

And Mrs

And Mrs

248

Handwritten text, possibly a signature or date, oriented vertically.



Handwritten text, possibly a signature or date, oriented vertically.

Small handwritten mark or signature.



T I O M N A D H N U A D H

AR

TIGHEARN AGUS AR SLANUIGHIR

I O S A C R I O S D,

A I R A T H A R R U I N G

O 'N G H R E U G A I S

C H U M G A E L I C A L B A N N A I C H ;

A G U S

A I R A C H U R A M A C H L E H - U G H D A R R A S A R D - S H E A N -
A I D H E A G L A I S N A H - A L B A .




EDINBURGH:

PRINTED BY ANDERSON AND BRYCE ;

FOR THE EDINBURGH BIBLE SOCIETY ;

BY PERMISSION, FROM THE QUARTO EDITION OF THE SOCIETY IN
SCOTLAND EOR PROPAGATING CHRISTIAN KNOWLEDGE.

1838.



AN SOISGEUL

A REIR

M H A T A.

CAIB. I.

LEABHAR ginealaich Iosa
Criosd, mhic Dhaibhidh,
mhic Abrahaim.

2 Ghin Abraham Isaac, agus
ghin Isaac Iacob, agus ghin Iac-
ob Iudas agus a bhràithrean.

3 Agus ghin Iudas Phares
agus Sara o Thamar, agus ghin
Phares Esrom, agus ghin Esrom
Aram.

4 Agus ghin Aram Aminadab,
agus ghin Aminadab Naason,
agus ghin Naason Salmon.

5 Agus ghin Salmon Boos o
Rachab, agus ghin Boos Obed o
Rut, agus ghin Obed Iese.

6 Agus ghin Iese Daibhidh
an rìgh, agus ghin Daibhidh an
rìgh Solomon o 'n mhnaoi a bha
aig Urias.

7 Agus ghin Solomon Roboam,
agus ghin Roboam Abia,
agus ghin Abia Asa.

8 Agus ghin Asa Iosaphat,
agus ghin Iosaphat Ioram, agus
ghin Ioram Osias.

9 Agus ghin Osias Ioatam,
agus ghin Ioatam Ahas, agus
ghin Ahas Esecias,

10 Agus ghin Esecias Manases,
agus ghin Manases Amon,
agus ghin Amon Iosias.

11 Agus ghin Iosias Iechonias
agus a bhràithre, mu àm an
giùlain do Bhabilon.

12 Agus an déigh an toirt do
Bhabilon, ghin Iechonias Sala-

tiel, agus ghin Salatiel Serobabel.

13 Agus ghin Serobabel Abiud,
agus ghin Abiud Eliacim, agus
ghin Eliacim Asor.

14 Agus ghin Asor Sadoc, agus
ghin Sadoc Achim, agus ghin
Achim Eliud.

15 Agus ghin Eliud Eleasar,
agus ghin Eleasar Matan, agus
ghin Matan Iacob.

16 Agus ghin Iacob Ioseph
fear Mhuire, o 'n d' rugadh Iosa,
d' an goirear Criosd.

17 Uime sin na h-uile ghinealaich o Abraham gu Daibhidh, is ceithir ginealaich deug iad; agus o Dhaibhidh gu bruid Bhabiloin, ceithir ginealaich deug; agus o bhruid Bhabiloin gu Criosd, ceithir ginealaich deug.

18 Agus mar so bha breith Iosa Criosd: oir an déigh do cheangal-pòsaidh bhiair a dhèanamh eadar amhàthair Muire agus Ioseph, roimh dhoibh teachd cuideachd, fhuaradh torrach i o 'n Spiorad Naomh.

19 Ach air bhi do Ioseph a fear 'na dhuine cothromach, agus gun toil aige ball-sampuill a dhèanamh dh'i, bu mhiann leis a cur uaith os ìosal.

20 Ach ag smuaineachadh nan nithe sin dha, feuch, dh'fhoillsich aingeal an Tighearn e féin da ann am brudar, ag ràdh, A Ioseph, a mhic Dhaibhidh, na

biodh eagal ort do bhean Muire a ghabhail a d'ionnsuidh: oir an ni a ta air a ghineamhuin innte, is ann o'n Spiorad Naomh e.

21 Agus beiridh i mac, agus bheir thu Iosa mar ainm air; oir saoraidh e a shlugh féin o'm peacaibh.

22 (Agus rinneadh so uile chum gu coimhliontadh an ni a thubhairt an Tighearna leis an fhàidh, ag ràdh,

23 Feuch, bithidh maighdean torrach, agus beiridh i mac, agus bheir iad Emanuel mar ainm air, is ionnan sin r'a ràdh, air eadar-theangachadh, Dia maille ruinn.)

24 Agus air mosgladh do Ioseph as a chodal, rinn e mar a dh'iarr aingeal an Tighearn air, agus ghabh e d'a ionnsuidh a bhean:

25 Agus cha d'aithnich e i gus an d'rug i a ceud-ghin mic; agus thug e Iosa mar ainm air.

CAIB. II.

AGUS an uair a rugadh Iosa ann am Betlehem Iudea, ann an làithibh Heroid an rìgh, feuch, thàinig druidhean o'n àird an ear gu Ierusalem,

2 Ag ràdh, C' àit am bheil rìgh sin nan Iudhach a ta air a bhreith? oir chunnaic sinne a reult san àird an ear, agus a ta sinn air teachd a thabhairt aoraidh dha.

3 An uair a chual Herod an rìgh sin, bha e fo thrioblaid, agus Ierusalem uile maille ris.

4 Agus air cruinneachadh nan àrd-shagart uile dha, agus sgrìobhaichean an t-sluaigh, dh'fhèoraich e dhiubh c' àit an robh Crìosd gu bhi air a bhreith.

5 Agus thubhairt iad ris, Ann am Betlehem Iudea: oir mar so sgrìobhadh leis an fhàidh,

6 Agus thusa Bhethlehem an tìr Iudah, cha tu idir a's lugha

am measg cheannard Iuda: oir asadsa thig Uachdaran a stiùras mo shlugh Israel.

7 An sin air do Herod na druidhean a ghairm os ìosal d'a ionnsuidh, gheur-fhiosraich e dhiubh cia an t-àm an d'fhoillsicheadh an reult.

8 Agus chuir e iad gu Betlehem, agus thubhairt e, Imichibh, agus iarraibh gu dìchiollach an naoidhean; agus an déigh dhuibh fhaotainn, innsibh dhomhsa e, chum gu racham-sa féin, agus gu dèanam aoradh dha.

9 Agus an uair a chual iad an rìgh, dh'imich iad; agus, feuch, chaidh an reult a chunnaic iad san àird an ear rompa, gus an d'thàinig i agus gu'n do stad i os ceann an ionaid an robh an naoidhean.

10 Agus an uair a chunnaic iad an reult, rinn iad gàirdeachas le h-aoibhneas ro-mhòr.

11 Agus air dol a steach dhoibh do'n tigh, fhuair iad an naoidhean maille r'a mhàthar Muire, agus thuit iad sìos, agus rinn iad aoradh dha: agus air fosgladh an ionmhas dhoibh, thug iad dha tìodhlacan; òr, agus tùis, agus mirr.

12 Agus air faotainn rabhaidh o *Dhia* ann am hruadar, gun iad a philltinn a dh'ionnsuidh Heroid, chaidh iad d'an dùthaich féin air slighe eile.

13 Agus an uair a dh'imich iad air an ais, feuch, nochdadh aingeal an Tighearna do Ioseph ann am hruadar, ag ràdh, Eirich, agus gabh an naoidhean agus a mhàthair, agus teich do'n Eiphit, agus bi an sin gus an labhair mise riut: oir iarraidh Herod an naoidhean g' a mhilleadh.

14 Agus dh'éiriche, agus ghabh e d'a ionnsuidh an naoidhean agus a mhàthair san oidhche, agus dh'imich e do'n Eiphit:

15 Agus bha e an sin gu bàs Heroid : a chum gu coimhliontadh an ni a labhair an Tighearna leis an fhàidh, ag ràdh, A mach as an Eiphit, ghoir mi mo Mhac.

16 An sin an uair a chunnaic Herod gu 'n d' rinn na druidhean fanoir air, las e le feirg ro-mhòir, agus chuir e *luchd-millidh* uaith, agus mharbh e na bha do leanabaihb mac am Betlehem, agus 'na crìochaibh uile, o aois dhà bhliadhna agus fuidh, a réir na h-aimsir a dh'fhòghluim e gu dìchiollach o na druidhibh.

17 An sin choimhlionadh an ni a labhradh le Ieremias am fàidh, ag ràdh,

18 Chualas guth ann an Rama, caoidh, agus gul, agus bròn ro-mhòr, Rachel a' caoineadh a cloinne, agus cha b' àill leatha sòlas a ghabhail, a chionn nach 'eil iad *bèd*.

19 Ach an uair a dh'eug Herod, feuch, nochdadh aingeal an Tighearn ann am bruidhear do Ioseph san Eiphit,

20 Ag ràdh, Eirich, agus gabh an naoidhean agus a mhàthair, agus imich gu talamh Israeil : oir fhuair an dream a bha 'g iarraidh anama an leinibh bàs.

21 Agus dh'éirich esan, agus ghabh e an leanabh agus a mhàthair d' a ionnsuidh, agus thàinig e gu talamh Israeil.

22 Ach an uair a chual e gu 'n robh Archelaus 'na rìgh an *tìr* Iudea an àit Heroid 'athar, bha eagal air dol an sin : ach, air faotainn da rabhaidh o *Dhia* ann am bruidhear, thionndaidh e gu crìochaibh Ghalile :

23 Agus thàinig e agus ghabh e còmhnuidh ann am baile d' an goirear Nasaret, a chum gu coimhliontadh an ni a labhradh leis na fàidhibh, Gu goirear Nasarach dheth.

CAIB. III.

AGUS anns na làithibh sin thàinig Eoin Baiste, a' searmonachadh am fàsach Iudea, 2 Agus ag ràdh, Gabhaibh aithreachas : oir a ta rioglachd nèimh am fogus.

3 Oir is e so an tì ud mu 'n do labhar Esaias am fàidh, ag ràdh, Guth an tì a ghlaodhas anns an fhàsach, Ulluichibh slighe an Tighearna, dèanaibh a cheumanna dìreach.

4 Agus bha a chulaidh aig Eoin do fhionna chàmhail, agus crios leathair aige timchioll a leasraidh ; agus is e bu bhiadh dha locuist agus mil fhiadhaich.

5 Chaidh Ierusalem a mach d' a ionnsuidh an sin agus Iudea uile, agus luchd-àiteachaidh na dùthcha timchioll Iordain uile.

6 Agus bhaisteadh iad leis-san ann an Iordan, ag aideachadh am peacanna.

7 Ach an uair a chunnaic e mòran do na Phairisich, agus do na Sadusaich a' teachd a chum a bhaistidh-san, thubhairt e riu, A shìol nan nathraiche nimhe, cò a thug rabhadh dhuibh-sa teich-eadh o'n fheirg a ta ri teachd ?

8 Air an aobhar sin thugaibh a mach toradh iomchuidh do 'n aithreachas.

9 Agus na smuainichibh a ràdh annaibh féin, A ta Abraham 'na athair againn : oir a ta mi ag ràdh ribh, gur comasach Dia air clann a thogail suas a dh'Abraham do na clochaibh sin.

10 Agus a nis a ta an tuadh air a cur ri freumh nan crann : air an aobhar sin, ge b' e crann nach toir a mach toradh' maith, gearrar e, agus tilgear san teine e.

11 Gu deimhin a ta mise 'gur baisteadh le h-uisge chum aithreachais ; ach an Tì a thig a' m' dhéigh, is cumhachdaiche e na

mi, agus cha 'n airidh mise air a bhrògan a ghiùlan: baistidh esan sibh leis an Spiorad Naomh, agus le teine:

12 Aig am bheil a ghuit 'na làimh, agus glanaidh e gu robhaileach 'ùrlar-bualaidh, agus cruinnichidh e a chruithneachd d' a thigh-tasgaidh; ach loisgidh e am moll le teine nach feudar a mhùchadh.

13 An sin thàinig Iosa o Ghalile gu Iordan a dh' ionnsuidh Eoin, chum gu 'm biodh e air a bhaisteadh leis.

14 Ach bhac Eoin e, ag ràdh, A ta feum agamsa bhi air mo bhaisteadh leatsa, agus am bheil thusa a' teachd am' ionnsuidh-sa?

15 Agus fhreagair Iosa agus thubhairt e ris, *Leig do 'n chùis a bhi mar so a nis*: oir mar so is iomchuidh dhuinn gach uile fhireantachd a choimhlionadh. An sin dh' fhulaing e dha.

16 Agus an uair a bhaisteadh Iosa, chaidh e air ball suas as an uisge; agus, feuch, dh' fhosgladh nèamh dha, agus chunnaic e Spiorad Dé a' tuirling mar choluman, agus a' teachd air-san:

17 Agus, feuch, guth o nèamh, ag ràdh, Is e so mo Mhac gràdhach, anns am bheil mo mhòr-thlachd.

CAIB. IV.

AN sin thredraicheadh Iosa leis an Spiorad do 'n fhàsach, chum gu 'm biodh e air a bhuairleadh leis an diabhl.

2 Agus an uair a thraisg e dà fhichead là agus dà fhichead oidhche, an deigh sin bha ocras air.

3 Agus air teachd do 'n bhuairleadair d' a ionnsuidh thubhairt e, ma 's tu Mac Dhé, thoir àithne do na clochaibh so a bhi 'nan aran.

4 Ach fhreagair esan agus thubhairt e, A ta e sgrìobhta, Cha 'n ann le h-aran a mhàin a bheathaichear duine, ach leis gach uile fhocal a thig o bheul Dé.

5 An sin thug an diabhl e do 'n bhaile naomh, agus chuir e air binnein an teampuill e,

6 Agus thubhairt e ris, Ma 's tu Mac Dhé, tilg thu féin sìos: oir a ta e sgrìobhta, gu toir e àithne d' a ainglibh mu d' thimchioll, agus togaidh iad suas thu 'nan làmhaibh, chum nach buail thu uair air bith do chos air cloich.

7 Thubhairt Iosa ris a ris, A ta e sgrìobhta, Cha bhuair thu an Tighearna do Dhia.

8 Thug an diabhl e a ris chum beinne ro àird, agus nochd e dha uile rìoghachdan an domhain, agus an glòir;

9 Agus thubhairt e ris, Iad so uile bheir mise dhuit, ma thuit-eas tu sìos agus ma ni thu aoradh dhomhsa.

10 An sin thubhairt Iosa ris, Imich uam, a Shatain: oir a ta e sgrìobhta, Bheir thu aoradh do 'n Tighearna do Dhia, agus dhasan 'na aonar ni thu seirbhis.

11 An sin dh'fhàg an diabhl e; agus, feuch, thàinig aingil agus fhrithheil iad da.

12 Ach an uair a chual Iosa gu 'n do chuireadh Eoin an làimh, dh' imich e do Ghalile.

13 Agus air fàgail Nasaret da, thàinig e agus ghabh e còmh-nuidh ann an Capernaum, a ta ri taobh na fairge, ann an leth-iomall Shabuloin agus Nephtalim:

14 A chum gu 'n coimhliontadh an ni a labhradh le Esaias am fàidh, ga ràdh,

15 Talamh Shabuloin, agus talamh Nephtalim, slighe na fairge air an taobh thall do Iordan, Galile nan Cinneach:

16 Am pobull a bha 'nan suidhe an dorchadas, chunnaic iad solus mòr; agus a ta solus air éirigh do na daoineibh a bha 'nan suidhe an tìr agus an sgàil a' bhàis.

17 O sin a mach thòisich Iosa air sermoin a dhèanamh, agus a ràdh, Gabhaibh aithreachas, oir a ta rìoghachd nèimh am fogus.

18 Agus ag imeachd do Iosa ri taobh fairge Ghalile, chunnaic e dithis bhràithre, Simon d' an goirear Peadar, agus Aindreas a bhràthair, a' tilgeadh lìn san fhairge: (oir b' iasgairean iad.)

19 Agus thubhairt e riu, Leanaibh mise, agus ni mi iasgairean air daoineibh dhibh.

20 Agus air ball dh' fhàg iad na lìonta, agus lean iad esan.

21 Agus air triall da as a sin, chunnaic e dithis eile bhràithre, Seumas *mac* Shebede, agus Eoin a bhràthair, ann an luing maille r' an athair Sebede, a' càradh an lìn: agus ghairm e iad.

22 Agus air ball dh' fhàg iad an long agus an athair, agus lean iad e.

23 Agus dh' imich Iosa timchioll Ghalile uile, a' teagasg 'nan sionagogaibh, agus a' searmonachadh soisgeil na rìoghachd, agus a' slànuchadh gach gnè thinnis, agus gach gnè eucail am measg an t-sluaigh.

24 Agus chaidh a chliù feadh Shiria uile: agus thug iad d' a ionnsuidh iadsan uile e bha euslan, agus a bha air an cuibhreachadh le galaraibh, agus iomadh gnè phiapta, agus iadsan aig an robh deamhain annta, agus air an robh an tuiteamas, agus luchd pairilis; agus shlànuich e iad.

25 Agus lean cuideachd mhòr e o Ghalile, agus o Dhecapolis,

agus o Ierusalem, agus o Iudea, agus o na crìochaibh a ta an taobh thall do Iordan.

CAIB. V.

A GUS an uair a chunnaic Iosa an sluagh, chaidh e suas air beinn; agus air suidhe dha, thàinig a dheisciobuil d' a ionnsuidh.

2 Agus dh' fhosgail e a bheul, agus theagaisg e iad, ag ràdh,

3 *Is* beannaichte iadsan a ta bochd, 'nan spiorad: oir is leo rìoghachd nèimh.

4 *Is* beannaichte iadsan a ta ri bròn: oir gheibh iad sòlas.

5 *Is* beannaichte na daoine macanta: oir sealbhaichidh iad an talamh mar oighreachd.

6 *Is* beannaichte an dream air am bheil ocras agus tart na còrach: oir sàsuichear iad.

7 *Is* beannaichte na daoine tròcaireach: oir gheibh iad tròc-air.

8 *Is* beannaichte na daoine a ta glan 'nan cridhe: oir chi iad Dia.

9 *Is* beannaichte luchd-dèanamh na sìthe: oir goirear clann Dé dhiubh.

10 *Is* beannaichte an dream a ta fulang geur-leanmhuinn air son na còrach: oir is leo-san rìoghachd nèimh.

11 *Is* beannaichte bhitheas sibh an uair a bheir daoine anacainnt dhuibh, agus a ni iad geur-leanmhuinn *oirbh*, agus a labhras iad gach uile dhroch fhocal ribh gu breugach, air mo sgath-sa.

12 Dèanaibh gàirdeachas, agus bithibh ro-shubhach; oir is mòr bhur duais air nèimh: oir mar sin rinn iad geur-leanmhuinn air na fàidhibh a bha roimhibh.

13 *Is* sibhse salann na talmhainn: gidheadh ma chailleas an

salann a bhlas, ciod leis an saill-ear e? cha'n 'eil feum ann o sin suas, ach a' thilgeadh mach, agus a shaltairt fo chosaibh dhaoine.

14 Is sibhse solus an t-saoghail. Cha'n fheudar baile a ta air a shuidheachadh air sliabh fholach.

15 Agus cha las daoine coinneal, chum gu'n cuir iad i fuidh shoitheach, ach ann an coinneleir, agus ni i solus do na bheil a stigh.

16 Gu ma h-ann mar sin a dhealraicheas bhur solus an làthair dhaoine, chum gu faiciad bhur deadh oibre, agus gu toir iad glòir do bhur n-athair a ta air nèamh.

17 Na measaibh gu'n d' thàinig mise a bhriseadh an lagha no nam fàidhean; cha'n ann a bhriseadh a thàinig mi, ach a choimhlionadh.

18 Oir a ta mi ag ràdh ribh gu firinneach, Gus an téid nèamh agus talamh thairis, cha téid aon lide no aon phunc do'n lagh thairis, gus an coimhlionar gach aon ni.

19 Air an aobhar sin ge b'e neach a bhriseas aon do na h-àitheantaibh so a's lugha, agus a theagaisgeas daoine mar sin, goirear an duine a's lugha dheth ann an rìoghachd nèimh: ach ge b'e neach a ni, agus a theagaisgeas iad, goirear duine mòr dheth ann an rìoghachd nèimh.

20 Oir a ta mi ag ràdh ribh, Mur toir bhur fireantachd-sa barrachd air fireantachd nan sgriobhaiche agus nam Phairis-each, nach téid sibh air chor air bith a steach do rìoghachd nèimh.

21 Chuala sibh, gu'n dubhradh ris na sinnsiribh, na dèan mortadh; agus ge b'e neach a ni mortadh, bithidh e an cunnart a' bhreitheanais.

22 Ach a ta mise ag ràdh

ribh, Ge b'e neach aig am bi fearg r'a bhràthair gun aobhar, gu'm bi e ann cunnart a' bhreitheanais: agus ge b'e neach a their r'a bhràthair, Raca, gu'm bi e an cunnart na comhairle: ach ge b'e neach a their, Amadain, gu'm bi e an cunnart teine ifrinn.

23 Uime sin ma bheir thu do thabhartas chum na h-altarach, agus gu'n cuimhnich thu an sin gu bheil ni air bith aig do bhràthair a' d' aghaidh;

24 Fàg do thabhartas an sin an làthair na h-altarach, agus imich, agus dèan réite air tùs ri d' bhràthair, agus an déigh sin thig agus tabhair uait do thiodhlac.

25 Bi réidh ri d' eascaraid gu luath, am feadh a bhios tu maille ris san t-slighe; air eagal gu'n toir an t-eascaraid thairis thu do'n bhreitheamh, agus gu'n toir am breitheamh thu do'n mhaor, agus gu tilgear an prìosan thu.

26 A ta mi ag ràdh riut gu firinneach nach téid thu mach as a sin, gus an ioc thu an fheoirling dheireannach.

27 Chuala sibh gu'n dubhradh ris na sinnsiribh, Na dèan adhaltrannas.

28 Ach a ta mise ag ràdh ribh, Ge b'e neach a dh'amhairceas air mnaoi chum a miannachadh, gu'n d' rinn e adhaltrannas leatha cheana 'na chridhe.

29 Agus ma bheir do shuil dheas aobhar tuislidh dhuit, spìon a mach i, agus tilg uait i: oir is feàrr dhuit gu sgriosar aon do d' bhallaibh, na do chorp uile bhi air a thilgeadh do ifrinn.

30 Agus ma bheir do làmh dheas oilbheum dhuit, gearr dhìot i, agus tilg uait i: oir is feàrr dhuit gu sgriosar aon do d'

bhallaibh, na do chorp uile bhi air a thilgeadh do ifrinn.

31 Agus a dubhradh, Ge b' e chuireas a bhean-phòsda air falbh, thugadh e litir-dhealaich dh' i.

32 Ach a ta mise ag ràdh ribh, Ge b' e neach a chuireas air falbh a bhean-phòsda féin, ach a mhàin air son strìopachais, gu bheil e toirt oirre adhaltrannas a dhèanamh: agus an tì a phòsas a' bhean sin a chuireadh air falbh, a ta e a' dèanamh adhaltrannais.

33 Mar an ceudna, chuala sibh gu 'n dubhradh ris na sinn-siribh, Na tabhair mionnan eith-eich, ach coimhlion do mhionnan do 'n Tighearna.

34 Ach a ta mise ag ràdh ribh, Na tugaibh mionnan idir: na *tugaibh* air nèamh, oir is e rìgh-chaithir Dhé e.

35 Na *tugaibh* air an talamh, oir is e stòl a chos e: na *tugaibh* air Ierusalem, oir is e baile an rìgh mhòir e.

36 Na tabhair mionnan air do cheann, oir cha 'n urrainn thu aon fhuiltean a dhèanamh gèal no dubh.

37 Ach gu ma h-e is còmh-radh dhuibh, Seadh, seadh: ni h-eadh, ni h-eadh; oir ge b' e ni a bhios os ceann so, is ann o 'n olc a ta e.

38 Chuala sibh gu 'n dubhradh, Sùil air son sùla, agus fiacail air son fiacila.

39 Ach a ta mise ag ràdh ribh, Na cuiribh an aghaidh an uilc: ach ge b' e neach a bhuaileas tu air do ghial deas, tionndaidh thuige an gial eile mar an ceudna.

40 Agus an tì le 'm b' àill thusa a thagradh san lagh, agus do chòta a bhuin diot, leig leis d' fhalluinn mar an ceudna.

41 Agus ge b' e bheir leis air

feadh mìle a dh' aindeoin thu, imich leis air feadh dhà mhìle.

42 Tabhair do 'n tì a dh' iarras ort; agus uaithsan le 'm bu mhiann iasachd fhaotainn uait, na pill air falbh.

43 Chuala sibh gu 'n dubhradh, Gràdhaichidh tu do choimhearsnach, agus bithidh fuath agad do d' nàmhaid.

44 Ach a ta mise ag ràdh ribh, Biodh gràdh agaibh do bhur naimhdeibh, beannaichibh an dream a mhallacheas sibh, dèanaibh maith do na daoinibh air am beag sibh, agus dèanaibh ùrnuigh air son na muinntir a ta buntuinn ribh gu naimhdeil, agus a ta 'gur geur-leanmhuinn:

45 A chum gu 'm bi sibh 'nur cloinn aig bhur n-Athair a ta air nèamh: oir a ta esan a' tabhairt air a ghréin féin éirigh air na droch dhaoineibh, agus air na deadh dhaoineibh, agus a' cur uisge air na fìreanaibh, agus air na neo-fhìreanaibh.

46 Oir ma bhios gràdh agaibh do 'n mhuinntir aig am bheil gràdh dhuibh, ciod an duais a gheibh sibh? nach 'eil eadhon na cìs-mhaoir a' dèanamh an ni ceudna?

47 Agus ma chuireas sibh fàilte air bhur bràithribh féin a mhàin, ciod a tha sibh a' dèanamh thar *chàch*? nach 'eil na cìs-mhaoir féin a' dèanamh an ni ceudna?

48 Air an aobhar sin bithibh-sa coimhlionta mar a ta bhur n-Athair a ta air nèamh coimhlionta.

CAIB. VI.

THUGAIBH an aire nach toir sibh bhur déirc am fianuis dhaoine, chum gu 'm faicear leo sibh; no cha 'n fhaigh sibh tuarasdal o bhur n-Athair a ta air nèamh.

2 Uime sin, an uair a bheir thu do dhéirc, na toir fa' near gall-tromp a shéideadh romhad, mar a ni na cealgairean, anns na sionagogaibh, agus anns na sràidibh, chum gu faigh iad glòir o dhaoinibh. Gu firinneach a ta mise ag ràdh ribh, gu bheil an tuarasdal aca.

3 Ach an uair a bheir thusa déirc, na biodh fios aig do làimh chli ciod a ta do làmh dheas a' dèanamh;

4 Chum gu'm bi do dhéirc an uaignidheas: agus bheir t' Athair a chi an uaignidheas, duais dhuitse gu follaiseach.

5 Agus an uair a ni thu ùrnuigh, na bi mar luchd an fhuar-chràbhaidh: oir is ionmhuinn leo ùrnuigh a dhèanamh anns na sionagogaibh, agus ann an coinneachadh nan sràid 'nan seasamh, chum gu faicear le daoineibh iad. Gu deimhin tha mise ag ràdh ribh, gu bheil an tuarasdal aca.

6 Ach thusa, an uair a ni thu ùrnuigh, imich a steach do d' sheòmar, agus air dùnadh do dhoruis duit, dèan ùrnuigh ri t' Athair a ta an uaignidheas, agus bheir t' Athair a chi an uaignidheas, duais dhuit gu follaiseach.

7 Ach an uair a ni sibh ùrnuigh na gnàthaichibh ath-iarrtais dhìomhain, mar na Cinnich: oir saoilidh iadsan gu 'n éisdear riu air son lionmhoireachd am fola.

8 Uime sin na bithibh-sa cosmhuil riu: oir a ta fios aig bhur n-Athair cia iad na nithe a ta dh'uireasbhuidh oirbh, mu'n iarr sibh air iad.

9 Air an aobhar sin dèanaibh-sa ùrnuigh air a' mhadh so: Ar n-athair a ta air nèamh, Gu naomhaichear t' ainm.

10 Thigeadh do rìoghachd.

Dèanar do thoil air an talamh, mar a *nithear* air nèamh.

11 Tabhair dhuinn an diugh ar n-aran lathail.

12 Agus maith dhuinn ar fiacha, amhuil mar a mhaith-eas sinne d' ar luchd-fiach.

13 Agus na leig am buaireadh sinn; ach saor sinn o olc: oir is leatsa an rìoghachd, agus an cumhachd, agus a' ghlòir, gu sìorruidh. Amen.

14 Oir ma mhaith-eas sibh an cionta do dhaoineibh, maithidh bhur n-Athair nèamhaidh dhuibh-sa mar an ceudna:

15 Ach mur maith sibh an cionta do dhaoineibh, cha mhò a mhaith-eas bhur n-Athair dhuibh-sa bhur cionta.

16 Agus an uair a ni sibh trasgadh, na bitheadh gruaim air bhur gnùis, mar luchd an fhuar-chràbhaidh: oir cuiridh iadsan mi-dhreach air an aghaidh chum gu faicear le daoineibh iad a bhi trasgadh. Tha mi ag ràdh ribh gu firinneach, gu bheil an tuarasdal aca.

17 Ach thusa, an uair a ni thu trasgadh, cuir oladh air do cheann, agus ionnail t' aghaidh:

18 Chum nach faicear le daoineibh gu bheil thu a' dèanamh trasgaidh, ach le t' Athair a ta an uaignidheas: agus bheir t' Athair a chi an uaignidheas, duais dhuit gu follaiseach.

19 Na taisgibh dhuibh féin ionmhais air an talamh, far an truail an leomann agus a mheirg e, agus far an cladhaich na meirlich a stigh agus an goid iad.

20 Ach taisgibh ionmhais dhuibh féin air nèamh, far nach truail an leomann no a' mheirg, agus nach cladhaich, agus nach goid na meirlich.

21 Oir ge b'e àit am bheil bhur n-ionmhas, is ann an sin

a bhios bhur cridhe mar an ceud-na.

22 Is i an t-sùil solusa' chuirp: uime sin ma bhios do shùil glan, bithidh do chorp uile làn soluis.

23 Ach ma bhios do shùil gu h-olc, bithidh do chorp uile dorcha. Air an aobhar sin ma tha an solus a ta annad 'na dhorchadas, cia mòr an dorchadas sin?

24 Cha 'n urrainn neach air bith seirbhis a dhèanamh do dhà Thighearn: oir an dara cuid bithidh fuath aige do neach aca, agus gràdh do neach eile; no gabhaidh e le neach aca, agus ni e tàir air neach eile. Cha 'n urrainn, sibh seirbhis a dhèanamh do Dhia agus do Mhamon.

25 Uime sin a ta mise ag ràdh ribh, Na biodh ro-chùram oirbh mu thimchioll bhur beatha, ciod a dh'itheas no dh'òlas sibh; no mu thimchioll bhur cuirp, ciod a chuireas sibh umaibh. Nach mò a' bheatha na 'm biadh, agus an corp na 'n t-eudach?

26 Amhaircibh air eunlaith an athair: oir cha chuir iad sìol, agus cha bhuain iad, agus cha chruinnich iad an saibhlibh: gidheadh a ta bhur n-Athair nèamhaidh-sa 'g am beathachadh. Nach feàrr sibhse gu mòr na iadsan?

27 Agus cò agaibh le mòr-chùram a dh'fheudas aon làmh-choille a chur r' a àirde féin?

28 Agus c'ar son a ta sibh ro-chùramach mu thimchioll bhur culaidh? fòghlumaibh cionnus a ta na lilighean a' fàs sa' mhachair; cha saothraich iad, agus cha snìomh iad.

29 Gidheadh a ta mise ag ràdh ribh, Nach robh Solamh féin 'na uile ghlòir, air eudachadh mar aon diubh so.

30 Air an aobhar sin, ma tha

Dia mar sin a' sgeadachadh feoir na macharach, a ta an diugh ann, agus am màireach air a thilgeadh san àmhuinn, nach mò na sin a sgeadaicheas e sibhse, a dhaoine air bheag creidimh?

31 Uime sin na bithibh làn do chùram, ag ràdh, Ciod a dh'itheas sinn? no ciod a dh'òlas sinn? no ciod a chuireas sinn umainn?

32 (Oir iad so uile iarraidh na Cinnich;) oir a ta fios aig bhur n-Athair nèamhaidh gu bheil feum agaibh-sa air na nithibh so uile.

33 Ach iarraibh air tùs rioghachd Dhé, agus fhìreantachd-san, agus cuirear na nithe so uile ribh.

34 Uime sin na bitheadh ro-chùram oirbh mu thimchioll an là màireach: oir bithidh a làn do chùram air an là màireach mu thimchioll a nithe féin: is leòr do 'n là 'olc féin.

CAIB. VII.

NA tugaibh breth, chum nach toirear breth oirbh:

2 Oir a réir na breth a bheir sibh, bheirear breth oirbh: agus leis an tomhas le 'n tomhais sibh, tomhaisear dhuibh a rìs.

3 Agus c'ar son a ta thu a' faicinn an smùirnein a ta an sùil do bhràthar, ach nach 'eil thu toirt fa'near an t-sail a ta ann do shùil féin?

4 No cionnus a their thu ri d' bhràthair, Fulaing dhomh an smùirnein a spìonadh as do shùil; agus, feuch, an t-sail ann do shùil féin?

5 A chealgair, buin air tùs an t-sail as do shùil féin; agus an sin is léir dhuit gu maith an smùirnein a bhuntuinn á sùil do bhràthar.

6 Na toiribh an ni naomh do na madraibh, agus na tilgibh bhur nèamhnuidean am fianuis nam

muc, air eagal gu saltair iad orra le 'n cosaibh, agus air pilltinn doibh gu reub iad sibh féin as a chéile.

7 Iarraibh, agus bheirear dhuibh: siribh, agus gheibh sibh: buailibh *an dorus*, agus fosgailear dhuibh:

8 Oir gach uile neach a dh' iarras, glacaidh e: agus ge b' e a shireas, gheibh e: agus do 'n ti a bhuaileas *an dorus*, fosgailear.

9 Oir cò an duine agaibh-sa ma 's e 's gu 'n iarr a mhac aran, a bheir cloch dha?

10 Agus ma 's iasg a dh' iarras e, an tabhair e nathair dha?

11 Air an aobhar sin ma 's aithne dhuibh-sa a ta ole, tiodh-lacan maith a thabhairt do bhur cloinn, nach mò na sin a bheir bhur n-Athair a ta air nèamh nithe maithe dhoibhsan a dh' iarras air iad?

12 Uime sin gach uile ni bu mhiann leibh daoine a dhèanamh dhuibh-sa, dèanaibh-sa a leithid dhoibhsan mar an ceudna: oir is e so an lagh agus na fàidhean.

13 Imichibh a steach air an dorus chumhann; oir is farsuinn an dorus, agus is leathan an t-slighe a ta treòrachadh chum sgrios, agus is lionmhor iad a ta dol a steach oirre:

14 Ach is cumhann an dorus, agus is aimhleathan an t-slighe a ta treòrachadh chum na beatha, agus is tearc iad a ta 'g amas oirre.

15 Coimhidibh sibh féin o na fàidhibh bréige, a thig d' ur n-ionnsuidh ann an culaidhibh chaorach, ach a ta o 'n leth a stigh 'nam madaibh-alluidh.

16 Air an toraibh aithnichidh sibh iad: an tionail daoine dearcana-fiona do dhrisibh, no figean do na foghannanaibh?

17 Agus mar sin bheir gach

uile chrann maith toradh maith: ach bheir an droch chrann droch thoradh.

18 Cha 'n fheud a' chraobh mhaith droch thoradh a ghiùlan, no an droch chraobh toradh maith a thabhairt.

19 Gach uile chrann nach giùlain toradh maith, gearrar sìos e, agus tilgear san teine e.

20 Air an aobhar sin is ann air an toraibh a dh' aithnicheas sibh iad.

21 Cha 'n e gach uile neach a their riumsa, A Thighearn, a Thighearn, a théid a steach do rioghachd nèimh; ach an ti a ni toil m' Athar-sa a ta air nèamh.

22 Is iomadh iad a their riumsa san là ud, A Thighearn, a Thighearn, nach d' rinn sinn fàidheadaireachd a' t' ainm-sa? agus a' t' ainm-sa nach do thilg sinn a mach deamhain? agus a' t' ainm-sa nach d' rinn sinn iomadh miorbhuile?

23 Agus an sin aidichidh mise gu follaiseach dhoibh, Cha b' aithne dhomh riamh sibh: imichibh uam, a luchd-dèanamh na h-eucorach.

24 Air an aobhar sin, gach uile neach a chluinneas na briathra so agamsa, agus a ni iad, samhluichidh mi e ri duine glic, a thog a thigh air carraig:

25 Agus thuirling an t-uisge, agus thàinig na tuiltean, agus shéid na gaothan, agus bhual iad air an tigh sin: agus cha do thuite e, oir bha a bhunadh suidhichte air carraig.

26 Agus gach uile neach a chluinneas na briathra so agamsa, agus nach coimhlioniad, samhluichear e ri duine amaideach a thog a thigh air a' ghaineamh:

27 Agus thuirling an t-uisge, agus thàinig na tuiltean, agus shéid na gaothan, agus bhual

iad air an tigh sin: agus thuit e; agus bu mhòr a thuiteam.

28 Agus thàrladh an uair a chriochnaich Iosa na briathra so, gu'n do ghabh am pobull iongantas r'a theagasg-san:

29 Oir theagaisg e iad mar neach aig an robh cumhachd, agus cha'n ann mar na sgrìobhaichean.

CAIB. VIII.

A GUS air teachd a nuas o'n bheinn dha, lean cuideachd mhòr e.

2 Agus, feuch, thàinig lobhar, agus rinn e aoradh dha, ag ràdh, A Thighearna, ma's àill leat, is comasach thu air mise a ghlanadh.

3 Agus shìn Iosa mach a làmh, agus bhean e ris, ag ràdh, Is àill leam; bi thusa glan. Agus air ball bha a luibhre air a glanadh.

4 Agus thubhairt Iosa ris, Feuch nach innis thu do dhuine sam bith, ach imich, taisbein thu féin do'n t-sagart, agus thoir d'a ionnsuidh an tiodhlac a dh'àithn Maois, mar fhianuis dhoibh.

5 Agus air dol do Iosa a steach do Chapernaum, thàinig d'a ionnsuidh Caipitin-ceud, a' guidhe air,

6 Agus ag ràdh, a Thighearna, tha m'òglach 'na luidhe a stigh am pairilis, agus air a phianadh gu h-anabarrach.

7 Agus thubhairt Iosa ris, Théid mise, agus slànuichidh mi e.

8 Agus air freagairt do'n Chaipitin-ceud, thubhairt e, A Thighearna, cha'n araidh mise air thusa a theachd a steach fo m'òchleith: ach a mhàin abair am focal, agus slànuichear m'òglach.

9 Oir is duine mise féin a ta uidh ùghdarras, aig am bheil

saighdeara fodham: agus their mi ris an fhear so, Imich, agus imichidh e: agus ris an fhear so eile, Thig, agus thig e: agus ri m' sheirbhiseach, Dèan so, agus ni se e.

10 'Nuair a chual Iosa so, ghabh e iongantas, agus thubhairt e ris a' mhuinntir a lean e, Gu firinneach a ta mi ag ràdh ribh, ann an Israel féin nach d'fhuair mi creidimh comòr as so.

11 Agus a ta mi ag ràdh ribh, gu'n tig mòran o'n àird an ear, agus o'n àird an iar, agus gu'n suidh iad maille ri Abraham, agus Isaac, agus Iacob, ann an rìoghachd nèimh:

12 Ach gu'n tilgear clann na rìoghachd ann an dorchadas a ta 'n leth a muigh; bithidh an sin gul agus giosgan fhiacal.

13 Agus thubhairt Iosa ris a' Chaipitin-ceud, Imich romhad, agus biodh dhuit a réir mar a chreid thu. Agus shlànuicheadh 'òglach air an uair sin féin.

14 Agus an uair a thàinig Iosa gu tigh Pheadair, chunnaic e màthair a mhnà 'na luidhe, agus i ann am fiabhrus.

15 Agus bhean e r'a làimh, agus dh'fhàg am fiabhrus i: agus dh'éirich i, agus rinn i frithealadh dha.

16 Agus an uair a bha am feasgar air teachd, thug iad d'a ionnsuidh mòran anns an robh deamhain; agus thilg e na spioraid a mach le 'fhocal, agus shlànuich e iad uile a bha euslan:

17 A chum gu'n coimhlionadh an ni a labhradh le Esaias am fàidh, ag ràdh, Ghabh esan ar n-anmhuinneachdan air féin, agus ghiùlain e ar n-euslaintean.

18 Agus an uair a chunnaic Iosa sluagh mòr m'a thimchioll, dh'àithn e dol á sin do 'n taobh eile.

19 Agus thàinig sgrìobhaiche

àraidh, agus thubhairt e ris, A mhaighstir, leanaidh mise thu, ge b'e taobh a théid thu.

20 Agus thubhairt Iosa ris, Tha tuill aig na sionnaich, agus nid aig eunlaith an athair; ach cha'n 'eil aig Mac an duine ionad anns an cuir e a cheann fuidh.

21 Agus thubhairt fear eile d'a dheisciobluibh ris, A Thigh-earna, leig dhomh-sa imeachd air tús agus m' athair adhlacadh.

22 Ach thubhairt Iosa ris, Lean mise, agus leig leis na mairbh am mairbh féin adhlacadh.

23 Agus air dol dhasan a steach do luing, lean a dheisciobuil e.

24 Agus, feuch, dh'éirich doinn mhòr air an fhairge, ionnus gu'n d'fholaich na tuinn an long: ach bha esan 'na chodal.

25 Agus thàinig a dheisciobuil d'a ionnsuidh, agus dhùisg iad e, ag ràdh, A Thigh-earna, teasairg sinn: a ta sinn caillte.

26 Agus thubhairt e riu, C'ar son a ta sibh eagalach, sibhse air bheag creidimh? An sin dh'éirich e, agus chronuich e na gaothan agus an fhairge; agus bha ciùine mhòr ann.

27 Ach ghabh na daoine iongantais, ag ràdh, Ciod e ghnè dhuine so, gu bheil na gaotha féin agus an fhairge ùmhal dha?

28 Agus air teachd dha do'n taobh eile, gu tìr na Gergesen-each, thachair dithis dhaoine air, anns an robh deamhain, a' teachd a mach as na h-àitibh-adhlaic, agus iad ro-gharg, ionnus nach feudadh duine sam bith an t-slighe sin a ghabhail.

29 Agus, feuch, ghlaodh iad, ag ràdh, Ciod e ar gnothuch-ne riut, Iosa, a Mhic Dhé? An d'thàinig thu an so g'ar pianadh roimh an àm?

30 Agus bha treud mòr mhuc am fad uatha, ag ionaltradh.

31 Agus dh'iarr na deamhain a dh'athchuinge airsan, ag ràdh, Ma thilgeas tu mach sinn, leig dhuinn dol san treud mhuc ud.

32 Agus thubhairt e riu, Imichibh. Agus air dol a mach dhoibh, chaidh iad anns an treud mhuc: agus, feuch, ruith an treud mhuc uile gu dian sìos air ionad corrach, do'n chuan; agus chailleadh sna h-uisgeachaibh iad.

33 Agus theich na buachaill-ean, agus chaidh iad do'n bhaile, agus dh'innis iad na nithe so uile, agus na thachair dhoibhsan anns an robh na deamhain.

34 Agus, feuch, chaidh am baile uile a mach a choinneachadh Iosa; agus an uair a chunnaic iad e, ghuidh iad air imeachd as an crìochaibh-san.

CAIB. IX.

A GUS air dol an luing dha, chaidh e thar an uisge, agus thàinig e d'a bhaile féin.

2 Agus, feuch, thug iad d'a ionnsuidh duine air an robh am pairilis, 'na luidhe air leabaidh: agus an uair a chunnaic Iosa an creidimh, thubhairt e ri fear na pairilis, Biodh deadh mhisneach agad, a mhic, a ta do pheacanna air am maitheadh dhuit.

3 Agus, feuch, thubhairt dream àraidh do na sgrìobhaichibh annta féin, A ta am fear so a' labhairt toibheim.

4 Agus air do Iosa an smuaint-ean fhaicinn, thubhairt e, C'ar son a ta sibh a' smuaineachadh uile ann bhur cridheachaibh?

5 Oir cia is usadh a ràdh, A ta do pheacanna air am maitheadh dhuit? no a ràdh, Eirich agus imich?

6 Ach a chum gu'm bi fios agaibh gu bheil cumhachd aig Mac

an duine peacanna a mhaitheadh air an talamh, (thubhairt e an sin ri fear na pairilis,) Eirich, tog do leabaidh, agus imich do d' thigh.

7 Agus dh' éirich e, agus chaidh e d'a thigh féin.

8 Ach an uair a chunnaic am pobull so, ghabh iad iongantas, agus thug iad glòir do Dhia, a thug a leithid so a chumhachd do dhaoineibh.

9 Agus ag dol do Iosa as an àite sin, chunnaic e duine 'na shuidhe aig bòrd na cise, d'am b'ainm Mata; agus thubhairt e ris, Lean mise. Agus dh' éirich e, agus lean se e.

10 Agus thàrladh, air suidhe do Iosa aig biadh san tigh, feuch thàinig mòran chis-mhaor agus pheacach, agus shuidh iad sìos maille ris-san agus r'a dheisciobluibh.

11 Agus an uair a chunnaic na Phairisich so, thubhairt iad r'a dheisciobluibh, C'ar son a dh'ith-eas bhur maighstir-sa maille ri cis-mhaoraibh agus ri peacach-aibh?

12 Ach an uair a chual Iosa so,, thubhairt e riu. Cha'n ainm aig a' mhuinntir a ta slàn a ta feum air an léigh ach aig a' mhuinntir a ta euslan.

13 Ach imichibh agus fògh-lumaibh ciod is ciall da so, Tròc-air is àill leam, agus cha'n iob-airt: oir cha d' thàinig mise a ghairm nam fireanach, ach nam peacach chum aithreachais.

14 An sin thàinig deisciobuil Eoin d'a ionnsuidh, ag ràdh, C'ar son a ta sinne agus na Phairisich a' trasgadh gu minic, ach ni 'm bheil do dheisciobuil-sa a' trasgadh?

15 Agus thubhairt Iosa riu, Am feud clann seòmair an fhir-nuadh-phòsda bhi brònach, am feadh a bhitheas am fear-nuadh-

pòsda maille riu? Ach thig na làithean anns an toirear am fear-nuadh-pòsda uatha, agus an sin ni iad trasgadh.

16 Cha chuir duine sam bith mìr do eudach nuadh air sean eudach: oir buinidh an ni a chuireadh g'a lìonadh suas as an eudach, agus nithear an reubadh ni's miosa.

17 Cha mhò a chuireas daoine fion nuadh ann an seann searr-agaibh: no brisear na searragan, agus doirtear am fion, agus caillear na searragan: ach cuiridh iad fion nuadh ann an searr-agaibh nuadha, agus bithidh iad araon slàn.

18 'Nuair a bha e a' labhairt nan nithe so riu, feuch, thàinig uachdaran àraidh, agus thug e aoradh dha, ag ràdh, Fhuair mo nighean bàs air ball: ach thig-sa agus cuir do làmh oirre, agus bithidh i beò.

19 Agus dh' éirich Iosa, agus lean e féin agus a dheisciobuil e.

20 (Agus, feuch, thàinig bean, air an robh dòrtadh fola rè dhà bhliadhna dheug, air a chùlaobh, agus bhean i ri iomall 'eudaich:

21 Oir thubhairt i innte féin, Ma bheanas mi ach ri 'eudach, bithidh mi slàn.

22 Ach air tionndadh do Iosa mu'n cuairt, chunnaic e i, agus thubhairt e, A nighean, biodh deadh mhisneach agad; shlànuich do chreidimh thu. Agus bha a' bhean slàn o'n uair sin.)

23 Agus an uair a thàinig Iosa gu tigh an uachdarain, agus a chunnaic e an luchd-ciùil, agus a' chuideachd a' dèamamh toirm bhròin,

24 Thubhairt e riu, Imichibh roimhibh oir cha'n 'eil an nigh-eanag marbh ach 'na codal. Agus rinn iad gàire fochaid ris.

35 Ach an uair a chuireadh a' chuideachd a mach, chaidh e a

steach, agus rug e air làimh oirre, agus dh'éirich an nighean-ag.

26 Agus chaidh iomradh sin a mach air feadh na tìre sin uile.

27 Agus an uair a dh'imich Iosa as a sin, lean dithis dhall e, ag éigheach, agus ag ràdh, A Mhic Dhaibhidh, dèan tròcair oirne.

28 Agus an uair a thàinig e steach do'n tigh, thàinig na doill d'a ionnsuidh: agus thubhairt Iosa riu, Am bheil sibh a' creidsinn gur comasach mise so a dhèanamh? Thubhairt iad ris, A ta, A Thighearn.

29 An sin bhean e r'an sùilibh, ag ràdh, Biodh e dhuibh a réir bhur creidimh.

30 Agus dh'fhosgladh an sùilean, agus bhagair Iosa gu geur iad, ag ràdh, Faicibh nach faigh neach air bith fios air so:

31 Ach an uair a dh'imich iad a mach, sgaoil iad a chliù air feadh na dùthcha sin uile.

32 Agus ag dol dhoibhsan a mach, feuch, thug iad d'a ionnsuidh duine balbh anns an robh deamhan.

33 Agus an déigh do'n deamhan a bhi air a thilgeadh a mach, labhair am balbhan: agus ghabh an sluagh iongantach, ag ràdh, Cha'n fhacas a leithid so ann an Israel riamh.

34 Ach thubhairt na Pharisich, Troimh phrionnsa nan deamhan a ta e a' tilgeadh a mach dheamhan.

35 Agus ghabh Iosa mu chuairt nan uile chaithrichean agus bhailtean, a' teagasg 'nan sionagogaibh, agus a' searmonachadh soisgeil na rìoghachd, agus a' slànuchadh gach uile euslaint agus eucail am measg a' phobuill.

36 Ach an uair a chunnaic e an sluagh, ghabh e truas diubh,

air son gu'n robh iad air fannachadh, agus air an sgapadh o chéile, mar chaoraich aig nach 'eil buachaill.

37 An sin thubhairt e r'a dheisciobluibh, Gu deimhin is mòr am fogharadh, ach is tearc an luchd-oibre.

38 Uime sin guidhibh-sa air Tighearn an fhogharaidh, luchd-oibre chur a mach chum fhogharaidh féin.

CAIB. X.

AGUS air gairm a dhà dheisciobul deug d'a ionnsuidh, thug e cumhachd dhoibh an aghaidh nan spiorad neòghlan, gu'n tilgeadh a mach, agus a shlànuachadh gach gnè euslaint, agus gach gnè eucail.

2 Agus is iad so ainmean an dà Abstol deug; an ceud *fhear*, Simon d'an goirear Peadar, agus Aindreas a bhràthair, Seumas mac Shebede, agus Eoin a bhràthair;

3 Philip agus Bartolomeu, Tomas, agus Mata an cìs-mhaor, Seumas mac Alpheuis, agus Lebeus d'an co-ainm Tadeus;

4 Simon an Canaanach, agus Iudas Iscariot, an neach fòs a bhrath esan.

5 Chuir Iosa an dà fhear dheug so a mach, a' tabhairt àithne dhoibh, ag ràdh, Na gabhaibh gu slighe nan Cinn-each, agus na rachaibh a steach do *aon* bhaile a bhuineas do na Samaraich:

6 Ach gu ma feàrr leibh dol a dh'ionnsuidh chaorach chailte tighe Israeil.

7 Agus air imeachd dhuibh, searmonaichibh, ag ràdh, A ta rìoghachd nèimh am fagus.

8 Leighisibh an dream a ta tinn, glanaibh na lobhair [dùisgibh na mairbh,] tilgibh a mach na deamhain: a nasgaidh

fhuair sibh, a nasgaidh thug-aibh uaibh.

9 Na solairibh òr, no airgiod, no umha ann bhur sporanaibh ;

10 No màla chum bhur turuis, no dà chòta, no brògan, no bat-aichean : (oir is airidh am fear-oibre air a lòn.)

11 Agus ge b'e air bith caithir no baile d'an téid sibh a steach, feòraichibh cò a ta 'na dheadh airidh innte ; agus fan-aibh an sin gus am fàg sibh an t-àite sin.

12 Agus 'nuair a thig sibh steach do thigh, beannaichibh dha.

13 Agus ma's airidh an tigh sin, thigeadh bhur sith air ; ach mur airidh, pilleadh bhur sith do bhur n-ionnsuidh féin a ris.

14 Agus ge b'e neach nach gabh ribh, agus nach éisd ri 'ur briathraibh ; air dol a mach as an tigh, no as a' bhaile sin dhuibh, crathaibh dhibh duslach bhur cos.

15 Gu deimhin tha mi ag ràdh ribh, gur so-iomchaire a bhitheas staid fearainn Shodoim agus Ghomorah an là a' bhreithean-ais, na staid a' bhaile sin.

16 Feuch, cuiream-sa sibhse mach mar chaoraich am measg mhadadh-alluidh : air an aobhar sin bithibh-sa glic mar na nath-raiche, agus neo-chronail mar na columain.

17 Ach bithibh air bhur faicill o dhaoinibh ; oir bheir iad an làimh sibh do chomhairlibh, agus sgiùrsaidh iad sibh 'nan sion-gogaibh :

18 Agus bheirear sibh an làth-air uachdaran agus righrean air mo sgàth-sa, mar fhianuis dhoibh-san agus do na Cinnich.

19 Ach an uair a bheir iad an làimh sibh, na biodh e 'na ro-chàs oirbh cionnus no ciod a labhras sibh ; oir bheirear dhuibh

san uair sin féin an ni a labhras sibh.

20 Oir cha sibhse a labhras, ach Spiorad bhur n-Athar féin a labhras annaibh.

21 Agus bheir am bràthair a bhràthair féin suas chum bàis, agus an t-athair am mac ; agus éiridh a' chlann an aghaidh am pàrantan, agus bheir iad fa'near gu cuirear gu bàs iad.

22 Agus bithidh fuath aig na h-uile dhaoinibh dhuibh air son m'ainme-sa : ach ge b'e bhuan-aicheas gus a' chrìoch, is e so a thèarnar.

23 Agus an uair a ni iad geur-leanmhuinn oirbh sa' bhaile so, teichibh gu baile eile ; oir gu deimhin tha mi ag ràdh ribh, Nach imich sibh air feadh bhailtean Israeil mu'n tig Mac an duine.

24 Cha'n 'eil an deisciobul os ceann a mhaighstir, no an seirbhiseach os ceann a thighearna.

25 Is leòr do'n deisciobul a bhi mar a mhaighstir, agus do'n t-seirbhiseach a bhi mar a thighearn : ma ghoir iad Beelsebub do fhear an tighe, nach mò na sin a ghoireus iad e d'a mhuinntir ?

26 Uime sin na biodh eagal oirbh rompa : oir cha'n 'eil ni sam bith folaichte, nach foillsich-e ; agus an ceilt, nach aith-nichear.

27 An ni a dh'innseas mise dhuibh san dorchadas, labhraibh e san t-solus ; agus an ni a chluinneas sibh sa' chluais, searmonaichibh e air mullach nan tighean.

28 Agus na biodh eagal na muinntir sin oirbh a mharbhas an corp, ach aig nach 'eil comas an t-anam a mharbhadh : ach gu ma mò bhitheas eagal an Tì sin oirbh, a's urrainn an corp agus an t-anam a mhilleadh araon an ifrinn.

29 Nach 'eil dà ghealbhonn air an reiceadh air fheoirling? agus cha tuit a h-aon diubh air an talamh as eugmhais *freasdail* bhur n-Athar-sa.

30 Ach a ta eadhon fuilteine bhur cinn uile air an àireamh.

31 Air an aobhar sin na biodh eagal oirbh, is feàrr sibhse na mòran ghealbhonn.

32 Uime sin ge b'e dh'aidich-eas mise am fianuis dhaoine, aidichidh mise esan mar an ceud-na am fianuis m' Athar a ta air nèamh.

33 Ach ge b'e dh'àicheadhas mise am fianuis dhaoine, àicheadhaidh mise esan am fianuis m' Athar a ta air nèamh.

34 Na measaibh gu'n d'thàinig mise a chur sìthe air an talamh: cha'n ann a chur sìthe a thàinig mi, ach a chur claidheimh;

35 Oir thàinig mi a chur duine an aghaidh 'athar, agus na nighinn an aghaidh a màthar, agus bean a' mbic an aghaidh a màthar-chéile.

36 Agus is iad muinntir a theaghlach féin a *bhitheas* 'nan naimhdebh do dhuine.

37 An tì a ghràdhaicheas ath-air no màthair nì's mò na mise, cha'n airidh orm e: agus an tì a ghràdhaicheas mac no nighean os mo cheann-sa, cha'n airidh orm e:

38 Agus an tì nach glac a chrann-ceusaidh, agus nach lean mise, cha'n airidh orm e.

39 An tì a gheibh 'anam, caillidh se e: ach an tì a chailleas 'anam air mo shonsa, gheibh se e.

40 An tì a ghabhas ribhse, gabhaidh e riumsa; agus an tì a ghabhas riumsa, gabhaidh e ris an Tì a chuir uaith mi.

41 An tì a ghabhas ri fàidh an ainm fàidh, gheibh e duais fàidh; agus an tì a ghabhas ri firean

an ainm firein, gheibh e duais firein.

42 Agus ge b'e bheir cupan a dh'uisge fuar a mhàin r'a òl do aon neach do na daoineibh beaga so, an ainm deisciobuil, gu deimhin tha mi ag ràdh ribh, nach caill e air chor sam bith a dhuais.

CAIB. XI.

A GUS thàrladh, an uair a chrìochnaich Iosa àith-eantan a thabhairt d'a dhà dheisciobul deug, gu'n d'imich e as a sin a theagasg agus a shearmonachadh 'nam bailtibh.

2 A nis an uair a chual Eoin sa' phrìosan gnìomhara Chrìosd, chuir e dithis d'a dheisciobluibh d'a ionnsuidh.

3 Agus thubhairt e ris, An tusa an Tì ud a bha ri teachd, no am bi sùil againn ri neach eile?

4 Fhreagair Iosa agus thubhairt e riu, Imichibh agus innsibh do Eoin na nithe a ta sibh a' cluinntinn agus a' faicinn:

5 A ta na doill a' faotainn an radhairc, agus na bacaich ag imeachd, a ta na lobhair air an glanadh, agus na bothair a' cluinntinn, a ta na mairbh air an dùsgadh, agus an soisgeul air a shearmonachadh do na bochdaibh.

6 Agus is beannaichte an tì nach faigh oilbheum annam-sa.

7 Agus air imeachd dhoibhsan air falbh, thòisich Iosa air labhairt ris an t-sluagh mu thimchioll Eoin, ag ràdh, Ciod e an nì a chaidh sibh a mach do'n fhàsach a dh'fhaicinn? an i cuile air a crathadh le gaoith?

8 Ach ciod e an nì a chaidh sibh a mach a dh'fhaicinn? an e duine air a sgeadachadh ann an eudach min? feuch, a' mhuinntir a chaitheas eudach

mìn, is ann an tighibh nan rìgh-rean a ta iad.

9 Ach ciod e an ni a chaidh sibh a mach a dh'fhaicinn? An e fàidh? seadh, tha mi ag ràdh ribh, agus ni's mò na fàidh.

10 Oir is e so an tì mu'm bheil e sgriobhta, Feuch, cuiream-sa mo theachdair roimh do ghnùis, a dh'ulluicheas do shlighe romhad.

11 Gu deimhin tha mi ag ràdh ribh, 'nam measg-san a rugadh le mnaibh, nach d'éirich neach a's mò na Eoin Baiste: gidheadh, an tì sin a's lugha an rìoghachd nèimh, is mò e na esan.

12 Agus o làithibh Eoin Baiste gus a nis, a ta rìoghachd nèimh a' fulang ainneirt, agus luchd na h-ainneirt 'ga glacadh le làmh-achas-làidir.

13 Oir rinn na fàidhean uile agus an lagh fàidheadaireachd gu àm Eoin.

14 Agus ma's toil leibh a ghabhail, is e so Elias a bha ri teachd.

15 Ge b'e aig am bheil cluas-an chum éisdeachd, éisdeadh e.

16 Ach cò ris a shamhluch-eas mise an ginealach so? Is cosmhuil e ri cloinn a shuidheas anns a' mhargadh, agus ag éigh-each r'an companaich,

17 Agus ag ràdh, Rinn sinne pìobaireachd dhuibhse, ach cha d'rinn sibhse dannsa: rinn sinne tuireadh dhuibhse, ach cha d'rinn sibhse gul.

18 Oir thàinig Eoin cha'n ann ag itheadh no ag òl, agus tha iad ag ràdh, A ta deamhan aige.

19 Thàinig Mac an duine ag itheadh agus ag òl, agus tha iad ag ràdh, Feuch, duine geòcach agus pòiteir fiona, caraid chis-mhaor agus pheacach: ach a ta gliocas air a fireanachadh le a cloinn.

20 An sin thòisich e air ach-

mhasan a thabhairt do na bailt-ibh anns am mò a rinneadh d'a oibribh cumhachdach, air son nach d'rinn iad aithreachas.

21 Is an-aoibhinn duit, a Chorasin; is an-aoibhinn duit, a Bhetsaida: oir nam biodh na h-oibre cumhachdach a rinneadh annaibh-sa, air an dèanamh ann an Tirus agus ann an Sidon, is fada o'n a dhèanadh iad aithreachas ann an saic-eudach agus an luaith.

22 Ach tha mi ag ràdh ribh, Gu'm bi staid Thirus agus Shidoin ni's so-iomchaire ann an là a' bhreitheanais, na bhitheas bhur staid-sa.

23 Agus thusa, a Chapernaum, a ta air do thogail suas gu nèamh, tilgear sìos gu h-ifrinn thu: oir nam biodh na h-oibre cumhachdach a rinneadh annad-sa, air an dèanamh ann an Sodom, dh'fhanadh e *gun a sgrìos* gus an diugh.

24 Ach tha mi ag ràdh ribh, gur so-iomchaire a bhitheas e do fhearann Shodoim ann an là a' bhreitheanais, na dhuitse.

25 Anns an àm sin fhreag-air Iosa agus thubhairt e, Tha mi a' toirt buidheachais dhuit, O Athair, Thighearna nèimh agus na talmhainn, air son gu d'fholuich thu na nithe so o dhaoibh eagnuidh agus tuigs-each, agus gu d'fhoillsich thu iad do leanabaibh.

26 Seadh, Athair, do bhrìgh gu'm b'ann mar sin a bha do dheadh thoil-sa.

27 A ta na h-uile nithe air an tabhairt thairis dhomhsa o m'Athair: agus cha'n aithne do neach air bith am Mac, ach do'n Athair: ni mò is aithne do neach air bith an t-Athair, ach do'n Mhac, agus do gach aon d'an àill leis a' Mhac fhoillseachadh.

28 Thigibh a m' ionnsuidh-sa, sibhse uile a ta ri saothair, agus fuidh throm uallaich, agus bheir mise suaimhneas dhuibh.

29 Gabhaibh mo chuing oirbh, agus fòghlumaibh uam, oir a ta mise macanta agus iriosal an cridhe : agus gheibh sibh fois do bhur n-anamaibh.

30 Oir a ta mo chuing-sa so-iomchair, agus a ta m' uallach eutrom.

CAIB. XII.

CHAIDH Iosa san àm sin air là na sàbaid troimh na h-achaibh arbhair, agus bha ocras air a dheisciobuil, agus thòisich iad air diasan arbhair a bhuaibh, agus itheadh.

2 Ach an uair a chunnaic na Phairisich so, thubhairt iad ris, Feuch, a ta do dheisciobuil a' dèanamh an ni nach còir a dhèanamh air là na sàbaid.

3 Agus thubhairt esan riu, Nach do leugh sibh ciod a rinn Daibhidh an uair a bha ocras air féin, agus air a' mhuinntir a bha maille ris ;

4 Cionnus a chaidh e steach do thigh Dhé, agus a dh'ith e aran na fianuis, nach robh ceaduichte dha féin itheadh, no dhoibhsan a bha maille ris, ach do na sagartaibh a mhàin ?

5 No nach do leugh sibh san lagh, gu bheil na sagairt anns an teampull air làithibh na sàbaid a' briseadh na sàbaid, agus iad neòchiontach ?

8 Ach a ta mise ag ràdh ribh, gu bheil san ionad so neach a's mò na'n teampull.

7 Agus nam biodh fhios agaibh ciod is ciall da so, Tròcair is àill leam agus cha'n iobairt, cha dìteadh sibh an dream a ta neòchiontach.

8 Oir is e Mac an duine Tigh-earna na sàbaid.

9 Agus air dha imeachd as a sin, chaidh e steach d'an sionag-og ;

10 Agus, feuch, bha duine ann, aig an robh làmh sheargta : agus dh'fheòraich iad dheth, ag ràdh, Am bheil e ceaduichte leigheas a dhèanamh air làithibh na sàbaid ? chum gu'm biodh cùis dhìtidh aca 'na aghaidh.

11 Agus thubhairt esan riu, Cò agaibh-san an duine, aig am bi aon chaora, agus ma thuiteas i ann an slochd air là na sàbaid, nach beir e oirre, agus nach tog e nìos i ?

12 Nach mòr ma ta is feàrr duine na caora ? Uime sin a ta e ceaduichte maith a dhèanamh air làithibh na sàbaid.

13 An sin thubhairt e ris an duine, Sin a mach do làmh : agus shìn e mach i ; agus bha i air a h-aiseag slàn, mar an làmh eile.

14 Ach chaidh na Phairisich a mach, agus chum iad comhairle 'na aghaidh, cionnus a dh'fheudadh iad a mhilleadh.

15 Ach an uair a thuig Iosa so, dh'imich e as a sin : agus lean slòigh mhòr e, agus leighis e iad uile.

16 Agus thug e sparradh dhoibh chum nach dèanadh iad aithnuichte e :

17 A chum gu coimhliontadh an ni a labhradh le Esaias am fàidh, ag ràdh,

18 Feuch, mo sheirbhiseach féin a thagh mi ; m' aon ghràdh-ach anns am bheil tlachd aig m'anam : cuiridh mi mo Spiorad féin air, agus nochdaidh e breitheanas do na Cinnich.

19 Cha dèan e strì, agus cha ghlaodh e ; ni mò a chluinneas neach air bith a ghuth air na sràidibh.

20 Cha bhris e a' chuile bhrùite, agus cha mhùch e an lion as am bi deatach, gus an

tabhair e mach breitheanas chum buaidh.

21 Agus is ann a ainm-san a bhitheas muinighinn aig na Cinnich.

22 An sin thugadh d' a ionnsuidh duine anns an robh deamhan, dall, agus balbh : agus shlànuich se e, ionnus gu 'n do labhair am balbhan agus gu 'n robh an dall a' faicinn.

23 Agus ghabh am pobull uile iongantais, agus thubhairt iad, An e so Mac Dhaibhidh ?

24 Ach an uair a chuala na Phairisich so, thubhairt iad, Cha 'n 'eil am fear so a' tilgeadh a mach dheamhan, ach troimh Bheelsebub prionnsa nan deamhan.

25 Agus thuig Iosa an smuaintean, agus thubhairt e riu, Gach rìoghachd a ta roinnte 'na h-aghaidh féin, nithear 'na fàsach i ; agus gach uile bhaile no tigh a ta roinnte 'na aghaidh féin, cha seas e.

26 Agus ma thilgeas Satan a mach Satan, a ta e roinnte 'na aghaidh féin ; air an aobhar sin cionnus a sheasas a rìoghachd ?

27 Agus ma tha mise troimh Bheelsebub a' tilgeadh a mach dheamhan, troimh cò am bheil bhur clann-sa 'gan tilgeadh a mach ? Uime sin bithidh iad 'nam breitheamhnaibh oirbh :

28 Ach ma 's ann le Spiorad Dhé a ta mise a' tilgeadh a mach dheamhan, thàinig rìoghachd Dhé do bhur n-ionnsuidh-sa.

29 No cionnus is urrainn neach dol do thigh duine làidir, agus airneis a thighe a chreachadh, mur ceangail e air tùs an duine làidir ? agus an sin creachaidh e a thigh.

30 An tì nach 'eil leam, tha e a m' aghaidh ; agus an tì nach cruinnich leam, sgapaidh e.

31 Air an aobhar sin tha mi

ag ràdh ribh, Gu maithear gach peacadh agus gach toibheum do dhaoinibh : gidheadh chamhaith-ear toibheum an aghaidh an Spioraid Naoimh do dhaoinibh.

32 Agus ge b' e neach a labhras focal an aghaidh Mhic an duine, maithear dha e : ach ge b' e neach a labhras an aghaidh an Spioraid Naoimh, cha mhaithear dha e, anns an t-saoghal so, no anns an t-saoghal a ta ri teachd.

33 An dara cuid dèanaibh a' chraobh maith, agus a toradh maith ; no dèanaibh a' chraobh truailidh, agus a toradh truailidh : oir is ann air a toradh a dh' aithnichear a' chraobh.

34 A shliochd nan nathraiche nimhe, cionnus a dh' fheudas sibh nithe maithe a labhairt, o a ta sibh féin olc ? oir is ann á pailteas a' chridhe a labhras am beul.

35 Bheir duine maith a mach nithe maithe á deadh ionmhas a chridhe : agus bheir an droch dhuine mach droch nithe as a dhroch ionmhas.

36 Ach tha mi ag ràdh ribh, Gu 'n toir daoine cunntas ann an là a' bhreitheanais air son gach focail dhìomhain a labhras iad.

37 Oir is ann le d' fhoclaibh a shaorar thu, agus is ann le d' fhoclaibh a dhitear thu.

38 An sin fhreagair dream àraidh do na sgrìobhaichean agus do na Phairisich, ag ràdh, A mhaighstir, bu mhiann leinn comhara fhaicinn uait.

39 Ach fhreagair esan, agus thubhairt e riu, A ta ginealach olc agus adhaltrannach ag iarraidh comhara, agus cha toirear comhara dhoibh, ach comhar' an fhàidh Ionais.

40 Oir mar a bha Ionas am broinn na muice-mara trì làithean agus trì oidhchean ; is ann mar sin a bhitheas Mac an duine

ann an cridhe na talmhainn trì làithean agus trì oidhchean.

41 Eiridh muinntir Ninebheh sa' bhreitheanas maille ris a' ghinealach so, agus dìtidh iad e; oir rinn iad aithreachas aig sear-moin Ionais; agus, feuch, *a ta* ni's mò na Ionas an so.

42 Eiridh ban-righinn na h-àirde deas sa' bhreitheanas maille ris a' ghinealach so, agus dìtidh i e: oir thàinig i o na h-àitibh a's iomallaich do'n talamh a dh'-éisdeachd gliocais Sholaimh; agus, feuch, *a ta* ni's mò na Solamh an so.

43 An déigh do'n spiorad neòghlan dol a mach á duine, imichidh e troimh ionadaibh tiorma, ag iarraidh fois, agus cha'n fhaigh e.

44 An sin their e, Pillidh mi do m' thigh as an d' thàinig mi; agus air teachd dha, gheibh e falamh, sguabta, agus deadh-mhais-each e.

45 Imichidh e an sin, agus bheir e leis seachd spioraid eile a's miosa na e féin, agus théid iad a steach agus gabhaidh iad còmhnuidh an sin: agus bithidh staid dheireannach an duine sin ni's miosa na a thoiseach. Is ann eadhon mar sin a thachaireas do'n ghinealach aingidh so.

46 Agus air dha bhi fathast a' labhairt ris a' phobull, feuch, sheasa mhàthair agus a' bhràithrean a muigh, ag iarraidh labhairt ris.

47 An sin thubhairt neach éigin ris, Feuch, *a ta* do mhàthair, agus do bhràithrean 'nan seasamh a muigh, ag iarraidh labhairt riut.

48 Ach fhreagair esan agus thubhairt e ris an tì a dh'innis so dha, Cò i mo mhàthair? agus cò iad mo bhràithrean?

49 Agus air sìneadh a làimhe chum a dheisciobul, thubhairt e,

Feuch mo mhàthair, agus mo bhràithrean!

50 Oir ge b'e neach a ni toil m' Athar-sa a ta air nèamh, is e sin féin mo bhràthair, agus mo phiuthar, agus mo mhàthair.

CAIB. XIII.

AIR an là sin féin chaidh Iosa mach as an tigh, agus shuidh e ri taobh na fairge.

2 Agus chruinnich sluagh mòr d' a ionnsuidh, air chor as air dol a steach do luing dha, gu'n do shuidh e; agus sheas an sluagh uile air an tràigh.

3 Agus labhair e mòran do nithibh riu ann an cosamhlachdaibh, ag ràdh, Feuch, chaidh sìol-adair a mach a chur sìl.

4 Agus ag cur *an t-sìl* da, thuit cuid dheth ri taobh an rathaid; agus thàinig na h-eunlaith agus dh'ith iad e.

5 Thuit cuid air ionadaibh creagach, far nach robh mòran talmhainn aige; agus air ball dh'fhàs e suas, do bhrìgh nach robh doimhneachd talmhainn aige.

6 Ach air éirigh do'n ghréin dhothadh e; agus do bhrìgh nach robh freumh aige, shearg e as.

7 Agus thuit cuid am measg droighinn: agus dh'fhàs an droighionn suas, agus mhùch se e.

8 Ach thuit cuid eile am fear-ann maith, agus thug e toradh a mach, cuid a cheud uiread, cuid a thrì fichead, cuid a dheich thar fhichead uiread *'sa chuireadh*.

9 Ge b'e neach aig am bheil cluasa chum éisdeachd, éisdeadh e.

10 Agus thàinig na deisciobuil, agus thubhairt iad ris, C'ar son a ta thu a' labhairt riu ann an cosamhlachdaibh?

11 Fhreagair esan agus thubh-

airte riu, Do bhrìgh gu'n d' thugadh dhuibh-sa eòlas a bhi agaibh air rùn dìomhair rioghachd nèimh, ach dhoibhsan cha 'n 'eil so air a thoirt.

12 Oir ge b' e neach aig am bheil, dhasan bheirear, agus bithidh aige an tuilleadh pailt-eis: ach ge b' e neach aig nach 'eil, uaithsan bheirear eadhon an ni a ta aige.

13 Uime sin a ta mise a' labhairt riu ann an cosamhlachdaibh, do bhrìgh air dhoibh faicinn nach faic iad, agus a' cluinntinn nach cluinn iad, agus nach tuig iad.

14 Agus annta-san a ta fàidheadaireachd Esaiais air a coimhlionadh, a ta 'g ràdh, Le h-éisd-eachd cluinnidh sibh, agus cha tuig sibh; agus le h-amharc chi sibh, agus cha 'n aithnich sibh.

15 Oir a ta cridhe a' phobuill so air fàs reamhar, agus an cluasan mall chum éisdeachd, agus dhruid iad an sùilean; air eagal uair air bith gu'm faiceadh iad le'n sùilibh, agus gu'n cluinn-eadh iad le'n clusaibh, agus gu'n tuigeadh iad le'n cridhe, agus gu'm biodh iad air an iompachadh, agus gu'n slànuichinn-sa iad.

16 Ach is beannaichte bhur sùilean-sa, oir a ta iad a' faicinn; agus bhur cluasan, oir a ta iad a' cluinntinn.

17 Oir tha mi ag ràdh ribh gu fireannach, Gu'm b' iomadh fàidh, agus firean leis am bu mhiann na nithe so fhaicinn a ta sibhse a' faicinn, agus nach fac siad iad: agus na nithe so chluinntinn a ta sibhse a' cluinntinn, agus nach cual iad.

18 Eisidibh air an aobhar sin ri cosamhlachd an t-sìoladair.

19 An uair a chluinneas neach air bith focal na rioghachd, agus nach toir e fa'near e, thig an

droch *spiorad*, agus bheir e air falbh an ni a chuireadh 'n a chridhe: is e so esan anns an do chuireadh an sìol ri taobh an rathaid.

20 Ach esan a fhuair sìol ann an àitibh creagach, is e so an tì a chluinneas am focal, agus a ghabhas e air ball le gairdeachas;

21 Gidheadh cha 'n 'eil freumh aige ann féin, ach fanaidh e rè tamuill: agus an uair a thig trioblaid no geur-leanmhuinn air son an fhocail, air ball gheibh e oilbheum.

22 Esan mar an ceudna a ghabh sìol am measg an droighinn, is e so an tì a ta cluinntinn an fhocail; agus a ta ro-chùram an t-saoghail so, agus mealltaireachd beartais a' mùchadh an fhocail, agus bithidh e gun toradh.

23 Ach an tì ud a ghabh sìol ann an deadh fhearann is e sin an neach a ta cluinntinn an fhocail agus 'g a thoirt fa'near; neach mar an ceudna ta giùlan toraidh, agus a ta toirt a mach cuid a cheud uiread, cuid a thrì fichead, agus cuid eile a dheich thar fhichead uiread 's a *chuireadh*.

24 Chuir e cosamhlachd eile mach dhoibh, ag ràdh, Is cosmhuil rioghachd nèimh ri duine a chuir sìol maith 'n a fhearann:

25 Agus an uair a bha daoine 'nan codal, thàinig a nàmhaid agus chuir e cogal am measg a' chruithneachd, agus dh'imich e roimhe.

26 Ach an uair a thàinig an t-arbhar fuidh dhéis agus a thug e mach a thoradh, dh'fhoillsich an cogal e féin mar an ceudna.

27 Agus air teachd do sheirbh-sich fhir-an-tighe thubhairt iad

ris, A Thighearna, nach do chuir thusa siol maith ann ad fhearann? c' àite ma seadh as an d' fhuair e an cogal?

28 Thubhairt esan riu, Rinn nàmhaid éigin so. Agus thubhairt na seirbhisich ris, An áill leat uime sin gu'n téid sinne agus gu'n cruinnich sinn ri chéile iad?

29 Ach thubhairt esan, Cha'n áill; air eagal 'nuair a chruinnicheas sibh an cogal, gu spìon sibh an cruithneachd maille ris.

30 Leigibh leo fàs araon gus an tig am fogharadh: agus an àm an fhogharaidh their mise ris an luchd-buanaidh, Cruinnichibh air tùs an cogal, agus ceanglaibh e'n a cheanglachanaibh chum a losgaidh: ach cruinnichibh an cruithneachd do m' shabhal.

31 Chuir e mach cosamhlachd eile dhoibh, ag ràdh, A ta rìoghachd nèimh cosmhuil ri gràinne do shìol mustaird, a ghabh neach agus a chuir e'n a fhearann.

32 Ni gun amharus a's lugha do gach uile phòr: gidheadh air fàs da, is e a's mò do na luibheanaibh, agus fàsaidh e'n a chrann: ionnus gu'n tige eunlaith an athair, agus gu'n dèan iad nid 'n a gheugaibh.

33 Cosamhlachd eile labhair e riu; Is cosmhuil rìoghachd nèimh ri taois ghoirt, a ghabh bean agus a dh' fholaidh i ann an trì tomhasaibh mine, gus an do ghoirticheadh an t-iomlan.

34 Na nithe sin uile labhair Iosa ris a' phobull ann an cosamhlachdaibh; agus gun chosamhlachd cha do labhair e riu:

35 A chum gu coimhliontadh an ni a labhradh leis an fhàidh, ag ràdh, Fosglaidh mi mo bheul ann an cosamhlachdaibh, cuiridh

mi'n céill nithe a bha folaidhte o thoiseach an t-saoghail.

36 An sin chuir Iosa am pobull air falbh, agus chaidh e steach do'n tigh: agus thàinig a dheisciobuil d' a ionnsuidh, ag ràdh, Mìnich dhuinne cosamhlachd cogail an fhearainn.

37 Agus fhreagair esan agus thubhairt e riu, an tì a chuireas an siol maith is e Mac an duine e:

38 'S e 'm fearann an domhan: agus is e an siol maith clann na rìoghachd: ach is e an cogal clann an droch spioraid:

39 'S e an nàmhaid a chuir iad an diabhl: 's e am fogharadh deireadh an t-saoghail: agus is iad na buanaichean na h-aingil.

40 Agus amhuil mar a chruinnichear an cogal, agus a loisgear le teine e, is ann mar sin a bhitheas ann an deireadh an t-saoghail so.

41 Cuiridh Mac an duine aingil uaith, agus tionailidh iad as a rìoghachd na h-uile nithe a bheir oilbheum, agus iadsan a ta dèanamh aingidheachd;

42 Agus tilgidh siad iad anns an àmhuinn air dearg-lasadh: an sin bithidh gul agus giosgan fhiacal.

43 An sin dealraichidh na fireana mar a' ghrian, ann an rìoghachd an Athar féin. Ge b' e aig am bheil cluasa chum éisdeachd, éisdeadh e.

44 A ris, a ta rìoghachd nèimh cosmhuil ri ionmhas air fholach am fearann; ni an déigh fhaotainn, a dh' fholaidh duine, agus air sgàth a ghàirdeachais air a shon, dh' imich e agus reic e na bha aige uile, agus cheannaich e am fearann sin.

45 A ris, is cosmhuil rìoghachd nèimh ri ceannaiche àraidh ag iarraidh nèamhnuide mais-each:

46 Agus air amas da air aon nèamhnuid ro-luachmhoir, dh'imich e agus reic e na bha aige, agus cheannaich e i.

47 A ris, a ta rìoghachd nèimh cosmhuil ri lion air a thilgeadh san fhairge, agus a chruinnich do gach uile sheòrsa *èisg* :

48 Agus air dha bhi làn, tharruing na *h-iasgairean* e chum na tràighe, agus air suidhe dhoibh, chruinnich iad na *h-éisg* mhaithe ann an soithichibh, ach thilg iad na droch *éisg* a mach.

49 Is ann mar sin a bhitheas ann an deireadh an t-saoghail : théid na h-aingil a mach, agus dealaichidh iad na droch dhaoine a measg nam fireanach ;

50 Agus tilgidh siad iad san àmhuinn theinntich : an sin bithidh gul agus giosgan fhiacal.

51 Thubhairt Iosa riu, An do thuig sibh na nithe so uile ? thubhairt iad ris, Thuig, a Thighearn.

52 Agus thubhairt esan riu, Air an aobhar sin gach uile sgrìobhaiche a ta fòghluimte chum rìoghachd nèimh, is cosmhuil e ri fear-tighe, a bheir a mach as 'ionmhas nithe nuadha agus sean.

53 Agus thachair an uair a chrìochnaich Iosa na cosamhlachda so, gu 'n d' imich e as a sin.

54 Agus an uair a thàinig e d'a dhùthaich féin, theagaisg e iad 'nan sionagog, ionnus gu 'n do ghabh iad iongantais, agus gu 'n dubhairt iad, C' àit an d' fhuair am fear so an gliocas so, agus na feartan ud ?

55 Nach e so mac an t-saoir ? nach e ainm a mhàthar Muire ? nach iad a bhràithre, Seumas, agus Ioses, agus Simon, agus Iudas ?

56 Agus a pheathraiche, nach 'eil iad uile maille ruinn ? c' àit

uime sin an d' fhuair an duine so na nithe ud uile ?

57 Agus fhuair iad oilbheum ann. Ach thubhairt Iosa riu, Cha 'n 'eil fàidh gun urram, ach 'na dhùthaich féin, agus 'na thigh féin.

58 Agus cha d' rinn e mòran do oibribh cumhachdach an sin, air son am mi-chreidimh.

CAIB. XIV.

SAN àm sin chual Herod an Tetrarch cliù Iosa,

2 Agus thubhairt e r'a sheirbhisich, Is e so Eoin Baiste ; dh'éirich e o na marbhaibh, agus uime sin a ta feartan air an oibreachadh leis.

3 Oir 'nuair a ghlac Herod Eoin, cheangail se e, agus thilg e am prìosan e air son Herodiais, mnà Philip a bhràthar féin.

4 Oir thubhairt Eoin ris, Cha 'n 'eil e dligheach dhuit i bhi agad.

5 Agus an uair bu mhiann leis a chur gu bàs, bha eagal a phobuill air, oir bha meas fàidh aca air.

6 Ach an uair a bha co-ainm là-breithe Heroid air a chumail, rinn nighean Herodiais dannsa 'nan làthair, agus thaitinn i ri Herod :

7 Ionnus gu 'n do gheall e le mionnaibh, gu tugadh e dh'i ge b' e air bith ni a dh'iarradh i.

8 Agus air dh'ise bhi air a teagasg le a màthair roimh làimh, thubhairt i, Thoir dhomh an so ceann Eoin baiste air mèis.

9 Agus bha 'n rìgh doilich : ach air son a mhionnan, agus na muinntir a bha 'nan suidhe aig biadh maille ris, dh' àithn e a thabhairt d'i.

10 Agus air cur *fir-marbhaidh* uaith, bhuin e a cheann do Eoin anns a' phrìosan.

11 Agus thogadh a cheann air

mèis, agus thugadh do 'n chailin e : agus thug ise d' a màthair e.

12 Agus thàinig a dheisciobuil, agus thug iad an corp leo, agus dh' adhlaic iad e, agus thàinig iad agus dh' innis iad *sin* do Iosa.

13 An uair a chual Iosa so, chaidh e as a sin air luing gu ionad fàsail air leth : agus an uair a chual am pobull *sin*, lean iad d' an cois e as na bailtibh.

14 Agus air dol a mach do Iosa, chunnaic e coimhthional mòr, agus ghabh e truas mòr dhiubh, agus shlànuich e an dream aca bha euslan.

15 Agus an uair a b' fheasgar e, thàinig a dheisciobuil d' a ionnsuidh, ag ràdh, Is àite fàsail so, agus a ta an t-àm a nis air dol seachad ; cuir an sluagh air falbh, chum gu 'n téid iad do na bailtibh, agus gu 'n ceannaich iad biadh dhoibh féin.

16 Ach thubhairt Iosa riu, Cha ruig iad a leas falbh ; thugaibh-sa dhoibh r' a itheadh.

17 Agus thubhairt iad ris, Cha 'n 'eil againn an so ach cùig arain, agus dà iasg.

18 Thubhairt esan *riu*, Thugaibh an so iad a m' ionnsuidh-sa.

19 Agus dh' àithn e do 'n t-sluagh suidhe sìos air an fheur, agus ghlac e na cùig arain, agus an dà iasg, agus air amharc dha suas gu nèamh, bheannaich agus bhris e, agus thug e na h-arain d' a dheisciobluibh, agus *thug* na deisciobuil do 'n t-sluagh *iad*.

20 Agus dh' ith iad uile, agus shàsuicheadh iad : agus thog iad làn dà chliabh dheug do 'n bhiadh bhriste, a bha dh' fhuigheal aca.

21 Agus bha iadsan a dh' ith mu thimchioll cùig mìle fear, thuilleadh air mnaibh agus air cloinn.

22 Agus air ball cho-éignich Iosa a dheisciobuil gu dol an

luing, agus dol roimhe do 'n taobh eile, gus an cuireadh esan an sluagh air falbh.

23 Agus an uair a leig e an sluagh uaith, chaidh e suas air heinn 'na aonar a dhèanamh ùrnuigh : agus an uair a bha am feasgar air teachd, bha e an sin 'na aonar.

24 Ach bha an long san àm sin am meadhon na fairge, air a tilgeadh a null agus a nall leis na tonnaibh : oir bha a' ghaoth 'nan aghaidh.

15 Agus anns a' cheathramh faire do 'n oidhche, chaidh Iosa d' an ionnsuidh, ag imeachd air an fhairge.

26 Agus an uair a chunnaic na deisciobuil e ag imeachd air an fhairge, bha iad fo bhuair-eas, ag ràdh, Is spiorad a ta ann ; agus ghlaodh iad a mach le h-eagal.

27 Ach labhair Iosa riu air ball, ag ràdh, Biodh misneach mhaith agaibh ; is mise a ta ann, na biodh eagal oirbh.

28 Agus fhreagair Peadar e agus thubhairt e, A Thighearna, ma 's tu a ta ann, iarr ormsa teachd a d' ionnsuidh air na h-uisgeachaibh.

29 Agus thubhairt esan, Thig. Agus an uair a bha Peadar air teachd a nuas as an luing, dh' imich e air na h-uisgeachaibh, chum teachd gu h-Iosa.

30 Ach an uair a chunnaic e a' ghaoth làidir, ghabh e eagal : agus an uair a thòisich e air dol fuidh, ghlaodh e, ag ràdh, A Thighearna, fòir erm.

31 Agus air ball shìn Iosa mach a làmh, agus rug e air, agus thubhairt e ris, O thusa air bheag creidimh, c' ar son a bha thu fo amharus ?

32 Agus an uair a chaidh iad a steach do 'n luing, choisg a' ghaoth.

33 An sin thàinig iadsan a bha san luìng, agus rinn iad aoradh dha, ag ràdh, Gu frinneach is tu Mac Dhé.

34 Agus an uair a chaidh iad do 'n taobh eile, thàinig iad gu talamh Ghenesaret.

35 Agus an uair a fhuair luchd an àite sin fiosrachadh uime, chuir iad fios air feadh na tìre sin uile air gach taobh dhiubh, agus thug iad d' a ionnsuidh an dream sin uile a bha euslan.

36 Agus ghuidh iad air, gu feudadh iad beantuinn ri iomall 'eudaich a mhàin: agus a mheud dhiubh as a bhean, shlàn- uicheadh gu h-iomlan iad.

CAIB. XV.

AN sin thàinig sgrìobhaichean agus Phairisich o Ierusalem gu Iosa, ag ràdh,

2 C' ar son a ta do dheisciobuil a' dol an aghaidh gnàthachaidh nan sinnsear? oir cha 'n ionnlaid iad an làmhan an uair a dh' itheas iad aran.

3 Ach fhreagair esan agus thubhairt e riu, C' ar son a ta sibhse a' briseadh àithne Dhé le bhur gnàthachadh féin?

4 Oir thug Dia àithne, ag ràdh, Thoir urram do t' athair agus do d' mhàthair: agus ge b' e mhallaicheas 'athair no 'mhàthair, cuirear gu bàs e.

5 Ach their sibhse, Ge b' e neach a their r' a athair no r' a mhàthair, Biodh e 'na thiodhlac do 'n teampull gach ni leis am feudadh tu buannachd fhaotainn uamsa;

6 Nach feum e urram a thabhairt d' a athair no d' a mhàthair. Mar sin chuir sibhse an neòbhrìgh àithne Dhé le bhur gnàthachadh féin.

7 A chealgairean, is maith a rinn Esaias fàidheadaireachd m' ur timchioll, ag ràdh,

8 A ta an sluagh so a' dlùthachadh riumsa le 'm beul, agus a' toirt urrainn dhomh le 'm bìlbh: ach a ta ann cridhe fada uam.

9 Ach is ann an dìomhanas a ta iad a' dèanamh aoraidh dhomhsa, a' teagasg àitheanta dhaoine mar theagasg.

10 Agus air gairm an t-slòigh dha, thubhairt e riu, Eisdibh agus tuigibh:

11 Cha 'n e an ni a théid a steach sa' bheul a shalaicheas an duine; ach an ni a thig a mach as a' bheul, is e so a shalaicheas an duine.

12 An sin thàinig a dheisciobuil, agus thubhairt iad ris, Am bheil fhios agad gu 'n do ghabh na Phairisich oilbheum, an déigh dhoibh na briathran ud a chluinntinn?

13 Ach fhreagair esan agus thubhairt e, Gach uile luibh nach do shuidhich m' Athair nèamhaidh-sa, spìonar á bhun e.

14 Leigibh leo: is cinn-iùil dhall nan dall iad. Agus ma threòraicheas dall dall eile, tuitidh iad araon anns a' chlais.

15 Agus fhreagair Peadar agus thubhairt e ris, Mìnich dhuinn a' chosamhlachd sin.

16 Agus thubhairt Iosa, Am bheil sibhse fathast mar an ceudna gun tuigse?

17 Nach 'eil sibh a' tuigsinn fathast ge b' e ni a théid a steach sa' bheul, gu 'n téid esa' bhroinn, agus gu 'n tilgear a mach do 'n t-slochd shalchair e?

18 Ach na nithe sin a thig a mach as a' bheul, a ta iad a' teachd o 'n chridhe, agus is iad sin a shalaicheas an duine.

19 Oir is ann as a' chridhe thig droch smuainte, mortadh, adhaltrannas, striopachas, gadachd, fianuis bhréige, toibheum:

20 Is iad so na nithe a shal-

aicheas an duine: ach itheadh le làmhaibh gun ionnlad, cha salaich sin an duine.

21 Agus air dol do Iosa as a sin, chaidh e gu crìochaibh Thiruis agus Shidoin.

22 Agus, feuch, thàinig bean do *mhuinntir* Chanaain o na crìochaibh sin, agus ghlaodh i ris, ag ràdh, Dèan tròcair orm, a Thighearn, a Mhic Dhaibhidh; a ta mo nighean air a buaireadh gu truagh le deamhan.

23 Ach cha d' thug esan freagradh sam bith dh'i. Agus thàinig a dheisciobuil d'a ionnsuidh, agus dh' iarr iad air, ag ràdh, Cuir air falbh i, oir tha i a' glaothaich 'nar déigh.

24 Ach fhreagair esan agus thubhairt e, Cha do chuireadh mise ach a chum chaorach chailte thighe Israel.

25 An sin thàinig ise agus rinn i aoradh dha, ag ràdh, A Thighearna, cuidich leam.

26 Ach fhreagair esan agus thubhairt e, Cha chòir aran na cloinne a ghlacadh, agus a thilgeadh chum nan con.

27 Agus thubhairt ise, Is fìor, a Thighearn: ach ithidh na coin do 'n sbruileach a thuiteas o bhòrd am maighstirean.

28 An sin fhreagair Iosa agus thubhairt e rithe, O bhean, is mòr do chreidimh: biodh e dhuit mar is toil leat. Agus rinneadh a nighean slàn o'n uair sin a mach.

29 Agus air imeachd do Iosa as a sin thàinig e làimh ri fairge Ghalile; agus an uair a chaidh e suas air beinn, shuidh e sìos an sin.

30 Agus thàinig mòr-shluagh d'a ionnsuidh, agus aca maille riu bacaich, doill, balbhain, *daoine* ciurramach, agus mòran eile, agus thilg iad sìos aig cos-

aibh Iosa iad, agus shlànuich e iad:

31 Ionnnus gu'n do ghabh an sluagh iongantais 'nuair a chunnaic iad na balbhain a' labhairt, na *daoine* ciurramach slàn, na bacaich ag imeachd, agus na doill a' faicinn: agus thug iad glòir do Dhia Israeil.

32 An sin ghairm Iosa a dheisciobuil d'a ionnsuidh, agus thubhairt e, A ta mi a' gabhail truais do'n t-sluagh, oir dh' fhan iad maille rium a nis rè thrì làithean, agus cha'n 'eil ni air bith aca r'a itheadh: agus cha chuir mi uam 'nan trasg iad, air eagal gu fannuich iad air an t-slighe.

33 Agus thubhairt a dheisciobuil ris, Cia as a gheibheamaid na h-uiread a dh' aran san fhàsach, as bu leòir a shàsachadh slòigh co mhòr?

34 Agus thubhairt Iosa riu, Cia lion aran a ta agaibh? agus thubhairt iadsan, Seachd, agus beagan a dh' iasgaibh beaga.

35 Agus dh' àithn e do'n t-sluagh suidhe sìos air an làr.

36 Agus air glacadh nan seachd aran agus nan iasg dha, agus air tabhairt buidheachais, bhris e *iad*, agus thug e d'a dheisciobluibh, agus *thug* na deisciobuil do'n t-sluagh *iad*.

37 Agus dh' ith iad uile, agus shàsuicheadh iad: agus thog iad do'n bhiadh bhriste a dh' fhàgadh làn sheachd bascaid.

38 Agus b' iad a' mhuinntir a dh' ith, ceithir mìle fear, thuilleadh air mnaibh agus *air* cloinn.

39 Agus air dha an sluagh a leigeadh uaith, chaidh e air luing, agus thàinig e gu crìochaibh Mhagdala.

CAIB. XVI.

A GUS air teachd do na Phairisich agus do na Sadus-

nich 'g a dhearbhadh, dh' iarr iad air comhar' a nochdadh dhoibh o nèamh.

2 Ach fhreagair esan agus thubhairt e riu, An uair isfeasgar e, their sibh, *Bithidh* deadh aimsir *ann*; oir a ta an t-athar dearg:

3 Agus air maduinn, *Bithidh* droch aimsir ann an diugh; oir a ta an t-athar dearg agus dorcha. A chealgairean, is aithne dhuibh breth a thoirt air gnùis an athair, agus nach 'eil e 'n comas duibh comharan nan aimsir a *thuigsinn*?

4 A ta ginealach aingidh agus adhaltrannach ag iarraidh comhara, agus cha toirear comhara dhoibh, ach comhar' an fhàidh Ionais. Agus air dha am fàgail, dh' imich e *as a sin*.

5 Agus an uair a thàinig a dheisciobuil a dh' ionnsuidh na taobh eile dhichuimhnich iad aran a thabhairt *leo*.

6 Agus thubhairt Iosa riu, Thugaibh an aire, agus gléidhibh sibh féin o thaois ghoirt nam Phairiseach, agus nan Sadusach.

7 Agus bha iad a' reusonachadh eatorra féin, agràdh, *Is ann* air son nach d' thug sinn aran *leinn*.

8 Agus 'nuair a thuig Iosa *sin*, thubhairt e riu, O sibhse air bheag creidimh, c' ar son a ta sibh a' reusonachadh eadaraibh féin, *gur ann* a chionn nach d' thug sibh aran *leibh*?

9 Nach 'eil sibh fathast a' tuigsinn, no a' cuimhneachadh nan cùig aran nan cùig mìle, agus cia lion cliabh a thog sibh?

10 No nan seachd aran nan ceithir mìle, agus cia lion bascaid a thog sibh?

11 Cionnus nach 'eil sibh a' tuigsinn, nach ann mu aran a thubhairt mi ribh, sibh a bhi air

bhur faicill o thaois ghoirt nam Phairiseach, agus nan Sadusach?

12 An sin thuig iad cionnus nach d' iarr e *orra* bhi air am faicill o thaois ghoirt an arain, ach o theagasg nam Phairiseach, agus nan Sadusach.

13 Agus air teachd do Iosa gu crìochaibh Chesarea Philipi, dh' fheòraich e d' a dheisciobluibh, ag ràdh, Cò tha daoine ag ràdh is e Mac an duine?

14 Agus thubhairt iadsan, *Tha cuid ag ràdh* Eoin Baiste, cuid Elias, agus cuid eile Ieremias, no aon do na fàidhibh.

15 Thubhairt esan riu, Ach cò tha sibhse ag ràdh is mi?

16 Agus fhreagair Simon Peadar agus thubhairt e, Is tusa Crìosd, Mac an Dé bheò.

17 Agus fhreagair Iosa agus thubhairt e ris, Is beannaichte thusa, a Shimoin Bhar-Iona; oir cha d' fhoillsich fuil agus feoil sin duitse, ach m' Athairsa a ta air nèamh.

18 Agus a ta mise ag ràdh riut, Gur tusa Peadar, agus air a' charraig so togaidh mise m' eaglais: agus cha toir geatachan ifrinn buaidh oirre.

19 Agus bheir mi dhuit iuchraiche rìoghachd nèimh: agus ge b' e ni a cheanglas tusa air talamh, bithidh e ceangailte air nèamh; agus ge b' e ni a dh' fhuasglas tusa air talamh, bithidh e fuasgailte air nèamh.

20 An sin dh' àithn e d' a dheisciobluibh gun iad a dh' innseadh do neach air bith, gu 'm b' esan Iosa an Crìosd.

21 O'n àm sin a mach thòisich Iosa air a nochdadh d' a dheisciobluibh, gur éigin dhasan dol suas gu Ierusalem, agus mòran do nithibh fhulang o na seanairibh, agus na sgriobhaichibh, agus a bhi air a chur gu bàs,

agus a bhi air a thogail suas air an treas là.

22 Agus ghabh Peadar e, agus thòisich e air achmhasan a thabhairt dha, ag ràdh, Gu ma fada sin uaitse, a Thighearna; cha tachair sin duitse.

23 Ach air tionndadh dhasan, thubhairt e ri Peadar, Imich air mo chùl, a Shatain; is oilbheum dhomh thu: oir cha 'n 'eil spéis agad do nithibh Dhé, ach do nithibh dhaoine.

24 An sin thubhairt Iosa r' a dheisciobluibh, Ma's àill le neach air bith teachd, a' m' dhéigh-sa, àicheadhadh se e féin, agus togadh e air a chrann-ceusaidh, agus leanadh e mise.

25 Oir ge b'e neach le'm b'àill 'anam a ghléidheadh, caillidh se e; agus ge b'e neach a chailleas 'anam air mo sgàth-sa, gheibh se e.

26 Oir ciod an tairbhe a ta ann do dhuine, ged chosnadh e an saoghal uile, agus 'anam féin a chall? no ciod i a' mhalairt a bheir duine air son anama?

27 Oir thig Mac an duine ann an glòir 'Athar, maille r' a ainglibh; agus an sin bheir e do gach neach a réir a ghnìomhara.

28 Gu deimhin tha mi ag ràdh ribh, Gu bheil cuid do 'n dream a ta 'nan seasamh an so, nach blais bàs, gus am faic iad Mac an duine a' teachd 'na rìoghachd féin.

CAIB. XVII.

A GUS an déigh shè làithean, ghabh Iosa Peadar, agus Seumas, agus Eoin a bhràthair, agus threòraich e iad air leth gu beinn àrd,

2 Agus dh' atharraicheadh a chruth 'nan làthair; agus dhealraich 'aghaidh mar a' ghrian,

agus rinneadh 'eudach geal mar an solus.

3 Agus, feuch, chunnacas leo Maois agus Elias a' còmhradh ris.

4 An sin fhreagair Peadar, agus thubhairt e ri Iosa, A Thighearn, is maith dhuinne bhi an so: ma's àill leatsa, dèanamaid trì pàilliuna an so: aon duitse, aon do Mhaois, agus aon do Elias.

5 Air dha bhi fathast a' labhairt, feuch, thilg neul soillseach sgàile orra: agus, feuch, guth as an neul, ag ràdh, Is e so mo Mhac gràdhach-sa, anns am bheil mo mhòr-thlachd, éisdibh ris.

6 Agus an uair a chuala na deisciobuil so, thuit iad air an aghaidh, agus ghabh iad eagal ro-mhòr.

7 Agus thàinig Iosa agus bhean e riu, agus thubhairt e, Eiribh, agus na biodh eagal oirbh.

8 Agus an uair a thog iad suas an sùilean, cha 'n fhac iad neach air bith, ach Iosa 'na aonar.

9 Agus an àm dhoibh teachd a nuas o'n bheinn, thug Iosa àithne dhoibh, ag ràdh, Na inn-sibh do neach air bith an ni a chunnaic sibh, gus an éirich Mac an duine o na marbhaibh.

10 Agus dh'fheòraich a dheisciobuil dheth, ag ràdh, C'ar son ma seadh a their na sgriobhaichean, gur éigin Elias a theachd air tùs?

11 Agus fhreagair Iosa agus thubhairt e riu, Thig Elias gu firinneach air tùs, agus aisigidh e na h-uile nithe:

12 Ach a ta mise ag ràdh ribh, Gu 'n d' thàinig Elias a cheana, agus cha d' aithnich iad e, ach rinn iad gach ni bu toil leo ris: is ann mar sin mar an

ceudna a dh' fhulaingeas Mac an duine uatha.

13 An sin thuig na deisciobuil gu'm b' ann mu Eoin Baiste a labhair e riu.

14 Agus an uair a thàinig iad chum an t-sluaigh, thàinig duine àraidh d' a ionnsuidh, a' tuiteam air a ghlùinibh dha, agus ag ràdh,

15 A Thighearna, dèan tròc-air air mo mhac, oir a ta e gu tinn leis an tuiteamas, agus is mòr an cràdh a ta e a' fulang: oir a ta e gu minic a' tuiteam san teine, agus gu tric san uisge.

16 Agus thug mi e dh' ionnsuidh do dheisciobuil, agus cha b' urrainn iad a leigheas.

17 Agus fhreagair Iosa agus thubhairt e, A ghinealaich neo-chreidich, agus choirbte, cia fhad a bhitheas mi maille ruibh? cia fhad a dh' fhulaingeas mi sibh? thugaibh a m' ionnsuidh-sa an so e.

18 Agus chronuich Iosa an deamhan, agus dh' imich e as: agus shlànuicheadh an leanabh o'n uair sin a mach.

19 An sin an uair a thàinig na deisciobuil chum Iosa fa leth, thubhairt iad, C' ar son nach b' urrainn sinne a thilgeadh a mach?

20 Agus thubhairt Iosa riu, Air son bhur mi-chreidimh: oir gu firinneach tha mi ag ràdh ribh, Nam biodh agaibh creidimh mar ghràinne mustaird, theireadh sibh ris a' bheinn so, Atharraich á so an sud, agus dh' atharraicheadh i; agus cha bhiodh ni air bith eu-comasach dhuibh.

21 Gidheadh, cha téid a' ghnè so mach, ach le h-ùrnuigh agus le trasgadh.

22 Agus am feadh a bha iad a' fantuinn ann an Galile, thubhairt Iosa riu, Bithidh Mac an

duine air a bhrath thairis do làmhaibh dhaoine:

23 Agus marbhaidh iad e, ach an treas là éiridh e. Agus bha iadsan ro bhrònach.

24 Agus air teachd dhoibh do Chapernaum, thàinig luchd-togail na cìse gu Peadar, agus thubhairt iad ris, Nach 'eil bhur maighstir-sa ag ìocadh na cìse?

25 Thubhairt esan, A ta. Agus an uair a chaidh e steach do 'n tigh, labhair Iosa ris air tùs, ag ràdh, Ciod i do bharail-sa, a Shimoin? co uaith a ta rìghrean na talmhainn a' togail càine no cìse? An ann o'n cloinn féin, no o choigrich?

26 Thubhairt Peadar ris, O choigrich. Thubhairt Iosa ris-san, Air an aobhar sin a ta a chlann saor.

27 Gidheadh, chum nach tugamaid oilbheum dhoibh, imich thusa chum na fairge, agus tilg dubhan *innte*, agus tog an ceud iasg a thig a nìos: agus air fosgladh a bheoil duit, gheibh thu bonn airgid; sin gabh, agus tabhair dhoibh air mo shon-sa, agus air do shon féin.

CAIB. XVIII.

ANNS an àm sin féin thàinig na deisciobuil chum Iosa, ag ràdh, Cò is mò ann an rioghachd nèimh?

2 Agus air do Iosa leanabh beag a ghairm d' a ionnsuidh, chuir e 'nam meadhon e,

3 Agus thubhairt e, Gu firinneach tha mi ag ràdh ribh, Mur iompaichear sibh, agus mur bi sibh mar leanabana, nach téid sibh a steach do rioghachd nèimh.

4 Air an aobhar sin ge b' e dh' islicheas e féin mar an leanaban so, 's e sin féin is mò ann an rioghachd nèimh.

5 Agus ge b' e ghabhas aon

leanaban d' a leithid so ann am ainm-sa, gabhaidh e mise.

6 Ach ge b' e neach a bheir oilbheum do aon neach do 'n mhuinntir bhig so a ta creidsinn annam-sa, b' fheàrr dha gu 'm biodh cloch-mhuilinn air a crochadh r' a mhuineal, agus gu 'm biodh e air a bhàthadh ann an doimhne na fairge.

7 Is an-auibhinn do 'n t-saoghal air son oilbheuman: oir is éigin do oilbheumaibh teachd; ach is an-auibhinn do 'n duine sin troimh an tig an t-oilbheum.

8 Uime sin ma bheir do làmh no do chos aobhar oilbheim dhuit, gearr dhìot iad, agus tilg uait *iad*: is feàrr dhuit dol a steach do 'n bheatha air leth-chois no air leth-làimh, na dà làimh no dà chois a bhi agad, agus thu bhi air do thilgeadh anns an teine shìorruidh.

9 Agus ma bheir do shùil aobhar oilbheim dhuit, spìon asad i, agus tilg uait *i*: is feàrr dhuit dol a steach chum na beatha air leth-shùil, na dà shùil a bhi agad agus thu bhi air do thilgeadh ann an teine ifrinn.

10 Thugaibh an aire nach dèan sibh tarcuis air aon neach do 'n mhuinntir bhig so; oir tha mise ag ràdh ribh, gu bheil an aingil-san air nèamh a' faicinn a ghnàth gnùis m' Athar-sa, a ta air nèamh.

11 Oir thàinig Mac an duine a shaoradh an ni sin a bha cailte.

12 Ciod is barail dhuibhse? ma bhitheas aig duine ceud caora, agus gu'n téid aon diubh air seacharan, nach fàg e na naoi caoraich dheug agus ceithir fichead air na beanntaibh, agus nach téid e dh'iarraidh na *caorach* a chaidh air seacharan.

13 Agus ma thàrlas da gu'm

faigh e i, gu deimhin tha mi ag ràdh ribh, Gu'n dèan e tuilleadh gairdeachais air son na *caorach sin*, na air son nan naoi caorach dheug agus ceithir fichead, nach deachaidh air seacharan.

14 Mar so cha'n e toil bhur n-Athar-sa a ta air nèamh, gu'n rachadh aon neach do 'n mhuinntir bhig so a chall.

15 Uime sin ma pheacaicheas do bhràthair a' d' aghaidh, imich agus innis a lochd dha eadar thu féin agus esan a mhàin: ma dh'éisdeas e riut, choisinn thu do bhràthair.

16 Ach mur éisd e *riut*, thoir leat aon no dithis eile, chum gu'm bi gach ni air a dhèanamh seasmhach am beul dithis no triuir do fhianuisibh.

17 Agus ma dhiùltas e iad-san éisdeachd, innis do 'n eaglais e: ach ma dhiùltas e 'n eaglais éisdeachd, biodh e dhuit mar Gheintileach, agus mar chis-mhaor.

18 Gu deimhin tha mi ag ràdh ribh, Ge b' e air bith nithe a cheanglas sibhse air talamh, bithidh iad ceangailte air nèamh: agus ge b' e air bith nithe a dh'fhuasglas sibhse air talamh, bithidh iad fuasgailte air nèamh.

19 A ris tha mi ag ràdh ribh, Ma chòirdeas dithis agaibh air thalamh mu thimchioll aoin ni a dh'iarrais iad, nithear *so* dhoibh le m' Athair-sa a ta air nèamh.

20 Oir ge b' e àit am bheil dithis no triuir air an cruinneachadh an ceann a chéile a'm' ainm-sa, a ta mise an sin 'nam meadhon.

21 Air dol do Pheadar d'a ionnsuidh san àm sin, thubhairt e, A Thighearna, cia minic a pheacaicheas mo bhràthair a'm' aghaidh, agus a mhaitheas mi dha? *An ann* gu ruig an seachdamh uair?

22 Thubhairt Iosa ris, Cha'n abair mi riut, gus an seachdamh uair, ach gu deich agus trì fich-ead seachd uairean.

23 Air an aobhar sin is cosmhuil rioghachd nèimh ri rìgh àraidh le'm b'àill cunntas a dhèanamh r'a sheirbhisich.

24 Agus an uair a thòisich e air cunntas a dhèanamh, thugadh aon d'a ionnsuidh air an robh aige deich mìle tàlann:

25 Ach do bhrìgh nach robh aige ni leis an dioladh e, dh'àithn a thighearn e féin, agus a bhean, agus a chlann, agus na h-uile nithe a bha aige a reiceadh, agus dioladh a dhèanamh.

26 Air an aobhar sin thuit an seirbhiseach sin sìos, agus rinn e ùmhlachd dha, ag ràdh, A Thighearn, dèan foighidinn rium, agus iocaidh mi dhuit an t-ìomlan.

27 An sin air do thighearn an òglaich sin truas mòr a ghabhail dheth, leig e a chead da, agus mhaith e na fiacha dha.

28 Ach an uair a chaidh an seirbhiseach sin féin a mach, fhuair e aon d'a chomh-sheirbhisich air an robh aige ceud pegh-inn: agus chuir e làmh ann, agus rug e air sgornan *air*, ag ràdh, Ioc dhomh na bheil agam ort.

29 Agus thuit a chomh-sheirbhiseach sìos aig a chosaibh, agus ghuidh e air, ag ràdh, Dèan foighidinn rium, agus iocaidh mi dhuit an t-ìomlan.

30 Agus cha b'àill leis-san *sin*: ach dh'imich e agus thilg e am prìosan e, gus an iocadh e na fiachan.

31 Agus an uair a chunnaic a chomh-sheirbhisich na nithe a rinneadh, bha iad ro-dhoilich, agus thàinig iad, agus dh'fhoill-

sich iad d'an tighearn gach ni a rinneadh.

32 An sin ghairm a thighearn air, agus thubhairt e ris, A dhroch sheirbhisich, mhaith mi dhuit na fiachan ud uile, do bhrìgh gu'n do chuir thu impidh orm:

33 Nach bu chòir dhuitse mar an ceudna tròcair a dhèanamh air do chomh-sheirbhiseach féin, amhuil mar a rinn mise tròcair ortsa?

34 Agus ghabh a thighearn fearg, agus thug e do na ceus-adairibh e, gus an iocadh e 'fhiachan uile dha.

35 Agus mar sin ni m' Ath-air nèamhaidh ribhse, mur maith gach aon agaibh o bhur cridheachaibh d'a bhràthair an cionta.

CAIB. XIX.

A GUS thàrladh, an uair a chrìochnaich Iosa na briathra sin, gu'n d'imich e o Ghalile, agus thàinig e gu crìochaibh Iudea, air an taobh thall do Iordan:

2 Agus lean sluagh mòr e, agus shlànuich e iad an sin.

3 Thàinig na Phairisich mar an ceudna d'a ionnsuidh 'ga dhearbhadh, agus ag ràdh ris, Am bheil e ceaduichte do dhuine a bhean a chur uaith air gach uile aobhar?

4 Agus fhreagair esan agus thubhairt e riu, Nach do leugh sibh, An Tì a rinn air tùs *iad*, gu'n d'rinn e iad fear agus bean?

5 Agus thubhairt e, Air an aobhar so fàgaidh duine 'athair agus a mhàthair, agus dlùthleanaidh e r'a mhnaoi: agus bithidh iad araon 'nan aon fheoil.

6 Air an aobhar sin cha dithis iad ni's mò, ach aon fheoil. Uime

sin an ni a cheangail Dia, na sgaoileadh duine.

7 Thubhairt iad ris, C'ar son ma seadh a dh'àithn Maois litir-dhealaich a thabhairt *dh' i*, agus a cur air falbh?

8 Thubhairt esan riu, Dh'fhulaing Maois dhuibh-sa air son cruais bhur cridhe, bhur mnàì a chur uaibh: ach cha robh e mar sin o thùs.

9 Agus tha mise ag ràdh ribh, Ge b'e chuireas uaith a bhean, ach air son striopachais, agus a phòsas bean eile, a ta e a' dèanamh adhaltrannais: agus ge b'e neach a phòsas ise a chuireadh air falbh, a ta e a' dèanamh adhaltrannais.

10 Thubhairt a dheisciobuil ris, Ma's e sin cor an fhir r'a mhnaoi, cha'n 'eil am pòsadh maith r'a dhèanamh.

11 Ach thubhairt esan riu, Cha'n 'eil na h-uile dhaoine comasach air a' chainnt so a ghabhail, ach *iadsan* d'an d'thugadh e.

12 Oir a ta cuid 'nan caillteanaich, a rugadh mar sin o bhroinn *am màthar*; agus a ta cuid do chaillteanaich ann, a rinneadh 'nan caillteanaich le daoineibh; agus a ta caillteanaich ann, a rinn iad féin 'nan caillteanaich air son rìoghachd nèimh. Ge b'e neach a ta comasach air a ghabhail d'a ionnsuidh, gabhadh se e.

13 An sin thugadh clann bheag d'a ionnsuidh, chum gu cuireadh e a làmhan orra, agus gu'n dèanadh e ùrnuigh: agus chronuich na deisciobuil iad.

14 Ach thubhairt Iosa, Fulaingibh do na leanabaibh, agus na bacaibh dhoibh teachd a m'ionnsuidh: oir is ann d'an leithidibh sin a ta rìoghachd nèimh.

15 Agus an déigh dha a làmhan a chur orra, dh'imich e as a sin.

16 Agus, feuch, thàinig neach agus thubhairt e ris, A mhaighstir mhaith, ciod am maith a ni mi chum gu faigh mi a' bheatha mhaireannach?

17 Agus thubhairt esan ris, C'ar son a ghoireadh tu maith dhiom-sa? cha 'n 'eil aon neach maith ach a h-aon, *eadhon* Dia: ach ma's àill leat dol a steach chum na beatha, coimhid na h-àitheanta.

18 Thubhairt esan ris, Cia iad? agus thubhairt Iosa, Na dèan mortadh. Na dèan adhaltrannas. Na goid. Na toir fianuis bhréige.

19 Thoir urram do t'athair, agus do d' mhàthair: agus, Gràdhaich do choimhearsnach mar thu féin.

20 Thubhairt an t-òganach ris, Choimhid mi iad sin uile o m'òige: ciod a ta dh'uireasbhuidh orm fathast?

21 Thubhairt Iosa ris, Ma's àill leat bhi coimhlionta, imich, reic na bheil agad, agus tabhair do na bochdaibh, agus gheibh thu ionmhas air nèamh; agus thig, *agus lean mise*.

22 Ach an uair a chual an t-òganach na briathra sin, dh'fhalbh e gu brònach: oir bha mòr-shaoibhreas aige.

23 An sin thubhairt Iosa r'a dheisciobluibh, Gu frinneach tha mi ag ràdh ribh, gu bheil e cruaidh air duine saoi bhir dol a steach do rìoghachd nèimh.

24 Agus a ris tha mi ag ràdh ribh, Gur usadh do chàmhail dol troimh chrò snàthaid, na do dhuine saoi bhir dol a steach do rìoghachd Dhé.

25 Agus 'nuair a chual a dheisciobuil so, ghabh iad iongantais mòr, ag ràdh, Cò ma seadh an neach a dh'fheudas a bhi air a shaoradh?

26 Ach air amharco Iosa orra,

thubhairt e riu, Do dhaoinibh a ta so eu-comasach, ach do Dhia a ta na h-uile nithe comasach.

27 An sin fhreagair Peadar, agus thubhairt e ris, Feuch, thréig sinne na h-uile *nithe*, agus lean sinn thusa; air an aobhar sin ciod a gheibh sinn?

28 Agus thubhairt Iosa riu, Gu deimhin a ta mi ag ràdh ribh, Sibhsè a lean mise, anns an ath-ghineamhuin, an uair a shuidheas Mac an duine air caithir a ghloire féin, gu'n suidh sibhsè mar an ceudna air dà chaithir dheug, a' toirt breth air dà thréibh dheug Israeil.

29 Agus ge b'e neach a thréig tighean, no bràithrean, no peathraichean, no athair, no màthair, no bean-phòsda, no clann, no fearann air sgàth m'ainme-sa, gheibh e a' cheud uiread, agus a' bbeatha mhàireannach mar oighreachd.

30 Ach a ta mòran air thoiseach a bhitheas air dheireadh; agus air dheireadh, *a bhitheas* air thoiseach.

CAIB. XX.

OIR is cosmhuil rioghachd nèimh ri fear-tighe, a chaidh a mach moch air mhaduinn a thuarasdalachadh luchd-oibre d' a ghàradh fiona.

2 Agus an déigh dha còrdadh ris an luchd-oibre air pheghinn *Romhanaich* san là, chuir e d' a ghàradh fiona iad.

3 Agus an uair a chaidh e mach timchioll na treas uaire, chunnaic e dream eile 'nan seasamh dìomhanach sa' mhargadh.

4 Agus thubhairt e riu, imichibh-sa mar an ceudna do'n ghàradh fhiona, agus ge b'eni a bhith-eas ceart, bheir mi dhuibh e. Agus dh'imich iad.

5 An uair a chaidh e mach a ris timchioll na seathadh agus

na naothadh uaire, rinn e mar an ceudna.

6 Agus an uair a chaidh e mach mu thimchioll na h-aoin uaire deug, fhuair e dream eile 'nan seasamh dìomhanach, agus thubhairt e riu, C'ar son a ta sibh 'nur seasamh an so feadh an là dìomhanach?

7 Thubhairt iad ris, A chionn nach do thuarasdalaich duine air bith sinn. Thubhairt e-san riu, Imichibh-sa mar an ceudna do'n ghàradh fhiona, agus ge b'e ni a ta ceart, gheibh sibh e.

8 Agus 'nuair thàinig am feasgar, thubhairt tighearn a' ghàradh fhiona sin r' a stiùbhard, Gairm an luchd-oibre, agus thoir dhoibh an tuarasdail, a' tòiseachadh o'n dream *a thàinig* mu dheireadh gu ruig na ceud *daoine*.

9 Agus an uair a thàinig iadsan *a thuarasdalaicheadh* mu thimchioll na h-aoin uaire deug, fhuair gach duine dhiubh peghinn.

10 Ach an uair a thàinig an ceud dream, shaoil iadsan gu'm faigheadh iad ni bu mhò; ach fhuair gach aon diubh mar an ceudna peghinn.

11 Agus air dhoibh fhaotainn, rinn iad gearan an aghaidh fhìr-an-tighe,

12 Ag ràdh, An dream sin *a thàinig* mu dheireadh, cha d'rinn iad *obair* ach aon uair, agus rinn thu iad ionnan ruinne, a ghiùlain uallach agus teas an là.

13 Ach fhreagair e-san agus thubhairt e ri fear dhiubh, A charaid, cha'n 'eil mi a' dèanamh eucoir ort: nach do chòird thu rium air peghinn?

14 Tog leat do chuid féin, agus imich romhad: is i mo thoil-sa a thabhairt do'n tì so *a thàinig* mu dheireadh, mar *a thug mi* dhuit-sa.

15 Nach 'eil e ceadaichte dhomh-sa an nì a's toil leam a dhèanamh ri mo chuid féin? am bheil do shùil-sa olc, air son gu bheil mise maith?

16 Mar sin bithidh an dream dheireannach air thoiseach, agus an dream *a ta* air thoiseach air dheireadh: oir a ta mòran air an gairm, ach beagan air an taghadh.

17 Agus a' dol do Iosa suas gu Ierusalem, thug e an dà dheisciobul deug leis a leth-taobh anns an t-slighe, agus thubhairt e riu,

18 Feuch, a ta sinn a dol suas gu Ierusalem; agus bithidh Mac an duine air a bhrath thairis do na h-àrd-shagartaibh, agus do na sgrìobhaichibh, agus ditidh iad chum bàis e.

19 Agus bheir iad thairis e do na Cinnich chum fanoid a dhèanamh *air*, agus *chum a* sgiùrsadh, agus *a* chéusadh: ach an treas là éiridh e a ris.

20 An sin thàinig d'a ionnsuidh màthair cloinne Shebede, maille r'a mic, a' toirt aoraidh *dha*, agus ag iarraidh nì àraidh air.

21 Agus thubhairt e-san rithe, Ciod a b' àill leat? Thubhairt i ris, Abair gu'n suidh iad so mo dhithis mhac, fear *aca* air do làimh dheis, agus fear eile air do làimh chli, a' d' rìoghachd.

22 Ach fhreagair Iosa agus thubhairt e, Cha 'n 'eil fhios agaibh ciod a ta sibh ag iarraidh. Am bheil sibh comasach air a' chupan sin òl a dh'òlas mise, agus a bhi air bhur baisteadh leis a' bhaisteadh leis am baistear mise? Thubhairt iad ris, A ta sinn comasach.

23 Agus thubhairt e-san riu, Olaidh sibh gu deimhin do m' chupan-sa agus baistear sibh leis a' bhaisteadh leis am baist-

ear mise: ach suidhe air mo làimh dheis agus chli, cha leamsa *sin* a thabhairt, ach *dhoibh-san* d'am bheil e air ulluchadh le m' Athair-sa.

24 Agus 'nuair a chual an deichnear *so*, bha iad diombach air an dithis bhràithre.

25 Ach ghairm Iosa iad d'a ionnsuidh, agus thubhairt e, A ta fhios agaibh gu bheil aig uachdaranaibh nan Cinneach tighearnas orra, agus gu bheil aig *an* daoineibh mòra smachd orra.

26 Ach mar sin cha bhi e 'nur measg-sa: ach ge b'e neach le'm b' àill a bhi mòr 'nur measg, biodh e dhuibh 'na fhear-frith-ealaidh.

27 Agus ge air bith le'm b' àill toiseach a bhi aige 'nur measg, biodh e-san 'na sheirbhiseach dhuibh:

28 Amhuil mar nach d' thàinig Mac an duine chum gu'n dèan-tadh frithealadh dha, ach a dhèanamh frithealaidh, agus a thabhairt 'anama féin mar éiric air son mhòran.

29 Agus ag dol a mach dhoibh á Iericho, lean sluagh mòr e:

30 Agus, feuch, dithis dhaoine dalla, a bha 'nan suidhe ri taobh na slighe, 'nuair a chual iad gu'n robh Iosa a' dol seachad, ghlaodh iad, ag ràdh, Dèan tròcair oirnne, a Thighearn, a Mhic Dhaibhidh.

31 Agus chronuich an sluagh iad, chum gu'm biodh iad 'nan tosd: ach is mòid a ghlaodh iadsan, ag ràdh, Dèan tròcair oirnn, a Thighearn, a Mhic Dhaibhidh.

32 Agus sheas Iosa, agus ghairm e iad, agus thubhairt e, Ciod is àill leibh mise a dhèanamh dhuibh?

33 Thubhairt iadsan ris, A Thighearn, ar sùilean a bhi air am fosgladh.

34 Agus ghabh Iosa truas dhiubh, agus bhean e r' an sùil-ibh: agus air ball thàinig radharc d'an sùilibh, agus lean iad e.

CAIB. XXI.

AGUS an uair a dhruid iad ri Ierusalem, agus a thàinig iad gu Betphage, gu sliabh nan crann-oladh, an sin chuir Iosa dithis d'a dheisciobluibh uaith,

2 Ag ràdh riu, Rachaidh do'n bhaile a ta thall fa 'ur comhair, agus air ball gheibh sibh asal ceangailte ann, agus loth maille rithe: fuasglaidh, agus thugaidh a m' ionnsuidh-sa iad.

3 Agus ma labhras aon duine ni air bith ribh, abraidh, Gu bheil feum aig an Tighearn orra; agus cuiridh e uaith air ball iad.

4 Rinneadh na nithe so uile, chum gu 'n coimhliontadh an ni a labhradh leis an fhàidh ag ràdh,

5 Innsibh do nighean Shioin, Feuch, a ta do Rìgh a' teachd a d' ionnsuidh gu ciùin, agus e' na shuidhe air asail, agus air loth mac na h-asail.

6 Agus dh' imich na deisciobuil, agus rinn iad mar a dh' àithn Iosa dhoibh;

7 Agus thug iad an asal agus an loth leo, agus chuir iad am falluinnean orra, agus chuir iad *esan* 'na shuidhe air am muin.

8 Agus sgaoil mòr-shluagh am falluinnean air an t-slighe; agus gheàrr dream eile geuga do na crannaibh, agus leag iad air an t-slighe iad.

9 Agus thog an sluagh a bha roimhe agus 'na dhéigh iolach, ag ràdh, Hosanna do Mhac Dhaibhidh: beannaichte gu robh an Tì a thig ann an ainm an Tighearna; Hosanna anns na h-ardaibh.

10 Agus 'nuair thàinig e steach

do Ierusalem, ghluaiseadh am baile uile, ag ràdh, Cò e so?

11 Agus thubhairt an sluagh, Is e so Iosa am fàidh o Nasaret Ghalile.

12 Agus chaidh Iosa a steach do theampull Dé, agus thilg e mach iadsan uile a bha reic agus a' ceannach anns an teampull, agus thilg e bùird luchd-malairt an airgid thairis, agus caithriche luchd-reicidh nan columan.

13 Agus thubhairt e riu, A ta e sgriobhta, Goirear tigh ùr-nuigh do m' thigh-sa; ach rinn sibhse 'na gharaidh luchd-reubainn e.

14 Agus thàinig na doill agus na bacaich d' a ionnsuidh anns an teampull, agus shlànuich e iad.

15 Agus an uair a chunn-aic na h-àrd-shagairt agus na sgriobhaichean na gnìomharan iongantach a rinn e, agus a' chlann a' glaodhaich san teampull, agus ag ràdh, Hosanna do mhac Dhaibhidh, bha corruich mhòr orra.

16 Agus thubhairt iad ris, An cluinn thu ciod a ta a mhuinntir sin ag ràdh? Agus thubhairt Iosa riu, A ta mi cluinntinn; nach do leugh sibhse riamh, A beul naoidhean agus chiochran choimhlion thu moladh?

17 Agus an uair a dh' fhàg e iad, chaidh e mach as a' bhaile gu Betani, agus dh' fhan e an sin.

18 Agus an uair a phill e chum a' bhaile air mhaduinn, bha ocras air.

19 Agus air dha crann-fige fhaicinn air an t-slighe, thàinig e d' a ionnsuidh, agus cha d' fhuair e ni air bith air, ach duilleach a mhàin; agus thubhairt e ris, Na fàsadh toradh o

so suas gu bràth ort. Agus chrìon an crann-fìge air ball.

20 Agus an uair a chunnaic na deisciobuil e, ghabh iad iongant-as, ag ràdh, Cia luath a shearg an crann-fìge as?

21 Agus fhreagair Iosa agus thubhairt e riu, Gu deimhin a ta mi ag ràdh ribh, ma bhitheas creidimh agaibh, agus nach bi sibh fo amharus, cha 'n e mhàin gu 'n dèan sibh an ni a rinneadh do 'n chrann-fhìge, ach mar an ceudna ma their sibh ris a' bheinn so, Togar thu, agus tilgear san fhairge thu, bithidh e dèanta:

22 Agus ge b' e air bith nithe a dh' iarras sibh ann bhur n-ùrnuigh, ma chreideas sibh, gheibh sibh iad.

23 Agus an uair a thàinig e do 'n teampull, thàinig na h-àrdshagairt agus seanairean a' phobuill d' a ionnsuidh, agus e a' teagasg, ag ràdh ris, Ciod e an t-ùghdarras leis am bheil thusa a' dèanamh nan nithe so? agus cò thug an cumhachd so dhuit?

24 Agus fhreagair Iosa agus thubhairt e riu, Feòraichidh mise mar an ceudna aon ni dhibh-sa, agus ma dh' innseas sibh dhomh e, innsidh mise dhuibh-sa air mhodh ceudna cia an t-ùghdarras leis am bheil mi dèanamh nan nithe so.

25 Baisteadh Eoin, cia as a thàinig e? O nèamh, no o dhaoinibh? Ach reusonaich iadsan 'nam measg féin, ag ràdh, Ma their sinn, O nèamh, their esan ruinn, C' ar son ma seadh nach do chreid sibh e?

26 Ach ma their sinn, O dhaoinibh, a ta eagal a' phobuill oirnn; oir a ta meas fàidh aig gach uile dhuine air Eoin.

27 Agus fhreagair iad Iosa, agus thubhairt iad, Cha 'n 'eil fhios againn. Agus thubhairt

esan riu Ni mò dh' innseas mise dhuibh-sa cia an t-ùghdarras leis am bheil mi dèanamh nan nithe so.

28 Ach ciod i bhur barail-sa? Bha aig duine àraidh dithis mhac, agus thàinig e dh' ionnsuidh a' cheud mhic, agus thubhairt e, A mhic, imich, dèan obair an diugh a' m' ghàradh fiona.

29 Agus fhreagair esan agus thubhairt e, Cha dèan: ach 'na dhéigh sin, ghabh e aithreachas agus dh' imich e.

30 Agus thàinig e gus an dara mac, agus thubhairt e mar an ceudna. Agus fhreagair esan agus thubhairt e, *Théid*, a Thighearn; gidheadh cha deachaidh e.

31 Cò do 'n dithis a rinn toil 'athar? Thubhairt iadsan ris, An ceud fhear. Thubhairt Iosa riu, Gu fìrinneach tha mise ag ràdh ribh, gu 'n téid na cìsmhaoir agus na strìopaichean do rìoghachd Dhé roimhibh-sa.

32 Oir thàinig Eoin do 'ur n-ionnsuidh an slighe na fireantachd, agus cha do chreid sibh e: ach chreid na cìsmhaoir agus na strìopaichean e. Agus ged chunnaic sibhse so, cha do ghabh sibh aithreachas 'na dhéigh sin, a chum gu 'n creideadh sibh e.

33 Eisdibh ri cosamhlachd eile: Bha fear-tighe àraidh ann, a phlannduich fion-lios, agus chuir e gàradh m' a thimchioll, agus chladhaich e ionad-bruthaidh an fhiona ann, agus thog e tùr, agus shuidhich e air tuath e; agus chaidh e féin air choigrich.

34 Agus an uair a dhruid riu àn an toraidh, chuir e a sheirbhisich a dh' ionnsuidh na tuatha, a dh' fhaotainn a thoraidh.

35 Agus rug an tuath air a sheirbhisich, agus ghabh iad air

fear dhiubh, agus mharbh iad fear eile, agus chlach iad fear eile.

36 A rìs, chuir e seirbhisich eile uaith, tuilleadh na *sa'* cheud *chuideachd*; agus rinn iad orra-san mar an ceudna.

37 Ach ma dheireadh, chuir e a mhac féin d'an ionnsuidh, ag ràdh, Bheir iad urram do mo mhac.

38 Ach an uair a chunnaic an tuath am mac, thubhairt iad eatorra féin, 'Se so an t-Oighre, thigibh, marbhamaid e, agus glacamaid 'oighreachd-san *dhuinn féin*.

39 Agus rug iad air, agus thilg iad a mach as an fhìon-lios e, agus mharbh iad e.

40 Air an aobhar sin an uair a thig Tighearn an fhìon-lios sin, ciod a ni e ris an tuath sin?

41 Thubhairt iad ris, Sgrìosaidd e gu truagh na droch dhaoine sin, agus suidhichidh e am fion-lios air tuath eile, a bheir a thoraidh dha 'nan aim-siribh féin.

42 Thubhairt Iosa riu, Nach do leugh sibh riamh anns na sgrìobtuiribh, A' chlach a dhiùlt na clachairean, rinneadh i 'na cloich-chinn na h-oisne: 's e an Tighearn a rinn so, agus a ta e iongantach 'nar sùilibh-ne?

43 Uime sin tha mi ag ràdh ribh, Gu'n toirear rìoghachd Dhé uaibhse, agus gu'n toirear do chinneach *eile* i, a bheir a toraidh uatha.

44 Agus ge b'e neach a thuit-eas air a' chloich so, brisear e; ach ge b'e air an tuit i, ni i mìnluaithre dheth.

45 Agus an uair a chuala na h-àrd shagairt agus na Phairisich a chosamhlachda-san, thuig iad gu'm b'ann mu'n timchioll féin a labhair e.

46 Ach an uair bu mhiann leo

breith air, bha eagal a' phobuill orra, oir bha meas fàidh ac' air-san.

CAIB. XXII.

AGUS fhreagair Iosa, agus labhair e riu a rìs ann' an cosamhlachdaibh, ag ràdh,

2 Is cosmhuil rìoghachd nèimh ri rìgh àraidh, a rinn banais-phòsaidh d'a mhac féin;

3 Agus chuir e a sheirbhisich a ghairm na muinntir a fhuair cuireadh chum na bainnse: ach cha b'àill leo-san teachd.

4 A rìs, chuir e d' an ionnsuidh seirbhisich eile, ag ràdh, Abraibh-sa ris a' mhuinntir d'an d'thugadh cuireadh, Feuch, dheasaich mi mo dhìnnear: a ta mo dhaimh agus mo spréidh bhiadhta air am marbhadh, agus a ta na h-uile nithe ullamh; thigibh chum na bainnse.

5 Ach chuir iadsan an suarachas e, agus dh'imich iad rompa, fear dhiubh d'a fhearann, agus fear eile chum a cheannachd:

6 Agus rug a' chuid eile *dhiubh* air a sheirbhisich, agus thug iad masladh *dhoibh*, agus mharbh siad *iad*.

7 Ach an uair a chual an rìgh so ghabh e fearg; agus chuir e 'armailtean uaithe, agus sgrìos e an luchd-mortaidh sin, agus loisg e am baile-san.

8 An sin thubhairt e r'a sheirbhisich, Gu firinneach a ta a' bhanais ullamh, gidheadh an dream a fhuair cuireadh cha b'airidh iad *air*.

9 Air an aobhar sin imichibh-sa gus na rathaidibh mòra, agus a lìon *daoine* 's a gheibh sibh, cuiribh *iad* chum na bainnse.

10 Agus chaidh na seirbhisich sin a mach air na rathaidibh, agus chruinnich iad gach uile neach a fhuair iad, eadar olc agus mhaith: agus lìonadh

tigh na bainnse le muinntir a shuidh chum bìdh.

11 Agus air dol a steach do'n rìgh a dh'fhaicinn nan aoidhean, chunnaic e an sin duine aig nach robh trusgan na bainnse uime :

12 Agus thubhairt e ris, A charaid, cionnus a thàinig thusa steach an so, gun trusgan na bainnse umad? Ach dh'fhan esan 'na thosd.

13 An sin thubhairt an rìgh ris na seirbhisich, Air a cheangal duibh eadar chosan agus làmh-an, togaibh leibh e, agus tilgibh e anns an dorchadas iomallach : an sin bithidh gul agus giosgan fhiacal.

14 Oir a ta mòran air an gairm, ach beagan air an taghadh.

15 An sin dh'imich na Phairisich, agus ghabh iad comhairle cionnus a dh'fheudadh iad esan a ribeadh 'na chainnt.

16 Agus chuir iad d'a ionnsuidh an deisciobuil féin, maille ri luchd-leanmhuinn Heroid, ag ràdh, A mhaighstir, a ta fhios againn gu bheil thusa fìor, agus gu bheil thu teagasg slighe Dhé ann am fìrinn, agus nach 'eil suim agad do dhuine sam bith : oir chan 'eil thu ag amharc air pearsaibh dhaoine.

17 Uime sin innis dhuinne do bharail, Am bheil e ceaduichte cis a thabhairt do Cheasar, no nach 'eil?

18 Ach air tuigsinn am mì-ruin a dh'Ìosa, thubhairt e, C'ar son a ta sibh ga m' bhuaireadh, a chealgairean?

19 Nochdaibh dhomhsa air-gìod na cise. Agus thug iad d'a ionnsuidh peghinn.

20 Agus thubhairt e riu, Cò dha a bhuineas an dealbh so, agus an sgrìobhadh a ta ma thimchioll?

21 Thubhairt iadsan ris, Do Cheasar. An sin thubhairt esan riu, Thugaibh uime sin do Cheasar na nithe a's le Ceasar; agus do Dhia, na nithe a's le Dia.

22 Agus an uair a chual iad so, ghabh iad iongantas, agus dh'fhàg iad e, agus dh'imich iad rompa.

23 Air an là sin féin thàinig d'a ionnsuidh na Sadusaich, a their nach 'eil aiseirigh ann, agus chuir iad ceisd air,

24 Ag ràdh, A mhaighstir, thubhairt Maois, Ma gheibh duine bàs gun chlann aige, gur còir d'a bhràthair a bhean-san a phòsadh a dhlighe dàimhe, agus sliochd a thogail d'a bhràthair.

25 A nis bha seachdnar bhràithre 'nar measg-ne; agus air do'n cheud fhear dhiubh bean a phòsadh, fhuair e bàs, agus do bhrìgh nach robh sliochd aige, dh'fhàg e a bhean d'a bhràthair.

26 Agus *thachair* mar an ceudna do'n dara, agus do'n treas bràthair, gu ruig an seachdamh.

27 Agus 'nan déigh uile fhuair a' bhean bàs mar an ceudna.

28 Air an aobhar sin anns an aiseirigh, cò do'n t-seachdnar d'am bean i? Oir bha i aca uile.

29 Agus fhreagair Ìosa agus thubhairt e riu, A ta sibh 'air seacharan, gun eòlas agaibh air na sgrìobtuiribh no air cumhachd Dhé:

30 Oir anns an aiseirigh cha dèan iad pòsadh, ni mò a bheir-eam am pòsadh iad; ach a ta iad mar aingil Dhé air nèamh.

31 Ach mu thimchioll aiseirigh nam marbh, nach do leugh sibh an ni sin a labhradh ribh le Dia, ag ràdh,

32 Is mise Dia Abraham, agus Dia Isaac, agus Dia Ia-

coib? cha 'n e Dia, Dia nam marbh, ach nam beò.

33 Agus an uair a chual am pobull so, ghabh iad iongantas r' a theagasg-san.

34 Ach an uair a chuala na Phairisich gu 'n do chuir e na Sadusaich 'nan tosd, chruinnich-eadh iad an ceann a chéile.

35 An sin chuir neach àraidh dhiubh, a b' fhear teagaisg an lagha, ceisd *air*, 'ga dhearbhadh, agus ag ràdh,

36 A mhaighstir, cia i an àithne a's mò san lagh?

37 Thubhairt Iosa ris, Gràdh-aichidh tu an Tighearn do Dhia le t'uile chridhe, agus le t'uile anam, agus le t'uile inntinn.

38 Is i so a' cheud *àithne* agus an àithne mhòr.

39 Agus is cosmhuil an dara rithe so, Gràdh-aichidh tu do choimhearsnach mar thu féin.

40 Air an dà àithne so tha'n lagh uile, agus na fàidhean an crochadh.

41 Ach air do na Phairisich bhi cruinn an ceann a chéile, dh'fheòraich Iosa dhiubh,

42 Ag ràdh, Ciod i bhur barail-sa mu thimchioll Chrìosd? cò d'am mac e? thubhairt iad-san ris, Do Dhaibhidh.

43 Thubhairt esan riu, Cionnus ma seadh a ghoireas Daibhidh san spiorad a Thighearna dheth, ag ràdh,

44 Thubhairt an Tighearn ri m' Thighearn, Suidh air mo làimh dheis, gus an cuir mi do naimhdean 'nan stol fo d' chos-aibh?

45 Air an aobhar sin ma ghoireas Daibhidh a Thighearn dheth, cionnus is mac dha e?

46 Agus cha b'urrainn aon neach freagradh sam bith a thabhairt air; ni mò abha chridhe aig aon neach o'n là sin suas ni air bith fheòraich dheth.

CAIB. XXIII.

AN sin labhair Iosa ris an t-sluagh, agus r'a dheisciobluibh féin,

2 Ag ràdh, a ta na sgrìobhaichean agus na Phairisich 'nan suidhe ann an caithir Mhaois:

3 Air an aobhar sin na h-uile nithe dh'iarras iad oirbh-sa a choimhead, coimhidibh agus dèanaibh *iad*; ach na dèanaibh a reir an oibre: oir their iad, agus cha dèan iad.

4 Oir ceanglaidh iad uallaiche troma, agus do-iomchar, agus cuiridh siad *iad* air guailnibh dhaoine; gidheadh cha charuich iad féin iad le h-aon d'am meur-aibh.

5 Ach an oibre uile a ta iad a' dèanamh chum a bhi air am faicinn le daoineibh: ni iad am philacteridh leathan, agus iomall an eudaich mòr;

6 Agus is ionmhuinn leo na ceud ionada-suidhe anns na féillibh, agus na ceud chaithriche anns na coimhthionalaibh,

7 Agus fàilte *fhaghail* air na margaibh, agus daoine a ghairm Rabbi, Rabbi dhiubh.

8 Ach na goirear Rabbi dhibhse: oir is aon àrd-mhaighstir a ta agaibh, Crìosd; agus is bràithre sibh féin uile.

9 Agus na goiribh bhur n-athair do dhuine sam bith air thalamh: oir is aon Athair a ta agaibh, a ta air nèamh.

10 Cha mhò a ghoirear àrd-mhaighstirean dhibh: oir is aon àrd-mhaighstir a ta agaibh, Crìosd.

11 Ach an tì a's mò 'nur measg, bithidh e 'na òglach agaibh.

12 Agus ge b'e neach a dh'àrdaicheas e féin, islichear e; agus ge b'e neach a dh'islicheas e féin, àrdaichear e.

13 Ach is an-aobhinn dhuibhsa, a sgrìobhaichean agus Phair-

iseacha, a chealgairean, do bhrìgh gu bheil sibh a' druideadh rìoghachd nèimh an aghaidh dhaoine : oir cha téid sibh féin a steach, agus cha'n fhulaing sibh do'n dream a ta dol a stigh dol ann.

14 Is an-aoibhinn dhuibh, a sgrìobhaichean agus Phairis-eacha, a chealgairean ; oir a ta sibh ag itheadh suas tighean bhantrach, agus air sgàth deadh choslais a' dèanamh ùrnuighean fada ; uime sin gheibh sibh an damnadh a's mò.

15 Is an-aoibhinn dhuibh, a sgrìobhaichean agus Phairis-eacha, a chealgairean ; oir cuairtichidh sibh muir agus tìr chum aon duine a dhèanamh do bhur creidimh féin ; agus an uair a bhitheas e dèanta, ni sibh mac ifrinn dheth dà uair ni's mò na sibh féin.

16 Is an-aoibhinn dhuibh, a chinn-iùil dhalla, a their, Ge b'e duine a bheir mionnan air an teampull, cha ni air bith sin : ach ge b'e bheir mionnan air òr an teampuill, a ta e ceangailte.

17 Amadana, agus a dhaoine dalla ! oir cò aca is mò an t-òr no an teampull a ta naomhachadh an òir ?

18 Agus, ge b'e bheir mionnan air an altair, cha'n 'eil suim ann : ach ge b'e bheir mionnan air an tiodhlac a ta oirre, a ta e ceangailte.

19 Amadana, agus a dhaoine dalla ! oir cò aca is mò an tiodhlac, no'n altair a ta naomhachadh an tiodhlaic ?

20 Air an aobhar sin ge b'e mhionnaicheas air an altair, a ta e a' mionnachadh oirre féin, agus air gach ni a ta oirre.

21 Agus ge b'e mhionnaicheas air an teampull, a ta e a' mionnachadh airsan, agus air an Tì a ta 'na chòmhnuidh ann.

22 Agus ge b'e neach a mhionnaicheas air nèamh, a ta e a' mionnachadh air rìgh-chaithir Dhé, agus airsan a ta 'na shuidhe oirre.

23 Is an-aoibhinn dhuibh, a sgrìobhaichean agus Phairis-eacha, a chealgairean ; oir a ta sibh a' toirt an deachamh as a' mhionnt, agus an anise, agus a' chuimin, agus dhìobair sibh nithe cudthromach an lagha, cothrom, tròcair, agus firinn : bu chòir dhuibh iad so a dhèanamh, agus gun iad sud fhàgail gun dèanamh.

24 A chinn-iùil dhalla, a shìolaidheas a' mhìn-chuileag, agus a shluigeas an càmhail.

25 Is an-aoibhinn dhuibh, a sgrìobhaichean agus Phairis-eacha, a chealgairean ; oir glanaidh sibh an taobh a muigh do'n chupan, agus do'n mhèis, ach a ta iad an taobh a stigh làn do reubainn, agus do eucoir.

26 Phairisich dhoill, glan air tùs an taobh a stigh do'n chupan agus do'n mhèis, chum gu'm bi an taobh a muigh dhiubh glan mar an ceudna.

27 Is an-aoibhinn dhuibh, a sgrìobhaichean agus Phairis-eacha, a chealgairean : oir is cosmhuil sibh ri uaighibh gealaichte, a ta deadh-mhaiseach air an taobh a muigh, ach air an taobh a stigh a ta làn do chnàmhaibh dhaoine marbha, agus do'n uile shalachar.

28 Mar an ceudna a ta sibhse an leth a muigh am fianuis dhaoine ann an coslas fhìreana, ach san taobh a stigh làn ceilg, agus eusaontais.

29 Is an-aoibhinn dhuibh, a sgrìobhaichean agus Phairis-eacha, a chealgairean ; oir a ta sibh a' togail àitean adhlacaidh nam fàidhean, agus a' dèanamh

leac-lithidh nam firean deadh-mhaiseach,

30 Agus ag ràdh, Nam bith-eamaid ann an làithibh ar n-aithriche, cha bhitheamaid com-pàirteach riu am fuil nam fàidhean.

31 Mar sin a ta sibh 'nur fianuisibh 'nur n-aghaidh féin, gur sibh clann na muinntir a mharbh na fàidhean.

32 Mar sin lìonaibh-sa suas tomhas bhur n-aithriche.

33 A nathraiche, a shiol nan nathraiche nimhe, cionnus a dh'fheudar leibh dol as o dhamnadh ifrinn?

34 Air anaobharsin feuch, cuir-eamsa d'ur n-ionnsuidh fàidhean, agus daoine glìce, agus sgrìobhaichean; agus *cuid* dhiubh marbhaidh agus cèusaidd sibh, agus *cuid* dhiubh sgiùrsaidh sibh ann bhur sionagogaibh, agus ni sibh geur-leanmhuinn *orra* o bhaile gu baile:

35 Chum gu'n tig oirbh gach uile fhuil fhìreanta a dhòirteadh air an talamh, o fhuil Abeil fhìreanta, gu fuil Shachariais, mhic Bharachiais, a mharbh sibh eadar an teampull agus an altair.

36 Gu firinneach a ta mi ag ràdh ribh, Gu'n tig na nithe so uile air a' ghinealach so.

37 A Ierusalem, a Ierusalem, a mharbhas na fàidhean, agus a chlachas an dream a chuirear a d' ionnsuidh, cia minic a b'àill leam do chlann a chruinneachadh r'a chéile, mar a chruinneicheas cearc a h-eoin fuidh a sgiathaibh, agus cha b'àill leibh!

38 Feuch, fàgar bhur tigh gaibh 'na fhàsach.

39 Oir tha mise ag ràdh ribh, nach faic sibh mise o so suas, gus an abair sibh, *Is beannaichte an Tì a thig ann an ainm an Tighearn.*

CAIB. XXIV.

AGUS chaidh Iosa mach, agus dh'imich e o'n teampull; agus thàinig a dheisciobuil d'a ionnsuidh, a nochdadh dha ait-reabh an teampull.

2 Agus thubhairt Iosa riu, Nach faic sibh iad so uile? gu firinneach tha mi ag ràdh ribh, Nach fàgar clach air muin cloiche an so nach tilgear sìos.

3 Agus air suidhe dha air sliabh nan crann-oladh, thàinig a dheisciobuil d'a ionnsuidh an uaighidheas, ag ràdh, Innis dhuinne, c' uin' a thig na nithe sin *gu crìch*? agus ciod e comh-ara do theachd-sa, agus deiridh an t-saoghail?

4 Agus fhreagair Iosa agus thubhairt e riu, Thugaibh an aire nach meall aon neach sibh:

5 Oir thig mòran a'm' ainm-sa, ag ràdh, Is mise Crìosd; agus meallaidh iad mòran.

6 Agus cluinnidh sibh cog-anna, agus tuairisgeul chog-anna: thugaibh an aire nach bi sibh fo amhladh: oir is éigin do na *nithibh sin* uile teachd gu crìch, ach cha'n 'eil an deir-eadh ann fathast.

7 Oir éiridh cinneach an aghaidh cinnich, agus rìoghachd an aghaidh rìoghachd: agus bithidh gorta, agus plàighean, agus criothanna-talmhainn ann am mòran àitean.

8 Agus cha'n 'eil annta so uile ach toiseach thruaighean.

9 An sin bheir iad thairis sibh chum àmhghair, agus marbhaidh iad sibh: agus bithidh fuath aig gach uile chinneach dhuibh air sgàth m' ainme-sa.

10 Agus an sin gabhaidh mòran oilbheum, agus brathaidh iad a chéile, agus bithidh fuath aca d'a chéile.

11 Agus éiridh mòran do

fhàidhibh bréige, agus meallaidh iad mòran.

12 Agus do bhrìgh gu'm bi an eucoir air a meudachadh, fuaraidhidh gràdh mhòran.

13 Ach ge b'e bhitheas seasmhach chum na crìche, 's e so a thèarnar.

14 Agus bithidh soisgeul so na rìoghachd air a shearmonachadh air feadh an domhain uile, mar fhianuis do na h-uile chinnich: agus an sin thig an deireadh.

15 Air an aobhar sin an uair a chi sibhse gràineileachd an léir-sgrìos, air an do labhair Daniel am fàidh, 'na seasamh ann an ionad naomh, (tuigeadh an tì a leughas,)

16 An sin teicheadh iadsan *a ta* ann an Iudea, chum nam beann:

17 An tì a *ta* air mullach an tighe, na tigeadh e nuas a thabhairt ni sam bith leis as a thig:

18 Agus an tì a *ta sa'* mhach-air, na pilleadh e air ais a thogail 'fhalluin leis.

19 Agus is an-aoibhinn do na mnaibh torrach, agus dhoibh-san a bheir cìoch uatha sna làithibh sin.

20 Ach guidhibh-sa gun bhur teicheadh a bhi sa' gheamhradh, no air an t-sàbaid:

21 Oir anns an àm sin bithidh àmhghar mòr ann, amhuil nach robh ann o thùs an domhain gus a nis, agus nach mò a bhitheas a chaoidh.

22 Agus mur biodh na làithean sin air an giorrachadh, cha bhiodh feoil sam bith air a tèarnadh: ach air son nan daoine taghta bithidh na làithean sin air an giorrachadh.

23 An sin ma their aon duine ribh, Feuch, *a ta* Crìosd an so, no an sud; na creidibh e:

24 Oir éiridh Crìosdan bréige, agus fàidhean bréige, agus ni iad comharan agus miorbhuilean mòra, ionnus gu mealladh iad, nam feudadh e bhi, na daoine taghta féin.

25 Feuch, dh'innis mi dhuibh e roimh-làimh.

26 Uime sin ma their iad ribh, Feuch, a *ta* e san fhàsach, na rachaibh a mach: feuch, *a ta* e sna seòmraichibh uaigneach, na creidibh sin.

27 Oir a réir mar a thig an dealanach o'n àird an ear, agus a dhealraicheas i gus an àird an iar; mar sin mar an ceudna bhitheas teachd Mhic an duine.

28 Oir ge b'e àit am bi a chairbh, is ann an sin a chruinnichear na h-iolairean.

29 Air ball an déigh trioblaid nan làithean ud, dorchaichear a' ghrian, agus cha tabhair a' ghealach a solus, agus tuitidh na reultan o nèamh, agus bithidh cumhachdan nan nèamh air an crathadh.

30 Agus an sin foillsichear comhara Mhic an duine an nèamh: agus an sin ni uile threubha na talmhainn bròn, agus chi iad Mac an duine a' teachd air neulaibh nèimh, le cumhachd agus glòir ro-mhòir.

31 Agus cuiridh e mach 'aingil le fuaim mhòir na gall truimp, agus cruinnichidh iad a shluagh taghta o na ceithir gaothaibh, o leth-iomall nèimh gus an leth-iomall eile.

32 Ach fòghlumaibh cosamhlachd o'n chrann-fhìge: an uair a bhitheas a gheug a nis maoth, agus a dh'fhàsas an duilleach, aithnichidh sibh gur fagus an samhradh:

33 Agus mar an ceudna, an uair a chi sibhse na nithe sin uile, biodh fios agaibh gu bheil

e am fagus, *eadhon* aig na dors-aibh.

34 Gu deimhin a ta mi ag ràdh ribh, Nach téid an ginealach so féin thairis, gus an tach-air na nithe so uile.

35 Théid nèamh agus talamh thairis, ach cha téid mo bhriathra-sa thairis a chaoidh.

36 Ach cha'n 'eil fios an là no na h-uaire sin aig duine air bith, no fòs aig ainglibh neimh, ach aig m' Athair-sa a mhàin.

37 Ach amhuil a *bha* làithean Noe, mar sin mar an ceudna bithidh teachd Mhic an duine.

38 Oir mar a bha iad anns na làithibh roimh an tuil ag itheadh agus ag òl, a' pòsadh agus a' toirt am pòsadh, gus an là an deachaidh Noe a steach san àire,

39 Agus nach robh fhios aca gus an d'thàinig an tuil, agus an do thog i leatha iad uile ; mar sin mar an ceudna bithidh teachd Mhic an duine.

40 An sin bithidh dithis air a' mhachair ; gabhar fear aca, agus fàgar am fear eile.

41 Bithidh dithis bhan a' meileadh anns a' mhuilean ; gabhar a h-aon aca, agus fàgar an aon eile.

42 Uime sin dèanaibh-sa faire, oir cha'n 'eil fhios agaibh cia an uair an tig bhur Tighearn.

43 Ach a ta fhios so agaibh, nam b' fhiosrach fear an tighe cia an uair an tigeadh an gaduiche, gu'n dèanadh e faire, agus nach fulaingeadh e gu'm bristeadh a thigh troimh.

44 Uime sin bithibh-sa ullamh mar an ceudna : oir is ann an uair nach saoil sibh, a thig Mac an duine.

45 Cò e ma seadh a ta 'na òglach firinneach agus glic, a chuir a Thighearn os ceann a mhuinntir, a thabhairt bìdh dhoibh na àm féin ?

46 *Is* beannaichte an t-òglach sin, a gheibh a Thighearna, ri àm dha teachd, a' dèanamh mar sin.

47 Gu deimhin a ta mi ag ràdh ribh, gu'n cuir se e os ceann a mhaoin gu h-ìomlan.

48 Ach ma their an droch sheirbhiseach ud 'na chridhe, A ta mo Thighearn a' cur dàil 'na theachd ;

49 Agus ma thòisicheas e air a chomh-sheirbhisich a bhualadh, agus air itheadh agus òl maille ri luchd-misge ;

50 Thig Tighearn an òglach sin ann an là nach 'eil suil aige ris, agus ann an uair nach fios da,

51 Agus gearraidh e 'na bhloighdibh e, agus bheir e a chuibhrionn *da* maille ris na cealgairibh : an sin bithidh gul agus giosgan fhiacal.

CAIB. XXV.

AN sin samhlaichear rioghachd nèimh ri deich òighibh, a thug leo an lòchrain, agus a chaidh a mach an còdhail an fhir nuadh-phòsda.

2 Agus bha cùignear dhiubh glic, agus cùignear amaideach.

3 Thug iadsan a bha amaid-each an lòchrain *leo*, ach cha d'thug iad oladh leo.

4 Ach iadsan a bha glic, thug iad oladh leo 'nan soithichibh maille r'an lòchranaibh.

5 Agus air dèanamh maille do'n fhear nuadh-phòsda, thuit clò codail orra uile, agus suain.

6 Ach anns a' mheadhon-oidhe rinneadh glaoth, Feuch, a ta am fear nuadh-phòsda a' teachd ; rachaibh a mach g'a choinneachadh.

7 An sin dh'éirich na h-òigh-ean ud uile, agus dheasaich iad an lòchrain.

8 Agus thubhairt na h-òighean amaidheach riusan a bha glic, Thoiribh dhuinne *cuid* do bhur n-oladh; oir a ta ar lòchrain a' dol as.

9 Ach fhreagair iadsan a bha glic, ag ràdh, Air eagal nach bi na 's leoir ann dhuinn féin agus dhuibh-san, gu ma feàrr leibh dol a chum an luchd-reicidh, agus ceannaichibh dhuibh féin.

10 Agus am feadh a bha iad a' dol a cheannach, thàinig am fear-nuadh pòda; agus chaidh iadsan a bha ullamh a steach leis chum a' phòsaidh, agus dhruid-eadh an dorus.

11 'Na dhéigh sin thàinig mar an ceudna na h-òighean eile, ag ràdh, A Thighearn, a Thighearn, fosgail dhuinne.

12 Ach fhreagair esan agus thubhairt e, Gu deimhin a ta mi ag ràdh ribh, nach aithne dhomh sibh.

13 Dèanaibh faire air an aobhar sin, do bhrìgh nach aithne dhuibh an là no an uair, air an tig Mac an duine.

14 Oir is cosmhuil e ri duine a' dol air choigrich, a ghairm a sheirbhisich, agus a thug dhoibh a mhaoin:

15 Agus do h-aon diubh thug e cùig tàlanna, agus do neach eile a dhà, agus do neach eile a h-aon; do gach aon fa leth a réir a chomais; agus air ball ghabh e a thurus.

16 Agus dh'imich esan a fhuair na cùig tàlanna, agus rinn e ceannachd leo, agus bhuannaich e cùig tàlanna eile.

17 Agus mar an ceudna esan a fhuair a dhà, bhuannaich e dithis eile.

18 Ach an tì a fhuair a h-aon, dh'imich e agus chladhaich e san talamh, agus dh'fholaidh e air-gìod a mhaighstir.

19 An déigh aimsir fhada

thàinig Tighearna nan seirbhisich sin, agus rinn e cunntas riu.

20 Agus thàinig esan a fhuair na cùig tàlanna, agus thug e leis cùig tàlanna eile, ag ràdh, A Thighearna, thug thu dhomh-sa cùig tàlanna: feuch, bhuannaich mi cùig tàlanna eile thuilleadh orra.

21 Agus thubhairt a Thighearna ris, Is maith, a dheadh sheirbhisich fhìrinnich; bha thusa fìrinneach ann am beagan, cuiridh mise os ceann mhòran thu: imich a steach do aoibhneas do Thighearn.

22 Agus thàinig esan a fhuair an dà thàlann, agus thubhairt e, A Thighearna, thug thu dhomh-sa dà thàlann: feuch, bhuannaich mi dà thàlann eile thuilleadh orra.

23 Thubhairt a Thighearna ris, Is maith, a dheadh sheirbhisich fhìrinnich; bha thusa fìrinneach ann am beagan *do nithibh*, cuiridh mise os ceann mòran *do nithibh* thu: imich a steach do aoibhneas do Thighearn.

24 Ach an uair a thàinig esan a fhuair an t-aon tàlann, thubhairt e, A Thighearna, bha fhios agam gur duine cruaidh thu, a bhuaineas san àite nach do chuir thu, agus a thionailas san ionad anns nach do sgaoil thu;

25 Agus air dhomh bhi fo eagal, chaidh mi agus dh'fholaidh mi do thàlann san talamh: feuch, sin agad do chuid féin.

26 Fhreagair a Thighearn agus thubhairt e ris, A sheirbhisich uile agus leisg, bha fhios agad gu buainim-sa san àit anns nach do chuir mi, agus gu tionalam as an ionad anns nach do sgaoil mi;

27 Bu chòir dhuit uime sin m' airgìod a thabhairt do'n luchd-malairt, agus air dhomh

teachd gheibhinn mo chuid féin maille r'a riadh.

28 Buinibh uaith uime sin an tàlann, agus thugaibh dhasan e, aig am bheil na deich tàlanna.

29 (Oir do gach neach aig am bheil bheirear, agus bithidh aige gu pailt : ach uaith-san aig nach 'eil, bheirear eadhon an ni sin a ta aige.)

30 Agus tilgibh an seirbhis-each mi-tharbhach so do dhorchadas iomallach : an sin bithidh gul agus giosgan fhiacal.

31 An uair a thig Mac an duine 'na ghloir, agus na h-aingil naomha uile maille ris, an sin suidhidh e air caithir rìoghail a ghloire :

32 Agus cruinnichear 'na làthair na h-uile chinnich ; agus sgaraidh e iad o chéile, amhuil a sgaras buachaill na caoraich o na gabhraibh :

33 Agus cuiridh e na caoraich air a làimh dheis, ach na gabh-air air a làimh chli.

34 An sin their an Rìgh rìusan air a dheis, Thigibh, a dhaoine beannaichte m' Athar-sa, sealbh-aichibh mar oighreachd an rìoghachd a ta air a deasachadh dhuibh o leagadh bunaite an domhain :

35 Oir bha mi ocrach, agus thug sibh dhomh biadh : bha mi tartmhor, agus thug sibh dhomh deoch : bha mi a'm' choigreach, agus thug sibh aoidheachd dhomh :

36 Lomnochd, agus dh'eudaich sibh mi : bha mi euslan, agus thàinig sibh g'am amharc : bha mi am prìosan, agus thàinig sibh a m' ionnsuidh.

37 An sin freagraidh na fireana e, ag ràdh, A Thighearna, c' uin' a chunnaic sinn ocrach thu, agus a bheathaich sinn thu? no tartmhor, agus a thug sinn deoch dhuit?

38 No c' uin' a chunnaic sin a'd' choigreach thu, agus a thug sinn aoidheachd dhuit? no lomnochd, agus a dh' eudaich sinn thu?

39 No c' uin' a chunnaic sinn euslan thu, no am prìosan, agus a thàinig sinn a d'ionnsuidh?

40 Agus freagraidh an Rìgh, agus their e riu, Gu deimhin a ta mi ag ràdh ribh, a mheud 's gu'n do rinn sibh e do aon do na bràithribh a's lugha agam-sa, rinn sibh dhomh-sa e.

41 An sin their e mar an ceudna rìusan air an làimh chli, Imichibh uam, a shluagh mall-uichte, dh'ionnsuidh an teine shìorruidh, a dh'ulluicheadh do'n diabhul agus d'a ainglibh :

42 Oir bha mi ocrach, agus cha d'thug sibh dhomh biadh : bha mi tartmhor, agus cha d'thug sibh dhomh deoch :

43 Bha mi a'm' choigreach, agus cha d'thug sibh aoidheachd dhomh : lomnochd, agus cha d'eudaich sibh mi : euslan, agus am prìosan, agus cha d'thàinig sibh g'am amharc.

44 An sin freagraidh iadsan mar an ceudna e, ag ràdh, A Thighearna, c' uin' a chunnaic sinne thu ocrach, no tartmhor, no d' choigreach, no lomnochd, no euslan, no am prìosan, agus nach do fhritheil sinn dhuit?

45 An sin freagraidh esan iad, ag ràdh, Gu deimhin a ta mi ag ràdh ribh a mheud 's nach d'rinn sibh e do'n neach a's lugha dhiubh so, cha d'rinn sibh dhomh-sa e.

46 Agus imichidh iadsan chum peanais shìorruidh ; ach na fireana chum na beatha mair-eannaich.

CAIB. XXVI.

AUGUS thàrladh, 'nuair a chrìochnaich Iosa na briath-

ra so uile, gu'n dubhairt e r'a dheisciobluibh,

2 A ta fhios agaibh gu bheil a' chàisg an déigh dà là, agus a ta Mac an duine air a bhrath chum a chèusadh.

3 An sin chruinnich uachdar-ain nan sagart, agus na sgrìobhaichean, agus seanairean a phobuill, gu talla an àrd-shagairt, d'an goirear Caiaphas,

4 Agus ghabh iad comhairle le chéile chum Iosa a ghlacadh le feall, agus a chur gu bàs.

5 Ach thubhairt iad, Na *dèan-amaid* e san fhéill, air eagal gu'm bi buaireas am measg a' phobuill.

6 Agus air do Iosa a bhi ann am Betani, ann an tigh Shimoin an lobhair.

7 Thàinig bean d'a ionnsuidh aig an robh bocsa alabastair làn do oladh ro luachmhoir, agus dhòirt i air a cheann e, agus e 'na shuidhe aig *biadh*.

8 Ach an uair a chunnaic a dheisciobuil *sin*, bha fearg orra, ag ràdh, Ciod is ciall do'n ana-caitheadh so?

9 Oir dh'fheudadh an oladh so bhi air a reiceadh air mhòran, agus a bhi air a toirt do na bochdaibh.

10 Ach air aithneachadh so do Iosa, thubhairt e riu, C'ar son a ta sibh a' cur dragha air a' mhnaoi? oir rinn i deadh obair dhomh-sa.

11 Oir a ta na bochdan agaibh a ghnàth maille ribh, ach cha'n 'eil mise agaibh a ghnàth.

12 Oir air dòrtadh na h-oladh so dh' i air mo chorp-sa, is ann fa chomhair m'adhlaic a rinn i e.

13 Gu deimhin a ta mi ag ràdh ribh, Ge b'e àit am bi an soisgeul so air a shearmonachadh air feadh an t-saoghail gu h-iomlan, aithrisear an ni a rinn a' bhean so, mar chuimhne oirre.

14 An sin dh'imich aon do'n dà fhear dheug, d'am b'ainm Iudas Iscariot, chum nan àrd-shagart.

15 Agus thubhairt e, Ciod a bheir sibh dhomh-sa, agus brathaidh mi dhuibh e? Agus chòird iad ris air dheich buinn fhichead airgid.

16 Agus o'n àm sin a mach dh'iarr e fàth air esan a bhrath.

17 Agus air a' cheud là do *fhéill* an arain neo-ghoirtichte, thàinig na deisciobuil chum Iosa, ag ràdh ris, C'àit an àill leat sinne a dh'ulluchadh dhuit, chum gu'n ith thu a' chàisg?

18 Agus thubhairt esan, Rach-aibh do'n bhaile gu leithid so do dhuine, agus abraibh ris, Tha am maighstir ag ràdh, A ta m'am am fagus, cumaidh mi a' chàisg aig do thigh-sa maille ri m' dheisciobluibh.

19 Agus rinn na deisciobuil mar a dh'òrduich Iosa dhoibh, agus dheasaich iad a' chàisg.

20 Agus an uair a thàinig am feasgar, shuidh e maille ris an dà fhear dheug.

21 Agus ag itheadh dhoibh, thubhairt e, Gu deimhin a ta mi ag ràdh ribh, gu'm brath fear dhibh mise.

22 Agus bha iad ro bhrònach, agus thòisich gach aon aca fa leth air a ràdh ris, Am mise e, a Thighearn?

23 Agus fhreagair esan agus thubhairt e, An tì a thumas a làmh sa' mhèis maille rium-sa, brathaidh esan mi.

24 Gu deimhin a ta Mac an duine ag imeachd, a réir mar a ta e sgrìobhta m'a thimchioll: ach is an-aoibhinn do'n duine sin le'm brathar Mac an duine: bu mhaith do'n duine sin mur beirte riamh e.

25 An sin fhreagair Iudas a bhrath e, agus thubhairt e, A

mhaighstir, am mise e? Thubhairt esan ris, Thubhairt thu.

26 Agus ag itheadh dhoibh, ghlac Iosa aran, agus air tabhairt buidheachais, bhris se e, agus thug e do na deisciobluibh e, agus thubhairt e, Gabhaibh, ithibh: is e so mo chorp-sa.

27 Agus air glacadh a' chupain, agus air tabhairt buidheachais, thug e dhoibh e, ag ràdh, Olaibh uile dheth:

28 Oir is i so m'fhuil-sa an tiomnaidh nuaidh, a dhòirtear air son mhòran chum maitheanais pheacanna.

29 Ach tha mi ag ràdh ribh, Nach òl mi á so suas do thoradh so na fionain, gus an là sin an òl mi e nuadh maille ribh ann an rìoghachd m'Athar.

30 Agus air dhoibh laoidh a sheinn, chaidh iad a mach gu sliabh nan crann-oladh.

31 An sin thubhairt Iosa riu, Gheibh sibh uile oilbheum annam-sa an nochd; oir a ta e sgriobhta, Buailidh mi am buachaill, agus sgapar caoraich an treuda.

32 Ach an déigh dhomh-sa éirigh a rìs, théid mi roimhibh do Ghalile.

33 Agus fhreagair Peadar agus thubhairt e ris, Ged gheibh gach uile dhaoine oilbheum annad, cha'n fhaigh mise oilbheum gu bràth.

34 Thubhairt Iosa ris, Gu deimhin a ta mi ag ràdh riut, air an oidhche so féin mu'n goir an coileach, gu'n àicheadh thu mi trì uairean.

35 Thubhairt Peadar ris, Ged a b'éigindhomh bàsachadh maille riut, cha'n àicheadh mi thu. Agus thubhairt na deisciobuil uile mar an ceudna.

36 An sin thàinig Iosa maille riu gu ionad d'an goirear Getsemane, agus thubhairt e ris na

deisciobluibh, Suidhibh-sa an so, gus an téid mise a dhèanamh ùrnuigh an sud.

37 Agus thug e Peadar leis, agus dithis mhac Shebede, agus thòisich e air a bhi brònach, agus ro dhoilgheasach.

38 An sin thubhairt e riu, A ta m'anam ro bhrònach, eadhon gu bàs: fanaibh-sa an so, agus dèanaibh faire maille riumsa.

39 Agus dh'imich e beagan air adhart, agus thuit e air aghaidh, a' dèanamh ùrnuigh, agus ag ràdh, O m' Athair, ma dh'fheudas e bhi, rachadh an cupan so seachd orm: 'gidheadh, na biodh e mar is àill leamsa, ach mar is toil leatsa.

40 Agus thàinig e chum nan deisciobul, agus fhuair e 'nan codal iad, agus thubhairt e ri Peadar, An ann mar sin, nach b'urrainn sibh faire a dhèanamh aon uair a mhàin maille riumsa?

41 Dèanaibh faire agus ùrnuigh, chum nach tuit sibh am buaireadh: a ta gun amharus an spiorad togarach; ach a ta 'n fheoil anmhunn.

42 A rìs an dara uair, dh'imich e agus rinn e ùrnuigh, ag ràdh, O m' Athair, mur feudar gu'n téid an cupan so seachad orm, gun mi 'ga òl, do thoil-sa gu robh dèanta.

43 Agus thàinig e agus fhuair e iad a rìs 'nan codal: oir bha an sùilean trom.

44 Agus dh'fhàg e iad, agus dh'imich e a rìs, agus rinn e ùrnuigh an treas uair, ag ràdh nam briathra ceudna.

45 An sin thàinig e chum a dheisciobul, agus thubhairt e riu, Coidlibh roimhibh a nis, agus gabhaibh fois; feuch, a ta an uair air druidealh, agus a ta Mac an duine air a bhrath thairis do làmbaibh pheacach.

46 Eiribh, imicheamaid: feuch, a ta an tì a bhrathas mise am fagus.

47 Agus air dha bhi fathast a' labhairt, feuch, thàinig Iudas, aon do'n dà fhear dheug, agus maille ris cuideachd mhòr le claidhibh agus bataibh o nah-àrd-shagartaibh agus o sheanairibh a' phobuill.

48 A nis bha an tì a bhrath esan air tabhairt comhara dhoibh, ag ràdh, Ge b'e neach a phògas mise, is e sin e; dèanaibh greim air.

49 Agus air ball thàinig e chum Iosa, agus thubhairt e, Fàilte dhuit, a mhaighstir; agus phòg se e.

50 Ach thubhairt Iosa ris, A charaid, c'ar son a thàinig thu? An sin thàinig iad, agus chuir iad làmh ann an Iosa, agus ghlac iad e.

51 Agus, feuch, shìn a h-aon diubhsan a bha maille ri Iosa a làmh, agus tharruinge a chlaidheamh, agus air dha seirbhiseach an àrd-shagairt a bhualadh, gheàrr e a chluas dheth.

52 An sin thubhairt Iosa ris, Cuir a rìs do chlaidheamh air ais 'na ionad féin: oir iadsan uile a ghlacas an claidheamh, tuitidh iad leis a' chlaidheamh.

53 An saoil thusa nach feud mise a nis m' Athair a ghuidhe, agus bheir e dhomh tuilleadh na dà legion deug do ainglibh?

54 Ach cionnus an sin bhiodh na sgriobtuirean air an coimhlionadh, *a tha 'g ràdh gur ann mar so is éigin tachairt?*

55 Anns an uair sin féin thubhairt Iosa ris an t-sluagh, An d'thàinig sibh a mach mar gu b'ann an aghaidh gaduiche, le claidhibh agus bataibh chum mise a ghlacadh? Bha mi gach là a' m' shuidhe maille ribh san

teampull a' teagasg, agus cha do chuir sibh làmh annam.

56 Ach thachair so uile, chum gu 'm biodh sgriobtuire nam fàidhean air an coimhlionadh. An sin thréig na deisciobuill uile e, agus theich iad.

57 Agus air dhoibh-san Iosa a ghlacadh, thug iad leo e gu Caiaphas an t-àrd-shagart, far an robh na sgriobhaichean agus na seanairean air cruinneachadh.

58 Ach lean Peadar e fad uatha, eadhon gu talla an àrd-shagairt, agus chaidh e steach, agus shuidh e maille ris na seirbhisich, a dh'fhaicinn na criche.

59 Agus dh'iarr na h-àrd-shagairt agus na seanairean, agus a' chomhairle uile, fianuis bhréige an aghaidh Iosa, chum a chur gu bàs.

60 Ach cha d'fhuair iad: seadh, ge do thàinig mòran do fhianuisibh bréige, cha d'fhuair iad. Fa dheòidh thàinig dà fhianuis bhréige.

61 Agus thubhairt iad, Thubhairt am fear so, Is urrainn mise teampull Dé a leagadh, agus a thogail a ris an trì làithibh.

62 Agus air do'n àrd-shagart éirigh, thubhairt e ris, Nach freagair thu bheag? Ciod e a ta iad sin a' toirt fianuis a' d' aghaidh?

63 Ach dh'fhan Iosa 'na thosd, Agus fhreagair an t-àrd-shagart agus thubhairt e ris, A ta mi ga d' mhionnachadh air an Dia bheò, gu'n innseadh tu dhuinn, an tu Crìosd Mac Dhé.

64 Thubhairt Iosa ris, Thubhairt thu: gidheadh tha mi ag ràdh ribh, 'Na dhéigh so chi sibh Mac an duine 'na shuidhe air deas làimh cumhachd *Dhé*, agus a' teachd air neulaibh nèimh.

65 An sin reub an t-àrd-shag-art 'eudach, ag ràdh, Gu'n do labhair e toibheum; ciod am feum tuilleadh a ta againn air fianuisibh? feuch, a nis chuala sibh a thoibheum.

66 Ciod i bhur barail-sa? Fhreagair iadsan agus thubhairt iad, A ta e toillteanach air a' bhàs.

67 An sin thilg iad smugaid 'na eudan, agus bhuail iad le 'm basaibh e; agus ghabh cuid eile air le slataibh,

68 Ag ràdh, Dèan fàidhead-aireachd dhuinn, a Chrìosd, Cò e a bhuail thu?

69 Agus shuidh Peadar a mach anns an talla: agus thàinig cail-in àraidh d'a ionnsuidh, ag ràdh, Bha thusa mar an ceudna maille ri Iosa o Ghalile.

70 Ach dh'àicheadh esan 'nan làthair uile, ag ràdh, Cha'n 'eil fhios agam ciod a ta thu ag ràdh.

71 Agus air dol a mach dha do'n fhor-dhorus, chunnaic *cail-in* eile e, agus thubhairt i riu-san a bha 'n sin, Bha 'm fear so mar an ceudna maille ri Iosa o Nasaret.

72 Agus dh'àicheadh e a ris le mionnaibh, *ag ràdh*, Cha'n aithne dhomh an duine.

73 Agus tamull beag 'na dhéigh sin thàinig an dream a bha 'nan seasamh a làthair, agus thubhairt iad ri Peadar, Gu fir-inneach is ann diubh sud féin tha thusa; oir a ta do chainnt ga d' bhrath.

74 An sin thòisich e ri mall-achadh agus mionnachadh, *ag ràdh*, Cha'n aithne dhomh an duine. Agus air ball ghoir an coileach.

75 Agus chuimhnich Peadar briathran Iosa, a thubhairt ris, Mu'n goir an coileach, àicheadh-aidh tu mi trì uairean. Agus

air dol a mach dha, ghuil e gu geur.

CAIB. XXVII.

AIR teachd do'n mhaduinn, ghabh uachdarain nan sag-art uile, agus seanairean a' phob-uill, comhairle le chéile an aghaidh Iosa, chum a chur gu bàs.

2 Agus air dhoibh esan a cheangal, thug iad leo e, agus thug iad thairis e do Phontius Pilat an t-uachdaran.

3 An sin an uair a chunnaic Iudas a bhrath e, gu'n do dhìtheadh e, ghabh e aithreachas, agus thug e air an ais na deich buinn fhichead airgid do na h-àrd-shagartaibh, agus do na seanairibh,

4 Ag ràdh, Pheacaich mi, ann am brath na fola neòchiontaich. Ach thubhairt iadsan, Ciod e sin duinne? amhaire thusa *air sin*.

5 Agus air tilgeadh uaith nam bonn airgid anns an team-pull, dh'imich e roimhe, agus chaidh e agus chroch se e féin.

6 Agus ghlac na h-àrd-shag-airt na buinn airgid, agus thubhairt iad, Cha chòir an cur san ionmhas, oir is luach fola iad.

7 Agus air gabhail comhairle dhoibh, cheannaich iad leo fear-ann a' chriadhadair, chum a bhi 'na àit-adhlaic do choigrich.

8 Air an aobhar sin goirear do'n fhearann sin, Fearann na fola, gus an là'n diugh.

9 (An sin choimhlionadh an ni a labhradh le Ieremias am fàidh, ag ràdh, Agus ghabh iad na deich buinn fhichead airgid, luach an Tì a mheasadh, neach a mheas iadsan a bha do chloinn Israeil,

10 Agus thug siad iad air son fearainn a' chriadhadair, mar a dh'òrduich an Tighearna dhomh-sa.)

11 Agus sheas Iosa an làthair an uachdarain: agus dh'fhios-

raich an t-uachdaran dheth, ag ràdh, An tusa Rìgh nan Iudhach? Agus thubhairt Iosa ris, Thubhairt thu.

12 Agus an uair a chuir na h-àrd-shagairt agus na seanair-ean cionta as a leth, cha do fhreagair e ni sam bith.

13 An sin thubhairt Pilat ris, Nach cluinn thu cia lìon nithe air am bheil iad a' toirt fianuis a' d' aghaidh?

14 Agus cha d'thug e freagradh dha air aon fhocal; ionnus gu'n do ghabh an t-uachdaran iongantais ro mhòr.

15 A nis ri àm na féille chleachd an t-uachdaran aon phrìosanach a b' àill leo chur fa sgaoil do'n phobull.

16 Agus bha aca san àm sin prìosanach ro-chomharaichte, d'am b' ainm Barabas.

17 Air an aobhar sin an uair a bha iad cruinn an ceann a chèile, thubhairt Pilat riu, Cò is àill leibh mise a chur fa sgaoil duibh? Barabas, no Iosa, d'an goirear Crìosd?

18 Oir bha fhios aige gu'm b' ann o fharmad a thug iad thairis e.

19 Agus an uair a bha e 'na shuidhe air caithir a' bhreitheanais, chuir a bhean *teachdair-eachd* d'a ionnsuidh, ag ràdh, Na biodh agad-sa gnothuch sam bith ris an fhìrean sin: oir is mòr a dh'fhulaing mise an diugh ann am bruadar, air a shon-san.

20 Ach chuir na h-àrd-shagairt agus na seanair-ean impidh air a' phobull gu'n iarradh iad Barabas, agus gu milleadh iad Iosa.

21 Agus fhreagair an t-uachdaran agus thubhairt e riu, Cò do'n dithis is àill leibh mise a chur fa sgaoil duibh? Thubhairt iadsan, Barabas.

22 Thubhairt Pilat riu, Ciod ma seadh a ni mi ri Iosa d'an goirear Crìosd? Thubhairt iad ris uile, Cèusar e.

23 Agus thubhairt an t-uachdaran, C'ar son? ciod an t-olc a rinn e? ach is mòr gu mòr a ghlaodh iadsan, ag ràdh, Cèusar e.

24 Agus an uair a chunnaic Pilat nach do bhuadhaich e bheag sam bith, ach gu'n d'éirich an tuilleadh buaireis, ghabh e uisge, agus dh'ionnlaid e a làmhnan am fianuis an t-sluaigh, ag ràdh, A ta mise neòchiontach do fhuil an fhìrein so; faicibh-sa sin.

25 Agus fhreagair am pobull uile, agus thubhairt iad, Biodh 'fhuil oirne, agus air ar cloinn.

26 An sin leig e fa sgaoil Barabas dhoibh: ach air dha Iosa a sgiùrsadh, thug e thairis e chum a chèusadh.

27 An sin thug saighdearan an uachdarain leo Iosa do thalla a' bhreitheanais, agus ehruinnich iad a' bhuidheann uile m'a thimchioll.

28 Agus air dhoibh a rùsgadh, chuir iad uime falluinn scarlaid.

29 Agus air dhoibh crùn droighinn fhigheadh, chuir iad m'a cheann e, agus slat chuilce 'na làimh dheis: agus lùb iad an glùn 'na làthair, agus rinn iad fanoid air, ag ràdh, Gu'm beannaichear thu, a Rìgh nan Iudhach.

30 Agus thilg iad smugaid air, agus ghlac iad an t-slat chuilce, agus bhuail iad sa' cheann e.

31 Agus an déigh dhoibh fanoid a dhèanamh air, thug iad an fhalluinn dheth, agus chuir iad 'eudach féin uime, agus thug iad leo e chum a chèusadh.

32 Agus an uair a chaidh iad a mach, fhuair iad duine o Chir-ene, d'am b' ainm Simon: esan dh'éignich iad chum a chrann-chèusaidh-san a ghiùlan.

33 Agus an uair a thàinig iad gu ionad d'an ainm Golgota, sin r'a ràdh, àite cloiginn,

34 Thug iad dha r'a òl fion geur, measgta le domblas: agus air dha a bhlasadh, cha'n òladh se e.

35 Agus an uair a chèus iad e, roinn iad a thrusgan eatorra, a' tilgeadh crannchuir: chum gu'n coimhliontadh an ni a labhradh leis an fhàidh, Roinn iad m'eudach eatorra, agus chuir iad crannchur air mo bhrat.

36 Agus shuidh iad, agus rinn iad faire air an sin:

37 Agus chuir iad a chèis-dhìtidh sgrìobhta os a cheann, IS E SO IOSA RIGH NAN IUDHACH.

38 An sin chèusadh maille ris dà ghaduiche; fear air a làimh dheis, agus fear eile air a làimh chlì.

39 Agus thug iadsan a bha dol seachad toibheum dha, a' crathadh an ceann,

40 Agus ag ràdh, Thusa a leagas an teampull, agus a chuireas suas an trì làithibh e, fòir ort féin: ma's tu Mac Dhé, thig a nuas o'n chrann-chèusaidh.

41 Mar an ceudna thubhairt na h-ard-shagairt, maille ris na sgrìobhaichibh, agus na seanairibh, a' fanoid air,

42 Shaor e daoine eile, e féin a shaoradh ni 'n comasach e: ma's e Rìgh Israeil, thigeadh e nis a nuas o'n chrann-chèusaidh, agus creididh sinn e.

43 Chuir e a dhòigh an Dia; saoradh e a nis e, ma tha toil aige dha: oir thubhairt e, Is mise mac Dhé.

44 Agus thug na gaduichean, a chèusadh maille ris, am beum ceudna dha.

45 A nis o'n t-seathadh uair bha dorchadas air an tìr uile gus an naothadh uair.

46 Agus mu thimchioll na naothadh uaire dh'éigh Iosa le guth àrd, ag ràdh, Eli, eli, lama sabachtani? is e sin r'a ràdh, Mo Dhia, mo Dhia, c'ar son a thréig thu mi?

47 Agus air cluinntinn sin do chuid diubhsan a bha 'nan seasamh an sin, thubhairt iad. A ta am fear so a' glaodhach air Elias.

48 Agus air ball ruith a h-aon diubh, agus ghabh e spong, agus lìon e do fhion geur i, agus air dha a cur air slait chuilce, thug e dha r'a òl.

49 Ach thubhairt càch, Leig dha, faiceamaid an tig Elias g'a thèarnadh.

50 Agus an uair a dh'éigh Iosa a ris le glaodh mòr, thug e suas a spiorad.

51 Agus, feuch, reubadh brat-roinn an teampull 'na dhà chuid, o mhullach gu ìochdar; agus chrìochnuich an talamh, agus sgoilteadh na creagan:

52 Agus dh'fhosglaidh na h-uaighean, agus dh'éirich mòran da chorpaibh nan naomh, a bha 'nan codal,

53 Agus chaidh iad a mach as na h-uaighibh an déigh 'aiseirigh-san, agus chaidh iad a steach do'n bhaile naomh, agus nochdadh iad do mhòran.

54 A nis an uair a chunn-aid an ceannard-ceud, agus iadsan a bha maille ris a' coimhead Iosa, a' chrith-thalmhainn, agus na nithe eile a rinneadh, ghabh iad eagal mòr, ag ràdh, Gu firinneach b'e so Mac Dhé.

55 Agus bha an sin mòran bhan (ag amharc am fad,) a

lean Iosa o Ghalile, a' fritheal-adh dha :

56 Am measg an robh Muire Magdalen, agus Muire màthair Sheumais agus Ioseis, agus màthair cloinne Shebede.

57 Agus air teachd do'n fheasgar, thàinig duine saoi bhir o Arimatea, d'am b'ainm Ioseph, a bha e féin 'na dheisciobul aig Iosa mar an ceudna.

58 Chaidh esan gu Pilat, agus dh'iarr e corp Iosa : an sin dh'àithn Pilat an corp a thabhairt da.

59 Agus ghlac Ioseph an corp, agus phaisg e ann an lion-eudach fìor-ghlan e,

60 Agus chuir se e 'na uaigh nuaidh féin, a chladhaich e ann an carraig : Agus charuich e clach mhòr gu dorus na h-uaighe, agus dh'imich e roimhe.

61 Agus bha Muire Magdalen, agus a' Mhuire eile 'nan suidhe fa chomhair na h-uaighe.

62 A nis air an là màireach, an là 'n déigh an ulluchaidh, chruinnicheadh na h-àrd-shagairt, agus na Phairisich gu Pilat,

63 Ag ràdh, a Thighearn, is cuimhne leinn an uair a bha am mealltair ud fathast beò, gu'n dubhairt e, Eiridh mi an déigh thrì làithean.

64 Orduich uime sin an uaigh a bhi air a coimhead gu cinnteach gus an treas là, air eagal gu'n tig a dheisciobuil san oidhe, agus gu'n goid iad leo e, agus gu'n abair iad ris an t-sluagh, Dh'éirich e o na marbhaibh : agus mar sin bithidh am mearachd deireannach nì's miosa na'n ceud mhearachd.

65 Thubhairt Pilat riu, Tha faire agaibh ; imichibh, dèanaibh an uaigh cho tèaruinte 's is aithne dhuibh.

66 Agus dh'imich iad agus

rinn iad an uaigh cinnteach, a' cur seula air a' chloich, maille ri faire.

CAIB. XXVIII.

AN déigh na sàbaid, aig bris-eadh na faire air a' cheud lá do'n t-seachduin, thàinig Muire Magdalen, agus a' Mhuire eile, a dh'fhaicinn na h-uaighe.

2 Agus, feuch, bha crith-thalmhainn mhòr ann ; oir thàinig aingeal an 'Tighearna nuas o nèamh, agus air teachd dha charuich e a' chlach o'n dorus, agus shuidh e oirre.

3 Agus bha a ghnùis mar dhealanach, agus 'eudach geal mar shneachdadh.

4 Agus air eagal roimhe chriothnuich an luchd-coimhid, agus chaidh iad an riochd mairbh.

5 Ach fhreagair an t-aingeal agus thubhairt e ris na mnaibh, Na biodh eagal oirbhse : oir a ta fhios agam gu bheil sibh ag iarraidh Iosa, a chaidh chèusadh.

6 Cha'n 'eil e 'n so ; oir dh'éirich e, mar a thubhairt e : thigibh, faicibh an t-àit an robh an 'Tighearn 'na luidhe.

7 Agus imichibh gu luath, agus innsibh d'a dheisciobluibh gu'n d'éirich e o na marbhaibh : agus, feuch, tha e dol roimhibh do Ghalile ; an sin chi sibh e ; feuch, thubhairt mise ribh e.

8 Agus dh'imich iad gu luath o'n uaigh, le h-eagal agus mòr-ghàirdeachas, agus ruith iad a dh'innseadh d'a dheisciobluibh.

9 Agus ag imeachd dhoibhsan a dh'innseadh d'a dheisciobluibh, feuch, thachair Iosa féin orra, ag ràdh, Fàilte dhuibh. Agus thàinig iad am fagus da, agus rug iad air a chosaibh, agus rinn iad aoradh dha.

10 An sin thubhairt Iosa riu, Na biodh eagal oirbh : imichibh, abraibh ri m' bhràithribh iadsan

a dhol do Ghalile, agus an sin chi iad mi.

11 Agus an uair a bha iadsan ag imeachd, feuch, thàinig cuid do'n luchd-faire do'n bhaile, agus nochd iad do na h-àrd-shagartaibh gach ni a thachair.

12 Agus air cruinneachadh dhoibhsan an ceann a chéile maille ris na seanairibh, agus air gabhail comhairle dhoibh, thug iad mòran airgid do na saighdearaibh,

13 Ag ràdh, Abraibh-sa gu'n d'thàinig a dheisciobuil anns an oidhche, agus gu'n do ghoid iad e, an uair a bha sinne 'nar codal.

14 Agus ma chluinneas an t-uachdaran so, cuiridh sinne impidh air, agus ni sinn sibhse tèaruinte.

15 Agus ghabh iad an t-airgiod, agus rinn iad mar a theagaisgeadh dhoibh: agus a ta a'

chainnt so air a h-aithris am measg nan Iudhach gus an là 'n diugh.

16 An sin chaidh an t-aon deisciobul deug do Ghalile, do'n bheinn far an d'òrduich Iosa dhoibh.

17 Agus an uair a chunnaic iad e, rinn iad aoradh dha: ach bha cuid aca fo amharus.

18 Agus thàinig Iosa, agus labhair e riu, ag ràdh, Thugadh dhomh-sa gach uile chumbachd air nèamh agus air talamh.

19 Uime sin imichibh-sa, agus dèanaibh deisciobuil do gach uile chinneach, 'gam baisteadh ann an ainm an Athar, agus a' Mhic, agus an Spioraid naomh;

20 A' teagasg dhoibh gach uile nithe a dh'àithn mise dhuibh a choimhead: Agus, feuch, a ta mise maille ribh a ghnàth, gu deireadh an t-saoghail. Amen.

AN SOISGEUL A REIR MHARCUIS.

CAIB. I.

TOISEACH Soisgeil Iosa Crìosd, Mhic Dhé:

2 A réir mar a ta e sgrìobhta anns na fàidhibh, Feuch, cuir-eam mo theachdair roimh do ghnùis a dh'ulluicheas do shlighe romhad.

3 Guth an tì a dh'éigheas anns an fhàsach, Ulluichibh slighe an Tighearna, dèanaibh a cheumanna dìreach.

4 Bha Eoin a' baisteadh anns an fhàsach, agus a' searmonachadh baistidh an aithreachais, chum maitheanais pheacanna.

5 Agus chaidh a mach d'a ionnsuidh tìr Iudea uile, agus luchd-àiteachaidh Ierusalem,

agus bhaisteadh leis iad uile ann an amhainn Iordain, ag aideachadh am peacanna.

6 Agus bha Eoin air eudachadh le fionna chàmhail, agus crios leathair m'a leasraidh; agus bu bhiadh dha locuist agus mil fhiadhaich.

7 Agus shearmonaich e, ag ràdh, A ta neach a' teachd a'm dhéigh a 's cumhachdaiche na mise, neach nach airidh mise air cromadh sìos agus barr-iall a bhròg fhuasgladh.

8 Bhaist mise gu dearbh sibh le h-uisge: ach baistidh esan sibh leis an Spiorad Naomh.

9 Agus thàrladh anns na làithibh sin, gu'n d'thàinig Iosa o Nasaret Ghalile, agus bhaist-

eadh e le h-Eoin ann an Iordan.

10 Agus air ball an uair a chaidh e suas as an uisge, chunnaic e na nèamhan air am fosgladh, agus an Spiorad mar choluman a' teachd a nuas air.

11 Agus thàinig guth o nèamh, *ag ràdh*, Is tusa mo Mhac gràdhach, anns am bheil mo mhòr thlachd.

12 Agus air ball tharruing an Spiorad e do'n fhàsach.

13 Agus bha e'n sin san fhàsach dà fhichead là air a bhuair-eadh le Satan, agus bha e maille ris na fiadh-bheathaichibh, agus fhrithheil na h-aingil dha.

14 Agus an déigh Eoin a chur am prìosan, thàinig Iosa do Ghalile, a' searmonachadh soisgeil rioghachd Dhé,

15 Agus ag ràdh, Choimh-ionadh an aimsir, agus a ta rioghachd Dhé am fagus; dèanaibh-sa aithreachas, agus creidibh an soisgeul.

16 Agus air dha bhi 'g imeachd ri taobh fairge Ghalile, chunnaic e Simon, agus Aindreas a bhràthair, a' tilgeadh lìn san fhairge: (oir b' iasgairean iad.)

17 Agus thubhairt Iosa riu, Thigibh a'm dhéigh-sa, agus ni mi 'nur iasgairibh air daoineibh sibh.

18 Agus air ball dh'fhàg iad an lionta, agus lean iad esan.

19 Agus an uair a chaidh e beagan air aghaidh as a sin, chunnaic e Seumas *mac Shebede*, agus Eoin a bhràthair, agus iad san luing a' càradh an lionta.

20 Agus air ball ghairm e iad; agus dh'fhàg iad Sebede an athair san luing maille ris an luchd-tuairasdail, agus lean iad esan.

21 Agus chaidh iad a steach do Chapernaum; agus air ball air dha dol a stigh do'n t-sionagog air an t-sàbaid, theagaisg e.

22 Agus ghabh iad iongantas r'a theagasg: oir bha e 'gan teagasg mar neach aig an robh ùghdarras, agus cha b'ann mar na sgrìobhaichean.

23 Agus bha 'nan sionagog-san neach anns an robh spiorad neòghlan, agus ghlaodh e,

24 Ag ràdh, Leig leinn; ciod ar gnothuch-ne riut. Iosa o Nasaret? an d'thàinig thu g'ar sgrios-ne? Is aithne dhomh cò thu, aon naomh Dhé.

25 Agus chronuich Iosa e, ag ràdh, Bì a' d' thosd, agus thig a mach as.

26 Agus an uair a reub an spiorad neòghlan e, agus a ghlaodh e le guth àrd, thàinig e mach as.

27 Agus ghabh iad mòr-iongantas uile, ionnus gu'n robh iad a' cur na ceisde so r'a chéile, ag ràdh, Ciod e so? Ciod e an teagasg nuadh so? oir le h-ùghdarras a ta e toirt òrduigh eadhon do na spioradaibh neòghlan, agus tha iad ùmhal dha.

28 Agus chaidh a chliù air ball a mach air feadh na tìre uile timchioll Ghalile.

29 Agus gun dàil, air dhoibh dol a mach as an t-sionagog, chaidh iad a steach do thigh Shimoin agus Aindrais maille ri Seumas agus Eoin.

30 Ach bha màthair-chéile Shimoin 'na luidhe ann am fiabhrus; agus ghrad labhair iad ris uimpe.

31 Agus thàinig esan agus thog e i, a' breith air làimh oirre; agus air ball dh'fhàg am fiabhrus i, agus fhrithheil i dhoibh.

32 Agus an uair a bha 'm feasgar ann, air do'n ghréin dol fuidhe, thug iad d'a ionnsuidh iadsan uile a bha euslan, agus iadsan anns an robh deamhain.

33 Agus bha 'm baile uile air a chruinneachadh chum an doruis.

34 Agus leighis e mòran air an robh iomadh gnè eucail, agus thilg e mach mòran dheamhan, agus cha d'fhulaing e do na deamhnaibh labhairt, air son gu'm b'aithne dhoibh e.

35 Agus air dha éirigh sa' mhaduinn, fada roimh là, chaidh e mach, agus dh' imich e gu àite fàsail, agus rinn e ùrnuigh an sin.

36 Agus lean Simon, agus an dream a bha maille ris e.

37 Agus air fhaotainn dhoibh thubhairt iad ris, A ta gach uile neach ga d' iarraidh.

38 Agus thubhairt esan riu, Rachamaid a dh'ionnsuidh nam bailtean eile làimh ruinn, chum gu'n searmonaich mi an sin mar an ceudna: oir is ann a chum na crìche so thàinig mise mach.

39 Agus shearmonaich e 'nan sionagogaibh air feadh Ghalile uile, agus thilg e mach na deamhan.

40 Agus thàinig lobhar d'a ionnsuidh, a' guidhe air, agus a' lùbadh a ghlùin da, agus ag ràdh ris, Ma's àill leat, tha thu comasach air mise a dhèanamh glan.

41 Agus ghabh Iosa truas mòr dheth, agus air sìneadh a mach a làimhe, bhean e ris, agus thubhairt e ris, Is àill leam; bi-sa glan.

42 Agus co luath as a labhair e, air ball dh'fhalbh an luibhre uaith, agus rinneadh glan e.

43 Agus thug e geur-òrdugh dha, agus air ball chuir e air falbh e;

44 Agus thubhairt e ris, Feuch nach innis thu bheag do neach air bith: ach imich, nochd thu féin do'n t-sagart, agus tabhair mar iobairt air son do ghlanaidh na nithe a dh'àithn Maois, mar fhianuis dhoibh.

45 Agus air dhasan dol a mach, thòisich e air innseadh gu ro-fhollaiseach, agus air a' chùis a sgaoileadh mu'n cuairt, air chor as nach feudadh Iosa dol tuilleadh gu follaiseach a steach do'n bhaile; ach bha e mach ann an àitibh uaigneach: agus thàinig iad d'a ionnsuidh as gach àird.

CAIB. II.

AGUS an déigh làithean àraidh, chaidh e a ris a steach do Chapernaum; agus chualas esan a bhi san tigh.

2 Agus air ball chruinnich-eadh mòran an ceann a chéile, air chor as nach robh àit a chumadh iad, eadhon timchioll an doruis: agus labhair e am focal riu.

3 Agus thàinig iad, a' toirt d'a ionnsuidh neach air an robh am pairilis, air a ghiùlan le ceathrar.

4 Agus a chionn nach b'urra-ainn iad teachd am fagus da leis an t-sluagh, rùisg iad mullach an tighe anns an robh e: agus air dhoibh a tholladh, leig iad sìos an leabadh air an robh an neach a bha tinn leis a' phairilis 'na luidhe.

5 'Nuair chunnaic Iosa an creidimh-san, thubhairt e ris an neach air an robh am pairilis, A mhic, tha do pheacanna air am maitheadh dhuit.

6 Ach bha dream àraidh do na sgrìobhaichibh 'nan suidhe an sin, agus iad a' reusonachadh 'nan cridheachaibh féin,

7 C'ar son a ta am fear so a' labhairt toibheim mar so? Cò dh'fheudas peacanna a mhaith-eadh ach Dia a mhàin?

8 Agus air ball air aithneachadh do Iosa 'na spiorad féingu'n robh iadsan a' reusonachadh mar sin annta féin, thubhairt e riu,

C'ar son a ta sibh a' reusonachadh nan nithe sin ann bhur cridheachaibh?

9 Cò aca is usadh a ràdh ris an neach air am bheil am pairilis, Tha do pheacanna air am maitheadh dhuit, no a ràdh, Eirich, agus tog do leabadh, agus imich?

10 Ach a chum gu 'm bi fios agaibh gu bheil ùghdarras aig Macan duine peacanna a mhaith-eadh air thalamh, (thubhairt e ris an fhear air an robh am pairilis,)

11 A ta mi ag ràdh riut, Eirich, agus tog do leabadh, agus imich do ' thigh.

12 Agus dh'éirich esan air ball, agus thog e an leabadh, agus chaidh e mach 'nam fianuis uile, ionnus gu'n robh mòr-iongantas orra uile, agus gu 'n do ghlòraich iad Dia, ag ràdh, Cha'n fhaca sinne riamh a leithid so.

13 Agus chaidh e mach a ris ri taobh na mara; agus thàinig an sluagh uile d'a ionnsuidh, agus theagaisg e iad.

14 Agus ag dol seachad da, chunnaic e Lebhi mac Alpheuis 'na shuidhe aig àite togail na cìse, agus thubhairt e ris, Lean mise. Agus dh'éirich e, agus lean se e.

15 Agus thàrladh, 'nuair a shuidh Iosa chum bìdh 'na thigh-san, gu'n do shuidh mòran chis-mhaor agus pheacach maille ri Iosa, agus r'a dheisciobluibh: oir bha mòran ann, agus lean iad e.

16 Agus an uair a chunnaic na sgrìobhaichean agus na Phairisich esan ag itheadh maille ri cìs-mhaoraibh agus ri peacachaibh, thubhairt iad r'a dheisciobluibh, C'ar son a ta e ag itheadh agus ag òl maille ri cìs-mhaoraibh agus ri peacachaibh?

17 Agus an uair a chuala Iosa

so, thubhairt e riu, Cha'n 'eil feum acasan a ta slàn air an léigh, ach acasan a ta tinn: cha d' thàinig mise a ghairm nam firean, ach nam peacach chum aithreachais.

18 Agus bu ghnàth le deisciobluibh Eoin, agus nam Phairiseach a bhi trasgadh: agus thàinig iad, agus thubhairt iad ris C'ar son a ta deisciobuil Eoin, agus nam Phairiseach ri trasgadh, agus nach 'eil do dheisciobuil-sa a' trasgadh.

19 Agus thubhairt Iosa riu, Am bheil clann seòmair an fhir nuadh-phòsda comasach air trasgadh a dhèanamh, am feadh a bhitheas am fear nuadh-phòsda maille riu? am feadh a ta am fear nuadh-phòsda aca maille riu, cha'n fheud iad trasgadh a dhèanamh.

20 Ach thig na làithean anns an toirear am fear nuadh-phòsda uatha; agus an sin ni iad trasgadh sna làithibh sin.

21 Agus cha'n 'eil duine sam bith a dh'fhuaigheas mìr do eudach nuadh air sean eudach; no, *ma dh'fhuaigheas*, buinidh am mìr nuadh, a chuireadh g'a lìonadh suas, as an t-sean eudach, agus nithear an reubadh ni 's miosa.

22 Agus cha chuir duine air bith fion ùr ann an seann searragaibh; no brisidh am fion nuadh na searragan, agus dòirt-e ar am fion, agus caillear na searragan: ach is còir fion nuadh a chur ann an searragaibh nuadha.

23 Agus thàrladh gu'n deachaidh e troimh na h-achaibh arbhair air là na sàbaid; agus thòisich a dheisciobuil, ag im-eachd dhoibh, ris na diasan arbhair a spìonadh.

24 Agus thubhairt na Phairisich ris, Feuch, c'ar son a ta

iad a' dèanamh an ni nach 'eil ceaduichte air là na sàbaid?

25 Agus thubhairt esan riu, Nach do leugh sibhse riamh ciod a rinn Daibhidh, 'nuair a bha uireasbhuidh air, agus ocras air féin agus orra-san a bha maille ris?

26 Cionnus a chaidh e steach do thigh Dhé ann an làithibh Abiatair an àrd-shagairt, agus a dh'ith e aran na fianuis, nach 'eil ceaduichte do neach air bith itheadh, ach do na sagartaibh, agus a thug e mar an ceudna do'n dream a bha maille ris?

27 Agus thubhairt e riu, Dh'òrduicheadh an t-sàbaid air son an duine, cha'n e an duine air son na sàbaid:

28 Air an aobhar sin is Tigh-earna Mac an duine air an t-sàbaid féin.

CAIB. III.

AGUS chaidh e ris a steach do'n t-sionagag; agus bha an sin duine aig an robh làmh sheargta.

2 Agus rinn iad faire air, a dh'fheuchainn an leighiseadh se e air là na sàbaid, chum gu'm biodh cùis-dhìtidh aca 'na aghaidh.

3 Agus thubhairt e ris an duine aig an robh an làmh sheargta, Eirich sa' mheadhon.

4 Agus thubhairt e riu, Am bheil e ceaduichte maith a dhèanamh air làithibh na sàbaid, no olc? anam a thèarnadh, no a sgrios? ach dh'fhan iadsan 'nan tosd.

5 Agus an uair a dh'amhairc e mu'n cuairt orra le feirg, air dha bhi doilich air son cruais an cridhe, thubhairt e ris an duine, Sìn a mach do làmh. Agus shìn e mach i: agus rinneadh slàn i mar an làmh eile.

6 Agus chaidh na Phairisich

a mach, agus ghabh iad comhairle air ball maille ri luchd-leanmhuinn Heroid 'na aghaidh-san, cionnus a dh'fheudadh iad a sgrios.

7 Ach chaidh Iosa maille r'a dheisciobluibh a leth chum na mara: agus lean sluagh mòr e o Ghalile, agus o Iudea,

8 Agus o Ierusalem, agus o Idumea, agus o thaobh thall Iordain; agus iadsan a bha timchioll Thiruis agus Shidoin, thàinig cuideachd mhòr dhiubh d'a ionnsuidh, 'nuair a chual iad cia mòr na nithe a rinn e.

9 Agus thubhairt e r'a dheisciobluibh, long bheag a bhi feith-eamh air, air son an t-sluaigh, chum nach dòmhluicheadh iad e:

10 Oir leighis e mòran; ionnus gu'n do dhlùth-theann iad ris, a mheud 's air an robh plàighean, chum gu'm beanadh iad ris.

11 Agus na spiorada neòghlan, an uair a chunnaic iad e, shleuchd iad da, agus ghlaodh iad, ag ràdh, Is tusa Mac Dhé.

12 Agus thug e sparradh teann dhoibh nach dèanadh iad aithnichte e.

13 Agus chaidh e suas gu beinn, agus ghairm e iadsan a b'àill leis: agus thàinig iad d'a ionnsuidh.

14 Agus dh'òrduich e dà fhear dheug, chum gu'm biodh iad maille ris, agus gu'n cuir-eadh e mach iad a shearmonachadh;

15 Agus gu'm biodh aca cumhachd a leigheas euslainte, agus a thilgeadh a mach dheamhan.

16 Agus air Simon thug e Peadar mar cho-ainm:

17 Agus Seumas *mac* Shebede, agus Eoin bràthair Sheumais, (agus orra-san thug e Boanerges mar cho-ainm, is e

sin ri ràdh, Clann na tairnean-aich,)

18 Agus Aindreas, agus Philip, agus Bartolomeus, agus Mata, agus Tomas, agus Seumas *mac* Alpheuis, agus Tadeus, agus Simon an Canaanach,

19 Agus Iudas Iscariot, an neach sin a bhrath e: agus chaidh iad do thigh.

20 Agus chruinnicheadh an sluagh a ris, ionnus nach robh e 'n comas doibh uiread as aran itheadh.

21 Agus an uair a chual a chàirdean so, thàinig iad a mach a bhreith air: oir thubhairt iad, Tha e air mhì-chéill.

22 Agus thubhairt na sgrìobhaichean a thàinig a nuas o Ierusalem, A ta Beelsebub aige, agus is ann troimh phrionnsa nan deamhan a ta e tilgeadh a mach dheamhan.

23 Agus ghairm e iad d'a ionnsuidh, agus thubhairt e riu ann an cosamhlachdaibh, Cionnus a dh'fheudas Satan Satan a thilgeadh a mach?

24 Agus ma bhitheas rìoghachd roinnte 'na h-aghaidh féin, cha'n urrainn an rìoghachd sin seasamh.

25 Agus ma bhitheas tigh air a roinn 'na aghaidh féin, cha'n urrainn an tigh sin seasamh.

26 Agus ma dh'éireas Satan 'na aghaidh féin, agus gu'm bi e roinnte, cha'n urrainn e seasamh, ach a ta crìoch aige.

27 Cha'n urrainn neach air bith dol a steach do thigh duine làidir, agus 'airneis a thogail leis, mur ceangail e 'n duine làidir an toiseach; agus an sin creachaidh e a thigh.

28 Gu deimhin a ta mi ag ràdh ribh, Gu maithear na h-uile pheacanna do chloinn nan daoine, agus gach toibheum a labhras iad.

29 Ach ge b' e labhras toibheum an aghaidh an Spioraid Naoimh, cha'n fhalgh e maith-eanas a chaidh, ach a ta e an cunnart peanais shìorruidh;

30 Air son gu'n dubhairt iad, Tha spiorad neòghlan aige.

31 An sin thàinig a bhràithrean agus a mhàthair, agus air dhoibh seasamh a muigh, chuir iad fios d'a ionnsuidh, a' gairm air.

32 Agus bha 'n sluagh 'nan suidhe m' a thimchioll; agus thubhairt iad ris, Feuch, a ta do mhàthair agus do bhràithrean a muigh ga d' iarraidh.

33 Agus fhreagair e iad, ag ràdh, Cò i mo mhàthair, no mo bhràithrean?

34 Agus sheall e mu 'n cuairt orra-san a bha 'nan suidhe m'a thimchioll, agus thubhairt e, Feuch mo mhàthair agus mo bhràithrean.

35 Oir ge b'e neach a ni toil Dé, is esan mo bhràthair, agus mo phiuthar, agus mo mhàthair.

CAIB. IV.

A GUS thòisich a air teagasg a ris làimh ris a' mhuir; agus chruinnicheadh sluagh mòr d'a ionnsuidh, ionnus gu'n deachaidh e steach do luing, agus gu'n do shuidh e air a' mhuir; agus bha'n sluagh uile ri taobh na mara air tìr.

2 Agus theagaisg e dhoibh mòran do nithibh ann an cosamhlachdaibh, agus thubhairt e riu 'na theagasg,

3 Eisdibh; Feuch, chaidh fear-cuir a mach a chur sìl:

4 Agus thàrladh 'nuair chuir e an siol, gu'n do thuit cuid deth ri taobh an rathaid, agus thàinig eunlaith an athair, agus dh'ith iad suas e.

5 Agus thuit cuid eile dheth air fearann creagach, far nach

robh mòr thalamh aige; agus air ball dh'fhàs e suas, do bhrìgh nach robh doimhne talmhainn aige:

6 Ach air do'n ghréin éirigh, loisgeadh e; agus a chionn nach robh freumh aige, shearg e as.

7 Agus thuit cuid eile am measg droighinn, agus dh'fhàs an droighionn suas, agus thachd se e, agus cha d'thug e toradh uaith.

8 Agus thuit cuid eile air talamh maith, agus thug e toradh uaith a' fàs suas agus a' meudachadh; agus thug e mach, cuid a dheich thar fhichead uiread, agus cuid a thrì fichead uiread, agus cuid a cheud uiread 's a chuireadh.

9 Agus thubhairt e riu, An tì aig am bheil cluasa chum éisd-eachd, éisdeadh e.

10 Agus an uair a bha e 'na aonar, dh'fhiosraich iadsan, a bha mu'n cuairt da, maille ris an dà fhear dheug, an cosamhlachd deth.

11 Agus thubhairt e riu, Dhuibhse thugadh eòlas a ghabhail air nithibh dìomhair rioghachd Dhè: ach dhoibh-san a ta an leth muigh nithear gach ni an cosamhlachdaibh:

12 Chum as ag faicinn doibh gu'm faic iad, agus nach aithnich iad, agus ag cluinntinn dhoibh gu'n cluinn iad, agus nach tuig iad; air eagal àm air bith gu'm pilleadh iad, agus gu'm biodh am peacanna air am maitheadh dhoibh.

13 Agus thubhairt e riu, Nach aithne dhuibh an cosamhlachd so? agus cionnus ma ta a thuig-eas sibh gach uile chosamhlachd?

14 Tha 'm fear-cuir a' cur an fhocail.

15 Agus is iad so iadsan ri taobh an rathaid, anns an cuir-eam am focal, an déigh dhoibh a

chluinntinn, air ball a ta Satan a' teachd, agus a' togail leis an fhocail, a shìol-chuireadh 'nan cridheachaibh.

16 Agus is iad so iadsan mar an ceudna a chuireadh air fear-ann creagach; muinntir, an uair a chluinneas iad am focal, a ghabhas e air ball le gàirdeachas:

17 Agus cha'n 'eil freumh aca annta féin, ach mairidh iad rè sealain; 'na dhéigh sin 'nuair a dh'éireas àmhghar no geur-leanmhuinn air son an fhocail, air ball a ta iad a' gabhail oilbheinn.

18 Agus is iad so iadsan a chuireadh am measg an droighinn, an dream a dh'éisdeas ris an fhocal;

19 Agus a ta ro chùram an t-saoghail so, agus mealltair-eachd saoihbheis, agus anamianna nithe eile teachd a steach, agus a' tachdadh an fhocail, agus nithear neo-thorach e.

20 Agus is iad so iadsan a chuireadh ann an talamh maith; an dream a chluinneas am focal, agus a ghabhas e, agus a bheir a mach toradh, cuid a dheich thar fhichead uiread, agus cuid a cheud uiread *as a chuireadh*.

21 Agus thubhairt e riu, An toirear coinneal chum gu'n cuir-eam i fuidh bheul soithich, no fuidh leabaidh? nach anna chum a cur ann an coinnleir?

22 Oir cha'n 'eil ni air bith foluichte, nach foillsichear; agus cha robh ni air bith an cleith, nach tig am follais.

23 Ma ta cluasa chum éisd-eachd aig neach air bith, éisdeadh e.

24 Agus thubhairt e riu, Thugaibh fa'near ciod a chluinneas sibh: leis an tomhas a thomh-

aiseas sibh, tomhaisear dhuibh féin; agus bheirear tuilleadh dhuibh-sa ta 'g éisdeachd.

25 Oir ge b'e neach aig am bheil, bheirear dha: agus ge b'e neach aig nach 'eil, bheirear uaith an ni sin féin a ta aige.

26 Agus thubhairt e, Is amhuil rìoghachd Dhé, mar gu'n cuireadh duine siol anns an talamh,

27 Agus gu'n coidleadh e, agus gu'n éireadh e a dh'oidhche agus a là, agus gu'n gineadh an siol, agus gu'm fàsadh e suas, air dòigh nach fhios da.

28 Oir bheir an talamh a mach toradh uaith féin, air tùs am fochann, a ris an dias, an déigh sin an làn arbhar anns an dèis.

29 Ach an uair a ta 'n toradh abaich, air ball cuiridh e an corran ann, a chionn gu bheil am fogharadh air teachd.

30 Agus thubhairt e, Ciod an ni ri 'n samhluich sinn rìoghachd Dhé? no ciod e an cosamhlachd leis an coimhmeas sinn i?

31 Is cosmhuil i ri gràinne mustaird, ni, 'nuair a chuirear san talamh e, a 's lugha do na h-uile phòraibh a ta air thalamh.

32 Ach an déigh a chur, fàsaidh e suas, agus cinnidh e ni's mò na luibh sam bith eile, agus fàsaidh geugan mòra air; ionnus gu'm feud eunlaith an athair nid a dhèanamh fuidh a sgàile.

33 Agus le iomadh d'a leithidibh sin do chosamhlachdaibh labhair e am focal riu, a réir mar a b'urrainn iad a chluinntinn.

34 Ach gun chosamhlachd cha do labhair e riu: Agus mhìnich e na h-uile nithe d'a dheisciobluibh féin air leth.

35 Agus thubhairt e riu air an là sin féin, air teachd do'n

fheasgar, Rachamaid thairis do'n taobh eile.

36 Agus an uair a sgaoil iad an coimhthional, thug iad leo esan anns an luing mar a bha e; agus bha longa beaga eile maille ris mar an ceudna.

37 Agus dh'éirich doinionn mhòr ghaoithe, agus leum na tonnan a steach do'n luing, air chor as gu'n robh i nis làn.

38 Agus bha esan ann an deireadh na luinge, 'na chodal air cluasaig: agus dhùisg iad e, agus thubhairt iad ris, A mhaighstir, nach 'eil suim agad gu'n caill-ear sinn?

39 Agus dh'éirich e, agus chronuich e a' ghaoth, agus thubhairt e ris an fhairge, Tosd, bi sàmhach. An sin luidh a' ghaoth, agus bha fèath mòr am.

40 Agus thubhairt e riu, C'ar son a ta sibh co eagalach? cionnus nach 'eil creidimh agaibh?

41 Agus ghabh iad eagal ro mhòr, agus thubhairt iad r'a chéile, Ciod e an duine so, gu bheil a' ghaoth, agus an fhairge féin ùmhal da?

CAIB. V.

A GUS thàinig iad gu taobh eile na mara, gu dùthaich nan Gadarach.

2 Agus an uair a chaidh e mach as an luing, air ball thach-air air as na h-àitibh-adhlaic, duine anns an robh spiorad neòghlan,

3 Aig an robh a chòmhnuidh sna h-àitibh-adhlaic; agus cha b'urrainn neach air bith a cheangal, eadhon le slabhraidhibh:

4 Oir chaidh a cheangal gu tric le geimhlibh agus le slabhraidhibh, agus tharruing e na slabhraidhean as a chéile, agus mhìn-bhris e na geimhlean: Agus cha b'urrainn duine sam bith a cheannsachadh.

5 Agus bha e ghnàth, a là agus a dh'oidhche, sna beanntaibh, agus sna h-ionadaibh-adhlaic, a' glaothaich, agus 'ga ghearradh féin le clachaibh.

6 Ach an uair a chunnaic e Iosa fada uaith, ruith e agus shleuchd e dha,

7 Agus ghlaodh e le guth mòr, agus thubhairt e, Ciod mo ghnothuch-sa riut, Iosa, a Mhic an Dé a's ro àirde? tha mi a' cur ort á h-uchd Dé, gun mo phianadh.

8 (Oir thubhairt e ris, Thig a mach as an duine, a spioraid neòghloin.)

9 Agus dh'fhiosraich e dheth, Ciod is ainm dhuit? Agus fhreagair esan, ag ràdh, Legion is ainm dhomh: oir a ta sinn mòran ann.

10 Agus ghuidh e gu ro gheur air, gun e g'an cur a mach as an dùthaich sin.

11 Agus bha treud mòr mhuc an sin, ag ionaltradh am fagus do'n bheinn.

12 Agus ghuidh na deamhain uile air, ag ràdh, Cuir sinne dh'ionnsuidh nam muc, chum gu'n rachamaid a steach annta.

13 Agus air ball thug Iosa cead doibh; agus air dol a mach do na spioradaibh neòghlan, chaidh iad a stigh anns na mucaibh, agus ruith an treud sìos gu dian le àite cas do'n fhairge, (bha iad mu thimchioll dà mhìle,) agus thachdadh iad san fhairge.

14 Agus theich iadsan a hha 'g ionaltradh nam muc, agus dh'innis iad sin, araon anns a' bhaile, agus anns an tìr. Agus chaidh iad a mach a dh'fhaicinn ciod e an ni ud a thachair.

15 Agus thàinig iad chum Iosa, agus chunnaic iad an tì anns an robh an deamhan, agus aig an robh an legion, 'na shuidhe, ag-

us 'eudach uime, agus a chiall aige; agus ghabh iad eagal.

16 Agus dh'innis iadsan a chunnaic e dhoibh, cionnus a thachair do'n tì anns an robh an deamhan, agus mu thimchioll nam muc.

17 Agus thòisich iad ri guidhe air imeachd a mach as an crìochaibh.

18 Agus air dha dol a stigh san luing, ghuidh an tì anns an robh an deamhan air, gu'm feudadh e bhi maille ris.

19 Gidheadh cha do leig Iosa leis, ach thubhairt e ris, Imich dhachaidh dh'ionnsuidh do mhuinntir, agus innis dhoibh meud nan nithe a rinn an Tigh-earna dhuit, agus gu'n d'rinn e tròcair ort.

20 Agus dh'imich esan, agus thòisich e ri chur an céill ann an Decapolis meud nan nithe a rinn Iosa dha: agus ghabh iad iongantais uile.

21 Agus 'nuair a chaidh Iosa a ris thairis anns an luing do'n taobheile, chruinnicheadh sluagh mòr d'a ionnsuidh; agus bha e làimh ris a' mhuir.

22 Agus, feuch, thàinig aon do uachdaranaibh nan sionagog, d'am b'ainm Iairus; agus an uair a chunnaic e esan, leig se e féin sìos aig a chosaibh.

23 Agus ghuidh e gu dùrachdach air, ag ràdh, A ta mo nigh-ean bheag ann an cunnart grad bhàis; thig, *tha mi a' guidhe ort*, agus leag do làmhan oirre chum gu'n slànuichear i, agus mairidh i beò.

24 Agus dh'imich Iosa maille ris; agus lean sluagh mòr e, agus dhòmhluich iad e.

25 Agus bha bean àraidh an sin, air an robh dòrtadh fola rè dhà bhliadhna dheug,

26 Agus dh'fhulaing i mòran o iomadh léigh, agus chaith i na

bha aice, agus cha b' fheairrd i bheag e, ach gu'm bu mhiosd ;

27 'Nuair a chual i iomradh air Iosa, thàinig i am measg an t-sluaigh o chùlaobh, agus bhean i r'a eudach :

28 Oir thubhairt i, Ma dh'fheudas mi beantuinn ach r' a eudach, slànuichear mi.

29 Agus air ball thiormaicheadh tobar a fola ; agus dh'aithnich i air a corp féin, gu'n do leighiseadh i o'n phlàigh sin.

30 Agus dh'aithnich Iosa air ball ann féin gu'n deachaidh cumhachd a mach as, agus air dha tionndadh san t-sluagh, thubhairt e, Cò a bhean ri m' eudach ?

31 Agus thubhairt a dheisciobuil ris, A ta thu faicinn gu bheil an sluagh ga d' dhòmh-lachadh, agus an abair thu, Cò a bhean rium ?

32 Agus dh'amhairc e mu'n cuairt g'a faicinn-sa a rinn so.

33 Ach air do'n mhnaoi bhi fo eagal agus air chrith, air aithneachadh an nì a rinneadh innte, thàinig i, agus leig si i féin sìos 'na làthair, agus dh'innis i an fhìrinn uile dha.

34 Agus thubhairt e rithe, A nighean, shlànuich do chreidimh thu ; imich an sìth, agus bi slàn o d' phlàigh.

35 Am feadh a bha e fathast a' labhairt, thàinig *dream* o *thigh* uachdarain na sionagoig, ag ràdh, Fhuair do nighean bàs ; c'ar son a chuireadh tu tuilleadh dragh air a' mhaighstir ?

36 Co luath is a chual Iosa an còmhradh so a labhradh, thubhairt e ri uachdaran na sionagoig, Na biodh eagal ort, a mhàin creid.

37 Agus cha d'fhulaing e do neach air bith a leantuinn, ach Peadar, agus Seumas, agus Eoin bràthair Sheumais.

38 Agus thàinig e gu tigh uachdarain na sionagoig, agus chunnaic e an iomairt agus iadsan a bha gul, agus a' caoineadh gu mòr.

39 Agus 'nuair thàinig e a steach, thubhairt e riu, C'ar son a ta sibh ris an iomairt so, agus ri bròn ? cha'n 'eil an nigh-eanag marbh, ach 'na codal.

40 Agus rinn iadsan gàire fanoid air : ach air dhasan an cur uile mach, thug e leis athair agus màthair na nighinn, agus iadsan a bha maille ris, agus chaidh e steach far an robh an nighean-ag 'na luidhe.

41 Agus rug e air an nighean-aig air làimh, agus thubhairt e rithe, Talitha-cumi ; 's e sin, air eadar-mhìneachadh, A chailin, (a ta mise ag ràdh riut.) éirich.

42 Agus air ball dh'éirich an nigheanag, agus dh'imich i ; oir bha i dà bhliadhna dheug a dh'-aois : agus ghabh iad iongantas anabarrach.

43 Agus thug e òrdugh teann doibh, nach faigheadh duine air bith fios air so ; agus dh'àithn e *càileigin* a thoirt d'i r'a itheadh.

CAIB. VI.

A GUS chaidh e mach as a sin, agus thàinig e d'a dhùthaich féin ; agus lean a dheisciobuil e.

2 Agus an uair a thàinig an t-sàbaid, thòisich e air teagasg anns an t-sionagag : agus air do mhòran a chluinntinn, ghabh iad iongantas, ag ràdh, Cia uaith a ta na nithe sin aig an fhear so ? Agus ciod e an gliocas so thugadh dha, gu bheil a leithid so do fheartaibh air an dèanamh le a làmh-aibh-san ?

3 Nach e so an saor, mac Mhuire, bràthair Sheumais, agus Ioseis, agus Iudais, agus Shimoin ? Agus nach 'eil a

pheathraiche an so maille ruinn?
Agus fhuair iad oilbheum ann.

4 Ach thubhairt Iosa riu,
Cha'n 'eil fàidh gun urram, ach
'na dhùthaich féin, agus am
measg a chàirdean, agus 'na thigh
féin.

5 Agus cha robh e 'n comas
da mìorbhuil air bith a dhèan-
amh an sin, saor o gu'n do chuir
e a làmhan air beagan do
mhuinntir a bha tinn, agus gu'n
do leighis e iad.

6 Agus bha iongantais air air
son am mi-chreidimh. Agus
chaidh e timchioll nam bailtean,
a' teagasg.

7 Agus ghairm e d'a ionnsuidh
an dà fhear dheug, agus thòisich
e air an cur a mach dithis agus
dithis; agus thug e dhoibh
cumhachd air spioradaibh neò-
ghlan;

8 Agus dh'àithn e dhoibh gun
ni air bith thoirt leo air son na
slighe, ach lorg a mhàin; gun
mhàla, gun aran, gun airgiod
'nan sporan:

9 Ach bonn-bhròga *bhi* air an
cosaibh, agus gun dà chòta bhi
umpa.

10 Agus thubhairt e riu, Ge
b'e ionad air bith anns an téid
sibh a steach do thigh, an sin
fanaibh gus am falbh sibh as an
àite sin.

11 Agus cò air bith iad nach
gabhadh ribh, agus nach éisd ribh,
air dhuibh imeachd as an àite
sin, crathaibh an duslach a
bhitheas fo 'ur cosaibh, mar
fhianuis 'nan aghaidh. Gu
deimhin a ta mi ag radh ribh,
Gur so-iomchaire a bhitheas e do
Shodom agus do Ghomorah ann
an là a' bhreitheanais, na do'n
bhaile sin.

12 Agus chaidh iad a mach,
agus shearmonaich iad gu'n
déanadh *davine* aithreachas.

13 Agus thilg iad a mach

mòran dheamhan, agus dh'ùng
iad le h-oladh mòran a bha tinn,
agus leighis siad iad.

14 Agus chual Herod an rìgh
uime, (oir chaidh 'ainm am foil-
ais;) agus thubhairt e, A ta
Eoin Baiste air éirigh o na
marbhaibh, agus uime sin a
ta feartan air an oibreachadh
leis.

15 Thubhairt cuid eile, Gur
e Elias a t'ann. Agus thubhairt
cuid eile, Gur fàidh a t'ann, no
mar aon do na fàidhibh.

16 Ach an uair a chual Herod
so, thubhairt e, Is e Eoin, d'an
do chuir mise an ceann, a
th'ann; dh'éirich e o na marbh-
aibh.

17 Oir chuir Herod féin a
mach agus ghlac e Eoin, agus
cheangail e ann am prìosan e,
air son Herodias bean phòsda
Philip, a bhràthar féin, do bhrìgh
gu'n do phòs e i.

18 Oir thubhairt Eoin ri He-
rod, Cha'n 'eil e ceaduichte dhuit
bean do bhràthar a bhi agad.

19 Uime sin bha diom mòr aig
Herodias ris, agus bu mhiann
leatha a chur gu bàs; ach cha
b'urrainn i.

20 Oir bha eagal Eoin air
Herod, air dha fios a bhi aige
gu'm bu duine ceart agus naomh
e, agus thug e fa'near e; agus
'nuair a chual se e, rinn e mòr-
an do nithibh *air a chomhairle*,
agus dh'éisd e ris gu toileach.

21 Agus air teachd do là
iomchuidh, rinn Herod, air co-
ainm an là an d'rugadh e, suip-
eir d'a uaislibh, agus d'a àrd-
cheannardaibh, agus do mhaith-
ibh Ghalile:

22 Agus an uair a chaidh
nighean Herodias so steach, ag-
us a rinn i dannsa, thaitinn i ri
Herod agus riu-san a shuidh
maille ris, agus thubhairt an
rìgh, ris a' chailin, Iarr ormsa ge

b'e ni is àill leat, agus bheir mi dhuit e.

23 Agus thug e mionnan d' i, Ge b'e ni a dh'iarras tu orm, bheir mi dhuit e, gu leth mo rìoghachd.

24 Agus an uair a chaidh i mach thubhairt i r'a màthair, Ciod a dh'iarras mi? Agus thubhairt ise, Ceann Eoin Bhaiste.

25 Agus chaidh i air ball le cabhaig a steach a dh'ionnsuidh an rìgh, agus dh'iarr i, ag ràdh, Is àill leam gu'n tugadh tu dhomh gun dàil ceann Eoin Bhaiste air mèis.

26 Agus bha 'n rìgh ro dhoilich; *gidheadh* air son a mhionnan, agus an dream a bha 'nan suidhe maille ris, cha robh toil aige a diùltadh.

27 Agus air ball chuir an rìgh a mach fear-millidh, agus dh'àithn e a cheann a thoirt a steach: agus dh'imich esan agus thug e an ceann deth anns a' phrìosan:

28 Agus thug e a cheann leis air mèis, agus thug e do'n chailin e: agus thug an cailin d'a màthair e.

29 Agus an uair a chual a dheisciobuil *sin*, thàinig iad agus thog iad a chorp, agus chuir iad ann an uaigh e.

30 Agus chruinnicheadh na h-Abstoil chum Iosa, agus dh'innis iad da na h-uile nithe, ar-aon gach ni a rinn iad, agus gach ni a theagaisg iad.

31 Agus thubhairt e riu, Thigibh-sa air leth do àit uaigneach, agus gabhaibh fois car tamuill bhig: Oir bha mòran a' teachd agus a' dol, agus cha robh ùine aca uiread as biadh itheadh.

32 Agus chaidh iad gu àite fàsail ann an luing air leth.

33 Agus chunnaic an sluagh iadsan a' falbh, agus dh'aithnich

mòran e, agus ruith iad d'an cois as na bailtibh uile an sin, agus bha iad rompa, agus chruinnicheadh iad d'a ionnsuidh.

34 Agus an uair a chaidh Iosa mach, chunnaic e sluagh mòr, agus ghabh e truas mòr dhiubh, a chionn gu'n robh iad mar chaoraich gun bhuachaill aca: agus thòisich e air mòran do nithibh a theagasg dhoibh.

35 Agus an uair a bha nis mòran do'n là air dol seachad, thàinig a dheisciobuil d'a ionnsuidh, ag ràdh, A ta 'n t-àite so fàs, agus a ta nis mòran do'n là *air dol thairis*:

36 Leig air falbh iad, chum gu téid iad do'n tìr mu'n cuairt, agus do na bailtibh, agus gu ceannaich iad biadh dhoibh féin: oir cha'n 'eil xi air bith aca r'a itheadh.

37 Ach fhreagair esan, agus thubhairt e riu, Thugaibh-sa dhoibh r'a itheadh. Agus thubhairt iadsan ris, An téid sinn agus an ceannaich sinn luach dhà cheud peghinn a dh'aran, chum gu tugamaid dhoibh ni r'a itheadh?

38 Ach thubhairt esan riu, Cia lìon builinn a ta agaibh? rachaibh agus faicibh. Agus air faotainn fios doibh, thubhairt iad, Cùig, agus dà iasg.

39 Agus dh'àithn e dhoibh a thoirt orra uile suidhe sìos 'nan cuideachdaibh air an fheur uaine.

40 Agus shuidh iad sìos 'nam buidhnibh fa leth, 'nan ceudaibh, agus 'nan leth-cheudaibh.

41 Agus air dha na cùig builinnean agus an dà iasg a ghabhail, agus amharc suas gu nèamh, bheannaich, agus bhris e na builinnean, agus thug e d'a dheisciobluibh *iad*, chum gu'n cuir-eadh iad rompa iad; agus roinn e an dà iasg orra uile.

42 Agus dh'ith iad uile, agus shàsuicheadh iad.

43 Agus thog iad dà chliabh dheug làn do'n bhiadh bhriste, agus do na h-iasgaibh.

44 Agus b'iad an dream a dh'ith do na builinnibh cùig mìle fear.

45 Agus air ball cho-éignich e a dheisciobuil gu dol anns an luing, agus dol roimhe dh'ionnsuidh na taoibh thall gu Bet-saida, gus an cuireadh e an sluagh air falbh.

46 Agus an uair a chuir e air falbh iad, chaidh e gu beinn a dhèanamh ùrnuigh.

47 Agus an uair a bha 'n t-anmoch ann, bha an long am meadhon na mara, agus esan 'na aonar air tìr.

48 Agus chunnaic e iadsan air am pianadh ag iomramh; oir bha a' ghaoth 'nan aghaidh: agus thàinig e d'an ionnsuidh mu thimchioll na ceathramh faire do'n oidhche, ag imeachd air a' mhuir, agus b'àill leis dol seachad orra.

49 Ach an uair a chunnaic iadsan e ag imeachd air a' mhuir, shaoil iad gu'm bu tannasg a bh'ann; agus ghlaodh iad.

50 (Oir chunnaic iad uile e, agus bha iad fo bhuaireas:) Agus air ball labhair e riu, agus thubhairt e riu, Biodh misneach mhaith agaibh; is mise ta ann, na biodh eagal oirbh.

51 Agus chaidh e suas d'an ionnsuidh do'n luing; agus luidh a' ghaoth: agus bha uamhas mòr thar tomhas orra, agus ghabh iad iongantais.

52 Oir cha d'thug iad fa'near *mòrbhuil* nam builinnean; oir bha'n cridhe air a chruadhachadh.

53 Agus an uair a chaidh iad thairis, thàinig iad gu talamh

Ghenesaret, agus tharruing iad gu tìr.

54 Agus an uair a thàinig iad a mach as an luing, air ball dh'-aithnich iad e,

55 Agus ruith iad air feadh na tìre sin uile mu'n cuairt, agus thòisich iad air an dream a bha tinn a ghiùlan mu'n cuairt air leabaichibh, ge b'e àit an cual iad esan a bhi.

56 Agus ge b' e air bith bailte, no caithriche, no dùthaich an deachaidh e steach, chuir iad na daoine tinn air na sràidibh, agus ghuidh iad air gu'm feudadh iad beantuinn a mhàin ri iomall 'eudaich: agus a mheud is a bhean ris, leighiseadh iad.

CAIB. VII.

A GUS chruinnicheadh na Phairisich d' a ionnsuidh, agus dream àraidh do na sgrìobhaichibh a thàinig o Ierusalem.

2 Agus an uair a chunnaic iad cuid d'a dheisciobluibh ag itheadh arain le làmhaidh salach, (sin r'a ràdh neo-ionnlaidte,) fhuir iad cron *doibh*.

3 Oir cha'n ith na Phairisich, agus na h-Iudhaich uile, biadh, mur ionnlaid iad an làmhan gu minic, a' coimhead beul-aithris nan seanairean.

4 Agus *air dhoibh teachd* o'n mhargadh, mur tum siad iad, cha'n ith iad. Agus a ta mòran do nithibh eile a ghabh iad orra a choimhead, *mar a ta* nigheadh chupan, agus phoitean, agus shoithiche umha, agus leabaichean.

5 An sin dh'fheòraich na Phairisich agus na sgrìobhaichean dheth, C'ar son nach 'eil do dheisciobuil ag imeachd a réir beul-aithris nan seanairean, ach a ta iad ag itheadh arain le làmhaidh neo-ionnlaidte?

6 Ach fhreagair esan agus

thubhairt e riu, Is maith a rinn Esaias fàidheadaireachd mu bhur timchioll-sa, a chealgairean, a réir mar a ta e sgriobhta, A ta am pobull so toirt urraim dhomhsa le 'm bilibh, ach a ta an cridhe fada uam.

7 Ach is ann gu dìomhanach a ta iad a' toirt aoraidh dhomhsa, a' teagasg àitheanta dhaoine mar theagasg.

8 Oir air dhuibh àithne Dhé a thréigsinn, a ta sibh a' cumail òrduchaidh dhaoine, *mar a ta nigheadh phoitean agus chupan*: agus mòran eile d'an leithidibh sin a ta sibh a' dèanamh.

9 Agus thubhairt e riu, Is maith a ta sibh a' cur air cùl àithne Dhé, chum gu'n coimhid sibh bhur òrduchadh féin.

10 Oir thubhairt Maois, Thoir urram do t'athair, agus do d' mhàthair: agus, Ge b'e neach a mhallachas athair no màthair, cuirear gu cinnteach gu bàs e.

11 Ach their sibhse, Ma their neach r'a athair, no r'a mhàthair, Biodh e 'na Chorban, sin r'a ràdh, 'na thiodhlac *do'n team-pull*, ge b'e ni leis am faigheadh tu tairbhe uamsa;

12 Nach leig sibh dha á sin suas ni sam bith a dhèanamh air son 'athar, no a mhàthar;

13 A' cur focail Dé an neòbhrigh le bhur beul-aithris féin, a dh'aithris sibh: agus mòran d'an leithidibh sin do nithibh a ta sibh a' dèanamh.

14 Agus 'nuair a ghairm e an sluagh uile d'a ionnsuidh, thubhairt e riu, Eisdibh riumsa uile, agus tuigibh:

15 Cha'n 'eil ni sam bith o'n taobh a muigh do'n duine, a théid a steach ann, d'am bheil e 'n^e comas a shalachadh; ach na nithe tha teachd a mach as, is iad sin a ta salachadh an duine.

16 Ge b'e aig am bheil cluasa chum éisdeachd, éisdeadh e.

17 Agus an uair a chaidh e steach do'n tigh o'n t-sluagh, chuir a dheisciobuil ceisd air mu thimchioll a' chosamlachd.

18 Agus thubhairt e riu, Am bheil sibhse mar so fathast gun tuigse? Nach 'eil fhios agaibh, ge b'e ni air bith a théid a steach san duine o'n leth a muigh, nach 'eil e 'n comas da esan a shalachadh?

19 Do bhrigh nach téid e steach d'a chridhe, ach do'n bhroinn, agus théid e mach do'n t-slochd shalchair, a' glanadh gach uile bhìdh.

20 Agus thubhairt e, Is e an ni a thig a mach as an duine, a shalachas an duine.

21 Oir is ann o'n taobh a stigh, á cridhe dhaoine, a thig a mach droch smuaintean, adhaltrannas, strìopachas, mortadh,

22 Goid, sannt, aingidheachd, mealltaireachd, macnus, droch shùil, toibheum, uabhar, amaid-eachd:

23 A ta na h-uile so uile a' teachd a mach o'n taobh a stigh, agus a' salachadh an duine.

24 Agus air dha éirigh as a sin, chaidh e gu crìochaibh Thiruis agus Shidoin: agus an uair a chaidh e steach do thigh, cha b'àill leis fios a bhi aig neach sam bith *air*; gidheadh cha'n fheudadh e bhi 'm folach.

25 Oir chuala bean uime, aig an robh nighean bheag, anns an robh spiorad neòghlan, agus thàinig i agus thuit i aig a chos-aibh:

26 (Agus bu Ghreugach a' bhean, Ban-shiropheiseach a thaobh cinnich;) agus ghuidh i air gu'n tilgeadh e an deamhan a mach as a ghinnn.

27 Agus thubhairt Iosa rithe,

Fulaing do n chloinn air tùs a bhi air an sàsuchadh: oir cha 'n 'eil e iomchuidh aran na cloinne a ghabhail, agus a thilgeadh chum nan con.

28 Agus fhreagair ise agus thubhairt i ris, Is fìor sin, a Thighearn: gidheadh ithidh na coin fo 'n bhòrd do sbruileach na cloinne.

29 Agus thubhairt esan rithe, Air son na cainnte so féin, imich romhad; a ta an deamhan air dol a mach á d' nighinn.

30 Agus an uair a bha ise air teachd a dh'ionnsuidh a tighe, fhuair i an deamhan air dol a mach, agus a nighean air a cur 'na luidhe air an leabaidh.

31 Agus a rìs 'nuair a dh'imich e o chrìochaibh Thiruis agus Shidoin, thàinig e gu muir Ghailile, troimh mheadhon chrìoch Dhecapolis.

32 Agus thug iad d'a ionnsuidh duine bodhar, aig an robh staduich 'nachainnt: agus ghuidh iad air gu'n cuireadh e a làmh air.

33 Agus thug e a leth o'n t-sluagh e, agus chuir e a mheoir 'na chluasaibh, agus shil e, agus bhean e r'a theangaidh.

34 Agus air dha amharc suas gu nèamh, rinn e osna, agus thubhairt e ris, Ephphata, is e sin r'a ràdh, Bi fosgailte.

35 Agus air ball dh'fhosgladh a chluasan, agus dh'fhuasgladh ceangal a theangaidh, agus labhair e gu ceart.

36 Agus dh'àithn e dhoibh gun iad a dh'innseadh sin do neach air bith: ach mar is mò a thoirmisg esan doibh, bu mhòid gu ro mhòr a chuir iadsan an gnèomh am follais;

37 Agus bha iad gu ro mhòr air an lionadh le h-iongantais, ag ràdh, Rinn e na h-uile nithe

gu maith: tha e araon a' tabhairt air na bodhair gu'n cluinn iad, agus air na bailbh gu'n labhair iad.

CAIB. VIII.

ANNS na làithibh sin air do shluagh ro mhòr a bhi ann, agus gun ni air bith aca r'a ith-eadh, ghairm Iosa a dheisciobuil d'a ionnsuidh, agus thubhairt e riu,

2 A ta truas mòr agam do'n t-sluagh, do bhrìgh gu'n d'fhan iad a nis trì làithean maille rium, agus nach 'eil ni air bith aca r'a itheadh;

3 Agus ma leigeas mi d'an tighibh féin 'nan trasg iad, fannuichidh iad air an t-slighe: oir thàinig cuid aca am fad.

4 Agus fhreagair a dheisciobuil e, Cia as a dh'fheudas neach iad so a shàsachadh le h-aran an so san fhàsach?

5 Agus dh'fhiosraich e dhiubh, Cia lion builinn a ta agaibh? Agus thubhairt iadsan, Seachd.

6 Agus thug e òrdugh do'n t-sluagh suidhe sìos air an làr: agus ghlac e na seachd builinn-ean, agus air toirt buidheachais, bhris e, agus thug e iad d'a dheiscioblubh, chum gu'n cuir-eadh iad 'nan làthair iad: agus chuir iad sìos an làthair an t-sluaigh iad.

7 Agus bha aca beagan a dh'iasgaibh beaga: agus bheannaich e iad, agus dh'àithn e an cur sìos 'nan làthair mar an ceudna.

8 Agus dh'ith iad, agus shàs- uicheadh iad: agus thog iad làn sheachd bascaidean do'n bhiadh bhriste, a bha dh'fhuigheall aca.

9 Agus bha iadsan a dh'ith mu thimchioll cheithir mìle; agus leig e air falbh iad.

10 Agus air ball chaidh e steach an luing maille r'a dheis-

ciobluibh, agus thàinig e gu crìochaibh Dhalmanuta.

11 Agus thàinig na Phairisich a mach; agus thòisich iad ri ceisdean a chur air, ag iarraidh comhara uaith o nèamh, 'ga dhearbhadh.

12 Agus air dèanamh osna dhasan 'na spiorad, thubhairt e, C'ar son a ta an ginealach so ag iarraidh comhara? gu deimhin a ta mise ag ràdh ribh nach toirear comhara do'n ghinealach so.

13 Agus dh'fhàg e iad, agus air dha dol a steach do'n luìng a ris, chaidh e do'n taobh eile.

14 Agus dhichuimhnich na deisciobuil aran a thoirt leo; agus cha robh aca ach aon bhuilinn maille rin san luìng.

15 Agus dh'àithn e dhoibh, ag ràdh, Thugaibh an aire, bithibh air bhur faicill an aghaidh taois ghoirt nam Phairis-each, agus taois ghoirt Heroid.

16 Agus bha iadsan a' reusonachadh 'nam measg féin, ag ràdh, *Is ann* air son nach 'eil aran againn *a ta e*.

17 Agus air aithneachadh sin do Iosa, thubhairt e riu, C'ar son a ta sibh a' reusonachadh do bhrìgh nach 'eil aran agaibh? Nach 'eil fhios agaibh fathast, agus nach 'eil sibh a' tuigsinn? am bheil bhur cridhe fathast air a chruadhachadh?

18 Air dhuibh sùilean a bhi agaibh, nach faic sibh? agus air dhuibh cluasan a bhi agaibh, nach cluin sibh? agus nach 'eil sibh a' cuimhneachadh?

19 An uair a bhris mi na cùig builinnean am measg nan cùig mìle, cia lìon cliabh làn do bhiadh briste a thog sibh? Thubhairt iadsan ris, A dhà dheug.

20 Agus an uair a bhris mi na seachd am measg nan ceithir

mìle, cia lìon bascaid làn do bhiadh briste a thog sibh? Agus thubhairt iadsan, Seachd.

21 Agus thubhairt e riu, Cionnus nach 'eil sibh a' tuigsinn?

22 Agus thàinig e gu Bet-saida; agus thug iad d'a ionnsuidh duine dall, agus ghuidh iad air gu'm beanadh e ris.

23 Agus rug e air làimh an doil agus threòraich e mach as a' bhaile e; agus air dha a shil-eadh a chur air a shùilibh, agus a làmhan a chur air, dh'fheòraich e dheth an robh e faicinn ni air bith.

24 Agus dh'amhairc esan suas, agus thubhairt e, A ta mi faicinn dhaoine mar chraobhan ag imeachd.

25 'Na dhéigh sin, chuir e a làmhan a ris air a shùilibh, agus thug e air amharc suas: agus dh'aisigeadh a *radharc dha*, agus chunnaic e gach uile dhuine gu soilleir.

26 Agus chuir e dh'ionnsuidh a thighe féin e, ag ràdh, Na rach a steach do'n bhaile, agus na innis do neach air bith anns a bhaile e.

27 Agus chaidh Iosa agus a dheisciobuil a mach gu bailtibh Chesarea Philipi: agus air an t-slighe chuir e ceisd air a dheisciobluibh, ag ràdh riu, Cò a tha daoine ag ràdh is mise?

28 Agus fhreagair iadsan, Eoin Baiste; agus cuid eile, Elias; agus cuid eile, Aon do na fàidhibh.

29 Agus thubhairt esan riu, Ach cò a tha sibhse ag ràdh is mi? Fhreagair Peadar agus thubhairt e ris, Is tu Crìosd.

30 Agus thug e sparradh dhoibh gun iad a dh'innseadh so uime do neach sam bith.

31 Agus thòisich e r'an teagasg, gur éigin do Mhac an duine

mòran do nithibh fhulang, agus a bhi air a dhiùltadh leis na seanairibh, agus na h-àrd-shagartaibh, agus na sgrìobhaichibh, agus a bhi air a chur gu bàs, agus éirigh a ris an déigh thrì làithean.

32 Agus labhair e a' chainnt so gu follaiseach. Agus rug Peadar air, agus thòisich e r'a chronuchadh.

33 Ach air dhasan tionndadh mu 'n cuairt, agus amharc air a dheisciobluibh, chronuich e Peadar, ag ràdh, Imich air mo chùlaobh, a Shatain: oir cha'n 'eil spéis agad do nithibh Dhé, ach do nithibh dhaoine.

34 Agus air gairm an t-sluaigh, agus a dheisciobul d'a ionnsuidh, thubhairt e riu, Ge b'e neach leis an àill teachd a'm' dhéigh-sa, àicheadhadh se e féin, agus togadh e a chrann-cèusaidh, agus leanadh e mise.

35 Oir ge b'e neach leis an àill 'anam féin a choimhead, caillidh se e; ach ge b'e neach a chailleas 'anam air moshon-sa, agus *air son* an t-soisgeil, coimhididh esan e.

36 Oir ciod e an tairbhe do dhuine, ge do chosnadh e an saoghal gu h-iomlan, agus 'anam a chall?

37 No ciod a bheir duine an éiric 'anama?

38 Oir ge b'e neach a ghabhas nàire dhìomsa, agus do m'fhoclaibh, anns a' ghinealach adh-altrannach agus olc so, dheth-san gabhaidh Mac an duine nàire, 'nuair a thig e an glòir 'Athar, maille ris na h-ainglibh naomha.

CAIB. IX.

AGUS thubhairt e riu, Gu deimhin a ta mi ag ràdh ribh, gu bheil cuid dhiubhsan a ta 'nan seasamh an so, nach

blais bàs, gus am faic iad rioghachd Dhé a' teachd le cumhachd.

2 Agus an ceann shè làithean, thug Iosa Peadar, agus Seumas, agus Eoin leis, agus threòruich e iad leo féin air leth gu beinn àird: agus dh'atharraicheadh a chruth 'nam fianuis.

3 Agus rinneadh 'eudach dealrach, ro gheal mar an *sneachdadh*; air mhodh nach robh e 'n comas do ghlanadair-eudaich sam bith air talamh a ghealachadh.

4 Agus dh'fhoillsicheadh dhoibh Elias maille ri Maois: agus bha iad a' còmhradh ri Iosa.

5 Agus fhreagair Peadar, agus thubhairt e ri Iosa, A mhaighstir, is maith dhuinne bhi an so: air an aobhar sin dèanamaid trì pàilliuna; aon duitse, agus aon do Mhaois, agus aon do Elias.

6 Oir cha robh fhios aige ciod a theireadh e: oir bha iad fuidh eagal ro mhòr.

7 Agus thàinig neul a chuir sgàile orra, agus thàinig guth as an neul, ag ràdh, Is e so mo Mhac gràdhach-sa, éisdibh ris.

8 Agus air ball, an uair a dh'amhaire iad mu 'n timchioll, cha'n fhac iad neach air bith á sin suas, ach Iosa 'na aonar maille riu.

9 Agus ag teachd dhoibh a nuas o 'n bheinn, dh'àithn e dhoibh gun na nithe a chunnaic iad innseadh do neach sam bith, gus an éireadh Mac an duine a ris o na marbhaibh.

10 Agus ghléidh iad a' chainnt so aca féin, a' fiosrachadh d'a chéile ciod bu chiall do'n aiseirigh o na marbhaibh.

11 Agus dh'fheòraich iad deth, ag ràdh, C'ar son a ta na sgrìobhaichean ag ràdh, gur éigin Elias a theachd air tùs?

12 Agus fhreagair esan agus thubhairt e riu, Thig Elias gu deimhin air tùs, agus aisigidh e na h-uile nithe, agus mar a ta e sgriobhta mu Mhac an duine, gu bheil e gu mòran do nithibh fhulang, agus a bhi air a chur an dimeas.

13 Ach a ta mi ag ràdh ribh, gu bheil Elias da rìreadh air teachd, agus rinn iad ris gach ni a thogair iad, a réir mar a ta e sgriobhta uime.

14 Agus 'nuair thàinig e chum a dheisciobul, chunnaic e sluagh mòr mu'n timchioll, agus na sgriobhaichean a' deasboireachd riu.

15 Agus air ball bha 'n sluagh uile, 'nuair a chunnaic iad e, fo uamhas mòr, agus air dhoibh ruith d'a ionnsuidh, chuir iad failte air.

16 Agus dh'fhiosraich e do na sgriobhaichibh, Ciod e mu 'm bheil sibh a' deasboireachd riu?

17 Agus air freagairt do neach do'n t-sluagh, thubhairt e, A mhaighstir, thug mi mo mhac a d' ionnsuidh, anns am bheil spiorad balbh:

18 Agus ge b'e ionad sam bith an glac se e, a ta e 'ga tharruing as a chéile; agus a ta e cur cobhair *as a bheul*, agus a' giosgarnaich le 'fhiaclaibh, agus a ta e a' seargadh as: agus thubhairt mi ri d' dheisciobluibh, iad g'a chur a mach, agus cha b'urrainn iad.

19 Ach fhreagair esan, agus thubhairt e ris, O chinnich gun chreidimh, cia fhad a bhitheas mi maille ribh? cia fhad a dh'fhuilgeas mi sibh? thugaibh e a m' ionnsuidh.

20 Agus thug iad d'a ionnsuidh e: agus an uair a chunnaic se e, reub an spiorad air ball e; agus thuit e air an talamb,

agus bha e 'ga aoirneagan féin, agus a' cur cobhair *as a bheul*.

21 Agus dh'fhiosraich e d'a athair, Cia fhad an aimsir o thàinig so air? agus thubhairt e, O bha e 'na leanabh.

22 Agus gu minic thilg e san teine e, agus anns an uisge, chum gu milleadh se e: ach ma ta thusa comasach air ni sam bith a dhèanamh, gabh truas dinn, agus cuidich leinn.

23 Ach thubhairt Iosa ris, Ma 's urrainn thusa creidsinn, a ta gach aon ni comasach do'n neach a chreideas.

24 Agus ghlaodh athair an leinibh a mach air ball, agus thubhairt e le deuraibh, A ta mi creidsinn, a Thighearn; cuidich thusa le mo mhi-chreidimh.

25 Agus an uair a chunnaic Iosa an sluagh a' ruith cuid-eachd, chronuich e an spiorad neòghlan, ag ràdh ris, A spioraid bhailbh agus bhodhair, a ta mi 'g òrduchadh dhuit, Thig a mach as, agus na rach a steach ann ni 's mò.

26 Agus ghlaodh an spiorad, agus reub e gu ro chràiteach e, agus chaidh e mach as: agus bha e 'n riochd mairbh, ionnus gu'n dubhairt mòran, Tha e marbh.

27 Ach air do Iosa a ghlacadh air làimh, thog e suas e, agus dh'éirich e.

28 Agus an uair a chaidh e steach do'n tigh, dh'fhiosraich a dheisciobuil deth an uaignidheas, C'ar son nach b' urrainn sinne a thilgeadh mach?

29 Agus thubhairt esan riu, Cha'n 'eil e comasach gu'n téid a' ghnè so mach le ni air bith, ach le h-ùrnuigh agus trasgadh.

30 Agus dh'imich iad as a sin, agus chaidh iad troimh Ghalile; agus cha b'àill leis fhios so bhi aig aon neach.

31 Oir theagaisg e a dheis-ciobuil féin, agus thubhairt e riu, A ta Mac an duine air a thubhairt thairis do làmhaibh dhaoine, agus cuiridh iad gu bàs e; agus an déigh a chur gu bàs, éiridh e a ris an treas là.

32 Ach cha do thuig iad a' chainnt so, agus bha eagal orra fheòraich dheth.

33 Agus thàinig e gu Capernaum; agus air dha bhi san tigh, dh'fhiosraich e dhiubh, Ciod e mu'n robh sibh a' deasboireachd eadairibh féin, air an t-slighe?

34 Ach dh'fhan iadsan 'nan tosd: oir air an t-slighe bha iad a' reusonachadh eatorra féin, cò aca bu mhò a bhiodh.

35 Agus air suidhe dha, ghairm e 'n dà fhear dheug d'a ionnsuidh, agus thubhairt e riu, Ge b'e neach leis am miann a bhi air thoiseach, bithidh esan air dheireadh air chàch uile, agus 'na sheirbhiseach do na h-uile.

36 Agus ghabh e leanabh, agus chuir e 'nam meadhon e: agus an uair a thog e suas 'na uchd e, thubhairt e riu,

37 Ge b'e neach a ghabhas ri h-aon d'an leithidibh so do leanabaibh a'm' ainm-sa, a ta e a' gabhail riumsa; agus ge b'e neach a ghabhas riumsa, cha mhise ris am bheil e a' gabhail, ach an Ti a chuir uaith mi.

38 Agus fhreagair Eoin e, ag ràdh, A mhaighstir, chunnaic sinne neach nach 'eil 'gar leantuinn a' tilgeadh a mach dheamhan a'd' ainm-sa; agus bhac sinn e, a chionn nach 'eil e 'gar leantuinn féin.

39 Ach thubhairt Iosa, Na bacaibh e: oir cha'n 'eil neach sam bith a ni mìorbhuil a'm' ainm-sa, d'am bheil e 'n comas olc a labhairt gu h-ealamh umam.

40 Oir ge b'e neach nach 'eil 'nar n-aghaidh, a ta e leinn.

41 Oir ge b'e neach a bheir cupan uisge dhuibh-sa r'a òl a'm' ainm-sa, a chionn gur le Crìosd sibh, gu deimhin a ta mi ag ràdh ribh, nach caill e a dhuais.

42 Agus ge b'e bheir aobhar oilbheim do aon neach do na h-aonaibh beaga so, a ta creidsinn annam-sa, b' fheàrr dha gu'm biodh clach-mhuilinn air a crochadh m' a mhuineal, agus gu'm biodh e air a thilgeadh san fhairge.

43 Agus ma bheir do làmh aobhar oilbheim dhuit, gearr dhìot i: is feàrr dhuit dol a steach do 'n bheatha air leth-làimh, na dà làimh a bhi agad, agus dol gu h-ifrinn, do'n teine nach mùchar a chaoidh;

44 Far nach bàsaich an cnuimh, agus nach téid an teine as.

45 Agus ma bheir do chos aobhar oilbheim dhuit, gearr dhìot i: is feàrr dhuit dol a steach do'n bheatha air leth-chois, na dà chois a bhi agad, agus a bhi air do thilgeadh ann an ifrinn, do'n teine nach mùchar a chaoidh;

46 Far nach bàsaich an cnuimh, agus nach téid an teine as.

47 Agus ma bheir do shùil aobhar oilbheim dhuit, spion asad i: is feàrr dhuit dol a steach do rioghachd Dhé air aon sùil, na dà shùil a bhi agad, agus a bhi air do thilgeadh ann an teine ifrinn;

48 Far nach bàsaich an cnuimh, agus nach téid an teine as.

49 Oir sailleair gach aon neach le teine, agus sailleair gach aon iobairt le salann.

50 Is maith an salann: ach ma chailleas an salann a shailt-eachd, ciod e leis an dèan sibh

deadh-bhlasda e? Biodh agaibh salann annaibh féin, agus bithibh sìochail r'a chéile.

CAIB. X.

AGUS air éirigh dha as a sin, thàinig e gu crìochaibh Iudea troimh an dùthaich a ta air an taobh thall do Iordan: agus thàinig slòigh d'a ionnsuidh a ris; agus mar bu ghnàth leis, theagaisg e iad a ris.

2 Agus thàinig na Phairisich d'a ionnsuidh, agus dh'fhiosraich iad deth, Am bheil e ceaduichte do dhuine a bhean a chur air falbh? 'ga dhearbhadh.

3 Ach fhreagair esan agus thubhairt e riu, Ciod a dh'àithn Maois dhuibh?

4 Agus thubhairt iadsan, Thug Maois cead duinn litir-dhealaich a sgrìobhadh, agus a cur air falbh.

5 Agus fhreagair Iosa agus thubhairt e riu, Air son cruais bhur cridhe, sgrìobh e an àithne so dhuibh.

6 Gidheadh o thoiseach na cruitheachd, rinn Dia iad fear agus bean.

7 Air an aobhar so fàgaidh duine 'athair agus a mhàthair, agus dlùth-leanaidhe r'amhnaoi-phòsda:

8 Agus bithidh iad araon 'nan aon fheoil: ionnus nach dithis iad o sin suas, ach aon fheoil.

9 Air an aobhar sin an ni a chuir Dia cuideachd, na cuir-eadh duine o chéile.

10 Agus anns an tigh dh'fheòraich a dheisciobuil deth a ris mu thimchioll an ni cheudna.

11 Agus thubhairt e riu, Ge b'e neach a chuireas air falbh a bhean féin, agus a phòsas bean eile, a ta e a' dèanamh adhaltrannais 'na h-aghaidh.

12 Agus ma chuireas bean air falbh a fear féin, agus ma bith-

eas i air a pòsadh ri fear eile, a ta i a' dèanamh adhaltrannais.

13 Agus thug iad leanabana d'a ionnsuidh, chum gu'm beanadh e riu; agus chronuich a dheisciobuil a' mhuinntir a thug leo iad.

14 Ach an uair a chunnaic Iosa sin, bha e ro dhiombach, agus thubhairt e riu, Leigibh do na leanabanaibh teachd a m' ionnsuidh, agus na bacaibh iad: oir is ann d'an leithidibh a ta rìoghachd Dhé.

15 Gu deimhin a ta mi ag ràdh ribh, Ge b'e neach nach gabh rìoghachd Dhé mar leanabh beag, nach téid e gu bràth a steach innte.

16 Agus ghlac e 'na uchd iad, agus chuir e a làmhan orra, agus bheannaich e iad.

17 Agus an uair a chaidh e mach air an t-slighe, thàinig neach 'na ruith, agus leig se e féin air a ghlùinibh dha, agus dh'fheòraich e dheth, A mhaighstir mhaith, ciod a ni mi chum gu sealbhaich mi a' bheatha mhaireannach?

18 Agus thubhairt Iosa ris, C'ar son a ghoireas tu maith dhìomsa? cha'n 'eil neach sam bith maith, ach a h-aon, is e sin Dia.

19 Is aithne dhuìt na h-àith-eanta, Na dèan adhaltrannas, Na dèan mortadh, Na goid, Na toir fianuis bhréige, Na dèan eucoir, Thoir urram do t'athair, agus do d' mhàthair.

20 Ach fhreagair esan agus thubhairt e ris, A mhaighstir, choimhid mi iad so uile o m'òige.

21 Agus air amharc do Iosa air, ghràdhaich se e, agus thubhairt e ris, A ta aon ni dh'uireasbhuidh ort: imich, reic na bheil agad, agus tabhair do na bochdaibh, agus bithidh agad ionmhas air nèamh; agus thig,

tog an crann-cèusaidh, agus lean mise.

22 Agus bha doilghios air-san air son nam briathra sin, agus dh'fhalbh e gu tuirseach; oir bha mòran saoihbheis aige.

23 Agus air amharc do Iosa mu'n cuairt, thubhairt e r'a dheisciobluibh, Cia deacair do'n mhuinntir sin aig am bheil mòr-shaoibhreas dol a steach do rìoghachd Dhé!

24 Agus bha mòr-uamhas air na deisciobluibh airson a bhriathra. Ach fhreagair Iosa a ris, agus thubhairt e riu, A chlann, cia deacair dhoibh-san a chuir-eas an dòigh ann an saoihbheas, dol a steach do rìoghachd Dhé!

25 Is usadh do chàmhhal dol troimh chrò na snàthaid, na do dhuine saoibhir dol a steach do rìoghachd Dhé.

26 Ach bha uamhas orra-san thar tomhas, ag ràdh eatorra féin, Cò ma seadh a dh'fheudas a bhi air a shaoradh?

27 Agus air do Iosa amharc orra, thubhairt e, Do dhaoinibh a ta so eu-comasach, ach cha 'n'eil e do Dhia: oir do Dhia a ta na h-uile nithe comasach.

28 Agus thòisich Peadar air a ràdh ris, Feuch, thréig sinne na h-uile nithe, agus lean sinn thu-sa.

29 Ach fhreagair Iosa, agus thubhairt e, Gu deimhin a ta mi ag ràdh ribh, nach 'eil neach sam bith a dh'fhàg tigh, no bràithre, no peathraiche, no athair, no màthair, no bean-phòsda, no clann, no fearann, air mo shonsa agus air son an t-soisgeil,

30 Nach faigh a cheud uiread san aimsir so féin, tighean, agus bràithrean, agus peathraichean, agus màthraichean, agus clann, agus fearann, maille ri geur-leanmhuinn; agus anns an

t-saoghal a ta ri teachd, a' bheatha mhaireannach.

31 Ach a ta mòran air thùs, a bhitheas air dheireadh; agus air dheireadh, a bhitheas air thùs.

32 Agus bha iad air an t-slighe a' dol suas gu Ierusalem: agus bha Iosa ag imeachd rompa; agus ghlac uamhas iad, agus ag dhoibh *esan* a leantuinn, bha eagal orra. Agus thug e an dà fhear dheug air leth a ris, agus thòisich e air na nithe a bha gu tachairt da innseadh dhoibh,

33 Ag ràdh, Feuch, a ta sinn a' dol suas gu Ierusalem; agus bithidh Mac an duine air a thoirt thairis do na h-àrd-shagartaibh, agus do na sgrìobhaichibh: agus ditidh iad chum bàis e, agus bheir iad thairis e do na Cinnich;

34 Agus ni iad fanoid air, agus sgiùrsaidh iad e, agus tilgidh iad smugaid air, agus cuiridh iad gu bàs e: agus air an treas là éiridh e a ris.

35 Agus thàinig d'a ionnsuidh Seumas agus Eoin, mic Shebede, ag ràdh, A mhaighstir, is àill leinn gu'n dèan thu dhuinne ge b'e ni a dh'iarras sinn.

36 Agus thubhairt *esan* riu, Ciod is àill leibh mise a dhèanamh dhuibh?

37 Agus thubhairt iadsan ris, Deònuich dhuinne gu'n suidheamaid, a h-aon air do làimh dheis, agus am fear eile air do làimh chli, ann do ghloir.

38 Ach thubhairt Iosa riu, Cha'n aithne dhuibh ciod a ta sibh ag iarraidh: am bheil sibh comasach air a' chupan òl a dh'òlas mise? agus a bhi air bhur baisteadh leis a' bhaisteadh leis am baistear mise?

39 Thubhairt iadsan ris, A ta sinn comasach. Ach thubhairt Iosa riu, Olaidh sibhse gu

deimhin an cupan a dh'òlas mise ; agus baistear sibh leis a' bhaisteadh leis am baistear mise :

40 Ach suidhe air mo làimh dheis, agus air mo làimh chli, cha leamsa sin r'a thabhairt, ach dhoibh-san d'an d'ulluicheadh e.

41 Agus air cluinntinn so do'n deichnear, thòisich iad air mòr-chorruich a ghabhail ri Seumas agus Eoin.

42 Ach ghairm Iosa iad d'a ionnsuidh, agus thubhairt e riu, A ta fhios agaibh gu bheil aca-san a ta air am meas mar uachd-arain air na Cinnich, àrd-thighearnas orra ; agus gu bheil aig an daoinibh mòra làn-ùghdarras orra.

43 Ach cha bhi e mar sin 'nur measg-sa : ach ge b'e neach le'n àill a bhi mòr 'nur measg, bithidh e 'na òglach agaibh :

44 Agus ge b'e neach agaibh le'n àill toiseach a bhi aige, bithidh e 'na sheirbhiseach do na h-uile.

45 Oir cha d'thàinig eadhon Mac an duine chum gu'n dèantadh frithealadh dha, ach a dhèanamh frithealaidh, agus a thoirt 'anama féin mar éiric air son mhòran.

46 Agus thàinig iad gu Iericho : agus air imeachd dhasan agus d'a dheisciobluibh, agus do shluagh mòr, a mach á Iericho, bha Bartimeus an dall, mac Thimeuis, 'na shuidhe ri taobh na slighe, ag iarraidh déirce.

47 Agus an uair a chual e gu'm b'e Iosa o Nasaret a bh'ann, thòisich e ri glaadhaich, agus a ràdh, Iosa, Mhic Dhaibhidh, dèan tròcair orm.

48 Agus chronuich mòran e, chum gu'm biodh e 'na thosd : ach bu ro mhòid a ghlaodh esan, a Mhic Dhaibhidh, dèan tròcair orm.

49 Agus sheas Iosa, agus dh'àithn e esan a ghairm d'a ionnsuidh : agus ghairm iad an dall, ag ràdh ris, Biodh misneach agad, éirich ; tha e ga d' ghairm.

50 Agus air dhasan 'fhalluinn a thilgeadh uaith, dh'éirich e, agus thàinig e gu Iosa.

51 Agus fhreagair Iosa, agus thubhairt e ris, Ciod is àill leat mise a dhèanamh dhuit ? Thubhairt an dall ris, A Thighearn, mi dh'fhaotainn mo radhairc.

52 Agus thubhairt Iosa ris, Imich ; shlànuich do chreidimh thu. Agus air ball fhuair e a radharc, agus lean e Iosa san-t-slighe.

CAIB XI.

AGUS an uair a thàinig iad am fagus do Ierusalem, gu Betphage agus Betani, aig sliabh nan crann-oladh, chuir e uaith dithis d'a dheisciobluibh,

2 Agus thubhairt e riu, Rach-aibh do 'n bhaile ud thall fa bhur comhair ; agus air ball an uair a théid sibh a steach ann, gheibh sibh searrach ceangailte, air nach do shuidh aon duine riamh ; fuasglaibh e, agus thug-aibh leibh e.

3 Agus ma their neach air bith ruibh, C'ar son a ta sibh a' dèanamh so ? abraibh, Gu bheil feum aig an Tighearn air ; agus air ball cuiridh e 'n so e.

4 Agus dh'imich iad, agus fhuair iad an searrach ceangailte a muigh aig an doras, aig coinn-eachadh dà shlighe ; agus dh'fhuasgail iad e.

5 Agus thubhairt cuid dhiubhsan, a bha 'nan seasamh an sin, riu, C'ar son a ta sibh a' fuasgladh an t-searraich ?

6 Agus thubhairt iadsan riu mar a dh'àithn Iosa dhoibh : agus leig iad uatha iad.

7 Agus thug iad an searrach

chum Iosa, agus chuir iad am falluinnean air; agus shuidh esan air.

8 Agus sgaoil mòran am falluinnean féin air an t-slighe: agus gheàrr cuid eile geugan do na craobhaibh, agus sgaoil iad air an t-slighe iad.

9 Agus ghlaodh iadsan a bha 'g imeachd roimhe, agus iadsan a bha 'ga leantuinn, ag ràdh, Hosanna, is beannaichte an Tì a ta teachd ann an ainm an Tigh-earn.

10 Is beannaichte rìoghachd ar n-Athar Daibhidh, a ta teachd [ann an ainm an Tighearna;] Hosanna anns na h-àrdaibh.

11 Agus chaidh Iosa a steach do Ierusalem, agus do'n teampull; agus an uair a dh'amhairc e air gach ni mu'n cuairt, agus a bha 'm feasgar a nis air teachd, chaidh e mach gu Betani maille ris an dà fhear dheug.

12 Agus air an là màireach, 'nuair a chaidh iad a mach á Betani, dh'fhàs e ocrach.

13 Agus air faicinn craobh-fhìge fada uaith, air an robh duilleach, thàinig e, dh'fheuchainn am faigheadh e ni sam bith oirre: agus air dha teachd d'a h-ionnsuidh, cha d'fhuair e ni sam bith ach duilleach; oir cha robh àm *tionail* nam fige fathast ann.

14 Agus fhreagair Iosa agus thubhairt e rithe, Nar itheadh neach sam bith toradh dhìotsa o so suas a chaoidh. Agus chual a dheisciobuil e.

15 Agus thàinig iad gu Ierusalem: agus chaidh Iosa a steach do'n teampull, agus thòisich e air an dream a bha reiceadh agus a' ceannach san teampull a chur a mach, agus thilg e thairis bùird luchd malairt an airgid, agus caithriche na muinntir a bha reiceadh choluman:

16 Agus cha'n fhuilgeadh e gu'n giùlaineadh neach sam bith soitheach troimh an teampull.

17 Agus theagaisg e, ag ràdh riu, Nach 'eil e sgrìobhta, Goir-ear tigh ùrnuigh do m' thigh-sa do na h-uile chinnich? Ach rinn sibhse 'na gharaidh luchd-reubainn e.

18 Agus chuala na sgrìobhaichean agus na h-àrd-shagairt so, agus dh'iarr iad cionnus a dh'fheudadh iad esan a mhill-eadh: oir bha 'eagal-san orra, do bhrìgh gu'n robh an sluagh uile fo iongantas mòr r'a theag-asg.

19 Agus an uair a bha am feasgar air teachd, chaidh e mach as a' bhaile.

20 Agus air mhaduinn, ag gabhail seachad dhoibh, chunn-aic iad an crann-fìge air crìonadh o fhreumhaibh.

21 Agus air cuimhneachadh do Pheadar, thubhairt e ris, A mhaighstir, feuch, a ta a' chraobh-fhìge, a mhalluich thu, air crìonadh.

22 Agus fhreagair Iosa, agus thubhairt e riu, Biodh creidimh Dhé agaibh.

23 Oir gu deimhin a ta mi ag ràdh ribh, ge b' e neach a their ris a' bheinn so, Togar thu, agus tilgear san fhairge thu, agus nach bi fo amharus 'na chridhe, ach a chreideas gu'n tachair na nithe a their e, thig gach ni a their e gu crìch dha.

24 Air an aobhar sin tha mi ag ràdh ribh, Ge b' e nithe air bith a dh'iarras sibh ann an ùrnuigh, creidibh gu'm faigh sibh, agus gheibh sibh.

25 Agus an uair a sheasas sibh a' dèanamh ùrnuigh, maithibh, ma ta ni air bith agaibh an aghaidh aoine duine; chum gu maith bhur n-Athair a ta air

nèamh bhur peacanna féin duibhse.

26 Ach mur maith sibhse, cha mhò a mhaitheas bhur n-Athair a ta air nèamh bhur peacanna féin duibhse.

27 Agus thàinig iad a rìs gu Ierusalem: agus air dhasan bhi a' spaisdeireachd anns an teampull, thàinig d'a ionnsuidh na h-àrd-shagairt, agus na sgrìobhaichean, agus na seanairean.

28 Agus thubhairt iad ris, Ciod e an t-ùghdarras leis am bheil thu a' dèanamh nan nithe so? Agus cò thug dhuit an t-ùghdarras so chum na nithe so dhèanamh?

29 Agus fhreagair Iosa agus thubhairt e riu, Feòraichidh mise mar an ceudna aon ni dhibhse, agus freagraibh mi, agus innsidh mise dhuibh-sa ciod e an t-ùghdarras leis am bheil mi dèanamh nan nithe so.

30 An ann o nèamh, no o dhaoineibh a thàinig baisteadh Eoin? freagraibh mi.

31 Agus bha iad a' reusonachadh eatorra féin, ag ràdh, Ma their sinn, O nèamh; their esan ruinn, C'ar son ma seadh nach do chreid sibh e?

32 Ach ma their sinn, O dhaoineibh; bhaeagalant-sluaigh orra: oir b'e meas gach uile air Eoin gu'm b'fhàidh e gu firinneach.

33 Agus air freagairt dhoibh, thubhairt iad ri Iosa, Cha'n 'eil fhios againn. Agus fhreagair Iosa agus thubhairt e riu, Cha mhò a dh'innseas mise dhuibhse ciod e an t-ùghdarras leis am bheil mi dèanamh nan nithe so.

CAIB. XII.

AGUS thòisich e air labhairt riu ann an cosamhlachdaibh. Shuidhich duine àraidh fionlios, agus chuir e gàradh mu'n

cualt air, agus chladhaich e ionad-bruthaidh *nam fion-dhearc*, agus thog e tùr, agus shuidhich e air tuath e, agus ghabh e a thurus as a dhùthaich.

2 Agus san àm dhligheach chuir e seirbhiseach a dh'ionnsuidh na tuatha, chum gu'm faigheadh e do thoradh an fhìon-lios o'n tuath.

3 Ach air dhoibh-san esan a ghlacadh, bhuail iad e, agus chuir iad uatha falamh e.

4 Agus a rìs chuir e seirbhiseach eile d'an ionnsuidh; agus chlach iad e, agus reub iad a cheann, agus chuir iad uatha e le h-eas-urram.

5 Agus a rìs chuir e neach eile d'an ionnsuidh; agus esan mharbh iad: agus mòran eile, a' bualadh cuid diubh, agus a' marbhadh cuid eile.

6 Fathast uime sin, air dha aon Mhac a bhi aige, a b' ionmhuinn leis, chuir e esan mar an ceudna fa dheoidh d'an ionnsuidh, ag ràdh, Bheir iad urram do m' Mhac.

7 Ach thubhairt an tuath sin 'nam measg féin, Is e so an t-oighre; thigibh, marbhamaid e, agus bithidh an oighreachd againn féin.

8 Agus rug iad air, agus mharbh iad e, agus thilg iad a mach as an fhìon-lios e.

9 Ciod e uime sin a ni Tigh-earn an fhìon-lios? Thig e agus sgriosaidh e 'n tuath sin, agus bheir e am fhìon-lios do dhaoineibh eile.

10 Nach do leugh sibh an sgriobtuir so? A' chlach a dhiùlt na clachairean, rinneadh ceann na h-oisinn d'i.

11 Rinneadh so leis an Tigh-earn, agus is iongantach e 'nar sùilbh-ne.

12 Agus dh'iarr iad breith air, ach bha eagal an t-sluaigh

orra; oir thuig iad gu'm b'ann 'nan aghaidh féin a labhair e an cosamhlachd: agus air fhàgail doibh, dh'imich iad rompa.

13 Agus chuir iad d'a ionnsuidh dream àraidh do na Phairisich, agus do luchd-leanmhuinn Heroid, chum gu'n glacadh iad e 'na chainnt.

14 Agus air dhoibh-san teachd, thubhairt iad ris, A mhaighstir, a ta fhios againn gu bheil thusa firinneach, agus nach 'eil suim agad do neach air bith: oir cha'n 'eil thu ag amharc air gnùis dhaoine, ach a' teagasg slighe Dhé ann am firinn. Am bheil e ceaduichte cìs a thoirt do Cheasar, no nach 'eil? an tabhair, no nach tabhair sinn i?

15 Ach air dhasan an cealg a thuigsinn, thubhairt e riu, C'ar son a ta sibh ga m' bhuaireadh? thugaibh peghinn a m' ionnsuidh, chum gu'm faic mi i?

16 Agus thug iad d'a ionnsuidh i, agus thubhairt e riu, Cò d'an ìomhaigh so, agus cò d' am buin an sgrìobhadh so? Agus thubhairt iadsan ris, Do Cheasar.

17 Agus fhreagair Iosa, agus thubhairt e riu; Thugaibh do Cheasar na nithe a's le Ceasar, agus do Dhia na nithe a's le Dia. Agus ghabh iad iongant-as ris.

18 An sin thàinig na Sadusaich d'a ionnsuidh, a ta 'g ràdh nach 'eil aiseirigh ann; agus dh'fheòraich iad deth, ag ràdh,

19 A mhaighstir, sgrìobh Maois dhuinne, Nam faigheadh bràthair duine air bith bàs, agus gu'm fàgadh e bean, agus nach fàgadh e clann, gu'n gabhadh a bhràthair a bhean d'a ionnsuidh, agus gu'n togadh e sliochd d'a bhràthair.

20 A nis bha seachdnar bhràithrean ann: agus ghabh an

ceud fhear dhiubh bean, agus an uair a dh'eug e, cha d'fhàg e sliochd.

21 Agus ghabh an dara fear i, agus fhuair esan bàs, agus cha mhò a dh'fhàg esan sliochd: agus an treas fear mar an ceudna.

22 Agus ghabh an t-seachdnar i, agus cha d'fhàg iad sliochd: 'nan déigh uile, chaochail a' bhean mar an ceudna.

23 Anns an aiseirigh uime sin, an uair a dh'éireas iad, cò dhiubh d'am bean i? oir bha i aig an t-seachdnar 'na mnaoi.

24 Agus fhreagair Iosa agus thubhairt e riu, Nach 'eil sibh uime sin ann am mearachd, do bhrìgh nach 'eil eòlas agaibh air na sgrìobtuiribh, no air cumhachd Dhé?

25 Oir an uair a dh'éireas iad o na marbhaibh, cha phòs iad, ni mò a bheirear am pòsadh iad; ach a ta iad mar na h-aingil a ta air nèamh.

26 Ach mu thimchioll nam marbh, gu'n éirich iad, nach do leugh sibh ann an leabhar Mhaois, cionnus a labhair Dia ris anns a' phreas, ag ràdh, Is mise Dia Abraham, agus Dia Isaac, agus Dia Iacoib?

27 Cha 'n e Dia nam marbh e, ach Dia nam beò: tha sibhse uime sin ann am mearachd mòr.

28 Agus thàinig neach do na sgrìobhaichibh, agus an uair a chual e iadsan a' deasboireachd r'a chéile, agus a thuig e gu'n do fhreagair e gu maith iad, chuir e ceisd air, Cia i a' cheud àithne do na h-àitheantaibh uile?

29 Agus fhreagair Iosa e, 'S i so a' cheud àithne do na h-àitheantaibh uile, Eisd, O Israel, an Tighearn ar Dia-ne, is aon Tighearn e;

30 Agus gràdhaichidh tu an Tighearn do Dhia le d'uile chridhe, agus le d'uile anam, ag-

us le d'uile inntinn, agus le d'uile neart: *Is i so a' cheud àithne:*

31 Agus is cosmhuil an dara *àithne* rithe so, Gràdhaichidh tu do choimhearsnach mar thu féin: cha'n 'eil àithne eile ann a's mò na iad so.

32 Agus thubhairt an sgrìobhaiche ris, *Is maith, gu fìrinn-each, a Mhaighstir, a thubhairt thu: oir a ta aon Dia ann, agus cha'n 'eil atharrach ann ach e féin.*

33 Agus esan a ghràdhachadh leis an uile chridhe, agus leis an uile tbuigse, agus leis an uile anam, agus leis an uile neart, agus neach a ghràdhachadh a choimhearsnaich mar e féin, is mò sin na na h-uile làn iòbairte-loisgte, agus thabharta-sa.

34 Agus an uair a chunnaic Iosa gu'n do fhreagair e gu tuisgeach, thubhairt e ris, Cha'n 'eil thu fada o rìoghachd Dhé. Agus cha robh a mhisnich aig neach air bith o sin suas ceisd a chur air.

35 Agus fhreagair Iosa agus thubhairt e, a' teagasg anns an teampull, Cionnus a tha na sgrìobhaichean ag ràdh gur e Crìosd Mac Dhaibhidh?

36 Oir thubhairt Daibhidh féin troimh an Spiorad naomh, Thubhairt an Tighearn ri m' Thighearn-sa, Suidh air mo làimh dheis, gus an cuir mi do naimhde 'nan stòl fo d' chos-aibh;

37 Air an aobhar sin a ta Daibhidh féin a' gairm a Thighearna dheth; cionnus ma seadh is e 'mhac e? Agus dh'éisd am mòr-shluagh ris gu taitneach.

38 Agus thubhairt e riu 'na theagasg, Bithibh air bhur faicill o na sgrìobhaichibh, leis an ionmhuinn imeachd ann an

culaidhibh fada, agus fàilte *phaotainn* air na margaibh,

39 Agus na ceud chaithriche anns na sionagogaibh, agus na ceud àiteacha-suidhe aig na féilibh:

40 A dh'itheas suas tighean bhantrach, agus air sgàth deadh choslais a ni ùrnuighean fada: gheibh iad sin an dìteadh a's mò.

41 Agus air do Iosa suidhe fa chomhair àite-coimhid an ionmhais, thug e fa'near cionnus a bha 'm pobull a' cur an airgid anns an ionmhas: agus chuir mòran do dhaoineibh saobhair mòran ann.

42 Agus air teachd do bhantraich bhochd, thilg i dà bhonn bbeag ann, a ni feirling.

43 Agus air dha a dheisciobuil a ghairm d'a ionnsuidh, thubhairt e riu, Gu deimhin a ta mi ag ràdh ribh gu'n do chuir a' bhantrach bhochd so tuilleadh san ionmhas, na iadsan uile a thilg ann.

44 Oir thilg iadsan uile ann d'am mòr-phailteas; ach thilg ise as a gainne na bha aice uile, eadhon a beathachadh gu h-iomlan.

CAIB. XIII.

AGUS an uair a bha e dol a mach as an teampull, thubhairt neach d'a dheisciobluibh ris, A Mhaighstir, feuch ciod e a' ghnè chlach so, agus ciod e a' ghnè aitreibh so!

2 Agus fhreagair Iosa agus thubhairt e ris, Am faic thu an aitreabh mhòr so? cha'n fhàgar clach air muin cloiche, nach sgarar o chéile.

3 Agus 'nuair a shuidh e air sliabh nan crann-oladh, fa chomhair an teampull, dh'fheòraich Peadar, agus Seumas, agus

Eoin, agus Aindreas an uaighidheas deth,

4 Innis duinne c'uin' a bhitheas na nithe sin, agus ciod e 'n comhara 'nuair a bhitheas na nithe sin gu léir air an coimh-ionadh.

5 Agus fhreagair Iosa iad, agus thòisich e air a ràdh, Thug-aibh an aire nach meall aon neach sibh :

6 Oir thig mòran an am ainm-sa, ag ràdh, Is mise e : agus meallaidh iad mòran.

7 Agus an uair a chluinneas sibh coganna, agus tuairisgeul choganna, na biodh buaireas oirbh : oir is éigin *iad so* a theachd ; ach cha 'n'eil an deir-eadh ann fathast.

8 Oir éiridh cinneach an aghaidh cinnich, agus rìoghachd an aghaidh rìoghachd : agus bithidh critheanna talmhainn ann an iomadh àit, agus bithidh gorta agus trioblaidean ann : is iad sin toiseach dhòruinnean.

9 Ach thugaibh an aire dhuibh féin : oir bheir iad thairis sibh do chomhairlibh : agus anns na sionagogaibh sgiùrsar sibh, agus cuirear sibh an làthair uachdar-an agus rìghrean air mo shon-sa, mar fhianuis dhoibh-san.

10 Agus is éigin air tùs an soisgeul a bhi air a shear-monachadh do na h-uile chiunn-ich.

11 Ach an uair a bheir iad leo sibh, 'gur tabhairt thairis, na biodh e na ro-chùram oirbh ciod e a labhras sibh, agus na smuainichibh roimh-làimh *air* : ach ge b'e ni a bheirear dhuibh san uair sin féin, abraibh e : oir cha sibhse ta labhairt, ach an Spiorad naomh.

12 Agus bheir am bràthair a bhràthair thairis chum bàis, agus an t-athair a mhac : agus éiridh a' chlann suas an agh-

aidh *am* pàranta, agus bheir iad fa' near an cur gu bàs.

13 Agus bithidh sibh air bhur fuathachadh leis na h-uile dhaoineibh air sgàth m'ainme-sa : ach an tì a bhunaicheas chum na crìche, is e so a shaor-ar.

14 Ach an uair a chi sibh gràineileachd an léir-sgrìos, air an do labhair Daniel am fàidh, 'na seasamh anns an ionad nach bu chòir dh'i, (tuigeadh an tì a leughas,) an sin teicheadh iad-san, a *ta* ann an *tìr* Iudea, chum nam beann :

15 Agus na tigeadh esan a ta air mullach an tighe, a nuas do'n tigh, agus na rachadh e steach, a thoirt ni air bith as a thigh.

16 Agus an tì a ta sa' mhach-air, na pilleadh e air ais a thogail 'fhalluinn leis.

17 Ach mo thruaigh iad na mnàin sin a ta torrach, agus iad-san a ta toirt cìche sna làithibh sin !

18 Agus guidhibh-sa gun bhur teicheadh a bhi sa' gheamhradh.

19 Oir bithidh àmhghar anns na làithidh sin, amhuil nach robh a leithid ann o thoiseach na cruitheachd a chruthaich Dia, gus a nis, agus nach mò a bhitheas.

20 Agus mur giorraicheadh an Tighearn na làithean ud, cha rachadh feoil air bith as : ach air son an t-sluaigh thaghta, a thagh e féin, ghiorraich e na làithean ud.

21 Agus an sin ma their neach air bith ribh, Feuch, a ta Crìosd an so, no, Feuch, a *ta* e 'n sin, na creidibh e :

22 Oir éiridh Crìosdan bréige, agus fàidhean bréige, agus ni iad comharan, agus mìorbhuilean, chum, nam bu chomasach

e, na daoine taghta féin a mhealladh.

23 Agus thugaibh-sa an aire : feuch, roimh-innis mi dhuibh na h-uile nithe.

24 Ach anns na làithibh sin, an déigh an àmhghair ud, bithidh a' ghrian, air a dorchachadh, agus cha toir a' ghealach a solus uaipe ;

25 Agus tuitidh reulta nèimh, agus bithidh na cumhachdan a ta sna nèamhaibh air an crathadh.

26 Agus an sin chi iad Mac an duine a' teachd anns na neulaibh, maille ri mòr-chumhachd, agus glòir.

27 Agus an sin cuiridh e 'aingil a mach, agus cruinnichidh e r'a chéile a dhaoine taghta féin o na ceithir gaothaibh, o leth-iomall na talmhainn gu leth-iomall nèimh.

28 A nis foghlumaibh cosamhlachd o 'n chraoibh-fhìge : An uair a bhitheas a geug a nis maoth, agus a chuireas i mach a duilleach, a ta fhios agaibh gu bheil an samhradh am fagus :

29 Agus mar an ceudna sibhse, an uair a chi sibh na nithe sin tachairt, biodh fhios agaibh gu bheil e 'm fagus, eadhon aig na dorsaibh.

30 Gu deimhin a ta mi ag ràdh ribh, nach téid an ginealach so thairis, gus an coimh-lionar na nithe sin uile.

31 Théid nèamh agus talamh seach ; ach cha téid m' fhocail-sa seach a chaoidh.

32 Ach cha'n 'eil fios an là no na h-uaire sin aig neach air bith, cha'n 'eil aig na h-ainglibh a ta air nèamh, no aig a' Mhac, ach aig an Athair.

33 Thugaibh fa'near, dèanaibh faire agus ùrnuigh : oir cha'n 'eil fhios agaibh c'uin' a thig an t-àm.

34 Oir a ta Mac an duine mar

dhuine a chaidh air thurus, agus a dh'fhàg a thigh féin, agus a thug d'a sheirbhisich cumhachd, agus 'obair féin do gach neach, agus a thug àithne do'n dorsair faire a dhèanamh.

35 Uime sin dèanaibh-sa faire, (oir cha'n 'eil fhios agaibh c'uin' a thig maighstir an tighe ; an ann air feasgar, no air mheadhon-oidhche, no aig gairm-choileach, no anns a' mhad-uinn ;)

36 Air eagal air teachd dha gu h-obann, gu'm faigh e sibh 'nur codal.

37 Agus na nithe a ta mi ag ràdh ribhse, a ta mi ag ràdh ris na h-uile dhaoineibh, Dèanaibh faire.

CAIB. XIV.

A GUS bha a' chàisg, agus féill an arain neò-ghoirtichte an déigh dà là : agus dh'iarr na h-àrd-shagairt agus na 'sgrìobhaichean, cionnus a ghlacadh iad esan le foill, agus a chuireadh iad gu bàs e.

2 Ach thubhairt iad, Cha'n ann air an fhéill, air eagal gu'n éirich buaireas am measg an t-sluaigh.

3 Agus air bhi dha ann am Betani, ann an tigh Shimoin an lobhair, an uair a bha e 'na shuidhe air bòrd, thàinig bean, aig an robh bocsa alabastair do oladh spicnaird, ro luachmhoir ; agus bhris i am bocsa, agus dhòirt i air a cheann e.

4 Agus bha cuid diubh diombach annta féin, agus ag ràdh, C'ar son a rinneadh an t-ana-caitheadh so air an oladh ?

5 Oir dh'fheudadh i bhi air a reiceadh air son tuilleadh na trì cheud peghinn, agus air a toirt do na bochdaibh. Agus rinn iad gearan 'na h-aghaidh.

6 Ach thubhairt Iosa, Leig-

ibh leatha; c'ar son a ta sibh cur dragha oirre? rinn i obair mhaith ormsa.

7 Oir a ta na bochdan a ghnàth maille ribh, agus ge b'e uair is àill leibh, feudaidd sibh maith a dhèanamh dhoibh: ach cha'n 'eil mise a ghnàth agaibh.

8 Rinn i na dh'fheudadh i: thàinig i roimh-làimh a dh'ùngadh mo chuirp chum adh-laic.

9 Gu deimhin a ta mi ag ràdh ribh, Ge b'e earrann air bith air feadh an domhain uile am bi an soisgeul so air a shearmonachadh, bithidh mar an ceudna an ni so a rinn i air innseadh, mar chuimhne oirre.

10 Agus dh'imich Iudas Iscariot, aon do'n dà fhear dheug, chum nan àrd-shagart, gu esan a bhrath dhoibh.

11 Agus 'nuair a chual iadsan so, bha iad aoibhneach, agus gheall iad airgid a thoirt da. Agus dh'iarr e cionnus a dh'fheudadh e gu h-ìomchuidh esan a bhrath.

12 Agus air a' cheud là do fhéill an arain neo-ghoirtichte, an uair bu ghnàth leo an t-uan càisge a mharbhadh, thubhairt a dheisciobuil ris, C'àit an toil leat sinne dhol a dh'ulluchadh, chum gu'n itheadh tu a' chàisg?

13 Agus chuir e dithis d'a dheisciobluibh, agus thubhairt e riu, Rachaibh a steach do'n bhaile, agus coinnichidh duine sibh a' giùlan soithich uisge: leanaibh e.

14 Agus ge b'e àit am téid e stigh, abraibh-sa ri fear-an-tighe, Tha am Maighstir ag ràdh, C'àit am bheil an seòmar aoidheachd, anns an ith mi a' chàisg maille ri m' dheisciobluibh?

15 Agus nochdaidh esan dhuibh seòmar àrd, farsuinn, 'na

làn uidheam agus deasaichte: an sin ulluichibh dhuinn.

16 Agus chaidh a dheisciobuil a mach, agus thàinig iad do'n bhaile, agus fhuair iad mar thubhairt e riu: agus dh'ulluich iad a' chàisg.

17 Agus air teachd do'n fheasgar, thàinig esan maille ris an da fhear dheug.

18 Agus an uair a bha iad 'nan suidhe, agus ag itheadh, thubhairt Iosa, Gu deimhin a ta mi ag ràdh ribh, gu'm brath aon agaibh-sa, a ta 'g itheadh maille rium, mise.

19 Agus thòisich iad air a bhi dubbach, agus a ràdh ris an déigh a chéile, Am mise e? agus fear eile, Am mise e?

20 Agus air freagairt dhasan thubhairt e riu, Is fear do'n dà fhear dheug e, a ta tumadh maille riumsa sa' mhèis.

21 A ta mac an duine gu deimhin ag imeachd, mar a ta e sgriobhta uime, ach is an-aoibh-inn do'n fhear sin le 'm brathar Mac an duine: bu mhaith do'n duine sin mur beirteadh riamh e.

22 Agus ag itheadh dhoibh, ghlac Iosa aran, agus an déigh a bheannachadh, bhris e, agus thug e dhoibhsan e, agus thubhairt e, Gabhaibh, ithibh: is e so mo chorp-sa.

23 Agus air glacadh a' chupain, agus air tabhairt buidheachais, thug e dhoibhsan e: agus dh'òl iad uile as.

24 Agus thubhairt e riu, Is i so m'fhuil-sa an Tiomnaidh-nuaidh, a dhòirtear air son mhòran.

25 Gu deimhin a ta mi ag ràdh ribh, Nach òl mi ni's mò do thoradh na fìonain, gus an là sin an òl mi nuadh e ann an rioghachd Dhé.

26 Agus air dhoibh laoidh a

sheinn, chaidh iad a mach gu sliabh nan crann oladh.

27 Agus thubhairt Iosa riu, Gheibh sibh uile oilbheum ann-am-saan nochd: oir a ta esgriobhta, Buailidh mi am buachaill, agus sgapar na caoraich.

28 Ach an déigh dhomh éirigh, théid mi roimhibh do Ghalile.

29 Ach thubhairt Peadar ris, Ged fhaigh iadsan uile oilbheum annad, gidheadh cha 'n fhaigh mise e.

30 Agus thubhairt Iosa ris, Gu deimhin a ta mi ag ràdh riut, An diugh, air an oidhche so féin, mu'n goir an coileach dà uair, gu'n àicheadh thusa mi trì uairean.

31 Ach is ro mhòid a thubhairt esan, Ged is éigin domh am bàs fhulang maille riut, cha'n àicheadh mi chaoidh thu. Agus mar sin thubhairt càch uile mar an ceudna.

32 Agus thàinig iad gu ionad d'am b' ainm Getsemane; agus thubhairt e r'a dheisciobluibh, Suidhibh-sa an so, gus an dèan mise ùrnuigh.

33 Agus thug e leis Peadar, agus Seumas, agus Eoin, agus thòisich e air a bhi fuidh uamh-chrith, agus fuidh anabarra bròin.

34 Agus thubhairt e riu, Tha m'anam ro bhrònach, eadhon gu bàs: fanaibh-sa an so, agus dèanaibh faire.

35 Agus chaidh e beagan air aghaidh, agus thuit e air an talamh, agus rinn e ùrnuigh, nam bu chomasach e, gu'n rachadh an uair thairis air.

36 Agus thubhairt e, Abba, Athair, a ta gach ni so-dhèanta dhuitse; cuir an cupan so seachad orm: gidheadh, na b'e an ni a b'àill leamsa, ach an ni a's toil leatsa.

37 Agus thàinig e, agus

fhuair e iadsan 'nam codal, agus thubhairt e ri Peadar, a Shìmoin am bheil thu a'd' chodal? nach b'urrainn thu faire a dhèanamh aon uair?

38 Dèanaibh faire agus ùrnuigh, chum nach tuit sibh am buaireadh: a ta an spiorad gu deimhin togarrach, ach a ta an fheoil anmhunn.

39 Agus air dha imeachd a ris, rinn e ùrnuigh, ag ràdh nam briathra ceudna.

40 Agus an uair a pbill e, fhuair e iad a ris 'nan codal, (oir bha'n sùilean trom,) agus cha robh fhios aca cionnus a bheireadh iad freagrach air.

41 Agus thàinig e an treas uair, agus thubhairt e riu, Coidlibh roimhibh a nis, agus gabhaibh fois: is leoir e, thàinig an uair; feuch, a ta Mac an duine air a bhrath thairis do làmhaibh nam peacach.

42 Eiribh, imicheamaid; feuch, a ta an tì a bhrathas mise am fagus.

43 Agus air ball, air dha bhi fathast a' labhairt, thàinig Iudas, aon do'n dà fhear dheug, agus sluagh mòr maille ris le claidhibh agus bataibh, o na h-àrd-shagartaibh, agus na sgrìobhaichibh, agus na seanairibh.

44 Agus bha an tì a bhrath esan air toirt comhara dhoibh, ag ràdh, Ge b'e neach d'an toir mise pòg, is e sin e; glacaibh e, agus thugaibh leibh e gu tèaruinte.

45 Agus air teachd dha, chaidh e air ball d'a ionnsuidhsa, agus thubhairt e, Fàilte dhuit, a mhaighstir; agus phòg se e.

46 Agus chuir iadsan làmh ann, agus ghlac iad e.

47 Agus air tarruing claidheimh do fhear do na bha làthair, bbuail e òglach an àrd-

shagairt, agus gheàrr e a chluas deth.

48 Agus fhreagair Iosa agus thubhairt e riu, An d'thàinig sibh a mach gu mo ghlacadh-sa, mar gu b'ann an aghaidh fir-reubainn le claidhibh agus le bataibh?

49 Bha mi gach là maille ribh san teampull, a' teagasg, agus cha do ghlac sibh mi: ach a ta so chum gu biodh na sgrìobtuirean air an coimhlionadh.

50 Agus air do na h-uile a thréigsinn, theich iad.

51 Agus lean òganach àraidh e, aig an robh lion-eudach air a chur m' a chorp lomnochd; agus rug na h-òganaich air.

52 Ach air dhasan an lion-eudach fhàgail, theich e lomnochd uatha.

53 Agus thug iad leo Iosa chum an àrd-shagairt: agus chruinnicheadh maille ris na h-àrd-shagairt uile, agus na sean-airean, agus na sgrìobhaichean.

54 Agus lean Peadar e fada uatha, gus an deachaidh e steach do thalla an àrd-shagairt: agus bha e 'na shuidhe maille ris na seirbhisich, agus 'ga gharadh ris an teine.

55 Agus dh'iarr na h-àrd-shagairt, agus a' chomhairle uile fianuis an aghaidh Iosa, chum a chur gu bàs; agus cha d'fhuair iad.

56 Oir rinn mòran dhaoine fianuis bhréige 'na aghaidh, ach cha do chòird am fianuis r' a chèile.

57 Agus dh'éirich dream àraidh, agus thug iad fianuis bhréige 'na aghaidh, ag ràdh,

58 Chuala sinne e ag ràdh, Leagaidh mi sìos an teampull so, a rinneadh le làmhaibh, agus an trì làithibh, togaidh mi teampull eile, neo-dhèanta le làmhaibh.

59 Agus mar sin féin cha robh am fianuis a' teachd r' a chèile.

60 Agus air éirigh suas do'n àrd-shagart sa' mheadhon, chuir e ceisd air Iosa, ag ràdh, Nach toir thu freagradh air bith uait? ciod sin mu bheil iad so 'a toirt fianuis a' d' aghaidh?

61 Ach dh'fhan esan 'na thosd, agus cha do fhreagair e ni sam bith. A ris dh'fheòraich an t-àrd-shagart deth, agus thubhairt e ris, An tu Crìosd, Mac an Tì bheannaichte?

62 Agus thubhairt Iosa, Is mi: agus chi sibh Mac an duine 'na shuidhe air deas làimh cumhachd *Dhé*, agus a' teachd le neulaibh nèimh.

63 An sin reubant-àrd-shagart 'eudach, agus thubhairt e, Ciod am feum a ta againn tuilleadh air fianuisibh?

64 Chuala sibh an toibheum: ciod i bhur barail-sa? Agus thug iad uile breth 'na aghaidh gu'n do thoill e am bàs.

65 Agus thòisich cuid diubh air smugaid a thilgeadh air, agus aghaidh fholach, agus a bhualadh le 'n dornaibh, agus a ràdh ris, Dèan fàidheadaireachd: agus ghabh na seirbhisich le m' basaibh air.

66 Agus air do Pheadar a bhi shìos anns an talla, thàinig aon do bhanoglaich an àrd-shagairt:

67 Agus 'nuair a chunnaic i Peadar 'ga gharadh, agus air dh'i beachdachadh air, thubhairt i ris, Bha thusa cuideachd maille ri Iosa o Nasaret.

68 Ach dh'àicheadh esan, ag ràdh, Cha'n aithne dhomh, agus cha'n 'eil mi tuigsinn ciod a ta thu 'g ràdh. Agus chaidh esan a mach do'n fhòr-dhorus; agus ghoir an coileach.

69 Agus air do bhanoglaich

fhaicinn a rìs, thòisich i air a ràdh riu-san a bha 'nan seasamh a làthair, Is ann diubh a ta 'm fear so.

70 Agus dh'àicheadh e rìs. Agus an ceann beagan 'na dhéigh sin, thubhairt iadsan a bha 'nan seasamh a làthair a rìs ri Peadar, Gu firinneach is ann diubh sud thu: oir is Galiléach thu, agus is cosmhuil do chainnt *riu*.

71 Ach thòisich esan air mallachadh agus air mionnachadh, *ag ràdh*, Cha'n aithne dhomh an duine so mu 'm bheil sibh a' labhairt.

72 Agus ghoir an coileach an dara uair. Agus chuimhnich Peadar am focal a thubhairt Iosa ris, Mu'n goir an coileach dà uair, àicheadhaidh tu mi trì uairean. Agus an uair a smuainich e air, ghuil e.

CAIB. XV.

AGUS air ball sa' mhaduinn chum na h-àrd-shagairt maille ris na seanairibh, agus na sgrìobhaichibh, agus a' chomhairle gu h-iomlan, comhairle, agus air dhoibh Iosa a cheangal, thug iad leo e, agus thug iad thairis e do Philat.

2 Agus dh'fhiosraich Pilat deth, An tusa rìgh nan Iudhach? Agus air freagairt dha, thubhairt e ris, Thubhairt thu e.

3 Agus chuir na h-àrd-shagairt mòran do nithibh as a leth: ach cha do fhreagair esan aon ni.

4 Agus chuir Pilat a rìs ceisd air, ag ràdh, Nach freagair thu nisam bith? feuch cia lion nithe air am bheil iad sin a' toirt fianuis a' d' aghaidh.

5 Ach cha do fhreagair Iosa ni sam bith tuilleadh; air chor as gu'n do ghabh Pilat iongant-as.

6 A nis air an fhéill b' ghnàth leis aon phrìosanach, ge b'e air bith a dh'iarradh iad, a leigeadh as doibh.

7 Agus bha *neach àraidh* d'am b'ainm Barabas, ceangailte maille r' a chompanaich ceannairce, muinntir a bha air dèanamh mortaidh anns a' cheannairce.

8 Agus air glaothaich gu h-àrd do'n t-sluagh, thòisich iad air iarraidh *air*, a dhèanamh dhoibh mar a rinn e an còmh-nuidh.

9 Ach fhreagair Pilat iad, ag ràdh, An àill leibh gu'n cuir mi rìgh nan Iudhach fa sgaoil duibh?

10 (Oir bha fhios aige gu'm b'ann troimh fharmaid a thug na h-àrd-shagairt thairis e.)

11 Ach bhrosnuich na h-àrd-shagairt an sluagh, chum gu'm b'fheàrr leis Barabas a chur fa sgaoil doibh.

12 Agus fhreagair Pilat, agus thubhairt e riu a rìs, Ciod ma seadh is àill leibh mi a dhèanamh ris *an duine sin*, d' an goir sibh Rìgh nan Iudhach?

13 Agus ghlaodh iad a rìs, Cèus e.

14 An sin thubhairt Pilat riu, C'ar son, ciod e 'n t-olc a rinn e? Ach bu ro mhòid a ghlaodh iadsan, Cèus e.

15 Agus air do Philat bhi toileach gnìomh taitneach a dhèanamh do 'n t-sluagh, dh'fhuasgail e Barabas dhoibh, agus thug e thairis Iosa, an déigh dha a sgiùrsadh, chum a chèusadh.

16 Agus thug na saighdearan leo e steach do'n talla, eadhon cùirt anuachdarain: agus ghairm iad a' chuideachd uile an ceann a chéile.

17 Agus chuir iad uime eudach purpuir, agus air dhoibh coron droighinn fhigheadh, chuir iad air e.

18 Agus thòisich iad air beannachadh dha, *ag ràdh*, Fàilte dhuit, a Rìgh nan Iudhach !

19 Agus bhuail iad sa' cheann e le slait chuilce, agus thilg iad smugaid air, agus a' lùbadh an glùn, rinn iad aoradh dha.

20 Agus an déigh dhoibh fanoid a dhèanamh air, thug iad deth an *t-eudach* purpuir, agus chuir iad 'eudach féin uime, agus thug iad a mach e chum gu'n cèusadh iad e.

21 Agus dh'éignich iad duine àraidh bha dol seachad, Simon o Chirene, (athair Alecsandair agus Rufuis, a bha teachd as a' mhachair,) chum a chrann-cèusaidh a ghiùlan.

22 Agus thug iad e gu ionad *d'am b'ainm* Golgota, is e sin air eadar-theangachadh, àite cloiginn.

23 Agus thug iad da r' a òl, fion air a mheasgadh le mirr : ach cha do ghabh esan e.

24 Agus an uair a chèus iad e, roinn iad a thrusgan, a' tilgeadh croinn air, ciod a' chuid a bhiodh aig gach duine dheth.

25 Agus bha 'n treas uair ann ; agus chèus iad e.

26 Agus bha sgrìobhadh a chèise-ditidh air a sgrìobhadh os a cheann, RIGH NAN IUDHACH.

27 Agus chèus iad maille ris dà ghaduiche ; fear air a làimh dheis, agus fear air a làimh chli.

28 An sin choimhlionadh an sgrìobtuir, a thubhairt, Agus bha e air àireamh am measg nan ciontach.

29 Agus thug iadsan a bha dol seachad anacainnt da, a' crathadh an ceann, agus *ag ràdh*, O thusa a leagas an teampull, agus a thogas e ann an trì làithibh,

30 Fòir ort féin, agus thig a nuas o'n chrann-chèusaidh.

31 Agus mar an ceudna thubhairt na h-àrd-shagairt agus na sgrìobhaichean r' a chéile, a' fanoid air, Shaor e daoine eile ; cha'n 'eil e comasach air e féin a shaoradh.

32 Thigeadh a nis Crìosd Rìgh Israeil a nuas o'n chrann-chèusaidh, chum gu'm faic agus gu'n creid sinn. Agus thug iadsan a chaidh chèusadh maille ris, anacainnt da.

33 Agus an uair a thàinig an seathadh uair, bha dorchadas air an talamh uile, gu ruig an naothadh uair.

34 Agus air an naothadh uair dh'éigh Iosa le guth àrd, *ag ràdh*, Eloi, Eloi, lama sabachtani ? is e sin, air eadar-theangachadh, Mo Dhia, mo Dhia, c' ar son a thréig thu mi ?

35 Agus air cluinntinn *sin* do chuid diubhsan a bha 'nan seasamh a làthair, thubhairt iad, Feuch, a ta e a' gairm Eliais.

36 Agus ruith fear diubh, agus air dha spòg a lionadh do fhion geur agus a cur air slait chuilce, thug e deoch dha, *ag ràdh*, Leigibh *leis* ; faiceamaid an tig Elias g'a thoirt a nuas.

37 Agus air do Iosa éigheach le guth àrd, thug e suas an deò.

38 Agus bha brat-roinn an teampuill air a reubadh 'na dhà chuid o mhullach gu ìochdar.

39 Agus an uair a chunnaic an ceannard-ceud, a bha 'na sheasamh fa chomhair, gu'n d' thug e suas an deò, a' glodhaich mar sin, thubhairt e, Gu firinneach b' e 'n duine so Mac Dhé.

40 Agus bha mar an ceudna mnàì am fad uatha *ag amharc* : nam measg sin bha Muire Magdalen, agus Muire màthair Sheumais bu lugha, agus Ioseis, agus Salome ;

41 Muinntir a lean e mar an

ceudna, an uair a bha e an Galile, agus a bha frithealadh dha; agus mòran eile do mhnaibh a chaidh suas maille ris gu Ierusalem.

42 Agus a nis air teachd do'n fheasgar, (do bhrìgh gu'm b'è là an ulluchaidh e, eadhon an là roimh an t-sàbaid,)

43 Thàinig Ioseph o Arimatea, comhairleach urramach, aig an robh mar an ceudna sùil ri rìoghachd Dhé, agus chaidh e steach gu dàna dh'ionnsuidh Philait, agus dh'iarr e corp Iosa.

44 Agus b'ìoghnadh le Pilat ma bha e cheana marbh: Agus air dha an ceannard-ceud a ghairm, dh'fhiosraich e dheth, An robh fad o fhuair e bàs.

45 Agus air dha fios fhaotainn o'n cheannard-ceud, thug e 'n corp do Ioseph.

46 Agus cheannaich esan lìon-eudach grinn, agus thug e nuas e, agus phaisg e san lìon-eudach e, agus chuir se e ann an uaigh a chladhaicheadh á carraig, agus charuich e clach gu dorus na h-uaighe.

47 Agus dh'amhairc Muire Magdalen, agus Muire *màthair* Ioseis, air an àite san do chuireadh e.

CAIB. XVI.

AGU air dol do'n t-sàbaid seachad, cheannaich Muire Magdalen, agus Muire *màthair* Sheumais, agus Salome, spìosraidh deadh fhàile, chum air dhoibh teachd gu'n ùngadh iad e.

2 Agus thàinig iad gu ro mhoch air maduinn a' cheud là do 'n t-seachdain chum na h-uaighe, aig éirigh na gréine.

3 Agus thubhairt iad eatorra féin, Cò a charuicheas dhuinn a' chlach o dhorus na h-uaighe?

4 (Agus air dhoibh amharc,

chunnaic iad gu'n robh a' chlach air a h-atharrachadh air falbh,) oir bha i ro mhòr.

5 Agus air dhoibh dol a stigh do'n àit-adhlaic, chunnaic iad òganach 'na shuidhe air an làimh dheis, uime an robh trusgan fada geal; agus bha eagal orra.

6 Agus thubhairt esan riu, Na biodh eagal oirbh: a ta sibh ag iarraidh Iosa o Nasaret, a chèusadh: dh'éirich e, cha'n 'eil e 'n so: faicibh an t-àit anns an do chuir iad e:

7 Ach imichibh, innsibh d'a dheisciobluibh agus do Pheadar, gu bheil e dol roimhibh do Ghalile: chi sibh an sin e, mar thubhairt e ribh.

8 Agus air dol a mach dhoibh, theich iad o 'n uaigh; oir bha ball-chrith agus uamhunn orra: agus cha dubhairt iad ni sam bith ri neach air bith; oir bha eagal orra.

9 Agus air éirigh do Iosa sa' mhaduinn air a' cheud là do'n t-seachdain, nochdadh e air tùs do Mhuire Magdalen, as an do thilg e seachad deamhain.

10 Agus air imeachd dh'ise, dh'innis i sin dhoibh-san a bha maille ris, agus iad ri bròn agus gul.

11 Agus iadsan, an uair a chual iad gu'n robh e beò, agus gu'm facadh leatha-san e, cha do chreid iad.

12 'Na dhéigh sin, nochdadh e do dhithis diubh ann an cruth eile, ag imeachd dhoibh, agus iad a' dol do'n dùthaich.

13 Agus dh'imich iadsan agus dh'innis iad e do chàch: agus cha mhò a chreid iad iadsan.

14 An déigh sin nochdadh e do'n aon fhear deug, agus iad 'nan suidhe aig biadh, agus thilg e orra am mì-chreidimh, agus an cruas-cridhe, a chionn nach do

chreid iad iadsan a chunnaic e an déigh dha éirigh.

15 Agus thubhairt e riu, Im-ichibh air feadh an t-saoghail uile, agus searmonaichibh an soisgeul do gach dùil.

16 Ge b'e chreideas agus a bhaistear, saorar e, ach ge b'e nach creid, dìtear e.

17 Agus leanaidh na comh-aran so an dream a chreideas: Ann am ainm-sa tilgidh iad a mach deamhain; labhraidh iad le teangaibh nuadha;

18 Togaidh iad nathraiche

nimhe; agus ma dh'òlas iad ni air bith marbhtach, cha chiùrr e iad; cuiridh iad an làmhan air daoineibh tinne, agus bithidh iad gu maith.

19 Mar sin an déigh do'n Tighearna labhairt riu, ghabhadh suas gu nèamh e, agus shuidh e air deas làimh Dhé.

20 Agus air dhoibh-san dol a mach, shearmonaich iad anns gach àit, air bhi do 'n Tighearna a' co-oibreachadh leo, agus a' daingneachadh an fhocail leis na comharaibh a lean e. Amen.

AN SOISGEUL A REIR LUCAIS.

CAIB. I.

DO bhrìgh gu'n do ghabh mòran os làimh eachdraidh sgrìobhadh ann an òrdugh air na nithibh sin a ta air an coimhlionadh 'nar measg-ne,

2 A réir mar a dh'aithris na daoine sin dhuinne iad, a chunnaic iad o thùs le 'n sùilibh, agus a bha 'nan luchd-frithealadh an fhocail:

3 Chunnacas dhomh-sa mar an ceudna, a Theophiluis ro òirdheirc, air faotainn dearbh fhios nan uile nithe dhomh o 'n fhìor thoiseach, sgrìobhadh a d'ionnsuidh-sa an òrdugh,

4 Chum gu'm biodh fios agad air cinnteachd nan nithe anns an deachaidh do theagasg.

5 **B**HA ann an làithibh Heroid rìgh Iudea, sagart àraidh d'am b'ainm Sacharias, do sheal Abia: agus bha a bhean do nigh-eanaibh Aaroin, agus b'ainm dh' i Elisabet.

6 Agus bha iad le chéile ionraic am fianuis Dé, ag imeachd ann an uile àitheantaibh agus

òrduighibh an Tighearna, gu neo-lochdach.

7 Agus cha robh duine cloinne aca, do bhrìgh gu'n robh Elisabet neo-thorrach, agus bha iad le chéile aosmhor.

8 Agus thàrladh, am feadh a bha esan a' frithealadh mar shagart an làthair Dhé ann an òrdugh a sheala,

9 A réir gnàtha na sagartachd, b' e a chrannchur tùis a losgadh, air dha dol a steach do theampull an Tighearna.

10 Agus bha coimhthional an t-sluaigh uile a' dèanamh ùrnuigh a muigh, ri àm na tùise.

11 Agus chunnacas leis-san aingeal an Tighearna 'na sheasamh air taobh deas altarach na tùise.

12 Agus an uair a chunnai Sacharias e, bha e fo thrioblaid, agus thuit eagal air.

13 Ach thubhairt an t-aingeal ris, Na gabh eagal, a Shachariais; oir fhuair t'ùrnuigh éisd-eachd, agus beiridh do bhean

Elisabet mac dhuit, agus bheir thu Eoin mar ainm air.

14 Agus bithidh aoibhneas agus subhachas ort; agus ni mòran gàirdeachas r'a bhreith.

15 Oir bithidh e mòr an làth-air an Tighearn, agus cha'n òl e fion no-deoch làidir; agus bithidh e air a lìonadh leis an Spiorad naomh, eadhon o bhroinn a mhàthar.

16 Agus pillidh e mòran do chloinn Israeil chum an Tighearn an Dé.

17 Agus théid e roimhe-san ann an spiorad agus ann an cumhachd Eliais, a thionndadh cridhe nan aithriche chum na cloinne, agus nan eas-ùmhal gu gliocas nam firean, a dh'ulluchadh pobuill deas do'n Tighearn.

18 Agus thubhairt Sacharias ris an aingeal, Cionnus a bhios fhios so agam? oir is seann duine mise, agus a ta mo bhean aosmhor.

19 Agus fhreagair an t-aingeal agus thubhairt e ris, Is mise Gabriel a sheasas an làth-air Dhé; agus chuireadh mi a labhairt riut-sa, agus a dh'innseadh an naidheachd mhaith so dhuit.

20 Agus, feuch, bithidh tu balbh agus gun chomas labhairt, gus an là anns an tig na nithe so gu crìch, a chionn nach do chreid thu mo bhriathra-sa, a bhitheas air an coimhlionadh 'nan àm féin.

21 Agus bha am pobull a' feitheamh ri Sacharias, agus b'iongantach leo a' mhoille a rinn e san teampull.

22 Agus an uair a thàinig e mach, cha b'urrainn e labhairt riu: agus thuig iad gu'm fac e sealladh *nèamhaidh* san teampull: oir bha e smèideadh orra, agus dh'fhan e 'na thosd.

23 Agus thàrladh, an uair a

choimhlionadh làithean a fhrith-ealaidh, gu'n deachaidh e d'a thigh féin.

24 Agus an déigh nan làithean sin dh'fhàs a bhean Elisabet torrach, agus dh'fholaich si i féin rè chuig mìosan, ag ràdh,

25 Is ann mar so a rinn an Tighearna dhomh anns na làithibh air an d'amhairc e orm, a thogail diom mo mhaslaidh am measg dhaoine.

26 Agus anns an t-seathadh mìos, chuireadh an t-aingeal Gabriel o Dhia, gu caithir do Ghalile, d'am b'ainm Nasaret,

27 Dh'ionnsuidh òigh a bha fo cheangal pòsaidh aig fear d'am b'ainm Ioseph, do thigh Dhaibhidh; agus *b' e* ainm na h-òigh Muire.

28 Agus air dol a steach do'n aingeal d'a h-ionnsuidh, thubhairt e, Fàilte dhuit, o thusa d'an do nochdadh mòr dheadh-ghean, *a ta* an Tighearna maille riut: is beannaichte thu am measg bhan.

29 Agus an uair a chunnaic i e, bha i fo thrioblaid inntinn air son a chainnte, agus a' reusnachadh ciod a' ghnè altachabeatha dh'fheudadh bhi 'n so.

30 Agus thubhairt an t-aingeal rithe, Na biodh eagal ort, a Mhuire: oir fhuair thu deadh-ghean o Dhia.

31 Agus, feuch, gabhaidh tu a'd' bhroinn, agus beiridh tu mac, agus bheir thu losa mar ainm air.

32 Bithidh e mòr, agus goir-ear Mac an Tì a' s ro-àird dheth; agus bheir an Tighearna Dia dha rìgh-chaithir 'athar féin Dhaibhidh.

33 Agus bithidh e 'na Rìgh air tigh Iacoib gu bràth, agus cha bhi crìoch air a rìoghachd.

34 Agus thubhairt Muire ris an aingeal, Cionnus a bhitheas

so, do bhrìgh nach 'eil aithne agam-sa air duine?

35 Agus fhreagair an t-aing-eal agus thubhairt e rithe, Thig an Spiorad naomh ort, agus cuiridh cumhachd an Tì a's àirde sgàil ort: uime sin an ni naomh sin a bheirear leat, goir-ear Mac Dé dheth.

36 Agus, feuch, do bhan-charaid Elisabet, a ta ise féin torrach air mac 'na sean aois; agus is e so an seathadh mìos dh'ise d'an goirteadh bean neo-thorrach;

37 Oir cha 'n 'eil ni sam bith do-dhèanta do Dhia.

38 Agus thubhairt Muire, Feuch banoglach an Tighearna; biodh e dhomh-sa réir t'fhocail. Agus dh'fhalbh an t-aing-eal uaipe.

39 Agus air éirigh do Mhuire sna làithibh sin, chaidh i le cabhaig do dhùthaich nam beann, gu baile do Iuda.

40 Agus chaidh i steach do thigh Shachariais, agus chuir i fàilte air Elisabet.

41 Agus thàrladh, an uair a chual Elisabet beannachadh Mhuire, gu'n do leum an naoidhean 'na broinn: agus lìonadh Elisabet leis an Spiorad naomh.

42 Agus ghlaodh i mach le guth àrd, agus thubhairt i, Is beannaichte thu am measg bhan, agus is beannaichte toradh do bhronn.

43 Agus cionnus a dh'éirich so dhomh-sa, gu'n tigeadh màthair mo Thighearn a m' ionnsuidh?

44 Oir feuch, co luath as a thàinig fuaime do bheannachaidh a' m' chluasaibh, bhriosg an naoidhean le h-aoibhneas ann mo bhroinn.

45 Agus is beannaichte ise a chreid: oir coimhlionar na nithe a labhradh rithe leis an Tighearn.

46 Agus thubhairt Muire, A ta m'anam ag àrd-mholadh, an Tighearn,

47 Agus a ta mo spiorad a' dèanamh gàirdeachais ann an Dia mo Shlànuighear:

48 Do bhrìgh gu'n d'amhairc e air staid ìosal a bhanoglaich: oir feuch, o so suas goiridh gach linn beannaichte dhìom.

49 Do bhrìgh gu'n d'rinn an Tì a ta cumhachdach nithe mòra dhomh; agus is naomh 'ainm.

50 Agus a ta a thròcair-san o linn gu linn, do 'n dream d'an eagail e.

51 Nochd e neart le 'ghàird-ean, sgap e na h-uaibhrich ann an smuaintibh an cridhe féin.

52 Thug e nuas na daoine cumhachdach o 'n caithrichibh rìoghail, agus dh'ardaich e iad-san a bha ìosal.

53 Lion e 'n dream a bha ocrach le nithibh maithe; agus chuir e uaith na daoine saoi bhir falamh.

54 Rinn e còmhnaidh ri Israel òglach féin, ann an cuimhneachadh a thròcair:

55 Mar a labhair e r'ar n-aithrichibh, do Abraham agus d'a shliochd gu bràth.

56 Agus dh'fhan Muire maille rithe mu thimchioll thrì mìosan, agus phill i d'a tigh féin.

57 A nis thàinig làn inbhe Elisabet, gu'm biodh i air a h-aisead; agus rug i mac.

58 Agus chual a coimhearsnaich agus a càirdean mar a nochd an Tighearna mòr-thròcair dh'i: agus rinniad gàirdeachas maille rithe.

59 Agus thàrladh air an ochdamh là gu'n d'thàinig iad a thimchioll-ghearradh an naoidhean: agus ghairm iad Sacharias deth, a réir ainme 'athar.

60 Agus fhreagair a màth-

air, agus thubhairt i, Ni h-eadh ; ach goirear Eoin deth.

61 Agus thubhairt iad rithe, Cha'n 'eil aon neach do d' chàirdibh d' an gairmear an t-ainm so.

62 Agus smèid iad air 'ath-air, ciod an t-ainm a b'àill leis thoirt air.

63 Agus air iarraidh clàir-sgrìobhaidh dhasan, sgrìobh e, ag ràdh, Is e Eoin is ainm dha. Agus ghabh iad iongantas uile.

64 Agus air ball dh'fhosgladh a bheul, agus dh'fhuasgladh a theangadh, agus labhair e, a' moladh Dhé.

65 Agus thàinig eagal air an coimhearsnaich uile : agus dh'aithriseadh na nithe sin gu léir feadh dhùthaich àrd Iudea uile.

66 Agus iadsan uile a chuala na nithe sin, thaisg iad 'nan cridhe iad, ag ràdh, Ciod a' ghnè leinibh a bhitheas an so ? Agus bha làmh an Tighearna maille ris.

67 Agus bha Sacharias 'athair air a lionadh leis an Spiorad naomh, agus rinn e fàidheadair-eachd, ag ràdh,

68 Gu ma beannaichte an Tighearna Dia Israeil, air son gu'n d'fhiosraich e, agus gu'n d'thug e saorsa d'a phobull,

69 Agus gu'n do thog e suas dhuinne adharc slàinte, ann an tigh Dhaibhidh 'òglaich féin ;

70 A réir mar a labhair e le beul 'fhàidhean naomha féin, a bha ann o thoiseach an t-saoghail ;

71 A thoirt saorsa dhuinn o ar naimhdibh, agus o làimh na muinntir sin uile le'm fuathach sinn :

72 A choimhlionadh na tròc-air a gheall e d'ar n-aithrichibh, agus a chuimhneachadh a choimhcheangail naoimh féin :

73 Na mionnan a mhionnaich e d'ar n-athair Abraham,

74 Gu'n tugadh e dhuinn, air dhuinn bhi air ar saoradh o làimh ar naimhde, gu'n dèanamaid seirbhis dha as eugmhais eagail.

75 Ann an naomhachd agus ann am fireantachd 'na làthair féin, uile làithean ar beatha.

76 Agus thusa, a leinibh, goirear dhìot Fàidh an Tì a's àirde : oir théid thu roimh aghaidh an Tighearna, a dh'ulluchadh a shlighe ;

77 A thoirt eòlais na slàinte d'a phobull, ann am maitheanas am peacanna,

78 Troimh thròcair ro mhòir ar Dé-ne, leis an d'fhiosraich an ùr-mhaduinn o'n ionad a's àirde sinn,

79 A thoirt soluis dhoibhsan a ta 'nan suidhe ann an sgàil a' bhàis, a threòrachadh ar cos air slighe na sìthe.

80 Agus dh'fhàs an leanabh, agus neartaicheadh an spiorad e, agus bha e san fhàsach gu là 'fhoillseachaidh do Israel.

CAIB. II.

AUGUS thàrladh sna làithibh sin, gu'n deachaidh òrdugh a mach o Cheasar Augustus, an domhan uile a mheas.

2 (Agus rinneadh an ceud mheas so 'nuair a bha Cirenus 'na uachdaran air Siria.)

3 Agus chaidh iad uile chum a bhi air am meas, gach aon fa leth d'a bhaile féin.

4 Agus chaidh Ioseph mar an ceudna suas o Ghalile, á baile Nasaret, do Iudea, gu baile Dhaibhidh, d'an gairmear Bethlehem, (do bhrìgh gu'n robh e do thigh agus do shliochd Dhaibhidh,)

5 Chum gu biodh e air a mheas maille ri Muire a bha fo

cheangal pòsaidh dha, agus i mòr-thorrach.

6 Agus thàrladh, am feadh a bha iad an sin, gu'n do choimh-lionadh làithean a h-inbhe, chum i bhi air a h-aisead.

7 Agus rug i a ceud-ghin mic, agus phaisg i e am brat-speilidh, agus chuir i 'na luidhe am prasaich e; do bhrìgh nach robh àit aca san tigh-òsda.

8 Agus bha anns an dùthaich sin buachaillean a' fantuinn a muigh, agus a' dèanamh faireoidhe air an treud.

9 Agus, feuch, thàinig aing-eal an Tighearn orra, agus dhealraich glòir an Tighearna mu'n timchioll; agus ghabh iad eagal mòr.

10 Agus thubhairt an t-aing-eal riu, Na biodh eagal oirbh: oir feuch, a ta mi ag innseadh dhuibh deadh sgéil mhòr-aoibh-neis, a bhitheas do'n uile shluagh:

11 Oir rugadh dhuibh an diugh Slànuighear, ann am baile Dhaibhidh, neach a 's e Crìosd an Tighearna.

12 Agus bithidh so 'na chomh-ara dhuibh; Gheibh sibh an naoidhean paisgte ann am brat-speilidh, na luidhe am prasaich.

13 Agus air ball bha maille ris an aing-eal cuideachd mhòr do armaitibh nèimh, a' moladh Dhé, agus ag ràdh,

14 Glòir do Dhia anns na h-àrdaibh, agus air talamh sìth, deadh-ghean do dhaoinibh.

15 Agus thàrladh, 'nuair a dh'fhalbh na h-aingil uatha do nèamh, gu'n dubhairt na buachaillean r'a chéile, Rachamaid a nis eadhon do Bhetlehem, agus faiceamaid an ni so a rinneadh, a dh'fhoillsich an Tighearna dhuinne.

16 Agus thàinig iad gu grad, agus fhuair iad Muire agus Io-

seph, agus an leanabh 'na luidhe sa' phrasaich.

17 Agus an uair a chunnaic iad sin, dh'aithris iad an ni a dh'innseadh dhoibh mu thimchioll an leinibh so.

18 Agus ghabh gach neach a chuala so, iongantas ris na nithibh sin a dh'innseadh dhoibh leis na buachaillibh.

19 Ach ghléidh Muire na nithe sin uile, a' beachd-smuain-eachadh orra 'na cridhe.

20 Agus phill na buachaillean, a' tabhairt glòire agus molaidh do Dhia air son nan nithe sin uile a chual agus a chunnaic iad, a réir mar a labhradh riu.

21 Agus an uair a choimh-lionadh ochd làithean chum an leanabh a thimchioll-ghearradh, thugadh IOSA mar ainm air, eadhon an t-ainm a ghairm an t-aing-eal deth mu'n do ghabhadh sa' bhroinn e.

22 Agus an uair a choimh-lionadh làithean a glanaidh, a réir lagha Mhaois, thug iad esan gu Ierusalem, chum a thaisbeanadh do'n Tighearna;

23 (Mar a ta e sgrìobhta ann an lagh an Tighearna, Gach ceud-ghin mic a dh'fhosglas a' bhrù, gairmear naomh do'n Tighearn e;)

24 Agus a thoirt ìobairt a réir mar a theirear ann an lagh an Tighearna, dà thurtur, no dà choluman òg.

25 Agus, feuch, bha duine ann an Ierusalem d'am b'ainm Simeon; agus bha 'n duine so ionraic agus diadhaidh, agus bha dùil aige ri sòlas Israeil: agus bha'n Spiorad naomh air.

26 Agus dh'fhoillsicheadh dha leis an Spiorad naomh, nach faicheadh e bàs, gus am faicheadh e Crìosd an Tighearn.

27 Agus thàinig e le treòrachadh an Spioraid do'n teampull:

Agus an uair a thug na pàrantan an leanabh Iosa a stigh, chum gu'n dèanadh iad air a shon a réir gnàthachaidh an lagha,

28 An sin ghlac esan 'na uchd e, agus bheannaich e Dia, agus thubhairt e.

29 A nis, a 'Thighearn, a ta thu leigeadh do d' sheirbhiseach siubhal an sìth, a réir t'fhocail;

30 Oir chunnaic mo shùilean do shlàinte,

31 A dh'ulluich thu roimh ghnùis nan uile shluagh:

32 Solus a shoillseachadh nan Cinneach, agus glòir do phob-uill Israeil.

33 Agus ghabh Ioseph agus a mhàthair iongantas mu na nithibh a labhradh uime.

34 Agus bheannaich Simeon iad, agus thubhairt e ri Muire a mhàthair, Feuch, chuireadh an *leanabh* so chum tuiteam agus aiseirigh mhòran ann an Israel, agus 'na chomhar' an aghaidh an labhrar;

35 (Agus théid claidheamh troimh d' anam-sa féin,) chum gu'm foillsichear smuainte cridheacha mhòran.

36 Agus bha Anna ban-fhàidh, nighean Phanueil, do thréibh Aseir; *bha* i ro aosmhor, agus chaith i seachd bliadhna maille ri fear o àm dh' i bhi 'na h-òigh:

37 Agus bu bhantrach i mu thimchioll ceithir bliadhna agus ceithir fichead a dh'aois, nach deachaidh o'n teampull, a' dèanamh seirbhis do *Dhia* a là agus a dh'oidhche le trasgadh agus le h-ùrnuigh.

38 Agus air teachd dh'ise a stigh san uair sin féin, thug i moladh do'n Tighearn, agus labhair i m'a thimchioll riusan uile aig an robh sùil ri saorsa ann an Ierusalem.

39 Agus an uair a choimhlion

iad na h-uile nithe a réir lagha an Tighearna, phill iad do Ghailile, d'am baile féin Nasaret.

40 Agus dh'fhàs an leanabh, agus neartaicheadh an spiorad e, air a lìonadh le gliocas; agus bha gràsa Dhé air.

41 Agus chaidh a phàranta gach bliadhna gu Ierusalem, aig féill na càisge.

42 Agus 'nuair a bha e dà bhliadhna dheug a dh'aois, chaidh iad suas gu Ierusalem, a réir gnàtha na féille.

43 Agus air coimhlionadh nan làithean sin doibh, 'nuair a phill iadsan, dh'fhan an leanabh Iosa 'nan déigh ann an Ierusalem; agus cha robh fios aig Ioseph no aig a mhàthair air sin.

44 Ach air dhoibh a shaoilsinn gu'n robh e sa chuideachd, dh'imich iad astar là; agus dh'iarr iad e measg an càirdean, agus an luchd-eòlais.

45 Agus an uair nach d'fhuair iad e, phill iad gu Ierusalem, 'ga iarraidh.

46 Agus thàrladh an déigh thrì làithean, gun d'fhuair iad e san teampull, 'na shuidhe am meadhon an luchd-teagaisg, ar-aon 'gan éisdeachd, agus a' cur cheisd orra.

47 Agus ghabh a' mhuinntir a chual e uile iongantas r'a thuigse agus r'a fhreagraibh.

48 Agus an uair a chunnaic iad e, ghlac uamhas iad: agus thubhairt a mhàthair ris, A mhic, c'ar son a rinn thu mar so oirnn? feuch, bha t'athair agus mise gu brònach ga d'iarraidh.

49 Agus thubhairt esan riu, C'ar son a bha sibh ga m' iarraidh? nach robh fhios agaibh gu'm bu chòir dhomh-sa bhi ann an tigh m' Athar?

50 Agus cha do thuig iadsan an ni a labhair e riu.

51 Agus chaidh e sìos maille

riu, agus thàinig e gu Nasaret, agus bha e ùmhal doibh: ach ghléidh a mhàthair na nithe sin uile 'na cridhe.

52 Agus thàinig Iosa air aghaidh ann an gliocas agus am meudachd, agus ann an deadh-ghean aig Dia, agus aig daoineibh.

CAIB. III.

A NIS anns a' chùigeadh bliadhna deug do impireachd Thiberiuis Cheasair, air bhi do Phontius Pilat 'na uachdaran air Iudea, agus Herod 'na Thetrarc air Galile, agus Philip a bhràthair 'na Thetrarc air Iturea agus dùthaich Thrachonitis, agus Lisanias 'na Thetrarc air Abilene.

2 An uair a bha Annas agus Caiaphas 'nan àrd-shagartaibh, thàinig focal Dé chum Eoin, mhic Shachariais, anns an fhàsach.

3 Agus thàinig e do'n dùthaich uile timchioll Iordain, a' searmonachadh baistidh an aithreachais, chum maitheanais pheacanna;

4 Mar a ta e sgrìobhta ann an leabhar bhriathra an fhàidh Esaias, ag ràdh, Guth an tì a dh'éigheas anns an fhàsach, Ulluichibh slighe an Tigh-earna, dèanaibh a cheumanna dìreach.

5 Bithidh gach gleann air a lìonadh, agus gach beinn agus cnoc air an isleachadh; agus bithidh na nithe cama air an dèanamh dìreach, agus na slighean garbha air an dèanamh réidh;

6 Agus chi gach uile fheoil slàinte Dhé.

7 Uime sin thubhairt e ris an t-sluagh a thàinig a mach chum bhi air am baisteadh leis, A shìl nan nathraiche nimhe, cò thug

rabhadh dhuibh-sa teicheadh o'n fheirg a ta ri teachd?

8 Air an aobhar sin thugaibh a mach toradh iomchuidh an aithreachais, agus na tòisichibh air a ràdh annaibh féin, A ta Abraham 'na Athair againn: oir a ta mi ag ràdh ribh, gur comasach Dia do na clachaibh so air clann a thogail suas do Abraham.

9 Agus a nis féin a ta 'n tuagh air a' cur ri bun nan craobh: air an aobhar sin gach craobh nach toir a mach toradh maith, gearrar sìos i, agus tilgear san teine i.

10 Agus dh'fhiosraich an sluagh dheth, ag ràdh, Ciod uime sin a ni sinne?

11 Agus fhreagair esan agus thubhairt e riu, An tì aig am bheil dà chòta, roinneadh e ris an tì aig nach 'eil; agus an tì aig am bheil biadh, dèanadh e mar an ceudna.

12 Agus thàinig mar an ceudna cìs-mhaoir gu bhi air am baisteadh, agus thubhairt iad ris, A mhaighstir, ciod a ni sinne?

13 Agus thubhairt esan riu, Na dèanaibh ni air bith os ceann na dh'òrduicheadh dhuibh.

14 Agus dh'fhiosraich na saighdearan mar an ceudna dheth, ag ràdh, Agus ciod a ni sinne? Agus thubhairt e riu, Na dèanaibh foirneart air neach sam bith, no casaid-bhréige, agus bithibh toilichte le 'ur tuarasdal.

15 Agus air bhi do'n phobull a' feitheamh, agus na h-uile dhaoine a' reusonachadh 'nan cridheachaibh féin mu thimchioll Eoin, am b' e Crìosd a bh'ann;

16 Fhreagair Eoin, ag ràdh riu uile, Tha mise gu dearbh 'gur baisteadh le h-uisge; ach

a ta neach a' teachd a's cumhachdaiche na mise, agus cha'n airidh mise air barr-iall a bhròg fhusgladh: baistidh esan sibh leis an Spiorad naomh, agus le teine.

17 Aig am bheil a ghuit 'na làimh, agus ro-ghlanaidh e 'ùrlar, agus cruinnichidh e an cruithneachd d'a thigh-tasgaidh; ach loisgidh e am moll le teine nach fheudar a mhùchadh.

18 Agus ag earalachadh mòran do nithibh eile, shearmonaich e do'n t-sluagh.

19 Ach air do Herod an Tetrarc bhi air a chronachadh leis air son Herodiais bean a bhràthar (Philip.) agus air son gach olc a rinn Herod,

20 Chuir e so ris gach olc eile, gu' n do dhruid e Eoin am prìosan.

21 Agus thàrladh, 'nuair a bha 'n sluagh uile air am baisteadh, air do Iosa mar an ceudna bhi air a bhaisteadh, agus e ri 'ùrnuigh, gu'n d'fhosgladh nèamh.

22 Agus gu'n d'thàinig an Spiorad naomh a nuas air an coslas corporra, mar choluman, agus gu'n d'thàinig guth o nèamh, ag ràdh, Is tusa mo Mhac gràdhach, anns am bheil mo mhòr-thlachd.

23 Agus thòisich Iosa féin air a bhi mu thimchioll deich bliadhna fichead a dh'aois, air dha bhi, (a réir barail *dhaoine*.) 'na mhac do Ioseph, *mac Heli*,

24 *Mhic Mhatait, mic Lebhi, mic Mhelchi, mic Ianna, mic Ioseiph,*

25 *Mhic Mhatatais, mic Amois, mic Nauim, mic Esli, mic Nage,*

26 *Mhic Mhaait, mic Mhatatais, mic Shemei, mic Ioseiph, mic Iudah,*

27 *Mhic Ioanna, mic Rhesa,*

mic Shorobabeil, mic Shalatieil, mic Neri,

28 *Mhic Mhelchi, mic Adi, mic Chosaim, mic Elmodaim, mic Eir,*

29 *Mhic Iose, mic Elieseir, mic Ioreim, mic Mhatait, mic Lebhi,*

30 *Mhic Shimeoin, mic Iudah, mic Ioseiph, mic Ionain, mic Eliacim,*

31 *Mhic Mhelea, mic Mhainain, mic Mhatata, mic Natain, mic Dhaibhidh,*

32 *Mhic Iese, mic Obeid, mic Bhoois, mic Shalmoin, mic Naasoin,*

33 *Mhic Aminadaib, mic Araim, mic Esroim, mic Phareis, mic Iudah,*

34 *Mhic Iacoib, mic Isaaic, mic Abraham, mic Thara, mic Nachoir,*

35 *Mhic Sharuich, mic Ragau, mic Phaleic, mic Ebeir, mic Shala,*

36 *Mhic Chainain, mic Arphacsaid, mic Shem, mic Noe, mic Lameich,*

37 *Mhic Mhatusala, mic Enoich, mic Iareid, mic Mhaleleuil, mic Chainain,*

38 *Mhic Enois, mic Shet, mic Adhaimh, mic Dhé.*

CAIB. IV.

A GUS air do Iosa bhi làn do'n Spiorad naomh, phill e air ais o Iordan, agus threòraich ead e leis an Spiorad do'n fhàsach,

2 Agus bha e air a bhuaireadh rè dhà fhichead là leis an diabhl; agus cha d'ith e ni sam bith anns na làithibh sin: agus air dhoibh bhi air an crìochnachadh, an sin dh'fhàs e oc-rach.

3 Agus thubhairt an diabhl ris, Ma 's tu Mac Dhé, abair ris a' chloich so bhi 'na h-aran.

4 Agus fhreagair Iosa e, ag ràdh, A ta e sgrìobhta, nach ann le h-aran a mhàin a thig duine beò, ach le gach uile fhocal Dé.

5 Agus air do'n diabhul a thoirt gu beinn àrd, nochd e dha uile rìoghachdan an domhain ann am mionaid aimsir.

6 Agus thubhairt an diabhul ris, Bheir mise an cumhachd so uile dhuit, agus an glòir; oir thugadh dhomh-sa sin; agus bheir mi e do neach air bith a's toil leam.

7 Uime sin ma ni thu aoradh dhomh-sa, is leat iad uile.

8 Agus fhreagair Iosa agus thubhairt e ris, Tàr air mo chùlaobh, a Shatain: oir a ta e sgrìobhta, Ni thu aoradh do'n Tighearn do Dhia, agus dhasan 'na aonar ni thu seirbhis.

9 Agus thug se e gu Ierusalem, agus chuir e air binnein an teampuill e, agus thubhairt e ris, Ma's tu Mac Dhé, tilg thu féin sìos á so.

10 Oir a ta e sgrìobhta, Bheir e àithne d' a ainglibh mu d' thimchioll, thusa a choimhead.

11 Agus togaidh iad suas thu 'nan làmhaibh, air eagal gu'm buail thu uair air bith do chos air cloich.

12 Agus air freagairt do Iosa thubhairt e ris, A dubhradh, Na buair thusa an Tighearna do Dhia.

13 Agus an uair a chrìochnaich an diabhul am buaireadh uile, dh'imich e uaith rè tamuill.

14 Agus phill Iosa ann an cumhachd an Spioraid chum Ghalile; agus chaidh 'iomradhsan air feadh na dùthcha mu'n cuairt gu h-iomlan.

15 Agus theagaisg e 'nan sionagogaibh, a' faotainn glòire o na h-uile dhaoineibh.

16 Agus thàinig e gu Nasaret,

far an d'àraicheadh e: agus chaidh e steach, mar bu ghnàth leis, air là na sàbaid do'n t-sionagag, agus dh'éirich e 'na sheasamh chum leughaidh.

17 Agus thugadh dha leabhar an fhàidh Esaiais; agus air fosgladh an leabhair dha, fhuair e an t-àit anns an robh e sgrìobhta,

18 Tha Spiorad an Tighearn orm, do bhrìgh gu'n d'ùng e mi a shearmonachadh an t-soisgeil do na bochdaibh; chuir e mi a shlànuchadh na muinntir aig am bheil an cridhe briste, a ghairm fuasglaidh do na braighdibh, agus aiseag an radhairc do na doill, a thoirt saorsa do'n mhuinntir a ta brùite,

19 A shearmonachadh bliadhna thaitnich an Tighearn.

20 Agus air dùnadh an leabhair dha, thug e do'n fhear-frith-ealaidh e, agus shuidh e: agus bha sùilean na bha san t-sionagag uile a' geur-amharc airsan.

21 Agus thòisich e air a ràdh riu, An diugh a ta an sgrìobtur so air a choimhlionadh ann bhur clusaibh-sa.

22 Agus thug iad uile fianuis da, agus ghabh iad iongantais ris na briathraibh gràsmhor a thàinig a mach as a bheul. Agus thubhairt iad, Nach e so mac Ioseiph?

23 Agus thubhairt e riu, Gun amharus thubhairt sibh rium an gnàth-fhocal so, A léigh, leighis thu féin: ge b'e air bith iad na nithe a chuala sinn a rinn-eadh leat an Capernaum, dèan mar an ceudna iad an so a' d' dhùthaich féin.

24 Agus thubhairt e, Gu deimhin a ta mi ag ràdh ribh, nach 'eil fàidh air bith taitneach na dhùthaich féin.

25 Ach gu firinneach a ta mise ag ràdh ribh, gu'n robh

mòran bhantrach ann an Israel an làithibh Eliais, an uair a dhruideadh nèamh rè thrì bliadhna agus shè mìosan, agus a bha gorta mhòr air feadh na tìre uile :

26 Ach cha do chuireadh Elias dh'ionnsuidh aoin diubh, ach gu Sarepta Shidoin, chum mnà a bha 'na bantraich.

27 Agus bha mòran lobhar ann an Israel ri linn Eliseuis an fhàidh ; agus cha do ghlanadh a h-aon aca, ach Naaman an Sirianach.

28 Agus lìonadh iadsan uile a bha san t-sionagog le feirg, an uair a chual iad na nithe sin ;

29 Agus dh'éirich iad suas, agus thilg iad a mach as a' bhaile e, agus thug iad leo e gu maluidh a' chnoic, air an robh am baile togta, chum a thilgeadh sìos an coinneamh a chinn.

30 Ach air gabhail dhasan troimh am meadhon, dh'fhalbh e,

31 Agus chaidh e sìos gu Capernaum, baile do Ghalile, agus bha e 'gan teagasg air làithibh na sàbaid :

32 Agus ghabh iad iongantas r'a theagasg ; do bhrìgh gu'n robh 'fhocal le cumhachd.

33 Agus bha anns an t-sionagog duine anns an robh spiorad deamhain neòghloin, agus ghlaodh e le guth mòr,

34 Ag ràdh, Leig leinn ; ciod e ar gnothuch-ne riut, Iosa o Nasaret ? an d'thàinig thu g'ar sgrios ? a ta fhios agam cò thu, Aon naomh Dhé.

35 Agus chronuich Iosa e, ag ràdh, Bi a' d' thosd, agus thig a mach as. Agus air do'n deamhan esan a thilgeadh sìos 'nam meadhon, thàinig e mach as, gun chiurradh sam bith a dhèanamh air.

36 Agus thàinig uamhas orra uile, agus labhair iad r'a chéile, ag ràdh, Ciod a' ghnè cainnte so ?

oir le h-ùghdarras agus cumhachd a ta e toirt òrduigh do na spioradaibh neòghlan, agus tha iad a' teachd a mach.

37 Agus chaidh iomradh air-san a mach feadh gach àite do'n dùthaich mu'n cuairt.

38 Agus dh'éirich e as an t-sionagog, agus chaidh e steach do thigh Shimoìn : agus bha fiabhrus mòr air màthair-chéile Shimoìn ; agus ghuidh iad air as a leth.

39 Agus air dha seasamh os a ceann, chronuich e am fiabhrus, agus dh'fhàg e i. Agus dh'éirich ise air ball, agus rinn i frithealadh dhoibh.

40 Agus ag dol fuidhe na gréine, iadsan uile aig an robh daoine euslan le iomadh gnè tinnis, thug iad d'a ionnsuidh iad : agus chuir esan a làmhan air gach aon diubh, agus leighis e iad.

41 Agus chaidh mar an ceudna deamhain a mach a mòran, a' glaothaich agus ag ràdh, Is tu Crìosd Mac Dhé. Agus chronuich e iad, agus cha d'fhulaing e dhoibh labhairt : oir bha fhios aca gu'm b' esan Crìosd.

42 Agus air teachd do'n là, chaidh e mach, agus dh'imich e gu àite fàsail : agus bha'n sluagh 'ga iarraidh, agus thàinig iad d'a ionnsuidh, agus b'àill leo a chumail, chum nach rachadh e uatha.

43 Ach thubhairt esan riu, Is éigin dhomh-sa rioghachd Dhé a shearmonachadh do bhaitibh eile mar an ceudna ; oir is ann chum so a chuireadh mi.

44 Agus shearmonaich e ann an sionagogaibh Ghalile.

CAIB. V.

A GUS thàrladh, 'nuair a bha am pobull a' dlùth-theann-

adh air, chum focal Dé éisd-eachd, gu'n do sheas e làimh ri loch Ghenesaret,

2 Agus chunnaic e dà luing 'nan seasamh ri taobh an locha: ach bha an h-iasgairean air dol a mach asda, agus a' nigheadh an lionta.

3 Agus chaidh e steach do aon do na longaibh bu le Simon, agus dh'iarr e air dol a mach beagan o thìr: agus air suidhe dha, theagaisg e an sluagh as an luing.

4 A nis an uair a sguir e do labhairt, thubhairt e ri Simon, Cuir a mach chum na doimhne, agus leigibh sìos bhur lionta chum tarruing.

5 Agus fhreagair Simon, agus thubhairt e ris, A mhaighstir, shaothraich sinn feadh na h-oidhche uile, agus cha do ghlac sinn ni sam bith: ach air t'fhocal-sa leigidh mi sìos an lion.

6 Agus an uair a rinn iad so, chuartich iad tachdar mòr éisg; ionnus gu'n do bhriseadh an lion.

7 Agus smèid iad air an compa-naich, a bha san luing eile, teachd agus còmhnaidh a dhèanamh leo. Agus thàinig iad, agus lìon iad an dà luing, ionnus gu'n robh iad an inbhe dol fuidhe.

8 'Nuair a chunnaic Simon Peadar so, thuit e sìos aig glùinibh Iosa, ag ràdh, Imich uam-sa, a Thighearn, oir is duine peacach mi.

9 Oir ghlac uamhas e féin agus iadsan uile bha maille ris, air son an tarruing éisg a ghlac iad:

10 Agus mar an ceudna Seumas agus Eoin, mic Shebede, a bha 'nan companaich aig Simon. Agus thubhairt Iosa ri Simon, Na biodh eagal ort; á so suas glacaidh tu daoine.

11 Agus an uair a thug iad an longa gu tìr, dh'fhàg iad na h-uile nithe, agus lean iad esan.

12 Agus an uair a bha esan ann am baile àraidh, feuch duine làn do luibhre: agus air dha Iosa fhaicinn, thuit e sìos air 'aghaidh, agus ghuidh e air, ag ràdh, A Thighearn, ma's toil leat, tha thu comasach air mise a ghlanadh.

13 Agus shìn e a làmh, agus bhean e ris, ag ràdh, Is toil leam; bi glan. Agus air ball dh'fhàg an luibhre e.

14 Agus dh'àithn e dha, gun innseadh do neach air bith: Ach imich, agus nochd thu féin do'n t-sagart, agus thoir seachad air son do ghlanaidh, mar a dh'àithn Maois, mar fhianuis doibh.

15 Ach bu mhòid a sgaoileadh 'iomradh-san: agus thàinig sluagh mòr an ceann a chèile chum éisdeachd, agus a bhi air an slànuchadh leis o'n eucailibh.

16 Agus chaidh e air leth chum an fhàsaich, agus rinn e ùrnuigh.

17 Agus thàrladh air là àraidh, 'nuair a bha e a' teagasg, gu'n robh 'nan suidhe an sin Phairisich agus luchd-teagaisg an lagha, a thàinig as gach uile bhaile do Ghalile, agus do Iudea, agus o Ierusalem: agus bha cumhachd an Tighearn a làthair chum an slànuchadh.

18 Agus, feuch, ghiùlain daoine air leabaidh duine air an robh am pairilis: agus dh'iarr iad a thoirt a steach, agus a chur 'na làthair-san.

19 Agus an uair nach d'fhuair iad seòl air am feudadh iad a thoirt a steach, le meud na cuideachd, chaidh iad suas air an tigh, agus leig iad sìos troimh mhullach an tìghe e féin agus a

leabadh, anns a' mheadhon an làthair Iosa.

20 Agus an uair a chunnaic e an creidimh, thubhairt e ris, A dhuine, tha do pheacanna air am maitheadh dhuit.

21 Agus thòisich na sgrìobhaichean agus na Phairisich air reusonachadh, ag ràdh, Cò e so a ta labhairt toibheim? cò dh'fheudas peacanna a mhaitheadh ach Dia a mhàin?

22 Ach air aithneachadh an smuainte do Iosa, fhreagair e agus thubhairt e riu, Ciod a ta sibh a' reusonachadh 'nur cridheachaibh?

23 Cò aca is usadh a ràdh, Tha do pheacanna air am maith-eadh dhuit, no ràdh, Eirich agus imich?

24 Ach a chum gu'm bi fios agaibh gu bheil cumhachd aig Mac an duine peacanna a mhaith-eadh air talamh, (thubhairt e ri fear na pairilis,) A ta mi ag ràdh riut, éirich, agus tog do leabadh, agus imich do d' thigh.

25 Agus dh'éirich e air ball nan làthair, agus thog e an leabadh air an robh e 'na luidhe, agus chaidh e d'a thigh féin, a' toirt glòire do Dhia.

26 Agus ghlac uamhas iad uile, agus thug iad glòir do Dhia, agus lionadh le h-eagal iad, ag ràdh, Chunnaic sinne nithe do-chreidsinn an diugh.

27 Agus an déigh nan nithe sin, chaidh e mach, agus chunnaic e cìs-mhaor d' am b'ainm Lebhi, 'na shuidhe aig àite togail na cìse; agus thubhairt e ris, Lean mise.

28 Agus air fàgail nan uile nithe dha, dh'éirich e, agus lean se e.

29 Agus rinn Lebhi féisd mhòr dha 'na thigh féin: agus bha cuideachd mhòr do chis-

mhaoraibh, agus do mhuinntir eile a shuidh maille riu.

30 Agus rinn an sgrìobhaichean agus am Phairisich gearan an aghaidh a dheisciobul-san, ag ràdh, C'ar son a ta sibh ag itheadh, agus ag òl maille ri cìs-mhaoraibh agus ri peacach-aibh?

31 Agus fhreagair Iosa agus thubhairt e riu, Cha'n 'eil feum aca-san a ta slàn air an léigh, ach aca-san a ta tinn.

32 Cha d'thàinig mise a ghairm nam firean, ach nam peacach chum aithreachais.

33 Agus thubhairt iadsan ris, C'ar son a ta deisciobuil Eoin gu tric ri trasgadh, agus a' dèanamh ùrnuigh, agus mar an ceudna deisciobuil nam Phairis-each; ach a ta do dheisciobuil-sa ag itheadh agus ag òl?

34 Agus thubhairt esan riu, Am feud sibh a thoirt air cloinn seòmair an fhir nuadh-phòsda trasgadh a dhèanamh, am feadh a ta am fear nuadh-phòsda maille riu?

35 Ach thig na làithean an uair a bheirear am fear nuadh-phòsda uatha; an sin ni iad trasgadh anns na làithibh sin.

36 Agus labhair e mar an ceudna cosamhlachd riu; Cha chuir neach air bith mìr a dh'eudach nuadh air sean eudach: no, reubaidh an t-eudach nuadh e, agus cha tig am mìr do'n eudach nuadh ris an t-sean eudach.

37 Agus cha chuir duine sam bith fion nuadh ann an seann searragaibh; no, brisidh am fion nuadh na searragan, agus dòirt-ear e féin, agus caillear na searragan.

38 Ach is còir fion nuadh a chur ann an searragaibh nuadha; agus bithidh iad le chéile tèar-uinte.

39 Agus cha'n 'eil duine sam bith, air dha sean *fhìon* òl, a dh'iarras air ball *fìon* nuadh: oir their e, is e an sean *fhìon* a's feàrr.

CAIB. VI.

A GUS thàrladh air a' cheud là sàbaid an déigh an dara là *do fhéill na càisge*, gu'n deachaidh e troimh na h-ach-aibh arbhair; agus spìon a dheisciobuil na diasan arbhair, agus dh'ith iad, an déigh *am* bruthadh le'n làmh-aibh.

2 Agus thubhairt cuid do na Phairisich riu, C'ar son a ta sibh a' dèanamh an ni nach 'eil ceaduichte r'a dhèanamh air làithibh na sàbaid?

3 Agus fhreagair Iosa iad, agus thubhairt e, Nach do leugh sibhse an ni so rinn Daibhidh, 'nuair a bha ocras air féin, agus orra-san a bha maille ris;

4 Cionnus a chaidh e steach do thigh Dhé, agus a ghabh e aran na fianuis, agus a dh'ith e féin, agus a thug e mar an ceudna dhoibh-san a bha maille ris; ni nach 'eil ceaduichte-itheadh ach do na sagartaibh a mhàin?

5 Agus thubhairt e riu, Is Tighearn Mac an duine air an t-sàbaid féin.

6 Thàrladh mar an ceudna air sàbaid eile, gu'n deachaidh e steach do'n t-sionagog, agus gu'n do theagaisg e; agus bha an sin duine, aig an robh a làmh dheas air seargadh.

7 Agus rinn na sgrìobhaichean agus na Phairisich faire, a dh'fheuchainn an leighiseadh e air an t-sàbaid; chum gu'm faigheadh iad cùis-dhìtidh 'na aghaidh.

8 Ach thuig esan an smuaintean, agus thubhairt e ris an duine aig an robh an làmh sheargta, Eirich, agus seas a

mach sa' mheadhon. Agus dh'éirich esan, agus sheas e.

9 An sin thubhairt Iosa riu, Feòraichidh mise aon ni dhìbh; Am bheil e ceaduichte air làithibh na sàbaid maith a dhèanamh, no olc? anam a shaoradh, no a sgrios?

10 Agus air dha amharc mu'n cuairt orra uile, thubhairt e ris an duine, Sin a mach do làmh. Agus rinn e sin: agus dh'aisigeadh a làmh slàn da mar an làmh eile.

11 Agus lìonadh iadsan do chuthach; agus labhair iad r'a chéile, ciod a dhèanadh iad ri Iosa.

12 Agus anns na làithibh sin chaidh esan gu beinn a dhèanamh ùrnuigh, agus bhuaich e rè na h-oidhche ann an ùrnuigh ri Dia.

13 Agus air teachd do'n là, ghairm e d'a ionnsuidh a dheisciobuil; agus thagh e dà fhear dheug asda, d'an do ghior e Abstoil:

14 Simon, (a dh'ainmich e mar an ceudna Peadar,) agus Aindreas a bhràthair, Seumas agus Eoin, Philip agus Bartolomeus,

15 Mata agus Tomas, Seumas *mac* Alpheuis, agus Simon d'an goirear Selotes,

16 Iudas *bràthair* Sheumais, agus Iudas Iscariot, esan a bha 'na fhear-brathaidh.

17 Agus thàinig e nuas leo, agus sheas e air ionad còmhnaidh, agus coimhthional a dheisciobul, agus buidheann mhòr-shluaigh o Iudea uile agus o Ierusalem, agus o chois fairge Thiruis agus Shidoìn, muinntir a thàinig g'a éisdeachd, agus gu bhi air an leigheas o'n euslaintibh;

18 Agus iadsan a bha air am pianadh le spioradaibh neò-shèargta: agus leighiseadh iad.

19 Agus dh'iarr an sluagh uile beantuinn ris : oir chaidh cumhachd a mach as, agus shlànuich e iad uile.

20 Agus thog e suas a shùilean air a dheisciobluibh, agus thubhairt e, *Is beannaichte sibhse ta bochd* : oir is leibh rìoghachd Dhé.

21 *Is beannaichte sibhse ta ocrach a nis* : oir sàsuichear sibh. *Is beannaichte sibhse ta caoidh a nis* : oir gàiridh sibh.

22 *Is beannaichte sibh, 'nuair a bheir daoine fuath dhuibh*, agus a chuireas iad as an cuideachd sibh, agus a bheir iad cainnt mhaslach dhuibh, agus a thilgeas iad a mach bhur n-ainm mar olc, air son Mhic an duine.

23 Dèanaibh-sa gàirdeachas san là sin, agus leumaibh le haobhneas : oir feuch, is mòr bhur duais air nèamh : oir is ann mar sin a rinn an aithriche air na fàidhibh.

24 Ach is an-aoibhinn duibhse ta saobhir : oir fhuair sibh bhur sòlas.

25 Is an-aoibhinn duibhse ta sàitheach : oir bithidh ocras oirbh. Is an-aoibhinn duibhse ta gàireachdaich a nis : oir ni sibh bròn agus gul.

26 Is an-aoibhinn duibhse 'nuair a labhras daoine maith umaibh : oir is ann mar sin a rinn an aithriche ris na fàidhibh bréige.

27 Ach a ta mi ag ràdh ribhse ta 'g éisdeachd, Gràdhaichibh bhur naimhde, dèanaibh maith dhoibh-san le'm fuathach sibh ;

28 Beannaichibh iadsan a ta 'gur mallachadh, agus dèanaibh ùrnuigh air son na muinntir a ta buntuinn gu naimhdeil ribh.

29 Ris an tì a bhuaileas thu air aon ghial, cum an gial eile ; agus do'n tì a bheir t'fhalluinn

dhìot, na bac do chòta mar an ceudna.

30 Thoir do gach neach a dh'iarras ort ; agus o 'n neach a bheir uait do mhaoin, na iarr air ais i.

31 Agus mar a b'àill leibh daoine dhèanamh dhuibh, dèanaibh-sa mar an ceudna dhoibh-san.

32 Oir ma ghràdhaicheas sibh iadsan aig am bheil gràdh dhuibh, ciod am buidheachas a ta agaibh ? oir gràdhaichidh peacaich féin an dream aig am bheil gràdh dhoibh.

33 Agus ma ni sibh maith do'n mhuinntir a ni maith dhuibh, ciod am buidheachas a ta agaibh ? oir ni peacaich an ni so féin mar an ceudna.

34 Agus ma bheir sibh iasachd dhoibhsan o'm bheil dùil agaibh ri fhaotainn a ris, ciod am buidheachas a ta agaibh ? oir bheir peacaich féin iasachd do pheacachaibh, chum gu'm faigh iad uiread a ris.

35 Ach gràdhaichibh-sa bhur naimhde, agus dèanaibh maith, agus thugaibh iasachd, gun dùil a bhi agaibh ri ni sam bith 'na éiric : agus bithidh bhur duais mòr, agus bithidh sibh 'nur cloinn do'n Tì a's àirde : oir a ta esan tabhartach dhoibhsan a ta mi-thaingéal agus olc.

36 Bithibh-sa uime sin tròcaireach, mar a ta bhur n-Athair tròcaireach.

37 Agus na tugaibh breth, agus cha toirear breth oirbh : na ditibh, agus cha ditear sibh : thugaibh maitheanas, agus bheir-ear maitheanas dhuibh.

38 Thugaibh uaibh, agus bheir-ear dhuibh ; deadh thomhas, air a gheinneadh, agus air a chrathadh ri chéile, agus a' cur thairis, bheir daoine ann bhur n-uchd ; oir leis an tomhas le'n

tomhais sibh, tomhaisear dhuibh a ris.

39 Agus labhair e cosamhlachd riu, Am feud an dall dall a threòrachadh? nach tuit iad le chéile ann an slochd?

40 Cha'n 'eil an deisciobul os ceann a mhaighstir: ach ge b'e neach a ta coimhlionta, bithidh e mar a mhaighstir.

41 Agus c' ar son a ta thu faicinn an smùirnein a ta an sùil do bhràthar, agus nach 'eil thu toirt fa'near an t-sail a ta ann do shùil féin?

42 No cionnus a dh'fheudas tu ràdh ri do bhràthair, A bhràthair, leig dhomh an smùirnein a thoirt á d'shùil, agus nach 'eil thu toirt fa'near an t-sail a ta ann do shùil féin? A chealgair, tilg a mach air tùs an t-sail as do shùil féin, agus an sin is léir dhuit gu soilleir an smùirnein a ta ann an sùil do bhràthar a thoirt aside.

43 Oir cha deadh chraobh a bheir a mach droch thoradh: agus cha droch chraobh a bheir a mach deadh thoradh.

44 Oir aithnichear gach craobh air a toradh: oir cha tionail daoine fìgean do dhroighionn, na caoran fìona do'n fhearr-dhris.

45 Bheir duine maith ni maith a mach á deadh ionmhas a chridhe; agus bheir droch dhuine ni olc a mach á droch ionmhas a chridhe: oir is ann á pailteas a chridhe a labhras a bheul.

46 Agus c'ar son a ghoireas sibh, a Thighearn, a Thighearn, dhìom-sa, agus nach dèan sibh na nithe a ta mi ag ràdh?

47 Gach neach a thig a m' ionnsuidh-sa, agus a chluinneas mo bhriathra, agus a ni iad, feuchaidh mi dhuibh co ris is cosmhuil e:

48 Is cosmhuil e ri duine a thog tigh, agus a chladhaich domhain, agus a chuir a' bhunait air carraig: agus an uair a thàinig an tuil, bhual an sruth gu dian air an tigh sin, agus cha b'urrainn e charachadh; oir bha e air a shuidheachadh air carr-aig.

49 Ach an tì a chluinneas, agus nach dèan, is cosmhuil e ri duine a thog tigh air an talamh gun bhunait, air an do bhual an sruth gu dian, agus air ball thuit e; agus bu mhòr tuiteam an tighe sin.

CAIB. VII.

A NIS an uair a chrìochnaich e a bhriathra-san uile ann an éisdeachd an t-sluaigh, chaidh e steach do Chapernaum.

2 Agus bha seirbhiseach ceann-aird-ceud àraidh, a b' ionmhuinn leis, gu tinn, agus ri h-uchd bàis.

3 Agus an uair a chual e mu Iosa, chuir e seanairean nan Iudhach d' a ionnsuidh, a' cur impidh air gu'n tigeadh e, agus gu'n leighiseadh e a sheirbhis-each.

4 Agus an uair a thàinig iad gu Iosa, ghuidh iad air gu dùrachdach, ag ràdh, Gu'm b'airidh e gu'n dèanadh esan so dha:

5 Oir is toigh leis ar cinn-each-ne, agus thog esan dhuinn sionagag.

6 Agus chaidh Iosa maille riu. Ach air dha bhi nis fagus do'n tigh, chuir an ceannard-ceud càirdean d'a ionnsuidh, ag ràdh ris, A Thighearn, na cuir dragh ort féin; oir cha'n airidh mise gu'n rachadh tu steach fo m' chleith:

7 Uime sin cha mhò a mheas mi gu'm b'airidh mi féin air teachd a d' ionnsuidh: ach a

mhàin abair am focal, agus slànuichear m' òglach.

8 Oir is duine mise féin air mo chur fo ùghdarras, aig am bheil saighdeara fodham; agus their mi ris an fhear so, Imich, agus imichidh e; agus ri fear eile, Thig, agus thig e; agus ri m' sheirbhiseach, Dèan so, agus nì se e.

9 Agus an uair a chual Iosa na nithe so, ghabh e iongantais, agus air tionndadh dha, thubhairt e ris an t-sluagh a lean e, A ta mi ag ràdh ribh, nach d'fhuair mi creidimh co mòr as so, ann an Israel féin.

10 Agus air pilltinn air an ais do'n tigh do na teachdairibh a chuireadh d' a *ionnsuidh*, fhuair iad an seirbhiseach a bha tinn, slàn.

11 Agus thàrladh an là 'na dhéigh sin, gu'n deachaidh e chum baile d'an gairmear Nain; agus chaidh a dheisciobuil maille ris, agus sluagh mòr.

12 A nis an uair a thàinig e am fagus do gheata a' bhaile, feuch, ghiùlaineadh a mach duine marbh, aon mhac a mhàthar, agus bu bhantrach i: agus bha sluagh mòr do *mhuinntir* a' bhaile maille rithe.

13 Agus an uair a chunnaic an Tighearn i, ghabh e truas d' i, agus thubhairt e rithe, Na guil.

14 Agus thàinig e agus bhean e ris a' ghiùlan; (agus sheas iadsan a bha 'ga iomchar;) agus thubhairt e, Oganach, a ta mi ag ràdh riut, éirich.

15 Agus dh'éirich an duine bha marbh 'na shuidhe, agus thòisich e air labhairt: agus thug e d'a mhàthair e.

16 Agus ghlac eagal *iad* uile: agus thug iad glòir do Dhia, ag ràdh, Dh'éirich fàidh mor 'nar

measg-ne; agus, Dh'amhairc Dia air a shluagh féin.

17 Agus chaidh an t-ìomradh so mach airesan air feadh Iudea uile, agus na dùthcha mu'n cuairt uile.

18 Agus dh'innis a dheisciobuil do Eoin mu thimchioll nan nithe sin uile.

19 Agus ghairm Eoin d'a ionnsuidh dithis àraidh d'a dheisciobluibh, agus chuir e iad gu Iosa, ag ràdh, An tusa esan a bha ri teachd, no'm bi sùil againn ri neach eile?

20 Agus air teachd do na daoineibh d' a ionnsuidh, thubhairt iad, Chuir Eoin Baiste sinne a d' ionnsuidh, ag ràdh, An tusa an tì a bha ri teachd, no 'm bi sùil againn ri neach eile?

21 Agus anns an uair sin féin leighis e mòran o 'n euslaintibh agus o 'm plàighibh, agus o dhroch spioradaibh; agus thug e 'n radharc do mhòran a bha dall.

22 Agus fhreagair Iosa, agus thubhairt e riu, Imichibh-sa agus innsibh do Eoin na nithe a chunnaic agus a chuala sibh, gu bheil na doill a' faicinn, na bacadh ag imeachd, na lobhair air an glanadh, na bodhair a' cluinntinn, na mairbh air an dùsgadh, an soisgeul air a shearmonachadh do na bochdaibh.

23 Agus is beannaichte esan nach faigh oilbheum annam-sa.

24 Agus an uair a dh'fhalbh teachdairean Eoin, thòisich e air labhairt ris an t-sluagh mu thimchioll Eoin, Ciod an nì a chaidh sibh a mach do'n fhàsach a dh'fhaicinn? an i cuile air a crathadh le gaoith?

25 Ach ciod e an nì chaidh sibh a mach a dh'fhaicinn? an e duine air a sgeadachadh ann an eudach mìn? feuch, iad-

san a ta sgeadaichte le eudach-riomhach, agus a' caitheadh am beatha gu sòghail, is ann an cùirtibh nan rìghrean a ta iad.

26 Ach ciod e an ni chaidh sibh a mach a dh'fhaicinn? an e fàidh? seadh, a ta mi ag ràdh ribh, agus ni's mò na fàidh.

27 Is e so an tì mu'm bheil e sgrìobhta, Feuch, cuiridh mi mo theachdair roimh do ghnùis, a dh'ulluicheas do shlighe romhad.

28 Oir a ta mi ag ràdh ribh, 'Nam measg-san a rugadh le mnaibh, cha'n 'eil fàidh a's mò na Eoin Baiste: gidheadh an tì a's lugha ann an rìoghachd Dhé, is mò e na esan.

29 Agus dh'fhìreanaich am pobull uile a chual e, agus na cìs-mhaoir Dia, air dhoibh bhi air am baisteadh le baisteadh Eoin.

30 Ach chuir na Phairisich agus an luchd-lagha cùl ri comhairle Dhé d'an taobh féin, am feadh nach do bhaisteadh iad leis.

31 Agus thubhairt an Tigh-earn, Cò ris uime sin a shamhlaicheas mi daoine a' ghinealaich so? agus cò ris a ta iad cosmhuil?

32 A ta iad cosmhuil ri cloinn a ta 'nan suidhe sa 'mhargadh, agus a dh'éigheas r'a chéile, ag ràdh, Rinn sinne pìobaireachd dhuibh-sa, agus cha d'rinn sibhse dannsa: rinn sinne tuireadh dhuibh-sa, agus cha d'rinn sibhse gul.

33 Oir thàinig Eoin Baiste, cha'n ann ag itheadh arain, no ag òl fiona; agus their sibh, A ta deamhan aige.

34 Thàinig Mac an duine ag itheadh agus ag òl; agus their sibh, Feuch duine geòcach, agus pòitear-fiona, caraid chis-mhaor agus pheacach.

35 Ach a ta gliocas air a fìreanachadh le a cloinn uile.

36 Agus dh'iarr duine àraidh do na Phairisich air, gu'n itheadh e biadh maille ris. Agus chaidh e steach do thigh an Phairisich, agus shuidh e sìos chum bìdh.

37 Agus, feuch, an uair a fhuaire bean anns a' bhaile, a bha 'na peacach, fios gu'n robh e 'na shuidhe aig biadh ann an tigh an Phairisich, thug i leatha bocsa alabastair làn do oladh chùbhraidh,

38 Agus sheas i aig a chos-aibh air a chùlaobh a' gul, agus thòisich i air a chosan a fhliuchadh le a deuraibh, agus thiormaich i iad le folt a cinn, agus phòg i a chosa, agus dh'ùng i leis an oladh iad.

39 Agus an uair a chunnaic am Phairiseach, a thug cuireadh dha, so, labhair e ann féin, ag ràdh, Nam b'fhàidh an duine so, bhiodh fhios aige cò i a' bhean so a ta beantuinn ris, agus ciod is gnè dh' i; oir is peacach i.

40 Agus fhreagair Iosa, agus thubhairt e ris, A Shimoìn, a ta ni agam ri ràdh riut. Agus thubhairt esan, A mhaighstir, abair e.

41 Bha aig fear-flacha àraidh dithis do fheichneinibh: bha aige air aon fhear cùig ceud peghinn, agus air an fhear eile leth-cheud.

42 Agus do bhrìgh nach robh aca ni leis an dioladh iad, mhaith e gu saor dhoibh araon. Innis dhomh-sa uime sin, cò dhiubh is mo a ghràdhaicheas e?

43 Agus fhreagair Simon agus thubhairt e, Is i mo bharail gur e an neach is mò d' an do mhaith e. Agus thubhairt e ris, is ceart a thug thu breth.

44 Agus air tionndadh ris a' mhnai, thubhairt e ri Simon, Am faic thu a' bhean so? thàin-

ig mi steach do d' thigh, cha d'-thug thu dhomh uisge chum mo chos; ach dh'ionnlaid ise mo chosa le deuraibh, agus thiom-aich i *iad* le folt a cinn.

45 Cha d' thug thusa dhomh pòg: ach o thàinig ise stigh, cha do sguir i a phògadh mo chos.

46 Cha d'ùng thusa mo cheann le h-oladh: ach dh'ùng ise mo chosa le h-oladh chùbh-raidh.

47 Uime sin a ta mi ag ràdh riut, Gu bheil a peacanna a ta lìonmhor, air am maitheadh; air an aobhar sin ghràdhaich i gu mòr: ach ge b' e neach d'am maithear beagan, bithidh a ghràdh beag.

48 Agus thubhairt e rithe, Tha do pheacanna air am maitheadh.

49 Agus thòisich iadsan a bha 'nan suidhe aig biadh maille ris, air a ràdh annta féin, Cò e so a ta eadhon a' maitheadh pheacanna?

50 Agus thubhairt e ris a' mhnaoi Shlànuich do chreidimh thu; imich an sìth.

CAIB. VIII.

A GUS thàrladh an déigh sin, gu'n d'imich esan troimh gach caithir agus baile, a' sear-monachadh, agus a' cur an céill soisgeil rioghachd Dhé, agus an dà fhear dheug maille ris;

2 Agus mnàì àraidh a leigh-iseadh o dhroch spioradaibh agus o euslaintibh, Muire d'an gairmear Magdalen, as an deachaidh seachd deamhain,

3 Agus Ioanna bean Chusa stiùbhaird Heroid, agus Susanna, agus mòran eile, a bha frith-ealadh dha le am maoin.

4 Agus an uair a chruinnich sluagh mòr, agus a thàinig iad as gach baile d'a ionnsuidh, labhair e ann an cosamhlachd:

5 Chaidh fear-cuir a mach a chur a shìl: agus ag cur da, thuit cuid ri taobh an rathaid; agus shaltradh sìos e, agus dh'ith eunlaith an athair suas e.

6 Agus thuit cuid eile air carr-aig, agus air fàs da, shearg e, do bhrìgh nach robh sùgh aige.

7 Agus thuit cuid eile am measg droighinn, agus dh'fhàs an droighionn maille ris, agus thachd se e.

8 Agus thuit cuid eile air talamh maith agus dh'fhàs e suas, agus thug e toradh uaithe a cheud uiread *as a chuireadh*. Agus air dha na nithe sin a ràdh, ghlaodh e, Ge b' e aig am bheil cluasa chum éisdeachd, éisdeadh e.

9 Agus dh'fhiosraich a dheisciobuil deth, ag ràdh, Ciod e an cosamhlachd so?

10 Agus thubhairt esan, Thugadh dhuibh-sa eòlas fhaotainn air rùn dìomhair rioghachd Dhé; ach do chàch an cosamhlachdaibh, ionnus ag faicinn doibh nach faiceadh iad, agus ag cluinntinn doibh nach tuigeadh iad.

11 Ach is e so an cosamhlachd: Is e an siol focal Dé.

12 Iadsan ri taobh an rathaid, is iad sin a dh'éisdeas: 'na dhéigh sin a ta an diabhl a' teachd, agus a' togail air falbh an fhocail as an cridheachaibh, air eagal gu'n creideadh iad agus gu'm biodh iad air an saoradh.

13 An dream air a' charraig, *is iad sin iadsan*, an uair a dh'éisdeas iad, a ghabhas am focal d'an ionnsuidh le gairdeachas; ach cha'n 'eil aca so freumh, *muinntir* a chreideas rè tamuill, agus an àm buairidh a ta tuit-eam air falbh.

14 Agus an nì a thuit am measg droighinn, is iad sin an dream a dh'éisdeas, agus air dhoibh dol a mach, a ta iad air

an tachdadh le cùram, agus le saoihbreas, agus le sàimhean na beatha so, agus cha 'n 'eil iad a' toirt toraidh uatha chum foirfeachd.

15 Ach an ni a *thuit* san talamh mhaith, is iad sin iadsan, air dhoibh am focal éisdeachd, a ta 'ga choimhead ann an cridhe tréibh-dhireach agus maith, agus a' toirt toraidh uatha le foighidinn.

16 Cha'n 'eil neach air bith, air dha coinneal a lasadh, a dh'fholaicheas fo shoitheach i, no chuireas fo leabaidh i: ach cuiridh e ann an coinnleir i, chum gu'm faic iadsan a thig a stigh an solus.

17 Oir cha'n 'eil nisam bith fol-aichte, nach dèanar follaiseach; no uaigneach, nach aithnichear, agus nach tig am follais.

18 Air an aobhar sin thug-aibh fa'near cionnus a dh'éisdeas sibh: oir ge b'e neach aig am bheil, bheirear dha; agus ge b'e neach aig nach 'eil, bheirear uaith eadhon an ni sin a shaoil-ea bhi aige.

19 An sin thàinig d'a ionn-suidh a mhàthair agus a bhràithre, agus cha b'urrainn iad teachd am fagus da leis an dòmhlas.

20 Agus dh'innseadh dha le *dream àraidh*, a thubhairt, Tha do mhàthair agus do bhràithre 'nan seasamh a muigh, ag iarraidh t'fhaicinn.

21 Agus fhreagair esan agus thubhairt e riu, Is iad mo mhàthair agus mo bhràithrean iadsan a dh'éisdeas ri focal Dé, agus a ni e.

22 Agus thàrladh air là àraidh, gu'n deachaidh e féin agus a dheisciobuil a stigh do luing: agus thubhairt e riu, Rachamaid thairis gu taobh thall an locha. Agus chuir iad a mach o *thèr*.

23 Ach ag seòladh dhoibh, thuit codal airsan: agus thàinig ànradh gaoithe a nuas air an loch, agus lionadh iad le *h-uisge*, agus bha iad ann an gàbhadh.

24 Agus thàinig iad d'a ionn-suidh, agus dhùisg iad e, ag ràdh, A mhaighstir, a mhaighstir, tha sinn caillte! An sin dh'éirich esan, agus chronuich e a' ghaoth, agus onfa an uisge; agus sguir iad, agus thàinig fèath ann:

25 Agus thubhairt e riu, C'àit am bheil bhur creidimh? agus air dhoibh bhi fo eagal, ghabh iad iongantas, ag ràdh r'a chéile, Ciod a' ghnè dhuine so? oir a ta e toirt àithne do na gaothaibh, agus do'n uisge féin, agus a ta iad ùmhal dha.

26 Agus thàinig iad air tìr aig dùthaich nan Gadareneach, a ta thall fa chomhair Ghalile.

27 Agus an uair a chaidh e mach air tìr, choinnich duine àraidh as a' bhaile e, anns an robh deamhain rè aimsir fhada, agus aig nach biodh eudach uime, agus nach fanadh ann an tigh, ach anns na h-àitibh-adh-laic.

28 An uair a chunnaic e Iosa, ghlaodh e mach, agus thuit e sìos 'na làthair, agus thubhairt e le guth àrd, Ciod e mo ghnothuch-sa riut, Iosa, a Mhic an Dé a's ro àirde? guidheam ort, na pian mi.

29 (Oir bha e air toirt àithne do'n spiorad neòghlan dol a mach as an duine. Oir bu tric a rug e gu naimhdeil air: agus cheangladh e le slabhruidhibh, agus choimhheadh an geimhlibh e; agus air briseadh a chuibhreacha dha, dh'iomaineadh e leis an deamhan do'n fhàsach.)

30 Agus dh'fhiosraich Iosa dheth, ag ràdh, Ciod is ainm dhuit? agus thubhairt esan,

Legion : do bhàigh gu'n deachaidh mòran dheamhan a steach ann.

31 Agus ghuidh iad air, gun àithne thoirt doibh dol sìos do'n doimhneachd.

32 Agus bha treud lìonmhor mhuc an sin, ag ionaltradh air an t-sliabh : agus ghuidh iad air cead a thoirt doibh dol a steach annta. Agus thug e cead doibh.

33 An sin air dol do na deamhnaibh a mach as an duine, chaidh iad anns na mucaibh : agus ruith an treud mhuc gu dian sìos le bruthach do'n loch, agus thachdadh iad.

34 Agus an uair a chunnaic an dream a bha 'gam biadhadh an ni a rinneadh, theich iad, agus dh'innis iad e anns a' bhaile, agus anns an dùthaich.

35 Agus chaidh iadsan a mach a dh'fhaicinn an ni a rinneadh ; agus thàinig iad gu Iosa, agus fhuair iad an duine as an deachaidh na deamhain, 'na shuidhe aig cosaibh Iosa air eudachadh, agus e 'na chèill : agus ghabh iad eagal.

36 Agus dh'innis an dream a chunnaic e dhoibh, cionnus a shlànuicheadh an duine san robh na deamhain.

37 An sin dh'iarr muinntir dùthcha nan Gadareneach uile airsan imeachd uatha ; oir ghlacadh le h-eagal mòr iad : agus chaidh e san luing, agus phill e air ais a ris.

38 A nis ghuidh an duine as an deachaidh na deamhain air, e féin a bhi maille ris : ach chuir Iosa uaith e, ag ràdh,

39 Pill do d' thigh féin, agus cuir an céill meud nan nithe a rinn Dia dhuit. Agus dh'imich e roimhe, ag innseadh gu follaiseach air feadh a' bhaile uile, meud nan nithe a rinn Iosa dha.

40 Agus thàrladh, an uair a phill Iosa air ais, gu'n do ghabh an sluagh *gu toileach* ris : oir bha iad uile 'ga fheitheamh.

41 Agus, feuch, thàinig duine d'am b'ainm Iairus, a bha 'na uachdaran air an t-sionagog ; agus thuit e aig cosaibh Iosa, agus ghuidh e air gu'n tigeadh e d'a thigh :

42 Do bhrìgh gu'n robh aonghin nighinn aige, mu thimchioll dà bhliadhna dheug, agus i faotainn a' bhàis. (Ach air dha bhi 'g imeachd, bha'n sluagh 'ga theannadh.

43 Agus thàinig bean air an robh dòrtadh fola dà bhliadhna dheug, agus a chaidh a beathachadh uile ri léighibh, agus nach b'urrainn bhi air a leigh-eas le neach air bith,

44 Thàinig *ise* air a chùlaobh, agus bhean i ri iomall 'eudaich : agus sguir a dòrtadh fola air ball.

45 Agus thubhairt Iosa, Cò bhean rium ? Air àicheadh do na h-uile, Thubhairt Peadar ris, agus iadsan a bha maille ris, A mhaighstir, tha'n sluagh ga d' dhòmhlachadh, agus ga d' theannadh, agus an abair thu, Cò bhean rium ?

46 Agus thubhairt Iosa, Bhean neach éigin rium : oir mhothaich mi cumhachd a' dol asam.

47 Agus an uair a chunnaic a' bhean nach robh i an ain-fhios, thàinig i air chrith, agus a' sleuchdadh dha, chuir i 'n céill da, an làthair an t-sluaigh uile, c'ar son a bhean i ris, agus mar a shlànuicheadh i gu grad.

48 Agus thubhairt esan rithe, A nighean, biodh misneach agad : shlànuich do chreidimh thu ; imich an sìth.)

49 Am feadh a bha e fathast a' labhairt, thàinig neach o thigh Uachdarain na sionagoig, ag

ràdh ris, Tha do nighean marbh ; na cuir dragh air a' mhaighstir.

50 Ach an uair a chual Iosa so, fhreagair se e, ag ràdh, Na biodh eagal ort : a mhàin creid, agus bithidh i air a slànuchadh.

51 Agus an uair a chaidh e do'n tigh, cha do leig e le neach air bith dol a stigh, ach Peadar, agus Eoin, agus Seumas, agus athair agus màthair na nighinn.

52 Agus bha iad uile a' gul, agus a' dèanamh caoidh air a son : ach thubhairt esan, Na guilibh ; cha'n 'eil i marbh, ach 'na codal.

53 Agus rinn iad gàire fanoid ris, do bhrìgh gu'n robh fhios aca gu'n robh i marbh.

54 Agus air dha an cur a mach uile, ghlac e air làimh i, agus ghlaodh e, ag ràdh, A nigh-ean, éirich.

55 Agus thàinig a spiorad air ais, agus dh'éirich i air ball : agus dh'àithn e biadh a thoirt d' i.

56 Agus ghlac uambas mòr a pàrantan : ach thug esan àithne dhoibh gun an ni a rinneadh innseadh do neach air bith.

CAIB. IX.

A GUS ghairm e an dà fhear dheug an ceann a chéile, agus thug e cumhachd agus ùgh-darras doibh air na h-uile dheamhnaibh, agus a chum euslaintean a leigheas.

2 Agus chuir e mach iad a shearmonachadh rìoghachd Dhé, agus a shlànuchadh nan euslan.

3 Agus thubhairt e riu, Na tugaibh ni air bith leibh chum na slighe, bataiche, no màla, no aran, no airgiod ; ni mò bhios dà chòta aig gach fear agaibh.

4 Agus ge b'e air bith tigh d'an téid sibh a steach, fanaibh an sin, agus á sin rachaibh a mach.

5 Agus cò air bith iad nach

gabh ribh, air dhuibh dol a mach as a' bhaile sin, crathaibh dhìbh eadhon an duslach o bhur cosaibh mar fhianuis 'nan aghaidh.

6 Agus chaidh iadsan a mach, agus ghabh iad troimh na bailtibh, a' searmonachadh an t-soisgeil, agus a' leigheas anns gach àit.

7 Agus chual Herod an Te-trarc na h-uile nithe a rinn-eadh leis : agus bha e an im-cheist, do bhrìgh gu'n dubhradh le cuid, gu'n robh Eoin air éirigh o na marbhaibh ;

8 Agus le cuid, gu'n d'fhoillsicheadh Elias ; agus le cuid eile, gu'n robh aon do na sean fhàidhibh air éirigh a ris.

9 Agus thubhairt Herod, Thug mise an ceann do Eoin : ach cò e am fear so mu'm bheil mi cluinntinn a leithid so do nithibh ? Agus dh'iarr e fhaicinn.

10 Agus air pilltinn do na h-abstolaibh, dh'innis iad dha gach ni a rinn iad. Agus thug e leis iad, agus chaidh e fa leth gu àite fàsail, a bhuineadh do'n bhaile d'an goirear Betsaida.

11 Agus an uair a fhuair an sluagh fios air, lean iad e : agus ghabh e d'a ionnsuidh iad, agus labhair e riu mu thimchioll rìoghachd Dhé, agus leighis e iadsan aig an robh feum air leigheas.

12 Agus an uair a thòisich an là air teireachdainn, thàinig an dà fhear dheug, agus thubhairt iad ris, Cuir air falbh an sluagh, chum gu'n téid iad do na bailtibh agus do'n tìr mu'n cuairt, agus gu'n gabh iad tàmh agus gu'm faigh iad biadh ; oir tha sinn an so an àite fàsail.

13 Ach thubhairt esan riu, Thugaibh-sa dhoibh ni r'a ith-eadh. Agus thubhairt iadsan, Cha'n 'eil againn tuilleadh na

cùig builinnean agus dà iasg: mur téid sinn agus biadh a cheannach do'n t-sluagh so uile.

14 Oir bha iad mu thimchioll cùig mìle fear. Agus thubhairt e r'a dheisciobluibh, Cuiribh 'nan suidhe iad, leth-cheud anns gach cuideachd.

15 Agus rinn iad mar sin, agus chuir iad 'nan suidhe iad uile.

16 Agus ghabh e na cùig builinnean agus an dà iasg, agus air amharc suas gu nèamh, bheannaich e iad, agus bhris e, agus thug e d'a dheisciobluibh iad gu'n cur an làthair an t-sluaigh.

17 Agus dh'ith iad, agus shànuicheadh iad uile: agus thogadh dà chliabh dheug do bhiadh briste, a bha dh'fhuigheall aca.

18 Agus thàrladh, air dha bhi ri ùrnuigh fa leth, gu'n robh a dheisciobuil maille ris: agus dh'fheòraich e dhiubh, ag ràdh, Cò tha an sluagh ag ràdh is mise?

19 Fhreagair iadsan agus thubhairt iad, Eoin Baiste: ach *tha cuid ag ràdh* Elias: agus cuid eile, gu bheil aon do na sean fhàidlibh air éirigh a ris.

20 Thubhairt e riu, Ach cò tha sibhse ag ràdh is mi? Agus fhreagair Peadar, agus thubhairt e, Crìosd Dhé.

21 Agus air dha sparradh teann a thoirt doibh, dh'àithn e gun iad a dh'innseadh so do neach sam bith;

22 Ag ràdh, Gur éigin do Mhac an duine mòran fhulang, agus a bhi air a dhiùltadh leis na seanairibh agus na h-àrd-shagartaibh, agus na sgrìobhaichibh, agus a bhi air a chur gu bàs, agus air a thogail suas air an treas là.

23 Agus thubhairt e riu uile, Ma's àill le neach air bith teachd

a'm' dheigh-sa, àicheadhadh se e féin, agus togadh e a chrann-cèusaidh gach là, agus leanadh e mise.

24 Oir ge b'e neach le'm b'àill 'anam a thèarnadh, caillidh se e: ach ge b'e neach a chailleas 'anam air mo sgàth-sa, saoraidh esan e.

25 Oir ciod e an tairbhe do dhuine, ged chosnadh e an saoghal gu h-iomlan, agus e féin a chall, no bhi air a sgrios?

26 Oir ge b'e neach a ghabhas nàire dhiomsa agus do m' bhriathraibh, gabhaidh Mac an duine nàire dheth-san, an uair a thig e 'na ghlòir féin, agus *an glòir* 'Athar, agus nan aingeal naomha.

27 Ach a ta mise ag ràdh ribh gu fìrinneach, gu bheil cuid 'nan seasamh an so, nach blais bàs, gus am faic iad rioghachd Dhé.

28 Agus thàrladh, mu thimchioll ochd làithean an déigh nam briathra so, gu'n d'thug e leis Peadar, agus Eoin, agus Seumas, agus gu'n deachaidh e suas gu beinn a dhèanamh ùrnuigh.

29 Agus an uair a bha e ri ùrnuigh, bha dreach a ghnuise air atharrachadh, agus rinneadh 'eudach geal agus dealrach.

30 Agus, feuch, bha dithis fhear a' còmhradh ris, eadhon Maois agus Elias,

31 A nochdadh ann an glòir, agus a bha labhairt m' a bhàs, a bha esan gu choimhlionadh ann an Ierusalem.

32 Ach bha Peadar, agus iadsan a bha maille ris, trom 'nan codal: agus an uair a dhùisg iad, chunnaic iad a ghlòir, agus an dithis fhear a bha 'nan seasamh maille ris.

33 Agus an uair a bha iadsan a' dealachadh ris, thubhairt

Peadar ri Iosa, A mhaighstir, is maith dhuinne bhi an so; agus dèanamaid trì pàilliona, aon duitse, agus aon do Mhaois, agus aon do Elias; gun fhios aige ciod a bha e ag ràdh.

34 Am feadh a bha e ag ràdh so, thàinig neul, agus chuir e sgàile orra: agus ghabh iad eagal an uair a bha iad a' dol a stigh san neul.

35 Agus thàinig guth as an neul, ag ràdh, Is e so mo Mhac gràdhach-sa; éisdibh ris.

36 Agus an uair a rinneadh an guth so, fhuaradh Iosa 'na aonar: agus dh'fhan iadsan 'nan tosd, agus cha d'innis iad do neach air bith anns na làithibh sin aon ni do na chunnaic iad.

37 Agus thàrladh, an là 'na dhéigh sin, an uair a thàinig iad a nuas o'n bheinn, gu'n do thach-air sluagh mòr air.

38 Agus, feuch, ghlaodh duine àraidh do'n t-sluagh, ag ràdh, A mhaighstir, tha mi a' guidhe ort, amhaire air mo mhac, oir is e m' aon duine cloinne e.

39 Agus, feuch, a ta spiorad a' breith air, agus a ta e gu h-obann ag éigheach; agus a ta e 'ga tharruing as a chéile, air chor as gu bheil e cur cobhair a mach, agus an déigh a chomhbhruthadh is gann a dh'fhàgas se e.

40 Agus ghuidh mi air do dheisciobluibh gu'n cuireadh iad a mach e, agus cha b'urrainn iad.

41 Agus fhreagair Iosa agus thubhairt e, O ghinealaich mhìchreidich agus fhiair, cia fhad a bhios mi maille ribh, agus a dh'fhuilgeas mi sibh? Thoir an so do mhac.

42 Agus am feadh a bha e fathast a' teachd, thilg an deamhan sìos e, agus reub se e: agus chrònuich Iosa an spiorad

neòghlan, agus shlànuich e an leanabh, agus thug e d'a athair e.

43 Agus ghabh iad uamhas uile ri mòr-chumhachd Dhé. Ach air dhoibh uile bhi gabhail iongantais ris na h-uile nithibh a rinn Iosa, thubhairt e r'a dheisciobluibh,

44 Taisgibh na briathra so ann bhur cluasaibh: oir tha Mac an duine gu bhi air a thoirt thairis do làmhaibh dhaoine.

45 Ach cha do thuig iadsan an còmhradh so, agus bha e fol-aichte uatha, air chor as nach b'aithne dhoibh e: agus b'eagal-ach leo ceisd a chur air mu thimchioll a' chòmhradh so.

46 An sin dh'éirich deasboir-eachd eatorra, cò aca bu mhò a bhitheadh.

47 Agus air do Iosa smuaintean an cridhe fhaicinn, ghabh e leanabh, agus chuir e làimh ris féin e,

48 Agus thubhairt e riu, Ge b'e ghabhas ris an leanabh so ann am ainm-sa, tha e a' gabhail riumsa: agus ge b'e neach a ghabhas riumsa, tha e gabhail ris an Tì a chuir uaith mi: oir an neach a's lugha 'nur measg-sa uile, bithidh esan mòr.

49 Agus fhreagair Eoin, agus thubhairt e, A mhaighstir, chunnaic sinne duine àraidh a' tilgeadh mach dheamhan a' d'ainm-sa; agus bhac sinn e, a chionn nach 'eil e 'gar leantuinn-ne.

50 Agus thubhairt Iosa ris, Na bacadh e: oir ge b'e nach 'eil 'nar n-aghaidh, tha e leinn.

51 A nis an uair a choimhlionadh làithean a gabhail suas, shuidhich e a ghnùis chum dol gu Ierusalem;

52 Agus chuir e teachdairean roimh a ghnùis: agus dh'imich iad, agus chaidh iad a steach do

bhaile leis na Samaritanaich, a dh'ulluchadh air a shon-san.

53 Agus cha do ghabh iadsan ris, a chionn gu'n robh 'aghaidh mar gu'm biodh e dol gu Ierusalem.

54 Agus an uair a chunnaic a dheisciobuil Seumas agus Eoin so, thubhairt iad, A Thighearn, an àill leat gu'n abramaid teine a theachd a nuas o nèamh, agus an losgadh, eadhon mar a rinn Elias?

55 Ach thionndaidh esan agus chronuich e iad, agus thubhairt e, Cha'n 'eil fhios agaibh ciod a' ghnè spioraid d'am bheil sibh:

56 Oir cha d'thàinig Mac an duine a sgrios anama dhaoine, ach g'an saoradh. Agus chaidh iad gu baile eile.

57 Agus thàrladh, an uair a bha iad ag imeachd air an t-slighe, gu'n dubhairt duine àr-aidh ris, A Thighearn, leanaidh mise thu ge b'e àit an téid thu.

58 Agus thubhairt Iosa ris, Tha tuill aig na sionnaich, agus nid aig eunlaith an athair; ach cha'n 'eil àit aig Mac an duine anns an cuir e a cheann fuidhe.

59 Agus thubhairt e ri duine eile, Lean mise: ach thubhairt esan, A Thighearn, leig dhomh dol air tùs agus m'athair adhlac.

60 Ach thubhairt Iosa ris, Leig leis na mairbh am mairbh féin adhlac; ach imich thusa agus searmonaich rìoghachd Dhé.

61 Agus thubhairt neach eile mar an ceudna, A Thighearn, leanaidh mise thu: ach leig dhomh air tùs mo chead a ghabhail diubhsan a ta aig mo thigh.

62 Ach thubhairt Iosa ris, Cha'n 'eil neach air bith, a chuireas a làmh ris a' chrann-araidh, agus a sheallas 'na dhéigh, iomchuidh air son rìoghachd Dhé.

CAIB. X.

AN déigh nan nithe sin, dh'òrduich an Tighearna mar an ceudna deichnear agus trì fichead eile, agus chuir e lìon dithis agus dithis roimh a ghnùis iad, do gach baile, agus àit, anns an robh e féin gu teachd.

2 Air an aobhar sin thubhairt e riu, *Tha* am fogharadh gu firinneach mòr, ach *a ta* an luchd-oibre tearc: guidhibh uime sin air Tighearn an fhogharaidh, luchd-oibre chur a mach chum 'fhogharaidh féin.

3 Imichibh: feuch, a ta mise 'gur cur a mach mar uain am measg mhadadh-alluidh.

4 Na giùlainibh sporan, no màla, no brògan; agus na beannaichibh do neach air bith san t-slighe.

5 Agus ge b'e tigh d'an téid sibh a steach, abraibh air tùs, *Sith do'n tigh so*.

6 Agus ma bhios mac na sìthe an sin gabhaidh bhur sìth còmhnaidh air: ach mur bi, pillidh *bhur sìth* do bhur n-ionnsuidh féin a ris.

7 Agus fanaibh anns an tigh sin, ag itheadh agus ag òl nan nithe a bheirear dhuibh: oir is airidh an t-oibriche air a thuar-asdal. Na rachaibh o thigh gu tigh.

8 Agus ge b'e baile d'an téid sibh a steach, agus san gabh iad ribh, ithibh na nithe sin a chuireas iad 'nur làthair.

9 Agus leighisibh a' mhuinntir a ta euslan ann, agus abraibh riu, *Tha* rìoghachd Dhé air teachd am fagus duibh.

10 Ach ge b'e baile d'an téid sibh a steach, agus nach gabh iad ribh, air dhuibh dol a mach air a shràidibh, abraibh,

11 Eadhon duslach bhur baile a lean ruinn, *tha sinne a' glanadh dhinn 'nur n-aghaidh-sa:*

gidheadh, biodh fhios so agaibh gu'n do dhruid rioghachd Dhé ribh.

12 Ach a ta mise ag ràdh ribh, gur so-ìomchaire a bhitheas e do Shodom san là ud, na do'n bhaile sin.

13 Is an-aoibhinn duit, a Chorasin! is an-aoibhinn duit, a Bhetsaida! oir nam bitheadh na h-òibre cumhachdach a rinn-eadh annaibh-sa air an dèanamh ann an Tirus agus ann an Sidon, is fad o'n a dhèanadh iad aithreachas, 'nan suidhe ann an saic-eudach agus ann an luaith-re.

14 Ach bithidh e ni 's so-ìomchaire do Thirus agus do Shidon anns a' bhreitheanas, na dhuibh-sa.

15 Agus thusa, a Chaper-naum, a ta air t'àrdachadh gu nèamh, tilgear sìos gu h-ifrinn thu.

16 Esan a dh'éisdeas ribhse, éisidh e rium-sa: agus esan a dhiùltas sibhse, tha e ga mo dhiùltadh-sa: agus an neach a dhiùltas mise, tha e a' diùltadh an Tì a chuir uaith mi.

17 Agus phill an deichnear agus an trì fichead le gairdeachas, ag ràdh, a Thighearn, a ta na deamhain féin fo smachd ag-ainne troimh t'ainm-sa.

18 Agus thubhairt e riu, Chunnaic mi Satan, mar dhealanach, a' tuiteam o nèamh.

19 Feuch, a ta mi toirt dhuibh cumhachd saltairt air nathraich-ibh, agus air scorpion-ibh, agus air uile neart an nàmhaid; agus cha ghoirtich ni air bith air aon dòigh sibh.

20 Gidheadh na dèanaibh gairdeachas air son gu bheil na spioraid fo bhur smachd; ach dèanaibh gairdeachas air son gu bheil bhur n-ainmean sgrìobhta anns na nàmhaid.

21 Anns an uair sin féin rinn Iosa gairdeachas 'na spiorad, agus thubhairt e, Tha mi toirt buidheachais duit, O Athair, a Thighearn nèimh agus talmh-ainn, air son gu'n d'fholaich thu na nithe sin o *dhaoinibh* glìce agus tuigseach, agus gu'n d'fhoillsich thu iad do naoidhean-aibh: seadh, Athair, oir is ann mar sin bu toil leatsa.

22 Tha na h-uile nithe air an tabhairt domh-sa le m' Athair: agus cha'n aithne do neach air bith cò e am Mac, ach do'n Athair; no cò e an t-Athair ach do'n Mhac, agus an neach d'an àill leis a' Mhac fhoillseachadh.

23 Agus air tionndadh r'a dheisciobluibh, thubhairt e riu an uaignidheas, Is beannaichte na sùilean a chi na nithe ta sibhse a' faicinn:

24 Oir a ta mi ag ràdh ribh, Gu'm b'iomadh fàidh agus rìgh, le'm bu mhiann na nithe fhaicinn a ta sibhse a' faicinn, agus nach fac *iad*; agus na nithe a' chluinntinn, a ta sibhse a' cluinntinn, agus nach cual *iad*.

25 Agus, feuch, sheas fear-lagha àraidh suas, 'ga dhearbhadh, agus ag ràdh, A mhaighstir, ciod a ni mi chum gu sealbhaich mi a' bheatha mhair-eannach?

26 Agus thubhairt e ris, Ciod a tha sgrìobhta san lagh? cionnus a leughas tu?

27 Agus ag freagairt dasan, thubhairt e, Gràdhaichidh tu an Tighearna do Dhia le d'uile chridhe, agus le d'uile anam, agus le d'uile neart, agus le d'uile inntinn; agus do choimhearsnach mar thu féin

28 Agus thubhairt esan ris, Is ceart a fhreagair thu: dèansa so, agus bithidh tu beò.?

29 Ach air dhasan toil a bhi aige e féin fhìreanachadh, thu-

bhairt e ri Iosa, Agus cò e mo choimhearsnach?

30 Agus fhreagair Iosa, agus thubhairt e, Chaidh duine àraidh sìos o Ierusalem gu Iericho, agus thuit e am measg luchd-reubainn, agus air dhoibh a rùsgadh, agus a lotadh, dh'imich iad rompa, air fhàgail-san doibh leth-mharbh.

31 Agus thàrladh, gu'n d'imich sagart àraidh sìos air an t-slighe sin: agus an uair a chunnaic se e, ghabh e seachad air an taobh eile.

32 Agus mar an ceudna air do Lebhitheach bhi dlùth do'n ionad sin, thàinig e agus dh'amhairc e air, agus ghabh e seachad air an taobh eile.

33 Ach air do Shamaritanach àraidh bhi gabhail an rathaid, thàinig e far an robh esan: agus an uair a chunnaic se e, ghabh e truas mòr *dheth*,

34 Agus thàinig e d'a ionnsuidh, agus cheangail e suas a chreuchdan, a' dòrtadh olaidh agus fiona annta, agus chuir e air 'ainmhidh féin e, agus thug e gu tigh-òsda e, agus ghabh e cùram dheth.

35 Agus air an là màireach, 'nuair a dh'fhalbh e, thug e mach dà pheghinn *Romhanach*, agus thug e do fhear an tigh-òsda *iad*, agus thubhairt e ris, Gabh cùram dheth; agus ge b'e ni tuilleadh a chaitheas tu, an uair a philleas mise air m'ais, diolaidh mi dhuit e.

36 Cò a nis do'n triuir so, a shaoileas tu, bu choimhearsnach dhasan a thuit am measg an luchd-reubainn?

37 Agus thubhairt esan, An tè a rinn tròcair air. An sin thubhairt Iosa ris, Imich thusa, agus dèan mar an ceudna.

38 Agus ag imeachd dhoibh, chaidh e steach do bhaile àr-

aith; agus ghabh bean àraidh, d'amb'ainm Marta, d'a tigh féine.

39 Agus bha piuthar aice d'an goirte Muire, a shuidh aig cosaibh Iosa, agus a bha 'g éisd-eachd 'fhocail.

40 Ach bha Marta air a ro-chùradh le mòran frithealaidh, agus air seasamh dh' i 'na làthair, thubhairt i, A Thighearn, nach 'eil suim agad gu'n d'fhàg mo phiuthar mise a' m' aonar ri fritbealadh? uime sin abair rithe cuideachadh leam.

41 Agus fhreagair Iosa, agus thubhairt e rithe, a Mharta, a Mharta, tha thusa làn cùraim, agus dragha mu thimchioll mòrain do nithibh:

42 Ach a ta aon ni feumail. Agus rinn Muire roghainn do'n chuid mhaith sin, nach toirear uaipe.

CAIB. XI.

AGUSthàrladh air dha bhi ann an ionad àraidh ri h-ùrnuigh, 'nuair a sguir e, gu'n dubhairt neach àraidh d'a dheisciobluibh ris, A Thighearna, teagaisg dhuinne ùrnuigh a dhèanamh, mar a theagaisg Eoin d'a dheisciobluibh féin.

2 Agus thubhairt e riu, 'Nuair a ni sibh ùrnuigh, abraibh, Ar n-Athair a ta air nèamh, Gu naomhaichear t' ainm. Thigeadh do rìoghachd. Dèanar do thoill, mar air nèamh, gu ma h-amhluidh sin air thalamh.

3 Thoir dhuinn o là gu là ar n-aran làthail.

4 Agus maith dhuinn ar peacanna: oir a ta sinne féin a' maitheadh do gach aon air am bheil fiachan againn. Agus na leig ann am buaireadh sinn, ach saor sinn o'n olc.

5 Agus thubhairt e riu, Cò agaibh-sa aig am bi caraid, agus a théid d'a ionnsuidh air mheadh-

on-oidheche, agus a their ris, A charaid, thoir dhomh trì builinn-ean air iasachd;

6 Oir thàinig caraid dhomh a m' ionnsuidh as a shlighe, agus cha 'n 'eil ni agam a chuireas mi 'na làthair:

7 Agus gu'm freagair esan o'n taobh a stigh agus gu'n abair e, Na cuir dragh orm: tha 'n dorus a nis air a dhùnadh, agus tha mo chlann maille rium san leabaidh; cha'n fhaigh mi éirigh agus an toirt duit.

8 A ta mi ag ràdh ribh, Ged nach éirich e agus nach toir e dha, air son gur e a charaid e; gidheadh air son a liosdachd, éiridh e agus bheir e dha mheud as a ta dh'uireasbhuidh air.

9 Agus a ta mise ag ràdh ribh, Iarraibh, agus bheirear dhuibh: siribh, agus gheibh sibh; buailibh an dorus, agus fosgailear dhuibh.

10 Oir gach neach a dh'iarras, glacaidh e: agus an tì a shireas, gheibh e: agus do'n tì a bhuail-eas, fosgailear.

11 Ma dh'iarras mac aran air aon neach agaibh-sa ta 'na athair, an toir e dha clach? no ma dh'iarras e iasg, an toir e nath-air dha an àit éisg?

12 No ma dh'iarras e ubh, an toir e scorpion da?

13 Air an aobhar sin ma's aithne dhuibh-sa a ta olc, tiodh-lacan maithe a thoirt do 'ur cloinn, nach mòr is mò na sin a bheir bhur n-Athair nèamh-aidh an Spiorad naomh dhoibh-sa a dh'iarras air e?

14 Agus bha e tilgeadh a mach deamhain, agus bha e balbh. Agus air dol do'n deamhan a mach, labhair am balbhan; agus ghabh an sluagh iongant-as.

15 Ach thubhairt cuid diubh, Is ann troimh Bheelsebub ceann-

ard nan deamhan a ta e tilgeadh mach dheamhan.

16 Agus dh'iarr dream eile dhiubh, ga dhearbhadh, comhar air o nèamh.

17 Ach air dhasan an smuaint-ean a thuigsinn, thubhairt e riu, Gach rìoghachd a ta roinnte 'na h-aghaidh féin fàsaichear i; agus gach tigh a ta roinnte 'na aghaidh féin, tuitidh e.

18 Agus ma tha Satan mar an ceudna air a roinn 'na aghaidh féin, cionnus a sheasas a rìoghachd? oir tha sibhse ag ràdh, gu bheil mise troimh Bheelsebub a' tilgeadh a mach dheamhan.

19 Agus ma 's ann troimh Bheelsebub a ta mise a' tilgeadh mach dheamhan, cò e troimh am bheil bhur clann-sa 'gan tilgeadh mach? uime sin bithidh iadsan 'nam breitheamhnaibh oirbh.

20 Ach ma 's ann le mèur Dhé a ta mise a' tilgeadh mach dheamhan, tha rìoghachd Dhé, gun teagamh, air teachd oirbhse.

21 'Nuair a ghléidheas duine làidir fo armaibh a thalla féin, tha na bhuineas da ann an sìth.

22 Ach an uair a thig duine a's treise na e, agus a bheir e buaidh air, bheir e uaith 'armachd uile anns an robh a dhòigh, agus roinnidh e a chreach.

23 An neach nach 'eil leam-sa, tha e a' m' aghaidh; agus an neach nach 'eil a' cruinneachadh leam-sa, sgapaidh e.

24 'Nuair a théid an spiorad neòghlan a mach á duine, imichidh e troimh ionadaibh tiorma, ag iarraidh foise: agus an uair nach faigh e sin, their e, Pillidh mi dh'ionnsuidh mo thighe as an d' thàinig mi.

25 Agus air dha teachd,

gheibh se e air a sguabadh agus air a dhèanamh maiseach.

26 An sin imichidh e, agus bheir e leis seachd spioraid eile a's miosa na e féin; agus air dhoibh dol a steach, gabhaidh iad còmhnuidh an sin: agus bithidh deireadh an duine sin ni's miosa na a thoiseach.

27 Agus an uair a bha e labhairt nan nithe so, thog bean àraidh do'n t-sluagh a guth, agus thubhairt i ris, Is beannaichte a' bhrù a ghiùlain thu, agus na cìochan a dheoghail thu.

28 Ach thubhairt esan, Is mò gur beannaichte iadsan a dh'éisdeas ri focal Dé, agus a choimhideas e.

29 Agus an uair a chruinnich an sluagh gu tiugh *d'a ionnsuidh*, thòisich e air a ràdh, Is droch ghinealach so: tha iad ag iarraidh comhara; agus cha toirear comhara dhoibh, ach comhara Ionais an fhàidh.

30 Oir mar a bha Ionas 'na chomhara do mhuinntir Ninebheh, is ann mar sin mar an ceudna bhios Mac an duine do'n ghinealach so.

31 Eiridh ban-rìghinn na h-àirde deas suas anns a' bhreitheanas maille ri daoineibh a ghinealaich so, agus ditidh i iad: oir thàinig ise o iomallaibh na talmhainn, a dh'éisdeachd ri gliocas Sholaimh; agus, feuch, *a ta* ni's mò na Solamh an so.

32 Eiridh muinntir Ninebheh suas anns a' bhreitheanas maille ris a' ghinealach so, agus ditidh iad e: oir rinn iadsan aithreachas le searmoin Ionais; agus, feuch, *a ta* ni's mò na Ionas an so.

33 Cha 'n 'eil neach sam bith, air dha coinneal a lasadh, e chuireas am folach i, no fo shoitheach; ach ann an coinneil, chum gu'm faic an dream a thig a stigh an solus.

34 Is i an t-sùil solus a' chuirp: uime sin an uair a bhios do shùil glan, bithidh do chorp uile làn soluis: ach an uair a bhios *do shùil* olc, bithidh do chorp mar an ceudna dorch.

35 Uime sin tboir an aire, nach bi an solus a ta annad 'na dhorchadas.

36 Air an aobhar sin ma bhith-eas do chorp uile soillseach, gun chuid sam bith dheth dorch, bithidh e soillseach gu h-iomlan, mar an uair a shoillsicheas coinneal thu le dealradh.

37 Agus a' labhairt dhasan, dh'iarr Phairiseach àraidh air a dhinneir a ghabhail maille ris: agus chaidh e stigh, agus shuidh e chum bith.

38 Agus an uair a chunnaic am Phairiseach *sin*, b'ìoghnadh leis nach d'ionnlaid se e féin roimh a dhinneir.

39 Agus thubhairt an Tigh-earna ris, A nis, Phairiseacha, glanaidh sibhse an taobh a muigh do'n chupan agus do'n mhèis: ach a ta 'n taobh a stigh dhibh làn do reubainn agus do aingidb-eachd.

40 Amadana, an tì a rinn an ni a ta 'n taobh a muigh, nach do rinn e an ni a ta 'n taobh a stigh mar an ceudna?

41 Ach thugaibh uaibh déire do na nithibh a ta agaibh: agus, feuch, a ta na h-uile nithe glan duibh.

42 Ach is an-aoibhinn duibh, Phairiseacha: oir a ta sibh a' toirt deachaimh á mionnt, agus á rù, agus as gach uile ghnè luibhean, agus a' gabhail thairis air breitheanas agus air gràdh Dhé: bu chòir dhuibh iad so a dhèanamh, agus gun iad sud fhàgail gun dèanamh.

43 Is an-aoibhinn duibh, Phairiseacha: oir is ionmhuinn leibh na ceud àiteacha-suidhe

anns na sionagogaibh, agus fàilte *fhaotainn* air na margaibh.

44 Is an-aoibhinn duibh, a sgrìobhaichean agus Phairis-eacha, a chealgairean: oir a ta sibh mar uaighean nach faicear, agus do nach toir na daoine a ta 'g imeachd thairis orra, an aire.

45 Agus fhreagair duine àr-aidh do'n luchd-lagha, agus thubhairt e ris, A mhaighstir, le so a labhairt, tha thu toirt mas-laidh dhuinne mar an ceudna.

46 Agus thubhairt esan, Is an-aoibhinn dhuibh-sa mar an ceudna, a luchd-lagha: oir a ta sibh a' cur uallacha troma do ghiùlan air daoineibh, agus cha bhean sibh féin ris na h-uallaichibh le h-aon do bhur mèuraibh.

47 Is an-aoibhinn duibh: oir a ta sibh a' togail àitean-adh-laic nam fàidhean, agus is iad bhur n-aithriche a mharbh iad.

48 Gu deimhin a ta sibh a' toirt fianuis gu bheil sibh ag aontachadh le gnìomharaibh bhur n-aithriche: oir mharbh iadsan gu deimhin iad, agus a ta sibhse a togail an àitean-adh-laic.

49 Air an aobhar sin thubhairt gliocas Dé, cuiridh mise fàidhean, agus abstoil d'an ionn-suidh, agus *cuid* diubh marbh-aidh iad, agus *cuid eile* geur-leanaidh iad:

50 Chum gu'n agrar air a' ghinealach so fuil nam fàidhean uile a dhòirteadh o thoiseach an domhain;

51 O fhuil Abeil gu fuil Shachariais, a mhilleadh eadar an altair agus an teampull: gu deimhin a ta mi ag ràdh ribh, gu'n agrar i air a' ghinealach so.

52 Is an-aoibhinn duibh, a luchd-lagha: oir thug sibh air falbh iuchair an eòlais: cha deachaidh sibh féin a steach,

agus an dream a bha dol a steach, bhac sibh iad.

53 Agus an uair a bha e labhairt nan nithe so riu, thòisich na sgrìobhaichean agus na Phairisich air a chur thuige gu dian, agus a tharruing gu labhairt air mòran do nithibh:

54 A' dèanamh feall-aire air, agus ag iarraidh ni éigin a ghlacadh as a bheul, chum gu'm biodh cùis-dhitidh aca 'na aghaidh.

CAIB. XII.

ANNS an àm sin, an uair a bha sluagh gun àireamh air cruinneachadh, ionnus gu'n robh iad a' saltairt air a chéile, thòisich e air a ràdh r'a dheisciobluibh féin, Roimh gach ni bithibh air bhur faicill o thaois ghoirt nam Phairiseach, eadhon cealgaireachd.

2 Oir cha'n 'eil ni air bith foluichte, nach foillsichear; no uaigneach, air nach faighear fios.

3 Air an aobhar sin ge b'e ni a labhair sibh san dorchadas, cluinnear e san t-solus: agus an ni a labhair sibh sa' chluais an seòmraichibh uaigneach, gairmear e air mullach nan tighean.

4 Agus a ta mi agràdh ribhse, mo chàirde, Na biodh eagal oirbh roimh 'n mhuinntir sin a mharbhas an corp, agus 'na dhéigh sin aig nach 'eil ni tuilleadh dh'fheudas iad a dhèanamh:

5 Ach nochdaidh mi dhuibh cò e roimh an còir dhuibh eagal a bhi oirbh: Biodh eagal an Tì ud oirbh, aig am bheil cumhachd, an déigh neach a mharbhadh, a thilgeadh do ifrinn; seadh, a ta mi ag ràdh ribh, Biodh eagal an Tì so oirbh.

6 Nach 'eil cùig gealbhoinn

air an reiceadh air dhà fheoir-
ling, agus cha'n 'eil aon diubh
air dhearmad am fianuis Dé?

7 Ach a ta eadhon fuilteine
bhur cinn uile air an àireamh.
Uime sin na biodh eagal oirbh:
is feàrr sibhse na mòran ghealbh-
onn.

8 Agus a ta mise ag ràdh
ribh, Ge b'e neach a dh'aidich-
eas mise am fianuis dhaoine,
aidichidh Mac an duine esan
mar an ceudna an làthair aingle
Dhé:

9 Ach ge b'e neach a dh'-
àicheadhas mise am fianuis
dhaoine, àicheadhar esan am
fianuis aingle Dhé.

10 Agus ge b'e neach a labh-
ras focal an aghaidh Mhic an
duine, maithear dha e: ach do'n
tì a labhras toibheum an agh-
aidh an Spioraid naoimh, cha
toirear maitheanas.

11 Agus an uair a bheir iad
sibh chum nan sionagog, agus
nan uachdaran, agus nan daoine
cumhachdach, na biodh e 'na
ro-chùram oirbh cionnus no
ciod a fhreagras sibh, no ciod
a their sibh:

12 Oir teagaisgidh an Spior-
ad naomh dhuibh anns an uair
sin féin na nithe a's còir dhuibh
a ràdh.

13 Agus thubhairt neach àr-
aidh do'n t-sluagh ris, A mhaigh-
stir, abair ri m' bhràthair an
oighreachd a roinn rium.

14 Agus thubhairt e ris, A
dhuine, cò a chuir mise a'm'
bhreitheamh, no a' m' fhear-
roinn os bhur ceann?

15 Agus thubhairt e riu,
Thugaibh an aire, agus gléidh-
ibh sibh féin o shannt: oir cha'n
ann am mòr-phailteas nan nithe
ta e sealbhachadh tha beatha
an duine.

16 Agus labhair e cosamh-
lachd riu, ag ràdh, Thug fear-

ann duine shaoibhir àraidh bàrr
pailte uaith:

17 Agus smuainich e ann
féin, ag ràdh, Ciod a ni mi, a
chionn nach 'eil agam àit anns
an cruinnich mi mo thoraidh?

18 Agus thubhairt e, Ni mi
so: leagaidh mi mo shalbhean,
agus togaidh mi *saibhlean* a's
mò; agus cruinnichidh mi annta
sin mo thoraidh uile, agus mo
mhaoin.

19 Agus their mi ri m' an-
am, Anam, a ta agad mòran do
nithibh maithe air an tasgaidh
fa chomhair mòrain bhliadh-
nach; gabh fois, ith, òl, agus
bi subhach.

20 Ach thubhairt Dia ris,
Amadain, air an oidhche so
fein iarrar t'anam uait: an sin
cò dha a bhuineas na nithe sin a
dh'ulluich thu?

21 Is ann mar sin a ta an tì
a thaisgeas ionmhas dha féin,
agus nach 'eil saoi bhir a thaobh
Dhé.

22 Agus thubhairt e r' a dheis-
cioblubh, Uime sin a ta mise ag
ràdh ribh, na biodh ro-chùram
oirbh mu thimchioll bhur beatha,
ciod a dh'itheas sibh; no mu
thimchioll bhur cuirp, ciod a
chuireas sibh umaibh.

23 Is mò a' bheatha na 'm
biadh, agus an corp na 'n t-eud-
ach.

24 Thugaibh fa'near na fith-
ich: oir cha'n 'eil iadsan a' cur
no buain; cha 'n 'eil aca tigh-
tasgaidh no sabhal; agus a ta
Dia 'gam beathachadh: Cia mòr
is feàrr sibhse na 'n eunlaith?

25 Agus cò agaibh-sa, le ro-
chùram, is urrainn aon làmh-
choille a chur r'a àirde féin?

26 Mur 'eil sibh uime sin
comasach air an ni a's lugha a
dhèanamh, c'ar son a ta sibh ro-
chùramach mu nithibh eile?

27 Thugaibh fa'near na liligh-

ean, cionnus a ta iad a' fàs: cha'n 'eil iad a' saothreachadh, no a' sniomh: gidheadh a ta mi ag ràdh ribh, nach robh Solamh féin 'na ghlòir uile, air a sgeadachadh mar aon diubh so.

28 Agus ma tha Dia mar sin a' sgeadachadh an fheoir, a ta 'n diugh sa' mhachair, agus am màireach air a thilgeadh san amhuinn; nach mòr is mò *a sgeadaicheas e* sibhse, O dhaoine air bheag creidimh?

29 Uime sin na iarraibh-sa ciod a dh'itheas sibh, no ciod a dh'òlas sibh, agus na bithibh amharusach.

30 Oir na nithe so uile ta Cinnich an t-saoghail ag iarraidh: ach a ta fhios aig bhur n-Athair-sa gu bheil feum agaibh air na nithibh sin.

31 Ach iarraibh-sa rìoghachd Dhé, agus cuirear na nithe so uile ribh.

32 Na biodh eagal ort, a threud bhig; oir is e deadh thoil bhur n-Athar an rìoghachd a thoirt duibh.

33 Reicibh na bheil agaibh, agus thugaibh déire uaibh: dèanaibh dhuibh féin sporain nach fàs sean, ionmhas nach teirig auns na nèamhaibh, far nach tig gaduiche am fagus, agus nach truail an reudan.

34 Oir ge b'e àit am bheil bhur n-ionmhas, an sin bithidh bhur cridhe mar an ceudna.

35 Biodh bhur leasraidh crioslaichte mu'n cuairt, agus *bhur* lòchrain air an lasadh;

36 Agus sibh féin cosmhuil ri daoineibh a ta feitheamh an Tighearna, 'nuair a philleas e o'n phòsadh; chum air dha teachd agus bualadh, gu'n gràdh-fhosgail iad dha.

37 Is beannaichte na seirbhisich sin, a gheibh an Tighearna, nuair a thig e, ri faire: gu

deimhin a ta mi ag ràdh ribh, gu'n crioslaich se e féin mu'n cuairt, agus gu'n cuir e 'nan suidhe iad chum bìdh, agus gu'n tig e mach agus gu'n dèan e frithealadh dhoibh.

38 Agus ma thig e san dara faire, no ma thig e san treas faire, agus gu'm faigh e *iad* mar sin, is beannaichte na seirbhisich sin.

39 Agus biodh cinnt agaibh air so, nam biodh fhios aig fear an tighe cia an uair anns an tigeadh an gaduiche, gu'n dèanadh e faire, agus nach fuilgeadh e a thigh a bhi air a tholladh troimh.

40 Bithibh-sa uime sin deas mar an ceudna: oir thig Mac an duine 'nuair nach saoil sibh.

41 Agus thubhairt Peadar ris, A Thighearn, an ann ruinne a ta thu labhairt a' chosamhlachd so, no ris gach uile?

42 Agus thubhairt an Tighearn, Cò e uime sin an stiùbhard fìrinneach agus glic sin, a chuireas a Thighearn os ceann a theaghlaich, a thoirt *doibh an* cuibhrinn bìdh 'na àm féin?

43 *Is* beannaichte an seirbhisich sin, a gheibh a Thighearn, an uair a thig e, a' dèanamh mar sin.

44 Gu fìrinneach a ta mi ag ràdh ribh, gu'n cuir se e os ceann na bheil aige.

45 Ach ma their an seirbhisich sin 'na chridhe, Tha mo Thighearn a' cur dàile 'na theachd; agus ma thòisicheas e air na h-òglaich agus na banoglaich a bhualadh, agus itheadh, agus òl, agus a bhi air mhisg:

46 Thig Tighearn an t-seirbhisich sin ann an là nach 'eil sùil aige ris, agus ann an uair nach fios da, agus gearraidh e 'na bhloighdibh e, agus bheir

e a chuibhrionn da maille ris na mì-chreidich.

47 Agus an seirbhiseach sin d'am b'aithne toil a mhaighstir, agus nach d'ulluich e féin, agus nach d'rinn a réir a thoile, buailear e le mòran bhuillean.

48 Ach an tì do nach b'aithne, agus a rinn nithe a b'airidh air buillibh, buailear esan le beagan do bhuillibh. Oir gach neach d'an d'thugadh mòran, iarrar mòran uaith: agus ge b'e ri 'n d'earbadh mòran, iarrar an tuilleadh air.

49 Thàinig mise a chur teine air an talamh, agus ciod is àill leam, ma ta e cheana air fhadadh.

50 Ach a ta baisteadh agam ri bhi air mo bhaisteadh leis, agus cionnus a ta mi air mo theannadh gus an coimhlionar e!

51 Am bheil sibh a' saoil sinn gu'n d'thàinig mise a thoirt sithe air an talamh? ni h-eadh, a ta mi ag ràdh ribh, ach aimhreit.

52 Oir bithidh á so suas cùignear an aon tigh air an roinn, triuir an aghaidh dithis, agus dithis an aghaidh triuir.

53 Bithidh an t-athair air a roinn an aghaidh a' mhic, agus am mac an aghaidh an athar; a' mhàthair an aghaidh na nighinn, agus an nighean an aghaidh na màthar; a' mhàthair-chéile an aghaidh mnà a mic, agus bean a' mhic an aghaidh a màthar-chéile.

54 Agus thubhairt e mar an ceudna ris an t-sluagh, 'Nuair a chi sibh neul ag éirigh san àird an iar, air ball their sibh, A ta fras a' teachd; agus a ta e mar sin.

55 Agus an uair a chi sibh a' ghaoth á deas a' séideadh, their sibh, Bithidh teas ann; agus a ta e tachairt.

56 A chealgairean, is aithne dhuibh breth a thoirt air aghaidh nan speur, agus na talmhainn; ach cionnus nach 'eil sibh a' toirt breth airan aimsirso?

57 Agus c'ar son nach 'eil sibh eadhon uaibh féin a' breithneachadh an ni sin a ta ceart?

58 'Nuair a théid thu maille ri d' eascaraid chum an uachd-arain, dèan dichioll san t-slighe air bhi air do shaoradh uaith; air eagal gu'n tarruing e chum a' bhreithimh thu, agus gu'n toir am breitheamh thairis do'n mhaor thu, agus gu'n tilg am maor am prìosan thu.

59 A ta mi ag ràdh riut, nach téid thu mach as a sin, gus an òc thu eadhon a' pheighinn dheireannach.

CAIB. XIII.

AGUS bha làthair san àm sin daoine àraidh a dh'innis dha mu thimchioll nan Galiléach, muinntir a mheasg Pilat am fuil maille r'an òbairtibh.

2 Agus fhreagair Iosa agus thubhairt e riu, Am bheil sibh a' saoil sinn gu'n robh na Galiléaich sin 'nam peacaich ni's mò na na Galiléaich uile, air son gu'n d'fhulaing iad a leithid so?

3 Ni h-eadh, a ta mi ag ràdh ribh: ach mur dèan sibhse aithreachas, sgriosar sibh uile mar an ceudna.

4 No na h-ochd fir dheug sin air an do thuit an tùr ann an Siloam, agus a mharbh iad, an saoil sibh gu'n robh iadsan 'nam peacaich os ceann nan uile dhaoine a bha 'nan còmhnuidh an Ierusalem?

5 Ni h-eadh, a ta mi ag ràdh ribh: ach mur dèan sibhse aithreachas, sgriosar sibh uile mar an ceudna.

6 Labhair e mar an ceudna an cosamhlachd so: Bha aig duine àraidh crann-fìge suidhichte 'na ghàradh fìona: agus thàinig e ag iarraidh toraidh air, agus cha d'fhuaire e.

7 An sin thubhairt e ris a' ghàradair, Feuch, a ta mi rè thrì bliadhna a' teachd a dh'iarraidh toraidh air a' chrann-fhige so, agus cha'n 'eil mi faotainn a bheag: gearr sìos e, c' ar son a ta e fàsachadh an talmhainn?

8 Agus fhreagair esan agus thubhairt e ris, A Thighearna, leig leis air a' bhliadhna so mar an ceudna, gus an cladhaich mi m' a thimchioll, agus gu'n cuir mi aolach *m'a bhun*:

9 Agus ma ghiùlaineas e toradh, *is maith sin*: ach mar giùlain, 'na dhéigh sin gearraidh tu sìos e.

10 Agus bha e a' teagasg an aon do na sionagogaibh air an t-sàbaid.

11 Agus, feuch, bha bean àraidh a làthair aig an robh spiorad anmhuinneachd rè ochd bliadhna deug, agus bha i air a cromadh ri chéile, agus gun chomas aice air chor sam bith i féin a dhìreachadh.

12 Agus an uair a chunnaic Iosa i, ghairm e d'a ionnsuidh i, agus thubhairt e rithe, A bhean, tha thu air d' fhuasgladh o d' anmhuinneachd.

13 Agus chuir e a làmhan oirre; agus air ball rinneadh dìreach i, agus thug i glòir do Dhia.

14 Agus fhreagair uachdaran na sionagoig, agus e làn do fheirg air son gu'n d'rinn Iosa leigheas air là na sàbaid, agus thubhairt e ris an t-sluagh, Tha sè làithean anns an còir obair a dhèanamh: orra so air an aobhar sin thigibh, agus bithibh air bhur

leigheas, agus na b'ann air là na sàbaid.

15 An sin fhreagair an Tigh-earn e, agus thubhairt e, A chealgair, nach fuasgail gach aon agraibh a dhamh no 'asal o'n phrasaich, agus nach toir e gu uisge e air là na sàbaid?

16 Agus nach bu chòir a' bhean so, a ta 'na nighinn do Abraham, a cheangail Satan a nis rè ochd hliadhna deug, a bhi air a fuasgladh o'n chuibhreach so air là na sàbaid?

17 Agus an uair a thubhairt e na nithe sin, chuireadh a naimhdean uile gu nàire: ach rinn an sluagh uile gairdeachas, air son nan uile nithe glòrmhor a rinneadh leis.

18 An sin thubhairt e, Cò ris a ta rìoghachd Dhé cosmhuil? agus cò ris a shamhlaicheas mi i?

19 Tha i cosmhuil ri gràinne do shìol mustaird, a ghabh duine, agus a chuir e 'na ghàradh: agus dh'fhàs e, agus rinneadh craobh mhòr dheth; agus rinn eunlaith an athair nid 'na geugaibh.

20 Agus thubhairt e a ris, Cò ris a shamhlaicheas mi rìoghachd Dhé?

21 Tha i cosmhuil ri taois ghoirt, a ghabh bean agus a dh'fholaich i an trì tomhasaibh mine, gus an do ghoirticheadh an t-ìomlan.

22 Agus chaidh e troimh gach caithir agus baile beag, a' teagasg, agus a' gabhail na slighe gu Ierusalem.

23 An sin thubhairt neach àraidh ris, A Thighearn, an tearc iad a shaorar? Agus thubhairt esan riu,

24 Dèanaibh spairn chruaidh gu dol a stigh air a' gheata chumhann: oir a ta mi ag ràdh ribh, gu'n iarr mòran dol a stigh, agus nach urrainn iad.

25 O 'n uair a dh'éireas fear an tighe, agus a dhùineas e 'n dorus, agus a thòisicheas sibhse air seasamh a muigh, agus an dorus a bhualadh, ag ràdh, A Thighearn, a Thighearn, fosgail duinn : agus air dhasan freagairt their e ribh, Cha'n aithne dhomh sibh, cò as a ta sibh :

26 An sin tòisichidh sibh air a ràdh, Dh'ith sinn agus dh'òl sinn a' d' làthair, agus theagaisg thu 'nar sràidibh.

27 Ach their esan, A ta mi ag ràdh ribh, cha'n aithne dhomh sibh, cò as a ta sibh ; imichibh uam uile, a luchd-dèanamh na h-eucorach.

28 An sin bithidh gul agus giosgan fhiacal, an uair a ch' sibh Abraham, agus Isaac, agus Iacob, agus na fàidhean uile ann an rìoghachd Dhé, agus sibh féin air bhur tilgeadh a mach.

29 Agus thig iad o'n àird an ear, agus o'n àird an iar, agus o'n àirde tuath agus deas, agus suidhidh iad ann an rìoghachd Dhé.

30 Agus, feuch, a ta daoine air dheireadh a bhitheas air thoiseach, agus air thoiseach a bhitheas air dheireadh.

31 Air an là sin féin thàinig Phairisich àraidh d'a ionnsuidh, ag ràdh ris, Gabh a mach agus imich á so : oir tha toil aig Herod do mharbhadh.

32 Agus thubhairt e riu, Imichibh agus innsibh do'n t-sionnach sin, Feuch, a ta mi tilgeadh mach dheamhan, agus a ta mi dèanamh leigheas an diugh, agus am màireach, agus air an treas là bithidh mi air mo dhèanamh foirfe.

33 Gidheadh, is éigin domh imeachd an diugh agus am màireach, agus an là 'na dhéigh sin : oir cha'n fheud e bhi gu'n cuir-

ear fàidh gu bàs a mach á Ierusalem.

34 A Ierusalem, a Ierusalem, a mharbhas na fàidhean, agus a chlachas an dream a chuirear a d'ionnsuidh : cia minic a b'àill leam do chlann a chruinneachadh, mar a *chruinnicheas* ceare a h-àlach fuidh a sgiathaibh, agus cha b'àill leibh !

35 Feuch, dh'fhàgadh bhur tigh fàs agaibh : agus gu deimhin a ta mi ag ràdh ribh, nach faic sibh mise, gus an tig an t-àm, anns an abair sibh, Is beannaichte an tì a thig an ainm an Tighearna.

CAIB. XIV.

A GUS thàrladh, an tràth chaidh e gu tigh uachdairain àraidh do na Phairisich a dh'itheadh bìdh air là na sàbaid, gu'n robh iad a' dèanamh geur-fhaire air.

2 Agus, feuch, bha duine àraidh 'na làthair air an robh a' mheud-bhronn.

3 Agus fhreagair Iosa, agus labhair e ris an luchd-lagha, agus ris na Phairisich, ag ràdh, Am bheil e ceaduichte leigheas a dhèanamh air là na sàbaid ?

4 Ach dh'fhan iadsan 'nan tosd. Agus air dha breith air, leighis se e, agus leig e uaith e :

5 Agus fhreagair e iadsan, ag ràdh. Cò agaibh-sa, ma thuit-eas 'asal no a dhamh ann an slochd, nach tarruing a mach gu grad e air là na sàbaid ?

6 Agus cha b'urrainn iad a fhreagairt a ris anns an nithibh sin.

7 Agus labhair e cosamhlachd riu-san a fhuair cuireadh, 'nuair a thug e fa'near mar a thagh iad na ceud àiteacha-suidhe, ag ràdh riu,

8 'Nuair a gheibh thu cuir-

eadh o neach air bith chum bainnse, na suidh anns a' cheud àit; air eagal gu'n d' fhuair duine a's urramaiche na thusa cuireadh uaith;

9 Agus gu'n tig an tì a thug cuireadh dhuitse agus dhasan, agus gu'n abair e riut, Thoir àit do'n duine so; agus gu'n tòisich thusa an sin le nàire air suidhe anns an àit a's ìsle.

10 Ach an uair a gheibh thu cuireadh, imich agus suidh anns an àit a's ìsle; chum, 'nuair a thig esan a thug cuireadh dhuit, gu'n abair e riut, A charaid, suidh suas ni 's àirde: an sin gheibh thu urram an làthair na muinntir a ta 'nan suidhe air bòrd maille riut.

11 Oir ge b'e neach a dh'àrd- aicheas e féin, islichear e; agus ge b' e neach a dh'islicheas e féin, àrdaichear e.

12 An sin thubhairt e ris an tì mar an ceudna a thug cuireadh dha, 'Nuair a nì thu dìnn-eir no suipeir, na gairm do chàirdean, no do bhràithre, no do luchd-dàimh, no do choimh- earsnaich shaoibhir; air eagal gu'n toir iadsan mar an ceudna cuireadh dhuitse a ris, agus gu'm faigh thu a' chomain cheudna.

13 Ach an uair a nì thu cuirm, gairm na bochdan, na daoine ciurramach, na bacaich, na doill:

14 Agus bithidh tu beannaichte, a chionn nach urrainn iad a' chomain cheudna thoirt duit: oir gheibh thu comain ann an aiseirigh nam firean.

15 Agus an uair a chual aon do na shuidh maille ris air bòrd na nithe sin, thubhairt e ris, Is beannaichte an tì sin a dh'ith- eas aran ann an rioghachd Dhé.

16 Ach thubhairt esan ris, Rinn duine àraidh suipeir mhòr,

agus thug e cuireadh do mhòr- an:

17 Agus chuir e a sheirbhis- each uaith an àm na suipeir a ràdh ris a' mhuinntir a fhuair cuireadh, Thigibh, oir a ta na h-uile nithe a nis ullamh.

18 Agus thòisich iad uile a dh'aon *ghuth* air an leithsgeul a ghabhail. Thubhairt an ceud fhear ris, Cheannaich mi fear- ann, agus is éigin domh dol a mach agus fhaicinn: tha mi ag guidhe ort, gabh mo leiths- geul.

19 Agus thubhairt fear eile, Cheannaich mi cùig cuing dhamh, agus a ta mi dol g'an dearbhadh: tha mi ag guidhe ort, gabh mo leithsgeul.

20 Agus thubhairt fear eile, Phòs mi bean, agus air an aobh- ar sin cha 'n 'eil e 'n comas domh teachd.

21 Agus thàinig an seirbhis- each sin, agus dh'innis e na nithe sin d'a thighearn. An sin air gabhail feirge do fhear an tighe, thubhairt e r'a sheirbhis- each Gabh a mach gu grad gu sràidibh agus gu caol-shràid- ibh a' bhaile, agus thoir a stigh an so na bochdan, agus na daoine ciurramach, agus na bacaich, agus na doill.

22 Agus thubhairt an seirbh- iseach, A Thighearn, rinneadh mar a dh'òrduich thu, gidheadh tha àite *falamh* ann fathast.

23 Agus thubhairt an Tigh- earna ris an t-seirbhiseach, Gabh a mach gus na rathaidibh mòra agus na gàrachaibh, agus co-éignich iad gu teachd a steach, chum gu'm bì mo thigh air a lionadh.

24 Oir a ta mi ag ràdh ribh, nach blais aon do na daoinibh ud a fhuair cuireadh, do m' shuipeir-sa.

25 Agus bha sluagh mòr ag

imeachd maille ris: agus air dha tionndadh, thubhairt e riu,

26 Ma thig neach air bith a m'ionnsuidh-sa, agus nach fuath-aich e' athair, agus a mhàth-air agus a bhean-phòsda, agus a chlann, agus a hhràithrean, agus a pheathraichean, seadh, agus a bheatha mar an ceudna, cha'n 'eil e'n comas da bhi 'na dheisciobul dhomh-sa.

27 Agus ge b' e neach nach giùlain a chrann-cèusaidh, agus nach lean mise, cha'n 'eil e 'n comas da bhi 'na dheisciobul dhomh-sa.

28 Oir cò am fear agaibh-sa leis am miann tùr a thogail, nach suidh sìos air tùs, agus nach meas an costus, a dh'fheuchainn am bheil aige na chuireas crìoch air?

29 Air eagal an déigh dha a bhunadh a leagadh, agus gun bhi comasach air crìoch a chuir air, gu'n tòisich na h-uile a chì e ri fanoid air,

30 Ag ràdh, Thòisich an duine so air *tigh* a thogail, agus cha b'urrainn e a chrìochnachadh.

31 No cò an rìgh, ag dol a mach dha gu cogadh an aghaidh rìgh eile, nach suidh sìos air tùs, agus nach gabh comhairle, a dh'fheuchainn an urrainn e le deich mìle coinneamh a thoirt dasan a ta teachd le fichead mìle 'na aghaidh?

32 No air bhi dhasan fathast fad uaith, cuiridh e teachdair-eachd a dh'iarraidh cumhachan sìthe.

33 Mar sin mar an ceudna, gach neach agaibh-sa, nach tréig na h-uile nithe a ta aige, cha'n 'eil e'n comas da bhi 'na dheisciobul dhomh-sa.

34 *Tha* 'n salann maith: ach ma chailleas an salann a bhlas,

ciod e leis an dèanar deadhbhlasda e?

35 Cha'n 'eil e iomchuidh chum an talmhainn, no chum an dùnain; *ach* tilgidh daoine mach e. An tì aig am bheil cluasa chum éisdeachd, éisdeadh e.

CAIB. XV.

AN sin thàinig na cìs-mhaoir uile agus na peacaich am fagus da, chum éisdeachd ris.

2 Agus rinn na Phairisich agus na sgrìobhaichean gearan, ag ràdh, Tha am fear so gabhail pheacach d'a ionnsuidh, agus ag itheadh maille riu.

3 Agus labhair esan an cos-amhlachd so riu, ag ràdh,

4 Cò an duine dhibhse aig am bheil ceud caora, ma chaill-eas e aon diubh, nach fàg an naoi deug agus an ceithir fich-ead anns an fhàsach, agus nach téid an déigh na caorach a chailleadh, gus am faigh e i?

5 Agus air dha a faotainn, cuiridh e air a ghuaillibh i le gairdeachas.

6 Agus an uair a thig e dhachaidh, gairmidh e a chàird-ean agus a choimhearsnaich an ceann a chéile, ag ràdh riu, Dèanaibh gairdeachas maille rium-sa, a chionn gu'n d'fhuair mi mo chaora bha caillte.

7 Mar sin, a ta mi ag ràdh ribh, gu'm bì aoibhneas air nèamh air son aoin pheacaich a nì aithreachais, nì 's mò na air son naoi deug agus ceithir fich-ead firean, aig nach 'eil feum air aithreachas.

8 No cò a' bhean aig am bheil deich buinn airgid, ma chaill-eas i aon bhonn diubh, nach las coinneal, agus nach sguab an tigh, agus nach iarr gu dìchiollach gus am faigh i e?

9 Agus air dh'i fhaotainn,

gairmidh i a ban-chàirdean agus a ban-choimhearsnaich an ceann a chéile, ag ràdh, Dèanaibh gàirdeachas leam-sa, oir fhuair mi am bonn a chaill mi.

10 Mar an ceudna a ta mi ag ràdh ribh, A ta gàirdeachas an làthair aingle Dhé, air son aoin pheacaich a nì aithreachas.

11 Agus thubhairt e, Bha aig duine àraidh dithis mhac:

12 Agus thubhairt am mac a b' òige dhiubh r'a athair, Athair, thoir dhomh-sa a' chuid-roinn a thig orm do d' mhaoin. Agus roinn e eatorra a bheathachadh.

13 Agus an déigh beagain do làithibh, chruinnich am mac a b'òige a chuid uile, agus ghabh e a thurus do dhùthaich fad air astar, agus an sin chaith e a mhaoin le beatha struidheas-aich.

14 Agus an uair a chaith e a chuid uile, dh'éirich gorta ro mhòr san tìr sin; agus thòisich e ri bhi ann an uireasbhuidh.

15 Agus chaidh e agus cheangail se e féin ri aon do shaordhaoineibh na dùthcha sin; agus chuir e d'a fhearann e, a bhiadh-adh mhuc.

16 Agus bu mhiann leis a bhrù a lìonadh do na plaosgaibh a bha na mucan ag itheadh; ach cha d'thug neach air bith dha.

17 Agus an uair a thàinig e d'a ionnsuidh féin, thubhairt e, Cia lion do luchd-tuarasdail m'athar-sa aig am bheil aran gu leoir agus r'a sheachnadh, 'nuair a ta mise a' bàsachadh le gorta?

18 Eiridh mi, agus théid mi dh'ionnsuidh m'athar, agus their mi ris, Athair, pheacaich mi an aghaidh fhlaithceanais, agus a' d' làthair-sa.

19 Agus cha'n airidh mi tuilleadh gu 'n goirte do mhac-sa dhìom: dèan mi mar aon do d' luchd-tuarasdail.

20 Agus dh'éirich e, agus chaidh e dh'ionnsuidh 'athar. Ach air dha bhi fathast fad uaith, chunnaic 'athair e, agus ghabh e truas mòr *dheth*, agus ruith e, agus thuit e air a mhuineal, agus phòg se e.

21 Agus thubhairt am mac ris, Athair, pheacaich mi an aghaidh fhlaithceanais, agus a' d' làthair-sa, agus cha'n airidh mi tuilleadh gu'n goirte do mhac dhìom.

22 Ach thubhairt an t-athair r' a sheirbhisich, Thugaibh a mach a' chulaidh a 's fearr, agus cuiribh uime i; agus cuiribh fàinne air a làimh, agus brògan air a chosaibh.

23 Agus thugaibh an so an laogh biadhta, agus marbhaibh e; agus itheamaid agus biomaid subhach:

24 Oir bha mo mhac so marbh, agus tha e beò a ris; bha e caillte, agus fhuaradh e. Agus thòisich iad air bhi subhach.

25 A nis bha a mhac bu shine mach san fhearann: agus an uair a thàinig e, agus a thàr e am fagus do'n tigh, chual e an ceòl agus an dannsa.

26 Agus ghairm e d' a ionnsuidh aon do na h-òglaich, agus dh'fhiosraich e ciod bu chiall do na nithibh sin.

27 Agus thubhairt esan ris, Thàinig do bhràthair; agus mharbh t'athair an laogh biadhta a chionn gu'n d'fhuair e ris slàn fallain e.

28 Agus ghabh esan fearg, agus cha b'aill leis dol a stigh: air an aobhar sin thàinig 'athair a mach, agus chuir e impidh air.

29 Ach fhreagair esan agus thubhairt e r'a athair, Feuch, a ta mise a' dèanamh seirbhis duit an uiread so do bhliadhnach-aibh, agus uair air bith cha do bhris mi t'àithne, gidheadh cha

d'thug thu meann riamh dhomh, chum gu'm bithinn subhach maille ri m' chàirdibh.

30 Ach an uair a thàinig do mhac so, a dh'ith suas do bheathachadh maille ri strìopaichibh, mharbh thu an laogh biadhtha dha.

31 Agus thubhairt e ris, A mhic, tha thusa a ghnàth maille rium, agus na h-uile nithe a's leamsa, is leatsa iad.

32 Bu chòir dhuinn a bhi subhach, agus aoibhneach; oir bha do bhràthair so marbh, agus tha e beò a ris; agus bha e cailte, agus fhuaradh e.

CAIB. XVI.

A GUS thubhairt e mar an ceudna r' a dheiscioblubh, Bha duine saoi bhir àraidh ann aig an robh stiùbhard; agus chasaideadh ris e, mar neach a bha dèanamh ana-caithidh air a mhaoin.

2 Agus ghairm se e, agus thubhairt e ris, Ciod e so a ta mi cluinntinn mu d' thimchioll? thoir cunntas air do stiùbhardachd; oir cha'n fheud thu bhi ni's faide a' d' stiùbhard.

3 An sin thubhairt an stiùbhard ann féin, Ciod a nì mi? oir a ta mo mhaighstir a' toirt na stiùbhardachd uam: cha'u urrainn mi ruamhar a dhèanamh, is nàr leam déire iarraidh.

4 A ta fhios agam ciod a nì mi, chum 'nuair a chuirear as an stiùbhardachd mi, gu 'n gabh iad a steach d'an tighibh mi.

5 Agus air dha gach aon diubhsan air an robh fiachan aig a Thighearn a ghairm d' a ionnsuidh, thubhairt e ris a' cheud fhear, Cia meud a ta aig mo Thighearn ortsa?

6 Agus thubhairt esan, Ceud tomhas oladh. Agus thubhairt e ris, Gabh do sgrìobhadh, agus

suidh sìos gu h-ealamh, agus sgrìobh leth-cheud.

7 An sin thubhairt e ri fear eile, Agus cia meud a ta aig ortsa? Agus thubhairt esan, Ceud tomhas cruithneachd. Agus thubhairt e ris, Gabh do sgrìobhadh, agus sgrìobh ceithir fichead.

8 Agus mhol an Tighearn an stiùbhard eucorach, do bhrìgh gu'n d'rinn e gu glic: oir a ta clann an t-saoghail so 'nan ginealach féin ni's glìce na clann an t-soluis.

9 Agus a ta mise ag ràdh ribh, Dèanaibh dhuibh féin càird-ean le Mamon na h-eucorach; chum 'nuair a shiubhlas sibh, gu'n gabhar sibh do àitibh-còmh-nuidh sìorruidh.

10 An tì a ta firinneach anns an ni a's lugha, tha e fìrinneach mar an ceudna ann am mòran; agus an tì a ta eucorach anns an ni a's lugha, tha e eucorach ann am mòran mar an ceudna.

11 Air an aobhar sin mur robh sibh fìrinneach anns an t-saoibhreas eucorach, cò a dh'earbas ribh an *saoibhreas* fìor?

12 Agus mur robh sibh fìrinneach ann an cuid duine eile, cò a bheir dhuibh an ni a's leibh féin?

13 Cha'n 'eil seirbhiseach sam bith comasach air seirbhis a dhèanamh do dhà thighearn; oir an dara cuid fuathaichidh e aon diubh, agus bheir e gràdh do'n fhear eile; no gabhaidh e le aon diubh agus nì e tàir air an fhear eile. Cha'n 'eil sibh comasach air seirbhis a dhèanamh do Dhia agus do Mhamon.

14 Agus chuala na Phairisich, a bha sanntach, na nithe sin uile: agus rinn iad fanoid air.

15 Agus thubhairt e riu, Is sibhse an dream a ta 'gur

fìreanachadh féin am fianuis dhaoine; ach is aithne do Dhia bhuir cridheachan: oir an ni sin a ta ro mheasail aig daoineibh, is gràineileachd e am fianuis Dé.

16 *Bha* an lagh agus na fàidhean ann gu teachd Eoin: o sin tha rioghachd Dhé air a searmonachadh, agus a ta gach duine a' dol le dian strì a steach innte.

17 Agus is usadh do nèamh agus do'n talamh dol thairis, na do aon lide do'n lagh tuiteam.

18 Gach neach a chuireas uaith a bhean, agus a phòsas bean eile, tha e dèanamh adhaltrannais: agus ge b' e neach a phòsas a' bhean a chuireadh air falbh o a fear, tha e dèanamh adhaltrannais.

19 Bha duine saoi bhir àraidh ann, a bha air a sgeadachadh le purpur agus lion-eudach grinn, agus *bla e* caitheadh a beatha gach là gu sòghail le mòrghreadhnachas:

20 Agus bha duine bochd àraidh ann, d'am b'ainm Lasarus, a chuireadh 'na luidhe aig a dhorus, làn do chreuchdaibh,

21 Agus bu mhiann leis bhi air a shàsachadh leis an sbruil-each a bha tuiteam o bhòrd an duine shaoibhir: seadh, agus thàinig na madraidh agus dh'imlich iad a chreuchdan.

22 Agus thàrladh gu'n d'fhuaire an duine bochd bàs, agus gu'n do ghiùlaineadh leis na h-ainglibh e gu uchd Abraham: fhuair an duine saoi bhir bàs mar an ceudna, agus dh'adhlaiceadh e.

23 Agus ann an ifrinn thog e suas a shùilean, air dha bhi ann am piantaibh, agus chunnaic e Abraham fad uaith, agus Lasarus 'na uchd.

24 Agus ghlaodh e, agus thubhairt e, Athair Abraham, dèan tròcair orm, agus cuir Las-

arus, chum gu'n tum e bàrr a mheoir ann an uisge, agus gu'm fuaraich e mo theangadh; oir a ta mi air mo ro-phianadh san las-air so.

25 Ach thubhairt Abraham, A mhic, cuimhnich gu'n d'fhuaire thusa do nithe maithe ri àm dhuit bhi beò, agus Lasarus mar an ceudna droch nithe: ach a nis a ta esan a' faotainn sòlais, agus a ta thusa air do phianadh.

26 Agus a bhàrr air so uile, tha doimhne mhòr air a cur eadar sinne agus sibhse, air chor agus iadsan le am b'àill dol á so do 'ur ionnsuidh-sa, nach 'eil e 'n comas doibh; agus nach mò tha e 'n comas do aon neach teachd á sin d'ar n-ionnsuidhne.

27 An sin thubhairt e, Uime sin tha mi a' guidhe ort, athair, gu'n cuireadh tu e gu tigh m'athar:

28 Oir a ta cùignear bhràithrean agam; chum gu'n toir e fianuis doibh, air eagal gu'n tig iadsan mar an ceudna do'n ionad ro phiantach so.

29 Thubhairt Abraham ris, Tha Maois agus na fàidhean aca, éisdeadh iad riu-san.

30 Agus thubhairt esan, Ni h-eadh, Athair Abraham: ach ma théid neach d'an ionnsuidh o na marbhaibh, nì iad aithreachas.

31 Agus thubhairt e ris, Mur éisd iad ri Maois agus ris na fàidhibh, cha mhò a chreideas iad, ged éireadh neach o na marbhaibh.

CAIB. XVII.

AN sin thubhairt e r' a dheisciobluibh, Cha'n fheudar nach tig oilbheuman: ach is an-aioibhinn *dasan* troimh an tig iad.

2 B'fheàrr dha gu'm biodh clach-mhuilinn air a crochadh m'a mhuineal, agus gu'm biodh e air a thilgeadh san fhairge, na gu'n tugadh e oilbheum do aon neach do'n mhuinntir bhig so.

3 Thugaibh an aire dhuibh féin: ma pheacaicheas do bhràthair a'd' aghaidh, cronuich e; agus ma ghabhas e aithreachas, thoir maitheanas da.

4 Agus ma pheacaicheas e a'd' aghaidh seachd uairean san là, agus gu'm pill e riut seachd uairean san là, ag ràdh, Tha aithreachas orm; thoir maith-eanas da.

5 Agus thubhairt na h-abstoil ris an Tighearn, Meudaich ar creidimh.

6 Agus thubhairt an Tighearn, Nam biodh agaibh creidimh mar ghràinne do shìol mustaird, theireadh sibh ris a' chraoibh Shicamin so, Bì air do spionadh as do fhreumhaibh, agus bì air do shuidheachadh sa' chuan; agus bhitheadh i ùmhal duibh.

7 Ach cò agaibh-sa aig am bheil seirbhiseach a' treabhadh, no ri buachailleachd, a their ris, an déigh dha teachd a steach o'n fhearann, Thig air ball, agus suidh sìos chum bìdh?

8 Agus nach dòchadh e ràdh ris, Ulluich ni a ghabhas mise gu m' shuipeir, agus crioslaich thu féin, agus fritheil domh, gus an ith agus an òl mi; agus 'na dhéigh sin ithidh agus òlaidh tusa?

9 An toir e buidheachas do'n t-seirbhiseach sin do bhrìgh gu'n d'rinn e na nithe a dh'òrd-uicheadh dha? cha saoil mi gu'n toir.

10 Mar sin sibhse, 'nuair a ni sibh na h-uile nithe a dh'àithn-eadh dhuibh, abraibh, Is seirbh-isich neo-tharbhach sinn: oir

rinn sinn a mhàin an ni bu dligh-each dhuinn a dhèanamh.

11 A nis, ag dol suas da gu Ierusalem, chaidh e troimh mheadhon Shamaria agus Ghalile.

12 Agus an uair a bha e dol a stigh do bhaile àraidh, thachair deichnear dhaoine air a bha 'nan lobhair, a sheas fad uaith:

13 Agus thog iad suas an guth, ag ràdh, Iosa, a mhaighstir, dèan tròcair oirnn.

14 Agus an uair a chunnaic e iad, thubhairt e riu, Imichibh, nochdaibh sibh féin do na sagartaibh. Agus ag imeachd dhoibh, ghlanadh iad.

15 Agus an uair a chunnaic aon diubh gu'n do leighiseadh e, phill e air ais, a' toirt glòire do Dhia le guth àrd,

16 Agus thuit e air aghaidh aig a chosaibh-san, a' toirt buidheachais da: agus bu Shamaritanach e.

17 Agus fhreagair Iosa agus thubhairt e, Nach do ghlanadh deichnear? ach an naoinear, c'àit am bheil iad?

18 Cha d'fhuaradh a phill a thoirt glòire do Dhia, ach an coigreach so.

19 Agus thubhairt e ris, Eirich, imich; shlànuich do chreidimh thu.

20 Agus an uair a dh'fheòraich na Phairisich dheth, c'uin' a thigeadh rìoghachd Dhé, fhreagair e iad agus thubhairt e, Cha tig rìoghachd Dhé air chor gu faicear i.

21 Cha mhò a their iad, Feuch an so, no, Feuch an sin: oir feuch, a ta rìoghachd Dhé an taobh a stigh dhibh.

22 Agus thubhairt e ris na deisciobluibh, Thig na làithean anns am miannach leibh aon do làithibh Mhic an duine fhaicinn, agus cha'n fhaic sibh e.

23 Agus their iad ribh, Feuch an so, no, Feuch an sud: na rachaibh, agus na leanaibh iad.

24 Oir mar a ta an dealan-ach a dhealraicheas o aon *ionad* fo nèamh, a' soillseachadh gus an *ionad* eile fo nèamh, mar sin a bhitheas Mac an duine mar an ceudna 'na là féin.

25 Ach is éigin da air tùs mòran do nithibh fhulang, agus a bhi air a dhiùltadh leis a' ghinealach so.

26 Agus mar a bha e ann an làithibh Noe, mar sin mar an ceudna bithidh e ann an làithibh Mhic an duine:

27 Bha iad ag itheadh agus ag òl, a' pòsadh agus air an toirt am pòsadh, gus an là an deachaidh Noe a steach do 'n àire: agus thàinig an dìle, agus sgrios i iad uile.

28 Amhuil fòs mar a thach-air ann an làithibh Lot; bha iad ag itheadh agus ag òl, a' ceannach agus a' reiceadh, a' planndachadh agus a' togail aitreabh:

29 Ach air an là sin féin anns an deachaidh Lot a mach á Sodom, fhrasadh teine agus pronnasg o nèamh, agus sgrios e iad uile.

30 Is ann mar sin a bhitheas anns an là am foillsichear Mac an duine.

31 Anns an là sin, an tì bhios air mullach an tighe, agus 'air-neis anns an tigh, na tigeadh e nuas gu a toirt leis: agus an tì a ta sa' mhachair, na pilleadh esan air ais mar an ceudna.

32 Cuimhnichibh bean Lot.

33 Ge b' e neach a dh'iarras a bheatha féin a thèarnadh, caillidh e i; agus ge b' e neach a chailleas a bheatha, gléidhidh esan i.

34 A ta mi ag ràdh ribh, anns an oidhe sin bithidh dithis

dhaoine san aon leabaidh; gabhar aon diubh, agus fàgar am fear eile.

35 Bithidh dithis bhan a' bleath cuideachd; gabhar aon diubh agus fàgar a' bhean eile.

36 Bithidh dithis dhaoine anns a' mhachair; gabhar aon diubh agus fàgar am fear eile.

37 Agus fhreagair iadsan agus thubhairt iad ris, C'ait, a Thighearn? agus thubhairt esan riu, Ge b' e àit *am bì* an corp, an sin cruinnichear na h-iolairean.

CAIB. XVIII.

A GUS labhair e cosamhlachd riu, a' nochdadh gur còir ùrnuigh a dhèanamh a ghnàth, agus gun fhannachadh;

2 Ag ràdh, Bha breitheamh ann am baile *àraidh*, air nach robh eagal Dé, agus aig nach robh urram do dhuine:

3 Agus bha bantrach *àraidh* sa' bhaile sin, agus thàinig i d'a ionnsuidh, ag ràdh, Cum còir rium an aghaidh mo nàmhaid.

4 Agus cha b'àill leis rè tam-uill: ach 'na dhéigh sin thubhairt e an féin, Ged nach 'eil eagal Dé orm, no urram agam do dhuine;

5 Gidheadh air son gu bheil a' bhantrach so cur dragha orm, cumaidh mi còir rithe, air eagal le a sìr-theachd gu'n sgithich i mi.

6 Agus thubhairt an Tighearn, Eisdibh ciod a ta am breitheamh eucorach ag ràdh.

7 Agus nach dèan Dia dìoghaltas air son a dhaoine taghta féin, a ta ag éigheach ris a là agus a dh'oidheche, ged tha e fad-fhulangach mu'n timchioll?

8 A ta mi ag ràdh ribh gu'n dèan e dìoghaltas air an son gu luath. Gidheadh, an uair a thig mac an duine, am faigh e creidimh air an talamh?

9 Agus labhair e an cosamhlachd so ri dream àraidh a bha 'g earbsadh asda féin gu'n robh iad 'nam fireanaibh, agus a bha dèanamh tàir air dream eile:

10 Chaidh dithis dhaoine suas do'n teampull a dhèanamh ùrnuigh; fear diubh 'na Phairiseach, agus am fear eile 'na chis-mhaor.

11 Sheas am Phairiseach leis féin, agus rinn e ùrnuigh mar so, A Dhé, tha mi toirt buidheachais duit nach 'eil mi mar a ta daoine eile, 'nan luchd-foir-eigin, eucorach, adhaltrannach, no eadhon mar an cis-mhaor so.

12 Tha mi a' trasgadh dà uair san t-seachduin, tha mi toirt deachaimh as na h-uile nithibh a ta mi sealbhachadh.

13 Agus air seasamh do'n chis-mhaor fad air ais, cha b'àill leis fiu a shùl a thogail suas gu nèamh, ach bhual e 'uchd, ag ràdh, A Dhia, dèan tròcair orm-sa ta am pheacach.

14 A ta mi ag ràdh ribh, gu'n deachaidh am fear so sìos d'a thigh air fhìreanachadh ni's mò na 'm fear ud eile: oir ge b'e neach a dh'àrdaicheas e féin, islichear e; agus ge b'e a dh'islicheas e féin, àrdaichear e.

15 Agus thug iad d' a ionnsuidh mar an ceudna naoidheana, chum gu'm beanadh e riu: agus an uair a chunnaic na deisciobuil so, chronuich siad iad.

16 Ach air do Iosa an gairm d' a ionnsuidh, thubhairt e, Fuilgibh do na leanabaibh teachd a m' ionnsuidh-sa, agus na bacaibh iad: oir is ann d'an leithidibh so a ta rìoghachd Dhé.

17 Gu deimhin a ta mi ag ràdh ribh, ge b' e nach gabh rìoghachd Dhé mar leanabh

beag, nach téid e air chor sam bith a steach innte.

18 Agus dh'fheòraich uachdaran àraidh dheth, ag ràdh, A mhaighstir mhaith, ciod a nì mi chum gu sealbhaich mi a' bheatha mhaireannach?

19 Agus thubhairt Iosa ris, C'ar son a ghoireas tu maith dhìomsa? cha'n 'eil neach sam bith maith ach a h-aon, eadhon Dia.

20 Is aithne dhuit na h-àitheanta. Na dèan adhaltrannas, Na dèan mortadh, Na goid, Na toir fianuis bhréige, Thoir urram do t'athair agus do d' mhàthair.

21 Agus thubhairt esan, Choimhid mi iad sin uile o m' òige.

22 Agus an uair a chual Iosa so, thubhairt e ris, Tha aon ni fathast a dh'uireasbhuidh ort: reic na h-uile nithe a ta agad, agus roinn air na bochdaibh, agus bithidh agad ionmhas air nèamh; agus thig, agus lean mise.

23 Agus an uair a chual e so, bha e ro dhoilich: oir bha mòr-bheartas aige.

24 Agus an uair a chunnaic Iosa gu'n robh e làn tuirse, thubhairt e, Cia deacair dhoibhsan aig am bheil saoihbreas, dol a steach do rìoghachd Dhé!

25 Oir is usadh do chàmhail dol troimh chrò snàthaid, na do dhuine saoihbhir dol a steach do rìoghachd Dhé.

26 Agus thubhairt iadsan a chuala so, Cò ma seadh a dh'fheudas bhì air a shaoradh?

27 Ach thubhairt esan, Na nithe a ta eu-comasach do dhaoineibh, tha iad comasach do Dhia.

28 An sin thubhairt Peadar, Feuch, thréig sinne na h-uile nithe, agus lean sinn thusa.

29 Agus thubhairt esan riu, Gu deimhin a ta mi ag ràdh ribh, nach 'eil aon neach a thréig tigh, no pàrantan, no bràithrean, no bean-phòsda, no clann air son rìoghachd Dhé,

30 Nach faigh mòran ni 's mò anns an aimsir so a ta làthair, agus anns an t-saoghal a ta ri teachd a' bheatha mhaireannach.

31 Agus ghabh e an dà fhear dheug d'a ionnsuidh, agus thubhairt e riu, Feuch, a ta sinn a' dol suas gu Ierusalem, agus bithidh na h-uile nithe a ta sgrìobhta leis na fàidhibh mu Mhac an duine, air an coimhlionadh.

32 Oir bheirear thairis e do na Cinnich, agus théid fanoid a dhèanamh air, agus masluichear e, agus tilgear smugaid air;

33 Agus sgiùrsaidh agus marbhaidh iad e: agus air an treas là éiridh e a ris.

34 Agus cha do thuig iadsan aon ni dhiubh so: agus bha na briathra so foluichte orra, agus cha b'aithne dhoibh na nithe a chaidh labhairt.

35 Agus thàrladh, 'nuair a dhruid e ri Iericho, gu'n robh dall àraidh 'na shuidhe ri taobh na slighe, ag iarraidh déirce;

36 Agus air cluinntinn an t-sluaigh a' dol seachad, dh'fhiosraich e ciod e so.

37 Agus dh'innis iad da, gu'm b' e Iosa o Nasaret a bha gabhail seachad.

38 Agus ghlaodh e, ag ràdh, Iosa, Mhic Dhaibhidh, dèan tròcair orm.

39 Agus chronuich iadsan a bha air thoiseach e, chum gu'm biodh e 'na thosd: ach bu mhòid gu mòr a ghlaodh esan, A Mhic Dhaibhidh, dèan tròcair orm.

40 Agus air seasamh do Iosa, dh'àithn e a thoirt d'a ionnsuidh:

agus an uair a thàinig e am fagus da, dh'fhiosraich e dheth,

41 Ag ràdh, Ciod is àill leat mise a dhèanamh dhuit? agus thubhairt esan, a Thighearn, mi dh'fhaotainn mo radhairc.

42 Agus thubhairt Iosa ris, Faigh do radharc: shlànuich do chreidimh thu.

43 Agus air ball fhuair e a radharc, agus lean se e, a' toirt glòire do Dhia: agus thug an sluagh uile cliù do Dhia, 'nuair a chunnaic iad so.

CAIB. XIX.

A GUS air do Iosa dol a steach, chaidh e troimh Iericho.

2 Agus, feuch, bha duine ann d'am b'ainm Sacheus, agus b'ard chis-mhaor esan, agus bha e saoi bhir:

3 Agus bha déidh aige air Iosa fhaicinn, cò e; agus cha b'urrainn e air son an t-sluaigh, a chionn gu'n robh e iosal 'na phearsa.

4 Agus ruith e roimhe, agus streap e suas ann an craoibh Shicamoir, chum gu faiceadh se e; oir bha e gus an t-slighe sin a ghabhail.

5 Agus an uair a thàinig Iosa chum an àite sin, air dha amharc suas, chunnaic se e, agus thubhairt e ris, A Shacheuis, thig a nuas gu grad; oir is éigin domh-sa stad an diugh aig do thigh.

6 Agus thàinig e nuas le cabhaig, agus ghabh e ris gu subhach.

7 Agus an uair a chunnaic iad so, rinn iad uile gearan, ag ràdh, Gu'n deachaidh e steach air aoidheachd gu duine a ta 'na pheacach.

8 Agus sheas Sacheus agus thubhairt e ris an Tighearn, Feuch, a Thighearn, a ta mi toirt leth mo mhaoin do na

bochdaibh : agus ma thug mi aon ni o neach air bith le casaid bhréige, tha mi toirt *dha* a cheithir uiread.

9 Agus thubhairt Iosa ris, Thàinig slàinte an diugh a dh'ionnsuidh an tighe so, do bhrìgh gur mac do Abraham esan mar an ceudna.

10 Oir thàinig Mac an duine a dh'iarraidh agus a thèarnadh an ni sin a bha cailte.

11 Agus ag cluinntinn nan nithe sin dhoibh, chuir e ris, agus labhair e cosamhlachd, do bhrìgh gu'n robh e am fagus do Ierusalem, agus gu'n do shaoil iadsan gu'm biodh rìoghachd Dhé air a grad-fhoillseachadh.

12 Air an aobhar sin thubhairt e, Chaidh duine uasal àraidh do dhùthaich fad as a dh'fhaotainn rìoghachd dha féin, agus a philltinn air ais.

13 Ach ghairm e a dheich seirbhisich, agus thug e dhoibh deich puind, agus thubhairt e riu, Cuiribh gu buil iad, gus an tig mise.

14 Ach bha fuath aig muinntir a dhùthcha dha, agus chuir iad teachdaireachd 'na dhéigh, ag ràdh, Cha'n àill leinn an duine so bhì 'na rìgh oirnn.

15 A nis an uair a phill e air ais, an déigh dha an rìoghachd fhaotainn, an sin dh'òrduich e na seirbhisich ud bhì air an gairm d'a ionnsuidh, d'an d'thug e an t-airgiod, chum gu'm biodh fhios aige ciod a bhuannaich gach aon diubh leis a bhuileachadh.

16 An sin thàinig an ceud *fhear*, ag ràdh, A Thighearn, bhuidhinn do phund deich puind.

17 Agus thubhairt e ris, Is maith, a dheadh sheirbhisich : do bhrìgh gu'n robh thusa firinneach ann an ro-bheagan,

biodh agad-sa uachdaranachd air deich bailtibh.

18 Agus thàinig an dara *fear*, ag ràdh, A Thighearn, rinn do phund cùig puind.

19 Agus thubhairt e ris-san, Bi-sa mar an ceudna os ceann chùig bailtean.

20 Agus thàinig *fear* eile, ag ràdh, a Thighearn, feuch do phund, a bha agam-sa taisgte ann an neapaicin :

21 Oir bha eagal orm romhad, do bhrìgh gur duine geur-theann thu : tha thu a' togail an ni nach do leag thu, agus a' buain an ni nach do chuir thu.

22 Agus thubhairt e ris, As do bheul féin bheir mi breth ort, a dhroch sheirbhisich. Bha fhios agad gu'm bu duine geur-theann mi, a' togail an ni nach do leag mi, agus a' buain an ni nach do chuir mi :

23 Air an aobhar sin c'ar son nach d'thug thu m' airgiod do'n luchd-malairt, agus air teachd dhomh-sa thogainn e le riadh ?

24 Agus thubhairt e riusan a bha 'nan seasamh a làthair, Thugaibh uaith am pund, agus thoiribh dhasan e aig am bheil na deich puind.

25 (Agus thubhairt iad ris, A Thighearn, tha deich puind aige ;)

26 Oir a ta mi ag ràdh ribh, Gu'n toirear do gach neach aig am bheil : ach uaith-san aig nach 'eil, bheirear eadhon an ni sin a ta aige.

27 Ach thugaibh an so na naimhdean ud agam-sa, leis nach b'àill mise bhì am rìgh os an ceann, agus marbhaibh a' m' fhianuis iad.

28 Agus air dha so a ràdh, dh'imich e rompa, a' dol suas gu Ierusalem.

29 A nis an uair a dhruid e ri Betphage agus Betani, làimh

ris an t-sliabh d'an gairmear *sliabh* nan crann-oladh, chuir e dithis d' a dheisciobluibh uaith,

30 Ag ràdh, Imichibh do'n bhaile ta fa bhur comhair; anns am faigh sibh, air dhuibh dol a steach, searrach ceangailte, air nach do shuidh aon duine riamh: fuasglaibh, agus thugaibh an so e.

31 Agus ma dh'fhiosraicheas neach air bith dhibh, C'ar son a ta sibh 'g a fhuasgladh? mar so their sibh ris, A ta feum aig an Tighearn air.

32 Agus air imeachd dhoibhsan a chuireadh air falbh, fhuair iad mar thubhairt e riu.

33 Agus an uair a bha iad a' fuasgladh an t-searraich, thubhairt a shealbhadairean riu, C'ar son a ta sibh a' fuasgladh an t-searraich?

34 Agus thubhairt iadsan, Tha feum aig an Tighearn air.

35 Agus thug iad gu Iosa e: agus thilg iad am falluinnean air an t-searrach, agus chuir iad Iosa air.

36 Agus ag imeachd dhasan, sgaoil iad am falluinnean fuidhe air an t-slighe.

37 Agus an uair a thàinig e am fagus, eadhon gu dol sìos sléibh nan crann-oladh, thòisich mòr-chuideachd nan deisciobul uile ri gairdeachas a dhèanamh, agus moladh a thoirt do Dhia le guth àrd, air son nan uile oibre cumhachdach a chunnaic iad.

38 Ag ràdh, Gu ma beannaichte an rìgh a ta teachd ann an ainm an Tighearna: sith air nèamh, agus glòir anns na h-àrd-aibh.

39 Agus thubhairt cuid do na Phairisich o mheasg an t-sluaigh ris, A mhaighstir, cronuich do dheisciobuil.

40 Agus fhreagair esan, agus thubhairt e riu, A ta mi ag ràdh

ribh, nam fanadh iad sin 'nan tosd, gu'n glaothadh na clacha féin.

41 Agus an uair a thàinig e am fagus, chunnaic e am baile, agus ghuil e air a shon.

42 Ag ràdh, Nam b'aithne dhuit, eadhon dhuitse, air bheag sam bith ann ad là so féin, na nithe a bhuineas do d' shìth! ach a nis a ta iad folaichte o d' shùilibh.

43 Oir thig na làithean ort, anns an tilg do naimhde dìg mu d' thimchioll, agus an iadh iad umad mu'n cuairt, agus an druid iad a stigh air gach taobh thu,

44 Agus an leag iad co ìosal ris an làr thu, agus do chlann annad, agus nach fàg iad annad clach air muin cloiche; do bhrìgh nach b'aithne dhuit aimsir t'fhiosrachaidh.

45 Agus chaidh e steach do'n teampull, agus thòisich e air an dream a bha reiceadh, agus a' ceannach ann a thilgeadh mach,

46 Ag ràdh riu, Tha e sgriobhta, Is tigh ùrnuigh mo thighsa; ach rinn sibhse 'na gharaidh luchd-reubainn e.

47 Agus bha e gach là a' teagasg san teampull. Ach dh'iarr 'na h-àrd-shagairt agus na sgrìobhaichean, agus ceannardan a' phobuill esan a mhilleadh:

48 Gidheadh cha robh fhios aca ciod a dhèanadh iad: oir bha am pobull uile ag éisdeachd ris le ro-aire.

CAIB. XX.

AGUS thàrladh air aon do na làithibh sin, an uair a bha e teagasg a' phobuill san teampull, agus a' searmonachadh an t-soisgeil gu'n d'thàinig na h-àrd-shagairt, agus na sgrìobhaichean air, maille ris na sean-airibh.

2 Agus labhair iad ris, ag

ràdh, Innis duinn ciod e an t-ùghdarras leis am bheil thu a' dèanamh nan nithe so? no cò esan a thug an t-ùghdarras so dhuit?

3 Agus fhreagair esan agus thubhairt e riu, Feòraichidh mise mar an ceudna aon ni dhìbhsè; agus freagraibh mi:

4 Baisteadh Eoin, an ann o nèamh a bha e, no o dhaoinibh?

5 Agus reusonaich iad eatorra féin, ag ràdh, Ma their sinn, O nèamh; their esan, C'ar son ma ta nach do chreid sibh e?

6 Ach ma their sinn, O dhaoinibh, clachaidh an sluagh uile sinn; oir is deimhin leo gu'm b' fhàidh Eoin.

7 Agus fhreagair iadsan, Nach robh fhios aca cia uaith a bha e.

8 Agus thubhairt Iosa riu, Ni mò a dh'innseas mise dhuibhsa ciod e an t-ùghdarras leis am bheil mi dèanamh nan nithe so.

9 An sin thòisich e air a' chosamhlachd so a labhairt ris an t-sluagh; Phlannduich duine àraidh fion-lios, agus shuidhich e air tuath e; agus chaidh e air choigrich rè aimsir fhada.

10 Agus anns an àm dh'fhìonnsuidh na tuatha, chum gu'n tugadh iad da do thoradh an fhion-lios: ach ghabh an tuath air, agus chuir iad uatha falamh e.

11 Agus a ris chuir e seirbhiseach eile uaith; agus ghabh iad a' sealltainn mar an ceudna, agus mhaslaich iad e, agus chuir iad uatha falamh e.

12 Agus a thuilleadh air sin chuir e an treas seirbhiseach uaith; agus lot iad esan mar an ceudna, agus thilg iad a mach e.

13 An sin thubhairt Tigh-earn an fhion-lios, Ciod a nì mi? cuiridh mi mo Mhac gràdh-

ach d'an ionnsuidh: feudaidh e bi, 'nuair a chì iad e, gu'n toir iad urram dha.

14 Ach an uair a chunnaic an tuath e, reusonaich iad eatorra féin, ag ràdh, Is e so an t-oighre: thigibh, marbhamaid e, chum gu'm bì an oighreachd againn féin.

15 Agus thilg iad a mach as an fhion-lios e, agus mharbh iad e. Ciod uime sin a nì Tigh-earn an fhion-lios riu?

16 Thig e agus sgriosaidh e an tuath ud, agus bheir e am fion-lios do dhaoinibh eile. Agus an uair a chual iad so, thubhairt iad, Nar leigeadh Dia.

17 Agus air dhasan amharcorra, thubhairt e, Ciod e so ma seadh a ta sgriobhta, A' chlach a dhiùlt na clachairean, rinn-eadh ceann na h-oisne dh'i?

18 Ge b'e neach a thuiteas air a' chloich sin, brisear e: ach ge b'e neach air an tuit i, pronnaidh i gu luathre e.

19 Agus anns an uair sin féin dh'iarr na h-àrd-shagairt agus na sgriobhaichean làmh a chur ann; ach bha eagal an t-sluaigh orra; oir thuig iad gu'm b' ann 'nan aghaidh féin a labhair e'n cosamhlachd so.

20 Agus rinn iad geur-fhaire air, agus chuir iad a mach luchd-feill, a leigeadh orra féin a bhi 'nam fìreanaibh, chum gu'n dèanadh iad greim air 'fhoclaibh, air chor's gu'n tugadh iad thairis e do chumhachd agus do ùghdarras an uachdarain.

21 Agus dh'fhiosraich iad deth, ag ràdh, a mhaighstir, tha fhios againn gu bheil thu a' labhairt agus a' teagasg gu ceart, agus nach 'eil suim agad do phearsa duine sam bith, ach gu bheil thu teagasg slighe Dhé a réir na fìrinn.

22 Am bheil e ceaduichte

dhuinn cìs a thoirt do Cheasar, no nach 'eil?

23 Ach thuig esan an cuil-bheartachd, agus thubhairt e riu, C'ar son a ta sibh ga m'bhuaireadh?

24 Nochdaibh dhomh pegh-inn: cò leis an dealbh agus an sgrìobhadh a ta oirre? Fhreagair iadsan agus thubhairt iad, Le Ceasar.

25 Agus thubhairt esan riu, Thugaibh-sa, air an aobhar sin, do Cheasar na nithe a's le Ceasar, agus do Dhia na nithe a's le Dia.

26 Agus cha b' urrainn iad greim a dhèanamh air 'fhoclaibh am fianuis an t-sluaigh: agus ghabh iad iongantais r' a fhreagradh, agus dh'fhan iad 'nan tosd.

27 An sin thàinig d' a ionn-suidh dream àraidh do na Sadusaich, a ta 'g àicheadh gu bheil aiseirigh ann, agus dh'fhiosraich iad deth,

28 Ag ràdh, A mhaighstir, sgrìobh Maois dhuinn, Nam faigheadh bràthair duine air bith bàs, agus bean-phòsda aige, agus gu'm faigheadh e bàs gun chlann, gu'n gabhadh a bhràthair a bhean, agus gu'n togadh e suas sliochd d' a bhràthair.

29 Air an aobhar sin, bha seachdnar bhràithrean ann: agus ghabh an ceud fhear bean, agus fhuair e bàs gun chlann.

30 Agus ghabh an dara fear i mar mhnai, agus fhuair esan bàs gun chlann.

31 Agus ghabh an treas fear i; agus mar an ceudna an t-seachdnar. Agus cha d'fhàg iad clann, agus fhuair iad bàs.

32 Ma dheireadh uile fhuair a' bhean bàs mar an ceudna.

33 Anns an aiseirigh uime sin, cò dhiubh d' am bean i? oir bha i aig an t-seachdnar 'na mnai.

34 Agus fhreagair Iosa, agus thubhairt e riu, Tha clann an t-saoghail so a' pòsadh, agus air an toirt am pòsadh:

35 Ach an dream sin a mheas-ar gur airidh iad air an t-saoghal ud fhaghail, agus an aiseirigh o na marbhaibh, cha 'n 'eil iad a' pòsadh, no air an toirt am pòsadh.

36 Agus cha 'n urrainn iad bàs fhaghail ni's mò; oir tha iad an co-inbhe ris na h-ainglibh; agus is iad clann Dé iad, air bhi dhoibh 'nan cloinn do 'n aiseirigh.

37 Ach gu'n éirich na mairbh, nochd Maois féin aig a' phreas, an uair a ta e a' gairm do 'n Tighearn, Dia Abraham, agus Dia Isaac, agus Dia Iacob.

38 A nis cha 'n e Dia nam marbh e, ach nam beò: oir a ta iad uile beò dhasan.

39 An sin fhreagair dream àraidh do na sgrìobhaichibh, agus thubhairt iad, A mhaighstir, is maith a labhair thu.

40 Agus cha robh chridhe aca tuilleadh ni sam bith fheòraich dheth.

41 Agus thubhairt e riu, Cionnus a their iad gur e Crìosd mac Dhaibhidh?

42 Agus tha Daibhidh féin ag ràdh ann an leabhar nan Salm, Thubhairt an Thighearn, ri mo Thighearn, Suidh air mo làimh dheis,

43 Gus an cuir mi do naimhde 'nan stòl fo do chosaibh.

44 Tha Daibhidh air an aobhar sin a' gairm a Thighearna dheth, cionnus ma seadh is e a mhac e?

45 An sin thubhairt e r' a dheisciobluibh, ann an éisdeachd an t-sluaigh uile,

46 Thugaibh an aire dhuibh féin o na sgrìobhaichibh, leis am miann imeachd ann an culaidhibh fada, agus leis an ionmh-

uinn fàilte *fhaotainn* air na marg-aibh, agus na caithrichean a's àirde anns na sionagogaibh, agus na ceud àiteacha-suidhe aig féillibh ;

47 A shluigeas suas tighean bhantrach, agus air sgàth deadh choslais a nì ùrnuighean fada : gheibh iad sin an dìteadh a's mò.

CAIB. XXI.

A GUS air dha amharc suas, chunnaic e na daoine saoi bhir a' tilgeadh an tiodhlac-an ann an àite coimhead an ionmhais.

2 Agus chunnaic e mar an ceudna bantrach bhochd àraidh a' tilgeadh dà leth-fheoirling an sin.

3 Agus thubhairt e, Gu fìrinn-each a ta mi ag ràdh ribh, gu'n do chuir a' bhantrach bhochd so nì's mò ann na iad uile.

4 Oir thilg iad so uile d'am pailteas a steach do thiodhlac-aibh Dhé : ach thilg ise d'a h-uireasbhuidh féin am beathach-adh uile a bha aice.

5 Agus air do chuid diubh bhi labhairt mu'n teampull, mar a bha e air a dhèanamh maiseach le clachaibh sgiamhach, agus le tiodhlacaibh, thubhairt e,

6 A *thaobh* nan nithe so a chì sibh, thig na làithean, anns nach fàgar clach air muin cloiche *dhiubh*, nach tilgear sìos.

7 Agus dh'fhiosraich iadsan deth, ag ràdh, A mhaighstir, c'uin' ma ta bhitheas na nithe so? agus ciod e an comhara 'nuair a bhios na nithe so gu teachd gu crìch?

8 Agus thubhairt esan, Feuch-aibh nach meallar sibh ; oir thig mòran ann am ainm-sa, ag ràdh, Is mise *Crìosd* ; agus a ta an t-àm am fagus ; uime sin na leanaibh iad.

9 Ach an uair a chluinneas sibh mu chogannaibh, agus mu cheannaircibh, na biodh mòr-gheilt oirbh : oir is éigin do na nithibh so tachairt air tùs ; ach cha 'n 'eil a' chrìoch air ball.

10 An sin thubhairt e riu, Eiridh cinneach an aghaidh cinnich, agus rìoghachd an aghaidh rìoghachd :

11 Agus bithidh critheanna mòra talmhainn ann an iomadh àit, agus gortaidh, agus plàigh-ean ; agus nithe uamhasach, agus comharan mòra o nèamh.

12 Ach rompa so uile cuiridh iad làmh annaibh-sa, agus geur-leanaidh iad *sibh*, 'gur tabhairt thairis do choimhthionalaibh, agus do phrìosanaibh, 'gur tabhairt chum rìghrean agus uachdaran air sgàth m'ainme-sa.

13 Agus tacharaidh so dhuibh-sa mar fhianuis.

14 Air an aobhar sin daingnichibh ann bhur cridheachaibh, gun smuaineachadh roimh làimh, ciod a fhreagras sibh air bhur son féin :

15 Oir bheir mise dhuibh beul agus gliocas, nach bì bhur naimhdean uile comasach air labhairt no cur 'na aghaidh.

16 Agus brathar sibh le 'ur pàrantaibh, agus le 'ur bràithribh, agus le 'ur luchd-dàimhe, agus le 'ur càirdibh ; agus bheir iad fa'near *cuid* dhibh a chur gu bàs.

17 Agus bithidh fuath aig na h-uile dhaoineibh dhuibh air son m'ainme-sa.

18 Ach cha chaillear fuiltein do ghruaig bhur cinn.

19 Ann bhur foighidinn sealbhaichidh bhur n-anama féin.

20 Agus an uair a chì sibh Ierusalem air a cuairteachadh le armaitibh, an sin biodh fhios agaibh gu bheil a fàsachadh am fagus.

21 (An sin teicheadh iadsan a ta ann an Iudea chum nam beann,) agus imicheadh iadsan a ta 'na meadhon-sa mach aisde; agus na rachadh iadsan a ta sa' mhachair, a steach innte.

22 Oir is iad sin làithean an dioghaltais, chum gu 'n coimhlionar na h-uile nithe a ta sgrìobhta.

23 Ach mo thruaigh na mnàir a bhios torrach, agus iadsan a bhios toirt cìche anns na làithibh sin! oir bithidh teanntachd mhòr san dùthaich, agus fearg air a' phobull so.

24 Agus tuitidh iad le faobhar a' chlaidheimh, agus bheirear iad am braighdeanas chum nan uile chinneach: agus bithidh Ierusalem air a saltairt sìos fuidh na Cinnich, gus an coimhlionar aimsire nan Cinneach.

25 Agus bithidh comharan anns a' ghréin, agus anns a' ghealaich, agus anns na reultaibh; agus air an talamh airc nan Cinneach, ann an iomachomhairle; an cuan agus na tonnan a' beuchdaich;

26 Cridhe dhaoine 'gan tréig-sinn troimh eagal, agus feitheamh nan nithe sin a ta teachd air an domhan: oir bithidh cumhachdan nan nèamh air an crathadh.

27 Agus an sin chì iad Mac an duine a' teachd ann an neul, le cumhachd agus mòr-ghlòir.

28 Agus an uair a thòisich-eas na nithe so air tachairt, an sin amhaircibh suas, agus tog-aibh bhur cinn; oir a ta bhur saorsa am fagus.

29 Agus labhair e cosamhlachd riu, Amhaircibh air a' chraoibh-fhìge, agus na craobhan uile;

30 'Nuair a bhios iad a cheana a' cur a mach an duillich, tha sibh a' faicinn, agus ag aith-

neachadh uaibh féin, gu bheil an samhradh a nis am fagus.

31 Agus mar an ceudna sibhse, 'nuair a chì sibh na nithe so a tachairt, biodh fhios agaibh gu bheil rioghachd Dhé fagus do làimh.

32 Gu deimhin a ta mi ag ràdh ribh, nach téid an ginealach so thairis, gus an coimhlionar na nithe so uile.

33 Théid nèamh agus talamh thairis: ach cha téid mo bhriathra-sa thairis a chaoidh.

34 Agus thugaibh an aire dhuibh féin, air eagal uair air bith gu 'm bì bhur cridhe fuidh uallaich le geòcaireachd, agus le misg, agus le ro-chùram mu nithibh na beatha so, agus gu'n tig an là sin oirbh gu h-obann.

35 Oir mar ribe thig e air na h-uile dhaoineibh, a ta 'g àiteachadh aghaidh na talmhainn uile.

36 Dèanaibh-sa air an aobhar sin faire, a' dèanamh ùrnuigh gach àm, chum gu measar gur airidh sibh air dol as o na nithibh sin uile a ta gu teachd, agus seasamh an làthair Mhic an duine.

37 Agus bha e san là a' teagasg san teampull, agus san oidhche chaidh e mach, agus dh'fhan e air an t-sliabh, d'an goirear *sliabh* nan crann-oladh.

38 Agus thàinig an sluagh uile gu moch d' a ionnsuidh san teampull, a dh'éisdeachd ris.

CAIB. XXII.

A NIS dhruid riu féill an ar-ain neo-ghoirtichte, d' an goirear a' chàisg.

2 Agus bha na h-àrd-shagairt agus na sgrìobhaichean ag iarraidh cionnus a dh'fheudadh iad esan a chur gu bàs; oir bha eagal an t-sluaigh orra.

3 An sin chaidh Satan ann an Iudas d'an co-ainm Iscariot, a

bha do àireamh an dà fhirdheug.

4 Agus dh'imich e, agus labhair e ris na h-àrd-shagartaibh agus ri ceannardaibh an teampuill, cionnus a bhrathadh se esan doibh.

5 Agus bha iad subhach, agus rinn iad coimhcheangal airgid a thoirt da.

6 Agus gheall esan, agus dh'iarr e àm iomchuidh air a bhrath dhoibh gun an sluagh a bhi làthair.

7 An sin thàinig là an arain neo-ghoirtichte, anns am b'éigin an t-uain-càisge a mharbhadh.

8 Agus chuir e uaith Peadar agus Eoin, ag ràdh, Imichibh, agus ulluichibh dhuinn a' chàisg, chum gu'n ith sinn i.

9 Agus thubhairt iadsan ris, C'àit an àill leat sinn a dh'ulluchadh?

10 Agus thubhairt e riu, Feuch, air dhuibh dol a steach do 'n bhaile, tacharaidh oirbh duine, a' giùlan soithich uisge; leanaidh e do 'n tigh anns an téid e steach.

11 Agus abraibh ri fear an tìghe, Tha am maighstir ag ràdh riut, C'àit am bheil an seòmar aoidheachd anns an ith mi a' chàisg maille ri mo dheisciobluibh?

12 Agus feuchaidh e dhuibh àrd-sheòmar farsuinn uidhimichte: ulluichibh an sin.

13 Agus dh'imich iad agus fhuair iad mar thubhairt e riu: agus dh'ulluich iad a' chàisg.

14 Agus an tràth thàinig an uair, shuidh e sìos, agus an dà abstol deug maille ris.

15 Agus thubhairt e riu, Le mòr-thogradh mhiannaich mi a' chàisg so itheadh maille ribh roimh dhomh fulang:

16 Oir a ta mi ag ràdh ribh, nach ith mi dh' i tuilleadh, gus

an coimhleanar i ann an rìoghachd Dhé.

17 Agus ghlac e cupan, agus air dha buidheachas a thabhairt, thubhairt e, Gabhaibh so, agus roinnibh eadaraibh féin e.

18 Oir a ta mi ag ràdh ribh, nach òl mi do thoradh na fionain, gus an tig rìoghachd Dhé.

19 Agus ghlac e aran, agus an déigh buidheachas a thabhairt, bhris e, agus thug e dhoibh-san e, ag ràdh, Is e so mo chorp-sa a ta air a thoirt air bhur son-sa: dèanaibh so mar chuimhneachan ormsa.

20 Agus mar an ceudna an cupan, an déigh na suipeir, ag ràdh, Is e an cupan so an tiomnadh nuadh ann am fhuil-sa, a dhòirteadh air bhur son-sa.

21 Ach feuch, làmh an tì a bhrathas mise maille rium air a' bhòrd.

22 Agus gu fìrinneach a ta Mac an duine ag imeachd, a réir mar a dh'òrduicheadh: ach is an-aobhinn do 'n duine sin leis am brathar e.

23 Agus thòisich iadsan air fiosrachadh eatorra féin, cò aca bha gus an ni so a dhèanamh.

24 Agus bha mar an ceudna comhstri eatorra, co aca bu mhò a bhiodh.

25 Ach thubhairt esan riu, A ta aig rìghribh nan Cinneach tighearnas orra; agus goirear daoine fiala dhiubh-san, aig am bheil ùghdarras orra.

26 Ach na bithibh-sa mar sin: ach an neach a's mò 'nur measg, biodh e mar an neach a's òige; agus an tì a's àirde, mar esan a ta ri frithealadh.

27 Oir cò aca is mò, an tì a shuidheas air bòrd, no esan a fhritheileas? nach e an tì a shuidheas; ach a ta mise 'nur measg-sa mar fhear-frithealaidh.

28 Is sibhse iadsan a dh'fhan maille rium-sa ann am dheuchainnibh ;

29 Agus a ta mise ag òrd-uchadh dhuibh rìoghachd, mar a dh'òrduich m' Athair dhomh-sa ;

30 Chum gu'n ith agus gu'n òl sibh air mo bhòrd-sa ann am rìoghachd, agus gu'n suidh sibh air caithrichibh rìoghail, a' toirt breth air dà thréibh dheug Israeil.

31 Agus thubhairt an Tigh-earn, A Shimoìn, a Shimoìn, feuch, dh'iarr Satan sibhse, chum *bhur* criaradh mar chruithneachd.

32 Ach ghuidh mise air do shonsa, nach dìobradh do chreidimh thu : agus an uair a dh'iompaichear thu, neartaich do bhràithre.

33 Agus thubhairt esan ris, A Thighearn, tha mise ullamh gu dol maille riut araon chum prìosain, agus a chum bàis.

34 Agus thubhairt esan, A ta mi ag ràdh riut, a Pheadair, nach goir an coileach an diugh, agus an àicheadh thu trì uairean gur aithne dhuit mi.

35 Agus thubhairt e riu, 'Nuair a chuir mi uam sibh gun sporan, agus gun mhàla, agus gun bhrògan, an robh uireasbhuidh ni sam bith oirbh? Agus thubhairt iad, Cha robh.

36 An sin thubhairt e riu, Ach a nis ge b'e aig am bheil sporan, togadh se e, agus mar an ceudna a mhàla : agus an ti aig nach 'eil claidheamh, reiceadh e fhalluinn, agus ceannachadh e aon.

37 Oir a ta mi ag ràdh ribh, gur éigin fathast an ni so ta sgriobhta a choimhlionadh ann-amsa, Agus bha e air àireamh am measg nan ciontach : oir a ta crìoch aig na nithibh ud, a ta mu m' thimchioll-sa.

38 Agus thubhairt iadsan, A Thighearn, feuch, a ta dà chladheamh an so. Agus thubhairt esan riu, Is leoir e.

39 Agus air dha dol a mach, chaidh e, mar bu ghnàth leis, gu sliabh nan crann-oladh ; agus lean a dheisciobuil e.

40 Agus an uair a thàinig e do 'n àit, thubhairt e riu, Dèanaibh ùrnuigh, chum nach tuit sibh ann am buaireadh.

41 Agus thairngeadh esan uatha mu thimchioll urchuir chloiche, agus leig se e féin air a ghlùinibh, agus rinn e ùrnuigh,

42 Ag ràdh, Athair, ma 's toil leat, cuir an cupan so seachad orm : gidheadh, na b' i mo thoil-sa, ach do thoil-sa gu robh dèanta.

43 Agus dh'fhoillsicheadh dha aingeal o nèamh, 'ga neartachadh.

44 Agus air dha bhi ann an cruaidh-ghleachd anama, rinn e ùrnuigh ni bu dùrachdaiche : agus bha 'fhallas mar bhraonaibh mòra fola a' tuiteam sìos air an talamh.

45 Agus air dha éirigh o ùrnuigh, thàinig e chum a dheisciobul, agus fhuir e 'nan codal iad troimh thuirse.

46 Agus thubhairt e riu, C'ar son a ta sibh 'nur codal? éiribh, agus dèanaibh ùrnuigh, chum nach tuit sibh ann am buaireadh.

47 Agus an uair a bha e fathast a' labhairt, feuch sluagh, agus dh'imich esan d'am b' ainm Iudas, aon do 'n dà fhear dheug, rompa, agus dhruid e ri Iosa, chum a phògadh.

48 Ach thubhairt Iosa ris, A Iudais, am bheil thu le pòig a' brath Mhic an duine?

49 Agus an uair a chunnaic iadsan a bha mu thimchioll-sa

an ni a bha gu tachairt, thubhairt iad ris, A Thighearn, an buail sinn leis a' chlaidheamh?

50 Agus bhuail aon diubh seirbhiseach an àrd-shagairt, agus gheàrr e dheth a chluas dheas.

51 Agus fhreagair Iosa agus thubhairt e, Fulaingibh gu so. Agus bhean e r' a chluais, agus shlànuich e i.

52 An sin thubhairt Iosa ris na h-àrd-shagartaibh agus ri ceannardaibh an teampull, agus ris na seanairibh, a thàinig d' a ionnsuidh, An d'thàinig sibh a mach le claidhibh agus le bat-aibh, mar gu b' ann an aghaidh fir reubainn?

53 'Nuair a bha mi gach là maille ribh san teampull, cha do shìn sibh a mach *bhur* làmhan a' m' aghaidh: ach is i so *bhur* n-uair-sa, agus cumhachd an dorchadais.

54 An sin rug iad air, agus thug iad leo e do thigh an àrd-shagairt. Agus lean Peadar am fad uaith e.

55 Agus air dhoibh teine fhad-adh ann am meadhon an talla, agus suidhe sìos maille ri chéile, shuidh Peadar 'nam meadh-on.

56 Ach chunnaic cailin àraidh e 'na shuidhe aig an teine, agus air dh'i amharc gu geur air, thubhairt i, Bha 'm fear so mar an ceudna maille ris.

57 Agus dh'àicheadh esan e, ag ràdh, A bhean, cha'n aithne dhomh e.

58 Agus beagan 'na dhéigh sin chunnaic neach eile e, agus thubhairt e, Is ann diubh thusa mar an ceudna. Agus thubhairt Peadar, A dhuine, cha 'n ann.

59 Agus mu thimchioll ùine aoin uaire 'na dhéigh sin, chòmh-daich neach eile air, ag ràdh, Gu

fìrinneach bha am fear so mar an ceudna maille ris; oir is Galiléach e.

60 Agus thubhairt Peadar, A dhuine, cha'n aithne dhomh ciod a ta thu 'g ràdh. Agus air ball, am feadh a bha e fathast a' labhairt, ghoir an coileach.

61 Agus air tionndadh do'n Tighearn, dh'amhairc e air Peadar; agus chuimhnich Peadar focal an Tighearna, mar thubhairt e ris, Mun goir an coileach, àicheadhaidh tu mi trì uair-ean.

62 Agus chaidh Peadar a mach, agus ghul e gu goirt.

63 Agus rinn na daoine, a chum Iosa, fanoid air, 'ga bhual-adh.

64 Agus an uair a dh'fholuich iad a shùilean, bhuail iad e san aghaidh, agus dh'fhiosraich iad deth, ag ràdh, Dèan fàidhead-aireachd cò e a bhuail thu?

65 Agus labhair iad mòran do nithibh eile gu toibheumach 'na aghaidh.

66 Agus an uair a bha an là air teachd, chruinnich seanadh an t-sluaigh, agus na h-àrd-shagairt, agus na sgrìobhaichean an ceann a chéile, agus thug iad esan chum an combhairle,

67 Ag ràdh, An tusa Crìosd? innis dhuinn. Agus thubhairt e riu, Ma dh'innseas mi dhuibh, cha chreid sibh:

68 Agus ma dh'fhiosraicheas mi *ni air bith*, cha toir sibh freagradh dhomh, agus cha leig sibh as mi.

69 O 'n àm so bithidh Mac an duine 'na shuidhe air deas làimh cumhachd Dhé.

70 An sin thubhairt iad uile, An tusa ma seadh Mac Dhé? Agus thubhairt e riu, A ta sibhse ag ràdh gur mi.

71 Agus thubhairt iad, Ciod tuilleadh am feum a ta againn?

air fianuis? oir chuala sinn féin
i as a bheul féin.

CAIB. XXIII.

AGUS air éirigh d'an cuid-
eachd uile, thug iad e gu
Pilat.

2 Agus thòisich iad air a
chasaìd, ag ràdh, Fhuair sinn
am fear so a' clao nadh a' chinn-
ich, agus a' bacadh, cìs a thoirt
do Cheasar, ag ràdh, Gur e féin
Crìosd an rìgh.

3 Agus dh'fhiosraich Pilat
deth, ag ràdh, An tusa rìgh nan
Iudhach? agus fhreagair esan
agus thubhairt e, A ta thu 'g a
ràdh.

4 An sin thubhairt Pilat ris
na h-àrd-shagartaibh agus ris an
t-sluagh, Cha'n 'eil mi faotainn
coire air bith san duine so.

5 Agus bha iadsan ni bu ro
dhéine, ag ràdh, Tha e buaireadh
an t-sluaigh, a' teagasg troimh
Iudea uile, a' tòiseachadh o
Ghalile, gus an àit so.

6 'Nuair a chuala Pilat mu
Ghalile, dh'fhiosraich e am bu
Ghaliléach an duine.

7 Agus an uair a chual e gu'm
b'ann fo uachdaranachd Heroid
a bha e, chuir se e gu Herod, a
bha e féin ann an Ierusalem sna
làithibh sin.

8 Agus an uair a chunnaic
Herod Iosa, bha aoibhneas mòr
air: oir bha déidh aige rè ùine
fhada air esan fhaicinn, do
bhrìgh gu'n cual e mòran uime;
agus bha dùil aige gum faiceadh
e mìorbhuil éigin air a dhèanamh
leis.

9 An sin dh'fheòraich e mòr-
an do cheisibh dheth; ach cha
d'thug e freagradh sam bith
air.

10 Agus sheas na h-àrd-
shagairt agus na sgrìobhaichean
'ga chasaìd gu dian.

11 Ach chuir Herod agus a

luchd-cogaidh an neo-mheas e,
agus rinn iad fanoid air, agus an
déigh a sgeadachadh an eudach
dealrach chuir e air ais gu Pilat
e.

12 Agus rinneadh Pilat agus
Herod 'nan càirdibh d' a chéile
san là sin: oir bha iad roimhe
sin an naimhdeas r' a chéile.

13 Agus an uair a ghairm Pilat
an ceann a chéile na h-àrd-
shagairt, agus na h-uachdarain,
agus an sluagh,

14 Thubhairt e riu, Thug sibh
a m' ionnsuidh-sa an duine so,
mar neach a ta tionndadh an
t-sluaigh a thaobh: agus, feuch,
air dhomh a cheasnachadh ann
bhur làthair, cha d'fhuair mi
coire air bith san duine so thaobh
nan nithe sin mu 'm bheil sibh a'
dèanamh casaìd air;

15 No mar an ceudna Herod:
oir chuir mi d'a ionnsuidh sibh,
agus, feuch, cha d'rinneadh ni
air bith leis toilltiunneach air
bàs.

16 Uime sin, air dhomh-sa a
smachdachadh, leigidh mi as e.

17 (Oir b'éigin da aon a leig-
eadh as doibh air an fhéill.)

18 Agus ghlaodh iad a mach
dh'aon ghuth, ag ràdh, Beir
uainn *am fear* so, agus leig air
a chomas duinne Barabas:

19 (Neach air son ceannaire
àraidh a rinneadh anns a' bhaile,
agus air son mòrtaidh, a thilg-
eadh am prìosan.)

20 Air an aobhar sin labhair
Pilat riu a ris, air dha bhi toil-
each Iosa a chur fa sgaoil.

21 Ach ghlaodh iadsan, ag
ràdh, Céus e, céus e.

22 Agus thubhairt e riu an
treas uair, C'ar son? cìod an
cron a rinn e? cha d'fhuair mise
cùis bhàis air bith ann: uime
sin, an déigh dhomh a smachd-
achadh, leigidh mi as e.

23 Agus luidh iadsan air la

guthaibh mòra, ag iarraidh esan a chéusadh : agus bhuadhaich an guthanna-san, agus *guthanna* nan àrd-shagart.

24 Agus thug Pilat breth gu 'n dèanta na dh'iarr iad.

25 Agus leig e mach dhoibh esan a thilgeadh am prìosan air son ceannairc agus mortaidh, an neach a dh'iarr iad ; ach thug e thairis Iosa d'an toil.

26 Agus an tràth thug iad leo e, rug iad air Simon, duine àraidh o Chirene, a bha teachd o 'n dùthaich, agus chuir iad an crann-céusaidh air, g' a ghiùlan an déigh Iosa.

27 Agus lean cuideachd mhòr e do'n t-sluagh, agus domhnaibh, a bha mar an ceudna ri bròn, agus 'ga chaoineadh-san.

28 Ach air tionndadh do Iosa riu, thubhairt e. A nigheana Ierusalem, na guilbh air mo shon-sa, ach guilbh air bhur son féin, agus air son bhur cloinne :

29 Oir feuch, a ta na làithean a' teachd, anns an abair iad, Is beannaichte na *mnà*i neo-thorrach, agus na bronna nach do ghiùlain *clann*, agus na cìocha nach d'thug bainne.

30 An sin tòisichidh iad air a ràdh ris na beanntaibh, Tuitibh oirne ; agus ris na cnocaibh, Folaichibh sinn.

31 Oir ma nì iad na nithe so ris a' chrann ùr, ciod a nì iad ris a' chrìonaich ?

32 Agus thugadh mar an ceudna dithis eile, a bha 'nan luchd droch-bheirt, chum bhi air an céusadh maille ris.

33 Agus an uair a thàinig iad do'n àit d'an goirear Calbhari, an sin chéus iad e féin, agus na droch dhaoine ; fear dhiubh air a làimh dheis, agus am fear eile air a làimh chli.

34 An sin thubhairt Iosa, Athair, maith dhoibh ; oir cha'n 'eil

fhios aca ciod a ta iad a' dèanamh. Agus roinn iad 'eudach, agus thilg iad crannchur *air*.

35 Agus sheas an sluagh ag amharc : agus rinn na h-uachdarain fanoid *air* maille riusan, agus ràdh, Shaor e daoine eile ; saoradh se e féin, ma 's e so Crìosd, aon taghta Dhé.

36 Agus rinn na saighdearan mar an ceudna fanoid *air*, a' teachd d'a ionnsuidh, agus a' tairgseadh fìon geur dha,

37 Agus ag ràdh, Ma 's tu rìgh nan Iudhach, teasaairg thu féin.

38 Agus bha sgriobhadh mar an ceudna air a sgriobhadh os a cheann, ann an litrichibh Gréigis, agus Laidin, agus Eabhra, IS E SO RIGH NAN IUDH-ACH.

39 Agus thug aon do na droch dhaoinibh, a chrochadh, toibheum dha, ag ràdh, Ma 's tu Crìosd, saor thu féin agus sinne.

40 Ach fhreagair am fear eile, agus chronuich se e, ag ràdh, Nach 'eil eagal Dé ort, agus gu bheil thu fo 'n aon dìteadh *ris* ?

41 Agus sinne da rìreadh an ceartas ; oir a ta sinn a' faotainn nan nithe sin a thoill ar gnìomh-aran : ach cha d'rinn an duine so cron air bith.

42 Agus thubhairt e ri Iosa, A Thighearn, cuimhnich ormsa 'nuair a thig thu do d' rìoghachd.

43 Agus thubhairt Iosa ris, Gu deimbin a ta mi ag ràdh riut, gu'm bì thu maille riumsa an diugh ann am pàras.

44 Agus bha e mu thimchioll na seathadh uaire, agus bha dorchadas air an talamh uile gus an naothadh uair.

45 Agus dhorchaicheadh a' ghrian, agus reubadh brat-roinn an teampuill 'na mheadhon.

46 Agus an uair a ghlaodh Iosa le guth mòr, thubhairt e, Athair, a ta mi tiomnadh mo spioraid a' d' làmhaibh-sa: agus an uair a thubhairt e so, thug e suas an deò.

47 A nis an uair a chunnaic an ceannard-ceud an ni a rinn-eadh, thug e glòir do Dhia, ag radh, Gu fìrinneach b' ionracan an duine so.

48 Agus an sluagh uile a chruinnich dh'ionnsuidh an t-seallaidh sin, an uair a chunnaic iad na nithe a rinneadh, phill iad air an ais, a bualadh an uchd.

49 Agus sheas a luchd-eòlais uile, agus na mnà a lean e o Ghalile, am fad uaith, ag amharc air na nithibh sin.

50 Agus, feuch, duine àraidh d' am b' ainm Ioseph, comhairleach, a bha 'na dhuine maith, agus 'na fhìrean;

51 (Cha d'aontaich an duine so d' an comhairle no d' an gnìomh;) O Arimatea, baile leis na h-Iudhaich; neach mar an ceudna aig an robh sùil ri rioghachd Dhé.

52 Chaidh esan gu Pilat, agus dh'iarr e corp Iosa.

53 Agus air dha a thoirt a nuas, phaisg e ann an lìon-eudach e, agus chuir e ann an uaigh e a chladhaicheadh á carraig, anns nach do chuireadh aon duine riamh roimhe.

54 Agus b' e sin là an ulluchaidh, agus bha an t-sàbaid am fagus.

55 Agus lean na mnà a thàinig maille ris o Ghalile, agus chunnaic iad an uaigh, agus cionnus a chuireadh a chorp.

56 Agus phill iad, agus dh'ulluich iad spìosraidh, agus oladh deadh fhàile; agus ghabh iad tàmh air là na sàbaid, a réir na h-àithne.

CAIB. XXIV.

ANIS air a cheud là do 'n t-seachduin, gu ro mhoch air mhaduinn, thàinig iad chum na h-uaighe, a' toirt leo nan spìosraidh a dh'ulluich iad, agus mnà àraidh eile maille riu.

2 Agus fhuairead iad a' chlach air a caruchadh o 'n uaigh.

3 Agus air dhoibh dol a steach cha d'fhuairead iad corp an Tigh-earn Iosa.

4 Agus am feadh a bha iad an ioma-cheisd mu 'n ni so, feuch, sheas dithis dhaoine làimh riu ann an eudaichibh dealrach.

5 Agus air dhoibh bhi fuidh eagal, agus a' cromadh an aghaidh chum na talmhainn, thubhairt iad riu, C'ar son a ta sibh ag iarraidh an tì a ta beò am measg nam marbh?

6 Cha 'n 'eil e 'n so, ach dh'éirich e: cuimhnichibh mar a labhair e ribh air dha bhi fathast ann an Galile,

7 Ag ràdh, Is éigin do Mhac an duine bhi air a thoirt thairis do làmhaibh dhaoine peacach, agus a bhi air a chéusadh, agus éirigh a ris an treas là.

8 Agus chuimhnich iad a bhriathran.

9 Agus air dhoibh pilltinn o'n uaigh, dh'innis iad na nithe so uile do'n aon fhear deug, agus do chàch uile.

10 Agus b' i Muire Magdalen, agus Ioanna, agus Muire màthair Sheumais, agus mnà eile maille riu, a dh'innis na nithe so do na h-abstolaibh.

11 Agus mheasadh am briathra leo-san mar sgeula faoine, agus cha do chreid siad iad.

12 An sin air éirigh do Pheadar, ruith e chum na h-uaighe; agus air dhacromadhsios, chunnaic e 'n lìon-eudach 'na luidhe leis féin, agus dh'fhalbh e, a'

gabhail iongantais leis féin mu'n ni so a rinneadh.

13 Agus, feuch, bha dithis diubh a' dol air an là sin féin gu baile d'am b'ainm Emaus, a bha trì fichead stàid o Ierusalem.

14 Agus bha iad a' labhairt eatorra féin mu thimchioll nan nithe ud uile a thachair.

15 Agus an uair a bha iad a' còmhradh, agus a' co-reusonachadh, thàinig Iosa e féin am fagus, agus dh'imich e maille riu.

16 Ach bha 'n sùilean air an cumail, air chor as nach d'aithnich iad e.

17 Agus thubhairt e riu, Ciod e an còmhradh so air am bheil sibh a' teachd eadaraibh féin, ag imeachd dhuibh, agus sibh dubhach?

18 Agus fhreagair fear diubh d'am b'ainm Cleopas, agus thubhairt e ris, Am bheil thusa a mhàin a' d' choigreach an Ierusalem, agus gun fhios agad air na nithibh a rinneadh innte anns na làithibh so?

19 Agus thubhairt e riu, Ciod na nithe? Agus thubhairt iad-san ris, Na nithe a thaobh Iosa o Nasaret, a bha' na fhàidh cumhachdach ann an gnìomh agus ann am focal am fianuis Dé, agus an t-sluaigh uile:

20 Agus cionnus a thug na h-àrd-shagairt agus ar n-uachdarain thairis chum ditidh bàis e, agus a chéus iad e.

21 Ach bha dùil againne gu'm b'esan an tì a bha gu Israel a shaoradh; agus a thuilleadh air so uile, is e 'n diugh an treas là o rinneadh na nithe so.

22 Agus mar an ceudna, chuir mnà àraidh dhinn féin, a chaidh gu moch a dh'ionnsuidh na h-uaigne, mòr-ìoghnadh oirnn:

23 Agus an uair nach d'fhuair iad a chor, thàinig iad, ag ràdh,

gu'm fac iad sealladh do aingil bh a thubhairt gu bheil e beò.

24 Agus chaidh dream àraidh dhiubh-san a bha maille ruinn féin, chum na h-uaigne, agus fhuair iad eadhon mar thubhairt na mnà; ach cha'n fhac iad esan.

25 An sin thubhairt e riu, O dhaoine amaideach, agus mall-chridheach a chreidsinn nan nithe sin uile a labhair na fàidhean!

26 Nach b'éigin do Chrìosd na nithe so fhulang, agus dol a steach d' a ghloir?

27 Agus air dha tòiseachadh o Mhaois, agus o na fàidhibh uile, dh'eadar-mhìnich e dhoibh anns na sgrìobtuiribh uile na nithe m' a thimchioll féin.

28 Agus dhruid iad ris a' bhaile, d' an robh iad a' dol: agus leig esan air gu'n rachadh e ni b'fhaide.

29 Ach cho-éignich iadsan e, ag ràdh, Fan maille ruinne, oir a ta e dlùth do'n fheasgar, agus tha deireadh an là ann. Agus chaidh e steach a dh'fhuireach maille riu.

30 Agus an uair a shuidh e gu biadh maille riu, air dha aran a ghlacadh, bheannaich se e, agus, bliris se e, agus thug e dhoibh e.

31 Agus dh'fhosgladh an sùilean, agus dh'àithnich iad e; agus chaidh e as an t-sealladh.

32 Agus thubhairt iad r' a chéile, Nach robh ar cridhe a' lasadh annainn, am feadh a bha e a' labhairt ruinn air an t-slighe, agus an uair a dh'fhosgail e dhuinn na sgrìobtuirean?

33 Agus dh'éirich iad air an uair sin féin, agus phill iad gu Ierusalem, agus fhuair iad an t-aon fhear deug cruinn an ceann a chéile, agus an dream a bha maille riu,

34 Ag ràdh, Dh'éirich an Tighearna da rìreadh, agus chunnacas le Simon e.

35 Agus dh'innis iad na nithe a rinneadh air an t-slighe, agus mar a dh'aithnicheadh leo e ann am briseadh an arain.

36 Agus ag labhairt nan nithe so dhoibh, sheas Iosa féin 'nam meadhon, agus thubhairt e riu, Sìth maille ribh.

37 Ach bha iadsan fuidh gheiltchrith agus fuidh eagal, agus shaoil iad gur spiorad a chunn-aic iad.

38 Agus thubhairt e riu, C'ar son a ta sibh fo bhuaireas, agus c'ar son a ta smuaintean ag éirigh suas ann bhur cridheach-aibh?

39 Feuchaibh mo làmhan agus mo chosan, gur mi féin a th'ann: làimhsichibh mi, agus faicibh; oir cha'n 'eil aig spiorad feoil agus cnàmha, mar a chì sibh agam-sa.

40 Agus an uair a thubhairt e so, nochd e dhoibh a làmhan agus a chosan.

41 Agus air dhoibh bhi fathast mì-chreideach troimh aoibhneas, agus iad fuidh iongantas, thubhairt e riu, Am bheil biadh sam bith agaibh an so?

42 Agus thug iad da mìr do iasg ròiste, agus do chìr-mheala.

43 Agus ghlac se e, agus dh'ith e 'nam fianuis.

44 Agus thubhairt e riu, 'S iad so na briathran a labhair mi

ribh, 'nuair a bha mi fathast maille ribh, gur éigin do na h-uile nithibh a ta sgriobhta ann an lagh Mhaois, agus anns na fàidhibh, agus anns na salmaibh mu m' thimchioll-sa, bhi air an coimhlionadh.

45 An sin dh'fhosgail e an tuigse, chum gu'n tuigeadh iad na sgriobtuirean.

46 Agus thubhairt e riu, Mar so a ta e sgriobhta, agus mar so b' éigin do Chrìosd fulang, agus éirigh o na marbhaibh an treas là:

47 Agus aithreachas agus maitheanas peacaidh bhi air an searmonachadh 'na ainm-san, do na h-uile chinnich, a' tòiseachadh aig Ierusalem.

48 Agus is fianuisean sibhse air na nithibh so.

49 Agus, feuch, cuiridh mise gealladh m' Athar oirbh: ach fanaibh-sa ann am baile Ierusalem, gus an sgeadaichear le cumhachd o na h-àrdaibh sibh.

50 Agus thug e mach iad co fhad ri Betani; agus thog e suas a làmhan, agus bheannaich e iad.

51 Agus am feadh a bha e 'gam beannachadh, dhealaich-eadh riu e, agus thogadh suas gu nèamh e.

52 Agus rinn iad aoradh dha, agus phill iad gu Ierusalem le gàirdeachas mòr:

53 Agus bha iad a ghnàth anns an teampull, a' moladh agus a' beannachadh Dhé. Amen.

AN SOISGEUL A REIR EOIN.

CAIB. I.

ANNS an toiseach bha am Focal, agus bha am Focal maille ri Dia, agus b' e am Focal Dia.

2 Bha e so air tùs maille ri Dia.

3 Rinneadh na h-uile nithe leis; agus as eugmhais cha d'-rinneadh aon ni a rinneadh.

4 Ann-san bha beatha, agus b' i a' bheatha solus dhaoine.

5 Agus tha 'n solus a' soill-seachadh anns an dorchadas, agus cha do ghabh an dorchadas e.

6 Chuireadh duine o Dhia, d'am b' ainm Eoin.

7 Thàinig esan mar fhianuis, chum fianuis a thoirt mu'n t-solus, chum gu'n creideadh na h-uile dhaoine trid-san.

8 Cha b' esan an solus sin, ach *chuireadh e* chum gu tugadh e fianuis mu'n t-solus.

9 B'e so an solus fìor a ta soill-seachadh gach uile dhuine tha teachd chum an t-saoghail.

10 Bha e anns an t-saoghal, agus rinneadh an saoghal leis, agus cha d'aithnich an saoghal e.

11 Thàinig e dh'ionnsuidh a dhùthcha féin, agus cha do ghabh a *mhuinntir* féin ris.

12 Ach a mheud as a ghabh ris, thug e dhoibh cumhachd a bhi 'nan cloinn do Dhia, *eadhon* dhoibh-san a ta creidsinn 'na ainm:

13 A bha air an gineamhuin, cha'n ann o fhuil, no o thoil na feòla, no o thoil duine, ach o Dhia.

14 Agus rinneadh am Focal 'na fheoil, agus ghabh e còmhnuidh 'nar measg-ne, (agus chunnaic sinn a ghlòir, mar ghlòir aoin ghin Mhic an Athar,) làn gràis agus firinn.

15 (Thug Eoin fianuis uime, agus ghlaodh e, ag ràdh, Is e so an Tì mu'n do labhair mi, An Tì a ta teachd a'm' dhéigh, tha toiseach aig orm; oir bha e rònham.)

16 Agus as a lànachd-san fhuair sinn e uile, agus gràs air son gràis.

17 Oir thugadh an lagh le Maois, ach thàinig an gràs agus an fhirinn le Iosa Crìosd.

18 Cha'n fhaca neach air bith Dia riamh; an t-aon-ghin Mic, a ta ann an uchd an Athar, is esan a dh'fhoillsich e.

19 Agus is i so fianuis Eoin: An uair a chuir na h-Iudhaich sagairt agus Lebhithich o Ierusalem, chum gu'm fiosraicheadh iad deth, Cò thusa?

20 Dh'aidich esan, agus cha d'àicheadh e; ach dh'aidich e, Cha mhi Crìosd.

21 Agus dh'fhiosraich iad deth, Cìod ma seadh? An tu Elias? Agus thubhairt e, Cha mhi. An tu am fàidh? Agus fhreagair e, Cha mhi.

22 An sin thubhairt iad ris, Cò thu? chum gu'n toir sinn freagradh dhoibh-san a chuir *uatha* sinn: cìod a tha thu 'g ràdh mu do thimchioll féin?

23 Thubhairt e, *Is* mise guth an Tì a ghlaodhas anns an fhàsach, Dèanaibh dìreach slighe an Tighearna, mar thubhairt am fàidh Esaias.

24 Agus an dream a chuir eadh *leis an teachdaireachd*, b'ann do na Phairisich iad.

25 Agus dh'fhiosraich iad deth, agus thubhairt iad ris, C'ar son ma seadh a ta thu a' baisteadh, mur tu Crìosd, no Elias, no am fàidh?

26 Fhreagair Eoin iad, ag ràdh, A ta mise a' baisteadh le h-uisge; ach a ta neach 'na sheasamh 'nur measg, nach aithne dhuibh;

27 Is e so an Tì, a ta teachd a'm' dhéigh-sa, aig am bheil toiseach orm, neach nach airidh mise air barr-iall a bhròige fhuasgladh.

28 Rinneadh na nithe so ann am Betani air an taobh thall do Iordan, far an robh Eoin a' baisteadh.

29 Air an là màireach chunnaic Eoin Iosa a' teachd d'a ionn-

suidh, agus thubhairt e, Feuch Uan Dé, a ta toirt air falbh peacaidh an t-saoghail!

30 Is e so an Tì mu'n dubhairt mi, Tha fear a' teachd a'm' dhéigh, aig am bheil barrachd orm; oir bha e romham.

31 Agus cha robh aithne agam-sa air: ach a chum gu'm bitheadh e air fhoillseachadh do Israel, uime sin thàinig mi a' baisteadh le h-uisge.

32 Agus thug Eoin fianuis, ag ràdh, Chunnaic mi an Spiorad a' teachd a nuas mar choluman o nèamh, agus ghabh e còmh-nuidh air.

33 Agus chab'aithne dhomh-sa e: ach an Tì a chuir mi a bhaisteadh le h-uisge, thubhairt esan rium, Ge b' e air am faic thu an Spiorad a' teachd a nuas agus a' gabhail còmh-nuidh air, is e sin an Tì a bhaisteadh leis an Spiorad naomh.

34 Agus chunnaic mi, agus rinn mi fianuis, gur e so Mac Dhé.

35 Air an là maireach a ris sheas Eoin, agus dithis d'a dheis-cioblubh;

36 Agus air dha amharc air Iosa agus e ag imeachd, thubhairt e, Feuch Uan Dé!

37 Agus chual an dithis dheis-ciobul e a' labhairt, agus lean iad Iosa.

38 Agus air tionndadh do Iosa, chunnaic e iad 'ga leant-uinn, agus thubhairt e riu, Ciod a ta sibh ag iarraidh? Thubhairt iadsan ris, Rabbi, (is e sin r' a ràdh, air eadar-theangachadh, A mhaighstir,) c'àit am bheil thu gabhail còmh-nuidh?

39 Thubhairt e riu, Thigibh agus faicibh. Thàinig iad agus chunnaic iad c'àit an robh e gabhail còmh-nuidh, agus dh'fhan iad maille ris an là sin: oir bha e mu thimchioll na deicheamh uaire.

40 B' e Aindreas, bràthair Shimoin Pheadair, aon do 'n dithis a chual Eoin a' labhairt, agus a lean esan.

41 Fhuair esan air tùs a bhràthair féin Simon, agus thubhairt e ris, Fhuair sinne am Mesias, is e sin, air eadar-theangachadh, Crìosd.

42 Agus thug e chum Iosa e; Agus an uair a dh'amhairc Iosa air, thubhairt e, is tusa Simon mac Iona: gairmear Cephas dhìot, is e sin air eadar-theangachadh, Peadar.

43 Air an là 'na dhéigh sin, bu toil le Iosa dol a mach do Ghalile, agus fhuair e Philip, agus thubhairt e ris, Lean mise.

44 A nis bha Philip o Bhet-saida, baile Aindreais agus Pheadair.

45 Fhuair Philip Natanael, agus thubhairt e ris, Fhuair sinne an Tì mu 'n do sgriobh Maois anns an lagh, agus na fàidhean, Iosa o Nasaret, mac Ioseiph.

46 Agus thubhairt Natanael ris, Am feud ni maith air bith teachd á Nasaret? Thubhairt Philip ris, Thig agus faic.

47 Chunnaic Iosa Natanael a' teachd d' a ionnsuidh, agus thubhairt e uime, Feuch Israeleach da rìreadh, anns nach 'eil cealg!

48 Thubhairt Natanael ris, Cionnus is aithne dhuit mi? Fhreagair Iosa agus thubhairt e ris, Mun do ghairm Philip thu, 'nuair a bha thu fo 'n chrann-fhige, chunnaic mise thu.

49 Fhreagair Natanael agus thubhairt e ris, Rabbi, is tusa Mac Dhé; is tu Rìgh Israeil.

50 Fhreagair Iosa agus thubhairt e ris, A chionn gu'n dubhairt mi riut, chunnaic mi thu fo 'n chrann-fhìge, am bheil thu creidsinn? chì thu nithe a' s mò na iad so.

51 Agus thubhairt e ris, Gu deimhin deimhin a ta mi ag ràdh ribh, 'Na dhéigh so chì sibh nèamh fosgailte, agus aingil Dhé a' dol suas agus a' teachd a nuas air Mac an duine.

CAIB. II.

AGUS air an treas là bha pòsadh ann an Cana Ghalile; agus bha màthair Iosa an sin.

2 Agus fhuair Iosa mar an ceudna agus a dheisciobuil cuir-eadh chum a' phòsaidh.

3 Agus air teireachdainn do 'n fhìon, thubhairt màthair Iosa ris, Cha'n 'eil fìon aca.

4 Thubhairt Iosa rithe, Ciod e moghnothuch-sa riut, a bhean? cha d'thàinig m' uair-sa fathast.

5 Thubhairt a màthair ris an luchd-frithealaidh, Ge b' e ni a their e ribh, dèanaibh e.

6 Agus bha sè soithichean uisge do chloich air an cur an sin, a réir gnàtha glanaidh nan Iudhach, a ghabhadh dà fheircin no trì gach aon diubh.

7 Thubhairt Iosa riu, Lìonaibh na soithiche le uisge. Agus lìon siad iad gus am beul.

8 Agusthubhairteriu, Tairngibh a nis, agus thugaibh chum uachdarain na cuirme. Agus thug iad *ann e*.

9 'Nuair a bhlais uachdaran na cuirme an t-uisge a rinneadh 'na fhìon, (agus cha robh fhios aige cia as a thàinig e; ach bha fhios aig an luchd-frithealaidh a tharruing an t-uisge,) ghairm uachdaran na cuirme am fear nuadh-pòsda.

10 Agus thubhairt e ris, Cuiridh gach duine fion maith a làthair air tùs; agus an uair a dh'òlas daoine gu leoir, an sin *am f'ion a's miosa: ach* ghléidh thusa am fion maith gus a nis.

11 An toiseach so do mhiorbhuilibh rinn Iosa ann an Cana

Ghalile, agus dh'fhoillsich e a ghloir; agus chreid a dheisciobuil ann.

12 An déigh so chaidh e sìos do Chapernaum, e féin, agus a mhàthair, agus a bhràithrean, agus a dheisciobuil; agus cha d'fhan iad ann mòran do làithibh.

13 Agus bha càisg nan Iudhach am fagus; agus chaidh Iosa suas gu Ierusalem.

14 Agus fhuair e 'nan suidhe anns an teampull luchd-reicidh cruiddh, agus chaorach, agus choluman, agus luchd-malairt an airgid:

15 Agus air dèanamh sgiùrs-air dha do chòrdaibh caola, dh'fhuadaich e mach as an teampull iad uile, agus na caoraich agus an crodh; agus dhòirt e mach airgid an luchd-malairt, agus thilg e na bùird thairis;

16 Agus thubhairt e riusan a bha reiceadh choluman, Tog-aibh iad sin a so; na dèanaibh tigh m' Athar-sa 'na thigh mars-andachd.

17 Agus chuimhnich a dheisciobuil gu 'n robh e sgrìobhta, Dh'ith eud do thighe suas mi.

18 An sin fhreagair na h-Iudhaich, agus thubhairt iad ris, Ciod an comhar a nochdas tu dhuinne, do bhrìgh gu bheil thu dèanamh nan nìthe sin?

19 Fhreagair Iosa agus thubhairt e riu, Leagaibh sìos an teampull so, agus an trì làithibh cuiridh mise suas e.

20 Ansin thubhairt na h-Iudhaich, Sè bliadhna agus dà fhichead bha an teampull so 'ga thogail, agus an cuir thusa suas an trì làithibh e?

21 Ach labhair esan mu theampull a chuirp.

22 Uime sin an uair bha e air éirigh o na marbhaibh, chuimhnich a dheisciobuil gu 'n dubh-

airt e so: agus chreid iad an sgriobtuir, agus am focal a thubhairt Iosa.

23 A nis an uair a bha e an Ierusalem aig a' chàisg, air an fhéill, chreid mòran 'na ainm, an uair a chunnaic iad na mìorbhuilean a rinn e.

24 Ach cha d' earb Iosa e féin riu, do bhrìgh gu'm b' aithne dha na h-nìle dhaoine,

25 Agus nach robh feum aige neach air bith a' dhèanamh fianuis air duine: oir bha fhios aige ciod a bha anns an duine.

CAIB. III.

A GUS bha duine do na Phairisich, d'am b' ainm Nicodemus, a bha 'na uachdaran air na h-Iudhaich:

2 Thàinig esan chum Iosa san oidheche, agus thubhairt e ris, A mhaighstir, tha fhios againn gur fear-teagaisg thu a thàinig o Dhia: oir cha'n urrainn duine air bith na mìorbhuile so a dhèanamh a ta thusa a' dèanamh, mur bì Dia maille ris.

3 Fhreagair Iosa agus thubhairt e ris, Gu deimhin deimhin a ta mi ag ràdh riut, mur beirear duine a ris, nach feud e rioghachd Dhé fhaicinn.

4 Thubhairt Nicodemus ris, Cionnus a dh'fheudas duine bhi air a bhreith 'nuair a ta e aosda? am bheil e comasach air dol a stigh an dara uair do bhroinn a mhàthar, agus a bhi air a bhreith?

5 Fhreagair Iosa, Gu deimhin deimhin a ta mi ag ràdh riut, mur bì duine air a bhreith o uisge, agus o'n Spiorad, cha'n urrainn e dol a steach do rìoghachd Dhé.

6 An ni sin a ta air a bhreith o'n fheoil, is feoil e; agus an ni sin a ta air a bhreith o'n Spiorad, is spiorad e.

7 Na gabh iongantas gu'n dubhairt mi riut, Is éigin duibh bhi air bhur breith a ris.

8 Tha a' ghaoth a' séideadh far an àill leatha, agus tha thu a' cluinntinn a fuaim, ach cha'n 'eil fhios agad cia as a tha i teachd, no c'àit a tha i dol: is ann mar sin a tha gach neach a tha air a bhreith o'n Spiorad.

9 Fhreagair Nicodemus agus thubhairt e ris, Cionnus a dh'fheudas na nithe so bhi?

10 Fhreagair Iosa agus thubhairt e ris, Am bheil thusa a' d'fhear-teagaisg Israeil, agus nach aithne dhuit na nithe so?

11 Gu deimhin deimhin a ta mi ag ràdh riut, gu bheil sinne a' labhairt an ni a's fios duinn, agus a toirt fianuis air an ni sin a chunnaic sinn; agus cha ghabh sibhse ar fianuis.

12 Ma dh'innis mi dhuibh nithe talmhaidh, agus nach creid sibh, cionnus a chreideas sibh ma dh'innseas mi dhuibh nithe nèamhaidh?

13 Agus cha deachaidh aon neach suas do nèamh, ach an Tì a thàinig a nuas o nèamh. Mac an duine a ta air nèamh.

14 Agus mar a thog Maois suas an nathair san fhàsach, is an mar sin is éigin do Mhac an duine bhi air a thogail suas:

15 Chum as ge b'e neach a chreideas ann, nach sgriosar e, ach gu'm bì a' bheatha mhair-eannach aige.

16 Oir is ann mar sin a ghràdhaich Dia an saoghal, gu'n d'thug e 'aon-ghin Mhic féin, chum as ge b'e neach a chreideas ann, nach sgriosar e, ach gu'm bì a' bheatha shìorruidh aige.

17 Oir cha do chuir Dia a Mhac do'n t-saoghal, chum gu'n d'iteadh e an saoghal, ach a chum

gu'm biodh an saoghal air a shaoradh trid-san.

18 An tì a chreideas ann, cha dìtear e: ach an tì nach creid, tha e air a dhìteadh cheana, a chionn nach do chreid e an ainm aoin-ghin Mhic Dhé.

19 Agus is e so an dìteadh, gu'n d'fhàinig an solus do'n t-saoghal, agus gu'n doghràdh-aich daoine an dorchadas ni's mò na'n solus, a chionn gu'n robh an gnìomharan olc.

20 Oir gach neach a ta dèanamh uile, tha e toirt fuatha do'n t-solus, agus cha 'n 'eil e teachd chum an t-soluis, air eagal gu'm biodh 'oibre air an cronachadh.

21 Ach an tì a nì an fhìrinn, thig e chum an t-soluis, chum gu'm bì 'oibre follaiseach, gur ann an Dia a rinneadh iad.

22 An déigh sin thàinig Iosa agus a dheisciobuil do thir Iudea; agus dh'fhan e an sin maille riu, agus bhaist e.

23 Agus bha Eoin mar an ceudna a' baisteadh ann an Enon, làimh ri Salim, do bhrìgh gu'n robh mòran uisgeachan an sin; agus thàinig iad, agus bhaisteadh iad.

24 Oir cha robh Eoin fathast air a thilgeadh am prìosan.

25 An sin dh'éirich ceisd eadar deisciobuil Eoin agus na h-Iudhaich, mu thimchioll glan-aidh.

26 Agus thàinig iad chum Eoin, agus thubhairt iad ris, A mhaighstir, an tì a bha maille riut an taobh thall do Iordan, d'an d' thug thu fianuis, feuch, tha esan a' baisteadh, agus tha na h-uile dhaoine a' teachd d' a ionnsuidh.

27 Fhreagair Eoin agus thubhairt e, Cha 'n 'eil duine comasach air ni sam bith a ghabhail, mur bì e air a thoirt da o nèamh.

28 Tha sibhse féin a' toirt

fianuis dhomh-sa, gu'n dubhairt mi, Cha mhi Crìosd, ach gu'n do chuireadh roimhe mi.

29 An tì aig am bheil a' bhean nuadh-phòsda, is e am fear nuadh-phòsda e: ach caraid an fhir nuadh-phòsda, a ta 'na sheasamh agus ag éisdeachd ris, tha e a' dèanamh gàirdeachais mhòir air son gutha an fhir nuadh-phòsda: uime sin tha mo ghàirdeachas so air a choimhlionadh.

30 Is éigin dasan fàs, ach dhomh-sa bhi air mo lughdachadh.

31 An Tì a thig a nuas, tha e os ceann nan uile: an tì a tha o'n talamh, tha e talmhaidh, agus labhraidh e air mhodh talmhaidh: an Tì a thig o nèamh, tha e os ceann nan uile.

32 Agus an ni a chunnaic agus a chual e, air sin tha e toirt fianuis; agus cha 'n 'eil aon duine a' gabhail r' a fhianuis.

33 An tì a ghabh r' a fhianuis-san, chuir e a sheula ris, gu bheil Dia fìor.

34 An Tì a chuir Dia uaith, tha e a' labhairt bhriathra Dhé: oir cha 'n ann a réir tomhais a tha Dia a' toirt an Spioraid da.

35 Is toigh leis an Athair am Mac, agus thug e na h-uile nithe 'na làimh.

36 An tì a chreideas anns a' Mhac, tha a' bheatha mhair-eannach aige; ach an tì nach 'eil a' creidsinn anns a' Mhac, cha'n fhaic e beatha; ach a ta fearg Dhé a' gabhail còmhnuidh air.

CAIB. IV.

AIR an aobhar sin an uair a thuig Iosa gu'n cuala na Phairisich gu'n robh e a' dèanamh agus a' baisteadh tuilleadh dheisciobul na Eoin,

2 (Ged nach do bhaist Iosa féin iad ach a dheisciobuil,)

3 Dh'fhàge Iudea, agus chaidh e a ris do Ghalile.

4 Agus b'éigin da dol troimh Shamaria.

5 An sin thàinig e gu baile a *bhuineadh* do Shamaria, ris an abrar Sichar, fagus do'n fhear-ann a thug Iacob d' a mhac Ioseph.

6 A nis bha tobar Iacoib an sin. Uime sin air do Iosa bhi sgith le a thurus, shuidh e mar sin làimh ris an tobar; agus bha e mu thimchioll na seathadh uaire.

7 Thàinig bean o Shamaria a tharruing uisge: thubhairt Iosa rithe, Thoir dhomh-sa deoch.

8 Oir bha a dheisciobuil air dol do 'n bhaile a cheannach bìdh.

9 An sin thubhairt a' bhean o Shamaria ris, Cionnus a ta thusa agus gur Iudhach thu, ag iarraidh deoch uam-sa, a ta am Bhan-samaritanaich? oir cha 'n 'eil comunn aig na h-Iudhaich ris na Samaritanaich.

10 Fhreagair Iosa agus thubhairt e rithe, Nam b'aithne dhuit tiodhlac Dhé, agus cò e a ta 'g ràdh riut, Thoir dhomh deoch, dh'iarradh tu airsan, agus bheireadh e uisge beò dhuit.

11 Thubhairt a' bhean ris, a Thighearn, cha 'n 'eil inneal tarruing agad, agus tha 'n tobar domhain: uime sin cia as a ta an t-uisge beò sin agad?

12 Am mò thusa na ar n-ath-air Iacob, a thug dhuinne an tobar so, agus a dh'òl as e féin, agus a chlann, agus a spréidh?

13 Fhreagair Iosa agus thubhairt e rithe, Ge b'e neach a dh'òlas do 'n uisge so, bithidh tart air a ris:

14 Ach ge b'e neach a dh'òl-as do'n uisge a bheir mise dha, cha bhi tart gu bràth air: ach an t-uisge a bheir mise dha, bithidh e 'na thobar uisge ann, a'

sruthadh suas chum na beatha maireannaich.

15 Thubhairt a' bhean ris, a Thighearn, thoir dhomh-sa an t-uisge so, chum nach bì tart orm, agus nach tig mi an so a tharruing.

16 Thubhairt Iosa rithe, Im-ich, gairm t'fhear-*pòsda*, agus thig an so.

17 Fhreagair a' bhean agus thubhairt i, Cha 'n 'eil fear agam. Thubhairt Iosa rithe, Is maith a thubhairt thu, Cha 'n 'eil fear agam:

18 Oir bha cùignear fhear agad, agus esan a ta agad a nis, cha 'n e t' fhear féin e: thubhairt thu so gu fìor.

19 Thubhairt a' bhean ris, A Thighearn, tha mi faicinn gur fàidh thu.

20 Rinn ar n-aithriche aoradh san t-sliabh so; agus tha sibhse ag ràdh, gur ann an Ierusalem a ta an t-ionad anns an còir aoradh a dhèanamh.

21 Thubhairt Iosa rithe, A bhean, creid mise, gu bheil an uair a' teachd, anns nach dean sibh aoradh do 'n Athair aon chuid san t-sliabh so, no ann an Ierusalem.

22 Tha sibh a' dèanamh aoraidh do'n ni nach aithne dhuibh: tha sinne a' dèanamh aoraidh do'n ni a's aithne dhuinn: oir is ann o na h-Iudhaich a ta slàinte.

23 Ach a ta an uair a' teachd, agus a ta i nis ann, anns an dèan am fìor luchd-aoraidh aoradh do 'n Athair ann an spiorad agus ann am fìrinn: oir a ta an t-Athair ag iarraidh an leithide so do luchd-aoraidh.

24 Is Spiorad Dia, agus is éigin d' a luchd-aoraidh, aoradh a dhèanamh *dha* an spiorad agus am fìrinn.

25 Thubhairt a' bhean ris, Tha fhios agam gu bheil am

Mesias a' teachd, ris an abrar Crìosd: 'nuair a thig esan, innsidh e na h-uile nithe dhuinn.

26 Thubhairt Iosa rithe, Is mise e, a ta labhairt riut.

27 Agus air a so thàinig a dheisciobuil, agus b' iongantach leo gu'n robh e labhairt ris a' mhnaoi: ach cha dubhairt aon neach, Ciod a tha thu 'g iarraidh? no, C'ar son a tha thu labhairt rithe?

28 An sin dh'fhàg a' bhean a soitheach uisge, agus dh'fhalbh i do'n bhaile, agus thubhairt i ris na daoineibh,

29 Thigibh, faicibh duine a dh'innis dhomh-sa na h-uile nithe a rinn mi riamh: Nach e so Crìosd?

30 An sin chaidh iad a mach as a' bhaile, agus thàinig iad d' a ionnsuidh-san.

31 San àm sin féin ghuidh a dheisciobuil air, ag ràdh, A mhaighstir, ith.

32 Ach thubhairt esan riu, Tha agam-sa biadh r' a itheadh air nach 'eil fhios agaibh-sa.

33 Uime sin thubhairt na deisciobuil r' a chéile, An d'thug neach air bith *ni* d' a ionnsuidh r' a itheadh?

34 Thubhairt Iosa riu, Is e mo bhiadh-sa toil an Tì a chuir uaith mi a dhèanamh, agus obair a' chrìochnachadh.

35 Nach abair sibhse, A ta *uine* cheithir mìosan ann fathast, agus *an sin* thig am fogharadh? feuch, a ta mi ag ràdh ribh, Tog-aibh suas bhur sùilean, agus seallaibh air na h-achaibh; oir a ta iad a cheana geal chum an fhogharaidh.

36 Agus an tì a bhuaineas tha e faotainn tuarasdail, agus a' cruinneachadh toraidh chum na beatha maireannaich; chum gu'n dèan an tì a chuireas, agus

an tì a bhuaineas, gàirdeachas le chéile.

37 Agus an so tha an ràdh ud fìor, Gu bheil neach a' cur, agus neach eile a' buain.

38 Chuir mise sibhse a bhuain an nì sin nach do shaothraich sibh: shaothraich daoine eile, agus chaidh sibhse steach 'nan saothair.

39 Agus chreid mòran do Shamaritanaich a' bhaile sin ann, air son cainnte na mnà, a thug fianuis, *ag ràdh*, Dh'innis e dhomh na h-uile nithe a rinn mi riamh.

40 Uime sin an uair a thàinig na Samaritanaich d' a ionnsuidh, ghuidh iad air fantuinn maille riu: agus dh'fhuirich e an sin dà là.

41 Agus chreid mòran tuilleadh air son 'fhocail féin:

42 Agus thubhairt iad ris a' mhnaoi, 'Tha sinn a' creidsinn, cha'n ann á so suas air son do chòmhraidh-sa: oir chuala sinn féin e, agus a ta fhios againn gur e so da rìreadh Crìosd, Slàn-uirgear an t-saoghail.

43 Agus an déigh dà là dh'fhalbh e as a sin, agus chaidh e do Ghalile:

44 Oir thug Iosa féin fianuis, nach 'eil urram aig fàidh 'na thìr féin.

45 Uime sin, an uair a thàinig e do Ghalile, ghabh na Galiléaich ris, air dhoibh na nithe sin uile fhaicinn a rinn e ann an Ierusalem air an fhéill: oir chaidh iadsan mar an ceudna chum na féille.

46 An sin thàinig Iosa a ris do Chana Ghalile, far an d'rinn e fìon do 'n uisge. Agus bha duine cumbachdach àraidh, aig an robh a mhac gu tinn ann an Capernaum.

47 'Nuair a chual esan gu'n robh Iosa air teachd á Iudea

do Ghalile, chaidh e d' a ionn-suidh, agus ghuidh e air gu 'n rachadh e sìos, agus gu 'n slàn- uicheadh e a mhac: oir bha e ri h-uchd bàis.

48 An sin thubhairt Iosa ris, Mur faic sibh comharan agus mìorbhuilean, cha chreid sibh.

49 Thubhairt an duine cumh- achdach ris, A Thighearn, rach sìos mum faigh mo leanaban bàs.

50 Thubhairt Iosa ris, Imich; tha do mhac beò. Agus chreid an duine am focal a labhair Iosa ris, agus dh'imich e.

51 Agus am feadh a bha e fathast a' dol sìos, choinnich a sheirbhisich e, agus dh'innis iad *da*, ag ràdh, Tha do mhac beò.

52 An sin dh'fhiosraich e dhiubh an uair anns an deach- aidh e am feabhas: agus thu- bhairt iad ris, An dé air an t- seachdamh uair dh'fhàg am fiabhras e.

53 An sin dh'aithnich an t-athair gu'm *b' i* an uair sin féin, anns an dubhairt Iosa ris, Tha do mhac beò; agus chreid e féin, agus a theaghlach uile.

54 'Se so a ris an dara mìor- bhuil a rinn Iosa, 'nuair a thàinig e á Iudea do Ghalile.

CAIB. V.

NA dhéigh so bha féill nan Iudhach *ann*; agus chaidh Iosa suas gu Ierusalem.

2 A nis a ta ann an Ierusalem làimh ri *geata* nan caorach loch- an, ris an abrar sa' chainnt Eabhruidhich, Betesda, aig am bheil cùig tighean-fasgaidh.

3 Annta sin bha 'nan luidhe mòr-bhuidheann do dhaoinibh euslan, dalla, bacach, seargta, a' feitheamh ri caruchadh an uisge.

4 Oir chaidh aingeal sìos an àm àraidh san lochan, agus chuire an t-uisge troimh chéile: uime sin an cèud neach a rach-

adh sìos ann, an déigh cur troimh chéile an uisge, rinneadh slàn e a dh' aon tinneas a bhiodh air.

5 Agus bha duine àraidh an sin, a bha ochd bliadhna deug thar fhichead ann an euslaint.

6 'Nuair a chunnaic Iosa esan 'na luidhe, agus fios aige gu 'n robh e nis ùinè fhada *mar sin*, thubhairt e ris, Am miann leat bhi air do dhèanamh slàn?

7 Fhreagair an duine euslan e, A Thighearn, cha'n 'eil duine agam, an uair a chuirear an t-uisge troimh a chéile, a chuir- eas anns an lochan mi: ach am feadh a ta mise teachd, tha neach eile a' dol sìos romham.

8 Thubhairt Iosa ris, Eirich, tog do leabadh, agus imich.

9 Agus air ball rinneadh an duine slàn, agus thog e a leab- adh, agus dh'imich e: agus bha'n t-sàbaid ann air an là sin.

10 Uime sin thubhairt na h-Iudhaich ris an tì a shlànuich- eadh, Is i an t-sàbaid a ta ann; cha'n 'eil e dligheach dhuit do leabadh a ghiùlan.

11 Fhreagair e iad, An Tì a rinn slàn mi, thubhairt esan rium, Tog do leabadh agus im- ich?

12 An sin dh'fhiosraich iad deth, Cò an duine a thubhairt riut, Tog do leabadh agus im- ich?

13 Agus cha robh fhios aig an tì a shlànuicheadh, cò e: oir chaidh Iosa as a shealladh, air do mhòr-shluagh bhi anns an àit.

14 'Na dhéigh so fhuair Iosa e anns an teampull, agus thubh- airt e ris, Feuch, rinneadh slàn thu: na peacaich ni 's mò, air eagal gu 'n tachair ni 's miosa dhuit.

15 Dh'imich an duine, agus dh'innis e do na h-Iudhaich gu'm b' e Iosa rinn slàn e.

16 Agus air a shon so rinn na

h-Iudhaich geur-leanmhuinn air Iosa, agus dh'iarr iad a mharbhadh, do bhrìgh gu'n d'rinn e na nìthe so air an t-sàbaid.

17 Ach fhreagair Iosa iad, 'Tha m' Athair ag oibreachadh gu a nis, agus tha mise ag oibreachadh.

18 Uime sin bu mhòid a dh'iarr na h-Iudhaich a mharbhadh, a chionn nach e mhàin gu'n do bhris e 'n t-sàbaid, ach gu'n dubhairt e mar an ceudna gu'm b' e Dia 'Athair-san, 'ga dhèanamh féin co-ionann ri Dia.

19 Air an aobhar sin fhreagair Iosa, agus thubhairt e riu, Gu deimhin deimhin a ta mi ag ràdh ribh, nach 'eil am mac comasach air ni sam bith a dhèanamh uaith féin, ach an ni a chì e an t-Athair a' dèanamh : oir ge b' e nithe a nì esan, na nithe sin féin nì am Mac mar an ceudna.

20 Oir is ionmhuinn leis an Athair am Mac, agus a ta e a' foillseachadh dha nan uile nithe a tha e féin a' dèanamh : agus foillsichidh e dha oibre a's mò na iad so, air chor as gu'm bì iongantashas oirbhse.

21 Oir mar a ta an t-Athair a' dùsgadh, agus a' beothachadh nam marbh, is amhuil sin a ta am Mac a' beothachadh an dream a's àill leis.

22 Oir cha'n 'eil an t-Athair a' toirt breth air duine sam bith ; ach thug e gach uile bhreith-eanas do'n Mhac :

23 Chum gu'n tugadh na h-uile dhaoine urram do'n Mhac, amhuil mar a ta iad a' toirt urraim do'n Athair. An tì nach 'eil a' toirt urraim do'n Mhac, cha'n 'eil e toirt urraim do'n Athair a chuir uaith e.

24 Gu deimhin deimhin a ta mi ag ràdh ribh, An tì a dh'éisdeas ri m' fhocal-sa, agus a ta creidsinn anns an Tì a chuir

uaith mi, tha a' bheatha-mhair-eannach aige, agus cha tig e chum ditidh ; ach chaidh e thairis o bhàs gu beatha.

25 Gu deimhin deimhin a ta mi ag ràdh ribh, Gu bheil an uair a' teachd, agus gu bheil i nis ann, anns an cluinn na mairbh guth Mhic Dhé : agus an dream a chluinneas, bithidh iad beò.

26 Oir mar a ta aig an Athair beatha ann féin, is amhuil sin a thug e do'n Mhac beatha a bhi aig ann féin ;

27 Agus thug e mar an ceudna dha ùghdarras chum breth a thabhairt, do bhrìgh gur e Mac an duine.

28 Na gabhaibh iongantashas deth so ; oir a ta an uair a' teachd, anns an cluinn iadsan uile a ta sna h-uaighibh a ghuthsan :

29 Agus théid iad a mach ; iadsan a rinn maith, 'chum aiseirigh na beatha ; agus iadsan a rinn olc, chum aiseirigh an damnaidh.

30 Cha'n 'eil mise comasach air ni sam bith a dhèanamh uam féin : mar a chluinneas mi bheir mi breth : agus a ta mo bhreith-eanas ceart ; do bhrìgh nach 'eil mi ag iarraidh mo thoile féin, ach toil an Athar a chuir uaith mi.

31 Ma bheir mise fianuis mu m' thimchioll féin cha'n 'eil m' fhianuis fìor.

32 'Tha neach eile a' toirt fianuis mu m' thimchioll, agus a ta fhios agam gur fìor an fhianuis a ta e dèanamh mu m' thimchioll.

33 Chuir sibhse chum Eoin, agus thug e fianuis do'n fhìrinn.

34 Ach cha'n 'eil mise a' gabhail fianuis o dhuine : ach a ta mi ag ràdh nan nithe so,

chum gu'm bì sibhse air bhur tèarnadh.

35 B'esan an lòchran lasarach agus dealrach: agus bha sibhse toileach car tamuill gàirdeachas a dhèanamh 'na sholus.

36 Ach a ta agam-sa fianuis a's mò na *fianuis* Eoin: oir na h-òibre a thug an t-Athair dhomh-sa chum gu 'n crìoch-naichinn iad, tha na h-oibre sin féin a tha mise a' dèanamh, a' toirt fianuis mu m' thimchioll, gu'n do chuir an t-Athair uaith mi.

37 Agus an t-Athair féin a chuir uaith mi, thug e fianuis mu m' thimchioll. Cha chuala sibh riamh a ghuth, ni mò a chunnaic sibh a choslas.

38 Agus cha 'n 'eil 'fhocal-san agaibh a' gabhail còmhnuidh annaibh: oir an tì sin a chuir esan uaith, cha 'n 'eil sibh 'ga chreidsinn.

39 Rannsaichibh na sgrìobtuirean, oir a ta sibh a' saoil-sinn gu bheil a' bheatha mhair-eannach agaibh annta-san; agus is iad sin a ta toirt fianuis mu m' thimchioll-sa.

40 Gidheadh cha 'n àill leibh teachd a m' ionnsuidh-sa, chum gu'm faigheadh sibh beatha.

41 Cha 'n 'eil mise a' gabhail urraim o dhaoineibh.

42 Ach is aithne dhomh sibhse, nach 'eil gràdh Dhé agaibh annaibh.

43 Thàinig mise an ainm m' Athar, agus cha 'n 'eil sibh a' gabhail rium: ma thig neach eile 'na ainm féin, gabhaidh sibh ris-san.

44 Cionnus a dh'fheudas sibh creidsinn, a ta gabhail urraim o chéile, agus nach 'eil ag iarraidh an urraim a *thig* o Dhia a mhàin?

45 Na saoilibh gu'n dèan mise bhur casaid ris an Athair: tha aon a tha dèanamh casaid oirbh,

Maois, anns am bheil sibh a' cur bhur dòchais.

46 Oir nan creideadh sibh Maois, chreideadh sibh mise: oir sgrìobh esan mu m' thimchioll.

47 Ach mur creid sibh a sgrìobhadh-san, cionnus a chreideas sibh mo bhriathra-sa?

CAIB. VI.

9 **N**A dhéigh sin chaidh Iosa thar muir Ghalile, *no* Thiberiais.

2 Agus lean sluagh mòr e, do bhrìgh gu 'm fac iad a mhìorbhuilean a rinn e air an dream a bha euslan.

3 Agus chaidh Iosa suas air beinn, agus shuidh e an sin maille r' a dheiscioblubh.

4 Agus bha a' chàisg, féill nan Iudhach, am fagus.

5 An sin an uair a thog Iosa suas a shùilean, agus a chunnaic e gu'n d' thàinig buidheann mhòr shluaigh d' a ionnsuidh, thubhairt e ri Philip, Cia an t-àit as an ceannaich sinn aran chum gu 'n ith iad so?

6 (Ach thubhairt e so 'ga dhearbhadh-san; oir bha fhios aige féin ciod a dhèanadh e.)

7 Fhreagair Philip e, Cha leoir dhoibh luach dhà cheud peghinn a dh'aran, chum gu 'n gabhadh gach aon diubh beagan.

8 'Thubhairt aon d' a dheiscioblubh, Aindreas, bràthair Shimoin Pheadair, ris,

9 Tha òganach an so, aig am bheil cùig builinnean eòrna, agus dà iasg bheag: ach ciod iad so am measg na h-uiread?

10 Agus thubhairt Iosa, Thugaibh air na daoineibh suidhe sìos. A nis bha mòran feoir anns an àit. Air an aobhar sin shuidh na daoine sìos, an àireamh timchioll chùig mìle.

11 Agus ghlac Iosa na builinnean, agus air tabhairt buidh-

eachais da, roinn e air na deisciobluibh *iad*, agus na deisciobuil orra-san a shuidh: agus mar an ceudna do na h-iasgaibh beaga, mheud as a b' àill leo.

12 'Nuair a shàsuicheadh iad, thubhairt e r' a dheisciobluibh, Cruinnichibh am biadh briste a ta thuilleadh ann, chum nach caillear a bheag.

13 Air an aobhar sin chruinnich iad e r'a chéile, agus lìon iad dà chliabh dheug do sbruileach nan cùig builinnean eòrna, a bha dh'fhuigheall aig a' mhuinntir a dh'ith.

14 An sin an uair a chunnaic na daoine sin am mìorbhuil a rinn Iosa, thubhairt iad, Gu firinneach is e so am fàidh a bha gu teachd chum an t-saoghail.

15 Uime sin an uair a thuig Iosa gu'n robh iad air tì teachd agus breith air le làimh làidir, chum gu'n dèanadh iad rìgh dheth, dh'imich e ris do'n bheinn 'na aonar.

16 Agus an uair a thàinig am feasgar, chaidh a dheisciobuil sìos chum na mara.

17 Agus air dol an luing dhoibh, chaidh iad thar a' mhuir gu Capernaum: agus bha an dorchadas a nis ann, agus cha robh Iosa air teachd d'an ionnsuidh.

18 Agus ag séideadh doghaoith mhòir, dh'éirich a' mhuir.

19 Uime sin an uair a rinn iad iomramh timchioll cùig no deich thar fhichead do stàidibh, chunnaic iad Iosa ag imeachd air a' mhuir, agus a' druideadh ris an luing; agus ghabh iad eagal.

20 Ach thubhairt esan riu, Is mise ta ann; na biodh eagal oirbh.

21 Uime sin ghabh iad gu toileach a steach do'n luing e:

agus air ball ràinig an long an tìr gus an robh iad a' dol.

22 Air an là 'na dhéigh sin, an uair a chunnaic an sluagh a sheas air taobh eile na mara, nach robh long eile an sin, ach an *long* sin anns an deachaidh a dheisciobuil a steach, agus nach deachaidh Iosa san luing maille r' a dheisciobluibh, ach *gu'n* d'fhalbh a dheisciobuil 'nan aonar;

23 (Gidheadh thàinig longa beaga eile o Thiberias, làimh ris an àit san dh'ith iad an t-aran, an déigh do 'n Tighearn buidheachas a thoirt;)

24 Uime sin an uair a chunnaic an sluagh nach robh Iosa an sin, no a dheisciobuil, chaidh iad féin mar an ceudna ann an longaibh, agus thàinig iad gu Capernaum, ag iarraidh Iosa.

25 Agus air dhoibh fhaotainn air an taobh thall do'n mhuir, thubhairt iad ris, A mhaighstir, c' uin' a thàinig thu an so?

26 Fhreagair Iosa iad agus thubhairt e, Gu deimhin deimhin a ta mi ag ràdh ribh, Tha sibh ga m' iarraidh, cha'n ann a chionn gu'm faca sibh na mìorbhuilean, ach a chionn gu'n d'ith sibh do na builinnibh, agus gu'n do shàsuicheadh sibh.

27 Dèanaibh saothair cha 'n ann air son a' bhìdh a theirgeas, ach air son a' bhìdh a mhaireas chum na beatha sìorruidh, a bheir Mac an duine dhuibh: oir esan sheulaich Dia an t-Athair.

28 An sin thubhairt iad ris, Ciod a ni sinn, chum as gu'n oibrich sinn oibre Dhé?

29 Freagair Iosa agus thubhairt e riu, Is i so obair Dhé, gu'n creid sibh anns an Tì a chuir e uaith.

30 Uime sin thubhairt iad ris, Ciod an comhar a ni thusa ma ta, chum gu'm faic sinn, agus

gu'n creid sinn thu? ciod an obair a nì thu?

31 Dh'ith ar n-aithriche mana san fhàsach; a réir mar a ta e sgrìobhta, Thug e dhuibh aran o nèamh r' a itheadh.

32 An sin thubhairt Iosa riu, Gu deimhin deimhin a ta mi ag ràdh ribh, nach d' thug Maois dhuibh an t-aran o nèamh; ach a ta m' Athair-sa a' toirt dhuibh an arain fhior o nèamh.

33 Oir is e sin aran Dhé a ta teachd a nuas o nèamh, agus a ta tabhairt beatha do 'n t-saoghail.

34 An sin thubhairt iad ris, A Thighearn, thoir dhuinne an t-aran so an còmhnuidh.

35 Agus thubhairt Iosa riu, Is mise aran na beatha: an tì a thig a m' ionnsuidh-sa, cha bhi ocras gu bràth air; agus an tì a chreideas annam-sa, cha bhi tart gu bràth air.

36 Ach mar a thubhairt mi ribh, ge do chunnaic sibh mi, cha'n 'eil sibh a' creidsinn.

37 Gach ni a bheir an t-Athair dhomh-sa, thig e a m' ionnsuidh; agus an tì a thig a m' ionnsuidh, cha tilg mi air chor sam bith a mach e.

38 Oir thàinig mi nuas o nèamh, cha 'n ann chum gu 'n deanainn mo thoil féin, ach toil an Tì a chuir uaith mi.

39 Agus is i so toil an Athair a chuir uaith mi, nach caillinn a bheag sam bith do 'n uile a thug e dhomh, ach gu 'n togainn suas e ris air an là dheireannach.

40 Agus is i so toil an Tì a chuir uaith mi, gu 'm biodh a' bheatha mhaireannach aig gach neach a chì am Mac, agus a chreideas ann: agus togaidh mise suas e air an là dheireannach.

41 An sin rinn na h-Iudh-

aich gearan uime, a chionn gu'n dubhairt e, Is mise an t-aran a thàinig a nuas o nèamh.

42 Agus thubhairt iad, Nach e so Iosa mac Ioseiph, neach aig an aithne dhuinn 'athair agus a mhàthair? cionnus ma seadh a ta e ag ràdh, Thàinig mi nuas o nèamh.

43 Air an aobhar sin fhreagair Iosa agus thubhairt e riu, Na dèanaibh gearan 'nur measg féin.

44 Cha 'n urrainn neach air bith teachd a m' ionnsuidh-sa, mur tarraing an t-Athair a chuir uaith mise e: agus togaidh mise suas e air an là dheireannach.

45 Tha e sgrìobhta sna fàidhibh, Agus bithidh iad uile air an teagasg o Dhia. Uime sin gach neach a chuala, agus a dh'fhòghluim o 'n Athair, thig e a m' ionnsuidh-sa.

46 Cha 'n e gu 'm faca neach sam bith an t-Athair, ach an Tì a ta o Dhia; chunnaic esan an t-Athair.

47 Gu deimhin deimhin a ta mi ag ràdh ribh, An tì a ta creidsinn annam-sa, tha bheatha mhaireannach aige.

48 Is mise aran na beatha.

49 Dh'ith bhur n-aithriche mana san fhàsach, agus fhuair iad bàs.

50 Is e so an t-aran a tha teachd a nuas o nèamh, chum as gu 'n ith neach dheth, agus nach faigh e bàs.

51 Is mise an t-aran beò, a thàinig a nuas o nèamh: ma dh'itheas neach air bith do 'n aran so, bithidh e beò gu sìorruidh: agus an t-aran a bheir mise uam, is e m' fheoil e, a bheir mi air son beatha an t-saoghail.

52 Air an aobhar sin bha connsachadh aig na h-Iudhaich

r' a chéile, ag ràdh, Cionnus a dh'fheudas an duine so 'fheoil a thoirt duinn r' a itheadh.

53 An sin thubhairt Iosa riu, Gu deimhin deimhin a ta mi ag ràdh ribh, mur ith sibh feoil Mhic an duine, agus mur òl sibh 'fhuil, cha 'n 'eil beatha ag-aibh annaibh.

54 Esan a dh'itheas m' fheoil-sa, agus a dh'òlas m' fhuil-sa, a ta a' bheatha shìorruidh aige; agus togaidh mise suas e air an là dheireannach.

55 Oir is biadh gu fìrinneach m'fheoil, agus is deoch gu fìrinneach m' fhuil.

56 Esan a dh'itheas m' fheoil-a, agus a dh'òlas m' fhuil-sa, tha e gabhail còmhnuidh annam-sa, agus mise annsan.

57 Mar a ta 'n t-Athair beò a chuir uaith mise, agus a ta mise beò troimh an Athair; is amhuil sin esan a dh'itheas mise, bithidh e mar an ceudna beò tromham-sa.

58 Is e so an t-aran sin a thàinig a nuas o nèamh; cha 'n e mar a dh'ith bhur n-aithriche mana, agus fhuair iad bàs: esan a dh'itheas an t-aran so, bithidh e beò am feasd.

59 Thubhairt e na nithe so anns an t-sionagag, an uair a bha e a' teagasg an Capernaum.

60 Uime sin 'nuair a chual mòran d' a dheisciobluibh so, thubhairt iad, is cruaidh a' chainnt so; cò a dh'fheudas éisd-eachd rithe.

61 'Nuair a thuig Iosa ann féin gu 'n robh a dheisciobuil ri gearan uime so, thubhairt e riu, Am bheil so a' toirt oilbheim dhuibh-sa?

62 Agus *ciod* nam faiceadh sibh Mac an duine a' dol suas do 'n àit anns an robh e roimhe?

63 Is e an Spiorad a bheothaicheas; cha 'n 'eil tairbhe air

bith san fheoil: na briathran a tha mise a' labhairt ribh, is spiorad agus is beatha iad.

64 Ach a ta cuid dibhse nach 'eil a' creidsinn. (Oir b'aithne do Iosa o thùs, cò iad nach robh a' creidsinn, agus cò an tì a bhrathadh e.)

65 Agus thubhairt e, Air an aobhar sin thubhairt mi ribh, nach urrainn neach air bith teachd a' m' ionnsuidh, mur bi e air a thoirt da o m' Athair.

66 O 'n àm sin chaidh mòran d'a dheisciobluibh air an ais, agus cha d'imich iad ni's mò maille ris.

67 An sin thubhairt Iosa ris an dà fhear dheug, An àill leibhse falbh cuideachd?

68 An sin fhreagair Simon Peadar e, A Thighearn, cò dh'ionnsuidh an téid sinn? agadsa tha briathra na beatha maireannaich.

69 Agus a ta sinne a' creidsinn, agus a ta fhios againn gur tusa Crìosd Mac an Dé bheò.

70 Fhreagair Iosa iad, Nach do thagh mise sibhse dà fhear dheug, agus a ta fear agaibh 'na dhiabhul?

71 Ach labhair e mu Iudas Iscariot, *mac* Shimoin: oir is e so an tì a bha gu esan a bhrath, air dha bhi 'na aon do'n dà fhear dheug.

CAIB. VII.

A GUS an déigh nan nithe sin, bha Iosa ag imeachd mu 'n cuairt ann an Galile: oir cha b'àill leis a bhi 'g imeachd ann an Iudea, a chionn gu'n robh na h-Iudhaich ag iarraidh a mharbhadh.

2 Agus bha féill nan Iudhach, *eadhon* féill nam pàillion, am fagus.

3 Uime sin thubhairt abhràithre ris, Imich as so agus rach do

Iudea, chum gu faic do dheis-ciobuil mar an ceudna t'oibre a tha thu a' dèanamh.

4 Oir cha dèan neach air bith aon ni am folach, a dh'iarras e féin a bhi am follais: ma tha thu a' dèanamh nan nithe so, nochd thu féin do 'n t-saogh-al.

5 Oir cha do chreid a bhràithre féin ann.

6 An sin thubhairt Iosa riu, Cha d'thàinig m' àm-sa fathast; ach a ta bhur n-àm-sa ghnàth deas.

7 Cha 'n 'eil e 'n comas do 'n t-saoghal sibhse fhuathachadh; ach fuathaichidh e mise, do bhrìgh gu bheil mi toirt fianuis m'a thimchioll gu bheil 'oibre olc.

8 Rachaibh-sa suas chum na féille so: cha téid mise suas fathast chum na féille so, do bhrìgh nach 'eil m' àm fathast air a choimhlionadh.

9 'Nuair thubhairt e na nithe so riu, dh'fhan e an Galile.

10 Ach an uair a chaidh a bhràithre suas, an sin chaidh esan suas mar an ceudna chum na féille, cha 'n ann am follais, ach margub' ann an uaignidheas.

11 An sin dh'iarr na h-Iudhaich e air an fhéill, agus thubhairt iad, C'ait am bheil e?

12 Agus bha borbhan mòr am measg an t-sluaigh m' a thimchioll: oir thubhairt cuid, Is duine maith e: ach thubhairt cuid eile, Cha 'n eadh; ach a ta e mealladh an t-sluaigh.

13 Gidheadh cha do labhair neach sam bith gu follaiseach uime, air eagal nan Iudhach.

14 A nis mu mheadhon na féille, chaidh Iosa suas do 'n teampull, agus theagaisg e.

15 Agus ghabh na h-Iudhaich iongantas, ag ràdh, Cionnus is aithne do'n duine so litrichean, agus nach d'fhòghluim e?

16 Fhreagair Iosa iad, agus thubhairt e, Cha leam féin mo theagasg, ach leis-san a chuir uaith mi.

17 Ma 's àill le neach sam bith a thoil-san a dhèanamh, bithidh fios aige mu 'n teagasg, an ann o Dhia a ta e, no 'm bheil mise a' labhairt uam féin.

18 An tì a labhras uaith féin, tha e 'g iarraidh a ghlòire féin: ach ge b' e dh'iarras glòir an tì a chuir uaith e, tha esan fìrinn-each, agus cha 'n 'eil eucoir air bith ann.

19 Nach d'thug Maois an lagh dhuibh, agus *gidheadh* cha 'n 'eil aon neach agaibh a' coimhlionadh an lagha? C'ar son a ta sibh ag iarraidh mise a mharbhadh?

20 Fhreagair an sluagh agus thubhairt iad, Tha deamhan agad: cò tha 'g iarraidh do mharbhadh?

21 Fhreagair Iosa agus thubhairt e riu, Rinn mise aon obair, agus a ta iongantas oirbh uile air an aobhar sin.

22 Thug Maois dhuibh an timchioll-ghearradh, (cha 'n e gur ann o Mhaois a ta e, ach o na h-aithrichibh,) agus timchioll-ghearraidh sibhse duine air an t-sàbaid.

23 Ma tha duine air an t-sàbaid a' gabhail timchioll-ghearraidh, chum nach bì lagh Mhaois air a bhriseadh; am bheil fearg agaibh riumsa, a chionn gu 'n d'rinn mi duine uile slàn air an t-sàbaid?

24 Na tugaibh breth a réir coslais, ach thugaibh breth cheart.

25 An sin thubhairt cuid do mhuinntir Ierusalem, Nach e so esan a tha iad ag iarraidh a mharbhadh?

26 Agus, feuch, tha e labhairt gu follaiseach, agus cha 'n

'eil iad ag ràdh ni sam bith ris : am bheil dearbh-fhios aig na h-uachdarain gur e so da rìreadh Crìosd ?

27 Gidheadh is aithne dhuinn an duine so cia as da : ach an uair a thig Crìosd, cha'n aithne do neach air bith cia as da.

28 An sin ghlaodh Iosa san teampull, agus e a' teagasg, ag ràdh, Is aithne dhuibh araon mise, agus cia as domh : agus cha d' thàinig mi uam féin, ach a ta esan fìor a chuir uaith mi, air nach 'eil eòlas agaibh-sa.

29 Ach a ta eòlas agam-sa air ; oir is ann uaith a ta mi, agus chuir esan uaith mi.

30 An sin dh' iarr iad a ghlacadh : ach cha do chuir neach air bith làmh ann, a chionn nach robh 'uair-san fathast air teachd.

31 Agus chreid mòran do'n t-sluagh air, agus thubhairt iad, 'Nuair a thig Crìosd, an dèan e ni's mò do mhìorbhuilibh na iad sin a rinn an duine so ?

32 Chuala na Phairisich gu'n robh an sluagh a' borbhanaich nan nithe so m'a thimchioll : agus chuir na Phairisich agus na h-àrd-shagairt maoir g'a ghlacadh.

33 An sin thubhairt Iosa, Fathast tamull beag tha mise maille ribh, agus an sin a ta mi dol chum an Tì a chuir uaith mi.

34 Iarraidh sibh mi, agus cha'n fhaigh sibh mi : agus do'n àit am b' mi, cha'n urrainn sibhse teachd.

35 An sin thubhairt na h-Iudhaich eatorra féin, C' àit an téid am fear so, nach faigh sinn e ? an téid e chum na muinntir a ta air an sgapadh am measg nan Greugach, agus an teagaisg e na Greugaich ?

36 Cìod i a' chainnt so a thubhairt e, Iarraidh sibh mi, agus cha'n fhaigh sibh mi : agus

do'n àit am bheil mise, cha'n urrainn sibhse teachd ?

37 Air an là dheireannach, là mòr sin na féille, sheas Iosa agus ghlaodh e, ag ràdh, Ma tha tart air neach sam bith, thigeadh e m'ionnsuidh-sa, agus òladh e.

38 An tì a chreideas annam-sa, mar a ta an sgrìobtuir ag ràdh, sruthaidh as a bhroinn ailmhnichean do uisge beò.

39 (Ach labhair e so mu'n Spiorad, a bha iadsan a chreideadh annsan gu fhaghail : oir cha robh an Spiorad fathast air a thubhairt, do bhrìgh nach robh Iosa fathast air a ghlòrachadh.)

40 Uime sin, an uair a chuala mòran do'n t-sluagh a' chainnt so, thubhairt iad, Gu fìrinneach is e so am fàidh.

41 Thubhairt cuid eile, Is e so Crìosd. Ach thubhairt dream eile, An ann o Ghalile a thig Crìosd ?

42 Nach dubhairt an sgrìobtuir, Gu'n tig Crìosd do shìol Dhaibhidh, agus á Betlehem, am baile san robh Daibhibh ?

43 Air an aobhar sin dh' éirich eas-aonachd am measg an t-sluaigh air a shon-san.

44 Agus b' àill le cuid diubh a ghlacadh ; ach cha do chuir duine air bith làmh ann.

45 An sin thàinig na maoir chum nan àrd-shagart agus nam Phairiseach ; agus thubhairt iadsan riu, C' ar son nach d' thug sibh leibh e ?

46 Fhreagair na maoir, Cha do labhair duine riamh mar an duine so.

47 An sin fhreagair na Phairisich iad, Am bheil sibhse mar an ceudna air bhur mealladh ?

48 An do chreid aon air bith do na h-uachdarain ann, no do na Phairisich ?

49 Ach an sluagh so aig nach

'eil eòlas an lagha, tha iad mall-
uichte.

50 Thubhairt Nicodemus riu,
(esan a thàinig d' a ionnsuidh
san oidhche, air dha bhi 'na aon
diubh,)

51 Am bheil ar lagh-ne toirt
breth air duine sam bith gus an
cluinn e uaith féin an toiseach,
agus gus am bi fhios aige ciod
a tha e a' dèanamh?

52 Fhreagair iadsan agus
thubhairt iad ris, Am bheil
thusa mar an ceudna o Ghalile?
Rannsaich, agus faic: oir á Ga-
lile cha d' éirich fàidh.

53 Agus dh' imich gach aon
d' a thigh féin.

CAIB. VIII.

ACH chaidh Iosa chum sléibh
nan crann-oladh:

2 Agus gu moch air mhadauin
thàinig e ris do'n teampull, agus
thàinig an sluagh uile d' a ionn-
suidh; agus air suidhe dha,
theagaisg e iad.

3 Agus thug na sgrìobhaich-
ean agus na Phairisich bean d' a
ionnsuidh a ghlacadh an adhal-
trannas; agus air dhoibh a cur
anns a' mheadhon,

4 Thubhairt iad ris, Amhaigh-
stir, ghlacadh a' bhean so anns
a' ghnìomh fèin, a' deanamh adh-
altrannais.

5 A nis dh' àithn Maois dhuinn
san lagh, an leithide so a chlach-
adh: ciod ma seadh a ta thusa
ag ràdh?

6 Thubhairt iad so 'ga
dhearbhadh, chum gu 'm biodh
aca cùis-chasaid 'na aghaidh.
Ach chrom Iosa sìos, agus sgrìobh
e le 'mheur air an làr, (mar
nach biodh e 'gan cluinn-
tinn.)

7 Mar sin air dhoibh buanach-
adh a' feòraich dheth, thog se e
féin suas agus thubhairt e riu,
An neach a ta gun pheacadh

agaibh-sa, tilgeadh e a' cheud
chlach oirre.

8 Agus chrom e sìos a ris,
agus sgrìobh e air an làr.

9 Agus an uair a chual iad-
san so, (air dhoibh bhi air an
agairt le'n coguis féin,) chaidh
iad a mach an déigh a chéile, a'
tòiseachadh aig an dream bu
shine, gus an dream mu dheir-
eadh: agus dh' fhàgadh 'na aonar
Iosa, agus a' bhean 'na seasamh
sa' mheadhon.

10 Agus 'nuair a dh' éirich
Iosa suas, agus nach fac e aon
air bith ach a' bhean, thubhairt
e rithe, A bhean, c' àit am bheil
iad sud do luchd-casaid? an do
dhìt duine air bith thu?

11 Thubhairt ise, Cha do dhìt
aon duine, a Thighearn. Agus
thubhairt Iosa rithe, Cha mhò
a tha mise ga d' dhìteadh: imich
romhad, agus na peacaich ni 's
mò.

12 An sin labhair Iosa riu a
ris, ag ràdh, Is mise solus an t-
saoghail: an tì a leanas mise,
cha siubhail e an dorchadas, ach
bithidh solus na beatha aige.

13 Uime sin thubhairt na
Phairisich ris, Tha thu toirt
fianuis mu d' thimchioll féin;
cha'n 'eil t' fhianuis fìor.

14 Fhreagair Iosa, agus
thubhairt e riu, Ged tha mi
toirt fianuis mu m' thimchioll
féin, gidheadh a ta m' fhianuis
fìor: oir a ta fhios agam cia as
a thàinig mi, agus c' àit am bheil
mi dol; ach cha'n 'eil fhios
agaibh-sa cia as a thàinig mi, no
c' àit am bheil mi dol.

15 Tha sibhse a' toirt breth
a réir na feòla; cha'n 'eil mise
a' toirt breth air aon duine.

16 Agus gidheadh ma bheir
mise breth, tha mo bhreth fìrinn-
each: oir cha'n 'eil mi m' aonar,
ach mise agus an t-Athair a chuir
uaith mi.

17 Agus a ta e sgrìobhta ann bhur lagh féin, gu bheil fianuis dithis dhaoine fìor.

18 Is aon mise a ta dèanamh fianuis mu m' thimchioll féin, agus a ta an t-Athair a chuir uaith mi, a' dèanamh fianuis mu m' thimchioll.

19 An sin thubhairt iad ris, C'aitam bheil t' Athair? Fhreagair Iosa, Cha'n aithne dhuibhse aon chuid mise no m' Athair: nam biodh eòlas agaibh ormsa, bhiodh eòlas agaibh air m' Athair mar an ceudna.

20 Labhair Iosa na briathra so an tigh-coimhead an ionmhais, ag teagasg dha san teampull: agus cha do chuir duine air bith làmh ann; oir cha robh 'uair fathast air teachd.

21 An sin thubhairt Iosa riu a ris, 'Tha mise a' falbh, agus iarraidh sibh mi, agus bàsaichidh sibh ann bhur peacadh: cha'n urrainn sibhse teachd do'n àit am bheil mise a' dol.

22 An sin thubhairt na h-Iudhaich, Am marbh se e féin? do bhrìgh gu bheil e 'g ràdh, Far am bheil mise a' dol, cha'n urrainn sibhse teachd.

23 Agus thubhairt e riu, Tha sibhse o shìos, tha mise o shuas: tha sibhse do'n t-saoghal so, cha'n 'eil mise do'n t-saoghal so.

24 Uime sin thubhairt mi ribh, Gu'm bàsaich sibh ann bhur peacaibh: oir mur creid sibh gur mise e, gheibh sibh bàs ann bhur peacaibh.

25 An sin thubhairt iad ris, Cò thusa? Agus thubhairt Iosa riu, *An neach* sin féin a thubhairt mi ribh o thùs.

26 'Tha mòran agam ri ràdh, agus r'a bhreithneachadh m'ur timchioll-sa: ach a ta an Tì a chuir uaith mi fìrinneach; agus a ta mise a' labhairt ris an t-

saoghal nan nithe a chuala mi uaith-san.

27 Cha do thuig iad gu'm b'ann mu thimchioll an Athar a labhair e riu.

28 An sin thubhairt Iosa riu, 'Nuair a thogas sibh suas Mac an duine, an sin bithidh fios agaibh gur mise e, agus nach 'eil mi dèanamh ni sam bith uam féin; ach mar a theagaisg m' Athair mi, gu bheil mi labhairt nan nithe so.

29 Agus tha'n Tì a chuir uaith mi maille rium: cha d'fhàg an t-Athair a' m' aonar mi, do bhrìgh gu bheil mi dèanamh a ghnàth nan nithe sin a's taitneach leis.

30 An uair a bha e labhairt nan nithe so, chreid mòran ann.

31 An sin thubhairt Iosa ris na h-Iudhaich a chreid ann, Ma bhvanaicheas sibh ann am fhocal-sa, bithidh sibh da rìreadh 'nur deisciobuil agam;

32 Agus bithidh eòlas agaibh air an fhìrinn, agus nì an fhìrinn saor sibh.

33 Fhreagair iad e, Is sinne sliochd Abrahaim, agus cha robh sinn riamh fo dhaorsa aig duine sam bith: cionnus a ta thusa ag ràdh, Bithidh sibh saor?

34 Fhreagair Iosa iad, Gu deimhin deimhin a ta mi ag ràdh ribh, ge b'e nì peacadh, is seirbhiseach do'n pheacadh e.

35 Agus cha'n fhan an seirbhiseach san tigh gu bràth: *ach* fanaidh am mac gu bràth.

36 Uime sin ma nì am Mac saor sibh, bithidh sibh saor da rìreadh.

37 Tha fhios agam gur sibh sliochd Abrahaim; ach a ta sibh ag iarraidh mise a mharbhadh, do bhrìgh nach 'eil àit aig m' fhocal annaibh.

38 Tha mise a' labhairt an

ni sin a chunnaic mi aig m' Athair; agus tha sibhse a dèanamh an ni a chunnaic sibh aig bhur n-athair féin.

39 Fhreagair iadsan agus thubhairt iad ris, Is e Abraham ar n-athair-ne. Thubhairt Iosa riu, Nam bu chlann do Abraham sibh, dhèanadh sibh oibre Abraham.

40 Ach a nis tha sibh ag iarraidh mise a mharbhadh, duine a dh'innis duibh an fhìrinn, a chuala mi o Dhia: cha d'rinn Abraham so.

41 Tha sibhse a' dèanamh oibre bhur n-athar féin. An sin thubhairt iad ris, Cha d'rugadh an strìopachas sinne; tha aon Athair againn, *eadhon* Dia.

42 An sin thubhairt Iosa riu, Nam b'e Dia bhur n-Athair, ghràdhaicheadh sibh mise: oir chaidh mise mach, agus thàinig mi o Dhia; agus cha d'thàinig mi uam féin, ach chuir esan uaith mi.

43 C'ar son nach 'eil sibh a' tuigsinn mo chòmhradh? do bhrìgh nach urrainn sibh éisd-eachd ri m' fhocal.

44 Tha sibhse o *bhur* n-athair an diabhl, agus is iad anamiana bhur n-athar a's toil leibh a dhèanamh: bha esan 'na mhortair o thùs, agus cha d'fhan e san fhìrinn, a chionn nach 'eil fìrinn ann. 'Nuair a labhras e breug, is ann uaith féin a ta e labhairt: oir is breugaire e, agus *is e* athair na bréige.

45 Agus do bhrìgh gu bheil mise ag innseadh na fìrinn, cha 'n 'eil sibh ga m' chreidsinn.

46 Cò agaibh-sa chuireas peacadh as mo leth-sa? agus ma tha mi ag innseadh na fìrinn, c'ar son nach 'eil sibh ga m' chreidsinn?

47 An tì a ta o Dhia, éisdidh e ri briathraibh Dhé: uime sin

cha 'n 'eil sibhse ag éisd-eachd, a chionn nach an e Dhia a ta sibh.

48 An sin fhreagair na h-Iudhaich, agus thubhairt iad ris, Nach maith a thubhairt sinn gur Samaritanach thu, agus gu bheil deamhan agad?

49 Fhreagair Iosa, Cha 'n 'eil deamhan agam; ach a ta mi toirt urraim do m' Athair, agus a ta sibhse toirt eas-urraim dhomh-sa.

50 Agus cha 'n 'eil mi 'g iarraidh mo ghloire féin: tha neach a ta 'g iarraidh agus a' toirt breth.

51 Gu deimhin deimhin a ta mi ag ràdh ribh, Ma choimhdeas neach m'fhocal-sa, cha 'n fhaic e bàs am feasd.

52 An sin thubhairt na h-Iudhaich ris, A nis tha fhios againn gu bheil deamhan agad. Fhuair Abraham bàs, agus na fàidhean; gidheadh a ta thusa ag ràdh, Ma choimhdeas duine m'fhocal-sa, cha bhlais e bàs am feasd.

53 Am mò thusa na ar n-athair Abraham, a fhuair bàs? agus fhuair na fàidhean bàs: cò a tha thu dèanamh dhìot féin?

54 Fhreagair Iosa, Ma tha mi toirt glòire dhomh féin, cha 'n 'eil ach neo-ni a'm' ghlòir: is e m' Athair a ta toirt glòire dhomh, neach a ta sibhse ag ràdh gur e bhur Dia e:

55 Gidheadh cha do ghabh sibh eòlas air; ach a ta eòlas agam-sa air: agus nan abrainn, Nach aithne dhomh e, bhithinn cosmhuil ribhse a'm' bhreugaire: ach is aithne dhomh e, agus a ta mi coimhead 'fhocail.

56 Bha déidh mhòr aig Abraham bhur n-athair-sa air mo là-sa fhaicinn: agus chunnaic se e, agus rinn e gairdeachas.

57 An sin thubhairt na h-

Iudhaich ris, Cha'n 'eil thu fathast leth-cheud bliadhna dh' aois, agus am faca tu Abraham?

58 Thubhairt Iosa riu, Gu deimhin deimhin a ta mi ag ràdh ribh, Mun robh Abraham ann, A TA MISE.

59 An sin thog iadsan clachan chum an tilgeadh air: ach dh'fholaich Iosa e féin, agus chaidh e mach as an teampull, a' dol troimh am meadhon, [agus mar sin chaidh e seachad.]

CAIB. IX.

A GUS an uair a ghabh Iosa seachad, chunnaic e duine a bha dall o rugadh e.

2 Agus dh'fheòraich a dheisciobuil deth, ag ràdh, A mhaighstir, cò a pheacaich, an duine so, no a phàrantan, gu'n d'rugadh dali e?

3 Fhreagair Iosa, Cha do pheacaich aon chuid an duine so, no a phàrantan: ach a chum gu'm foillsichte oibre Dhé ann.

4 Is éigin domh-sa oibre an Tì a chuir uaith mi a dhèanamh, am feadh is là e: tha 'n oidhche a' teachd, 'nuair nach urrainn aon duine obair a dèanamh.

5 Am feadh a ta mise san t-saoghal, is mi solus an t-saoghail.

6 'Nuair a thubhairt e na nithe so, chuir e sìle air an talamh, agus rinn e criadh do'n t-sìle, agus sgaoil e a' chriadh air sùilibh an doill.

7 Agus thubhairt e ris, Imich, ionnlaid ann an lochan Shiloaim, (is e sin air eadar-theangachadh, Air a chur.) Uime sin dh'imich e, agus dh'ionnlaid e, agus thàinig e a' faicinn.

8 Uime sin thubhairt na coimhearsnaich, agus iadsan a chunnaic dall e roimhe sin, Nach e so esan a bha 'na shuidhe ag iarraidh na déirce?

9 Thubhairt cuid, Is e so e; cuid eile, Tha e cosmhuil ris: thubhairt e féin, Is mise e.

10 Air an aobhar sin thubhairt iad ris, Cionnus a dh'fhosgladh do shùilean?

11 Fhreagair esan agus thubhairt e, Rinn duine d'an ainm Iosa criadh, agus sgaoil e air mo shùilibh i, agus thubhairt e rium, Imich gu lochan Shiloaim, agus ionnlaid: agus dh'imich mi agus dh'ionnlaid mi, agus fhuair mi mo radharc.

12 An sin thubhairt iad ris, C'ait am bheil e? Thubhairt esan, Cha'n aithne dhomh.

13 Thug iad chum nam Phairiseach esan a bha roimhe dall.

14 Agus b' i an t-sàbaid a bha ann an uair a rinn Iosa a' chriadh, agus a dh'fhosgail e 'shuilean.

15 An sin a rìs dh'fheòraich na Phairisich dheth mar an ceudna cionnus a fhuair e a radharc. Agus thubhairt esan riu, Chuir e criadh air mo shùilibh, agus dh'ionnlaid mi, agus tha mi a' faicinn.

16 Uime sin thubhairt cuid do na Phairisich, Cha'n 'eil an duine so o Dhia, do bhrìgh nach 'eil e gléidheadh na sàbaid. Thubhairt cuid eile, Cionnus a dh'fheudas duine a ta 'na pheacach, an leithide so do mhòrbhuilbh a dhèanamh? Agus bha eas-aonachd 'nam measg.

17 Thubhairt iad a ris ris an duine dhall, Ciod a ta thusa ag ràdh uime, a thaobh gu'n d'fhosgail e do shùilean? Agus thubhairt esan, is fàidh e.

18 Ach cha do chreid na h-Iudhaich m'a thimchioll, gu'n robh e dall, agus gu'n d'fhuair e a radharc, gus an do ghairm iad pàrantan an tì a fhuair a radharc.

19 Agus dh'fhiosraich iad dhiubh, ag ràdh, An e so bhur mac-sa, a ta sibh ag ràdh a rugadh dall? cionnus ma seadh a ta e nis a' faicinn?

20 Fhreagair a phàrantan iad agus thubhairt iad, Tha fhios againn gur e so ar mac, agus gu'n do rugadh dall e:

21 Ach cionnus a ta e nis a' faicinn, cha'n 'eil fhios againn; no cò a dh'fhosgail a shùilean, cha'n aithne dhuinn: tha e féin air teachd gu aois, feòraichibh dheth, labhraidh e air a shon féin.

22 Thubhairt a phàrantan na briathra so, a chionn gu robh eagal nan Iudhach orra: oir shuidhich na h-Iudhaich a cheana eatorra féin, Nan aidicheadh duine sam bith gu'm b' esan Criosd, gun rachadh a chur as an t-sionagag.

23 Air an aobhar sin thubhairt a phàranta, Tha e air teachd gu aois, feòraichibh dheth féin.

24 Air an aobhar sin ghairm iad an dara uair an duine a bha dall, agus thubhairt iad ris, Thoir glòir do Dhia: tha fhios againne gur peacach an duine so.

25 An sin fhreagair esan agus thubhairt e, Am peacach e cha'n aithne dhomh: air aon ni tha fhios agam, air dhomh bhi dall, gu bheil mi nis a' faicinn.

26 Ach thubhairt iad ris a rìs, Ciod a rinn e dhuìt? cionnus a dh'fhosgail e do shùilean?

27 Fhreagair e iad, Dh'innis mi dhuibh a cheana, agus cha d'éisd sibh; c'ar son a b'àill leibh a chluinntinn a rìs? am bheil a' mhiann oirbhe bhi 'nur deisciobuil aige mar an ceudna?

28 An sin chàin iad e, agus thubhairt iad, Is tusa a dheisciobul; ach is sinne deisciobuil Mhaois.

29 Tha fhios againn gu'n do labhair Dia ri Maois: ach mu thimchioll an fhir so, cha'n 'eil fhios againn cia as da.

30 Fhreagair an duine agus thubhairt e riu, An so tha ni iongantach, nach 'eil fhios agaibh cia as da, agus gu'n d'fhosgail e mo shùilean;

31 Ach a ta fhios againn nach éisd Dia ri peacaich: ach ma ta neach air bith 'na fhear-aoraidh do Dhia, agus a' dèanamh a thoile, ris-san éisdidh e.

32 O thoiseach an t-saoghail cha chualas gu'n d'fhosgail aon neach sùilean duine a rugadh dall.

33 Mur biodh an duine so o Dhia, cha b'urrainn e ni sam bith a dhèanamh.

34 Fhreagair iadsan agus thubhairt iad ris, Rugadh thusa uile ann am peacaibh, agus am bheil thu 'gar teagasg-ne? ag-us thilg iad a mach e.

35 Chual Iosa gu'n do thilg iad a mach e; agus air dha fhaotainn, thubhairt e ris, Am bheil thu creidsinn ann am Mac Dhé?

36 Fhreagair esan agus thubhairt e, Cò e, a Thighearn, chum gu'n creid mi ann?

37 Agus thubhairt Iosa ris, Chunnaic thu araon e, agus an Ti a ta labhairt riut, is esan e.

38 Agus thubhairt esan, Tha mi creidsinn, a Thighearn. Agus rinn e aoradh dha.

39 Agus thubhairt Iosa, Is ann chum breitheanais a thàinig mise chum an t-saoghail so, chum iadsan nach 'eil a' faicinn, gu'm faiceadh iad; agus gu'm biodh iadsan a ta faicinn, air an dèanamh dall.

40 Agus chuala cuid do na Phairisich, a bha maille ris na nithe so, agus thubhairt iad ris,

Am bheil sinne dall mar an ceudna?

41 Thubhairt Iosa riu, Nam bitheadh sibh dall, cha bhiodh peacadh agaibh: ach a nis a ta sibh ag ràdh, Is léir dhuinn; uime sin tha bhur peacadh a' fantuinn.

CAIB. X.

GU deimhin deimhin a ta mi ag ràdh ribh, An tì nach téid a stigh troimh an dorus do chrò nan caorach, ach a théid suas air sheòl eile, is gaduiche agus fear-reubainn esan.

2 Ach an tì a théid a steach air an dorus, is esan buachaill nan caorach.

3 Dhasan fosglaidh an dorsair; agus éisdidh na caoraich r' a ghuth: agus gairmidh e a chaoraich féin air an ainm, agus treòraicheadh e mach iad.

4 Agus an uair a chuireas e mach a chaoraich féin, imichidh e rompa, agus leanaidh na caoraich e: oir is aithne dhoibh a ghuth.

5 Agus chalean iad coigreach, ach teichidh iad uaith, do bhrìgh nach aithne dhoibh guth choigreach.

6 An cosamhlachd so labhair Iosa riu: ach cha do thuig iadsan ciod iad na nithe a labhair e riu.

7 An sin thubhairt Iosa riu a rìs, Gu deimhin deimhin a ta mi ag ràdh ribh, gur mise dorus nan caorach.

8 Iadsan uile a thàinig romham-sa, is gaduichean agus luchd-reubainn iad: ach cha d'éisd na caoraich riu.

9 Is mise an dorus: ma théid neach air bith steach tromham-sa, tèarnar e, agus théid e steach agus a mach, agus gheibh e ionaltradh.

10 Cha tig an gaduiche ach a

ghoid, agus a mharbhadh, agus a mhilleadh: thàinig mise chum gu'm biodh beatha aca, agus gu'm biodh i aca ni's pailte.

11 Is mise am buachaill maith: leigidh am buachaill maith 'anam sìos air son nan caorach.

12 Ach am fear-tuarasdail, agus an tì nach e am buachaill, agus nach leis féin na caoraich, chì e am madadh-alluidh a' teachd, agus fàgaidh e na caoraich, agus teichidh e: agus glacadh am madadh-alluidh iad, agus sgapaidh e na caoraich.

13 Ach teichidh am fear-tuarasdail, a chionn gur fear-tuarasdail e, agus nach 'eil suim aige do na caoraich.

14 Is mise am buachaill maith, agus is aithne dhomh mo *chaoraich* féin, agus aithnich-e ar le m' *chaoraich* féin mi.

15 Mar is aithne do 'n Athair mise, mar sin is aithne dhomh-sa an t-Athair: agus a ta mi leigeadh m'anama sìos air son nan caorach.

16 Agus a ta caoraich eile agam, nach 'eil do 'n chrò so: is éigin domh iad sin mar an ceudna thoirt a *stigh*, agus éisdidh iad ri m' ghuth; agus bithidh aon treud ann, agus aon bhuachaill.

17 Air an aobhar so is ionmh-uinn leis an Athair mise, air son gu'n leig mi sìos m' anam, chum gu'n glac mi e a rìs.

18 Cha'n 'eil neach air bith 'ga thoirt uam, ach a ta mi 'ga leigeadh sìos uam féin: tha cumhachd agam a leigeadh sìos, agus tha cumhachd agam a ghlacadh a rìs. An àithne so fhuair mi o m' Athair.

19 Air an aobhar sin dh'éirich eas-aonachd a rìs am measg nan Iudhach air son nam briathra so.

20 Agus thubhairt mòran

diubh, Tha deamhan aige, agus tha e air bhoile ; c'ar son a tha sibh ag éisdeachd ris ?

21 Thubhairt cuid eile, Cha'n iad so briathra duine anns am bheil deamhan ; am bheil deamhan comasach air sùilean nan dall fhosgladh ?

22 Agus bha féill-chuimhne an ath-choisreagaidh ann an Ierusalem, agus b' e an geamhradh a bha ann.

23 Agus bha Iosa a' sràid-imeachd san teampull ann an sgàth-thigh Sholaimh.

24 An sin chruinnich na h-Iudhaich m' a thimchioll, agus thubhairt iad ris, Cia fhad a chumas tu ar n-anama an amharus ? ma 's tu Criosd, innis dhuinn gu follaiseach.

25 Fhreagair Iosa iad, Dh'innis mi dhuibh, agus cha do chreid sibh : na h-oibre a ta mi dèanamh an ainm m' Athair, tha iad sin a' toirt fianuis mu m' thimchioll.

26 Ach cha 'n 'eil sibhse a' creidsinn ; oir cha'n ann do m' chaoraich sibh, mar thubhairt mi ribh.

27 Tha mo chaoraich-sa ag éisdeachd ri m' ghuth, agus is aithne dhomh iad, agus leanaidh iad mi :

28 Agus bheir mi a' bheatha mhaireannach dhoibh ; agus cha sgriosar iad am feasd, ni mò a spionas neach air bith as mo làimh iad.

29 M' Athair a thug dhomh-sa iad, is mò e na na h-uile ; agus cha'n urrainn neach air bith an spionadh á làimh m' Athar.

30 Mise agus an t-Athair, is aon sinn.

31 Uime sin thog na h-Iudhaich clachan a rìs chum a chlachadh.

32 Fhreagair Iosa iad, Nochd mi dhuibh mòran do oibribh

maithe o m' Athair ; cia do na h-oibribh sin air son am bheil sibh ga m' chlachadh ?

33 Fhreagair na h-Iudhaich e, ag ràdh, Air son oibre maithe cha 'n 'eil sinn ga d' chlachadh ; ach air son toibheim, agus air son, air bhi dhuitse a' d' dhuine, gu bheil thu dèanamh Dé dhìot féin.

34 Fhreagair Iosa iad, Nach 'eil e sgrìobhta ann bhur laghasa, Thubhairt mi, Is dée sibh ?

35 Ma thubhairt e dée rìusan, dh'ionnsuidh an robh focal Dé, agus nach feudar an sgrìobtuir a bhriseadh ;

36 An abair sibh ris-san, a naomhaich an t-Athair, agus a chuir e chum an t-saoghail, Tha thu a' labhairt toibheim ; air son gu'n dubhairt mi, Is mi Mac Dhé ?

37 Mur dèan mi oibre m' Athar, na creidibh mi.

38 Ach ma nì, ged nach creid sibh mise, creidibh na h-oibre, chum gu 'm bì fios agaibh, agus gu'n creid sibh gu bheil an t-Athair annam-sa, agus mise annsan.

39 Uime sin dh'iarr iad a rìs a ghhlacadh : ach chaidh e as an làimh.

40 Agus chaidh e rìs do'n taobh thall do Iordan, do'n ionad anns an robh Eoin air tùs ri baisteadh ; agus rinn e còmh-nuidh an sin.

41 Agus thàinig mòran d' a ionnsuidh, agus thubhairt iad, Cha d' rinn Eoin aon mhìorbhuil : ach bha na h-uile nithe thubhairt Eoin mu 'n duine so fìor.

42 Agus chreid mòran san àit sin air.

CAIB. XI.

ANIS bha duine àraidh gu tinn, d' am b' ainm Lasarus

o Bhetani, baile Mhuire agus Mharta a peathar.

2 (B' i Mhuire *sin* a dh'ùng an Tighearn le oladh luachmhoir, agus a thiormaich a chosan le a folt, aig an robh a bràthair Lasarus gu tinn.)

3 Uime sin chuir a pheathraiche fios d' a ionnsuidh, ag ràdh, A Thighearn, feuch, tha 'n tì a 's ionmhuinn leat tinn.

4 'Nuair a chual Iosa *so*, thubhairt e, Cha'n 'eil an tinneas so chum bàis, ach a chum glòire Dhé, chum gu'm bì Mac Dhé air a ghlòrachadh d' a thaobh.

5 A nis b'ionmhainn le Iosa Marta, agus a piuthar, agus Lasarus.

6 Uime sin an uair a chual e gu'n robh esan tinn, dh'fhan e fathast dà là anns an ionad an robh e.

7 'Na dhéigh sin thubhairt e r' a dheisciobluibh, Rachamaid a ris do Iudea.

8 Thubhairt a dheisciobuil ris, A Mhaighstir, a nis dh'iarr na h-Iudhaich do chlachadh; agus am bheil thu dol a ris an sin?

9 Fhreagair Iosa, Nach 'eil dà uair dheug san là? Ma dh'imicheas duine anns an là, cha tuislich e, oir tha e faicinn soluis an t-saoghail so:

10 Ach ma dh'imicheas duine anns an oidhche, tuislichidh e, do bhrìgh nach 'eil an solus ann.

11 Na nithe so labhair e: agus 'na dhéigh sin thubhairt e riu, Tha ar caraid Lasarus 'na chodal; ach a ta mise a' dol chum gu'n dùisg mi as a chodal e.

12 An sin thubhairt a dheisciobuil, A Thighearn, ma tha e 'na chodal, bithidh e slàn.

13 Gidheadh labhair Iosa m' a bhàs: ach shaoil iadsan gu'n do labhair e mu thimchioll fois codail.

14 An sin thubhairt Iosa riu gu soilleir, Fhuair Lasarus bàs:

15 Agus a ta mi subhach air bhur son-sa nach robh mi an sin, chum gu'n creid sibh; ach rachamaid d' a ionnsuidh.

16 An sin thubhairt Tomas, ris an abrar Didimus, r' a cho-dheisciobluibh, Rachamaid-ne mar an ceudna, chum gu'm faigh sinn bàs maille ris.

17 An sin an uair a thàinig Iosa, fhuair se e an déigh dha bhi cheana ceithir làithean san uagh.

18 (A nis bha Betani fagus do Ierusalem, mu thimchioll cùig stàide deug uath.)

19 Agus thàinig mòran do na h-Iudhaich chum Mharta agus Mhuire, gu comhfhurtachd a thoirt doibh a thaobh am bràthar.

20 An sin an uair a chuala Mharta gu'n robh Iosa a' teachd, chaidh i 'na chòdhail: ach shuidh Muire san tigh.

21 An sin thubhairt Marta ri Iosa, A Thighearn, nam biodh tusa an so, cha 'n fhaigh-eadh mo bhràthair bàs.

22 Ach a ta fhios agam a nis féin, ge b' e air bith nithe a dh'iarras tu air Dia gu'n toir Dia dhuit *iad*.

23 Thubhairt Iosa rithe, Eiridh do bhràthair a ris.

24 Thubhairt Marta ris, Tha fhios agam gun éirich e a ris san aiseirigh air an là dheireannach.

25 Thubhairt Iosa rithe, Is mise an aiseirigh, agus a' beatha: an tì a chreideas annam-sa, ged gheibheadh e bàs, bithidh e beò:

26 Agus ge b' e neach a ta beò, agus a' creidsinn annam-sa, cha'n fhaigh e bàs am feasd. Am bheil thu creidsinn so?

27 Thubhairt i ris, Tha, a

Thighearn : tha mi creidsinn gur tusa Crìosd, Mac Dhé, a bhagu teachd chum an t-saoghail.

28 Agus air dh' i na nithe so ràdh, dh' fhalbh i, agus ghairm i a piuthar Muire an uaignidheas, ag ràdh, Thàinig am Maighstir, agus tha e ga d' ghairm.

29 'Nuair a chual ise sin, dh' éirich i gu grad, agus thàinig i d' a ionnsuidh.

30 A nis cha robh Iosa fathast air teachd do 'n bhaile, ach bha e anns an àit an do choinnich Marta e.

31 An sin na h-Iudhaich a bha maille rithe san tigh, agus a' toirt comhfhurtachd dh' i, 'nuair a chunnaic iad Muire gu 'n d' éirich i gu grad, agus gu 'n deachaidh i mach, lean iad i, ag ràdh, Tha i dol chum na h-uaigne, a chaoineadh an sin.

32 An sin an uair a thàinig Muire do 'n àit an robh Iosa, agus a chunnaic i e, thuit i aig a chosaibh, ag ràdh ris, A Thighearn, nam biodh tusa an so, cha 'n fhaigheadh mo bhràthair bàs.

33 Uime sin an uair a chunnaic Iosa i a' gul, agus na h-Iudhaich a thàinig maille rithe a' gul mar an ceudna, rinn e osna 'na spiorad, agus chuir se e féin fo àmhghar.

34 Agus thubhairt e, C' àit an do chuir sibh e? Thubhairt iad ris, A Thighearn, thig agus faic.

35 Ghuil Iosa.

36 An sin thubhairt na h-Iudhaich, Feuch cionnus a ghràdhaich se e!

37 Agus thubhairt cuid diubh, Nach feudadh an duine so a dh' fhosgail sùilean an doill, a thoirt fa' near nach faigheadh eadhon am fear so bàs?

38 Uime sin thàinig Iosa, ag

osnaich a ris ann féin, chum na h-uaigne. Agus b' uaimh i, agus bha clach air a cur oirre.

39 Thubhairt Iosa, Togaibh a' chlach. Thubhairt Marta, piuthar an duine mhairbh, ris, A Thighearn, tha nis droch bholadh dheth; oir is e so an ceathramh là.

40 Thubhairt Iosa rithe, Nach dubhairt mi riut, Ma chreideas tu, gu 'm faic thu glòir Dhé?

41 An sin thog iad a' chlach (o'n àit anns an robh an duine marbh air a chur.) Agus thog Iosa suas a shùilean, agus thubhairt e, Athair, tha mi toirt buidheachais duit gu 'n d' éisd thu rium.

42 Agus bha fhios agam gu bheil thu ag éisdeachd rium a ghnàth: ach thubhairt mi e air son an t-sluaigh a tha 'nan seasamh mu m' thimchioll, chum gu 'n creid iad gu 'n do chuir thusa uait mi.

43 Agus an uair a labhair e na nithe so, ghlaodh e le guth mòr, A Lasarus, thig a mach.

44 Agus thàinig esan a bha marbh a mach, agus a chosan agus a làmhnan ceangailte leis an eudach mhairbh: agus bha 'aghaidh ceangailte mu 'n cuairt le neapaicin. Thubhairt Iosa riu, Fuasglaibh e, agus leigibh leis imeachd.

45 An sin chreid mòran do na h-Iudhaich ann, a thàinig chum Mhuire, agus a chunnaic na nithe a rinn Iosa.

46 Ach dh' fhalbh cuid diubh chum nam Phairiseach, agus dh' innis iad dhoibh na nithe a rinn Iosa.

47 An sin chruinnich na h-àrd-shagairt agus na Phairisich comhairle, agus thubhairt iad, Ciod a tha sinn a' dèanamh? oir a ta an duine so dèanamh mòrain mhìorbhuile.

48 Ma leigeas sinn leis air an dòigh so, creididh na h-uile dhaoine ann; agus thig na Romhanaich, agus sgriosaidh iad ar n-àit, agus ar cinneach.

49 An sin thubhairt fear àraidh dhiubh *d'am b' ainm Caiaphas*, air dha bhi 'na àrd-shagart air a' bhliadhna sin, riu, Cha'n aithne dhuibh ni sam bith,

50 Ni mò tha sibh a' toirt fa'near gur iomchuidh dhuinne gu'm faigheadh aon duine bàs air son an t-sluaigh, agus nach biodh an cinneach uile air a sgrios.

51 Ach cha b' ann uaith féin a labhair e so: ach air dha bhi 'na àrd-shagart air a' bhliadhna sin, rinn e fàidheadaireachd gu'm faigheadh Iosa bàs air son a' chinnich sin;

52 Agus cha'n ann air son a' chinnich sin a mhàin, ach a chum mar an ceudnagu'n cruinnicheadh e an ceann a chéile 'nan aon clann Dhé a bha air an sgapadh.

53 Uime sin o'n là sin a mach, chuir iad an comhairle r'a chéile chum esan a chur gu bàs.

54 Air an aobhar sin cha d'imich Iosa ni's mò gu follaiseach am measg nan Iudhach; ach chaidh e as a sin do dhùthaich làimh ris an fhàsach, gu baile ris an abrar Ephraim, agus an sin ghabh e còmhnuidh maille r'a dheisciobluibh.

55 Agus bha càisg nan Iudhach am fagus: agus chaidh mòr-an suas as an dùthaich do Ierusalem roimh an chàisg, chum iad féin a ghlanadh.

56 An sin dh'iarr iad Iosa, agus labhair iad r'a chéile 'nan seasamh san teampull, Ciod bhur barail-sa? an e nach tig e chum na féille?

57 A nis bha araon na h-àrd-shagart agus na Phairisich air

toirt àithne, nam biodh fhios aig neach air bith c'ait an robh e, gu'n innseadh se e, chum gu'n glacadh iad e.

CAIB. XII.

AN sin thàinig Iosa, sè làithean roimh an chàisg, gu Betani, far an robh Lasarus a bha marbh, neach a thog esan o na marbhaibh.

2 Uime sin rinn iad suipeir dha an sin; agus bha Marta a' frithealadh: ach bha Lasarus 'na aon diubh-san a shuidh air bòrd maille ris.

3 An sin ghabh Muire pund do oladh spicnaird ro luachmhoir, agus dh'ùng i cosan Iosa, agus thiormaich i a chosan le a folt: agus lìonadh an tigh le fàile chùbhraidh na h-oladh.

4 An sin thubhairt aon d'a dheisciobluibh, Iudas Iscariot, *mac Shimoin*, a bha gu esan a bhrath,

5 C'ar son nach do reiceadh an oladh so air son trì cheud peghinn, agus nach d'thugadh do na bochdaibh e?

6 Thubhairt e so, cha b' ann a chionn gu'n robh suim aige do na bochdaibh; ach a chionn gu'm bu ghaduiche e, agus gu'n robh an sporan aige, agus gu'n do ghiùlain e na nithe a chuireadh ann.

7 An sin thubhairt Iosa, Leig leatha: fa chomhair là m' adhlaic ghléidh i so.

8 Oir tha na bochdan a ghnàth agaibh maille ribh, ach cha'n 'eil mise agaibh a ghnàth.

9 Agus bha fhios aig sluagh mòr do na h-Iudhaich gu'n robh e an sin: agus thàinig iad, cha'n ann a mhàin air son Iosa, ach a chum gu'm faiceadh iad mar an ceudna Lasarus, a thog esan o na marbhaibh.

10 Ach ghabh na h-àrd-shag-

air comhairle, chum Lasarus mar an ceudna a mharbhadh ;

11 Do bhrìgh air a shon-san gu'n d'ìmich mòran do na h-ludhaich, agus gu'n do chreid iad ann an Iosa.

12 Air an là màireach, air cluinntinn do mhòr-shluagh a thàinig chum na féille, gu'n robh Iosa a' teachd gu Ierusalem,

13 Ghlac iad geuga pailme, agus chaidh iad a mach 'na chòdhail, agus ghlaodh iad, Hosanna, beannaichte gu robh Rìgh Israeil a tha teachd ann an ainm an Tighearn !

14 Agus air do Iosa asal òg fhaotainn, shuidh e air ; a réir mar a ta e sgrìobhta,

15 Na biodh eagail ort, a nigh-ean Shìoin : feuch, a ta do Rìgh a' teachd, 'na shuidhe air loth asail.

16 Cha do thuig a dheisciobuil na nithe so air tùs : ach an uair a ghlòraicheadh Iosa, an sin chuimhnich iad gu'n robh na nithe so sgrìobhta uime, agus gu'n d'rinn iad na nithe so dha.

17 Uime sin rinn an sluagh a bha maille ris fianuis, gu'n do ghairm e Lasarus as an uaigh, agus gu'n do thog e o na marbh-aibh e.

18 Air an aobhar sin mar an ceudna choinnich an sluagh e, do bhrìgh gu'n cual iad gu'n d'rinn e am mìorbhuil so.

19 Thubhairt na Phairisich uime sin eatorra féin, Am faic sibh nach 'eil sibh a' buadhachadh bheag sam bith ? feuch, tha'n saoghal air dol 'na dhéigh.

20 Agus bha Greugaich àraidh am measg na muinntir a chaidh suas chum aoradh a dhèanamh aig an fhéill :

21 Air an aobhar sin thàinig iadsan gu Philip, a bha o Bhet-saida Ghalile, agus dh'iarr iad

air, ag ràdh, A Thighearn, bu mhiann leinn Iosa fhaicinn.

22 Thàinig Philip agus dh'innis e do Aindreas ; agus a rìs dh'innis Aindreas agus Philip do Iosa.

23 Agus fhreagair Iosa iad, ag ràdh, Thàinig an uair, chum gu'm biodh Mac an duine air a ghlòrachadh.

24 Gu deimhin deimhin a ta mi ag ràdh ribh, Mur faigh an gràinne cruithneachd a thuiteas anns an talamh bàs, fanaidh e 'na aonar : ach ma gheibh e bàs, bheir e toradh mòr uaith.

25 Esan a ghràdhaicheas 'anam, caillidh se e ; agus esan a dh'fhuathaicheas 'anam anns an t-saoghal so, gléidhidh se e chum na beatha maireannaich.

26 Ma nì neach air bith seirbhis dhomh-sa, leanadh e mi ; agus ge b'è àit am bì mise, an sin bithidh mo sheirbhiseach mar an ceudna : ma nì neach seirbhis dhomh-sa bheir m' Ath-air urram dha.

27 A nis tha m' anam fo àmh-ghar ; agus ciod a their mi ? Athair, saor mi o'n uair so : ach is ann air a shon so a thàinig mi chum na h-uaire so.

28 Athair, glòraich t' ainm. An sin thàinig guth o nèamh, ag ràdh, Ghlòraich mi araon e, agus glòraichidh mi rìs e.

29 Uime sin thubhairt an sluagh a sheas a làthair, agus a chuala so, Gu'n robh tairneanach ann : thubhairt cuid eile, Labhair aingeal ris.

30 Fhreagair Iosa agus thubhairt e, Cha'n ann air mo shon-sa thàinig an guth so, ach air bhuir son-sa.

31 A nis tha breitheanas an t-saoghail so ann : a nis tilgear uachdaran an t-saoghail so mach.

32 Agus mise, ma thogar suas

o'n talamh mi, tairngidh mi na h-uile dhaoine a m'ionnsuidh.

33 (Ach thubhairt e so, a' ciallachadh ciod a' ghnè bàis a gheibheadh e.)

34 Fhreagair an sluagh e, Chuala sinne as an lagh, gu'm fan Crìosd gu sìorruidh: agus cionnus a ta thusa ag ràdh, Gur éigin do Mhac an duine bhi air a thogail suas? cò e mac an duine so?

35 An sin thubhairt Iosa riu, Fathast rè tamuill bhig tha'n solus maille ribh: gluaisibh am feadh 's a ta an solus agaibh, chum nach beir an dorchadas oirbh: oir an tì a ta ag imeachd san dorchadas, cha'n aithne dha c'ait am bheil e dol.

36 Am feadh as a ta'n solus agaibh, creidibh san t-solus, chum gu'm bì sibh 'nur cloinn do'n t-solus. Labhair Iosa na nithe so, agus dh'fhalbh e, agus dh'fholaich se e féin uatha.

37 Ach ge do rinn e a choimh-lion so do mhìorbhuilbh 'nan làthair, cha do chreid iad ann:

38 Chum gu'm biodh briath-ran an fhàidh Esaias air an coimhlionadh, a thubhairt e. A Thighearn, cò a chreid ar n-aith-ris-ne? agus cò dha a dh'fhoill-sicheadh gàirdean an Tigh-earna?

39 Air an aobhar so cha robh e'n comas doibh creidsinn, do bhrìgh gu'n dubhairt Esaias a ris,

40 Dhall e an sùilean, agus chruaidhich e an cridhe, chum nach faiceadh iad le'n sùilibh, agus nach tuigeadh iad le'n cridhe, agus nach pilleadh iad, agus gu'n slànuichinn iad.

41 Thubhairt Esaias na nithe so, 'nuair a chunnaic e a ghlòir-san, agus a labhair e uime.

42 Gidheadh chreid mòran do an h-Uachdaranaibh féin ann:

ach air son nam Phairiseach cha d'aidich iad e, air eagal gu'n cuirte mach as an t-sionagog iad.

43 Oir b'annsa leo glòir dhaoine na glòir Dhé.

44 Agus ghlaodh Iosa, agus thubhairt e, An tì a ta creidsinn annam-sa cha'n ann annam-sa tha e creidsinn, ach anns an Tì a chuir uaith mi.

45 Agus an tì a tha ga m' fhaicinn-sa, tha e faicinn an Tì a chuir uaith mi.

46 Thàinig mi a'm' sholus chum an t-saoghail, chum ge b'e chreideas annam, nach fanadh e an dorchadas.

47 Agus ma chluinneas neach air bith mo bhriathran-sa, agus nach creid e, cha'n 'eil mise 'ga dhìteadh: oir cha d'thàinig mi a dhìteadh an t-saoghail, ach a shaoradh an t-saoghail.

48 An tì a tha cur cùil rium-sa, agus nach 'eil a' gabhail ri m' bhriathraibh, tha aige neach a bheir breth air: am focal a labhair mi, hheir e sin breth air san là dheireannach.

49 Oir cha do labhair mi uam féin; ach an t-Athair a chuir uaith mi, thug e àithne dhomh, ciod a theirinn, agus ciod a labh-rainn.

50 Agus a ta fhios agam gur beatha mhaireannach 'àithne-san: air an aobhar sin na nithe tha mi a' labhairt, mar thubhairt an t-Athair rium, mar sin a ta mi a' labhairt.

CAIB. XIII.

ANIS roimh fhéill na càisge, air do Iosa fios a bhi aige gu'n robh 'uair air teachd, anns an rachadh e as an t-saoghal so chum an Athar, air dha a mhuinntir féin a bha anns an t-saoghal a ghràdhachadh, ghràdhaich e gu crìch iad.

2 Agus an uair a bha 'n t-suipeir thairis, (air do 'n diabhul a nis a chur an cridhe Iudais Iscarioit, *mhic* Shimoin, esan a bhrath,)

3 Air aithneachadh do Iosa gu'nd' thug an t-Athair na h-uile nithe 'na làmh-aibh, agus gur ann o Dhia a thàinig e, agus gur ann a dh' ionnsuidh Dhé a bha e dol ;

4 Dh' éirich e o 'shuipeir, agus chuir e dheth 'fhalluinn, agus ghlac e làmh-anart, agus cheangail e uime e.

5 'Na dhéigh sin, thaom e uisge ann an soitheach-ionnlaid, agus thòisich e air cosan nan deisciobul ionnlad, agus an tiormachadh leis an làmh-anart a bha ceangailte uime.

6 An sin thàinig e gu Simon Peadar: agus thubhairt esan ris, a Thighearn, am bheil thu-sa ag ionnlad mo chosan-sa?

7 Fhreagair Iosa agus thubhairt e ris, An ni so ta mi dèanamh cha 'n aithne dhuitse a nis ; ach bithidh fios agad air an dhéigh so.

8 Thubhairt Peadar ris, Cha nigh thu mo chosan-sa gu bràth. Fhreagair Iosa e, Mur nigh mi thu, cha 'n 'eil cuid agad maille rium.

9 Thubhairt Simon Peadar ris, A Thighearn, cha 'n iad mo chosan a mhàin, ach mar an ceudna mo làmh-anart agus mo cheann.

10 Thubhairt Iosa ris, An tì a ta air ionnlad, cha 'n 'eil feum aige ach a chosan ionnlad, ach tha e gu h-iomlan glan : agus a ta sibhse glan, ach cha 'n 'eil sibh uile glan.

11 Oir bha fhios aige cò a bhrathadh e ; uime sin thubhairt e, Cha 'n 'eil sibh uile glan.

12 An sin, an déigh dha an cosan ionnlad, agus 'fhalluinn a

ghabhail d' a ionnsuidh, shuidh e a ris, agus thubhairt e riu, Am bheil fhios agaibh ciod a rinn mi dhuibh?

13 Tha sibh a' gairm Maighstir, agus Tighearn dhìom-sa : agus tha sibh ag ràdh gu maith ; oir is mi *sin*.

14 Uime sin ma dh' ionnlaid mise, bhur 'Tighearn agus bhur Maighstir, bhur cosan-sa, is còir dhuibh-sa mar an ceudna cosan a chéile ionnlad.

15 Oir thug mi eisempleir dhuibh, chum mar a rinn mise dhuibh, gu 'n dèanadh sibhse mar an ceudna.

16 Gu deimhin deimhin a ta mi ag ràdh ribh, Cha mhò an t-òglach na 'mhaighstir, agus cha mhò an teachdair na 'n tì a chuir uaith e.

17 Ma 's aithne dhuibh na nithe so, is beannaichte sibh ma nì sibh iad.

18 Cha 'n 'eil mi labhairt oirbh uile : is aithne dhomh cò a thagh mi : ach is éigin an sgriobtuir a choimhlionadh, An tì a ta 'g itheadh arain maille rium, thog e a shàil a'm' aghaidh.

19 A nis a ta mi ag ràdh so ribh mun tig e gu crìch, chum, 'nuair a thàrlas e, gu 'n creid sibh gur mise e.

20 Gu deimhin deimhin a ta mi ag ràdh ribh, an tì a ghabhas ri neach sam bith a chuireas mise uam, gabhaidh e rium-sa ; agus an tì a ghabhas rium-sa, gabhaidh e ris an Tì a chuir uaith mi.

21 Air do Iosa na nithe so ràdh, bha e fo thrioblaid 'na spiorad, agus rinn e fianuis, agus thubhairt e, Gu deimhin deimhin a ta mi ag ràdh ribh, gu 'm brath aon agaibh mise.

22 An sin dh' amhairc na deisciobuil air a chéile, fo amharus co uime a labhair e.

23 A nis bha aon d' a dheisciobluibh, 'na luidhe an uchd Iosa, neach a b' ionmhuinn le Iosa.

24 Air an aobhar sin smèid Simon Peadar airsan, gu 'm feòraicheadh e cò uime a labhair e.

25 An sin air dhasan aomadh ri uchd Iosa, thubhairt e ris, A Thighearn cò e?

26 Fhreagair Iosa, Is e an tì sin e, d' an toir mise an greim, an déigh dhomh a thumadh. Agus an uair a thum e an greim, thug se e do Iudas Iscariot, *mac Shimoin*.

27 Agus an sin an déigh a' ghreama, chaidh Satan a steach ann-san. An sin thubhairt Iosa ris, An ni a ta thu a' dèanamh, dèan gu grad e.

28 A nis cha do thuig aon diubh-san a bha 'nan suidhe air a' bhòrd c' ar son a thubhairt e so ris.

29 Oir shaoil cuid diubh, do bhrìgh gu 'n robh an sporan aig Iudas, gu 'n dubhairt Iosa ris, Ceannaich *na nithe* a ta dh' uir-easbhuidh oirnn chum na féille; no gu 'n tugadh e ni-éigin do na bochdaibh.

30 An sin an déigh dhasan an greim a ghabhail, chaidh e mach air ball; agus bha 'n oidhche ann.

31 Uime sin, 'nuair a chaidh esan a mach, thubhairt Iosa, A nis a ta Mac an duine air a ghlòrachadh, agus tha Dia air a ghlòrachadh ann.

32 Ma tha Dia air a ghlòrachadh ann, glòraichidh Dia esan mar an ceudna ann féin, agus air ball glòraichidh se e.

33 A chlann bheag, fathast ùine bheag tha mise maille ribh. Iarraidh sibh mi: agus mar a thubhairt mi ris na h-Iudhaich, Do 'n àit an téid mise, cha 'n 'eil e 'n comas duibhse teachd;

mar sin a ta mi ag ràdh ribhse nis.

34 Aithne nuadh tha mi toirt dhuibh, Gu 'n gràdhaich sibh a chéile; mar a ghràdhaich mise sibhse, gu 'n gràdhaich sibh féin a chéile mar an ceudna.

35 Le so aithnichidh na h-uile dhaoine gur sibh mo dheisciobuil-sa, ma bhios gràdh agaibh féin d' a chéile.

36 Thubhairt Simon Peadar ris, A Thighearn, c' àit a théid thu? Fhreagair Iosa e, Do 'n àit an téid mi, cha 'n urrainn thusa nis mo leantuinn: gidheadh leanaidh tu mi 'na dhéigh so.

37 Thubhairt Peadar ris, a Thighearn, c' ar son nach urrainn mi do leantuinn a nis? Leigidh mi sìos m'anam air do shon.

38 Fhreagair Iosa e, An leig thu t' anam sìos air mo shonsa? Gu deimhin deimhin a ta mi ag ràdh riut, Nach goir an coil-each, gus an àicheadh thu mi trì uairean.

CAIB. XIV.

NA biodh bhur cridhe fo thrìob-laid: tha sibh a creidsinn ann an Dia, creidibh ann-am-sa mar an ceudna.

2 Ann an tigh m' Athar-sa tha iomadh àite-còmhnuidh: mur biodh *e mar sin*, dh' innsinn-sa dhuibh. Tha mi dol a dh' ulluchadh àite dhuibh.

3 Agus ma théid mi agus gu 'n ulluich mi àit dhuibh, thig mi ris, agus gabhaidh mi sibh a m' ionnsuidh féin; chum far am bheil mise, gu 'm bi sibhse mar an ceudna.

4 Agus is aithne dhuibh c' àit am bheil mi dol, agus is aithne dhuibh an t-slighe.

5 Thubhairt Tomas ris, A Thighearn, cha 'n 'eil fhios ag-

ainn c' àit am bheil thu dol ; agus cionnus a dh' fheudas eòlas na slighe bhì againn ?

6 Thubhairt Iosa ris, Is mise an t-slighe, agus an fhìrinn, agus a' bheatha : cha tig aon neach chum an Athar ach tromham-sa.

7 Nam b' aithne dhuibh mise, b' aithne dhuibh m' Athair mar an ceudna : agus á so suas is aithne dhuibh e, agus chunnaic sibh e.

8 Thubhairt Philip ris, A Thighearn follisich an t-Athair dhuinne, agus is leoir leinn e.

9 Thubhairt Iosa ris, Am bheil mise ùine co fhada maille ribh, agus nach aithne dhuit fathast mi, Philip ? an tì a chunnaic mise, chunnaic e 'n t-Athair ; agus cionnus a ta thu ag ràdh, Foillsich an t-Athair dhuinn ?

10 Nach 'eil thu creidsinn gu bheil mise anns an Athair, agus ant-Athair annam-sa ? nabriathran a ta mi labhairt ribh, cha 'n ann uam féin a ta mi 'gan labhairt : ach an t-Athair, a ta gabhail còmhnuidh annam-sa, tha esan a' dèanamh nan oibre.

11 Creidibh mise gu *bheil* mi anns an Athair, agus an t-Athair annam-sa ; no, creidibh mi air son nan oibre féin.

12 Gu deimhin deimhin a ta mi ag ràdh ribh, An tì a chreideas annam-sa, na h-oibre a ta mise a' dèanamh, nì esan mar an ceudna ; agus nì e *oibre* a' s mò na iad so, do bhrìgh gu bheil mise dol chum m' Athar.

13 Agus ge b' e ni a dh' iarras sibh a' m' ainm-sa, nì mise sin : chum gu 'm bì an t-Athair air a ghlòrachadh anns a' Mhac.

14 Ma dh' iarras sibh nì air bith a' m' ainm-sa, nì mise e.

15 Ma 's toigh leibh mise, coimhidibh m' àitheantan :

16 Agus guidhidh mise an t-Athair, agus bheir e dhuibh Comhfhurtair eile, chum gu fan e maille ribh gu bràth ;

17 Spiorad na firinn ; neach nach urrainn an saoghal a ghabhail, do bhrìgh nach 'eil e 'ga fhaicinn, agus nach aithne dha e : ach is aithne dhuibhse e, oir tha e fantuinn maille ribh, agus bithidh e annaibh.

18 Cha 'n fhàg mi sibh 'nur dilleachdain ; thig mi do 'ur n-ionnsuidh.

19 Tamull beag fathast, agus cha 'n fhaic an saoghal mi tuilleadh ; ach chì sibhse mi : do bhrìgh gu bheil mise beò, bithidh sibhse beò mar an ceudna.

20 Anns an là sin bithidh fios agaibh gu *bheil* mise ann am Athair, agus sibhse annam-sa, agus mise annaibh-sa.

21 An tì aig am bheil m' àitheanta-sa, agus a ta 'gan coimhead, is esan aig am bheil gràdh dhomh-sa : agus an tì aig am bheil gràdh dhomh-sa, gràdh-aichear le m' Athair e, agus gràdhaichidh mise e, agus foillsichidh mi mi féin da.

22 Thubhairt Iudas, (cha 'n e Iscariot,) ris, A Thighearn, c' ar son a dh' fhoillsicheas tu thu féin dhuinne, agus nach *dèan thu sin* do 'n t-saoghal ?

23 Fhreagair Iosa agus thubhairt e ris, Ma ghràdhaicheas neach mise, coimhididh e m' fhocal : agus gràdhaichidh m' Athair esan, agus thig sinn d'a ionnsuidh, agus nì sinn còmhnuidh maille ris.

24 An tì nach gràdhaich mise, cha choimhid e mo bhriathra : agus am focal a ta sibh a' cluinntinn, cha leam-sa e, ach leis an Athair a chuir uaith mi.

25 Na nithe so labhair mi ribh, air dhomh bhì m' còmhnuidh maille ribh :

26 Ach an Comhfhurtair, an Spiorad naomh, a chuireas an t-Athair uaith a'm' ainm-sa, teagaisgidh esan dhuibh na h-uile nithe, agus cuiridh e 'n cuimhne dhuibh na h-uile nithe a labhair mise ribh.

27 Tha mi fàgail sìthe agaibh, mo shìth-sa a ta mi toirt duibh : cha'n ann mar a bheir an saoghal, a tha mise toirt duibh. Na biodh bhur cridhe fo thrioblaid, agus na biodh eagail air.

28 Chuala sibh mar thubhairt mi ribh, Tha mi falbh, agus thig mi ris do 'ur n-ionnsuidh. Nam biodh gràdh agaibh dhomh-sa, bhiodh aoibhneas oirbh, a chionn gu 'n dubhairt mi, Tha mi, dol chum an Athar : oir is mò m' Athair na mise.

29 Agus a nis dh' innis mi dhuibh so roimh dha teachd gu crìch, chum, 'nuair a thig e gu crìch, gu creideadh sibh.

30 A so suas cha labhair mi mòran ribh : oir a ta uachdaran an t-saoghail so a' teachd, agus cha'n 'eil ni air bith aige annam-sa.

31 Ach a chum gu 'm bì fios aig an t-saoghal gur ionmhuinn leam an t-Athair ; agus mar a thug an t-Athair àithne dhomh, mar sin a ta mi a' dèanamh. Eiribh, rachamaid as so.

CAIB. XV.

IS mise an fhìonain fhìor, agus is e m' Athair an treabh-aiche.

2 Gach uile gheug annam-sa nach 'eil a' giùlan toraidh, bheir e air falbh ; agus gach uile gheug a ta tabhairt toraidh, glanaidh e i, chum gu 'n giùlain i tuilleadh toraidh.

3 A nis a ta sibhse glan tre an fhocal a labhair mi ribh.

4 Fanaibh annam-sa, agus mise annaibh-sa. Mar nach

urrainn a' gheug toradh a thoirt uaipe féin, mur fan i san fhìonain, cha mhò is urrainn sibhse, mur fan sibh annam-sa.

5 Is mise an fhìonain, sibhse na geuga : an tì a dh' fhanas annam-sa, agus mise annsan, bheir esan mòr-thoradh uaith ; oir as m' eugmhais-sa cha'n urrainn sibh aon ni a dhèanamh.

6 Mur fan neach annam-sa, tha e air a thilgeadh a mach mar ghéig, agus air crìonadh ; agus tionailidh daoine iad, agus tilgidh iad san teine iad, agus loisgear iad.

7 Ma dh' fhanas sibh-annam-sa, agus ma dh' fhanas m' fhocail-sa annaibh-sa, iarraidh sibh gach ni a's àill leibh, agus nith-eair dhuibh e.

8 An so tha m' Athair-sa air a ghlòrachadh, gu 'n toir sibhse mòr-thoradh uaibh ; agus bithidh sibh 'nur deisciobuil dhomh-sa.

9 Mar a ghràdhaich an t-Athair mise, mar sin ghràdhaich mise sibhse : fanaibh ann am ghràdh-sa.

10 Ma choimhideas sibh m' àitheanta, fanaidh sibh ann am ghràdh ; mar a choimhid mise àitheanta m' Athar, agus a tha mi a' fantuinn 'na ghràdh.

11 Na nithe so labhair mi ribh, chum gu fanadh mo ghàird-eachas annaibh, agus gu 'm biodh bhur gairdeachas-sa làn.

12 Is i so m' àithne-sa, gu 'n gràdhaich sibhse a chéile, mar a ghràdhaich mise sibhse.

13 Gràdh a's mò na so cha'n 'eil aig neach air bith, gu 'n leigeadh duine 'anam sìos air son a chàirdean.

14 Is sibhse mo chàirdean-sa, ma nì sibh gach ni a ta mi ag àithneadh dhuibh.

15 A so suas cha ghairm mi seirblisich dhibh ; oir cha'n

aithne do'n t-seirbhiseach ciod a ta a Thighearn a' dèanamh: ach ghairm mi càirde dhibh; oir na h-uile nithe a chuala mi o m' Athair, thug mi fios duibhse orra.

16 Cha sibhse a thagh mise, ach is mise a thagh sibhse, agus dh'òrduich mi sibh, chum gu'n rachadh sibh, agus gu'n tugadh sibh a mach toradh, agus gu maireadh bhur toradh: chum ge b'e ni a dh'iarras sibh air an Athair ann am ainm-sa, gu'n toir e dhuibh e.

17 Tha mi 'g àithneadh nan nithe so dhuibh, chum gu'n gràdhaich sibh a chèile.

18 Ma tha an saoghal 'gur fuathachadh, tha fhios agaibh gu'n d'fhuathaich e mise roimh-ibh.

19 Nam b' ann do'n t-saoghal sibh, ghràdhaicheadh an saoghal a chuid féin: ach do bhrìgh nach ann do'n t-saoghal sibh, ach gu'n do thagh mise sibh as an t-saoghal, uime sin tha fuath aig an t-saoghal duibh.

20 Cuimhnichibh am focal a thubhairt mi ribh, Cha 'n 'eil an seirbhiseach ni's mò na a Thighearn. Ma rinn iad geur-leanmhuinn ormsa, nì iad geur-leanmhuinn oirbhse mar an ceudna: ma choimhid iad m'fhocal-sa, coimhididh iad bhur focal-sa mar an ceudna.

21 Ach na nithe so uile nì iad oirbh air son m'ainme-sa, do bhrìgh nach aithne dhoibh esan a chuir uaith mi.

22 Mur bithinn-sa air teachd, agus air labhairt riu, cha bhiodh peacadh aca: ach a nis cha'n eil leithsgeul am peacaidh aca.

23 An ti aig am bheil fuath dhomh-sa, tha fuath aige do m' Athair mar an ceudna.

24 Mur bithinn-sa air dèanamh nan oibre 'nam measg nach

d' rinn aon neach eile, cha bhiodh peacadh aca: ach a nis chunn-aid siad iad, agus dh'fhuathaich iad araon mise agus m' Athair.

25 Ach rinneadh so chum gu'n coimhliontadh am focal a ta sgriobhta 'nan lagh féin, Dh'fhuathaich iad mi gun aobhar.

26 Ach an uair a thig an Comhfhurtair, a chuireas mise do 'ur ionnsuidh o'n Athair, Spiorad na firinn, a tha teachd a mach o'n Athair, nì esan fian-uis mu m' thimchioll-sa.

27 Agus nì sibhse fianuis mar an ceudna, do bhrìgh gu bheil sibh maille rium o thùs.

CAIB. XVI.

NA nithe so labhair mi ribh, chum nach faigheadh sibh oilbheum.

2 Cuiridh iad as an t-sionagag sibh: seadh, thig an uair, ge b'e neach a mharbhas sibh, gu'n saoil e gu bheil e dèanamh seirbhis do Dhia.

3 Agus nì iad na nithe so, do bhrìgh nach aithne dhoibh an t-Athair, no mise.

4 Ach dh'innis mi na nithe so dhuibh, chum 'nuair a thig an t-àm, gu'n cuimhnich sibh gu'n d'innis mi dhuibh iad. Ach cha dubhairt mi na nithe so ribh o thùs, do bhrìgh gu'n robh mi maille ribh.

5 Ach a nis a ta mi dol chum an ti a chuir uaith mi; agus cha 'n eil a h-aon agaibh-sa a' feòraich dhìom, C' àit tha thu dol?

6 Ach a chionn gu'n dubhairt mi na nithe so ribh, lion do-bhròn bhur cridhe.

7 Gidheadh a ta mi ag inn-seadh dhuibh na firinn, Is buannachd dhuibh mise a dh'fhalbh: oir mur falbh mi, cha tig an Comhfhurtair do 'ur n-ionnsuidh-sa; ach ma dh'-

fhalbhas mi, cuiridh mi esan do 'ur n-ionnsuidh.

8 Agus an uair a thig esan, bheir e dearbh-shoilleireachd do'n t-saoghal mu pheacadh, agus mu fhìreantachd, agus mu bhreitheanas:

9 Mu pheacadh, do bhrìgh nach 'eil iad a' creidsinn annam-sa;

10 Mu fhìreantachd, do bhrìgh gu bheil mi dol a dh'ionnsuidh m' Athar, agus nach faic sibh ni's mo mi;

11 Mu bhreitheanas, a chionn gu bheil uachdaran an t-saoghail so air a dhìtheadh.

12 Tha mòran nithe agam fathast ri ràdh ribh, ach cha'n urrainn sibh an giùlan an tràth so.

13 Ach an uair a thig esan, Spiorad na firinn, treòraichidh e sibh chum gach uile fhìrinn: oir cha labhair e uaith féin: ach labhraidh e na h-uile nithe a chluinneas e: agus foillsichidh e dhuibhse nithe a ta ri teachd.

14 Bheir esan glòir dhomh-sa: oir gheibh e do m' chuid-sa, agus nochdaidh e dhuibh-se e.

15 Na h-uile nithe a ta aig an Athair, is leam-sa iad: air an aobhar so thubhairt mi, gu'm faigh e do m' chuid-sa, agus nochdaidh e dhuibhse e.

16 Tamull beag agus cha'n fhaic sibh mi; agus a ris, tamull beag agus chì sibh mi, do bhrìgh gu bheil mi dol chum an Athar.

17 An sin thubhairt *cuid* d' a dheisciobluibh eatorra féin, Ciod e so a ta e ag ràdh ruinn, Tamull beag agus cha'n fhaic sibh mi: agus a ris, tamull beag agus chì sibh mi: agus, Do bhrìgh gu bheil mi dol chum an Athar?

18 Air an aobhar sin thubhairt iad, Ciod e so a ta e ag ràdh, Tamull beag? Cha'n 'eil

sinne a' tuigsinn ciod a ta e ag ràdh.

19 A nis dh'aithnich Iosa gu'n robh toil aca fheòraich dheth, agus thubhairt e riu, Am bheil sibh a' feòraich 'nur measg féin mar a thubhairt mi, Tamull beag agus cha'n fhaic sibh mi: agus a ris, tamull beag agus chì sibh mi?

20 Gu deimhin deimhin a ta mi ag ràdh ribh, gu'n dèan sibh-se gul agus caoidh, ach nì an saoghal gairdeachas: agus bithidh sibhse do-bhrònach, ach pillear bhur bròn gu gairdeachas.

21 'Nuair a bhios bean ri saothair-chloinne, bithidh i fo dhoilgheas, chionn gu bheil a h-uair air teachd: ach an uair a bheireas i an leanabh, cha chuimhnich i a h-àmhghar ni's mò, tre aoibhneas gu'n d' rugadh duine chum an t-saoghail.

22 Agus a ta nis uime sin doilgheas oirbh-sa: ach chì mise a ris sibh, agus nì bhur cridhe gairdeachas, agus bhur gairdeachas cha bhuin neach air bith uuibh.

23 Agus air an là sin cha'n fheòraich sibh nì air bith dhìom-sa: Gu deimhin deimhin a ta mi ag ràdh ribh, Ge b' e nithe dh' iarras sibh air an Athair ann am ainm-sa, gu'n toir e dhuibh iad.

24 Gus a so cha d' iarr sibh nì air bith ann am ainm-sa: iarraibh, agus gheibh sibh, chum gu'm bì bhur n-aoibhneas làn.

25 Na nithe so labhair mi ribh am briathraibh dorchas: ach thig an uair anns nach labhair mi ni's mò ribh am briathraibh dorchas, ach innsidh mi gu soilleir mu'n Athair dhuibh.

26 Anns an là sin iarraidh sibh a'm ainm-sa: agus cha'n

'eil mi ag ràdh ribh, gu'n guidh mi an t-Athair air bhur son :

27 Oir is toigh leis an Athair féin sibh, air son gu'n d' thug sibh gràdh dhomh-sa, agus gu'n do chreid sibh gur ann o Dhia a thàinig mi.

28 Thàinig mi mach o'n Athair, agus tha mi air teachd chum an t-saoghail : a ris, tha mi fàgail an t-saoghail, agus a' dol chum an Athar.

29 Thubhairt a dheisciobuil ris, Feuch, a nis tha thu labhairt gu soilleir, agus cha'n 'eil thu labhairt cosamhlachd air bith.

30 A nis tha fhios againn gur aithne dhuit na h-uile nithe, agus nach feum thu duine air bith a dh' fheòraich dhìot : air a shon so tha sinn a' creidsinn gur ann o Dhia a thàinig thu.

31 Fhreagair Iosa iad, Am bheil sibh a nis a' creidsinn ?

32 Feuch, thig an t-àm, seadh, tha e cheana air teachd, anns an sgapar o chéile sibh, gach aon g' a ionad féin, agus am fàg sibh mise a' m' aonar : gidheadh cha'n 'eil mise a' m' aonar, oir tha an t-Athair maille rium.

33 Na nithe so labhair mi ribh, chum gu'm biodh sìth agaibh annam-sa. Anns an t-saoghal bithidh àmhghar agaibh : ach biodh deadh mhisneach agaibh, thug mise buaidh air an t-saoghal.

CAIB. XVII.

LABHAIR Iosa na briathra so ; agus thog e suas a shùilean gu nèamh, agus thubhairt e, Athair, thàinig an uair ; glòraich do mhac, chum gu'n glòraich do mhac thusa mar an ceudna :

2 Chum mar a thug thu cumhachd dha air gach feoil, na h-uile a thug thu dha, gu'n tug-

adh esan dhoibh a' bheatha mhaireannach.

3 Agus is i so a' bheatha mhaireannach, eòlas a bhi aca ortsa an t-aon Dia fìor, agus air Iosa Crìosd a chuir thu uait.

4 Ghlòraich mise thusa air thalamh : chrìochnaich mi 'n obair a thug thu dhomh r' a dhèanamh.

5 Agus a nis, Athair, glòraich thusa mise maille riut féin, leis a' ghlòir a bha agam maille riut mun robh an saoghal ann.

6 Dh' fhoillsich mise t' ainm do na daoineibh a thug thu dhomh as an t-saoghal : bu leatsa iad, agus thug thu dhomh-sa iad ; agus choimhid iad t-fhocal.

7 A nis thuig iad gur ann uait a tha na h-uile nithe, a thug thu dhomh-sa.

8 Oir thug mi dhoibh na briathran a thug thusa dhomh ; agus ghabh siad iad, agus thuig iad gu fìrinneach gur ann uait-sa thàinig mi, agus chreid iad gu'n do chuir thu uait mi.

9 Air an sonsan tha mi guidhe : cha'n 'eil mi guidhe air son an t'-saoghail, ach air son na muinntir sin a thug thu dhomh, oir is leat-sa iad.

10 Agus is leatsa na h-uile nithe a's leamsa, agus is leamsa na nithe a's leatsa ; agus a ta mi air mo ghlòrachadh anna.

11 Agus a nis cha'n 'eil mise ni's mò anns an t-saoghal, ach a ta iadsan san t-saoghal, agus a ta mise a' teachd a d' ionnsuidh-sa. Athair naoimh, coimhid iadsan tre t' ainm, a thug thu dhomh-sa, chum gu'm bì iad 'nan aon, mar a ta sinne.

12 Am feadh 's a bha mise maille riu anns an t-saoghal, choimhid mi iad tre t' ainm-sa : ghléidh mi a' mhuinntir a thug thu dhomh, agus cha do chaill-eadh a h-aon diubh, ach mac

an sgrios; chum gu biodh an sgriobtuir air a choimhlionadh.

13 Agus a nis tha mi teachd a d' ionnsuidh-sa; agus tha mi labhairt nan nithe so anns an t-saoghal, chum gu 'm biodh mo ghàirdeachas aca air a choimhlionadh annta.

14 Thug mi t' fhocal dhoibh; agus thug an saoghal fuath dhoibh, air son nach ann do 'n t-saoghal iad, mar nach 'eil mise do 'n t-saoghal.

15 Cha 'n 'eil mi guidhe gu 'n tugadh tu as an t-saoghal iad, ach gu 'n coimhleadh tu o 'n olc iad.

16 Cha 'n 'eil iadsan do 'n t-saoghal, mar nach 'eil mise do 'n t-saoghal.

17 Naomhaich iad troimh an fhìrinn: is e t' fhocal-sa an fhìrinn.

18 Mar a chuir thusa mise chum an t-saoghail, mar sin chuir mise iadsan chum an t-saoghail.

19 Agus air an sonsan tha mise ga m' naomhachadh féin, chum gu 'm bì iadsan mar an ceudna air an naomhachadh troimh an fhìrinn.

20 Agus cha 'n 'eil mi guidhe air an sonsan a mhàin, ach mar an ceudna air son na muinntir sin a chreideas annam-sa troimh am focal-san.

21 Chum gu 'm bì iad 'uile nan aon; chum mar a ta thusa, Athair, annam-sa, agus mise annad-sa, gu 'm bì iadsan mar an ceudna 'nan aon annainne; chum gu 'n creid an saoghal gu 'n do chuir thusa uait mi.

22 Agus thug mise dhoibh-san a' ghlòir a thug thusa dhomh-sa, chum gu 'm bì iad 'nan aon, mar a ta sinne 'nar n-aon;

23 Mise annta-san, agus thusa annam-sa, chum gu 'n dèanar coimhlionta iad ann an aon;

agus a chum gu 'm bì fios aig an t-saoghal gu 'n do chuir thusa uait mi, agus gu 'n do ghràdhaich thu iadsan, mar a ghràdhaich thu mise.

24 Athair, is àill leam an dream a thug thu dhomh, gu 'm bì iad maille rium, far am bheil mi; chum gu faic iad mo ghlòir a thug thu dhomh: oir ghràdhaich thusa mi mun do leagadh bunaite an domhain.

25 Athair chothromaich, cha b' aithne do 'n t-saoghal thusa; ach b' aithne dhomhsa thu, agus thuig iad so gu 'n do chuir thusa uait mi.

26 Agus dh' fhoillsich mise t' ainm dhoibh, agus foillsichidh mi e, chum gu 'm bì an gràdh leis an do ghràdhaich thu mise, annta-san, agus mise annta.

CAIB. XVIII.

NUAIR a labhair Iosa na briathra so, chaidh e maille r' a dheisciobluibh thairis air sruth Chedroin, far an robh lios, anns an deachaidh e féin agus a dheisciobuil.

2 Agus b' aithne do Iudas, a bhrath esan, an t-àit: oir thàinig Iosa gu tric an sin maille r' a dheisciobluibh.

3 An sin air do Iudas buidheann agus maoir fhaotainn o na h-àrd-shagairt agus na Phairisich, thàinig e do 'n àit sin le leusaibh, agus lòchranaibh, agus armaibh.

4 Uime sin air do Iosa fios a bhi aige air na h-uile nithibh a bha gu teachd air, chaidh e mach, agus thubhairt e riu, Cò tha sibh ag iarraidh?

5 Fhreagair iadsan e, Iosa o Nasaret. Thubhairt Iosa riu, Is mise e. Agus sheas mar an ceudna Iudas, a bhrath esan, maille riu.

6 An sin co luath 's a thubh-

airt e riu, Is mise e, chaidh iad air an ais, agus thuit iad air an làr.

7 An sin dh'fheòraich e dhiubh a rìs, Cò tha sibh ag iarraidh? Thubhairt iadsan, Iosa o Nasa-ret.

8 Fhreagair Iosa, Thubhairt mi ribh gur mise e. Uime sin ma's mise tha sibh ag iarraidh, leigibh leo sin falbh:

9 Chum gu 'n coimhliontadh am focal a labhair e, An dream a thug thu dhomh, cha do chaill mi aon diubh.

10 An sin air do Shimon Peadar claidheamh a bhi aige, tharruing se e, agus bhuail e òglach an àrd-shagairt, agus gheàrr e a' chluas dheas deth. Agus b'e ainm an òglaich Malchus.

11 An sin thubhairt Iosa ri Peadar, Cuir do chladheamh san truaill: an cupan a thug m' Athair dhomh-sa, nach òl mi e?

12 An sin rug a bhuidheann, agus an ceannard, agus maoir nan Iudhach air Iosa, agus cheangail iad e,

13 Agus thug iad leo e air tùs gu Annas; (oir b' esan ath-air-céile Chaiaphais, a bha 'na àrd-shagairt air a' bhliadh nasin.)

14 A nis b'e Caiaphas a thug comhairle don a h-Iudhaich, gu'm b'iomchuidh gu'm faigheadh aon duine bàs air son an t-sluaigh.

15 Agus lean Simon Peadar agus deisciobul eile Iosa. B'aithne do'n àrd-shagart an deisciobul sin, agus chaidh e steach maille ri Iosa do chùirt an àrd-shagairt.

16 Ach sheas Peadar aig an dorus an leth muigh. Uime sin chaidh an deisciobul sin eile a b'aithne do'n àrd-shagart a mach, agus labhair e ris a' bhan-dors-air, agus thūg e Peadar a steach.

17 An sin thubhairt a' bhanog-lach a bha gléidheadh an doruis ri Peadar, Nach ann do dheisciobluibh an duine so thusa mar an ceudna? thubhairt esan, Cha'n ann.

18 Agus bha na seirbhisich agus na maoir 'nan seasamh, air dhoibh teine guail a chur suas, oir bha 'm fuachd ann, agus bha iad 'gan garadh féin: agus bha Peadar 'na sheasamh maille riu, agus 'ga gharadh féin.

19 An sin dh'fhiosraich an t-àrd-shagart do Iosa mu thimchioll a dheisciobul, agus mu thimchioll a theagaisg.

20 Fhreagair Iosa e, Labhair mise gu follaiseach ris an t-saogh-al; theagaisg mi a ghnàth anns an t-sionagog, agus anns an teampull, far am bheil na h-Iudhaich a' cruinneachadh as gach àit; agus am folach cha do labhair mi ni air bith.

21 C'ar son a ta thu fiosrachadh dhìom-sa? Fiosraich dhiubh-san a chuala, ciod a thubhairt mi riu: feuch, a ta fhios aca-san ciod a thubhairt mi.

22 Agus an uair a thubhairt e na nithe so, bhuail aon do na maoraibh, a bha 'na sheasamh a làthair, a bhas air Iosa, ag ràdh, An ann mar so a fhreagras tu an t-àrd-shagart?

23 Fhreagair Iosa e, Ma labhair mi gu h-olc, dèan fianuis air an olc: ach ma's ann gu maith, c'ar son a ta thu ga m' bhualadh?

24 (A nis chuir Annas e ceangailte gu Caiaphas an t-àrd-shagart.)

25 Agus bha Simon Peadar 'na sheasamh agus 'ga gharadh: Uime sin thubhairt iad ris, Nach aon d'a dheisciobluibh thusa mar an ceudna? Dh' àicheadh esan, agus thubhairt e, cha mhi.

26 Thubhairt aon do sheirbh-isich an àrd-shagairt, (caraid do'n fhear do'n gheàrr Peadar a chluas,) Nach faca mise thu san lios maille ris?

27 An sin dh' àicheadh Peadar a ris, agus air ball ghoir an coil-each.

28 An sin thug iad Iosa o Chaiaphas gu àit a' bhreitheanais: agus b' imhaduinn a bh' ann, agus cha deachaidh iad féin do àit a' bhreitheanais, chum nach biodh iad air an salachadh; ach gu'n itheadh iad a' chàisg.

29 An sin chaidh Pilat a mach d'an ionnsuidh-san, agus thubhairt e, Ciod a' chasaid a tha sibh a' toirt an aghaidh an duine so?

30 Fhreagair iadsan agus thubhairt iad ris, Mur b' fhear droch-bheirt e, cha tugamaid thairis dhuitse e.

31 An sin thubhairt Pilat riu, Gabhaibh-sa e, agus thugaibh breth air a réir bhur lagha féin. An sin thubhairt na h-Iudhaich ris, Cha'n 'eil e ceaduichte dhuinne neach air bith a chur gu bàs:

32 Chum gu'm biodh focal Iosa air a choimhlionadh, a labhair e, a' ciallachadh ciod a' ghnè bàis a bha e gu fhaotainn.

33 An sin chaidh Pilat a steach a ris do àit a' bhreitheanais, agus ghairm e Iosa, agus thubhairt e ris, An tusa Rìgh nan Iudhach?

34 Fhreagair Iosa e, Am bheil thu ag ràdh so uait féin, no an d'innis daoine eile dhuit e mu m' thimchioll-sa?

35 Fhreagair Pilat, An Iudhach mise? Thug do chinneach féin, agus na h-àrd-shagairt thairis dhomh-sa thu: ciod a rinn thu?

36 Fhreagair Iosa, Cha'n ann do'n t-saoghal so tha mo rìogh-

achd-sa: nam b' ann do'n t-saoghal so bhiodh mo rìoghachd, dhèanadh mo sheirbhisich cogadh, chum nach tugtadh thairis do na h-Iudhaich mi: ach a nis cha'n ann o so a ta mo rìoghachd.

37 Air an aobhar sin thubhairt Pilat ris, An rìgh thu ma seadh? Fhreagair Iosa, Thubhairt thusa gur rìgh mi. 'S ann chum na crìche so a rugadh mi, agus chum na crìche so thàinig mi do'n t-saoghal, chum gu'n dèanainn fianuis do'n fhirinn. Gach neach a ta air taobh na firinn, éisdidh e ri m' ghuth-sa.

38 Thubhairt Pilat ris, Ciod i an fhirinn? Agus air dha so a ràdh, chaidh e mach a ris chum nan Iudhach, agus thubhairt e riu, Cha'n 'eil mise a' faotainn coire air bith ann.

39 Ach a ta gnàth agaibh-sa, gu'n leiginn as duine dhuibh air a' chàisg: uime sin an àill leibh mi a leigeadh rìgh nan Iudhach fa sgaoil duibh?

40 An sin ghlaodh iadsan uile, ag ràdh, Cha'n e an duine so, ach Barabas. A nis b' fhear-reubainn Barabas.

CAIB. XIX.

AN sin air an aobhar sin ghlac Pilat Iosa, agus sgiùrs se e.

2 Agus dh' fhigh na saighdearan crùn droighinn, agus chuir iad air a cheann e, agus chuir iad falluinn phurpuir uime.

3 Agus thubhairt iad, Fàilte ort, a rìgh nan Iudhach! agus bhuaill iad le'm basaibh e.

4 An sin chaidh Pilat a mach a ris, agus thubhairt e riu, Feuch, a ta mise 'ga thoirt a mach do 'ur n-ionnsuidh, chum gu'm bì fios agaibh nach 'eil mise faotainn coire sam bith ann.

5 An sin thàinig Iosa mach,

agus an crùn droighinn air, agus an fhalluinn phurpuir uime. Agus thubhairt *Pilat* riu, Feuch an duine!

6 Uime sin, an uair a chunn-aic na h-àrd-shagairt agus na maoir e, ghlaodh iad, ag ràdh, Céus e, céus e. Thubhairt *Pilat* riu, Gabhaibh-sa e, agus céus-aibh e: oir cha'n 'eil mise a' faotainn coire sam bith ann.

7 Fhreagair na h-Iudhaich e, Tha lagh againne, agus a réir ar lagha-ne is còir a chur gu bàs, air son gu'n d'rinn e Mac Dhé dheth féin.

8 Uime sin an uair a chuala *Pilat* a' chainnt sin, bu mhòid a bha dh'eagal air;

9 Agus chaidh e steach a ris do àit a' bhreitheanais, agus thubhairt e ri Iosa, Cia as duit? ach cha d' thug Iosa freagradh air.

10 An sin thubhairt *Pilat* ris, Nach labhair thu riumsa? nach 'eil fhios agad gu bheil cumhachd agam-sa do chéusadh, agus gu bheil cumhachd agam do chur fa sgaoil?

11 Fhreagair Iosa, Cha bhiodh cumhachd air bith agad a' m' aghaidh-sa, mar tugtadh dhuit o'n àird e: air an aobhar sin an tì a thug mise thairis dhuit, tha aige-san am peacadh a's mò.

12 Agus o sin suas dh'iarr *Pilat* a chur fa sgaoil: ach ghlaodh na h-Iudhaich, ag ràdh, Ma leigeas tu am fear so fa sgaoil, cha charaid do Cheasar thu: ge b'e neach a ta 'ga dhèanamh féin 'na rìgh, tha e labhairt an aghaidh Cheasair.

13 Uime sin an uair a chuala *Pilat* a' chainnt sin, thug e mach Iosa, agus shuidh e air a' chaithir-bhreitheanais, anns an ionad ris an abrar an Leac-ùrlar, ach anns an Eabhra, Gabata.

14 Agus b'e là-ulluchaidh na

càisge e, agus mu thimchioll na seathadh uaire: agus thubhairt e ris na h-Iudhaich, Feuch bhur rìgh!

15 Ach ghlaodh iadsan a mach, Beir uainn, beir uainn, céus e. Thubhairt *Pilat* riu, An céus mi bhur rìgh-sa? Fhreagair na h-àrd-shagairt, Cha'n 'eil rìgh againne ach Ceasar.

16 An sin air an aobhar sin thug e thairis dhoibh e, gu bhi air a chéusadh. Agus ghlac iad Iosa, agus thug iad leo e.

17 Agus chaidh e mach, a' giùlan a chrann-céusaidh, do 'n ionad d'an goirear àit a' chloig-inn, d'an ainm san Eabhra, Golgota.

18 An sin chéus iad e, agus dithis eile maille ris, fear air gach taobh, agus Iosa sa mheadhon.

19 Agus sgrìobh *Pilat* mar an ceudna tiodal, agus chuir e air a' chrann-chéusaidh e. Agus b'e an sgrìobhadh, IOSA O NASARET RIGH NAN IUDHACH.

20 Uime sin leugh mòran do na h-Iudhaich an tiodal so: oir bha'n t-àit anns an do chéusadh Iosa fagus do'n bhaile: agus bha an sgrìobhadh an Eabhra, an Greugais, agus an Laidin.

21 An sin thubhairt àrd-shagairt nan Iudhach ri *Pilat*, Na sgrìobh, Rìgh nan Iudhach; ach gu'n dubhairt e féin, Is mi rìgh nan Iudhach.

22 Fhreagair *Pilat*, An ni a sgrìobh mi, sgrìobh mi e.

23 An sin an uair a chéus na saighdearan Iosa, ghlac iad a thrusgan, (agus rinn iad ceithir earrannan, earrann dogach saighdear,) agus a chòta mar an ceudna: agus bha'n còta gun fhuaigh-eal, air fhigheadh o bhràigh sìos gu h-ìomlan.

24 Thubhairt iad uime sin

eatorra féin, Na reubamaid e, ach tilgeamaid croinn air cò aig a bhitheas e: chum gu'n coimhliontadh an sgriobtuir, a ta 'g ràdh, Roinn iad mo thrusgan eatorra, agus thilg iad croinn air mo bhrat. Air an aobhar sin rinn na saighdearan na nithe so.

25 A nis sheas làimh ri crann-céusaidh Iosa, a mhàthair, agus piuthar a mhàthar, Muire bean Chleophais, agus Muire Magdalen.

26 Uime sin an uair a chunn-aic Iosa a mhàthair, agus an deisciobul a b' ionmhuinn leis 'na sheasamh a làthair, thubhairt e r' a mhàthair, A bhean, feuch do mhac!

27 An sin thubhairt e ris an deisciobul, Feuch do mhàthair! Agus o'n àm sin a mach thug an deisciobul *sin* leis i d'a thigh féin.

28 An déigh so air do Iosa fios a bhi aige gu'n robh na h-uile nithe a nis air an crìochnachadh, chum gu'n coimhliontadh an sgriobtuir, thubhairt e, Tha tart orm.

29 A nis bha an sin soitheach làn do fhion geur: agus air dhoibh-san spong a lionadh do'n fhìon gheur, agus a chur air hisop, shìn iad chum a bheoil e.

30 An sin an uair a ghabh Iosa am fion geur, thubhairt e, Tha e crìochnaichte: agus air cromadh a chinn da, thug e suas a spiorad.

31 An sin chum nach fanadh na cuirp air a' chrann-chéusaidh air an t-sàbaid, a chionn gu'm b'e là an ulluchaidh a bha ann, (oir bu là mòr an là sàbaid sin,) dh'iarr na h-Iudhaich air Pilat gu'n rachadh an luirgne a bhriseadh, agus gu'n tugtadh air falbh iad.

32 An sin thàinig na saigh-

dearan, agus bhris iad luirgne a' cheud fhir, agus luirgne an fhir eile, a chéusadh maille ris.

33 Ach air dhoibh teachd chum Iosa, an uair a chunnaic iad gu'n robh e cheana marbh, cha do bhris iad a luirgne-san.

34 Ach lot fear do na saighdearaibh a thaobh le sleagh, agus air ball thàinig a mach fuil agus uisge.

35 Agus thug an tì a chunn-aic *sin* fianuis, agus a ta 'fhianuis fìrinneach: agus a ta fhios aige gu bheil e labhairt na fìrinne, chum gu'n creideadh sibhse.

36 Oir rinneadh na nithe so chum gu'n coimhliontadh an sgriobtuir, Cha bhrisear cnàimh dheth.

37 Agus a ris a ta sgriobtuir eile ag ràdh, Amhaircidh iad air-san a lot iad.

38 'Na dhéigh so dh'iarr Ioseph o Arimatea, (a bha 'na dheisciobul aig Iosa, ach am folach air eagal nan Iudhach,) air Pilat comas corp Iosa a thoirt leis: agus leig Pilat *sin* leis. Thàinig e air an aobhar sin, agus thug e leis corp Iosa.

39 Thàinig mar an ceudna Nicodemus, (a thàinig air tùs gu Iosa san oidhche,) agus thug e leis mu thimchioll ceud pund do mhirr agus do aloes air am measgadh feadh a chéile.

40 An sin ghabh iad corp Iosa, agus cheangail iad e ann an lìon-eudaichibh, maille ris an spìosraidh, mar is gnàth leis na h-Iudhaich adhlac a dhèanamh.

41 A nis bha lios anns an àit an do chéusadh e; agus anns an lios uaigh nuadh, anns nach do chuireadh aon duine riamh.

42 Air an aobhar sin air son ulluchaidh *càisge* nan Iudhach, do bhrìgh gu'n robh an uaigh am fagus, chuir iad Iosa an sin.

CAIB. XX.

AIR a' cheud là do 'n t-seachd-
uin thàinig Muire Magda-
len gu moch, agus an dorchadas
fathast ann, chum na h-uaighe,
agus chunnaic i a' chlach air a
togail o 'n uaigh.

2 Ruith i an sin, agus thàinig
i gu Simon Peadar, agus gus an
deisciobul eile a b' ionmhuinn le
Iosa, agus thubhairt i riu, Thug
iad leo an Tighearn as an uaigh,
agus cha 'n 'eil fhios againn c' àit
an do chuir iad e.

3 Uime sin chaidh Peadar a
mach, agus an deisciobul sin eile,
agus thàinig iad chum na h-
uaighe.

4 Agus ruith iad 'nan dithis
cuideachd: agus ruith an deis-
ciobul eile ni bu luaithe na Pead-
ar, agus thàinig e air tùs chum
na h-uaighe.

5 Agus air cromadh sìos da,
chunnaic e 'n lìon-eudach 'na
luidhe; gidheadh cha deachaidh
e steach.

6 An sin thàinig Simon Pead-
ar 'ga leantuinn, agus chaidh e
steach do 'n uaigh, agus chunn-
aic e 'n lìon-eudach 'na luidhe;

7 Agus an neapaicin a bha
m'a cheann, cha 'n ann 'na luidhe
maille ris an lìon-eudach, ach air
leth air fhilleadh ann an aon àit.

8 An sin chaidh a steach mar
an ceudna an deisciobul sin eile
a thàinig air tùs chum na h-
uaighe, agus chunnaic, agus
chreid e.

9 Oir cha do thuig iad fath-
ast an sgriobtuir, gu 'm b' éigin
gu 'n éireadh esan a rìs o na
marbhaibh.

10 An sin dh' imich na deis-
ciobuil a rìs chum an cuideachd
féin.

11 Ach sheas Muire aig an
uaigh a muigh, a' gul: agus ag
gul d' i chrom i sìos, *ag amharc* a
steach do 'n uaigh,

12 Agus chunnaic i dà aing-
eal ann an *culaidhibh* geala, 'nan
suidhe, fear aig a' cheann, agus
fear aig na cosaibh, san àit an
robh corp Iosa 'na luidhe;

13 Agus thubhairt iadsan
rithe, A bhean, c' ar son a ta thu
gul? Thubhairt i riu, Air son
gu 'n d' thug iad mo 'Thighearn
leo, agus nach 'eil fhios agam
c' àit an do chuir iad e.

14 Agus an uair a thubhairt
i so, phill i air a h-ais, agus
chunnaic i Iosa 'na sheasamh,
agus cha d' aithnich i gu 'm b' e
Iosa bha ann.

15 Thubhairt Iosa rithe, A
bhean, c' ar son a ta thu gul?
cò tha thu 'g iarraidh? air saoil-
sinn d' ise gu 'm b' e an gàradair
a bh' ann, thubhairt i ris, A
thighearn, ma thug thusa leat e,
innis dhomh-sa c' àit an do chuir
thu e, agus bheir mise leam e.

16 Thubhairt Iosa rithe, A
Mhuire. Air tionndadh dh' ise,
thubhairt i ris, Rabboni, 's e sin
r' a ràdh, A Mhaighstir.

17 Thubhairt Iosa rithe, Na
bean rium; oir cha deachaidh
mi fathast suas chum m' Athar:
ach imich chum mo bhràithre,
agus abair riu, Tha mise dol suas
chum m' Athar féin agus bhur
n-Athar-sa, agus *chum* mo Dhé
féin agus bhur Dé-sa.

18 Thàinig Muire Magdalen
agus dh' innis i do na deisciob-
luibh, gu 'm fac i an Tighearn,
agus gu 'n dubhairt e na nithe so
rithe.

19 Agus air teachd do 'n
fheasgar an là sin féin, air a'
cheud là do 'n t-seachduin, agus
na dorsa dùinte far an robh na
deisciobuil cruinn air eagal nan
Iudhach, thàinig Iosa agus sheas
e sa' mheadhon, agus thubhairt
e riu, Sìth dhuibh.

20 Agus air dha so a ràdh,
nochd e dhoibh a làmhnan agus

a thaobh. An sin bha aoibhneas air na deisciobluibh an uair a chunnaic iad an Tighearn.

21 An sin thubhairt Iosa riu a ris, Sìth dhuibh: mar a chuir an t-Athair uaith mise, mar sin a ta mise 'gur cur-sa uam.

22 Agus air dha so a ràdh, shéid e orra, agus thubhairt e riu, Gabhaibh-sa an Spiorad naomh.

23 Cò air bith iad d' am maith sibh am peacanna, tha iad maith-te dhoibh; agus cò air bith iad d' an cum sibh am *peacanna gun am maitheadh*, tha iad air an cumail.

24 Ach cha robh Tomas, aon do 'n dà fhear dheug, d' an goir-ear Didimus, maille riu, 'nuair a thàinig Iosa.

25 Uime sin thubhairt na deisciobuil eile ris, Chunnaic sinne an Tighearn. Ach thubhairt esan riu, Mur faic mise aileadh nan tairngean 'na làmh-aibh, agus mur cuir mi mo mheur ann an aileadh nan tairngean, agus mur cuir mi mo làmh 'na thaobh, cha chreid mi.

26 Agus an ceann ochd làithean 'na dhéigh sin, bha a dheisciobuil a ris a stigh, agus Tomas maille riu: thàinig Iosa, agus na dorsa dùinte, agus sheas e sa' mheadhon, agus thubhairt e, Sìth dhuibh.

27 'Na dhéigh sin thubhairt e ri Tomas, Cuir an so do mheur, agus feuch mo làmhan; agus sin an so do làmh, agus cuir a' m' thaobh i: agus na bì mì-chreideach, ach creideach.

28 Agus fhreagair Tomas, agus thubhairt e ris, Mo Thigh-earn agus mo Dhia.

29 Thubhairt Iosa ris, Air son gu faca tu mi, a Thomais, chreid thu: is beannaichte iad-san nach faca, agus a chreid.

30 Agus rinn Iosa gu fìrinn-

each mòran do mhìorbhuilibh eile am fianuis a dheisciobul, nach 'eil sgriobhta san leabhar so.

31 Ach tha iad so sgriobhta, chum gu 'n creideadh sibh gur e Iosa an Crìosd Mac Dhé, agus ag creidsinn duibh, gu 'm biodh agaibh beatha troimh 'ainm-san.

CAIB. XXI.

AN déigh nan nithe sin dh' fhoillsich Iosa e féin a ris d' a dheisciobluibh aig muir Thiberiais; agus air an dòigh so nochd se e féin:

2 Bha maille r' a chéile Simon Peadar, agus Tomas d' an goirear Didimus, agus Natanael o Chàna Ghalile, agus *mic* Shebede, agus dithis eile d' a dheisciobluibh.

3 Thubhairt Simon Peadar riu, Tha mi dol a dh' iasgach. Thubhairt iadsan ris, Tha sinne a' dol maille riut. Dh' imich iad a mach, agus chaidh iad a steach do luing air ball; agus cha do ghlac iad ni air bith an oidhche sin.

4 Ach an uair a bha a' mhad-uinn a nis air teachd, sheas Iosa air an tràigh: gidheadh cha robh fhios aig na deisciobluibh gu 'm b' e Iosa bha ann.

5 An sin thubhairt Iosa riu, A chlann, am bheil biadh air bith agaibh? Fhreagair iadsan e, Cha 'n 'eil.

6 Agus thubhairt esan riu, Tilgibh an lìon air an taobh deas do 'n luing, agus gheibh sibh. Thilg iad uime sin, agus a nis cha b' urrainn iad a tharruing air son lionmhoireachd an éisg.

7 Uime sin thubhairt an deisciobul sin, a b' ionmhuinn le Iosa, ri Peadar, Is e 'n Tighearn a ta ann. A nis an uair a chuala Simon Peadar gur e an Tigh-earn a bh' ann, cheangail e a chòt-uachdair *uime*, (oir bha e

lomnochd,) agus thilg se e féin sa' mhuir.

8 Thàinig na deisciobuil eile ann an luing bhig; (oir cha robh iad fada o thìr, ach mu thimchioll dà cheud làmh-choille,) a' tarruing an lìn éisg.

9 Uime sin an uair a thàinig iad air tìr, chunnaic iad grìosach an sin, agus iasg air a chur oirre, agus aran.

10 Thubhairt Iosa riu, Thugaibh an so do 'n iasg a ghlac sibh a nis.

11 Chaidh Simon Peadar suas, agus tharruing e an lìon gu tìr, làn do iasgaibh mòra, ceud agus leth-cheud agus trì: agus ged bha 'n uiread sin ann, cha do bhriseadh an lìon.

12 Thubhairt Iosa riu, Thigibh, gabhaibh bhur dìnnear. Agus cha robh a chridhe aig a h-aon do na deisciobuibh fheòraich dheth; Cò thusa? oir dh' aithnich iad gur e an Tighearn a bha ann.

13 An sin thàinig Iosa, agus ghlac e aran, agus thuge dhoibh e, agus iasg mar an ceudna.

14 Is i so a nis an treas uair a nochd Iosa e féin d'a dheisciobuibh, an déigh dha éirigh o na marbhaibh.

15 An sin an déigh dhoibh an dìnnear a ghabhail, thubhairt Iosa ri Simon Peadar, a Shimoin *mhic* Ionais, am bheil barrachd gràidh agad dhomh-sa orra sin? Thubhairt e ris, Tha, a Thighearn; tha fios agad gur toigh leam thu. Thubhairt e ris, Beathaich m' uain.

16 Thubhairt e ris a ris an dara uair, A Shimoin *mhic* Ionais, an toigh leat mise? Thubhairt e ris, Seadh, a Thighearn; tha fios agad gur toigh leam thu. Thubhairt e ris, Beathaich mo chaoraich.

17 Thubhairt e ris an treas

uair, A Shimoin *mhic* Ionais, an toigh leat mise? Bha Peadar doilich a chionn gu 'n dubhairt e ris an treas uair, An toigh leat mise? Agus thubhairt e ris, A Thighearn, is aithne dhuit na h-uile nithe; tha fhios agad gur toigh leam thu. Thubhairt Iosa ris, Beathaich mo chaoraich.

18 Gu deimhin deimhin a ta mi ag ràdh riut, an uair a bha thu òg, chrioslaich thu thu féin, agus dh'imich thu an taobh bu mhiann leat: ach an uair a bhios tu aosmhor, sìnidh tu mach do làmhan, agus crioslaichidh neach eile thu, agus bheir e *thu* an taobh nach àill leat.

19 So thubhairt e, a' ciallachadh ciod a' ghnè bàis leis an tugadh e glòir do Dhia. Agus air dha so a ràdh, thubhairt e ris, Lean mise.

20 An sin air do Pheadar tionndadh, chunnaic e an deisciobul a b' ionmhuinn le Iosa, a' lean-tuinn; an tì mar an ceudna a luidh air uchd Iosa air a shuip-eir, agus a thubhairt ris, A Thighearn, cò e a bhrathas thu?

21 Air do Pheadar esan fhaicinn, thubhairt e ri Iosa, A Thighearn, ciod *a ni* am fear so?

22 Thubhairt Iosa ris, Ma's àill leam-sa e dh' fhan-tuinn gus an tig mi, ciod e *sin* duitse? Lean thusa mise.

23 Uime sin chaidh an ràdh so mach am measg nam bràithre, nach faigheadh an deisciobul sin bàs: gidheadh cha dubhairt Iosa ris, nach faigheadh e bàs: ach, Ma's i mo thoil-sa e dh' fhan-tuinn gus an tig mi, ciod e *sin* duitse?

24 Is e so an deisciobul a ta dèanamh fianuis air na nithibh so, agus a sgriobh na nithe so: agus a ta fhios againne gu bheil 'fhianuis fìor.

25 Agus a ta mar an ceudna mòran do nithibh eile a rinn Iosa, agus nam biodh iad uile sgrìobhta, is i mo bharrail nach

cumadh an saoghal féin na rachadh a sgrìobhadh do leabhraichibh. Amen.

GNIOMHARA NAN ABSTOL.

CAIB. I.

RINN mi an ceud leabhar, a Theophiluis, mu thimchioll nan uile nithe a thòisich Iosa air a dhèanamh agus a theag-asg,

2 Gus an là an do thogadh suas e, an déigh dha, troimh an Spiorad Naomh, àitheantan a thoirt do na h-abstolaibh a thagh e:

3 D'ann d'rinn e mar an ceudna e féin a nochdadh beò an déigh 'fhulangais, le mòran do chomharaibh fìrinneach, air dha bhi air fhaicinn leo feadh dhà fhichead là, agus e labhairt mu na nithibh sin a bhuineadh do rìoghachd Dhé:

4 Agus air dha bhi maille riu, dh'àithn e dhoibh gun iad a dhol o Ierusalem, ach feitheamh ri gealladh an Athar, *ars' esan*, a chuala sibh uam-sa.

5 Oir bhaist Eoin gu deimhin le uisge: ach baistear sibhse leis an Spiorad naomh, air bheag do làithibh an déigh so.

6 Uime sin an uair a chruinnich iad an ceann a chéile, dh'fheòraich iad deth, ag ràdh, A Thighearn, an aisig thu san àm so an rìoghachd do Israel?

7 Ach thubhairt esan riu, Cha bhuin e dhuibh-sa fios nan aimsir no nan àm fhaotainn, a chuir an t-Athair 'na chumhachd féin.

8 Ach gheibh sibhse cumhachd an uair a thig an Spiorad

naomh oirbh: agus bithidh sibh 'nur fianuisibh dhomh-sa, araon ann an Ierusalem, agus ann an Iudea uile, agus ann an Samaria, agus gu iomall na talmhainn.

9 Agus an uair a thubhairt e na nithe so, thogadh suas e, agus iadsan 'ga fhaicinn; agus thug neul as an sealladh e.

10 Agus am feadh a bha iadsan a' geur-amharc gu nèamh, agus esan a' dol suas, feuch, sheas dithis fhear làimh riu ann an eudach geal;

11 Agus thubhairt iad, Fheara Ghalile, c'ar son a ta sibh 'nur seasamh ag amharc gu nèamh? An t-Iosa so a thogadh suas uaibh gu nèamh, is amhuil sin a thig e, mar a chunnaic sibh e a' dol gu nèamh.

12 An sin phill iad gu Ierusalem, o'n t-sliabh ris an abrar *sliabh* nan crann-oladh, a tha'm fagus do Ierusalem, astar là sàbaid as.

13 Agus an uair a thàinig iad a stigh, chaidh iad suas do sheòmar uachdarach, far an robh a' fantuinn Peadar, agus Seumas, agus Eoin, agus Aindreas, Philip, agus Tomas, Bartolomeus, agus Mata, Seumas *mac* Alphueis, agus Simon Selotes, agus Iudas *bràthair* Sheumais.

14 Bhunaich iad so uile a dh'aon inntinn ann an ùrnuigh, [agus an guidhe,] maille ris na mnaibh, agus Muire màthair

Iosa, agus maille r' a bhràithribh.

15 Agus anns na làithibh sin dh' éirich Peadar ann am meadhon nan deisciobul, agus thubhairt e, (b' e àireamh nan ainm a bha làthair, mu thimchioll ceud agus fichead,)

16 Fheara *agus* a bhràithre, b' éigin an sgrìobtuir so bhi air a choimhlionadh, a roimh-labhair an Spiorad naomh le beul Dhaibhidh timchioll Iudais, a bha 'na cheann-iuil aca-san a ghlac Iosa.

17 Oir bha e air àireamh maille ruinne, agus fhuair e cuibhrionn do'n fhrithealadh so.

18 A nis cheannaich am fear so fearann le duais na h-eucorach; agus air dha tuiteam sìos air 'aghaidh, sgàin e sa' mheadhon, agus bhrùchd a mhionach uile mach.

19 Agus rinneadh so aithnichte do luchd-àiteachaidh Ierusalem uile; air chor as gu'n abrar ris an fhearann sin 'nan cainnt féin, Aceldama, sin ri ràdh, Fearann fola.

20 Oir a ta e sgrìobhta ann an leabhar nan Salm, Biodh 'àite-còmhnuidh 'na fhàsach, agus na gabhadh neach sam bith tàmh ann: agus, Glacadh neach eile a dhreuchd.

21 Air an aobhar sin is còir aon do na daoineibh sin a bha maille ruinne, rè na h-aimsir sin uile anns an deachaidh an Tighearn Iosa steach agus a mach 'nar measg-ne,

22 A' tòiseachadh o bhaisteadh Eoin, gus an là an do thogadh suas uainn e, bhi air a dhèanamh 'na fhianuis air 'aiseirighsan maille ruinne.

23 Agus shònraich iad dithis, Ioseph ris an abrar Barsabas, d'am bu cho-ainm Iustus, agus Matias.

24 Agus rinn iad ùrnuigh, agus thubhairt iad, 'Thusa a Thighearn, d' an aithne cridheacha nan uile dhaoine, foillsich cò do'n dithis so a thagh thu,

25 A ghabhail cuibhrinn do'n fhrithealadh agus do'n abstolachd so, o'n do thuit Iudas le seacharan, gu dol d' a àit féin.

26 Agus thilg iad an crannchur; agus thuit an crannchur air Matias; agus bha e air àireamh maille ris an aon abstol deug.

CAIB. II.

A GUS an uair a thàinig là na cuingis, bha iad gu léir a dh' aon inntinn ann an aon àit.

2 Agus thàinig gu h-obann toirm o nèamh, mar shéideadh gaoithe ro thréin, agus lion i an tigh uile far an robh iad 'nan suidhe.

3 Agus dh' fhoillsicheadh dhoibh teanganna sgoilte, mar do theine, agus shuidh e air gach aon diubh fa leth:

4 Agus lìonadh iad uile leis an Spiorad naomh, agus thòisich iad air labhairt le teangaibh eile, a réir mar a thug an Spiorad comas labhairt dhoibh.

5 Agus bha a' gabhail còmhnuidh ann an Ierusalem, Iudhach, daoine cràbhach, do gach uile chinneach fo nèamh.

6 A nis an uair a sgaoileadh an t-ìomradh so, thàinig an sluagh an ceann a chéile, agus bha iad fo amhladh, do bhrìgh gu'n cuala gach aon iad a' labhairt 'nan càinain féin.

7 Agus bha iad uile fo uamhas agus ghabh iad iongantas, ag ràdh r' a chéile, Feuch, nach Galiléich iad sin uile a ta labhairt?

8 Agus cionnus a ta sinne 'gan cluinntinn gach aon 'nar càinain féin, anns an d' rugadh sinn?

9 Partaich, agus Medich, agus Elamaich, agus luchd-àiteachaidh Mhesopotamia, Iudea, agus Chapadocia, Phontuis, agus Asia,

10 Phrighia, agus Phamphilia, na h-Eiphit, agus chrìoch na Libia timchioll Chirene, agus coigrich o'n Roimh, Iudhaich agus Proselitich,

11 Muinntir Chrete, agus Arabia, tha sinn 'gan cluinn-tinn a' labhairt 'nar teangaibh féin gnìomhara mòralach Dhé.

12 Agus bha iad uile fo uamhas, agus ann an ioma-chomhairle, ag ràdh, gach aon r'a chéile, Ciod is ciall da so?

13 Ach thubhairt dream eile a' fanoid, Tha na daoine so làn do fhìon ùr.

14 Ach air seasamh do Pheadar maille ris an aon fhear deug, thog e a ghuth, agus thubhairt e riu, Fheara Iudea, agus sibhse uile a luchd-àiteachaidh Ierusalem, biodh fios so agaibh, agus éisdibh ri m' bhriathraibh-sa:

15 Oir cha 'n 'eil iad so air mhisg, mar a ta sibhse a' meas, oir is i an treas uair do 'n là a ta ann.

16 Ach is e so an ni a chaidh labhairt leis an fhàidh Ioel:

17 Agus tàrlaidh anns na làithibh deireannach, (arsa Dia,) dòirtidh mise do m' Spiorad air gach uile fheoil; agus nì bhur mic agus bhur nigheana fàidheadaireachd, agus chì bhur n-òganaich seallanna, agus brudaraidh bhur seann daoine brudaran:

18 Agus dòirtidh mise air m' -òglaich, agus air mo bhanoglaich do m' Spiorad anns na làithibh sin; agus nì iad fàidheadaireachd:

19 Agus nochdaidh mise iongantais anns na nèamhaibh shuas, agus comharan air an talamh

shìos; fuil, agus teine, agus duibh-neul deataich.

20 Iompaichear a' ghrian gu dorchadas, agus a' ghealach gu fuil, mun tig là mòr agus comharaichte sin an Tighearna:

21 Agus tàrlaidh, ge b'e neach a ghairmeas air ainm an Tighearna, gu 'n tèarnar e.

22 Fheara Israeil, éisdibh ris na briathraibh so: Iosa o Nasaret, duine a dhearbhadh le Dia 'nur measg-sa, le cumhachdaibh agus le mìorbhuilibh agus le comharaibh, a rinn Dia leis-san 'nur meadhon-sa, mar a ta fhios agaibh féin;

23 An duine so, a thugadh thairis le comhairle chinntich agus roimh-eòlas Dé, ghlac sibhse, agus le làmhaibh dhroch dhaoine chéus agus mharbh sibh e:

24 Neach a thog Dia suas, air dha piantan a' bhàis fhuasgladh; do bhrìgh nach robh e 'n comas gu 'n cumtadh esan leis:

25 Oir thubhairt Daibhidh m'a thimchioll, Chunnaic mi an Tighearn romham a ghnàth; oir a ta e aig mo dheas làimh, chum nach gluaisteadh mi.

26 Air an aobhar so rinn mo chridhé gàirdeachas, agus rinn mo theangadh aoibhneas: tuilleadh fòs, gabhaidh m' fheoil còmhnuidh fhoisneach ann an dòchas:

27 Do bhrìgh nach fàg thu m' anam shìos ann an ifrinn, nì mò a dh' fhuilingeas tu do d' naomh Aon féin gu faic e truaillidheachd.

28 Dh' fhoillsich thu dhomh-sa slighean na beatha; lionaidh tu mi do shubhachas le d' ghnùis.

29 Fheara agus a bhràithre, leigibh leam-sa labhairt gu dàna ribh mu'n phrìomh-athair Daibhidh, araon gu 'n d' fhuair e bàs,

agus gu 'n d'adhlaiceadh e, agus gu bheil 'uaigh maille ruinne gus an là 'n diugh :

30 Air an aobhar sin air dha bhi 'na fhàidh, agus fiosrach gu 'n do mhionnaich Dia le mionnaibh dha, do thoradh a leasraidh, [a réir na feòla, gu togadh e suas Crìosd,] gu suidhe air a rìgh-chaithir-san.

31 Air dhasan so a roimh-fhaicinn, labhair e mu aiseirigh Chrìosd, nach d'fhàgadh 'anam ann an ifrinn, agus nach fac 'fheoil truaillidheachd.

32 An t-Iosa so thog Dia suas, air am bheil sinne uile 'nar fianuisibh.

33 Uime sin air dha bhi air àrdachadh le deas làimh Dhé, agus gealladh an Spioraid naomh fhaotainn o 'n Athair, dhòirt e mach an nì so, a tha sibhse nis a' faicinn agus a' cluinntinn.

34 Oir cha deachaidh Daibhidh suas chum nan nèamh : ach a ta e féin ag ràdh, Thubhairt an Tighearn ri m' Thighearn, Suidh air mo làimh dheis,

35 Gus an cuir mi do naimhde 'nan stòl fo d' chosaibh.

36 Uime sin biodh fios gu cinnteach aig tigh Israeil uile, gu 'n d' rinn Dia 'na Thighearn agus 'na Chrìosd an t-Iosa so féin, a chéus sibhse.

37 A nis an uair a chual iad so, bha iad air am bioradh 'nan cridhe, agus thubhairt iad ri Peadar, agus ris a' chuid eile do na h-abstolaibh, Fheara agus a bhràithre, ciod a nì sinn ?

38 An sin thubhairt Peadar riu, Dèanaibh aithreachas, agus bithibh air bhur baisteadh gach aon agaibh ann an ainm Iosa Crìosd, chum maitheanais pheacanna, agus gheibh sibh tiodhlac an Spioraid naomh.

39 Oir a ta an gealladh dhuibh-sa, agus do 'ur cloinn,

agus do na h-uile a ta fad o làimh, eadhon a mheud as a ghairmeas an Tighearn ar Dia.

40 Agus le mòran do bhriathraibh eile rinn e fianuis agus dh' earalaich e iad, ag ràdh, Saoraidh sibh féin o 'n ghinealach fhiar so.

41 An sin bhaisteadh iadsan a ghabh r' a fhocal gu toileach : agus an là sin féin chuireadh riu timchioll trì mìle anam.

42 Agus bhuaich iad gu seasmhach ann an teagasg nan abstol, agus ann an co-chomunn, agus ann am briseadh arain, agus ann an ùrnuighibh.

43 Agus thàinig eagal air gach anam : agus rinneadh mòran do mhiorbhuilibh agus do chomharaibh leis na h-abstolaibh.

44 Agus bha iadsan uile a chreid ann an aon àit, agus bha na h-uile nithe aca coitchionn ;

45 Agus reic iad an seilbh agus am maoin, agus roinn iad air na h-uile iad, a réir mar a bha feum gach neach.

46 Agus ag buanachadh dhoibh gach là a dh' aon inntinn anns an teampull, agus a' briseadh arain o thigh gu tigh, chaith iad am biadh le gairdeachas agus le aon-fhillteachd cridhe,

47 A' moladh Dhé, agus deadh-ghean aca o 'n t-sluagh uile. Agus chuir an Tighearn gach là ris an eaglais an dream a thèaruinear.

CAIB. III.

A GUS chaidh Peadar agus Eoin le chéile suas do 'n teampull, aig uair na h-ùrnuigh, eadhon an naothadh uair.

2 Agus bha duine àraidh a bha 'na bhacach o bhroinn a mhàthar air a ghiùlan, neach a chuireadh gach là aig doras sin an teampull ris an abrar Sgiamh-

ach, a dh'iarraidh déirce orrasan a bha dol a steach do 'n teampull :

3 Neach, an uair a chunnaic e Peadar agus Eoin air tí dol a steach do 'n teampull, a dh'iarr déire.

4 Agus air do Pheadar sealltuinn gu geur air, maille ri Eoin, thubhairt e, Amhairc oirnne.

5 Agus thug esan aire dhoibh an dòchas gu 'm faigheadh e ní-éigin uatha.

6 An sin thubhairt Peadar, Airgid no òr cha'n 'eil agam ; ach an nì a ta agam, so bheir mi dhuit : An ainm Iosa Crìosd o Nasaret, éirich agus imich.

7 Agus air dha breith air a làimh dheis, thog e suas e ; agus air ball neartaicheadh 'aobrunn-an agus a throidhean.

8 Agus leum e suas, agus sheas, agus dh' imich e, agus chaidh e steach maille riu do 'n teampull, ag imeachd, agus a' leumnaich, agus a toirt cliù do Dhia.

9 Agus chunnaic an sluagh uile e ag imeachd, agus a' toirt cliù do Dhia.

10 Agus dh' aithnich iad esan gu'm b' e a bha 'na shuidhe aig geata, Sgiamhach an teampuill ag iarraidh déirce : agus lìonadh iad le h-iongantas agus le h-uamhas air son an nì sin a thachair dha.

11 Agus ag cumail Pheadair agus Eoin, [do'n bhacach chaidh leigheas,] ruith an sluagh uile d' an ionnsuidh anns an sgàth-thigh ris an abrar sgàth-thigh Sholaimh, làn iongantais.

12 Agus an uair a chunnaic Peadar so, fhreagair e an sluagh, Fheara Israeil, c' ar son a ta iongantas oirbh mu 'n nì so ? no c' ar son a ta sibh a geur-amharc oirnne, mar gu b' ann le ar cumhachd no ar naomhachd féin a

thug sinn air an duine so im-eachd ?

13 Ghlòraich Dia Abrahaim, agus Isaic, agus Iacob, Dia ar n-aithriche a Mhac Iosa ; a thug sibhse thairis, agus a dh' àicheadh sibh an làthair Philait, an uair a b' i a bhreth a chur fa sgaoil.

14 Ach dh' àicheadh sibhse an t-Aon naomh, agus am Firean, agus dh' iarr sibh mortair a thiodhlacadh dhuibh ;

15 Agus mharbh sibh Prionnsa na beatha, a thog Dia o na marbhaibh ; air am bheil sinne 'nar fianuisibh.

16 Agus tre chreidimh 'na ainm neartaich e an tì so, a tha sibhse a' faicinn, agus a' s aithne dhuibh : seadh, thug 'ainm-san agus an creidimh a ta trid-san, dhasan an t-slàinte iomlan so 'nur làthair-sa uile.

17 Agus a nis, a bhràithre, tha fhios agam gur ann troimh aineolas a rinn sibh e, mar a rinn mar an ceudna bhur n-uachdar-ain.

18 Ach choimhlion Dia air an dòigh so na nithe sin a roimh-fhoillsich e le beul 'fhàidhean uile, gu'm fuilingeadh Crìosd.

19 Air an aobhar sin dèan-aibh-sa aithreachas agus bithibh air bhur n-iompachadh, chum gu'm bì bhur peacanna air an glanadh as, 'nuair a thig aman-an fionnuaireachd o làthair an Tighearn,

20 Agus a chuireas e Iosa Crìosd d' ur ionnsuidh, a chaidh roimh-òrduchadh :

21 Neach is éigin do nèamh a ghabhail gu aimsiribh aisig nan uile nithe, air an do labhair Dia le beul 'fhàidhean naomha uile, o thoiseach an t-saoghail.

22 Oir gu firinneach thubhairt Maois ris na h-aithrichibh, Togaidh an Tighearn bhur Dia

suas fàidh dhuibh, do 'ur bràith-ribh, mar mise; ris-san éisdidh sibh anns na h-uile nithibh a labhras e ribh.

23 Agus tàrlaidh, gach anam nach éisd ris an fhàidh sin, *gu'n* sgriosar a mach as an t-sluagh e.

24 Seadh, dh' fhoillsich na fàidhean uile o Shamuel, agus iadsan a lean o sin, a mheud diubh as a labhair, roimh-làimh mu na làithibh so.

25 Is sibhse clann nam fàidhean, agus a' choimhcheangail a rinn Dia r' ar n-aithrichibh, ag ràdh ri Abraham, Agus ann ad shliochd-sa bithidh uile theaghlaiche na talmhainn air am bean-nachadh.

26 Air do Dhia a Mhac Iosa thogail suas, chuir e do 'ur n-ionnsuidh-sa e air tùs, chum gu'm beannaicheadh e sibh, leis gach aon agaibh iompachadh o bhuir lochdaibh.

CAIB. IV.

A GUS am feadh 's a bha iad a' labhairt ris an t-sluagh, thàinig orra na sagairt, agus ceannard an teampuill, agus na Sadusaich;

2 Agus bha iad fo dhoilgheas gu'n robh iadsan a' teagasg an t-sluaigh, agus a' searmonachadh tre Iosa aiseirigh nam marbh.

3 Agus chuir iad làmh annta, agus chuir iad am prìosan iad gus an là màireach: oir b' e nis am feasgar a bh' ann.

4 Gidheadh, chreid mòran diubh-san a chual am focal; agus b' e àireamh nan daoine timchioll chùig mìle.

5 Agus thàrladh air an là màireach, gu 'n do chruinnicheadh an ceann a chéile an uachdarain, agus an seanairean, agus an sgrìobhaichean, ann an Ierusalem,

6 Agus Annas an t-àrd-shagart, agus Caiaphas, agus Eoin, agus Alecsander, agus a mheud as a bha do chinneach an àrd-shagairt.

7 Agus air dhoibh iadsan a chur anns a' mheadhon, dh'fhiosraich iad, Ciod e an cumhachd, no ciod e an t-ainm anns an d' rinn sibh so?

8 An sin air do Pheadar bhi air a lìonadh leis an Spiorad naomh, thubhairt e riu, Uachdarana a' phobuill, agus a sheanairean Israeil,

9 Ma tha sinne an diugh air ar ceasnachadh mu'n deadh ghnìomh a rinneadh do'n duine euslan, cionnus a shlànuicheadh e;

10 Biodh e aithnichte dhuibh-sa uile, agus do phobull Israeil uile, gur ann tre ainm Iosa Crìosd o Nasaret, a chéus sibhse, a thog Dia o na marbhaibh, eadhon trid-san a ta 'n duine so 'na sheasamh an so 'nur làthair-sa slàn.

11 Is i so a' chlach sin a dhiùltadh leibhse, a luchd togail, a rinneadh 'na ceann na h-oisne.

12 Agus cha'n 'eil slàinte ann an neach air bith eile: oir cha'n 'eil ainm air bith eile fo nèamh air a thoirt am measg dbaoine, tre am feud sinn bhi air ar tèarnadh.

13 A nis an uair a chunnaic iad dànachd Pheadair agus Eoin, agus a thuig iad gu'm bu daoine gun fhòghlum agus cumanta iad, ghabh iad iongantas; agus dh'aithnich siad iad gu 'n robh iadsan maille ri Iosa.

14 Agus air faicinn an duine a leighiseadh 'na sheasamh maille riu, cha robh ni air bith aca ri ràdh 'na aghaidh.

15 Agus an déigh dhoibh òrd-uchadh dhoibh-san dol a mach

as a' chomhairle, chuir iad an cinn cuideachd,

16 Ag ràdh, Ciod a nì sinn ris na daoineibh so? Oir gu'n deachaidh mìorbhuil aithnichte dhèanamh leo, a ta e follaiseach do luchd-àiteachaidh Ierusalem uile, agus, cha 'n urrainn sinne àicheadh.

17 Ach a chum nach sgaoilear e ni's mò air feadh an t-sluaigh, bagramaid orra gu geur, gun iad a labhairt ni's mò ri neach air bith anns an ainm so.

18 Agus air dhoibh an gairm, dh' àithn iad dhoibh gun iad a labhairt air chor sam bith, no a theagasg ann an ainm Iosa.

19 Ach fhreagair Peadar agus Eoin agus thubhairt iad riu, Am bheil e ceart am fianuis Dé, éisdeachd ribhse roimh Dhia, thugaibh féin breth.

20 Oir cha 'n 'eil e'n comas duinne gun na nithe a chunnaic agus a chuala sinn a labhairt.

21 Ach air dhoibh-san tuilleadh bagraidh a dhèanamh orra, leig iad as iad, gun dòigh air bith fhaotainn air am feudadh iad peanas a dhèanamh orra, air son an t-sluaigh: oir bha na h-uile a' toirt glòire do Dhia air son an ni a rinneadh.

22 Oir bha an duine air an d' rinneadh am mìorbhuil leighis so tuilleadh as dà fhichead bliadhna dh' aois.

23 Agus an uair a leigeadh as iad, thàinig iad dh'ionnsuidh am muinntir féin, agus dh'innis iad na h-uile nithe a thubhairt na h-àrd-shagairt, agus na sean-airean riu.

24 Agus an uair a chual iad-san so, thog iad suas a dh' aon inntinn an guth ri Dia, agus thubhairt iad, A Thighearn, is tusa an Dia a rinn nèamh agus talamh, agus an fhairge, agus na h-uile nithe ta anna:

25 A thubhairt le beul Dhaibhidh do sheirbhisich, C'ar son a ghabh na Cinnich boil, agus a smuainich an sluagh nithe dìomhanach?

26 Sheas rìghrean na talmhainn suas, agus chruinnich-eadh na h-uachdarain an ceann a chèile, an aghaidh an Tighearn, agus an aghaidh a Chrìosd.

27 Oir gu fìrinneach chruinnich-eadh an ceann a chèile, an aghaidh do Leinibh naoimh Iosa, a dh' ùng thu, araon Herod agus Pontius Pilat, maille ris na Cinnich, agus sluagh Israeil,

28 A dhèanamh gach ni a roimh-òrduich do làmh agus do chomhairle a bhi dèanta.

29 Agus a nis, a Thighearn, amhaire air am bagraidhibh: agus dèonaich do d' sheirbhisich féin, t' fhocal a labhairt leis gach uile dhànachd.

30 Le d' làimh a shìneadh a mach chum leighis: agus gu'm bì comharan agus mìorbhuilean air an dèanamh tre ainm do Leinibh naoimh Iosa.

31 Agus air dhoibh ùrnuigh a dhèanamh, chrathadh an t-àit anns an robh iad cruinn; agus lìonadh iad uile do 'n Spiorad naomh, agus labhair iad focal Dé le dànachd.

32 Agus bha aig a' chuideachd a chreid aon chridhe, agus aon anam: agus ni mò a thubhairt neach air bith *dhiubh*, gu'm bu leis féin aon ni a shealbhaich e; ach bha na h-uile nithe coitchionn aca.

33 Agus le mòr-chumhachd thug na h-abstoil fianuis air aiseirigh an Tighearna Iosa: agus bha mòr-ghràs orra uile.

34 Agus ni mò a bha aon neach uireasbhuidheach 'nam measg: oir a mheud as a bha 'nan sealbhadaireibh fearainn, no thighean, air dhoibh an

reiceadh, thug iad luach nan nithe a chaidh reiceadh leo ;

35 Agus chuir iad aig cosaibh nan abstol e : agus roinneadh e air gach neach a réir 'fheuma.

36 Agus air do fhearann a bhi aig Ioses d'an do ghoireadh leis na h-abstolaibh Barnabas, (is e sin, air eadar-theangachadh, Mac na comhfhurtachd,) Lebhitheach, d'am bu dùthaich Ciprus,

37 Reic se e, agus thug e 'n t-airgiod, agus chuir e aig cosaibh nan abstol e.

CAIB. V.

ACH reic fear àraidh d'am b' ainm Ananias, maille r'a mhnaoi Saphira, sealbh fear-ainn,

2 Agus cheil e *cuid* do'n luach, le fios a mhnà, agus air dha cuid éigin a thoirt leis, chuir e aig cosaibh nan abstol e.

3 Ach thubhairt Peadar, Ananiais, c'ar son a lion Satan do chridhe a dhèanamh bréige do'n Spiorad naomh, agus a cheiltinn *cuid* do luach an fhear-ainn?

4 Am feadh 's a dh'fhuirich e *gun reiceadh*, nach bu leat féin e? agus an déigh a reiceadh nach robh e a' d'chomas féin? c'ar son a smuainich thu ann do chridhe an gnìomh so? cha d'rinn thu breug do dhaoineibh, ach do Dhia.

5 Agus an uair a chuala Ananias na briathra so, thuit e sìos, agus chaidh an deò as : agus thàinig eagal mòr air na h-uile a chuala na nithe so.

6 Agus air éirigh do na h-òganaich, phaisg iad an eudach-mairbh e, agus air dhoibh a ghiùlan a mach, dh'adhlaid iad e.

7 Agus thàrladh timchioll trì naire 'na dhéigh sin, gu'n d-thàinig a bhean a steach, gun

fhios aice air an ni a rinn-eadh.

8 Agus fhreagair Peadar i, Innis dhomh-sa an ann air an uiread so reic sibh am fearann? Agus thubhairt ise, Is ann, air son an uiread sin.

9 An sin thubhairt Peadar rithe, C'ar son a cho-aontaich sibh Spiorad an Tighearna a dhearbhadh? feuch, *tha* cosan na muinntir a dh'adhlaid t'fhear aig an dorus, agus giùlainidh iad thusa mach.

10 An sin thuit i air ball aig a chosaibh, agus chaidh an deò aisde : agus air do na h-òganaich teachd a steach, fhuair iad i marbh, agus air dhoibh a giùlan a mach, dh'adhlaid iad làimh r'a fear i.

11 Agus thàinig eagal mòr air an eaglais uile, agus air na h-uile a chuala na nithe so.

12 Agus rinneadh mòran chomharan agus mhìorbhuilean am measg a' phobuill le làmhaidh nan abstol ; (agus bha iad uile dh'aon inntinn ann an sgàth-thigh Sholaimh :

13 Agus cha robh chridhe aig aon do chàch e féin a cheangal riu :) ach bha mòr-mheas aig a' phobull orra.

14 Agus is mòid a chuireadh creidich ris an Tighearn, buidheann mhòr araon do fhéaraibh agus do mhnaibh :

15 Air chor as gu'n d'thug iad a mach a' mhuinntir euslan air na sràidibh, agus gu'n do chuir iad air leabaichibh agus air uirighibh *iad*, chum ag teachd do Pheadar gu'n cuireadh 'fhail-eas, mar bu lugha, sgàile air neach éigin aca.

16 Agus thàinig mar an ceudna mòr-shluagh as na bailtibh mu'n cuairt air Ierusalem, a' toirt leo muinntir euslain, agus dream a bha air am buaireadh

le spioradaibh neòghlan : agus leighiseadh iad uile.

17 An sin dh' éirich an t-àrd-shagart, agus iadsan uile a bha maille ris, (eadhon luchd-bharail nan Sadusach.) agus lìonadh iad le tnùth,

18 Agus chuir iad làmh anns na h-abstolaibh, agus chuir iad sa' phrìosan chumanta iad.

19 Ach dh' fhosgail aingeal an Tighearna dorsan a' phrìosain san oidhche, agus thug e iadsan a mach, agus thubhairt e,

20 Imichibh, agus ag seasamh dhuibh labhraibh san teampull ris an t-sluagh, uile bhriathra na beatha so.

21 Agus an uair a chual iad so, chaidh iad gu moch a steach do'n teampull, agus theagaisg iad. Ach thàinig an t-àrd-shagart agus iadsan a bha maille ris, agus ghairm iad a' chomhairle, agus seanadh chloinn Israeil uile an ceann a chéile agus chuir iad do'n phrìosan chum gu'n tugtadh iadsan *d' an ionn-suidh*.

22 Ach an uair a thàinig na maoir, cha d'fhuair iad sa' phrìosan iad, agus air pilltinn dhoibh, dh' innis iad,

23 Ag ràdh, Fhuair sinne gu fìrinneach am prìosan dùinte gu ro thèaruinte, agus an luchd-coimhead 'nan seasamh a mach fa chomhair nan dorsan; ach an uair a dh' fhosgail sinn, cha d'fhuair sinn aon duine a stigh.

24 A nis an uair a chual an t-àrd-shagart, agus ceannard an teampuil, agus uachdarain nan sagart na briathra so, bha iad fo amharus mu'n timchioll ciod gus an tigeadh so.

25 An sin thàinig neach àraidh agus dh' innis e dhoibh, ag ràdh, Feuch, a ta na daoine a chuir sibh sa' phrìosan, 'nan seasamh

san teampull, agus a' teagasg a' phobuill.

26 An sin dh' imich an ceannard maille ris na maoraibh, agus thug e leis iad gun ainneart : (oir bha eagal orra roimh an t-sluagh, gu'm biodh iad air an clachadh *leo*.)

27 Agus an uair a thug iad leo iad, chuir iad ann am fianuis na comhairle *iad* : agus dh' fheòraich an t-àrd-shagart diubh,

28 Ag ràdh, Nach d' thug sinne geur-òrdugh dhuibh gun teagasg a dhèanamh san ainm so ? agus, feuch, lion sibh Ierusalem le 'ur teagasg, agus is àill leibh fuil an duine so a tharruing oirne.

29 An sin fhreagair Peadar agus na h-abstoil *eile*, agus thubhairt iad, Is còir géill a thoirt do Dhia ni's mò na do dhaoinibh.

30 Thog Dia ar n-aithriche Iosa, a mharbh sibhse agus a chroch sibh air crann.

31 Esan dh' àrdaich Dia le a dheas làimh 'na Cheannard agus 'na Shlànuighear, a thoirt aithreachais agus maitheanais pheacanna do Israel.

32 Agus tha sinne 'nar fianuisibh dha air na nithibh so; agus mar an ceudna an Spiorad naomh, a thug Dia dhoibh-san a ta ùmhal dha.

33 Agus an uair a chual iadsan so, bha iad air an gonadh, agus ghabh iad comhairle an cur gu bàs.

34 An sin dh' éirich Phairiseach àraidh anns a' chomhairle, d' am b' ainm Gamaliel, fear teagaisg an lagha, air an robh meas aig an t-sluagh uile, agus dh' òrduich e na h-abstoil a chur a mach rè tamuill;

35 Agus thubhairt e riu, Fheara Israeil, thugaibh aire dhuibh féin, ciod a ta roimhibh a dhèanamh mu thimchioll nan daoine sin.

36 Oir roimh na làithibh so dh' éirich Teudas suas, ag ràdh, gu'm bu neach éigin mòr e féin, agus cheangail àireamh dhaoine, timchioil ceithir cheud, iad féin ris: mharbhadh esan, agus a mheud 'sa dh'aontaich leis, sgaoileadh iad uile as a chéile, agus chaidh iad gu neo-ni.

37 An déigh an fhir so dh' éirich Iudas an Galiléach suas, ann an làithibh na cìs-mheasaidh, agus tharruing e mòran sluaigh 'na dhéigh: sgriosadh esan mar an ceudna, agus a mheud 's a ghéill da, sgapadh iad uile.

38 Agus a nis a ta mi ag ràdh ribh, Fanaibh o na daoineibh so, agus leigibh leo: oir ma's ann o dhaoineibh a ta a' chomhairle so, no an obair so, thig i gu neo-bhrigh:

39 Ach ma's ann o Dhia a ta i, cha'n urrainn sibhse a cur gu neo-bhrigh: air eagal gu 'n tàrladh gu'm faighear sibh eadhon a' cogadh an aghaidh Dhé.

40 Agus dh'aontaich iad leis-san: agus an uair a ghairm iad na h-abstoil, agus a ghabh iad orra, dh'òrduich iad dhoibh gun labhairt ann an ainm Iosa, agus leig iad as iad.

41 Agus dh'imich iadsan o làthair na comhairle, le gàird-eachas a chionn gu 'n do mheasadh gu'm b' airidh iad air eas-urram fhulang air son 'ainmesan.

42 Agus gach là anns an teampull, agus o thigh gu tigh, cha do sguir iad a bhi teagasg, agus a' searmonachadh Iosa Crìosd.

CAIB. VI.

AGUS anns na làithibh sin, an uair a bha àireamh nan deisciobul a' meudachadh, dh' éirich gearan am measg nan Greugach

an aghaidh nan Eabhrach, a chionn gu 'n do dhearmaideadh am bantraichean san fhrithealadh lathail.

2 An sin ghairm an dà fhear dheug mòr-chuideachd nan deisciobul d' an ionnsuidh, agus thubhairt iad, Cha 'n 'eil e iomchuidh sinne dh'fhàgail focail Dé, agus a fhrithealadh da bhòrd-aibh.

3 Uime sin, a bhràithre, iarraibh a mach 'nur measg seachd-nar dhaoine fo dheadh iomradh, làn do 'n Spiorad naomh agus do ghliocas, a chuireas sinne os ceann an dreuchd so.

4 Ach buanaichidh sinne a ghnàth ann an ùrnuigh, agus am ministreileachd an fhocail.

5 Agus bha chainnt so taitneach an làthair na mòr-chuideachd uile: agus thagh iad Stephan, duine làn do chreidimh, agus do 'n Spiorad naomh, agus Philip, agus Prochorus, agus Nicanor, agus Timon, agus Parmenas, agus Nicolas proseliteach do mhuinntir Antioch:

6 Chuir iad iadsan an làthair nan abstol: agus air dèanamh ùrnuigh dhoibh, chuir iad an làmhan orra.

7 Agus dh'fhàs focal Dé; agus mheudaicheadh àireamh nan deisciobul gu ro mhòr ann an Ierusalem; agus bha cuideachd mhòr do na sagartaibh ùmhal do 'n chreidimh.

8 Agus rinn Stephan, làn do chreidimh agus do chumhachd, mìorbhuilean agus comharan mòra am measg an t-sluaigh.

9 An sin dh' éirich dream àraidh do 'n t-sionagag, ris an abrar *sionagag* nan Libertineach, agus nan Cirenianach, agus mhuinntir Alecsandria, agus na dream o Chìlicia, agus o 'n Asia, a' deasboireachd ri Stephan.

10 Agus cha b' urrainn iad

cur an aghaidh a' ghliocais agus an spioraid leis an do labhair e.

11 An sin thug iad a steach an uaignidheas daoine a thubhairt, Chuala sinne e labhairt bhriathra toibheumach an aghaidh Mhaois, agus Dhé.

12 Agus dhùisg iad suas an sluagh, agus na seanairean, agus na sgrìobhaichean, agus thàinig iad air, agus ghlac iad e, agus thug iad an làthair na comhairle e,

13 Agus chuir iad suas fianaisean bréige, a thubhairt, Cha'n 'eil an duine so a' sgar do labhairt bhriathra toibheumach an aghaidh an ionaid naoimh so, agus an lagha.

14 Oir chuala sinn e ag ràdh, gu'n sgrios an t-Iosa so o Nasaret an t-àit so, agus gu'n caochail e na gnàthanna a thug Maois dhuinne.

15 Agus air dhoibh-san uile a bha 'nan suidhe sa' chomhairle amharc gu geur air, chunnaic iad 'aghaidh mar aghaidh aingil.

CAIB. VII.

AN sin thubhairt an t-àrdshagart, Am bheil ma ta na nithe so mar so?

2 Agus thubhairt esan, Fheara, a bhràithre, agus aithriche, éisdibh; Dh' fhoillsich eadh Dia na glòire d'ar n-athair Abraham, 'nuair a bha e ann am Mesopotamia, mun do ghabh e còmhnuidh ann an Charan.

3 Agus thubhairt e ris, Rach a mach à d' thir féin, agus o d' chinneach, agus thig chum na tìre a nochdas mise dhuit.

4 An sin chaidh esan a mach á talamh nan Caldéach, agus ghabh e còmhnuidh ann an Charan: agus as a sin, an déigh bàis 'athar, dh' atharraich se e do'n fhearann so anns am bheil sibhse nis 'nur còmhnuidh.

5 Agus cha d' thug e dha oighreachd *sam bith* ann, cha d' thug *fiù* leud troidhe: gidheadh gheall e gu'n tugadh e mar sheilbh e dha féin agus d' a shliochd 'na dhéigh, ged nach robh fathast duine cloinne aige.

6 Agus labhair Dia air an dòigh so, Gu'm biodh a shliochd air chuairt ann an dùthaich choigrich, agus gu'n dèanadh iad tràilleann diubh, agus gu'm buineadh iad gu h-olc *riu* rè ceithir cheud bliadhna.

7 Agus air a' chinneach sin d'am bi iadsan fo dhaorsa, bheir mise breth, arsa Dia: agus an déigh nan nithe sin thig iad a mach, agus nì iad seirbhis dhomhsa anns an àit so.

8 Agus thug e dha coimheangal an timchioll-ghearraidh: agus mar sin ghin *Abraham* Isaac, agus thimchioll-gheàrr se e air an ochdamh là: agus *ghin* Isaac Iacob, agus Iacob an dà phrìomh-athair dheug.

9 Agus a' gabhail farmaid reic na prìomh-aithriche Ioseph do'n Eiphit: ach bha Dia maille ris,

10 Agus shaor se e as a thrioblaidibh uile, agus thug e deadh-ghean agus gliocas da an làthair Pharaoh rìgh na h-Eiphit; agus chuir se e 'na uachdaran air an Eiphit, agus air a theaghlach féin uile.

11 Nis thàinig gorta agus àmhghar mòr air an Eiphit uile, agus air talamh Chanaain; agus cha d' fhuair ar n-aithriche teachd-an-tìr.

12 Ach an uair a chuala Iacob gu'n robh arbhar san Eiphit, chuir e mach ar n-aithriche air tùs.

13 Agus air an dara *uair* rinneadh Ioseph aithnichte d' a bhràithribh; agus rinneadh cinn-

each Ioseiph follaiseach do Pharaoh.

14 An sin chuir Ioseph *fios* uaith, agus ghairm e d' a ionnsuidh Iacob 'athair, agus a luchd-dàimhe uile, cùig anama deug agus trì fichead.

15 Agus chaidh Iacob sìos do 'n Eiphit, agus fhuair e bàs, e féin agus ar n-aithriche.

16 Agus ghiùlaineadh thairis iad gu Sichem, agus chuireadh iad anns an àit-adhlaic a cheannaich Abraham air suim airgid o mhic Eموir, *athar* Shicheim.

17 Ach an uair a dhruid àm a' gheallaidh a mhionnaich Dia do Abraham, dh' fhàs an sluagh agus rinneadh iad lionmhorsan Eiphit,

18 Gus an d' éirich rìgh eile, do nach b' aithne Ioseph.

19 Bhuin esan gu cuilbheirt-each r' ar cinneach, agus rinn e olc air ar n-aithrichibh, air chor as gu 'n d' thug e orra an naoidheana a thilgeadh mach, chum nach sìolaicheadh iad.

20 Anns an àm sin rugadh Maois, agus bha e ro sgiamhach, agus dh' altrumadh e trì mìosan ann an tigh 'athar :

21 Agus an uair a thilgeadh a mach e, thog nighean Pharaoh leatha e, agus dh' altrum i e mar mhac dh' i féin.

22 Agus dh' fhòghlumadh Maois ann an uile ghliocas nan Eiphiteach, agus bha e cumhachdach am briathraibh agus an gnìomharaibh.

23 Agus an uair a bha e dà fhichead bliadhna iomlan a dh' aois, thàinig e 'na chridhe a bhràithre clann Israeil fhiosrachadh.

24 Agus air dha duine àraidh *dhiubh* fhaicinn a' fulang eucoir, theasairg se e, agus air bualadh an Eiphitich dha, rinn e dìoghaltas do 'n fhear air an d' rinneadh an eucoir :

25 Oir shaoil e gu 'n tuigeadh a bhràithre, gu 'n tugadh Dia le a làimh-san saorsa dhoibh ; ach cha do thuig iad-san.

26 Agus air an là 'na dhéigh sin nochd se e féin doibh agus iad a' comhstri, agus b' àill leis sìth a dhèanamh eatorra, ag ràdh, A dhaoine, is bràithre sibh féin ; c' ar son a ta sibh a' dèanamh eucoir air a chéile ?

27 Ach chuir am fear a rinn an eucoir air a' choimhearsnach uaith e, ag ràdh, Cò a rinn thusa a' d' uachdaran agus a' d' bhrèitheamh oirnne ?

28 Am miann leat mise a mharbhadh, mar a *mharbh thu* an t-Eiphiteach an dé ?

29 An sin theich Maois air son an fhocail so, agus bha e 'na choigreach ann an dùthaich Mhidiaìn, far an do ghin e dithis mhac.

30 Agus an uair a choimhlionadh dà fhichead bliadhna, dh' fhoillsicheadh dha ann am fàsach beinne Shina, aingeal an Tighearn ann an lasair theine ann am preas.

31 Agus an uair a chunnaic Maois *so*, ghabh e iongantas mu 'n t-sealladh ; agus air dha teachd am fagus gu beachdachadh *air*, thàinig guth an Tighearna d' a ionnsuidh,

32 *Ag ràdh, Is* mise Dia t' aithriche, Dia Abraham, agus Dia Isaac, agus Dia Iacob. An sin chrìochnuich Maois, agus cha robh chridhe aige amharc.

33 An sin thubhairt an Tighearn ris, Fuasgail do bhrògan o d' chosaibh : oir is talamh naomh an t-àit air am bheil thu a' d' sheasamh.

34 Chunnaic mi gu cinnteach àmhghar mo phobuill a ta san Eiphit, agus chuala mi an osnaidh, agus thàinig mi nuas g' an

saoradh. Agus a nis thig, cuiridh mi do 'n Eiphit thu.

35 Am Maois so féin a dhiùlt iadsan, ag ràdh, Cò rinn uachdaran agus breitheamh dhiot-sa? esan chuir Dia *gu bhi* 'na uachdaran agus 'na fhear-saoraidh le làimh an aingil a dh' fhoillsich-eadh dha sa' phreas.

36 Thug esan a mach iad an déigh dha mìorbhuilean, agus comharan a dhèanamh ann an tìr na h-Eiphit, agus anns a' mhuir ruaidh, agus anns an fhàsach rè dhà fhichead bliadhna.

37 Is e so am Maois ud a thubhairt ri cloinn Israeil, Togaidh an Tighearn bhur Dia suas fàidh dhuibh do 'ur bràithribh, cosmhuil rium-sa; ris-san éisdidh sibh.

38 So esan a bha san eaglais anns an fhàsach, maille ris an aingeal a labhair ris ann am beinn Shina, agus maille r' ar n-aithrichibh-ne: neach a fhuair briathra na beatha chum an toirt dhuinne:

39 Do nach b' àill le ar n-aithrichibh bhi ùmhal, ach chuir iad uatha e, agus 'nan cridhe phill iad air an ais do 'n Eiphit,

40 Ag ràdh ri Aaron, Dèan dhuinne dée a théid romhainn: oir mu thimchioll a' Mhaois so, a thug a mach sinn á tìr na h-Eiphit, cha 'n 'eil fhios againn ciod a dh' éirich dha.

41 Agus rinn iad laogh sna làithibh sin, agus thug iad iobairt do 'n dealbh, agus rinn iad gairdeachas ann an oibribh an làmha féin.

42 An sin phill Dia, agus thug e thairis iad chum aoradh a dhèanamh do armait nèimh, a réir mar a ta e sgrìobhta ann an leabhar nam fàidhean, An d' thug sibh dhomh-sa beathaichean marbhtha, agus iobairte rè

dhà fhichead bliadhna anns an fhàsach, O a thigh Israeil?

43 Seadh, thog sibh suas pàillion Mholoich, agus reult bhur dé Remphain, dealbhan a rinn sibh chum aoraidh dhoibh: uime sin atharraichidh mi sibh an taobh thall do Bhabilon.

44 Bha pàillion na fianuis aig ar n-aithrichibh san fhàsach, a réir mar a dh' àithn an Tì a labhair ri Maois, gu 'n dèanadh se e a réir an t-samhlaidh a chunn-aic e.

45 An ni a thug mar an ceudna ar n-aithriche a bha 'nan déigh, a steach maille ri losa do sheilbh nan Cinneach, a thilg Dia a mach roimh ghnùis ar n-aithriche, gu làithibh Dhaibhidh;

46 Neach a fhuair deadh-ghean am fianuis Dhé, agus a dh' iarr pàillion fhaotainn do Dhia Iacoib.

47 Ach thog Solamh tigh dha.

48 Gidheadh cha 'n 'eil an Tì a's àirde a' gabhail còmhnuidh ann an teampluibh làmh-dhèanta; mar a ta am fàidh ag ràdh,

49 *Is e* nèamh mo rìghchaithir, agus an talamh stòl mo chos: ciod an tigh a thogas sibh dhomh? a ta an Tighearn ag ràdh: no ciod e ionad mo thàimh?

50 Nach do rinn mo làmh na nithe so uile?

51 A dhaoine cruaidh-mhuinealach, agus neo-thimchioll-ghearrta ann an cridhe agus ann an clusaibh, tha sibh a ghnàth a' cur an aghaidh an Spioraid naoimh: mar a rinn bhur n-aithriche, mar sin a ta sibhse a' dèanamh.

52 Cò do na fàidhibh air nach d' rinn bhur n-aithriche geurleanmhuinn? agus mharbh siad iadsan a roimh-fhoillsich teachd an Fhìrein ud; air an robh

sibhse a nis 'nur luchd-brathaidh, agus 'nur mortairibh :

53 *Sibhse* a fhuair an lagh le frithealadh nan aingeal, agus nach do choimhid e.

54 'Nuair a chual iad na nithe sin, bha iad air an gonadh 'nan cridhe, agus chas iad *am* fìaclan ris.

55 Ach air dhasan bhi làn do'n Spiorad naomh, dh'amhairc e gu geur suas gu nèamh, agus chunnaic e glòir Dhé, agus Iosa 'na sheasamh air deas làimh Dhé ;

56 Agus thubhairt e, Feuch, tha mi faicinn nan nèamh fosgailte, agus Mac an duine 'na sheasamh air deas làimh Dhé.

57 An sin ghlaodh iadsan le guth mòr, agus dhruid iad an cluasan, agus leum iad air a dh'aon inntinn,

58 Agus air dhoibh a thilgeadh a mach as a' bhaile, chlach iad e : agus thilg na fianuisean an eudach sìos aig cosaibh òganaich, d'am b' ainm Saul.

59 Agus chlach iad Stephen, agus e a' gairm air *Crìosd*, agus ag ràdh, A Thighearn Iosa, glac mo spiorad.

60 Agus air dha a leigeadh féin air a ghlùinibh, ghlaodh e le guth mòr, A Thighearn, na cuir am peacadh so as an leth. Agus air dha so a ràdh, choidile.

CAIB. VIII.

AGUS bha Saul ag aontachadh le a bhàs-san. Agus dh'éirich anns an àm sin geurleanmhuinn mhòr an aghaidh na h-eaglais a bha ann an Ierusalem ; agus bha iad uile air an sgapadh air feadh tìre Iudea agus Shamaria, ach na h-abstoil a *mhàin*.

2 Agus ghiùlain daoine daidhaidh Stephan *chum 'adhaic*, agus rinn iad caoidh mhòr air a shon.

3 Ach bha Saul a' fàsachadh na h-eaglais, a' dol a steach do gach tigh ; agus ag tarruing a mach fhear agus bhan, chuir e am prìosan *iad*.

4 Uime sin dh'imich an dream a sgapadh, feadh gach àite, a' searmonachadh an fhocail.

5 An sin chaidh Philip sìos do bhaile Shamaria, agus shearmonaich e Crìosd doibh.

6 Agus thug an sluagh a dh'aon toil aire do na nithibh a labhradh le Philip, ag éisd-eachd ris, agus a' faicinn nam mìorbhuile a rinn e.

7 Oir chaidh spiorada neòghlan a mach á mòran anns an robh iad, a' glaothaich le guth mòr : agus chaidh mòran air an robh am pairilis, agus a bha 'nam bacaich, a shlànuchadh.

8 Agus bha gàirdeachas mòr sa' bhaile sin.

9 Ach bha roimhe sin duine àraidh sa' bhaile sin d'am b' ainm Simon, a ghnàthaich druidh-eachd, agus a mheall muinntir Shamaria, ag ràdh gu'm bu neach mòr éigin e féin.

10 Dhasan thug iad uile aire o'n bheag gus a' mhòr, ag ràdh, Is e an duine so cumhachd mòr Dhé.

11 Agus thug iad an aire dha, a chionn gu'n do mheall e iad rè ùine fhada le a dhruidh-eachd.

12 Ach an uair a chreid iad Philip, a' searmonachadh nan nithe a bhuineas do rìoghachd Dhé, agus do ainm Iosa Crìosd, bhaisteadh iad eadar fheara agus mhnàin.

13 An sin chreid Simon féin mar an ceudna : agus an uair a bhaisteadh e, dh'fhan e maille ri Philip, agus a' faicinn nan comhara agus nam feartan a rinneadh, ghabh e iongantas ro-mhòr.

14 Agus an uair a chuala na h-abstoil a bha ann an Ierusalem, gu'n do ghabh Samaria focal Dhé, chuir iad d'an ionnsuidh Peadar agus Eoin :

15 Agus an uair a chaidh iad sìos, ghuidh iad air an son gu m faigheadh iad an Spiorad naomh.

16 (Oir cha d' thàinig e fathast a nuas air aon aca: ach a mhàin bhaisteadh iad ann an ainm an Tighearna Iosa.)

17 An sin chuir iad an làmhan orra, agus fhuair iad an Spiorad naomh.

18 Agus an uair a chunnaic Simon gu'n robh an Spiorad naomh air a thoirt tre làmhan nan abstol a chur orra, thairg e airgid dhoibh,

19 Agràdh, Thugaibh dhomhsa mar an ceudna an cumhachd so, ge b'e neach air an cuir mi mo làmha, gu'm faigh e an Spiorad naomh.

20 Ach thubhairt Peadar ris, Gu rachadh t' airgid am mugha maille riut féin, a chionn gu'n do mheas thu gu'm feudtadh tiodhlac Dhé a cheannach le h-airgid.

21 Cha 'n 'eil agad cuid no crannchur sa' chùis so: oir cha 'n 'eil do chridhe dìreach am fianuis Dhé.

22 Gabh aithreachas uime sin do t' olc so, agus guidh air Dia, ma dh' fheudar gu maithear dhuit smuaine do chridhe.

23 Oir a ta mi 'gad fhaicinn ann an domblas na seirbhe, agus fo chuibhreach na h-eucorach.

24 An sin fhreagair Simon, agus thubhairt e, Guidhibh-sa an Tighearn air mo shon, nach tig aon do na nithibh sin a thubhairt sibh orm.

25 An sin air dhoibh-san fianuis a dhèanamh agus focal an Tighearn a labhairt, phill iad gu

Ierusalem, agus shearmonaich iad an soisgeul ann am mòran do bhailtibh nan Samaritanach.

26 Agus labhair aingeal an Tighearna ri Philip, ag ràdh, Eirich agus imich chum na h-àirde deas, chum na slighe a ta dol sìos o Ierusalem, gu Gasa, a ta 'na fhàsach.

27 Agus dh' éirich e, agus dh' imich e: agus, feuch, duine àraidh, cailteanach o Etiopia, aig an robh mòr-ùghdarras fo Chandace ban-rìghinn na h-Etiopia, agus a bha os ceann a h-ionmhais uile, agus a bha air teachd gu Ierusalem chum aoradh a dhèanamh,

28 Bha e a' pilltinn air ais, agus 'na shuidhe 'na charbad, agus bha e a' leughadh an fhàidh Esaiais.

29 An sin thubhairt an Spiorad ri Philip, Imich am fagus, agus druid ris a' charbad so.

30 Agus ruith Philip d'a ionnsuidh, agus chuala se e a' leughadh an fhàidh Esaiais, agus thubhairt e, Am bheil thu a' tuigsinn nan nithe a tha thu a' leughadh?

31 Agus thubhairt esan, Cionn-us is urrainn mi, mur seòl neach éigin mi? Agus dh' iarr e air Philip teachd a nìos, agus suidhe maille ris.

32 A' chuibhrionn do'n sgriob-tuir a bha e leughadh, b' i so i, Thugadh e mar chaora chum marbhaidh; agus mar uan a ta 'na thosd am fianuis an fhir-lomairt, mar sin cha d' fhosgail e a bheul:

33 'Na isleachadh thugadh a bhreitheanas air falbh: agus cò a nochdas a ghinealach? oir thogadh a bheatha o'n talamh.

34 Agus fhreagair an cailt-eanach, agus thubhairt e ri Philip, Guidheam thu, cò uime

tha am fàidh ag ràdh so? uime féin, no mu neach éigin eile?

35 An sin dh'fhosgail Philip a bheul, agus a' tòiseachadh o'n sgriobtuir sin, shearmonaich e Iosa dha.

36 Agus an uair a dh'imich iad air an t-slighe, thàinig iad gu h-uisge àraidh: agus thubhairt an caillteanach, Feuch, uisge; ciod a ta bacadh mise bhi air mo bhaisteadh?

37 Agus thubhairt Philip, Ma tha thu a' creidsinn le d' uile chridhe, feudaidh tu. Agus fhreagair e agus thubhairt e, Tha mi a' creidsinn gur e Iosa Crìosd Mac Dhé.

38 Agus dh'àithn e 'n carbad a sheasamh: agus chaidh iad sìos le chéile do'n uisge, arzon Philip agus an caillteanach; agus bhaist se e.

39 Agus an uair a thàinig iad a nìos as an uisge, thug Spiorad an Tighearna Philip leis, agus cha'n fhac an caillteanach tuilleadh e: agus dh'imich e air 'aghaidh le gàirdeachas.

40 Ach fhuaradh Philip ann an Asotos: agus shearmonaich e anns na bailtibh uile, a' dol troimh an dùthaich, gus an d' thàinig e gu Cesarea.

CAIB. IX.

A GUS air do Shaul bhi fathast a' séideadh bagraidh, agus air an aghaidh dheisciobul an Tighearna, chaidh e chum an àrd-shagairt,

2 Agus dh'iarr e litrichean uaith gu Damascus chum nan sionagog, chum nam faigheadh e aon neach do'n t-slighe so, co aca b' fhir no mnà iad, gu'n tugadh e leis ceangailte gu Ierusalem iad.

3 Agus ag imeachd dha, thàrladh gu'n do dhruid e ri Damascus: agus dhealraich gu h-obann mu'n cuairt air solus o nèamh.

4 Agus air tuiteam dha air an talamh, chual e guth ag ràdh ris, A Shaul, A Shaul, c'ar son a ta thu 'gam gheur-leanmhuinn-sa?

5 Agus thubhairt esan, Cò thu, a Thighearn? Agus thubhairt an Tighearn, Is mise Iosa a ta thusa a' geur-leanmhuinn: is cruaidh dhuitse breabadh an aghaidh nan dealg.

6 Agus air dhasan bhi air chrith agus làn uamhainn, thubhairt e, A Thighearn, ciod is àill leat mise a dhèanamh? Agus thubhairt an Tighearn ris, Eirich, agus rach a steach do'n bhaile, agus innsear dhuit ciod is còir dhuit a dhèanamh.

7 Agus sheas na daoine bha 'g imeachd maille ris 'nan tosd, a' cluinntinn a' ghutha, ach gun neach air bith fhaicinn.

8 Agus dh'éirich Saul o'n talamh, agus air fosgladh a shùl dha, cha'n fhac e neach air bith: ach air dhoibh breith air a làimh, threòraich iad e gu Damascus.

9 Agus bha e trì làithean gun radharc, agus cha d'ith agus cha d'òl e ni air bith.

10 Agus bha deisciobul àraidh ann an Damascus, d'am b' ainm Ananias; agus thubhairt an Tighearn ris ann am foillseachadh, Ananiais. Agus thubhairt esan, Feuch a ta mi an so, a Thighearn.

11 Agus thubhairt an Tighearn ris, Eirich, agus imich do'n t-sràid, ris an abrar Direach, agus iarr ann an tigh Iudais, duine o Tharsus d'ann goirear Saul: oir feuch, a ta e ri ùrn-uigh,

12 Agus chunnaic e ann am foillseachadh duine d'an ainm Ananias, a' teachd a steach, agus a' cur a làimhe air, chum gu'm faigheadh e a radharc.

13 An sin fhreagair Ananias,

A Thighearn, chuala mi o mhòr-an mu 'n duine so, cia lìon ole a rinn e do d' naomhaibh ann an Ierusalem :

14 Agus a ta an so ùghdarras aige o uachdaranaibh nan sagart, iadsan uile a cheangal a ta gairm air t' ainm-sa.

15 Ach thubhairt an Tighearn ris, Imich ; oir is soitheach taghta dhomh-sa e, chum m' ainm a ghiùlan am fianuis nan Cinn-each, agus rìghrean, agus chloinn Israeil.

16 Oir nochdaidh mise dha cia mòr na nithe a's éigin da fhulang air sgath m' ainme-sa.

17 Agus dh' imich Ananias, agus chaidh e steach do 'n tigh ; agus chuir e a làmhan air, agus thubhairt e, A Shaul, a bhràthair, chuir an Tighearn, (*eadhon Iosa a dh' fhoillsicheadh dhuitse anns an t-slighe air an d' thàinig thu,*) mise chum gu'm faigheadh tu do radharc, agus gu'm biodh tu air do lionadh leis an Spiorad naomh.

18 Agus air ball thuit o 'shùilibh mar gu'm biodh lannan ; agus dh' aisigeadh a radharc dha gun dàil, agus air dha éirigh, bhaisteadh e.

19 Agus an uair a ghabh e biadh, neartaicheadh e. An sin bha Saul làithean àraidh maille ris na deisciobluibh a bha ann an Damascus.

20 Agus air ball shearmonaich e Iosa anns na sionagogaibh, gur esan Mac Dhé.

21 Ach bha na h-uile a chual e fo uamhas, agus thubhairt iad, Nach e so esan a bha sgrios ann an Ierusalem iadsan a bha gairm air an ainm so, agus a thàinig an so chum na criche so, gu'n tugadh e ceangailte iad dh' ionnsuidh uachdarana nan sagart ?

22 Ach bu mhòid a neartaicheadh Saul, agus chuir e gu h-

amhluadh na h-Iudhaich a bha chòmhnuidh ann an Damascus, a' dearbhadh gur e so an Crìosd.

23 Agus air dol do mhòran làithean seachad, rinn na h-Iudhaich comhairle r' a chéile esan a mharbhadh :

24 Ach thugadh fios do Shaul air am feill : agus bha faire aca air na geatachaibh a là agus a dh' oidhche chum a mharbhadh.

25 An sin ghabh na deisciobhuil e san oidhche, agus chuir iad a mach thar a' bhalla e, agus leig iad sìos ann an cliabh e.

26 Agus an uair a thàinig Saul gu Ierusalem, dh' fheuch e ri e féin a cheangal ris na deisciobluibh : ach bha eagal orra uile roimhe, agus cha do chreid iad gu'm bu deisciobul e.

27 Ach ghabh Barnabas d' a ionnsuidh e, agus thug e chum nan abstol e, agus chuir e'n ceill doibh cionnus a chunnaic e 'n Tighearn anns an t-slighe, agus gu'n do labhair e ris, agus cionnus a shearmonaich e gu dàna ann an Damascus an ainm Iosa.

28 Agus bha e maille riu a' teachd a steach, agus a' dol a mach ann an Ierusalem.

29 Agus labhair e gu dàna an ainm an Tighearna Iosa, agus rinn e deasboireachd an aghaidh nan Greugach : ach chuir iadsan rompa esan a mharbhadh.

30 Ach an uair a thuig na bràithre so, thug iad sìos e gu Cesarea, agus chuir iad air falbh gu Tarsus e.

31 An sin bha fois aig na h-eaglaisibh troimh Iudea uile, agus Ghalile, agus Shamaria, agus air dhoibh bhi air an togail suas, agus a' siubhal ann an eagal an Tighearn, agus ann an comhfhurtachd an Spioraid naomh, mheudaicheadh gu mòr iad.

32 Agus thàrladh, air do Pheadar imeachd troimh gach àite, gu'n deachaidh e sìos mar an ceudna chum nan naomh a bha gabhail còmhnuidh ann an Lida.

33 Agus fhuair e an sin duine àraidh d'am b'ainm Eneas, a bha rè ochd bliadhna air a leabaidh, agus e gu tinn leis a' phairilis.

34 Agus thubhairt Peadar ris, Eneais, tha Iosa Crìosd ga d'leigheas: éirich agus dèan do leabadh. Agus air ball dh'éirich e.

35 Agus chunnaic iadsan uile e, a bha còmhnuidh ann an Lida, agus ann an Saron, agus phill iad chum an Tighearn.

36 A nis bha ban-deisciobul àraidh ann an Iopa d'am b'ainm Tabita, 'se sin, air eadar-theangachadh, Dorcas: bha a' bhean so làn do dheadh oibribh, agus do dhéircibh a rinn i.

37 Agus thàrladh anns na làithibh sin, air dh'i bhi gu tinn gu'n d'fhuair i bàs: Agus air dhoibh a h-ionnlad, chuir iad ann an seòmar uachdarach i.

38 Agus air do Lida bhi fagus do Iopa, agus air cluinntinn do na deisciobluibh gu'n robh Peadar an sin, chuir iad dithis dhaoine d'a ionnsuidh, a' guidhe air e theachd d'an ionnsuidh gun dàil.

39 An sin dh'éirich Peadar, agus chaidh e maille riu. Agus an uair a bha e air teachd, threòraich iad suas e do'n t-seòmar uachdarach: agus sheas na bantraichean uile làimh ris a' caoineadh, agus a' nochdadh nan còta agus nan trusgan a rinn Dorcas am feadh a bha i maille riu.

40 Ach air do Pheadar an cur a mach uile, leig se e féin air a ghlùinibh agus rinn e ùrnuigh; agus air dha tionndadh

ris a' chorp, thubhairt e, A Thabita, éirich. Agus dh'fhosgail ise a sùilean: Agus air dh'i Peadar fhaicinn, dh'éirich i 'na suidhe.

41 Agus thug e a làmh dh'i, agus thog e 'na seasamh i; agus an uair a ghairm e na naoimh agus na bantraichean, chuir e 'nan làthair beò i.

42 Agus fhuaradh fios air so tre Iopa uile; agus chreid mòran anns an Tighearn.

43 Agus thàrladh gu'n d'fhan e mòran do làithibh ann an Iopa maille ri Simon àraidh fear-deasachaidh leathair.

CAIB. X.

A GUS bha duine àraidh ann an Cesarea, d'am b'ainm Cornelius, ceannard-ceud do'n chuideachd ris an abrar a' chuideachd Eadailteach,

2 Duine cràbhach, agus air an robh eagal Dé maille r'a thigh uile, a bha toirt mòrain déirce do'n t-sluagh, agus a' dèanamh ùrnuigh ri Dia a ghnàth.

3 Chunnaic e ann an sealladh gu soilleir, mu thimchioll na naothadh uaire do'n là, aingeal Dé a' teachd a stigh d'a ionnsuidh, agus ag ràdh, A Chorneliuis.

4 Agus air dhasan amharc gu geur air, ghabh e eagal, agus thubhairt e, Ciod e, a Thighearn? Agus thubhairt e ris, Chaidh t'ùrnuighean agus do dhéircean suas mar chuimheachan ann am fianuis Dé.

5 Agus a nis cuir daoine gu Iopa, agus cuir fios air Simon, d'an co-ainm Peadar:

6 Tha e air aoidheachd maille ri Simon àraidh fear-deasachaidh leathair, aig am bheil a thigh làimh ris an fhairge: innsidh esan duit ciod is còir dhuit a dhèanamh.

7 Agus an uair a dh fhalbh an t-aingeal a labhair ri Cornelius, ghairm e d' a ionnsuidh dithis do mhuinntir a thighe, agus saighdear cràbhach do'n dream a bha ghnàth a' feitheamh air ;

8 Agus an uair a chuir e an t-ìomlan an céill doibh, chuir e iad gu Iopa.

9 Agus air an là màireach, 'nuair a bha iadsan air an turus, agus a' teachd am fagus do'n bhaile, chaidh Peadar suas air mullach an tighe a dhèanamh ùrnuigh, mu thimchioll na seathadh uaire.

10 Agus dh'fhàs e ro ocrach, agus bu mhiann leis *biadh* ith-eadh : ach am feadh a bha iadsan ag ulluchadh, thuit e ann an neul,

11 Agus chunnaic e nèamh fosgailte, agus soitheach àraidh a' teachd a nuas d' a ionnsuidh, mar bhraith-lìn mhòir, ceangailte air a ceithir oisnibh, agus air a leigeadh sìos air an talamh ;

12 Anns an robh gach uile ghnè bheathaiche ceithir-chosach na talmhainn, agus bheathaiche allta, agus bhiasda snàigeach, agus eunlaith an athair.

13 Agus thàinig guth d' a ionnsuidh, Eirich, a Pheadair ; marbh agus ith.

14 Ach thubhairt Peadar, Ni h-eadh, a Thighearn ; oir cha d'ith mi riamh aon ni coitchionn no neòghlan.

15 Agus *thubhairt* an guth ris a ris an dara uair, Na nithe sin a ghlan Dia, na gairm thusa coitchionn.

16 Agus rinneadh so trì uairean : agus thogadh an soitheach a ris suas gu nèamh.

17 A nis an uair a bha Peadar fo amharus ann féin ciod bu chiall do'n t-sealladh a chunnaic e, feuch, bha na daoine a chuir-

eadh o Chornelius, an déigh dhoibh tigh Shimoin iarraidh, 'nan seasamh aig an dorus.

18 Agus air gairm dhoibh, dh'fheòraich iad an robh Simon d' an co-ainm Peadar, air aoidheachd an sin.

19 Am feadh a bha Peadar a' smuaineachadh air an t-sealladh, thubhairt an Spiorad ris, Feuch, tha triuir dhaoine ga d' iarraidh.

20 Uime sin éirich, agus gabh sìos, agus imich maille riu, gun amharus air bith a bhi ort : oir is mise a chuir uam iad.

21 Agus chaidh Peadar sìos chum nan daoine, [a chuireadh d' a ionnsuidh o Chornelius,] agus thubhairt e, Feuch, is mise an tì a tha sibh ag iarraidh : ciod e an t-aobhar mu'n d' thàinig sibh ?

22 Agus thubhairt iadsan, Fhuair Cornelius an ceannard-ceud, duine cothromach, air am bheil eagal Dé, agus fo dheadh ainm aig cinneach nan Iudhach uile, rabhadh o Dhia le aingeal naomh, fios a chur ortsa d' a thigh, agus briathran a chluinntinn uait.

23 An sin ghairm e steach iad, agus thug e aoidheachd *dhoibh*. Agus air an là màireach dh' imich Peadar maille riu, agus chaidh dream àraidh do na bràithribh o Iopa maille ris.

24 Agus air an là màireach chaidh iad a steach do Chesarea : agus bha Cornelius a' feitheamh riu, agus air gairm a luchd-dàimh agus a chàirde disle an ceann a chéile.

25 Agus an uair a bha Peadar a' dol a steach, choinnich Cornelius e, agus thuit e sìos aig a chosaibh, agus rinn e aoradh *dha*.

26 Ach thog Peadar suas e, ag ràdh, Seas suas ; is duine mise mar an ceudna.

27 Agus ag còmhradh ris, chaidh e steach, agus fhuair e mòran cruinn.

28 Agus thubhairt e riu, Tha fios agaibh gu bheil e mì-dhligh-each do dhuine a tha 'na Iudhach, comhludair a chumail ri neach a tha do chinneach eile, no teachd am fagus da; ach nochd Dia dhomh-sa, gun duine air bith a ghairm coitchionn no neòghlan.

29 Uime sin thàinig mise 'nuair a chuireadh fios orm, gun aon ni a ràdh 'na aghaidh: air an aobhar sin tha mi feòraich c'ar son a chuir sibh fios orm?

30 Agus thubhairt Cornelius, O'n cheathramh là gus an uair so bha mi a' dèanamh trasgaidh; agus air an naothadh uair bha mi dèanamh ùrnuigh ann mo thigh, agus, feuch, sheas duine a'm làthair ann an eudach dealrach,

31 Agus thubhairt e, A Chorneliuis, fhuair t'ùrnuigh éisdeachd, agus tha do dhéircean air an cuimhneachadh am fianuis Dé.

32 Uime sin cuir gu Iopa, agus cuir fios air Simon, d'an co-ainm Peadar; tha e air aoidheachd ann an tigh Shimoìn fear-deasachaidh leathair, làimh ris a' mhuir; neach, 'nuair a thig e, a labhras riut.

33 Uime sin chuir mi air ball fios ort; agus is maith a rinn thu teachd. Air an aobhar sin tha sinne uile an so a làthair am fianuis Dé, a dh'éisdeachd nan uile nithe a tha air an àithneadh dhuitse le Dia.

34 An sin dh'fhosgail Peadar a bheul, agus thubhairt e, Gu firinneach tha mi 'g aithneachadh nach 'eil Dia ag amharc air pearsaibh seach a chéile:

35 Ach anns gach uile chinn-each a ta an neach air am bheil

'eagal-san, agus a ta 'g oibreachadh fireantachd, taitneach aige.

36 Am focal a chuir Dia gu cloinn Israeil, a' searmonachadh sith tre Iosa Criosd, (neach is e Tighearna nan uile,)

37 Am focal sin is aithne dhuibh, a sgaoileadh air feadh tìre Iudea uile, agus a thòisich o Ghalile, an déigh a bhaistidh a shearmonaich Eoin:

38 Cionnus a dh'ùng Dia Iosa o Nasaret leis an Spiorad naomh, agus le cumhachd; neach a chaidh mu'n cuairt a' dèanamh maith, agus a' slànuchadh nan uile a bha air am foir-eigneachadh leis an diabhl: oir bha Dia maille ris.

39 Agus tha sinne 'nar fianuisibh air na h-uile nithibh a rinn e, araon ann an tìr nan Iudhach, agus ann an Ierusalem; neach a mharbh iad, 'ga chrochadh air crann:

40 Esan thog Dia suas air an treas là, agus nochd se e gu follaiseach;

41 Cha'n ann do'n t-sluagh uile, ach do fhianuisibh, a thaghadh le Dia roimh-làimh, eadhon dhuinne, a dh'ith agus a dh'òl maille ris an déigh dha éirigh o na marbhaibh.

42 Agus dh'àithn e dhuinne searmonachadh do'n t-sluagh, agus fianuis a dhèanamh gur esan a dh'òrduicheadh le Dia 'na bhreitheamh air bheòthaibh agus air mharbhaibh.

43 Dhasan tha na fàidhean uile a' toirt fianuis, gu'm faigh gach neach a chreideas ann maitheanas 'nam peacaibh tre 'ainm-san.

44 Am feadh a bha Peadar fathast a' labhairt nam briathra sin, thuirling an Spiorad naomh orra-san uile a chual am focal.

45 Agus ghabh na creidich

do 'n timchioll-ghearradh, a mheud diubh 'sa thàinig maille ri Peadar, iongantas mòr, do bhrìgh gu'n do dhòirteadh air na Cinnich mar an ceudna tiodhlac an Spioraid naoimh.

46 Oir chuala siad iad a' labhairt le teangaibh, agus ag àrd-mholadh Dhé. An sin fhreagair Peadar,

47 Am feud neach sam bith uisge a thoirmeasg, chum nach rachadh iad so a bhaisteadh, a fhuair an Spiorad naomh, co maith ruinne?

48 Agus dh'òrduich e iad a bhi air am baisteadh ann an ainm an Tighearna. An sin ghuidh iad air fantuinn *maille riu* làithean àraidh.

CAIB. XI.

AGUS chuala na h-abstoil agus na bràithrean a bha ann an Iudea, gu'n do ghabh na Cinnich mar an ceudna ri focal Dé.

2 Agus an uair a chaidh Peadar suas gu Ierusalem, rinn iadsan a bha do 'n timchioll-ghearradh conspoid ris,

3 Ag ràdh, Chaidh thu steach a dh'ionnsuidh dhaoine nach robh air an timchioll-ghearradh, agus dh'ith thu maille riu.

4 Agus thòisich Peadar, agus chuir e 'n *t-ìomlan* an céill doibh an òrdugh, ag ràdh,

5 Bha mi ann am baile Iopa ri ùrnuigh; agus ann an neul chunnaic mi sealladh, Soitheach àraidh a' teachd a nuas, mar bhraith-lìn mhòir, air a leigeadh a nuas o nèamh air a ceithir oisnibh; agus thàinig i a m'ionnsuidh-sa.

6 Agus air dhomh beachdachadh gu geur oirre, thug mi fa'n ear, agus chunnaic mi beathaiche ceithir-chosach na talmhainn, agus na fiadh-bheathaiche, agus

na biasda snàigeach, agus eun-laith an athair.

7 Agus chuala mi guth ag ràdh rium, Eirich a Pheadair; marbh agus ith.

8 Ach thubhairt mise, Ni h-cadh, a Thighearn: oir cha deachaidh riamh aon ni coit-chionn no neòghlan a steach do m' bheul.

9 Ach fhreagair an guth mi an dara uair o nèamh, Na nithe a ghlan Dia na meas thusa neòghlan.

10 Agus rinneadh so trì uairean: agus thogadh an t-ìomlan a ris suas gu nèamh.

11 Agus, feuch, air ball bha triuir dhaoine air teachd chum an tighe anns an robh mi, a chuireadh o Chesarea a m'ionnsuidh.

12 Agus thubhairt an Spiorad rium dol maille riu, gun amharus air bith a bhi orm. Agus chaidh mar an ceudna an t-seathnar bhràithre so maille rium, agus chaidh sinn a steach do thigh an duine:

13 Agus nochd e dhuinn cionnus a chunnaic e aingeal 'na sheasamh 'na thigh, a thubhairt ris, Cuir daoine gu Iopa, agus cuir fios air Simon, d'an co-ainm Peadar;

14 Neach a labhras briathra riut, leis an tèarnar thu féin agus do thigh uile.

15 Agus an uair a thòisich mi air labhairt, thuirling an Spiorad naomh orra-san, mar oirne air tùs.

16 An sin chuimhnich mise focal an Tighearna, mar a thubhairt e, Bhaist Eoin guu amharus le h-uisge; ach baistear sibhse leis an Spiorad naomh.

17 Uime sin ma thug Dia dhoibh-san a cho-ionann tiodhlaca ruinne, a chreid anns an Tighearn Iosa Crìosd, cò mise

gu 'm bithinn comasach bacadh a chur air Dia?

18 Agus an uair a chual iad na nithe so, thosd iad, agus thug iad glòir do Dhia, ag ràdh, Thug Dia ma seadh mar an ceudna do na Cinnich aithreachas chum na beatha.

19 A nis chaidh iadsan a sgapadh a mach leis an àmhghar a dh' éirich air son Stephaìn, gu ruig Phenice, agus Ciprus, agus Antioch, gun am focal a labhairt ri aon neach ach ris na h-ludhaich a mhàin.

20 Agus bha cuid diubh o Chiprus, agus o Chirene, dream air dhoibh dol a steach do Antioch, a labhair ris na Greugaich, a' searmonachadh an Tighearna Iosa.

21 Agus bha làmh an Tighearna maille riu: agus chreid àireamh mhòr, agus phill iad chum an Tighearn.

22 Agus thàinig sgeula air na nithibh sin gu clusaibh na h-eaglais a bha ann an Ierusalem; agus chuir iad Barnabas uatha, chum gu 'n rachadh e gu Antioch:

23 Neach an uair a thàinig e, agus a chunnaic e gràs Dhé, a rinn gàirdeachas, agus a dh' earail orra uile, gu 'n dlùth-leanadh iad ris an Tighearn le rùn cridhe.

24 Oir bha e 'na dhuine maith, agus làn do 'n Spiorad naomh, agus do chreidimh. Agus chuireadh sluagh mòr ris an Tighearn.

25 An sin chaidh Barnabas gu Tarsus, a dh' iarraidh Shaul.

26 Agus air dha fhaotainn, thug e leis e gu Antioch. Agus thàrladh, gu 'n robh iad rè bliadhna iomlain air an cruinneachadh maille ris an eaglais, agus gu 'n do theagaisg iad sluagh mòr; agus gu 'n do ghoireadh

Criosduidhean do na deisciobluibh air tùs ann an Antioch.

27 Agus anns na làithibh sin thàinig fàidhean o Ierusalem gu Antioch.

28 Agus air seasamh suas do aon diubh d' am b' ainm Agabus, dh' fhoillsich e troimh an Spiorad, gu 'm biodh gorta mhòr air feadh an domhain uile: ni mar an ceudna a thachair ri linn Chlaudiuis Cheasair.

29 An sin chuir gach aon do na deisciobluibh roimhe, a réir a chomais, còmhnaidh a chur chum nam bràithrean, a bha chòmhnuidh ann an Iudea.

30 Ni mar an ceudna a rinn iad, agus chuir iad e chum nan seanairean le làimh Bharnabais agus Shaul.

CAIB. XII.

A NIS mu 'n àm sin, shìn Herod an rìgh a làmh, a dhèanamh uile air dream àraidh do 'n eaglais.

2 Agus mharbh e Seumas bràthair Eoin leis a' chlàidheamh.

3 Agus an uair a chunnaic e gu 'n do thaitinn sin ris na h-ludhaich, chaidh e air aghaidh a ghlacadh Pheadair mar an ceudna. (Agus b' iad làithean an arain neo-ghoirtichte a bh' ann.)

4 Agus ghlac e agus chuir e 'm prìosan e, agus thug se e r' a ghléidheadh do cheithir cheathrar shaighdearan, fa rùn a thoirt a mach do 'n t-sluagh an dèigh na càisge.

5 Air an aobhar sin ghléidheadh Peadar anns a' phrìosan: ach bha bith-ùrnuigh air a dèanamh leis an eaglais ri Dia air a shon.

6 Agus an uair a b' àill le Herod a thoirt a mach, san oidheche sin féin bha Peadar 'na chodal eadar dithis shaighdear-

an, ceangailte le dà shlabhruidh : agus bha'n luchd-faire fa chomhair an doruis a' coimhead a' phrìosain.

7 Agus, feuch, thàinig aing-eal an Tighearn air, agus dhealraich solus anns a' phrìosan : agus bhuail e taobh Pheadair, agus dhùisg se e, ag ràdh, Eirich gu grad. Agus thuit a cheanglaiche d' a làmhaidh.

8 Agus thubhairt an t-aing-eal ris, Crioslaich thu féin, agus ceangail ort do bhonn-bhrògan : agus rinn e mar sin. Agus thubhairt e ris, Tilg t' fhalluinn umad, agus lean mise.

9 Agus chaidh e mach, agus lean se e ; agus cha robh fhios aige gu'n robh e fìor an ni a rinneadh leis an aing-eal : ach shaoil e gu'm bu taisbean a chunnaic e.

10 Agus air dhoibh dol troimh 'n cheud agus an dara faire, thàinig iad chum a' gheata iar-uinn a ta treòrachadh do 'n bhaile, a dh'fhosgail doibh leis féin : agus air dol a mach dhoibh, chaidh iad air an aghaidh troimh aon sràid, agus air ball dh'fhalbh an t-aing-eal uaith.

11 Agus an uair a thàinig Peadar d' a ionnsuidh féin, thubhairt e, A nis tha fhios agam gu fìrinneach gu 'n do chuir an Tighearn 'aing-eal uaith, agus gu 'n do shaor e mi o làimh Heroid, agus o uile dhùil pobuill nan Iudhach.

12 Agus an uair a smuainich e air a' chùis, thàinig e gu tigh Mhuire màthar Eoin, d' an co-ainm Marcus, far an robh mòran cruinn, agus iad ri ùrnuigh.

13 Agus an uair a bha Peadar a' bualadh doruis a' gheata, thàinig gruagach d' am b' ainm Roda a dh' éisdeachd.

14 Agus an uair a dh' aithnich i guth Pheadair, tre aoibhneas

cha d'fhosgail i an geata, ach ruith i stigh, agus dh' innis i gu'n robh Peadar 'na sheasamh aig a' gheata.

15 Ach thubhairt iad rithe, Tha thu air mhì-chéill. Ach bha ise toirt dearbh-chinntte gu'n robh e mar sin. An sin thubhairt iad, Is e 'aing-eal a ta ann.

16 Ach bhuanaich Peadar a' bualadh an doruis : agus an uair a dh'fhosgail iad, agus a chunnaic iad e, bha iad làn uamhais.

17 Ach air dhasan smèideadh orra le a làimh iad a bhi 'nan tosd, chuir e'n céill doibh cionnus a thug an Tighearn as a' phrìosan e. Agus thubhairt e, Innsibh na nithe so do Sheumas agus do na bràithribh. Agus air dol a mach dha, chaidh e gu àit eile.

18 Agus air teachd do 'n là bha iomairt nach bu bheag am measg nan saighdearan, ciod a thachair do Pheadar.

19 Agus an uair a dh' iarr Herod e, agus nach d' fhuair se e, rannsaich e an luchd-coimhead, agus dh'òrduich e an toirt air falbh chum peanaìs. Agus chaidh e sìos o Iudea gu Cesarea, agus rinn e còmhnuidh an sin.

20 Agus bha fearg mhòr aig Herod ri muinntir Thiruis agus Shidoin : ach thàinig iadsan a dh' aon inntionn d' a ionnsuidh, agus air dhoibh Blastus seomradair an rìgh a thoirt air an crann, dh' iarr iad sìth ; do bhrìgh gu'n robh an tìr air a beathachadh le tìr an rìgh.

21 Agus air là òrduichte, air do Herod bhi air a sgeudachadh le eudach rìoghail, agus 'na shuidhe air a rìgh-chaithir, labhair e gu deas-bhriathrach riu.

22 Agus rinn an sluagh iolach, ag ràdh, Is guth Dé so, agus cha ghuth duine.

23 Agus air ball bhuail aing-

eal an 'Tighearn e, do bhrìgh nach d' thug e a' ghloir do Dhia : agus dh' itheadh le cnuimhibh e, agus chaidh an deò as.

24 Ach dh' fhàs focal an Tigh-earn agus mheudaicheadh e.

25 Agus phill Barnabas agus Saul o Ierusalem, air dhoibh *am ministrileachd* a choimhlionadh, a' toirt leo mar an ceudna Eoin, d' an co-ainm Marcus.

CAIB. XIII.

A NIS bha anns an eaglais a bha aig Antioch, fàidhean, agus luchd-teagaisg àraidh ; mar a ta Barnabas, agus Simeon ris an abrar Niger, agus Lucius o Chirene, agus Manaen comh-alta Heroid an Tetreairc, agus Saul.

2 Agus air dhoibh bhi ri ministrileachd do'n Tighearn, agus a' trasgadh, thubhairt an Spiorad naomh, Cuiribh air leth dhomhsa Barnabas agus Saul, chum na h-oibre gus an do ghairm mi iad.

3 An sin air dhoibh trasgadh agus ùrnuigh a dhèanamh, agus an làmh an a chur orra, leig iad uatha *iad*.

4 Mar sin air dhoibh-san a bhi air an cur a mach leis an Spiorad naomh, chaidh iad sìos gu Seleucia ; agus o sin sheòl iad gu Ciprus.

5 Agus air dhoibh bhi ann an Salamis, shearmonaich iad focal Dé ann an sionagogaibh nan Iudhach : agus bha mar an ceudna Eoin aca mar fhear-frithealaidh.

6 Agus an uair a chaidh iad troimh an eilean gu Paphos, fhuaire iad druidh àraidh, fàidh bréige, Iudhach, d' am b' ainm Bariesus :

7 Neach a bha maille ri Sergius Paulus an t-uachdaran, duine tuigseach ; air dhasan

Barnabas agus Saul a ghairm d' a ionnsuidh, dh' iarr e focal Dé a chluinntinn.

8 Ach chuir Elimas an druidh, (oir is ann mar so a dh' eadar-theangaichear 'ainm,) 'nan aghaidh, ag iarraidh an t-uachdaran a thionndadh o'n chreidimh.

9 An sin air bhi do Shaul, (d' an *goirear* Pòl,) làn do'n Spiorad naomh, agus ag amharc gu geur air,

10 Thubhairt e, O thusa a ta làn do'n uile cheilg, agus do'n uile dhroch-bheirt, a mhic an diabhuil, a nàmhaid na h-uile fhìreantachd, nach sguir thu do fhiaradh shlighean dìreach an Tighearna ?

11 Agus feuch a nis, *tha* làmh an Tighearn ort, agus bithidh tu dall, gun a' ghrian fhaicinn rè tamuill. Agus air ball thuit ceò agus dorchadas air ; agus a' tionndadh mu'n cuairt, dh' iarr e dream a threòraicheadh air làimh e.

12 An sin an uair a chunnaic an t-uachdaran an nì a rinn-eadh, chreid e, air dha bhi làn iongantais mu theagasg an Tighearna.

13 Agus air gabhail luinge do Phòl agus d' a chuideachd o Phaphos, thàinig iad gu Perga na Pamphilia : agus air do Eoin am fàgail, phill e gu Ierusalem.

14 Ach air dhoibh-san imeachd o Pherga, thàinig iad gu Antioch na Pisidia, agus chaidh iad a steach do'n t-sionagog air là na sàbaid, agus shuidh iad.

15 Agus an déigh leughadh an lagha agus nam Fàidhean, chuir uachdaran na sionagoig d' an ionnsuidh, ag ràdh, Fheara *agus* a bhràithre, ma tha focal earail agaibh do'n t-sluagh, abraibh e.

16 An sin an uair a sheas Pòl suas agus a smèid e orra le

'làimh, thubhairt e, Fheara Israeil, agus sibhse air am bheil eagal Dé, éisdibh.

17 Thagh Dia a' phobuill so Israeil ar n-aithriche, agus dh'àrdaich e'm pobull 'nuair a bha iad air choigrich ann an tìr na h-Eiphit, agus le làimh àrd thug e iad a mach aisde.

18 Agus mu thimchioll ùine dhà fhichead bliadhna ghiùlain e le'm beusaibh anns an fhàsach.

19 Agus an uair a sgrios e seachd cinnich ann an tìr Chanään, roinn e am fearann orrasan le crannchur.

20 Agus 'na dhéigh sin mu thimchioll ceithir cheud agus leth-cheud bliadhna, thug e *dhoibh* breitheamhna, gu Samuel am fàidh.

21 Agus 'na dhéigh sin dh'iarr iad rìgh: agus thug Dia *dhoibh* Saul mac Chis. duine do thréibh Bheniamin, rè dhà fhichead bliadhna.

22 Agus air dha esan atharrachadh, thog e suas Daibhidh gu bhi 'na rìgh *dhoibh*; d'an d'thug e mar an ceudna fianuis, agràdh, Fhuair mi Daibhidh *mac Iese*, duine a réir mo chridhe féin, a nì m' uile thoil.

23 Do shliochd an duine so thog Dia suas do Israel, a réir a gheallaidh, Slànuighear, *eadhon* Iosa:

24 Air do Eoin roimh a theachd-san, baisteadh an aithreachais air tùs a shearmonachadh do phobull Israeil uile.

25 Agus mar a choimhlion Eoin a thriall, thubhairt e, An tì a ta sibh a' saolsinn is mise, cha mhi e. Ach feuch, a ta neach a' teachd a'm' dhéigh, nach airidh mi air brògan a chos fhuasgladh.

26 Fheara agus a bhràithre, a chlann fine Abraham, agus a

mheud agaibh air am bheil eagal Dé, is ann do 'ur n-ionnsuidh-sa a chuireadh focal na slàinte so.

27 Oir iadsan a ta chòmh-nuidh ann an Ierusalem, agus an uachdarain, air *dhoibh* bhi aineolach aisans, agus air foclaibh nam Fàidhean a ta air an leughadh gach sàbaid, le *esan* a dhiteadh choimhlion siad *iad*.

28 Agus ged nach d' fhuair iad coire bàis air bith *ann*, dh'iarr iad air Pilat gu 'n cuirteadh *esan* gu bàs.

29 Agus an uair a choimhlion iad na h-uile nithe bha sgriobhta mu 'thimchioll, thug iad a nuas o'n chrann e, agus chuir iad ann an uaigh e.

30 Ach thog Dia suas o na marbhaibh e:

31 Agus chunnacas e rè mòrain làithean leo-san, a chaidh suas maille ris o Ghalile gu Ierusalem, dream a ta 'nam fianuisibh dhasan do'n t-sluagh.

32 Agus a ta sinne a' soisgeulachadh dhuibhse a' gheallaidh, a rinneadh do na h-aithrichibh,

33 Gu 'n do choimhlion Dia so dhuinne an clann, air dha Iosa thogail suas; mar a ta e sgriobhta mar an ceudna san dara Salm, Is tu mo Mhac-sa, an diugh ghin mi thu.

34 Agus mar dhearbhadh gu 'n do thog e suas e o na marbhaibh, gun e a philltinn air ais tuilleadh chum truailidheachd, thubhairt e mar so, Bheir mise dhuibh tròcaire ciunteach Dhaidhidh.

35 Uime sin thubhairt e mar an ceudna ann an *Salm* eile, Cha 'n fhuiling thu do d' Aon naomh gu'm faic e truailidheachd:

36 Oir an déigh do Dhaibhidh a ghinealach féin a riarachadh a réir toil Dhé, choidil e,

agus chuireadh e chum aith-riche, agus chunnaic e truaillidheachd :

37 Ach an tì a thog Dia suas, cha'n fhac e truaillidheachd.

38 Uime sin biodh fhios ag-aibh-sa, fheara agus a bhràithre, gur ann tre'n duine so a ta maitheanas pheacanna air a shearmonachadh dhuibh :

39 Agus trid-san a ta gach neach a chreideas air a shaoradh o na h-uile nithibh, o nach robh e'n comas duibh bhi air bhur saoradh le lagh Mhaois.

40 Thugaibh aire uime sin, nach tig oirbh an ni a ta air a ràdh anns na Fàidhibh ;

41 Feuchaibh, a luchd-tarcuis, agus gabhaibh iongantas, agus rachadh as duibh : oir oibrichidh mise obair ann bhur làithibh-sa, obair nach creid sibh idir, ge do chuireadh duine an céill duibh e.

42 Agus an uair a chaidh na h-Iudhaich a mach as an t-sion-agog, ghuidh na Cinnich gu'n rachadh na briathra so a labhairt riu féin an t-sàbaid 'na dhéigh sin.

43 A nis an uair a sgaoil an coimhthional, lean mòran do na h-Iudhaich agus do na proselitich chràbhach Pòl agus Barnabas : agus labhair iadsan riu, agus chuir iad impidh orra fuireach ann an gràs Dhé.

44 Agus air an là sàbaid a b' fhaigse, is beag nach do chruinnich am baile gu h-ìomlan a dh'éisdeachd ri focal Dé.

45 Ach an uair a chunnaic na h-Iudhaich na slòigh, lìonadh iad le h-eud, agus labhair iad an aghaidh nan nithe sin a labhradh le Pòl, a' labhairt 'nan aghaidh agus a' tabhairt toibheim.

46 An sin dh'fhàs Pòl agus Barnabas dàna, agus thubhairt iad, B' éigin focal Dé bhi air a

labhairt ribhse air tùs : ach do bhrìgh gu'n do chuir sibh cùl ris, agus gur i bhur breth oirbh féin nach airidh sibh air a bheatha mhaireannach, feuch, a ta sinne a' pilltinn chum nan Cinneach.

47 Oir is ann mar sin a dh'àithn an Tighearna dhuinn, ag ràdh, Chuir mi thu mar sholus do na Cinnich, chum gu'm bitheadh tu mar shlàinte gu iomall na talmhainn.

48 Agus an uair a chuala na Cinnich so, rinn iad gàirdeachas, agus ghlòraich iad focal an Tighearna : agus chreid a mheud 'sa bha òrduichte chum na beatha maireannaich.

49 Agus sgaoileadh focal an Tighearna feadh na tire uile.

50 Ach bhrosnuich na h-Iudhaich na mnàì chràbhach agus urramach, agus daoine uaisle na caithreach, agus thog iad geur-leanmhuinn air Pòl agus Barnabas, agus thilg iad a mach as an crìochaibh iad.

51 Ach chrath iadsan duslach an cos dhiubh 'nan aghaidh, agus thàinig iad gu Iconium.

52 Agus bha na deisciobuil air an lìonadh le h-aoibhneas, agus leis an Spiorad naomh.

CAIB. XIV.

A GUS thàrladh ann an Iconium, gu'n deachaidh iad araon a steach do shionagog nan Iudhach, agus gu'n do labhair iad air chor as gu'n do chreid cuideachd mhòr do na h-Iudhaich, agus mar an ceudna do na Greugaich.

2 Ach bhrosnuich na h-Iudhaich mhì-chreideach, agus lìon iad do dhroch rùn inntinn nan Cinneach an aghaidh nam bràithre.

3 Uime sin dh'fhan iad aim-sir fhada a' labhairt gu dàna

mu thimchioll an Tighearn, a rinn fianuis do fhocal a ghràis, agus a thug fa'near comharan agus mìorbhuilean a bhi air an dèanamh le'n làmh-aibh-san.

4 Ach bha sluagh a' bhaile air an roinn: agus bha cuid diubh leis na h-Iudhaich, agus cuid eile leis na h-abstolaibh.

5 Agus an uair a thugadh ionnsuidh araon leis na Cinnich, agus mar an ceudna leis na h-Iudhaich, maille r'an uachdaran-aibh, chum iadsan a mhaslachadh agus a chlachadh,

6 'Nuair a thuig iadsan *so*, theich iad gu Listra agus Derbe, bailte do Licaonia, agus chum na dùthcha mu'n cuairt:

7 Agus bha iad a' searmonachadh an t-soisgeil an sin.

8 Agus bha ann an Listra duine àraidh gun lùth 'na chos-aibh 'na shuidhe, a bha bacach o bhroinn a mhàthar, neach nach d'imich riamh:

9 Chual esan Pòl a' làbhairt: neach air dha amharc gu geur air, agus a thuigsinn gu robh creidimh aige chum a leigheas,

10 Thubhairt e le guth àrd, Seas suas gu dìreach air do chos-aibh. Agus leum esan agus dh'imich e.

11 Agus an uair a chunnaic an sluagh an ni a rinn Pòl, thog iad an guth, ag ràdh ann an cànan Licaonia, Tha na Déa air teachd a nuas an coslas dhaoine d'ar n-ionnsuidh-ne.

12 Agus ghoir iad do Barnabas, Iupiter; agus do Phòl, Mercurius, do bhrìgh gu'm b'e am prìomh fhear-labhairt e.

13 An sin thug sagart Iupiteir, a bha fa chomhair an caithreach-san, tairbh agus blàth-fhleasgaidh chum nan geata, agus b' àill leis iobairt a dhèanamh maille ris an t-sluagh.

14 Ach an uair a chuala na

h-abstoil Barnabas agus Pòl *so*, reub iad an eudach, agus ruith iad a steach am measg an t-sluaigh, ag éigheach,

15 Agus ag ràdh, A dhaoine, c'ar son a ta sibh a' dèanamh nan nithe *so*? oir is daoine sinne cosmhuil ribh féin thaobh fulangais, a' searmonachadh dhuibhse, pilltinn o na nithibh dìomhain sin chum an Dé bheò, a rinn nèamh, agus an talamh, agus an cuan, agus na h-uile nithe a ta ann ta:

16 Neach anns na linnibh a chaidh seachad, a dh'fhuiling do na h-uile Chinnich imeachd nan slighibh féin.

17 Gidheadh, cha d'fhàg se e féin gun fhianuis, a' dèanamh maith, agus a' toirt dhuinn uisge o nèamh, agus aimsire tarbhach, a' lìonadh ar cridheacha le biadh agus le subhachas.

18 Agus ag ràdh nan nithe *so* dhoibh, is gann a chum iad an sluagh gun iobairt a dhèanamh dhoibh.

19 Agus thàinig Iudhaich o Antioch agus o Iconium, agus chomhairlich iad an sluagh, agus air dhoibh Pòl a chlachadh, tharruing iad a mach as a' bhaile e, a' saòilsinn gu robh e marbh.

20 Ach air seasamh do na deiscioblubh m'a thimchioll, dh'éirich e, agus chaidh e steach do'n bhaile; agus air an là màir-each dh'imich e maille ri Barnabas gu Derbe.

21 Agus an uair a shearmonaich iad an soisgeul do'n bhaile sin, agus a rinn iad mòran dheisciobul, phill iad gu Listra, agus Iconium, agus Antioch,

22 A' neartachadh anama nan deisciobul, agus ag earail orra buanachadh sa' chreidimh, agus a' teagasg gur an tre iom-

adh àn.hghar is éigin duinn dol a steach do rìoghachd Dhé.

23 Agus an uair a dh'òrduich iad seanairean dhoibh anns gach eaglais, agus a rinn iad ùrnuigh maille ri trasgadh, dh'earb siad iad ris an Tighearn, anns an do chreid iad.

24 Agus an déigh dhoibh dol troimh Phisidia, thàinig iad gu Pamphilia.

25 Agus air dhoibh am focal a labhairt ann am Perga, chaidh iad sìos gu Atalia :

26 Agus sheòl iad as a sin gu Antioch, an t-àit o'n d'earbadh iad ri gràs Dhé, chum na h-oibre a choimhlion iad.

27 Agus an uair a thàinig iad, agus a chruinnich iad an eaglais an ceann a chéile, dh'aithris iad meud nan nithe a rinn Dia leo, agus gu'n d'fhosgail e dorus creidimh do na Cinnich.

28 Agus dh'fhan iad an sin aimsir nach bu bheag maille ris na deisciobluibh.

CAIB. XV.

A GUS theagsaig dream àraidh, a thàinig a nuas o Iudea, na bràithre, ag ràdh, Mur timchioll-ghearrar sibh a réir gnàtha Mhaois, cha'n 'eil e'n comas duibh bhi air bhur tèarnadh.

2 Uime sin air do Phòl, agus do Bharnabas connsachadh agus deasboireachd nach bu bheag a bhi aca riu, dh'òrduich iad Pòl agus Barnabas, agus dream àraidh eile dhiubh féin, a dhol suas chum nan abstol agus nan seanairean gu Ierusalem mu timchioll na ceisde so.

3 Agus air dhoibh bhi air an toirt air an aghaidh leis an eaglais, chaidh iad tròimh Phenice, agus Shamaria, a' cur an céill iompachaidh nan Cinneach : ag-

us thug iad aoibhneas mòr do na bràithribh uile.

4 Agus an uair a thàinig iad gu Ierusalem, ghabhadh riu leis an eaglais, agus na h-abstolaibh, agus na seanaireibh, agus dh'innis iad meud nan nithe a rinn Dia leo-san.

5 Ach dh'éirich dream àraidh do bharail nam Phairiseach a bha 'nan creidich, ag ràdh, Gur còir an timchioll-ghearradh, agus àithneadh dhoibh lagh Mhaois a choimhead.

6 Agus thàinig na h-abstoil agus na seanairean an ceann a chéile a dh'fheuchainn mu'n chùis so.

7 Agus an déigh mòrain deasboireachd, dh'éirich Peadar agus thubhairt e riu, Fheara agus a bhràithre, tha fhios agaibh o cheann fhada gu'n do ròghnuich Dia 'nar measg-ne, o m' bheul-sa gu'n cluinneadh na Cinnich focal an t-soisgeil, agus gu'n creideadh iad :

8 Agus rinn an Dia d'an aithne an cridhe, fianuis dhoibh, a' tabhairt an Spioraid naoimh dhoibh, mar a thug e dhuinne ;

9 Agus cha d'rinn e eadar-dhealachadh eadar sinne agus iadsan, a' glanadh an cridhe le creidimh.

10 C'ar son uime sin a nis a ta sibh a' brosnuchadh Dhé, le cuing a chur air muineal nan deisciobul, nach robh aon chuid ar n-aithriche no sinne comasach air a giùlan ?

11 Gidheadh a ta sinn a' creidsinn, tre ghràs an Tigh-earna Iosa Crìosd, gu saorar sinn amhuil mar iadsan.

12 An sin dh'fhan a' chuideachd uile 'nan tosd, agus thug iad éisdeachd do Bharnabas agus do Phòl, ag inns-eadh meud nan comhara agus nam mìorbhuile a rinn Dia

leo-san am measg nan Cinn-each.

13 Agus an déigh dhoibh bhi 'nan tosd, fhreagair Seumas, ag ràdh, Fheara *agus* a bhràithre, éisdibh riumsa :

14 Chuir Simeon an céill cionnus a dh' fhiosraich Dia na Cinnich air tùs, le pobull a ghabhail as am measg d' a ainm féin.

15 Agus do so tha briathra nam fàidhean a' co-fhreagairt; a réir mar a ta e sgrìobhta.

16 An déigh so pillidh mi, agus togaidh mi suas a rìs pàillion Dhaibhidh, a ta air tuiteam; agus togaidh mi a rìs an ni a thuit deth, agus cuiridh mi suas e :

17 Chum gu 'n iarr fuigheall nan daoine an Tighearn, agus na h-uile Chinnich, air an goir-ear m'ainm-sa, tha an Tighearn ag ràdh, a ta dèanamh nan nithe sin uile.

18 Aithnichte do Dhia tha 'oibre féin uile o thoiseach an t-saoghail.

19 Uime sin is i mo bhrethsa, nach cuir sinn mì-shuaimhneas orra-san do na Cinnich, a ta air pilltinn chum Dhé :

20 Ach gu 'n sgrìobh sinn d' an ionnsuidh, iad a sheachnadh truillidheachd iòdhola, agus strìopachais, agus ni tachdta, agus fola.

21 Oir a ta aig Maois o na linnibh cian anns gach baile daoine a ta 'ga shearmonachadh, air dha bhi air a leughadh gach là sàbaid anns na sionagogaibh.

22 An sin chunnacas iomchuidh do na h-abstolaibh, agus do na seanairibh, maille ris an eaglais uile, daoine taghta dhiubh féin a chur gu Antioch, maille ri Pòl agus Barnabas; eadhon, Iudas d' an co-ainm Bar-

sabas, agus Silas, daoine inbheach am measg nam bràithre :

23 Agus sgrìobh iad litriche leo air an dòigh so, Tha na h-abstoil, agus na seanairean, agus na bràithrean a' cur beannachd chum nam bràithre do na Cinnich a ta ann an Antioch, agus ann an Siria, agus ann an Cilicia :

24 Do bhrìgh gu 'n cuala sinne, gu 'n do chuir dream àraidh a chaidh uainne mì-shuaimhneas oirbh le briathraibh, ag atharrachadh bhur n-inntinn, ag ràdh, *Gur còir dhuibh* bhi air bhur timchioll-ghearradh, agus an lagh a choimhead; do nach d' thug sinne a leithid sin a dh' àithne :

25 Chunnacas iomchuidh duinne, air dhuinn bhi cruinn a dh' aon toil, daoine taghta a chur do 'ur n-ionnsuidh-sa, maille ri ar bràithribh gràdhach Barnabas agus Pòl;

26 Daoine a thug an anama féin air son ainme ar Tighearna Iosa Crìosd.

27 Chuir sinn uime sin Iudas agus Silas uainn, a dh' innseas *dhuibh* na nithe ceudna le cainnt bheoil.

28 Oir chunnacas iomchuidh do 'n Spiorad naomh, agus dhuinne, gun ni air bith tuilleadh a chur oirbh a dh' uallaich ach na nithe feumail so;

29 Sibh a sheachnadh nithe a chaidh iòbradh do iòdholaibh, agus fola, agus ni tachdta, agus strìopachais: uatha so ma choimhideas sibh sibh féin, ni sibh gu maith. Slàn leibh.

30 Uime sin an uair a leigeadh uatha iad, thàinig iad gu Antioch: agus air cruinneachadh an t-sluaigh dhoibh, thug iad seachad an litir.

31 Agus an uair a leugh iad sin, rinn iad gàirdeachas air son na comhfhurtachd.

32 Agus air bhi do Iudas agus do Shilas 'nam fàidhibh iad féin, le mòran bhriathraibh dh'earailich, agus neartaich iad na bràithre.

33 Agus air fuireach rè ùine dhoibh, leigeadh air falbh an sìth iad o na bràithribh chum nan abstol.

34 Gidheadh chunnacas iomchuidh do Shilas còmhnuidh a dhèanamh an sin.

35 Dh'fhan Pòl mar an ceudna agus Barnabas ann an Antioch, a' teagasg agus a' searmonachadh maille ri mòran eile mar an ceudna, focail an Tighearna.

36 Agus an déigh làithean àraidh, thubhairt Pòl ri Barnabas, Pilleamaid agus faiceamaid ar bràithre, anns gach baile anns an do shearmonaich sinn focal an Tighearna, cionnus a ta iad.

37 Agus b'àill le Barnabas iad a thoirt Eoin, d'an co-ainm Marcus leo.

38 Ach cha do mheas Pòl gu'm bu chòir dhoibh esan, a dh'fhalbh uatha o Phamphilia, agus nach deachaidh maille riu chum na h-oibre, a thoirt leo.

39 Dh'éirich uime sin conspoid eatorra cho dian, as gu'n do sgaradh o chéile iad: agus mar sin thug Barnabas leis Marcus, agus chaidh e air luing gu Ciprus;

40 Ach thagh Pòl Silas, agus dh'imich e, air dha bhi air earbsadh ri gràs Dé leis na bràithribh.

41 Agus shiubhail e troimh Shiria agus Chìlicia, a' daingneachadh 'nan eaglaisean.

CAIB. XVI.

AN sin thàinig e gu Derbe agus Lìstra: agus, feuch, bha deisciobul àraidh an sin, d'am b'ainm Timoteus, mac mnà àraidh do'n chinneach Iudhach,

a bha 'na creideach; ach bu Ghrengach a b'athair dha:

2 A bha fo dheadh ainm aig na bràithribh a bha ann an Lìstra agus ann an Iconium.

3 Bha toil aig Pòl am fear so a dhol a mach maille ris; agus ghabh e agus thimchioll-ghearr se e, air son nan Iudhach a bha anns na h-àitibh sin: oir bha fios aca uile gu'm bu Gheugach 'athair.

4 Agus mar a shiubhail iad troimh na bailtibh, thug iad doibh na h-òrduighean r'an coimhead, a dh'òrduicheadh leis na h-abstolaibh agus na sean-airibh a bha ann an Ierusalem.

5 Agus mar sin bha na h-eaglaisean air an daingneachadh anns a' chreidimh, agus mheudaicheadh iad gach là an àireamh.

6 A nis an uair a chaidh iad troimh Phrìgia, agus tìr Ghàlata, agus a bhacadh dhoibh leis an Spiorad naomh am focal a labhairt san Asia,

7 An déigh dhoibh teachd gu Mìsia, dh'fheuch iad ri dol gu Bitinia: ach cha do leig an Spiorad leo.

8 Agus air dhoibh gabhail seachad air Mìsia, chaidh iad sìos gu Troas.

9 Agus chunnacas sealladh le Pòl san oidhche: Sheas duine àraidh o Mhacedonia, agus ghuidh e air, ag ràdh, 'Thig thairis gu Macedonia, agus cuidich leinne.

10 Agus an uair a chunnaic e an sealladh, air ball dh'iarr sinn dol thairis gu Macedonia, a dearbh-thuigsinn gu'n do ghairm an Tighearna sinn chum an soisgeul a shearmonachadh dhoibh.

11 Uime sin air dhuinn long a ghabhail o Throas, thàinig sinn gu dìreach gu Samotràcia, agus air an là 'na dhéigh sin gu Neapolis;

12 Agus o sin gu Philipi, ceud bhaile na cuid sin do Mhacedonia, agus b' ùr-threabhachas e : agus bha sinn a chòmhnuidh anns a' bhaile sin làithean àraidh.

13 Agus air là na sàbaid chaidh sinn a mach as a' bhaile ri taobh aimhne, far am b' àbhaist ùrnuigh a dhèanamh ; agus air dhuinn suidhe, labhair sinn ris na mnaibh a chruinnicheadh an sin.

14 Agus dh' éisd bean àraidh ruinn d' am b' ainm Lidia, bean-reicidh purpur, o bhaile Thiatira, a bha dèanamh aoraidh do Dhia ; aig an d' fhosgail an Tighearn a cridhe, ionnus gu'n d' thug i aire do na nithibh a labhradh le Pòl.

15 Agus an uair a bhaisteadh i, agus a teaghlach, ghuidh i oirnn, ag ràdh, Ma mheas sibh mise bhi dileas do'n Tighearn, thigibh a steach do m' thigh, agus dèanaibh còmhnuidh ann. Agus cho-éignich i sinn.

16 Agus thàrladh, ag dol dhuinne chum ùrnuigh, gu'n do thachair oirnn banoglach àraidh aig an robh spiorad fiosachd, a thug mòr-bhuannachd d' a maighstiribh le fiosachd a dhèanamh :

17 Lean ise Pòl agus sinne, agus ghlaodh i, ag ràdh, Is iad na daoine so seirbhisich an Dé a's ro-àirde, a ta a' nochdadh dhuinne slighe na slàinte.

18 Agus rinn i so rè mòrain do làithibh. Ach air do Phòl a bhi doilich, thionndaidh e agus thubhairt e ris an Spiorad, A ta mi toirt òrduigh dhuit ann an ainm Iosa Crìosd dol a mach aisde. Agus chaidh e mach air an uair sin féin.

19 Agus an uair a chunnaic a maighstirean gu'n d' fhalbh dòchas am buannachd, rug iad air Pòl agus air Silas, agus

tharruing iad do'n mhargadh iad, chum nan uachdaran ;

20 Agus air dhoibh an toirt chum luchd-riaghlaidh a' bhaile, thubhairt iad, Tha na daoine so a' buaireadh ar baile gu ro mhòr, air dhoibh bhi 'nan Iudhaich,

21 Agus a ta iad a' teagasg ghnàthanna nach 'eil ceaduichte dhuinne a ghabhail no leantuinn, do bhrìgh gur Romhanaich sinn.

22 Agus dh' éirich an sluagh dh' aon fheachd 'nan aghaidh : agus reub na h-uachdaran an eudach diubh, agus dh' àithn iad an sgiùrsadh le slataibh.

23 Agus an déigh dhoibh iomadh buille a leagadh orra, thilg iad am prìosan iad, a' toirt sparraidh do fhear-coimhead a' phrìosain an gléidheadh gu tèaruinte.

24 Neach air dha an àithne sin fhaotainn, a thilg iad do'n phrìosan a b' fhaide a stigh, agus a dhaingnich an cosa sa' cheap.

25 Agus mumheadhon-oidhche air do Phòl agus do Shilas ùrnuigh a dhèanamh, sheinn iad laoidh-mholaidh do Dhia ; agus chuala na prìosanaich iad.

26 Agus gu h-obann bha crith-thalmhainn mhòr ann, air chor as gu'n do chrathadh bunaithean a' phrìosain : agus air ball dh' fhosgladh na dorsan uile, agus dh' fhuasgladh cuibhreacha gach neach aca.

27 Agus air do fhear-coimhead a' phrìosain dùsgadh á codal, agus air faicinn dorsa a' phrìosain fosgailte, tharruing e a chlaidheamb, air ti e féin a mharbhadh, a' saoil sinn gu robh na prìosanaich air teicheadh.

28 Ach ghlaodh Pòl le guth àrd, ag ràdh, Na dèan cron sam bith ort féin ; oir tha sinn uile an so.

29 Agus air gairm soluis dasan, leum e steach, agus thàinig e air

chrith, agus thuit e sìos an làth-air Phòil agus Shilais;

30 Agus air dha an toirt a mach, thubhairt e, A mhaighstirean, ciod is còir domh a dhèanamh chum gu tèarnar mi?

31 Agus thubhairt iadsan, Creid anns an Tighearna Iosa Crìosd, agus tèarnar thu féin, agus do thigh.

32 Agus labhair iad focal an Tighearna ris, agus rìusan uile a bha 'na thigh.

33 Agus air dha an toirt leis air an uair sin féin do'n oidhche, nigh e an creuchdan; agus bhaisteadh e féin, agus a mhuinntir uile, gun dàil.

34 Agus an uair a thug e d' a thigh iad, chuir e bòrd rompa, agus rinn e gàirdeachas maille r' a theaghlach uile, a' creidsinn ann an Dia.

35 Agus air teachd do'n là, chuir an luchd riaghlaidh na maoir uatha, ag ràdh, Leig air an comas na daoine sin.

36 Agus dh'innis fear-coimhead a' phrìosain na briathra so do Phòil, Gu'n do chuir an luchd-riaghlaidh fios uatha sibhse a leigeadh as: uime sin rachaibh a mach, agus imichibh an sìth.

37 Ach thubhairt Pòl riu, an déigh dhoibh ar sgiùrsadh gu follaiseach gun ar dìteadh, agus gur Romhanaich sinn, thilg iad am prìosan sinn; agus a nis am b' àill leo ar cur a mach an uaignidheas? cha'n eadh gu deimhin; ach thigeadh iad féin agus thugadh iad a mach sinn.

38 Agus dh'innis na maoir na briathra sin do na h-uachdaran: agus ghabh iad eagal an uair a chual iad gu'm bu Romhanaich iad.

39 Agus thàinig iad agus chuir iad impidh orra, agus air dhoibh an toirt a mach, ghuidh iad orra imeachd a mach as a' bhaile.

40 Agus air dol a mach as a' phrìosan doibh, chaidh iad a steach do thigh Lidia: agus an uair a chunnaic iad na bràithre, thug iad comhfhurtachd dhoibh, agus dh' imich iad rompa.

CAIB. XVII.

ANIS air dhoibh imeachd troimh Amphipolis, agus Apolonia, thàinig iad gu Tesalonica, far an robh sionagag aig na h-Iudhaich:

2 Agus mar bu ghnàth le Pòl, chaidh e steach d'an ionnsuidh, agus air trì làithibh sàbaid reusonaich e riu as na sgriob-tuiribh,

3 'Gam fosgladh agus a' dearbhadh gu'm b' éigin do Chrìosd fulang, agus éirigh a ris o na marbhaibh: agus gur e an t-Iosa so, a ta mise a' searmonachadh dhuibh, Crìosd.

4 Agus chreid cuid diubh, agus lean iad ri Pòl agus ri Silas: agus do na Greugaich chràbhach buidheann mhòr, agus do na mnaibh inbheach àireamh nach bu bheag.

5 Ach air do na h-Iudhaich mì-chreideach bhi air am brosnuchadh le tnùth, ghabh iad d'an ionnsuidh droch dhaoine àraidh do na corraibh-margaidh, agus air tional cuideachd mòire dhiubh, chuir iad am baile uile thar a chéile, agus chuairtich iad tigh Iasoin, agus dh' iarr iad an toirt a mach chum an t-sluaigh.

6 Agus an uair nach d' fhuair siad iad, tharruing iad Iason, agus bràithrean àraidh chum uachdaran a' bhaile, ag éigheach, Tha na daoine so a chuir an saoghal bun os ceann, air teachd an so mar an ceudna;

7 D'an d' thug Iason aoidheachd: agus a ta iad so uile a' cur an aghaidh òrduigh Cheasair,

ag ràdh, Gu bheil rìgh eile ann, *eadhon* Iosa.

8 Agus chuir iad buaireas fo'n t-sluagh, agus fo uachdarain a' bhaile, 'nuair a chual iad na nithe so.

9 Agus an uair a ghabh iad urras o Iason, agus o chàch, leig iad uatha iad.

10 Agus air ball chuir na bràithre Pòl agus Silas san oidhe gu Berea: agus air teachd dhoibh-san *an sin*, chaidh iad a steach do shionagag nan Iudhaich.

11 Bha iad sin ni b' uaisle na muinntir Thesalonica, oir ghabh iad am focal d'an ionnsuidh leis an uile thogradh, a' rannsachadh nan sgrìobtuir gach aon là, *a dh'fheuchainn* an robh na nithe sin mar so.

12 Uime sin chreid mòran diubh: agus mar an ceudna do mhnaibh uaisle do na Greugaich, agus do fhearaibh àireamh nach bu bheag.

13 Ach an uair a thuig na h-Iudhaich o Thesalonica gu'n do shearmonaicheadh focal Dé le Pòl am Berea, thàinig iad an sin mar an ceudna, a' brosnuchadh an t-sluaigh.

14 An sin air ball chuir na bràithrean uatha Pòl, chum gu'n rachadh e mar gu b' ann chum na mara: ach dh'fhan Silas agus Timoteus an sin fathast.

15 Agus threòraich luchd-coimheadachd Phòil e gu *baile* na h-Aithne; agus air faghail àithne dhoibh gu Silas agus Timoteus, iad a theachd d'a ionnsuidh-san mar bu luaithe, dh'imich iad rompa.

16 A nis am feadh a bha Pòl a' feitheamh riu san Aithne, bha a spiorad air a bhrosnuchadh ann, do bhrìgh gu'm fac e am baile làn iodhol-aoraidh.

17 Air an aobhar sin rinn e

deasboireachd ris na h-Iudhaich, agus ris na daoineibh cràbhach anns an t-sionagag, agus air a' mhargadh gach là riu-san a thachair air.

18 An sin thug feallsanaich àraidh do na h-Epicuraich, agus do na Stoicich, aghaidh air; agus thubhairt cuid, Ciod a b' àill leis an fhear bhith-bhriathrach so a ràdh? thubhairt cuid eile, Is cosmhuil gu bheil e a' searmonachadh dhée coimheach; do bhrìgh gu'n do shearmonaich e dhoibh Iosa, agus an aiseirigh.

19 Agus rug iad air, agus thug iad leo e gu Areopagus, ag ràdh, Am feud sinn fios fhaotainn ciod e an teagasg nuadh so, a labhrar leat?

20 Oir a ta thu toirt nithe àraidh neo-ghnàthach chum ar cluasan: b' àill leinn uime sin fios fhaotainn ciod is ciall doibh sin.

21 (Oir cha do chaith muinntir na h-Aithne uile, agus a' choigrich a bha air chuairt 'nam measg, an ùine ri ni air bith eile, ach ri innseadh, no ri cluinntinn noimheadh éigin.)

22 An sin air seasamh do Phòl am meadhon Areopagus, thubhairt e, A mhuinntir na h-Aithne, tha mi faicinn gu bheil sibh anns na h-uile nithibh cràbhach thar tomhas:

23 Oir air dhomh bhi dol seachad, agus ag amharc air bhur nithibh naomha, fhuaire mi altair air an robh an sgrìobhadh so, **DO 'N DIA NEO-AITHNICHTE**. Uime sin esan d'am bheil sibh a' dèanamh aoraidh gun eòlas agaibh air, is e a ta mise a' searmonachadh dhuibh.

24 An Dia a rinn an saoghal, agus na h-uile nithe a ta ann, do bhrìgh gur e féin Tighearna nèimh agus na talmhainn, cha'n 'eil e gabhail còmhnuidh ann an teampuibh làmh-dhèanta:

25 Ni mò a bheirear aoradh dha le làmhaidh dhaoine, mar gu'm biodh uireasbhuidh ni sam bith air; oir is e féin a ta toirt do na h-uile beatha; agus anail, agus nan uile nithe:

26 Agus rinn e dh'aon fhuil uile chinnich dhaoine, chum iad a ghabhail còmhnuidh air aghaidh na talmhainn uile, agus shònraich e na h-amanna roimh-òrduichte, agus crìochan an àite-còmhnuidh;

27 Chum gu'n iarradh iad an Tighearn, a dh'fheuchainn an tàrladh dhoibh, le min-rannsachadh, gu'm faigheadh iad e, ged nach 'eil e fada o gach aon againn:

28 Oir annsan tha sinn beò, agus a' gluasad, agus tha ar bith againn; mar a thubhairt mar an ceudna dream àraidh do 'ur bàrdaibh féin, Oir is sinne fòs a ghineal-san.

29 Uime sin do bhrìgh gur sinne gineal Dé, cha chòir dhuinn a shaoilsinn gu bheil an Diadhachd cosmhuil ri h-òr, no ri h-aìrgiod, no ri cloich, nithe a ghearradh le h-ealadhain agus innleachd dhaoine.

30 A nis air do Dhia amharc thairis air aimsiribh an aineolais so, tha e nis ag àithneadh do na h-uile anns gach àit aithreachas a dhèanamh:

31 Do bhrìgh gu'n do shuidhich e là anns an toir e breth air an t-saoghal am fìreantachd, tre'n duine sin a dh'òrduich e; agus air so thug e dearbhadh do na h-uile dhaoinibh, le esan a thogail suas o na marbhaibh.

32 Agus an uair a chual iad mu aiseirigh nam marbh, rinn cuid diubh fanoid: ach thubhairt cuid eile, Eisdidh sinn riut a ris mu'n ni so.

33 Agus mar sin chaidh Pòl a mach as am meadhon.

34 Gidheadh, lean cuid do dhaoinibh ris, agus chreid iad. 'Nam measg so bha Dionisius an t-Areopagach, agus bean d'am b'ainm Damaris, agus dream eile maille riu.

CAIB. XVIII.

AN déigh nan nithe so, dh'fhàg Pòl baile na h-Aithne, agus thàinig e gu Corintus;

2 Agus fhuair e Iudhach àraidh d'am b'ainm Acuila, a rugadh am Pontus, air ùr-theachd as an Eadailt, maille r'a mhnaoi Priscila, (a chionn gu'n d'òrduich Claudius do na h-Iudhaich uile an Ròimh fhàgail,) agus thàinig e d'an ionnsuidh.

3 Agus a chionn gu'n robh e a dh'aon cheird riu, dh'fhan e maille riu, agus bha e ag obair, (oir bu cheird doibh bhì dèanamh phàilliona.)

4 Agus thagair e anns an t-sionagag gach aon là sàbaid, agus chuir e impidh air Iudhaich agus Greugaich.

5 Agus an uair a thàinig Silas agus Timoteus o Mhacedonia, bha Pòl air a theannadh 'na spiorad, agus rinn e fianuis do na h-Iudhaich, gu'm b'e Iosa an Crìosd.

6 Agus an uair a chuir iad 'na aghaidh, agus a labhair iad toibheum, chrath e 'eudach, agus thubhairt e riu, *Biodh* bhur fuil air bhur ceann féin; *tha* mise glan: á so suas théid mi chum nan Cinneach.

7 Agus chaidh e as a sin, agus thàinig e gu tigh duine àraidh, d'am b'ainm Iustus, a bha dèanamh aoraidh do Dhia, agus aig an robh a thigh làimh ris an t-sionagag.

8 Agus chreid Crispus, prìomh uachdaran na sionagoig anns an Tighearna, maille r'a theaghlach uile: agus chrèid mòran do na

Corintianaich, air dhoibh éisd-eachd ris, agus bhaisteadh iad.

9 An sin thubhairt an Tighearn ri Pòl ann an sealladh san oidhche, Na biodh eagal ort, ach labhair, agus na bì a' d' thosd :

10 Oir a ta mise maille riut, agus cha toir duine sam bith iennsuidh ort, chum do chron a dhèanamh : oir a ta mòr-shluagh agam-sa anns a' bhaile so.

11 Agus dh' fhan e bliadhna agus sè mìosan *an sin*, a' teagasg focail Dé 'nam measg.

12 Agus an uair a bha Galio 'na uachdaran air Achaia, dh' éirich na h-Iudhaich a dh' aon inntinn an aghaidh Phòil, agus thug iad e gu caithir a' bhreitheanais,

13 Ag ràdh, Tha 'n duine so a' comhairleachadh dhaoine aoradh a dhèanamh do Dhia an aghaidh an lagha.

14 Agus an uair a bha Pòl dol a dh' fhòsgladh a bheòil, thubhairt Galio ris na h-Iudhaich, Nam b' eucoir no droch ghnìomh a bhiodh ann, O Iudhacha, bu reusonta, gu 'n giùlaininn leibh :

15 Ach ma 's ceisd a ta ann timchioll fhocla agus ainmean, agus bhur lagha féin, amhaircibh féin air sin ; oir cha 'n àill leam-sa bhi m' bhreitheamh air an leithidibh sin do nithibh.

16 Agus dh' fhuadaich e iad o chaithir a' bhreitheanais.

17 An sin rug na Greugaich uile air Sostenes, uachdaran na sionagoig, agus ghabh iad air an làthair caithir a' bhreitheanais : agus cha do ghabh Galio suim do nì sam bith dhiubh sin.

18 Agus dh' fhan Pòl fathast ùine mhaith *sa' bhaile sin*, agus an sin an déigh a chead a ghabhail do na bràithribh, chaidh e air luing o sin gu Siria, agus maille ris-san Priscila agus Acuila ; an déigh a cheann a bhearradh ann

an Cenchrea : oir bha bòid air.

19 Agus thàinig e gu h-Ephesus, agus dh' fhàg e iadsan an sin : ach chaidh e féin a steach do 'n t-sionagog, agus reusonaich e ris na h-Iudhaich.

20 Agus an uair a dh' iarr iad *air* fuireach maille riu ni b' fhaide, cha d' aontaich e :

21 Ach ghabh e a chead diubh, ag ràdh, Is éigin domh air gach aon chor an fhéill so a ta teachd a choimhead ann an Ierusalem : ach pillidh mi a ris do 'ur n-ionnsuidh-sa, ma 's toil le Dia. Agus sheòl e o Ephesus.

22 Agus thàinig e tìr aig Cesareia, agus air dha dol suas agus fàilt a chur air an eaglais, chaidh e sìos gu Antioch.

23 Agus an uair a dh' fhan e rè tamuill *an sin*, dh' imich e, agus chaidh e an òrdugh troimh thir Ghalatia uile agus Phrighia, a' neartachadh nan deisciobul uile.

24 Agus thàinig gu h-Ephesus Iudhach àraidh d' am b' ainm Apollos, a rugadh an Alecsandria, duine deas-bhriathrach, agus cumhachdach anns na sgriobtuiribh.

25 Bha 'n duine so air a theagasg ann an slighe an Tighearn ; agus air dha bhi dian 'na spiorad, labhair agus theagaisg e gu dìchiollach na nithe a bhuineadh do 'n Tighearn, agus gun eòlas aige ach air baisteadh Eoin.

26 Agus thòisich e air labhairt gu dàna san t-sionagog. Agus air do Acuila agus do Phriscila a chluinntinn, ghabh iad d' an ionnsuidh e, agus mhinich iad dha slighe Dhé ni bu choimhionta.

27 Agus an uair bu mhiann leis dol gu Achaia, an déigh a chomhairleachadh, sgriobh na bràithre chum nan deisciobul

iad a ghabhail ris: neach, air dha teachd, a rinn còmhnaidh mòr riu-san a chreid tre ghràs:

28 Oir le mòr-dhìchioll rinn e deasboireachd ris na h-Iudhaich gu follaiseach, a' dearbhadh leis na sgrìobtuiribh, gur e Iosa an Crìosd.

CAIB. XIX.

A GUS thàrladh, 'nuair a bha Apollos ann an Corintus, air do Phòl dol troimh na crìochaibh uachdarach, gu 'n d' thàinig e gu Ephesus. Agus air faotainn dheisciobul àraidh,

2 Thubhairt e riu, An d' fhuair sibh an Spiorad naomh o chreid sibh? Agus thubhairt iadsan ris, Cha chuala sinn uiread as gu bheil Spiorad naomh ann.

3 Agus thubhairt e riu, Ciod ma seadh anns an do bhaisteadh sibh? Agus thubhairt iadsan, Am baisteadh Eoin.

4 An sin thubhairt Pòl, Bhaist Eoin gu deimhin le baisteadh an aithreachais, ag ràdh ris an t-sluagh, iadsan a chreidsinn anns an neach a bha gu teachd 'na dhéigh-san, sin r' a ràdh, ann an Iosa Crìosd.

5 Agus an uair a chual iad so, bhaisteadh iad ann an ainm an Tighearna Iosa.

6 Agus air do Phòl a làmh an a chur orra, thàinig an Spiorad naomh orra; agus labhair iad le teangaibh, agus rinn iad fàidheadaireachd.

7 Agus bha ann uile timchioll dà fhear dheug.

8 Agus chaidh esan a steach do 'n t-sionagag, agus labhair e gu dàna rè thrì mìosan, a' deasboireachd agus a' comhairleachadh nan nithe a bhuineas do rìoghachd Dhé.

9 Ach an uair a chruadaich-eadh cuid, agus nach do chreid iad, ach a labhair iad olc mu 'n

t-slighe sin an làthair an t-sluaigh, dh'fhàg'e iad, agus sgar e na deisciobuil uatha, agus bha e gach là a' deasboireachd ann an sgoil neach àraidh d' am b' ainm Tirannus.

10 Agus rinneadh so rè dhà bhliadhna; air chor as gu 'n cuala luchd-àiteachaidh na h-Asia uile, eadar Iudhaich agus Ghreugaich, focal an Tighearna Iosa.

11 Agus rinn Dia mìorbhuilean nach bu bheag le làmhaidh Phòil:

12 Air chor as gu 'n d' thugadh o 'chorp-san chum nan daoine tinne, neapaicinne no aprain, agus gu 'n d' fhalbh an euslaintean uatha, agus gu deachaidh na droch spioraid a mach asda.

13 Agus ghabh dream àraidh do na h-Iudhaich, a bha 'g im-eachd o àit gu h-àit, a' cur spiorada fo gheasaibh, os làimh ainm an Tighearna Iosa ainmeachadh os ceann na muinntir sin anns an robh droch spioraid, ag ràdh, Cuireamaid fo gheasaibh sibh tre Iosa a ta Pòl a' searmonachadh.

14 Agus bha aig Scebha Iudhach àraidh, aon do na h-àrd-shagartaibh, seachdnar mhac a bha dèanamh so.

15 Agus fhreagair an droch spiorad, agus thubhairt e, Tha eòlas agam air Iosa, agus is aithne dhomh Pòl: ach cò sibh-se?

16 Agus leum an duine anns an robh an droch spiorad orra, agus air dha làmh an uachdar fhaotainn orra, thug e buaidh orra, air chor as gu 'n do theich iad a mach as an tigh sin lom-nochd agus reubta.

17 Agus fhuair na h-Iudhaich uile agus mar an ceudna na Greugaich a bha thàmh ann an Ephesus fios air so; agus thuit

eagal orra uile, agus bha ainm an Tighearna Iosa air àrdachadh.

18 Agus thàinig mòran diubhsan a chreid, ag aideachadh, agus ag innseadh an gnìomhara.

19 Agus thug mòran diubhsan a bha gnàthachadh dhroch innleachda, an leabhraiche leo, agus loisg siad iad am fianuis nan uile: agus dh'aireamh iad an luach, agus fhuair iad e 'na leth-cheud mìle *bonn* airgid.

20 Mar sin le cumhachd dh'fhàs agus bhuadhaich focal An Tighearn.

21 Agus an uair a choimhlionadh na nithe so, chuir Pòl roimhe 'na spiorad, an dèigh dha imeachd troimh Mhacedonia, agus Achaia, dol gu Ierusalem, ag ràdh, An dèigh dhomh bhi an sin, is éigin domh an Ròimh fhaicinn mar an ceudna.

22 Agus air dba dithis dhiubhsan a bha frithealadh dha, Timoteus, agus Erastus, a chur do Mhacedonia, dh'fhan e féin rè tamuill san Asia.

23 Agus dh'éirich mu 'n àm sin iomairt nach bu bheag mu thimchioll na slighe sin.

24 Oir bha ceard-airgid àraidh d'am b'ainm Demetrius *ann*, a bha dèanamh theampull airgid do Dhiana, agus a thug buannachd nach bu bheag do'n luchd-ceirde;

25 Agus air dha iadsan a chruinneachadh an ceann a chèile, agus a' mhuinntir eile a bha dh'aon cheird riu, thubhairt e, Fheara, tha fhios agaibh gur ann o'n cheird so a ta ar beartas againne:

26 Os bàrr, tba sibh a' faicinn agus a' cluinntinn gu bheil am Pòl so le 'chomhairle air tionndadh air falbh sluaigh mhòir, cha 'n e a mhàin ann an Ephesus, ach cha mhòr san Asia uile,

ag ràdh, Nach dée iad a nithear le làmhaidh:

27 Air chor as nach e mhàin gu bheil e 'n cunnart gu'n dèanar tàir air ar ceird; ach mar an ceudna gu cuirear teampull na ban-dé mòire Diana an neo-phrìs, agus gu claidhear a mòrachd-sa, d'am bheil an Asia uile, agus an domhan a' dèanamh aoraidh.

28 Agus an uair a chual iadsan so, lionadh le feirg iad, agus ghlaodh iad, ag ràdh, *Is mòr Diana nan Ephesianach.*

29 Agus bha am baile uile air a lionadh le mì-riaghailt: Agus ruithiad a dh'aon toil chum àite-cruinnich an t-sluaigh, a' tarruing leo Ghaiuis agus Aristarchuis Macedonaich, luchd comh-thuruais Phòil.

30 Agus an uair a b' àill le Pòl dol a steach, chum an t-sluaigh, cha do leig na deisciobuil leis.

31 Agus mar an ceudna chuir cuid do uachdaranabh na h-Asia, a bha 'nan càirdibh dba, fios d'a ionnsuidh, a' guidhe *air* nach rachadh e gu àite-cruinnich an t-sluaigh.

32 Ghlaodh uime sin cuid diubh aon ni, agus cuid ni eile: oir bha an coimhthional troimh a chèile, agus cha robh fios aig a' chuid bu mhò c'ar son a thàinig iad cuideachd.

33 Agus tharruing iad a mach Alecsander as an t-sluaigh, air bhi do na h-Iudhaich 'ga iomain rompa. Agus smèid Alecsander le 'laimh, agus b' àill leis a leithsgeul a ghabhail ris an t-sluaigh.

34 Ach an uair a tbuig iad gu'm b'Iudhach e, rinneadh àrd-iolach leo uile mu thimchioll ùine dhà uair, a' glaochaich, *Is mòr Diana nan Ephesianach.*

35 Agus an uair a chiuinich an cléireach an sluagh, thubhairt

e, Fheara Ephesus, cò an duine aig nach 'eil fios gu bheil baile nan Ephesianach a' dèanamh aoraidh do'n bhan-dia mhòir Diana, agus do'n *dealbh* a thuit a nuas o Iupiter?

36 Air an aobhar sin do bhrìgh nach fheudar cur an aghaidh nan nithe so, is còir dhuibhse bhi ciuin, agus gun ni sam bith a dhèanamh gu h-obann.

37 Oir thug sibh an so na daoine so, ged nach 'eil iad a' creachadh theampull, no a' toirt toibheim d'ar ban-dia.

38 Uime sin ma ta aig Demetrius agus aig an luchd-ceird a ta maille ris, cùis an aghaidh neach air bith, tha 'n lagh réidh *dhoibh*, agus tha uachdarain *ann*; agradh iad a chéile.

39 Ach ma ta ceisd sam bith agaibh mu nithibh eile, réitichear sin ann an coimhthional dlìgheach.

40 Oir tha sinn an cunnart bhi air ar n-agairst air son ceann-airc air an là 'n diugh, do bhrìgh nach 'eil cùis sam bith againn a dh' fheudas sinn a thoirt seachad mar aobhar a' chruinneachaidh so.

41 Agus air dha so a ràdh, sgaoil e an coimhthional.

CAIB. XX.

A GUS an déigh do'n chomh-gbàir sgar, ghairm Pòl na deisciobuil d'a ionnsuidh, agus air dha a chead a ghabhail diubh, thriall e gu dol do Mhacedonia.

2 Agus air dha dol troimh na crìochaibh sin, agus mòr earail a dhèanamh orra, thàinig e do'n Ghréig;

3 Agus dh' fhan e *an sin* trì mìosan: agus an uair a bha na h-Iudhaich ri feall-fholach air a shon, agus e air ti dol air luing do Shiria, chuir e roimhe pilltinn troimh Mhacedonia.

4 Agus chaidh 'na chuideachd gu h-Asia, Sopater o Bherea; agus do mhuinntir Thesalonica, Aristarchus agus Secundus; agus Gaius o Dherbe, agus Timoteus; agus do mhuinntir na h-Asia, Tichicus agus Trophimus.

5 Air dhoibh so imeachd romhainne, dh' fheith iad ruinn ann an Troas.

6 Agus sheòl sinn o Philipi, an déigh làithean an arain neo-ghoirtichte, agus thàinig sinn d'an ionnsuidh-sangu Troas ann an cùig làithibh, far an d' fhan sinn seachduin.

7 Agus an ceud là do'n t-seachduin, air do na deisciobluibh cruinneachadh an ceann a chéile a bhriseadh arain, shearmonaich Pòl doibh, agus a rùn air imeachd uatha air an là maireach, agus lean e air labhairt gu meadhonoidhche.

8 Agus bha mòran lòchran anns an t-seòmar uachdarach, far an robh iad cruinn.

9 Agus bha òganach àraidh d'amb'ainm Eutichus nashuidhe ann an uinneig, air tuiteam gu trom 'na chodal: agus air do Phòl bhi rè fad a' searmonachadh, shàruicheadh leis a' chodal e, agus thuit e sìos o'n treas lobhta, agus thogadh marbh e.

10 Agus chaidh Pòl sìos, agus thuit e air, agus air dha a ghlacadh 'na uchd, thubhairt e, Na biodh trioblaid oirbh; oir a ta 'anam ann.

11 Agus air dol suas da a rìs, bhris e aran agus dh' ith e, agus labhair e riu rè ùine fhada, eadhon gu teachd na maidne, agus mar sin dh' fhalbh e.

12 Agus thug iad leo an t-òganach agus e beò, agus rinn iad gàirdeachas nach bu bheag.

13 Agus air dhuinne imeachd air thoiseach chum na luinge, sheòl sinn gu Asos, fa rùn Pòl a

ghabhail a steach an sin : oir is ann mar sin a dh'òrduich e, a' cur roimh gu 'n imicheadh e féin d' a chois.

14 Agus an uair a choinnich e sinn aig Asos, ghabh sinn a steach e, agus thàinig sinn gu Mitilene.

15 Agus air seòladh dhuinn as a sin, thàinig sinn air an là maireach fa chomhair Chiois ; agus air an là 'na dhéigh sin thàinig sinn gu Samos, agus dh' fhan sinn aig Trogillum ; agus air an là b' fhaisce thàinig sinn gu Miletus.

16 Oir chuir Pòl roimhe seòladh seach Ephesus, chum nach tàrladh dha moille a dhèanamh anns an Asia : oir rinn e cabhag, chum nam feudadh e, bhi ann an Ierusalem air là na Cuingeis.

17 Agus chuir e fios o Miletus gu h-Ephesus, agus ghairm e d' a ionnsuidh seanairean na heaglais.

18 Agus an uair a thàinig iad d' a ionnsuidh, thubhairt e riu, Tha fhios agaibh, cionnus a bha mi 'nur measg anns an uile aimsir, o' n cheud là a thàinig mi do 'n Asia,

19 A' dèanamh seirbhis do 'n Tighearn leis gach uile irioslachd inntinn, agus maille ri mòran dheur, agus dheuchainnean, a thachair dhomh le ceilg nan Iudhach.

20 Agus cionnus nach do ghléidh mi ni sam bith am folach a bha feumail dhuibhse, gun a nochdadh dhuibh, agus gun sibhse a theagasg am follais, agus o thigh gu tigh,

21 A' dèanamh fianuis araon do na h-Iudhaich, agus do na Greugaich, mu aithreachas a thaobh Dhé, agus mu chreidimh a thaobh ar Tighearna Iosa Crìosd.

22 Agus a nis feuch, a ta mi dol gu Ierusalem ceangailte san Spiorad, gun fhios agam ciod iad na nithe a thàrlas dhomh an sin ;

23 Ach a' mhàin gu bheil an Spiorad naomha' dèanamh fianuis anns gach baile, ag ràdh, Gu bheil geimhlichean agus trioblaidean a' feitheamh orm.

24 Ach cha 'n 'eil suim agam do ni air bith, ni mò tha mi a' measadh m' anama féin luachmhor dhomh, chum gu crìochnaich mi mo thurus le h-aoibhneas, agus gu coimhlion mi a' mhinistireil-eachd a fhuair mi o 'n Tighearn Iosa, a dhèanamh fianuis do shoisgeul gràis Dhé.

25 Agus a nis feuch, a ta fhios agam nach faic sibhse uile, measg an d' imich mise a' searmonachadh rìoghachd Dhé, mo ghnùis ni 's mò.

26 Uime sin a ta mi a' dèanamh fianuis duibh air an là 'n diugh, gu bheil mise glan o fhuil nan uile.

27 Oir cha do sheachainn mi uile chomhairle Dhé fhoillseachadh dhuibh.

28 Air an aobhar sin thugaibh aire dhuibh féin, agus do 'n treud uile, air an d' rinn an Spiorad naomh luchd-coimhead dhibh, a bheathachadh eaglais Dhé, a cheannaich e le 'fhuil féin.

29 Oir a ta fhios agam-sa air so, an déigh m' imeachd-sa gu 'n tig madaidh-allaidh gharga 'nur measg, nach caomhain an treud.

30 Agus éiridh daoine dhibh féin, a labhras nithe fiara, chum deisciobuil a tharruing' nan déigh féin.

31 Uime sin dèanaibh faire, a' cuimhneachadh nach do sguir mise rè thrì bliadhna, a chomhairleachadh gach aon agaibh a là agus a dh' oidhche le deuraibh.

32 Agus a nis, a bhràithre, earbam sibh ri Dia, agus ri focal a ghràis, a ta comasach air bhur togail suas, agus oighreachd a thoirt duibh am measg na muinntir sin uile a ta air an naomhachadh.

33 Cha do shanntaich mi airgid, no òr, no eudach duine sam bith.

34 Seadh, is aithne dhuibh féin, gu'n do fhrithheil na làmhnan so do m' uireasbhuidh féin, agus do'n mhuinntir sin a bha maille rium.

35 Nochd mi na h-uile nithe dhuibh, gur ann le saothreachadh mar so is còir dhuibh còmh-nadh a dhèanamh riusan a ta anmhunn; agus focail an Tigh-earna Iosa a chuimhneachadh, mar a thubhairt e, *Tha* e ni's beannaichte *ni* a thoirt na ghabhail.

36 Agus air dha na briathra so a ràdh, leig se e féin air a ghlùinibh, agus rinn e ùrnuigh maille riu uile.

37 Agus ghuil iad uile gu goirt, agus thuit iad air muineal Phòil, agus phòg iad e.

38 Air dhoibh bhi gu h-àraidh brònach air son nam briathra so a thubhairt e, Nach faiceadh iad a ghnùis-san ni's mò. Agus thug iad coimheadachd dha chum na luinge.

CAIB. XXI.

AGUS air dhuinn dealachadh riu-san, sheòlsinn romhainn, agus thàinig sinn gu dìreach gu Coos, agus air an là màireach gu Rodos, agus as a sin gu Patara:

2 Agus air dhuinn long fhaotainn a bha a' gabhail thairis gu Phenicia, chaidh sinn air bòrd, agus sheòl sinn romhainn.

3 Agus air dhuinn teachd an sealladh Chipruis, agus fhàgail air an làmh chli, sheòl sinn gu

Siria, agus thàinig sinn tìr aig Tirus: oir is ann an sin a bha an long gus a luchd a chur a mach.

4 Agus air dhuinn deisciobuil fhaotainn, dh' fhan sinn an sin seachd làithean: muinntir a thubhairt ri Pòl tre'n Spiorad, gun e dhol suas gu Ierusalem.

5 Agus an uair a chrìochnaich eadha na làithean sin, chaidh sinn a mach, agus thriall sinn romhainn; agus thàinig iadsan uile maille ri mnaibh agus ri cloinn 'nar cuideachd, a mach as a' bhaile: agus chaidh sinn air ar glùinibh air an tràigh, agus rinn sinn ùrnuigh.

6 Agus an déigh dhuinn air cead a ghabhail d'a chéile, chaidh sinn do'n luing; agus phill iadsan d'an tighibh féin.

7 Agus an uair a chrìochnaich sinn ar turas o Thirus, thàinig sinn gu Ptolemais, agus chuir sinn fàilte air na bràithribh, agus dh' fhan sinn aon là maille riu.

8 Agus air an là màireach, air dhuinne, a bha do chuideachd Phòil, imeachd, thàinig sinn gu Cesarea; agus chaidh sinn a steach do thigh Philip an t-soisgeulaiche, (a bha do'n t-seachd-nar,) agus dh' fhan sinn aige.

9 Agus bha ceathrar nighean aige-san, òighean, a bha ri fàidheadaireachd.

10 Agus ag fantuinn duinn mòran do làithibh *an sin*, thàinig a nuas o Iudea fàidh àraidh, d' am b' ainm Agabus.

11 Agus an uair a thàinig e d' ar n-ionnsuidh-ne, ghabh e crios Phòil, agus cheangail e a làmhnan agus a chosan féin, agus thubhairt e, Mar so tha an Spiorad naomh ag ràdh, Is ann mar so a cheanglas na h-Iudhaich ann an Ierusalem an duine d' am buin an crios so, agus bheir

iad thairis e do làmhaibh nan Cinneach.

12 Agus an uair a chuala sinne na nithe so, ghuidh sinn féin agus muinntir an àite air, gun e dhol suas gu Ierusalem.

13 An sin fhreagair Pòl, Ciod is ciall duibh a' gul, agus a' briseadh mo chridhe? oir a ta mise ullamh cha'n e a mhàin gu bhi air mo cheangal, ach eadhon gu bàsachadh ann an Ierusalem air son ainme an Tighearna Iosa.

14 Agus an uair nach gabhadh e comhairle, sguir sinne, ag ràdh, Dèanar toil an Tighearna.

15 Agus an déigh nan làithean so, air dhuinn bhi ullamh, chaidh sinn suas gu Ierusalem.

16 Agus chaidh mar an ceudna maille ruinn *cuid* do na deisciobluibh o Chesarea, a' toirt leo Mhnasoin o Chiprus, seann deisciobul àraidh, aig an robh sinn gu bhi air aoidheachd.

17 Agus an uair a thàinig sinn gu Ierusalem, ghabh na bràithre ruinn gu subhach.

18 Agus air an ath là, chaidh Pòl maille ruinne dh' ionnsuidh Sheumais; agus bha na seanair-ean uile a làthair.

19 Agus air dhasan fàilte chur orra, chuir e'n céill doibh fa leth na nithe a rinn Dia le 'mhinis-treileachd-san am measg nan Cinneach.

20 Agus an uair a chual iad-san so, thug iad glòir do'n Tigh-earn, agus thubhairt iad ris-san, Tha thu faicinn, a bhràthair, cia lion mìle do na h-Iudhaich a ta creidsinn; agus tha iad uile ro eudmhor mu'n lagh.

21 Agus chual iad umad-sa, gu bheil thu teagasg do na h-Iudhaich uile a ta measg nan Cinneach, Maois a thréigsinn, ag ràdh *riu*, Nach còir dhoibh an clann a thimchioll-ghearradh, no gluasad a réir nan gnàth.

22 Ciod uime sin a nithear? Gun teagamh, is éigin do'n t-sluagh cruinneachadh: oir cluinnidh iad gu'n d' thàinig thu.

23 Uime sin dèan so a ta sinne ag ràdh riut: Tha ceathrar fhear maille ruinne, air am bheil bòid;

24 Thoir iadsan leat, agus bi air do ghlanadh maille riu, agus dèan costus leo, chum gu beàrr iad an cinn: agus gu'm bi fhios aig na h-uile nach 'eil ach neo-ni anns na chual iad mu d' thimchioll-sa, ach gu bheil thu féin mar an ceudna ag imeachd gu riaghailteach, agus a' coimhead an lagha.

25 Ach mu thimchioll nan Cinneach a chreid, sgrìobh sinne agus b'i ar breth, gun iad a ghléidheadh a h-aon do na nithibh sin, ach a mhàin iad féin a choimhead o nithibh a chaidh iobradh do iodholaibh, agus o fhuil, agus o ni tachdta, agus o striopachas.

26 An sin ghabh Pòl na daoine; agus air an là maireach air dha bhi air a ghlanadh maille riu, chaidh e steach do'n teampull, a' foillseachadh coimhlionaidh làithean a' ghlanaidh, gus an tugtadh tabhartas air son gach aon aca.

27 Agus an uair a bha na seachd làithean air bheag nithe air an coimhlionadh, air do na h-Iudhaich o'n Asia esan fhaicinn san teampull, bhrosnuich iad am pobull uile, agus chuir iad làmh ann,

28 Ag éigheach, Fheara Israeil, cuidichibh: is e so an duine a ta teagasg nan uile dhaoine anns gach àit an aghaidh a' phobuill, agus an lagha, agus an àite so: agus os bàrr, thug e steach Greugaich do'n teampull, agus shalaich e'n t-ionad naomh so.

29 (Oir chunnaic iad Trophimus an t-Ephesianach roimhe sin anns a' bhaile maille ris, agus shaoil iad gu'n d'thug Pòl a steach do'n teampull e.)

30 Agus ghluaisheadh am baile gu h-ìomlan, agus ruith an sluagh cuideachd: agus air dhoibh breith air Pòl, tharruing iad a mach as an teampull e: agus air ball dhùineadh na dorsa.

31 Agus an uair a b' àill leo a mharbhadh, chaidh sgeula dh'ionnsuidh àrd-cheannaird na cuideachd, gu'n robh Ierusalem uile thar a chéile:

32 Neach air ball a thug leis saighdearan, agus ceannardan-cheud, agus a ruith sìos d'an ionnsuidh: Agus an uair a chunnaic iadsan an t-àrd-cheannard agus na saighdearan, sguir iad do bhualadh Phòil.

33 An sin thàinig an t-àrd-cheannard am fagus agus rug e air, agus dh' àithn e a cheangal le dàshlabhraidh; agus dh' fhiosraich e, Cò e, agus ciod a rinn e.

34 Agus ghluaodh aon chuid am measg an t-sluaigh aon ni, agus cuid eile ni eile: agus an uair nach robh e an comas da cinnteachd na càise a thuigsinn air son na h-àrd-bhruidhne, dh' òrd-uich e esan a thoirt do'n chaisteal.

35 Agus an uair a thàinig e chum na staidhreath, thàrladh gu'n do ghiùlaineadh e leis na saighdearaibh, air son foireigin an t-sluaigh.

36 Oir lean am mòr-shluagh e, a' gladhaich, Beir uainn e.

37 Agus an uair a bha Pòl gu bhì air a thoirt a steach do'n ehaisteal, thubhairt e ris an àrd-cheannard, An cead domh-sa ni a labhairt riut? agus thubhairt esan, An labhair thu Gréigis?

38 Nach tusa an t-Eiphiteach sin a thog ceannaire roimh na

làithibh so, agus a thug leat do'n fhàsach ceithir mìle fear a bha 'nan luchd-mortaidh?

39 Ach thubhairt Pòl, Is duine mise a tha a' m' Iudhach gun amharus o Tharsus, saor-dhuine do bhaile ro inbheach ann an Cilicia: agus guidheam ort, thoir cead domh labhairt ris an t-sluagh.

40 Agus an uair a thug e cead da, Air do Phòl seasamh air an staidhir, smèid e le 'làimh air an t-sluagh, ag iarraidh éisd-eachd: agus air fantuinn ro thosdach dhoibh-san, labhair e riu sa' chànain Eabhruidhich, ag ràdh,

CAIB. XXII.

THEARA, a bhràithre, agus aithriche, éisdibh-sa ri m' dhion-chainnt ribh a nis:

2 (Agus an uair a chual iadsan gu'n do labhair e riu sa' chànain Eabhruidhich, bu mhòid a thosd iad: agus thubhairt esan,)

3 Is Iudhach mise da rìreadh, a rugadh ann an Tarsus na Cilicia, ach a dh' oileadh sa bhaile so, aig cosaibh Ghamalieil, agus a theagaisgeadh gu coimhionta a réir gnàtha lagha nan aithriche. agus bha mi eudmhor a thaobh Dhé, mar a ta sibhse uile an diugh.

4 Agus rinn mi geur-leanmhuinn gu bàs air an t-slighe so, a' ceangal fhear agus bhan, agus 'gan tarruing gu prìosan:

5 Mar a ni an t-àrd-shagart mar an ceudna fianuis domh, agus comhairle nan seanairean uile; o'n d' fhuair mise mar an ceudna litriche chum nam bràithre, agus chaidh mi gu Damascus, chum an dream a bha'n sin a thoirt ceangailte gu Ierusalem, chum gu dèantadh peanas orra.

6 Agus thàrladh, air dhomh

bhi 'g imeachd, agus a' druid-eadh ri Damascus mu mheadhonlà, gu'n do dhealraich gu hobann o nèamh solus mòr mu'n cuàirt orm.

7 Agus thuit mi air an talamh, agus chuala mi guth ag ràdh, A Shaul, a Shaul, c'ar son a ta thu 'gam gheur-leanmhuinn-sa?

8 Agus fhreagair mise, Cò thu, a Thighearn? Agus thubhairt e rium, is mise Iosa o Nasaret, air am bheil thusa a' dèanamh geur-leanmhuinn.

9 Agus chunnaic na daoine a bha maille rium an solus gu deimhin, agus ghabh iad eagal; ach cha chual iad guth an Tì a labhair rium-sa.

10 Agus thubhairt mise, Ciod a ni mi, a Thighearn? Agus thubhairt an Tighearn rium, Eirich, agus imich gu Damascus, agus an sin labhrar riut mu thimchioll nan nithe sin uile a dh'òrduicheadh dhuitse a dhèanamh.

11 Agus an uair nach bu léir dhomh tre ghlòir an t-soluis sin, air dhomh bhi air mo threòrachadh air làimh leo-san a bha maille rium, thàinig mi gu Damascus.

12 Agus air do dhuine àraidh *d'am b' ainm* Ananias, abha cràbhach a réir an lagha, agus air an robh deadh theisteachas aig na h-Iudhaich uile a bha chòmh-nuidh *an sin*,

13 Teachd a m' ionnsuidh, agus seasamb làimh rium, thubhairt e rium, A Shaul a bhràthair, faigh do radharc. Agus air an uair sin féin dh'amhairc mi suas air.

14 Agus thubhairt esan, Thagh Dia ar n-aithriche roimh-làimh thusa, chum gu'n gabhadh tu eòlas air a thoil, agus gu'm faiceadh tu an t-Aon cothromach sin, agus gu'n cluinneadh tu guth as a bheul.

15 Oir bithidh tu a' d' fhianuis aige chum nan uile dhaoine, air na nithibh a chunnaic agus a chuala tu.

16 Agus a nis c'ar son a ta thu a' dèanamh moille? Eirich, agus bì air do bhaisteadh, agus ionnlaid uait do pheacanna, a' gairm air ainm an Tighearn.

17 Agus thàrladh, 'nuair a phill mise gu Ierusalem, agus a bha mi a' dèanamh ùrnuigh san teampull, gu'n deachaidh mi ann an neul,

18 Agus gu'm faca mi esan ag ràdh rium, Dèan deifir, agus imich gu grad á Ierusalem; oir cha ghabh iad ri d' theisteachas mu m' thimchioll-sa.

19 Agus thubhairt mise, A Thighearn, tha fhios aca gu robh mise a' tilgeadh am prìosan, agus a' sgiùrsadh anns gach sionagoga iadsan a chreid annad-sa:

20 Agus an uair a dhòirteadh fuil do mhairtirich Stephain, bha mise mar an ceudna a' m' sheasamh a làthair, agus ag aontachadh leis a mharbhadh, agus a' coimhead eudaich na muinntir a mharbh e.

21 Agus thubhairt e rium, Imich: oir cuiridh mise thu am fad chum nan Cinneach.

22 Agus dh'éisd iad ris gus an fhocal so, agus thog iad *an sin* an guth gu h-àrd, ag ràdh, Beir o'n talamh a leithid so do dhuine; oir cha chòir e bhi beò.

23 Agus an uair a bha iadsan ag éigheach, agus a' tilgeadh dhiubh *an eudaich*, agus a' tilgeadh luathre san athar,

24 Dh'àithn an t-àrd-cheannard esan a thoirt do'n chaisteal, ag òrduichadh a cheasnachadh le a sgiùrsadh; chum gu faigheadh e fios ciod i a' choire mu'n robh iad a' glaothaich mar sin 'na aghaidh.

25 Agus an uair a bha iad 'ga

cheangal le iallaibh, thubhairt Pòl ris a' cheannard-ceud a sheas a làthair, Am bheil e ceaduichte dhuibhse duine a ta 'na Romhanach a sgiùrsadh, agus gun e air a dhìteadh?

26 Agus an uair a chual an ceannard-ceud *so*, dh'imich e agus dh'innis e do'n àrd-cheannard, ag ràdh, Thoir fa'near ciod a nì thu; oir is Romhanach an duine *so*.

27 An sin thàinig an t-àrd-cheannard d' a ionnsuidh, agus thubhairt e ris, Innis domh-sa, an Romhanach thu? Agus thubhairt esan, Is mi.

28 Agus fhreagair an t-àrd-cheannard, Is mòr an t-suim air an do cheannaich mise ant-saorsa *so*. Agus thubhairt Pòl, Ach rugadh mise *saor*.

29 An sin dh'imich iadsan uaith air ball a bha gus a cheasnachadh: agus ghabh an t-àrd-cheannard mar an ceudna eagal 'nuair a thuig e gu'm bu Romhanach e, agus a chionn gu'n do cheangail se e.

30 Agus air an là màireach, air dha bhi togarrach air fios cinnteach fhaotainn ciod i a' choire a bha na h-Iudhaich a' cur as a leth, dh'fhuasgail se e o a chuibhreachaibh, agus dh'àithn e do na h-àrd-shagartaibh agus d'an comhairle uile teachd a làthair, agus air dha Pòl a thoirt sìos, chuir e 'nam fianuis e.

CAIB. XXIII.

AGUS air dearcadh do Phòl air a' chomhairle, thubhairt e, Fheara *agus* a bhràithre, anns an uile dheadh choguis chaith mise mo bheatha a thaobh Dhé gus an là'n diugh.

2 Agus dh'àithn an t-àrd-shagart Ananias dhoibh-san a bha 'nan seasamh làimh ris, a bhualadh air a bheul.

3 An sin thubhairt Pòl ris, Buailidh Dia thusa, a bhalla ghealaichte: oir am bheil thusa a'd' shuidhe a thoirt breth ormsa a réir an lagha, agus an aghaidh an lagha ag òrduchadh mo bhualadh?

4 Agus thubhairt iadsan a sheas làimh ris, Am bheil thusa a'toirt ana-cainnt do àrd-shagart Dhé?

5 An sin thubhairt Pòl, Cha robh fhios agam, a bhràithre, gu'm b'e an t-àrd-shagart e: oir a ta e sgriobhta, Na labhair olc mu uachdaran do phobuill.

6 Ach an uair a thuig Pòl, gu robh cuid diubh 'nan Sadusaich, agus a' chuid eile 'nam Phairisich, ghlaodh e anns a' chomhairle, Fheara *agus* a bhràithre, is Phairiseach mise, mac Phairisich: is ann á leth dòchais agus aiseirigh nam marbh, a tha mi air mo thoirt am breitheanas.

7 Agus air dhasan *so* a labhairt, dh'éirich comhstri eadar na Phairisich agus na Sadusaich: agus roinneadh an coimhthional *an aghaidh a chéile*.

8 Oir tha na Sadusaich ag ràdh nach 'eil aiseirigh, no aingeal, no spiorad ann; ach a ta na Phairisich ag aideachadh gach aon diubh.

9 Agus dh'éirich gàir mhòr: agus air seasamh suas do na sgriobhaichibh a bha air taobh nam Phairiseach, chathaich iad 'nan aghaidh, ag ràdh, Cha 'n 'eil sinne faotainn cron air aith san duine *so*: ach ma labhair spiorad no aingeal ris, na cogamaid an aghaidh Dhé.

10 Agus an uair a dh'éirich connsachadh mòr *eatorra*, air do'n àrd-cheannard bhi fo eagal gu'n rachadh Pòl a tharruing as a chéile leo, dh'àithn e do na saighdearaibh dol sìos, agus esan a thogail leis an làimh làidir as

am meadhon, agus a thoirt do'n chaisteal.

11 Agus air an oidhche 'na dhéigh sin, sheas an Tighearn làimh ris, agus thubhairt e, Biodh misneach mhaith agad, a Phòil; oir mar a rinn thu fianuis mu m' thimchioll-sa ann an Ierusalem, is amhuil sin is éigin duit fianuis a dhèanamh anns an Roimh.

12 Agus air teachd do'n là, chruinnich dream àraidh do na h-Iudhaich an ceann a chéile, agus chuir siad iad féin fo mhallachadh, ag ràdh, nach itheadh agus nach òladh iad gus am marbhadh iad Pòl.

13 Agus bha iad os ceann dà fhichead *fear* a rinn an comhionnachadh so.

14 Agus thàinig iad chum nan àrd-shagart, agus nan sean-airean, agus thubhairt iad, Chuir sinne sinn féin fo àrd-mhallachadh, nach blaiseamaid ni sam bith gus am marbhamaid Pòl.

15 A nis uime sin iarraibh-sa maille ris a' chomhairle air an àrd-cheannard, gu'n tugadh e do'ur n-ionnsuidh-sa e am màireach, mar gu biodh a rùn oirbh fios fhaotainn ni bu choimhlionta air ni éigin m'a thimchioll; agus tha sinne deas chum esan a mharbhadh, mu'n tig e'm fagus duibh.

16 Agus an uair a chuala mac peathar Phòil am feall-fholach so, thàinig e, agus air dha dol a steach do'n chaisteal, dh'innis e sin do Phòl.

17 An sin ghairm Pòl d'a ionnsuidh aon do na ceannard-aibh-cheud, agus thubhairt e, Thoir an t-òganach so chum an àrd-cheannaird; oir a ta ni àraidh aige r'a innseadh dha.

18 An sin thug e leis e, agus threòraich se e, chum an àrd-cheannaird, agus thubhairt e,

Ghairm Pòl am prìosanach mise d'a ionnsuidh, agus ghuidh e orm an t-òganach so thoirt a d'ionnsuidh-sa, aig am bheil ni éigin r'a innseadh dhuit.

19 An sin rug an t-àrd-cheannard air a làimh, agus chaidh e a leth-taobh an uaighidheas *maille ris*, agus dh'fhiosraich e *dheth*, Ciod a tha agad r'a innseadh dhomh-sa?

20 Agus thubhairt esan, Rinn na h-Iudhaich comhairle iarraidh ortsa, gu'n tugadh tu Pòl am màireach do'n chomhairle, mar gu'm biodh iad gu rannsachadh ni's géire a dhèanamh air ni éigin m'a thimchioll.

21 Ach na aontaich thusa leo: oir a ta os ceann dà fhichead fear dhiubh ri feall-fholach 'na aghaidh, a chuir iad féin fo mhallachadh, nach ith agus nach òl iad gus am marbh iad e: agus a nis tha iad ullamh, a' feith-eamh ri gealladh uaitse.

22 An sin leig an t-àrd-cheannard uaith an t-òganach, agus dh'àithn e *dha, ag ràdh, Feuch*, nach innis thu do neach sam bith, gu'n d'fhoillsich thu na nithe so dhomh-sa.

23 Agus ghairm e d'a ionnsuidh dà cheannard-ceud, agus thubhairt e, Ulluichibh dà cheud saighdear a théid gu Cesarea, agus deich agus trì fichead marcach, agus dà cheud fear-sleagha, air an treas uair do'n oidhche.

24 Agus ulluichibh eich, chum air dhoibh, Pòl a chur orra, gu'n toir iad e gu tèaruinte chum an uachdarain Felics.

25 Agus sgrìobh e litir air a' mhodh so:

26 Beatha agus slàinte o Chlaudius Lisias, chum an uachdarain ro òirdheirc Felics.

27 Ghlacadh an duine so leis na h-Iudhaich, agus an uair a bha iad air ti a mharbhadh,

thàinig mise orra le saighdear-aibh, agus thug mi dhuibh e, a' tuigsinn gu'm bu Romhanach e.

28 Agus air dhomh bhi toileach air fios an aobhair fhaotainn air son an d'agair iad e, thug mi sìos e chum an comhairle-san:

29 Agus thuig mi gu'n robh e air agairt mu cheisdibh d'an lagh féin, gun ni sam bith air a chur as a leth a b' airidh air bàs no air ceanglaichibh.

30 Ach an uair a dh'innseadh dhomh gu'n robh na h-Iudhaich gu feall a chaitheadh air an duine, air ball chuir mi a d'ionnsuidh-sa e, agus thug mi àithne mar an ceudna d'a luchd-casaid, gach cùis a bha aca 'na aghaidh a chur an céill a' d' làthair-sa. Slàn leat.

31 An sin air do na saighdearaibh Pòl a ghabhail, a réir mar a dh'àithneadh dhoibh, thug iad san oidhche e gu Antipatris.

32 Agus air an là màireach leig iad do'n mbarc-shluagh dol leis, agus phill iad féin do'n chaisteal.

33 Agus an uair a chaidh iad a stigh do Chesarea, agus a thug iad an litir do'n uachdaran, chuir iad mar an ceudna Pòl 'na fhianuis.

34 Agus an uair a leugh an t-uachdaran an litir, dh'fhiosraich e cò an dùthaich o'n robh e. Agus an uair a thuig e gur ann o Chìlicia bha e,

35 Thubhairt e, Eisdidh mi riut, 'nuair a thig do luchd-casaid mar an ceudna. Agus dh'àithn e esan a choimhead ann an talla-breitheanais Heroid.

CAIB. XXIV.

A GUS an ceann chùig làithean 'na dhéigh sin, chaidh Ananias an t-àrd-shagart sìos maille ris na seanairibh, agus ri Tertul-

lus fear-tagraidh àraidh, muinntir a nochd iad féin an làthair an uachdaran an aghaidh Phòil.

2 Agus an uair a ghairmeadh a mach e thòisich Tertullus air a chasaid, ag ràdh, Do bhrìgh gu bheil sinn tromhad-sa a' mealtuinn mòr-shith, agus gu'n d'rinneadh *iomadh* deadh ghniomh do'n chinneach so tre do ghliocas-sa,

3 Tha sinne gabhail ri so, anns gach àm agus anns gach àit, Fhèlics ro òirdheirc, maille ris gach uile bhuidheachas.

4 Ach, chum nach cuirinn mòr-mhoille ort, guidheam ort, do d' shuairceas gu'n éisd thu ruinn gu h-ath-ghoirid.

5 Oir fhuair sinn am fear so 'na phlàigh, agus a' dùsgadh nan Iudhach uile gu ceannairc air feadh an domhain, agus 'na cheann-feadhna do luchd saobhchreidimh nan Nasarenach.

6 Neach mar an ceudna a thogair an teampull a shalachadh; agus a ghlac sinne, agus b' àill leinn breth a thoirt air a réir ar lagha féin:

7 Ach air teachd do Lisias an t-àrd-cheannard oirnn, thug e le mòr-ainneart as ar làmbaibh e.

8 Ag àithneadh d'a luchd-casaid teachd a d' ionnsuidh-sa; neach o'm feud thu le a cheasnachadh, fios fhaotainn air na h-uile nithibh a tha sinne a' cur as a leth.

9 Agus dh'aontaich na h-Iudhaich mar an ceudna, ag ràdh, Gu'n robh na nithe sin mar sin.

10 An sin air do'n uachdaran smèideadh air Pòl e a labhairt, fhreagair esan, Is mòid mo mhisneach gu freagairt air mo shon féin, gu bheil fhios agam gu robh thusa rè mòrain bhliadhna a' d' bhrèitheamh air a' chinneach so:

11 Oir feudaidh tu fios fhaot-

ainn, nach mò na dà là dheug o chaidh mi suas gu Ierusalem a dhèanamh aoraidh.

12 Agus cha d' fhuair iad mi a' deasboireachd ri aon neach san teampull, no a' brosnuchadh an t-sluaigh *gu ceannaire*, aon chuid sna sionagogaibh, no anns a' bhaile.

13 Ni mò is urrainn iad na nithe sin a dhearbhadh a tha iad a' cur as mo leth.

14 Ach tha mi ag aideachadh so dhuitse, gur ann a réir na slighe sin ris an abair iadsan saobh-chreidimh, a ta mise a' dèanamh aoraidh do Dhia m'-aithriche, a' creidsinn nan uile nithe a ta sgrìobhta san lagh agus anns na fàidhibh :

15 Agus a ta dòchas agam an Dia, ris am bheil sùil mar an ceudna aca féin, gu'n tigaiseirigh nam marbh, nam firean araon agus nan neo-fhìrean.

16 Agus an so tha mi a' saothreachadh a ghnàth coguis neo-lochdach a bhi agam a thaobh Dhé, agus a thaobh dhaoine.

17 A nis an déigh mòrain bhliadhna, thàinig mi a thoirt déirce chum mo chinnich, agus thabhartas.

18 Air a so fhuair Iudhaich àraidh o'n Asia mi air mo ghlanadh san teampull, gun sluagh, agus gun bhuaireas.

19 Muinntir d'am bu chòir bhi'n so a' d' làthair-sa, agus m'-agairt, nam biodh ni sam bith aca a' m' aghaidh.

20 No abradh iad so féin, ma fhuair iad eucoir sam bith annam-sa, 'nuair a sheas mi an làthair na comhairle ;

21 Mur ann a mhàin air son an aoin fhocail so, a ghlaodh mi a' m' sheasamh 'nam measg, Gur ann air son aiseirigh nam marbh, a ta mi air mo thoirt gu breitheanas leibhse an diugh.

22 Agus an uair a chuala Felics na nithe so, air dha eòlas ni bu dìongmhalta bhi aige air an t-slighe sin, chuir e air dàil iad, ag ràdh, 'nuair a thig Liasias an t-àrd-cheannard a nuas, làn-rannsaichidh mi bhur cùis.

23 Agus dh' àithn e do cheannard-ceud Pòl a ghléidheadh, agus e bhi fuasgailte aige, agus gun neach d' a mhuinntir féin a bhacadh o fhrithealadh dha, no teachd d' a ionnsuidh.

24 Agus an déigh làithean àraidh, 'nuair a thàinig Felics maille r' a mhnaoi Drusilla, a bha 'na Ban-Iudhach, chuir e fios air Pòl, agus dh' éisd e ris mu thimchioll a' chreidimh ann an Crìosd.

25 Agus air dhasan bhi a' reusonachadh mu fhìreantachd, stuaim, agus breitheanas ri teachd, ghabh Felics eagal mòr, agus fhreagair e, Imich romhad an tràth so ; 'nuair a bhios ùine agam, cuiridh mi fios ort.

26 Bha dùil aige mar an ceudna gu rachadh airgid a thoirt da le Pòl, chum gu'm fuasgladh se e : uime sin chuir e fios air ni bu trice, agus labhair e ris.

27 Ach air do dhà bhliadhna bhi air an coimhlìonadh, thàinig Porcius Festus an àit Fhelics : agus air do Fhelics bhi toileach comain a chur air na h-Iudhaich, dh' fhàg e Pòl ceangailte.

CAIB. XXV.

A NIS 'nuair a thàinig Festus do'n mhòr-roinn, an ceann trì làithean chaidh e suas o Chesarea gu Ierusalem.

2 Agus nochd an t-àrd-shagart agus maithean nan Iudhach iad féin 'na làthair an aghaidh Phòil, agus chuir iad impidh air,

3 Ag iarraidh fàbhoir 'na aghaidh, gu'n cuireadh e fios air gu Ierusalem, agus iad a dhèan-

amh feall-fholach chum esan a mharbhadh air an t-slighe.

4 Ach fhreagair Festus, Gu'm bu chòir Pòl a ghléidheadh ann an Cesarea, agus gu'n rachadh e féin *an sin* gu h-aithghearr.

5 Uime sin, ars' esan, rachadh iadsan 'nur measg a dh'fheudas, sìos maille rium-sa, agus ma ta coire air bith san duine so, cuireadh iad sin as a leth.

6 Agus air dha fantuinn 'nam measg os ceann deich làithean, chaidh e sìos do Chesarea; agus air an là maireach shuidh e air a' chaithir-bhreitheanais, agus dh'àithn e Pòl a thoirt a làthair.

7 Agus an uair a thàinig esan, sheas na h-Iudhaich a thàinig a nuas o Ierusalem m'a thimchioll, a' cur choireanna lìonmhor agus mòra á leth Phòil, nach b'urrainn iad a dhearbhadh:

8 'Nuair a fhreagair esan 'ga shaoradh féin, Cha d' rinn mi cionta sam bith an aghaidh lagha nan Iudhach, no 'n aghaidh an teampuill, no 'n aghaidh Cheasair.

9 Ach air bhi do Fhestus togarrach air toileachas-inntinn a' thoirt do na h-Iudhaich, fhreagair e Pòl, agus thubhairt e, An àill leatsa dol suas gu Ierusalem, agus an sin dol fo bhreitheanas thaobh nan nithe sin ann mo làthair-sa?

10 An sin thubhairt Pòl, Tha mi m' sheasamh aig caithir-breitheanais Cheasair, far an còir breth a thoirt orm: air na h-Iudhaich cha d' rinn mi eucoir sam bith, mar is maith a ta fios agadsa.

11 Oir ma tha mi dèanamh eucoir, agus ma rinn mi ni sam bith a thoill bàs, cha 'n 'eil mi diùltadh bàs fhulang: ach mur 'eil ni sam bith dhiubh sin *fior* a tha iad so a' cur as mo leth, cha 'n fheud duine sam bith mo

thoirt thairis doibh. Tha mi togail mo chùis gu Ceasar.

12 An sin an déigh do Fhestus labhairt ris a' chomhairle, fhreagair e, An do thog thu do chùis gu Ceasar? gu Ceasar theid thu.

13 Air dol do làithibh àraidh seachad, thàinig Agripa an rìgh agus Bernice gu Cesarea a chur fàilte air Festus.

14 Agus air dhoibh mòran làithean a chaitheadh an sin, chuir Festus cùis Phòil an céill do 'n rìgh, ag ràdh, Dh' fhàgadh duine àraidh le Felics 'na phrìosnach.

15 Air-san, an uair a bha mise ann an Ierusalem, rinn na h-àrd-shagairt agus seanairean nan Iudhach casaid *rium*, ag iarraidh binne 'na aghaidh.

16 D'an d' thug mise am freagradh so, Cha 'n e gnàth nan Romhanach duine sam bith a thoirt thairis chum bàis, gus am bi aig an neach a tha air agairt, a luchd-casaid aghaidh ri h-aghaidh, agus gu'm bi cothrom aige air e féin a shaoradh o 'n choire e cuireadh as a leth.

17 Uime sin an uair a thàinig iad araon an so, gun mhoille sam bith shuidh mi air an là maireach sa' chaithir-bhreitheanais, agus dh' àithn mi 'n duine a thoirt a làthair.

18 Agus an uair a sheas a luchd-casaid m'a thimchioll, cha do chuir iad coire air bith as a leth do na nithibh a shaoil mise:

19 Ach thug iad ceisdean àraidh 'na aghaidh mu thimchioll an creidimh féin, agus mu thimchioll Iosa àraidh, a fhuair bàs, neach a thubhairt Pòl a bhi beò.

20 Agus a chionn gu robh mise amharusach mu thimchioll an leithid sin do cheisdibh, dh' fheòraich mi dheth am b' àill leis dol suas gu Ierusalem, agus

an sin dol fo bhreitheanas mu na nithibh so.

21 Ach an uair a dh'iarr Pòl a choimhead gus am fiosraichteadh a chùis-san le Augustus, dh'àithn mi e bhi air a ghléidheadh gus an cuirinn gu Ceasar e.

22 An sin thubhairt Agripa ri Festus, B' àill leamsa féin an duine so chluinntinn. Am màireach, thubhairt esan, cluinnidh tu e.

23 Uime sin air an là màireach, 'nuair a thàinig Agripa, agus Bernice, le mòr-ghreadhnachas, agus a chaidh iad a steach maille ris na h-àrd-cheannard-aibh agus prìomh-dhaoinibh na caithreach do'n ionad éisdeachd, air do Fhestus àithne a thoirt, thugadh Pòl a làthair.

24 Agus thubhairt Festus, A rìgh Agripa, agus sibhse a dhaoine uile a ta làthair an so maille ruinn, tha sibh a' faicinn an duine so, mu'n do chuir sluagh nan Iudhach uile impidh ormsa, araon ann an Ierusalem, agus an so, a' glaodhaich nach bu chòir e bhi ni b' fhaide beò.

25 Ach an uair a thuig mise nach d' rinn e ni sam bith a thoill bàs agus a chionn gu'n do thog e féin a chùis gu Augustus, shònraich mi a chur d'a ionnsuidh.

26 Mu nach 'eil ni sam bith cinnteach agam r' a sgrìobhadh chum mo Thighearn. Uime sin thug mi mach e do 'ur n-ionnsuidh-sa, agus gu h-àraidh a d' ionnsuidh-sa, a rìgh Agripa, chum an déigh rannsachadh a dhèanamh, gu'm biodh agam ni éigin r' a sgrìobhadh.

27 Oir is mì-reusonta a' m' bheachd-sa prìosanach a chur uam, agus gun na cùisean a ta 'na aghaidh ainmeachadh.

CAIB. XXVI.

AN sin thubhairt Agripa ri Pòl, Tha cead agad labhairt air do shon féin. An sin shìn Pòl a mach a làmh, agus fhreagair e air a shon féin,

2 A ta mi 'gam mheas féin sona, a rìgh Agripa, do bhrìgh gu bheil mi gu freagairt air mo shon féin an diugh a' d' làthair-sa, thaobh nan nithe sin uile a ta air an cur as mo leth leis na h-Iudhaich.

3 Gu h-àraidh, a chionn gu bheil thusa eòlach air gach gnàth agus ceisd a tha am measg nan Iudhach: uime sin guidheam ort, éisd rium gu foighidneach.

4 Tha mo bheatha-sa o m'-òige, a chaitheadh air tùs am measg mo chinnich féin ann an Ierusalem, aithnichte do na h-Iudhaich uile;

5 D' am b' aithne mi o thùs, (nam b' àill leo fianuis a dhèanamh,) gu'n do chaith mi mo bheatha a'm' Phairiseach, a réir an luchd comh-bharail a's teinne d' ar creidimh-ne.

6 Agus a nis tha mi m' sheasamh fo bhreitheanas air son dòchais a' gheallaidh a rinneadh le Dia d' ar n-aithrichibh:

7 Chum am bheil dùil aig ar dà thréibh dheug-ne teachd, a' dèanamh seirbhis do *Dhia* a là agus a dh' oidhche do ghnàth; agus air son an dòchais so tha mise, a rìgh Agripa, air m' agairt leis na h-Iudhaich.

8 C' ar son a mheasar leibhse mar ni do-chreidsinn, gu'n dùisgeadh Dia na mairbh?

9 Gu deimhin mheas mise annam féin, gu'm bu chòirdhomh mòran nithe a dhèanamh an aghaidh ainme Iosa o Nasaret.

10 Ni mar an ceudna a rinn mi ann an Ierusalem: agus air faotainn ùghdarrais o na h-àrd-shagartaibh, dhruid mi mòran do

na naoimh am prìosanaibh ; agus an uair a chuireadh gu bàs iad, thug mi mo ghuth 'nan aghaidh.

11 Agus a' dèanamh peanais orra gu minic anns gach sion-agog, cho-éignich mi *iad* gu toibheum a labhairt ; agus air dhomh bhi gu ro mhòr air bhoile 'nan aghaidh, rinn mi geur-leanmhuinn *orra*, eadhon gu bailtibh coigreach.

12 Air a so 'nuair a bha mi dol gu Damascus, le cumhachd agus barantas o na h-àrd-shagartaibh ;

13 Mu mheadhon-là, O a rìgh, chunnaic mi air an t-slighe solus o nèamh, bu shoilleire na solus na gréine, a' dealrachadh mu'n cuirt orm, agus orra-san a bha 'g imeachd maille rium.

14 Agus an uair a thuit sinn uile air an talamh, chuala mi guth a' labhairt rium, agus ag ràdh anns a' chainnt Eabhruidhich, A Shaul, a Shaul, c' ar son a ta thu ga m' gheur-leanmhuinn ? *Is* cruaidh dhuitse bhi breabadh an aghaidh nan dealg.

15 Agus thubhairt mise, Cò thu, a Thighearn ? Agus thubhairt esan, *Is* mise Iosa a ta thusa a' geur-leanmhuinn.

16 Ach éirich, agus seas air do chosaibh ; oir dh'fhoillsich mi mi féin duit chum na crìche so, gu'n òrduichinn thu a' d' mhinisteir agus a' d' fhianuis araon air na nithibh a chunnaic thu, agus air na nithibh anns am foillsich mi mi féin duit ;

17 Ga d' shaoradh o'n t-sluagh agus o na Ciunich, chum am bheil mi nis ga d' chur,

18 A dh' fhosgladh an sùl, chum gu tionndaidh iad o dhorchadas gu solus, agus o chumhachd Shatain gu Dia, chum gu faigh iad maitheanas pheacanna, agus oighreachd maille ris a' mhuinntir sin a ta

air an naomhachadh tre'n chreidimh a ta annam-sa.

19 Uime sin, a rìgh Agripa, cha robh mi eas-ùmhail do'n taisbean nèamhaidh :

20 Ach shearmonaich mi air tùs dhoibh-san ann an Damascus, agus ann an Ierusalem, agus air feadh tìre Iudea uile, agus *an sin* do na Cinnich, iad a dhèanamh aithreachais agus pilltiun ri Dia, a' dèanamh oibre iomchuidh an aithreachais.

21 Air son nan nithe so ghlac na h-Iudhaich mi san teampull, agus b' àill leo mo mharbhadh.

22 Uime sin air dhomh còmh-nadh fhaotainn o Dhia, bhuan-aich mi gus an là'n diugh, a' dèanamh fianuis do'n bheag agus do'n mhòr, gun ni air bith a' labhairt ach na nithe sin a thubhairt na fàidhean agus Maois a bha gu teachd ;

23 Gu robh Crìosd gu fulang, agus gu robh e gu éirigh an ceud neach o na marbhaibh, agus gu'm foillsicheadh e solus do'n phobull, agus do na Cinnich.

24 Agus air dha bhi labhairt nan nithe so air a shon féin, thubhairt Festus le guth àrd, Tha thu air mhi-chéill a Phòil : tha mòr-fhòghlum ga d' chur air bhoile.

25 Ach thubhairt esan, Cha 'n 'eil mi air bhoile, Fhestuis ro òirdheirc ; ach tha mi a' labhairt bhriathra na firinn agus na céille.

26 Oir a ta fhios aig an rìgh roimh am bheil mise a' labhairt gu saor, air na nithibh so : oir tha cinnt agam nach 'eil a h-aon do na nithibh so an ain-fhios da ; oir cha'n ann an cùil a rinneadh so.

27 Am bheil thu creidsinn nam fàidhean, a rìgh Agripa ? tha fhios agam gu bheil thu 'g *an* creidsinn.

28 An sin thubhairt Agripa ri Pòl, Is beag nach 'eil thu gam aomadh gu' bhi am Chrìosduidh.

29 Agus thubhairt Pòl, B' e mo ghuidhe air Dia, gu'm biodh cha'n e mhàin thusa, ach mar an ceudna iadsan uile a tha 'g éisdeachd rium an diugh, ann am beag agus am mòr, mar a ta mise, saor o na geimhlibh so.

30 Agus air dha na briathra so a labhairt, dh' éirich an rìgh, agus an t-uachdaran, agus Bernice, agus an dream a shuidh maille riu:

31 Agus an uair a chaidh iad a leth-taobh, labhair iad r'a chéile, ag ràdh, Cha 'n 'eil an duine so a' dèanamh ni air bith toillteannach air bàs, no air geimhlibh.

32 An sin thubhairt Agripa ri Festus, Dh' fheudtadh an duine so a leigeadh as, mur bhiodh gu 'n do thog e a chùis gu Ceasar.

CAIB. XXVII.

AGUS an uair a thugadh breth sinne a sheòladh do'n Eadailt, thug iad Pòl thairis maille ri prìosanaich àraidh eile, do cheannard-ceud d'am b' ainm Iulius, do chuideachd Augustuis.

2 Agus air dhuinn dol air luing le Adramitium, thog sinn ar seòil, a' cur romhainn seòladh seachad air crìochaibh na h-Asia, air do Aristarchus Macedonach o Thesalonica bhi maille ruinn.

3 Agus air an là màireach, thàinig sinn gu Sidon. Agus air do Iulius buntainn gu suairce ri Pòl, leig e dha dol a dh' ionnsuidh a chàirde chum comhfhurtachd fhaotainn.

4 Agus air dhuinn stiùradh as a sin, sheòl sinn fo Chiprus, a chionn gu robh na gaotha 'nar n-aghaidh.

5 Agus an uair a sheòl sinn

troimh'n fhairge ta làimh ri Cìlicia agus Pamphilia, thàinig sinn gu Mira baile do Lìcia.

6 Agus fhuair an ceannard-ceud long an sin o Alecsandria, a bha seòladh do'n Eadailt, agus chuir e sinn a steach innte.

7 Agus an uair a sheòl sinn gu mall rè mòrain do làithibh, agus a thàinig sinn air éigin fa chomhair Chniduis, a chionn nach do leig a' ghaoth leinn, sheòl sinn fo Chrete, fa chomhair Shalmone;

8 Agus air dhuinn seòladh air éigin seachad air, thàinig sinn gu ionad àraidh ris an abrar, Na calaidh sgiamhach, am fagus d' an robh baile Lasea.

9 Agus air do mhòran ùine dol seachad, 'nuair a bha seòladair-eachd a nis cunnartach, a chionn gu 'n deachaidh an trasgadh cheana seachad, chomhairlich Pòl iad,

10 Ag ràdh riu, Fheara, tha mi faicinn gu'm bì an t-seòladaireachd so le dochann agus call mòr, cha'n e mhàin do'n luchd agus do'n luing, ach d' ar n-anamaibh féin.

11 Gidheadh, is mò chreid an ceannard-ceud am maighstir agus sealbhadair na luinge, na na nithe a labhradh le Pòl.

12 Agus a chionn gu'n robh an caladh neo-iomchuidh gus an geamhradh a chaitheadh ann, b'i comhairle na cuid bu mhò seòladh as a sin mar an ceudna, agus nam feudadh iad air chor sam bith teachd gu Phenice, caladh do Chrete a ta 'g amharc chum an iar-dheas, agus an iar-thuath, agus fantuinn rè a' gheamhraidh an sin.

13 Agus an uair a shéid a' ghaoth á deas gu ciuin, shaoil iad gu d' fhuair iad an rùn, agus ag togail an seòl dhoibh, stiuir iad ri taobh Chrete.

14 Ach an ceann beagain 'na dhéigh sin, shéid gaoth anrathach 'na h-aghaidh, ris an abrar Euroclidon.

15 Agus air bhi do 'n luing air a fuadachadh, agus gun chomas d'i dol an aghaidh na gaoithe, leig sinn ruith dh' i.

16 Agus air dhuinn ruith a stigh fuidh eilean beag àraidh d'am b' ainm Claudia, is ann le éigin a ràinig sinn air a' bhàta :

17 Agus air dhoibh a thogail suas, ghnàthaich iad gach gleus còmhnaidh, a' criosadh na luinge fuipe; agus air dhoibh bhi fo eagal gu 'n tuiteadh iad sa' bheòghaineimh, leig iad an seòil sìos, agus mar sin dh' iomaineadh iad.

18 Agus air dhuinne bhi gu ro-mhòr air ar luasgadh leis an doininn, air an là 'na dhéigh sin thilg iad a mach *an luchd* ;

19 Agus air an treas là thilg sinn le ar làmhaidh féin a mach acfuiinn na luinge.

20 Agus an uair nach robh a' ghrian no na reulta r'am faicinn rè mòrain do làithibh, agus a luidh doinionn nach bu bheag oirnn, thugadh an sin uainn gach uile dhòchas gu teasairgteadh sinn.

21 Ach air dhuinn bhi fada 'nar trasg, an sin air seasamh do Phòl 'nam meadhon, thubhairt e, Fheara, bu chòir dhuibh mo chomhairle-sa ghabhail, agus gun fhuasgladh o Chrete, agus an dochann agus an call so a sheachnadh.

22 Agus a nis guidheam oirbh, biodh misneach mhaith agaibh : oir cha bhi call anama sam bith 'nur measg, ach a *mhàin* na luinge.

23 Oir air an oidhche nochd sheas làimh rium-sa aingeal an Dé sin, d'am buin mi, agus d'am bheil mi dèanamh seirbhis,

24 Ag ràdh, A Phòil, na biodh

eagal ort ; is éigin duit bhi air do thoirt an làthair Cheasair : agus, feuch, thiodhlaic Dia dhuit iadsan uile a ta seòladh maille riut.

25 Uime sin, fheara, biodh agaibh deadh mhisneach : oir a ta mi creidsinn Dhé, gu 'n tach-air ceart mar a labhradh rium.

26 Ach is éigin duinn bhi air ar tilgeadh air eilean àraidh.

27 Agus an uair a bha an ceathramh oidhche deug air teachd, air dhuinne bhi air ar séideadh null agus a nall ann an *cuan* Adria, mu mheadhon-oidhche b'i barail nam maraichean gu robh iad am fagus do thìr éigin :

28 Agus air leigeadh na luaidhe sìos doibh, fhuair iad *an doimhne* fichead aitheamh ; agus an uair a chaidh iad beagan air an aghaidh, leig iad sìos an luaidh a ris, agus fhuair iad i 'na cùig aitheamh deug.

29 An sin air dhoibh bhi fo eagal gu'm buaileadh iad air ionadaibh garbha, thilg iad ceithir acraichean á deireadh na luinge, agus ghuidh iad an là a theachd.

30 Agus an uair a bha na maraichean air ti teicheadh a mach as an luing, agus a leig iad sìos am bàta do 'n fhairge, a' gabhail orra bhi tilgeadh a mach acraichean á toiseach na luinge,

31 Thubhairt Pòl ris a' cheannard-ceud, agus ris na saighdearaibh, Mur fan iad sin san luing, cha 'n 'eil e'n comas duibh bhi air bhur teasairginn.

32 An sin gheàrr na saighdearan cùird a' bhàta, agus leig iad leis tuiteam sìos.

33 Agus am feadh a bha an là a' teachd, thug Pòl a chomhairle orra uile biadh a ghabhail, ag ràdh, Is e so an ceathramh là deug dhuibh a' feitheamh, ag-

us a' fantuinn 'nur trasg, gun bhiadh sam bith a ghabhail.

34 Uime sin guidheam oirbh biadh a ghabhail; oir a ta so chum bhur slàinte: oir cha chaillear fuiltean á ceann a haon agaibh.

35 Agus air dha na nithe so a labhairt, agus aran a ghlacadh, thug e buidheachas do Dhia 'nan làthair uile; agus air dha a bhriseadh, thòisich e ri itheadh.

36 An sin ghlac iad uile deadh mhisneach, agus ghabh iad biadh mar an ceudna.

37 Agus bha sinn a dh' anamaibh uile anns an luing, dà cheud agus sè deug agus trì fichead.

38 Agus an uair a shàsuicheadh iad le biadh, dh' eutrom-aich iad an long, agus thilg iad a mach an cruithneachd san fhairge.

39 Agus an uair a bha 'n là air teachd, cha d' aithnich iad am fearann: ach thug iad an aire do lùib àraidh aig an robh tràigh, auns an robh mhiann orra, nam b' urrainn iad, an long a chur gu tìr.

40 Agus air togail nan acraichean doibh, leig iad ris an fhairge i, agus an uair a dh' fhuasgail iad ceanglaichean na stiùire, agus a thog iad am prìomh sheòl ris a' ghaoith, sheòl iad chum na tràighe.

41 Agus air tuiteam dhoibh ann an ionad àraidh far an do choinnich dà fhairge a chéile, bhuaill iad an long air grund; agus air sàthadh d'a toiseach sa' ghrund, dh' fhan e gun charachadh, ach bhriseadh a deir-eadh le ainneart nan tonn.

42 Agus b' i comhairle nan saighdearan gu marbhadh iad na prìosanaich, air eagal gu'n snàmbadh neach sam bith dhiubh a mach, agus gu rachadh iad as.

43 Ach air do 'n cheannard-ceud bhi toileach Pòl a theas-airginn, chum e air ais o'n comhairle iad, agus dh' àithn e dhoibhsan d'am b' aithne snàmh iad féin a thilgeadh sa' chuan air tùs, agus dol a mach air tìr:

44 Agus do chàch dh' àithn e, cuid diubh dhol air clàraibh, agus cuid eile air mùribh briste do'n luing: agus mar sin thàrladh gu'n deachaidh iad uile tèaruinte gu tìr.

CAIB. XXVIII.

A GUS an uair a thèarnadh iad, thuig iad an sin gu'm b'e Melita ainm an eilein.

2 Agus nochd an sluagh borb caoimhneas nach bu bheag dhuinn: oir air fadadh teine dhoibh, ghabh iad ruinn uile, air son an uisge a bha ann, agus air son an fhuachd.

3 Agus air do Phòl dorlach bhioran a thional, agus an cur air an teine, thàinig nathair nimhe mach as an teas, agus shàs i 'na làimh.

4 Agus an uair a chunnaic an sluagh borb a' bhéisd an crochadh r' a làimh, thubhairt iad r' a chéile, Gu cinnteach is mortair an duine so. do nach fuiling dìoghaltas bhi beò, ge do theasairgeadh o'n fhairge e.

5 Agus air dhasan a' bhéisd a chrathath dheth anns an teine, cha d' fhulaing e dochann sam bith.

6 Ach bha iadsan a' feitheamh c' uin' a dh' atadh e, no a thuit-eadh e sìos marbh gu h-obann: ach an uair a dh' fheith iad ùine fhada, agus nach fac iad dochann sam bith a' teachd air, chaochail iad an inntinn, agus thubhairt iad gur Dia e.

7 Agus bha mu thimchioll an àite sin fearann aig prìomh dhuine an eilein, d'am b' ainm

Publius, a ghabh ruinne agus a thug rè thrì làithean aoidheachd dhuinn gu càirdeil.

8 Agus thàrladh gu robh athair Phubliuis 'na luidhe gu tinn le fiabhrus, agus gearrthach fola: air do Phòl dol a steach d'a ionnsuidh, rinn e ùrnuigh, agus air dha a làmhan a chur air, leigheas se e.

9 Agus an uair a rinneadh so, thàinig mar an ceudna muinntir eile a bha euslan san eilean d'a ionnsuidh, agus leighiseadh iad:

10 Muinntir mar an ceudna a thug mòr-urram dhuinn; agus an uair a dh'fhalbh sinn, chuir iad na nithe sin leinn a bha feumail *duinn*.

11 Agus an déigh thrì mìosa sheòl sinn ann an luing o Alecsandria, a chaith an geamhradh san eilean, d'am bu shuaitheantas Castor agus Pollux.

12 Agus an uair a chaidh sinn air tìr aig Siracuse, dh'fhan sinn *an sin* trì làithean.

13 Agus air seòladh dhuinn timchioll as a sin, thàinig sinn gu Regium: agus an ceann là 'na dhéigh sin shéid a' ghaoth á deas, agus thàinig sinn an t-ath là gu Puteoli:

14 Air dhuinn bràithrean fhaotainn an sin, chuireadh impidh oirnn *leo* fantuinn seachd làithean maille riu: agus mar sin thriall sinn chum na Ròimhe.

15 Agus as a sin, air faotainn ar sgéil do na bràithribh, thàinig iad 'nar coinneamh gu Apii-forum, agus na Trì tighibh-òsda; agus an uair a chunnaic Pòl iad, thug e buidheachas do Dhia, agus ghabh e misneach.

16 Agus an uair a thàinig sinn do 'n Ròimh, thug an ceannard-ceud thairis na prìosanaich do cheannard an fhreiceadain: ach thugadh comas do Phòl a bhi leis

féin, maille ri *aon* saighdear a bha 'ga ghléidheadh.

17 Agus thàrladh, an déigh thrì làithean, gu'n do ghairm Pòl maithean nan Iudhach an ceann a chéile. Agus an uair a chruinn-icheadh iad, thubhairt e riu, Fheara *agus* a bhràithre, ged nach d' rinn mise ni sam bith an aghaidh a' phobuill no ghnàth-anna nan aithriche, thugadh thairis mi a'm' phrìosanach o Ierusalem do làmbaibh nan Ròmhanaich.

18 Muinntir an déigh dhoibh mo cheasnachadh, leis am bu mhiann mo leigeadh as, a chionn nach robh coire bàis sam bith annam.

19 Ach an uair a bha na h-Iudhaich a' labhairt an aghaidh *so*, b' éigin domh mò chùis a thogail gu Ceasar; cha'n e gu bheil coire sam bith agam r'a chur á leth mo chiunnich.

20 Air an aobhar so uime sin chuir mi fios oirbhse, chum gu faicinn *sibh*, agus gu'n labhrainn *ribh*: oir is ann air son dòchais Israeil a ta mi ceangailte leis an t-slabhraidh so.

21 Agus thubhairt iadsan ris, Cha d' fhuair sinne litriche sam bith á Iudea mu d' thimchioll, cha mhò a dh' fhoillsich no dh'innis aon do na bràithribh a thàinig, olc sam bith umad.

22 Ach bu mhaith leinn a chluinntinn uaitse ciod i do bharrail: oir mu thimchioll na gnè-chreidimh so, tha fhios againn gu'n labhrar sgach àit 'na h-aghaidh.

23 Agus air suidheachadh là ris, thàinig mòran d'a ionnsuidh chum a cheithreanna; d'an do mhìnich e rioghachd Dhé, a' dèanamh fianuis uimpe, agus a' cur impidh orra thaobh nan nithe a bhuineas do Iosa, araon á lagh Mhaois, agus *as* na

fàidhibh, o mhoch-thrath gu feasgar.

24 Agus chreid cuid na nithe a labhradh, agus cha do chreid cuid eile dhuibh.

25 Agus air dhoibh bhi an aghaidh a chéile, sgaoil iad, air do Phòl aon fhocal a ràdh, Is maith a labhair an Spiorad naomh tre'n fhàidh Esaias, r' ar n-aithrichibh,

26 Ag ràdh, Imich chum a' phobuill so, agus abair, Le cluinntinn cluinidh sibh, agus cha tuig sibh; agus le faicinn chì sibh, agus cha'n aithnich sibh.

27 Oir a ta cridhe a' phobuill so air fàs reamhar, agus tha iad a' cluinntinn gu tròm le'n cluas-aibh, agus chaog iad an sùilean; air eagal gu faiceadh iad le'n sùilibh, agus gu'n cluinneadh iad

le'n cluas-aibh, agus gu'n tuigeadh iad le'n cridhe, agus gu'm pill-eadh iad, agus gu'n slànuichinn-sa iad.

28 Uime sin biodh fhios agaibh-sa, gu'n do chuireadh slàinte Dhé chum nan Cinneach, agus éisdidh iadsan.

29 Agus an uair a thubhairt e na briathra so, dh'imich na h-Iudhaich rompa, agus bha mòr-reusonachadh aca eatorra féin.

30 Agus dh'fhan Pòl dà bhliadhna iomlan 'na thigh-màil féin, agus ghabh e ris na h-uile dhaoineibh a thàinig d'a ionn-suidh.

31 A'searmonachadh rìoghachd Dhé, agus a' teagasg nan nithe a bhuineas do'n Tighearn Iosa Crìosd, leis an uile dhànachd, gun toirmeasg.

LITIR AN ABSTOIL PHOIL CHUM NAN ROMHANACH.

CAIB. I.

P**O**L, seirbhiseach Iosa Crìosd, a ghairmeadh 'na abstol, a chuireadh air leth chum Soisgeil Dé,

2 (A roimh-gheall e le 'fhàidh-ibh féin anns na sgrìobtuiribh naomha.)

3 Mu thimchioll a Mhic Iosa Crìosd ar Tighearn, a rinneadh do shìol Dhaibhidh, a réir na feòla;

4 A dhearbhadh *bhi* 'na Mhac do Dhia le cumhachd, a réir Spioraid na naomhachd, tre aiseirigh o na marbhaibh:

5 Tre an d'fhuair sinne gràs agus abstolachd chum ùmhachd a' chreidimh am measg nan uile chinneach air sgàth 'ainme-san:

6 Am mea-g am bheil sibhse mar an ceudna air bhur gairm le Iosa Crìosd:

7 Chum nan uile a ta san Ròimh, air an gràdhachadh le Dia, air an gairm 'nan naoimh: Gràs *gu robh* dhuibhse, agus sìth o Dhia ar n-Athair, agus o'n Tighearn Iosa Crìosd.

8 Air tùs, tha mi toirt buidh-eachais do m' Dhia tre Iosa Crìosd, air bhur son-sa uile, do bhrìgh gu bheil bhur creid-imh iomraideach air feadh an domhain gu léir.

9 Oir is e Dia m' fhianuis, d' am bheil mi a' dèanamh seirbhis le m' spiorad ann an soisgeul a Mhic, gu bheil mi gun sgar a' dèanamh luaidh oirbh,

10 A ghnàth a' guidhe ann am ùrnuighibh, (nam feudainn a nis fa-dheoidh air aon chor le toil Dé turus soirbheasach fhaotainn,) ri teachd do 'ur n-ionnsuidh-sa.

11 Oir a ta deidh agam air sibhse fhaicinn, ionnus gu pàirt-ich mi tiodhlac àraidh spioradail ribh, chum bhur neartachadh ;

12 Sin ri ràdh, chum gu faigh mi comhfhurtachd annaibh-sa, tre chreidimh a chéile, bhur creidimh-sa, agus mo chreidimh-sa.

13 Agus cha'n àill leam, a bhràithre, e bhi 'n ain-fhios duibhse gu 'n do chuir mi romham gu minic teachd do 'ur n-ionnsuidh, (ach bhacadh mi gus a so,) chum gu faighinn toradh éigin 'nur measg-sa fòs, mar am measg nan Cinneach eile.

14 Oir a ta mi fo fhiachaibh araon do na Greugaich, agus do na daoineibh borba, araon dhoibhsan a ta glic, agus dhoibhsan a ta neo-ghlic.

15 Uime sin, mbeud 's a ta an comas domh, tha mi ullamh chum an soisgeul a shearmonachadh dhuibhse mar an ceudna a ta san Ròimh.

16 Oir cha nàr leam-sa soisgeul Chrìosd : oir is e cumhachd Dhée chum slàinte do gach neach a chreideas, do 'n Iudhach air tùs, agus mar an ceudna do 'n Ghreugach.

17 Oir a ta fireantachd Dhé air a' foillseachadh ann tre chreidimh gu creidimh : mar a ta e sgriobhta, Bithidh am firean beò tre chreidimh.

18 Oir a ta fearg Dhé air a foillseachadh o nèamh an aghaidh gach uile mhì-dhiadhaidheachd, agus eucoir dhaoine, a tha bacadh na firinn ann an neo-fhìreantachd :

19 Do bhrìgh gu bheil an ni air am feudar fios fhaotainn a thaobh Dhé follaiseach annsan ; oir rinn Dia follaiseach dhoibh e.

20 Oir *riamh* o chruthachadh an t-saoghail a ta a nithe-san

nach feudar fhaicinn, *eadhon* a chumhachd sìorruidh agus a Dhiadhachd, air am faicinn gu soilleir, air dhoibh bhi so-thuigsinn o na nithibh a rinneadh ; chum gu biodh iad gun leithsgeul aca :

21 Do bhrìgh 'nuair a b' aithne dhoibh Dia, nach d' thug iad glòir dha mar Dhia, agus nach robh iad taingeil, ach gu 'n d'fhàs iad dìomhain 'nan reusonachadh féin, agus gu 'n do dhorchaicheadh an cridhe amaid-each.

22 Ag ràdh gur daoine glìce iad féin, rinneadh amadain duibh :

23 Agus chaochail iad glòir an Dé neo-thruaillidh gu dealbh a rinneadh cosmhuil ri duine truailidh, agus ri eunlaith, agus ainmhidhibh ceithir-chosach, agus bhéisdibh snàigeach.

24 Uime sin thug Dia thairis iad mar an ceudna, tre anamiannaibh an cridhe féin, chum neòghloine, a thoirt eas-urraim d' an corpaibh féin eatorra féin :

25 Muinntir a chaochail fìrinn Dé gu bréig, agus a thug aoradh agus a rinn seirbhis do 'n chreutair ni 's mò na do 'n Chruithear, a ta beannaichte gu sìorruidh. Amen.

26 Air a shon so thug Dia thairis iad do ana-miannaibh gràineil : oir chaochail eadhon am mnà an gnàthachadh nàdurra chum a' ghnàtha a ta an aghaidh nàduir :

27 Agus mar an ceudna na fir, air tréigsinn doibh gnàthachadh nàdurra na mnà, loisgeadh iad le 'n togradh d' a chéile, fìrionnaich ri fìrionnaich ag oibreachadh gràineileachd agus iad a' faotainn diol-thuarasdail an seacharain anna féin, mar bu chòir.

28 Agus amhuil mar nach bu taitneach leo eòlas Dé a chumail,

thug Dia thairis iad do inntinn mhì-chéillidh, a dhèanamh nithe nach robh iomchuidh :

29 Air dhoibh bhi air an lìonadh do'n uile eucoir, strìopachas, olc, shannt, mhì-run : làn do fharmaid, do mhortadh, do chonnsachadh, do cheilg, do dhroch-bheusaibh ; 'nan luchd-cogarsaich,

30 'Nan luchd-anacainnt, 'nan luchd-fuath air Dia, 'nan luchd-tarcuis, uaibhreach, 'nan luchd-ràiteachais, 'nan luchd-cumadh uile, eas-ùmhail do phàrantaibh.

31 Eu-céillidh, 'nan luchd-brisidh coimhcheangail, gun ghràdh nàdurra, do-rèiteachaidh, neo-thruacanta :

32 Muinntir d'an aithne ceartas Dé, (gu bheil iadsan a ni an leithide sin do nithibh toillteannach air bàs.) *gidheadh* cha'n e mhàin gu bheil iad féin 'gan dèanamh, ach a ta mar an ceudna tlachd aca do'n mhuinntir a ùi iad.

CAIB. II.

UIME an a ta thu gun leithsgeul, O a dhuine, co air bith thu a tha toirt breth : oir an uair a tha thu toirt breth air neach eile, tha thu ga d' dhiteadh féin ; oir thusa a tha toirt breth, tha thu dèanamh nan nithe sin féin.

2 Ach a ta fios againne gu bheil breitheanas Dé a réir firinn, an aghaidh na muinntir a tha dèanamh an leithide sin.

3 Agus an saoil thusa so, O a dhuine, a tha toirt breth orrasan a ni an leithide sin, agus a ta 'gan dèanamh thu féin, gu'n téid thu as o bhreitheanas Dé?

4 No 'n dèan thu tarcuis air saoihbreas a mhaithais, agus 'fhoighidin, agus 'fhad-fhulangais, gun fhios bhi agad gu bheil

maithias Dé ga d' threòrachadh chum aithreachais ?

5 Ach a réir do chruais agus do chridhe neo-aithreachail, a ta thu càrnadh suas feirge dhuit féin fa chomhair là na feirge, agus foillseachaidh ceart-bhreitheanasais Dé ;

6 A bheir do gach aon a réir a ghnìomhara ;

7 Dhoibh-san a ta le buanachadh gu foighidneach ann an deadh obair, ag iarraidh glòire, agus urraim, agus neo-bhàsmhorachd, a' bheatha mhaireannach :

8 Ach dhoibh-sana ta conspoid-each, agus nach 'eil ùmhail do'n fhìrinn, ach a ta ùmhail do'n eucoir, diom agus fearg ;

9 Amhghar agus teanntachd air gach anam duine a ta dèanamh uile, do'n Iudhach air tùs, agus mar an ceudna do'n Gheugach :

10 Ach glòir, agus urram, agus sìth, do gach duine a ni maith, do'n Iudhach air tùs, agus do'n Gheugach mar an ceudna :

11 Oir cha'n 'eil spéis aig Dia do phearsa seach a chéile.

12 Oir a mheud as a pheacaich gun an lagh, sgriosar iad gun an lagh ; agus a mheud as a pheacaich fuidh an lagh, dìtear iad leis an lagh :

13 (Oir cha'n iad luchd-éisdeachd an lagha a ta 'nam fìreanaibh am fianuis Dé, ach bithidh luchd-dèanamh an lagha air am fìreanachadh.

14 Oir an uair a ta na Cinnich aig nach 'eil lagh, a thaobh nàduir a' dèanamh nan nithe a ta san lagh, air dhoibh-san a bhi gun lagh tha iad 'nan lagh dhoibh féin :

15 Muinntir a ta nochdadh obair an lagha sgrìobhta 'nan cridheachaibh, air bhi d'an coguis a' dèanamh fianuis leo, agus an smuaintean eatorra féin 'gan ag-

airt, no a' gabhail an leithsgeil :)

16 San là anns an toir Dia breth air nithibh uaigneach dhaoine, a réir mo shoisgeil-sa, tre Iosa Crìosd.

17 Feuch, goirear Iudhach dhiot-sa, agus tha thu cur dòigh san lagh, agus a' dèanamh uail a Dia ;

18 Agus is aithne dhuit a thoil, agus a ta thu a' dearbhadh nan nithe a's feàrr, air dhuit bhi air do theagasg as an lagh,

19 Agus a ta thu dòchasach gur ceann-iuil thu féin do na doill, solus dhoibhsan a ta an dorchadas,

20 Fear-fòghluim do dhaoinibh neo-eagnaidh, fear-teagaisg do leanabaibh, aig am bheil samh-ladh an eòlais agus na firinn a ta san lagh.

21 Thusa uime sin a ta teagasg neach eile, nach 'eil thu ga d' theagasg féin ? thusa a ta sear-monachadh gun ghoid a dhèanamh, am bheil thu ri goid ?

22 Thusa tha 'g ràdh gun adhaltrannas a dhèanamh, am bheil thu dèanamh adhaltrannais ? thusa le'n gràin ìodhola, am bheil thu ri naomh-ghoid ?

23 Thusa a ta dèanamh uail as an lagh, an tabhair thu, le briseadh an lagha, eas-urram do Dhia ?

24 Oir a ta ainm Dhé a' faotainn toibheim do 'ur taobh-sa am measg nan Cinneach, mar a ta e sgriobhta.

25 Oir a ta tairbhe gu fìrinneach anns an timchioll-ghearradh, ma ghléidheas tu an lagh : ach ma's fear-brisidh an lagha thu, tha do thimchioll-ghearradh 'na neo-thimchioll-ghearradh dhuit.

26 Uime sin, ma ghléidheas an neo-thimchioll-ghearradh fìreantachd an lagha, nach measar a neo-thimchioll-ghearradh-san mar thimchioll-ghearradh ?

27 Agus nach dìt an neo-thimchioll-ghearradh thaobh nàduir, a ta a' coimhlionadh an lagha, thusa a tha tre'n litir agus tre'n timchioll-ghearradh a 'd' fhear-brisidh an lagha ?

28 Oir cha'n Iudhach esan, a tha mar sin o'n leth-muigh ; agus cha'n e sin an timchioll-ghearradh, a tha gu follaiseach san fheoil :

29 Ach is Iudhach esan, a tha mar sin san taobh a stigh ; agus is e sin an timchioll-ghearradh a tha sa' chridhe, agus san spiorad, cha'n ann san litir, aig am bheil a chliù cha'n ann o dhaoinibh, ach o Dhia.

CAIB. III.

CIOD e uime sin barrachd an Iudhaich ? no ciod e tairbhe an timchioll-ghearraidh ?

2 Is mòr *sin* air gach dòigh : air tùs, do bhrìgh gur ann riu-sa a dh'earbadh briathra Dhé.

3 Oir ciod e *sin* ged nach do chreid cuid ? an dèan am mìchreidimh-san firinn Dhé gun éifeachd ?

4 Nar leigeadh Dia : ach biodh Dia fìor, agus gach duine 'na bhreugaire ; a réir mar a ta e sgriobhta, Chum gu bì thu ceart ann ad bhriathraibh, agus gu'n toir thu buaidh 'nuair a bheirear breth ort.

5 Ach ma mholas ar n-eucoirne fireantachd Dhé, ciod a their sinn ? am bheil Dia eucorach a tha dèanamh dìoghaltais ? (tha mi a' labhairt mar dhuine,)

6 Nar leigeadh Dia : no cionnus a bheir Dia breth air an t-saoghal ?

7 Oir ma ta fìrinn Dhé tre mo bhréig-sa air a meudachadh chum a ghlòire-san ; c'ar son a ta mise air mo dhìteadh mar pheacach ?

8 Agus c'ar son nach dèan sinn olc, chum gu'n tig maith

as? (mar a labhrar gu toibheumach umainne, agus mar a thubhairt cuid gu bheil sinn ag ràdh.) *muinntir d'am bheil an dìteadh a réir ceartais.*

9 Ciod uime sin? am bheil barrachd againne? cha'n 'eil air aonchor: oir dhearbhsinn roimhe gu bheil araon na h-Iudhaich agus na Cinnich uile fo pheacadh;

10 Mar a ta e sgriobhta, Cha'n 'eil ionracan ann, cha'n 'eil fiù a h-aon:

11 Cha'n 'eil neach *ann* a thuigeas, cha'n eil neach *ann* a tha 'g iarraidh Dhé.

12 Chlaon iad uile *as an t-slighe*, tha iad uile mì-tharbhach; cha'n 'eil neach a tha dèanamh maith, cha'n 'eil fiù a h-aon.

13 Is uaigh fhosgailte an scòrnach; labhair iad cealg le'n teangaibh; tha nimh nan nath-racha nimhe fo 'm bilibh:

14 Aig am bheil am beul làn do mhallachadh agus dosheirbhe:

15 *Tha* an cosan luath a dhòrtadh fola:

16 *Tha* léir-sgrios agus truaighe 'nan slighibh:

17 Agus slighe na sìthe cha b' aithne dhoibh:

18 Cha'n 'eil eagal Dé fa chomhair an sùl.

19 A nis tha fhios againn ge b'e nithe a ta'n lagh a' labhairt, gur ann riu-san a ta' fuidh 'n lagh a tha e'gan labhairt: chum gu druideal gach uile bheul, agus gu 'm bi an saoghal uile air fhaotainn ciontach am fianuis Dé.

20 Uime sin cha bhi feòil air bith air a fireanachadh, 'na fhianuis-san, tre oibribh an lagha: oir *is ann* tre an lagh a ta eòlas peacaidh.

21 Ach a nis tha fireantachd Dhé air a foillseachadh as eugmhais an lagha, a' faotainn

fianuis o'n lagh agus o na fàidhibh;

22 Eadhon fireantachd Dhé tre chreidimh Iosa Crìosd, do na h-uile, agus air na h-uile a chreideas; oir cha'n 'eil eadar-dhealachadh ann:

23 Oir pheacaich na h-uile, agus tha iad air teachd geàrr air glòir Dhé;

24 Air dhoibh bhi air am fireanachadh gu saor le a ghràs, tre an t-saorsa a ta ann an Iosa Crìosd:

25 Neach a shònraich Dia 'na iobairt-réitich, tre chreidimh 'na fhuil, chum 'fhìreantachd fhoillseachadh le maitheanas nam peacanna a chaidh seachad, tre fhad-fhulangas Dé;

26 A dh'fhoillseachadh, *tha mi ag ràdh*, 'fhìreantachd-san san àm a ta làthair; chum gu'm biodh e cothromach, agus gu'm fireanaicheadh e an tì a chreideas ann an Iosa.

27 C'ait uime sin *am bheil* uail? Dhruideal a mach i. Ciod e an lagh *leis an do dhruideal a mach i?* *an e lagh* nan oibre? Cha'n e; ach tre lagh a' chreidimh.

28 Tha sinn uime sin a' meas gu bheil duine air fhìreanachadh tre chreidimh as eugmhais oibre an lagha.

29 An e Dia nan Iudhach a mhàin e? Nach e mar an ceudna Dia nan Cinneach? Gu deimhin nan Cinneach mar an ceudna:

30 Do bhrìgh gur aon Dia, a dh'fhìreanaicheas an timchioll-ghearradh o chreidimh, agus an neo-thimchioll-ghearradh tre chreidimh.

31 Am bheil sinn uime sin a' cur an lagha an neo-bhrìgh tre'n chreidimh? Nar leigeadh Dia: ach a ta sinne a' daingneachadh an lagha.

CAIB. IV.

CIOD ma ta a their sinn a fhuair ar n-athair Abraham a réir na feòla?

2 Oir ma dh'fhìreanicheadh Abraham le oibribh, tha aobhar uail aige, ach cha'n ann a thaobh Dhé.

3 Oir ciod a ta an sgrìobtuir ag ràdh? Chreid Abraham Dia, agus mheasadh sin da mar fhìreantachd.

4 A nis do'n tì a ni obair cha'n ann mar ghean-maith a mheasar antuarasdal, ach mar fhiachaibh.

5 Ach do'n tì nach dèan obair, ach a ta creidsinn anns an Tì a dh'fhìreanaicheas an duine mì-dhiadhaidh, measar a chreidimh mar fhìreantachd.

6 Amhuil mar a ta Daibhidh a' cur an céill beannachadh an duine sin d'am meas Dia fireantachd as eugmhais oibre, *ag ràdh*,

7 Is beannaichte iadsan a fhuair maitheanas 'nan euceirtibh, agus aig am bheil am peacanna air am folach.

8 Is beannaichte an tì nach cuir an Tighearn peacadh as a leth.

9 Am bheil ma ta am beannachadh so *teachd* air an timchioll-ghearradh *a mhàin*, no mar an ceudna air an neo-thimchioll-ghearradh? Oir tha sinn ag ràdh gu'n do mheasadh creidimh do Abraham mar fhìreantachd.

10 Cionnus ma ta a mheasadh *dha* e? An ann an uair a bha e san timchioll-ghearradh, no san neo-thimchioll-ghearradh? Cha'n ann san timchioll-ghearradh, ach san neo-thimchioll-ghearradh.

11 Agus fhuair e comhar an timchioll-ghearraidh, seula fireantachd a' chreidimh a bha aige san neo-thimchioll-ghearradh, chum gu'm biodh e 'na athair aca-san uile a ta creidsinn san

neo-thimchioll-ghearradh, chum gu measadh fireantachd dhoibh-san mar an ceudna:

12 Agus 'na athair an timchioll-ghearraidh dhoibh-san nach 'eil a mhàin do'n timchioll-ghearradh, ach mar an ceudna a ta 'g imeachd ann an ceumaibh a' chreidimh ar n-Athar Abraham, a bha aige san neo-thimchioll-ghearradh.

13 Oir cha b'ann tre'n lagh a thugadh an gealladh do Abraham no d'a shìol, Gu'm biodh e 'na oighre air an t-saoghal, ach tre fhìreantachd a' chreidimh.

14 Oir ma ta iadsan a bhuineas do'n lagh 'nan oighreachaibh, tha creidimh air a dhèanamh dìomhain, agus an gealladh gun bhrìgh:

15 A chionn gu bheil an lagh ag oibreachadh feirge: oir far nach 'eil lagh, cha'n 'eil an sin briseadh lagha.

16 Uime sin is ann o chreidimh a ta 'n *oighreachd*, ionnus gu'm biodh i tre ghràs: chum gu'm biodh an gealladh daingean do'n t-sìol uile, cha'n ann a mhàin dhoibh-sana bhuineas do'n lagh, ach mar an ceudna dhoibh-san a bhuineas do chreidimh Abraham, neach is e ar-n-athair-ne uile,

17 (A réir mar a ta e sgrìobhta, Dh'òrduich mi thu a'd'athair mhòran chinneach,) 'na làthairsa anns an do chreid e, eadhon Dia, a ta beothachadh nam marbh, agus a ta gairm nan nithe sin nach 'eil idir ann mar gu'm biodh iad ann:

18 Neach an aghaidh dòchais a chreid an dòchas, chum gu'm biodh e 'na athair mhòran chinneach; a réir mar a dubhradh, Mar so bithidh do shliochd.

19 Agus air dha gun bhi anmhunn an creidimh, cha do chuir e an suim gu robh a chorp

féin a nis marbh, air dha bhi timchioll ceud bliadhna dh'aois, no mairbhe bronn Shara :

20 Agus cha do chuir e an amharus gealladh Dhé le mì-chreidimh ; ach bha e làidir an creidimh, a' toirt glòire do Dhia :

21 Agus bha làn-deimhin aige, an tì a thug an gealladh, gur comasach esan air a choimhlionadh.

22 Agus uime sin mheasadh so dhasan mar fhìreantachd.

23 A nis cha b'ann air a shonsan a mhàin a sgrìobhadh, gu'n do mheasadh so dha ;

24 Ach air ar son-ne mar an ceudna, d'am measar e, ma chreideas sinn ann-san a thog suas Iosa ar Tighearn o na marbhaibh,

25 A thugadh thairis air son ar ciontaidh, agus a thogadh suas a ris air son ar fìreanachaidh.

CAIB. V.

UIME sin air dhuinne bhi air ar fìreanachadh tre chreidimh, tha sìth againn ri Dia, tre ar Tighearn Iosa Crìosd :

2 Tre'm bheil againn mar an ceudna slighe gu dol a steach tre chreidimh chum a' ghràis so anns am bheil sinn 'nar seasamh, agus a ta sinn a' dèanamh gàirdeachais an dòchas glòire Dhé.

3 Agus cha'n e so a mhàin, ach a ta sinn mar an ceudna a' dèanamh uail ann an trioblaidibh, do bhrìgh gu bheil fios againn gu'n oibrich trioblaid foighidìn ;

4 Agus foighidìn, dearbhadh ; agus dearbhadh, dòchas :

5 Agus cha nàraich an dòchas, do bhrìgh gu bheil gràdh Dhé air a dhòrtadh a mach ann ar cridheachaibh, tre 'n Spiorad naomh a thugadh dhuinne.

6 Oir air dhuinne bhi fathast gun neart, ann an àm iomchuidh

bhàsaich Crìosd air son nan daoine neo-dhiadhaidh.

7 Oir is gann a dh' fhuilingeas duine bàs air son duine chothromaich ; ach theagamh gu'm biodh aig neach éigin do mhìnich eadhon bàs fhulang air son duine mhaith.

8 Ach a ta Dia a' moladh a ghràidh féin duinne, do bhrìgh an uair a bha sinn fathast 'nar peacaich gu'n d' fhuiling Crìosd bàs air ar son.

9 Is mò gu mòr uime sin, air dhuinn a nis bhi air ar fìreanachadh tre 'fhuil, a shaorar tridsan o fheirg sinn.

10 Oir ma 'se air dhuinn bhi 'nar naimhdebh, gu'n d'rinneadh réidh ri Dia sinn tre bhàs a Mhic ; is mò gu mòr, air dhuinn bhi air ar dèanamh réidh, a shaorar tre a bheatha sinn.

11 Agus cha'n e mhàin sin, ach a ta sinn a' dèanamh gàird-eachais an Dia, tre ar Tighearna Iosa Crìosd, tre an d' fhuair sinn a nis an réite.

12 Uime sin mar a thàinig peacadh a steach do'n t-saoghal tre aon duine, agus bàs tre'n pheacadh ; mar sin mar an ceudna thàinig bàs air na h-uile dhaoineibh, do bhrìgh gu'n do pheacaich iad uile.

13 Oir gus an lagh, bha peacadh anns an t-saoghal : ach cha chuirear peacadh á leth *dhaoine* far nach 'eil lagh.

14 Gidheadh, rìoghaich am bàs o Adhamh gu Maois, eadhon air an dream nach do pheacaich a réir coslais eas-ùmhlaichd Adhaimh, neach is e samhlaichd an Tì ud a bha ri teachd :

15 Ach cha'n ann mar an cionta, a tha'n saor-thiodhlac. Oir ma fhuair mòran bàs tre chionta aoin, is mò gu mòr na sin a tha gràs Dhé, agus an tiodhlac troimh ghràs a ta tre

aon duine, Iosa Crìosd, pailte do mhòran.

16 Agus cha'n ann mar tre aon duine a pheacaich, *mar sin* a tha'n tabhartas: oir *bha* am breitheanastre aon *chionta*, chum dìtidh: ach *a ta'n* saor-thabhartas o mhòran chiontaibh chum fìreanachaidh.

17 Oir ma's e as tre chionta aoin *duine*, gu'n do rìoghaich am bàs tre aon, is mò gu mòr na sin a rìoghaicheas iadsan, a gheibh pailteas gràis, agus tabhartais na fìreantachd, ann am beatha tre aon, *eadhon* Iosa Crìosd.

18 Uime sin mar tre chionta aoin *duine a thàinig breitheanas* air na h-uile dhaoineibh chum dìtidh, is amhuil sin mar an ceudna tre fhìreantachd aoin, *thàinig an saor thiodhlac* air na h-uile dhaoineibh chum fìreanachaidh na beatha.

19 Oir mar tre eas-ùmhlaichd aoin duine a rinneadh mòran 'nam peacaich, is amhuil sin tre ùmhlaichd aoin *duine* a nithear mòran 'nam fìreanaibh.

20 Ach thàinig an lagh a steach, chum gu meudaichteadh an cionta: ach far an do mheudaicheadh am peacadh, bu romhò a mheudaicheadh gràs:

21 Chum as mar a rìoghaich am peacadh chum bàis, mar sin gu'n rìoghaicheadh gràs tre fhìreantachd chum na beatha mair-eannaich, tre Iosa Crìosd ar Tighearn.

CAIB. VI.

CIOD ma ta a their sinn? Am buanaich sinn am peacadh, chum gu meudaichear gràs?

2 Nar leigeadh Dia: cionnus a dh'fheudas sinne a ta marbh do'n pheacadh, ar beatha a chaitheadh ni's fàide ann?

3 Nach 'eil fhios agaibh, a mheud againn as a bhaisteadh

ann an Iosa Crìosd, gu'n do bhaisteadh chum a bhàis sinn?

4 Air an aobhar sin dh'adhlacaidh sinn maille ris tre'n bhaisteadh chum bàis: ionnus mar a thogadh Crìosd suas o na marbhaibh le glòir an Athar, mar sin gu gluaisemaid-ne mar an ceudna ann an nuadhachd beatha.

5 Oir ma chaidh ar suidheachadh maraon ann an coslas a' bhàis, bithidh sinn mar an ceudna *air ar suidheachadh ann an coslas* 'aiseirigh.

6 Air fhios so a bhi againn, gu bheil ar seann duine air a chéusadh maille ris, ionnus gu'm biodh corp a' pheacaidh air a sgrìos, chum á so suas nach dè namaid seirbhis do'n pheacadh.

7 Oir an tì a fhuair bàs, rinneadh saor e o'n pheacadh.

8 A nis ma fhuair sinn bàs maille ri Crìosd, tha sinn a' creidsinn gu'm bì sin beò maille ris mar an ceudna:

9 Air dhuinn fios a bhi againn air do Chrìosd éirigh o na marbhaibh, nach bàsaich e ni's mò; cha'n 'eil tighearnas aig a' bhàs ni's mò air.

10 Oir a mheud gu'n d' fhuair e bàs, is ann do'n pheacadh a fhuair e bàs aon uair *a mhàin*: ach a mheud gu bheil e beò, is ann do Dhia a ta e beò.

11 Mar sin mar an ceudna measaibh-sa gu bheil sibh féin gu deimhin marbh do'n pheacadh, ach beò do Dhia tre Iosa Crìosd ar Tighearna.

12 Air an aobhar sin na rìoghaicheadh am peacadh ann bhur corp bàsmhor, air chor as gu'n tugadh sibh ùmhlaichd dha 'na ana-miannaibh.

13 Agus na tugaibh bhur buill 'nan armaibh euceirt do'n pheacadh; ach thugaibh sibh féin do

Dhia, mar dhream a ta beò o na marbhaibh, agus bhur buill 'nan armaibh fireantachd do Dhia.

14 Oir cha bhi aig a' pheacadh tighearnas oirbh: oir cha 'n 'eil sibh fuidh 'n lagh, ach fuidh ghràs.

15 Ciod uime sin? am peac-aich sinn, do bhrìgh nach 'eil sinn fuidh 'n lagh, ach fuidh ghràs? Nar leigeadh Dia.

16 Nach 'eil fhios agaibh, an tì d'an toir sibh sibh fèin mar sheirbhisich chum ùmhlachd, gur seirbhisich sibh do 'n tì d'an dèan sibh ùmhlachd; ma 's ann do 'n pheacadh chum bàis, no do ùmhlachd chum fireantachd.

17 Ach buidheachas do Dhia, an déigh dhuibh a bhi 'nur seirbhisich do 'n pheacadh, gu 'n d' thug sibh o bhur cridhe ùmhlachd do 'n chumadh teagaisg sin d' an d' thugadh sibh thairis.

18 Air dhuibh ma ta bhi air bhur dèanamh saor o'n pheacadh, rinn sibh seirbhis do 'n fhìreantachd.

19 Tha milabhairt mar dhuine, air son anmhuinneachd bhur fèola-sa: oir mar a thug sibh bhur buill mar sheirbhisich do neòghloine, agus do euceart chum euceirt, amhuil sin a nis thugaibh bhur buill mar sheirbhisich do 'n fhìreantachd, chum naomhachd.

20 Oir an uair a bha sibh 'nur seirbhisich do 'n pheacadh, bha sibh saor o'n fhìreantachd.

21 Air an aobhar sin ciod an toradh a bha agaibh an sin anns na nithibh sin, a ta nis a' cur nàire oirbh? oir is e crìoch nan nithe sin am bàs.

22 Ach a nis air dhuibh bhi saor o'n pheacadh, agus 'nur seirbhisich do Dhia, tha bhur toradh agaibh chum naomhachd, agus a' chrìoch a' bheatha mhair-eannach.

23 Oir is e tuarasdal a' pheacaidh am bàs: ach is e saor-thiodhlac Dhé a' bheatha mhair-eannach, tre Iosa Crìosd ar Tigh-earna.

CAIB. VII.

NACH 'eil fhios agaibh, a bhràithre, (oir is ann riusan d' an aithne an lagh a ta mi labhairt,) gu bheil tighearnas aig an lagh air duine, am fad is beo e?

2 Oir a' bhean a ta pòsda ri fear, tha i ceangailte leis an lagh r' a fear am fad is beò e: ach ma gheibh a fear bàs, tha i fuasgailte o lagh a fir.

3 Uime sin am feadh is beò a fear, ma phòsar i ri fear eile, goirear ban-adhaltranach dh'i: ach ma gheibh a fear bàs, tha i saor o'n lagh sin, air chor as nach han-adhaltranach i, ged robh i aig fear eile.

4 Air an aobhar sin, mo bhràithre, tha sibhse mar an ceudna marbh do'n lagh tre chorp Chrìosd; ionnus gu'm biodh sibh pòsda ri fear eile, eadhon ris-san a thogadh o na marbhaibh, chum gu'n tugamaid toradh a mach do Dhia.

5 Oir an uair a bha sinn san fhèil, bha miannan nam peacanna, tre'n lagh, ag oibreachadh ann ar buill, chum toradh a thoirt a mach gu bàs.

6 Ach a nis tha sinn air ar dèanamh saor o'n lagh, air dha sin a bhi marbh leis an do chumadh sinn: chum gu'n dèanamaid seirbhis ann an nuadhachd spioraid, agus cha'n ann an seanachd na litreach.

7 Ciod uime sin a their sinn? am bheil an lagh 'na pheacadh? Nar leigeadh Dia. Ni h-eadh, cha b' àithne dhomh peacadh, ach tre'n lagh: oir cha bhiodh eòlas agam air sannt, mur abradh an lagh, Na sanntaich.

8 Ach air do'n pheacadh fàth a ghilacadh tre'n àithne, dh'oibrich e annam gach uile ghnè an-tograidh: oir as eugmhais an lagha *bha* 'm peacadh marbh.

9 Oir bha mise beò as eugmhais an lagha uair-éigin: ach air teachd do'n àithne, dh'ath-bheothaich am peacadh, agus fhuair mise bàs.

10 Agus an àithne a *dh'òrd-uicheadh* chum beatha, fhuaradh dhomh-sa chum bàis i.

11 Oir air do'n pheacadh fàth a ghilacadh tre'n àithne, mheall e mi, agus le sin mharbh e mi.

12 Air an aobhar sin *tha* 'n lagh naomh; agus *a ta* 'n àithne naomh, agus cothromach, agus maith.

13 Uime sin an d'rinneadh an ni sin a bha maith, na bhàs domhsa? Nar leigeadh Dia. Ach am peacadh, chum gu faicteadh gur peacadh e, ag oibreachadh bàis annam-sa, leis an ni sin a ta maith; chum tre'n àithne gu'm fàsadh am peacadh ro pheacach.

14 Oir a ta fhios againne gu bheil an lagh spioradail: ach a ta mise feòlmhor, air mo reiceadh fuidh 'n pheacadh.

15 Oir an ni a ta mi dèanamh, cha taitneach leam e: oir an ni a b' àill leam, cha'n e a ta mi a' dèanamh; ach an ni a's fuathach leam, is e sin a ta mise a' dèanamh.

16 Uime sin ma tha mi dèanamh an ni nach b' àill leam, tha mi 'g aontachadh leis an lagh, gu bheil e maith.

17 A nis ma ta cha mhise ni's mò a tha dèanamh so, ach am peacadh a tha gabhail còmh-nuidh annam.

18 Oir a ta fhios agam, annam-sa, (sin ri ràdh, ann am fheòil,) nach 'eil maith sam bith a' gabhail còmh-nuidh: oir tha'n

toil a làthair maille rium, ach *dòigh sam bith* chum maith a dhèanamh cha 'n 'eil mi faotainn.

19 Oir cha 'n 'eil mi dèanamh am maith bu mhiann leam: ach an t-olc nach b' àill leam, is e sin a ta mi a' dèanamh.

20 A nis ma tha mi a' dèanamh an ni nach b' àill leam, cha mhise ni's mò a ta dèanamh so, ach am peacadh a tha gabhail còmh-nuidh annam.

21 Uime sin tha mi faotainn lagha, 'nuair a b' àill leam am maith a dhèanamh, gu bheil an t-olc a làthair agam.

22 Oir a ta tlachd agam an lagh Dhé, a réir an duine an taobh a stigh:

23 Ach tha mi faicinn lagha eile a' m' bhuill a' cogadh an aghaidh lagha m' inntinn, agus ga m' thoirt am bruid do lagh a' pheacaidh, a ta ann am bhuill.

24 Och is duine truagh mi! cò a shaoras mi o chorp a' bhàis so?

25 Tha mi toirt buidheachais do Dhia, tre Iosa Crìosd ar Tighearna. Uime sin, tha mise féin leis an inntinn a' dèanamh seirbhis do lagh Dhé; ach leis an fheòil do lagh a' pheacaidh.

CAIB. VIII.

AIR an aobhar sin cha'n 'eil a nis diteadh sam bith do'n dream sin a tha ann an Iosa Crìosd, a tha gluasad cha'n ann a réir na feòla, ach a réir an Spioraid.

2 Oir shaor lagh Spioraid na beatha, ann an Iosa Crìosd, mise o lagh a' pheacaidh agus a' bhàis.

3 Oir an ni nach robh an comas do'n lagh a dhèanamh, do bhrìgh gu robh e anmhuinn tre'n fheòil, ag cur a Mhic féin do Dhia an coslas feòla peacaidh,

agus 'na òbairt air son peacaidh, dhìt e am peacadh san fheòil:

4 Chum gu'm biodh fireantachd an lagha air a coimhlionadh annainne, a tha gluasad cha'n ann a réir na feòla, ach a réir an Spioraid.

5 Oir an dream a ta a réir na feòla, tha an aire air na nithibh sin a bhuineas do'n fheòil; ach an dream a ta réir an Spioraid, air na nithibh sin a bhuineas do'n Spiorad.

6 Oir an inntinn fheòlmhor is bàs i; ach an inntinn spioradail is beatha agus sìth i:

7 Do bhrìgh gur naimhdeas an inntinn fheòlmhor an aghaidh Dhé; oir cha'n 'eil i ùmhal do lagh Dhé, agus cha mhò a tha'n comas d'i bhi.

8 Uime sin cha'n urrainn iad-san a tha san fheòil Dia a thoileachadh.

9 Ach cha'n 'eil sibhse san fheòil, ach san Spiorad, ma tha Spiorad Dhé a' gabhail còmhnuidh annaibh. A nis mur 'eil Spiorad Chrìosd aig neach, cha bhuin e dha.

10 Agus ma tha Chrìosd annaibh, tha'n corp marbh gu deimhin a thaobh peacaidh; ach is beatha an spiorad a thaobh fireantachd.

11 Ach ma tha Spiorad an Ti a thog Iosa o na marbhaibh a' gabhail còmhnuidh annaibh, an Ti a thog Chrìosd o na marbhaibh, beothaichidh e mar an ceudna bhur cuirp bhàsmhor-sa, tre a Spiorad-san a ta chòmhnuidh annaibh.

12 Uime sin, a bhràithre, tha sinn fo fhiachaibh, cha'n ann do'n fheòil, chum ar beatha a chaitheadh a réir na feòla.

13 Oir ma chaitheas sibh bhur beatha a réir na feòla, gheibh sibh bàs: ach ma mharbhas sibh

tre'n Spiorad gnìomhara na colla, bithidh sibh beò.

14 Oir a mheud 's a ta air an treòrachadh le Spiorad Dhé, is iad mic Dhé.

15 Oir cha d'fhuair sibh Spiorad na daorsa a ris chum eagail; ach fhuair sibh Spiorad na h-uchd-mhacachd, tre an glaoth sinn, Abba, Athair.

16 Tha an Spiorad féin a' dèanamh fianuis maille r'ar spiorad-ne, gur sinn clann Dhé:

17 Agus ma's clann is oighreachan; oighreachan air Dia, agus comh-oighreachan maille ri Crìosd: ma 'se is gu'm fuiling sinn maille ris, chum gu glòraichear sin maille ris mar an ceudna.

18 Oir tha mi a' measadh nach airidh fulangais na h-aimsir a ta làthair bhi air an coimhmeas ris a' ghloir a dh'fhoillsichear annainn.

19 Oir a ta dùil dhùrachdach a' chruthachaidh a' feitheamh ri foillseachadh cloinne Dhé.

20 Oir chuireadh an cruthachadh fo dhiomhanas, cha'n ann le 'thoil, ach trid-san a chuir fo dhiomhanas e;

21 An dòchas gu'n saorar an cruthachadh féin fòs o dhaorsa na truallidheachd, gu saorsa glòrmhor cloinne Dhé.

22 Oir a ta fhios againne gu bheil an cruthachadh uile ag osnaich, agus am péin gu léir, mar mhnai ri saothair, gus an àm so:

23 Agus cha'n e so a mhàin, ach sinn féin mar an ceudna, aig an bheil ceud thoradh an Spioraid, tha eadhon sinne ag osnaich annainn féin, a' feitheamh ris an uchd-mhacachd, eadhon saorsa ar cuirp.

24 Oir is ann le dòchas a shaorar sinn: ach dòchas a chithear, cha dòchas e: oir an ni

a ta an duine faicinn, c' ar son a bhios dòchas aige ris?

25 Ach ma tha dòchas againn ris an ni nach 'eil sinn a' faicinn, feithidh sinn gu foighidneach ris.

26 Tha an Spiorad féin mar an ceudna a' dèanamh còmhnaidh le ar n-anmhuinneachd: oir cha'n aithne dhuinn ciod a ghuidheamaid mar bu chòir dhuinn; ach a ta an Spiorad féin a' dèanamh eadar-ghuidhe air ar son le osnaibh do-labhairt.

27 Agus is aithne dhasan a ta rannsachadh nan cridheachan ciod i inntinn an Spioraid, do bhrìgh gu bheil e a' dèanamh eadar-ghuidhe air son nan naomh a réir *toil Dé*.

28 Agus a ta fhios againn gu'n comh-oibrich na h-uile nithe chum maith, do'n dream aig am bheil gràdh do Dhia, *eadhon* dhoibh-san a ghairmeadh a réir a rùin.

29 Oir an dream a roimh-aithnich e, roimh-òrduich e iad mar an ceudna *chum bhì* comh-chosmhuil ri Ìomhaigh a Mhic, chum gu'm biodh esan 'na cheudghin am measg mòraih bhràithre.

30 Agus an dream a roimh-òrduich e, ghairm e iad mar an ceudna: agus an dream a ghairm e, dh'fhìreanaich e mar an ceudna: agus an dream a dh'fhìreanaich e, ghlòraich e mar an ceudna.

31 Ciod uime sin a their sinn ris na nithibh sin? Ma tha Dia leinn, cò *dh'fheudas bhì* 'nar n-aghaidh?

32 An Tì nach do chaomhain a Mhac féin, ach a thug thairis e air ar son-ne uile, cionnus maille ris-san nach toir e mar an ceudna dhuinn gu saor na h-uile nithe?

33 Cò a chuireas coire sam bith á leth daoine taghta Dhé? *Is e Dia a dh'fhìreanaicheas.*

34 Cò a dhìteas? *Is e Crìosd a fhuair bàs, seadh tuilleadh fòs, a dh'éirich a rìs, agus a ta air deas làimh Dhé, neach a ta mar an ceudna a' dèanamh eadar-ghuidhe air ar son-ne.*

35 Cò a sgaras sinn o ghràdh Chrìosd? *an dèan trioblaid, no àmhghar, no geur-leanmhuinn, no gorta, no lomnochduidh, no cumnart, no claidheamh?*

36 (A réir mar a ta e sgriobhta, Air do shonsa mharbhadh sinn rè an là; mheasadh sinn mar chaoraich chum marbhaidh.)

37 Ni h-eadh, ach anns na nithibh sin uile tha sinn a' toirt tuilleadh agus buaidh, trid-san a ghràdhaich sinn.

38 Oir a ta dearbh-bheachd agam, nach bì bàs, no beatha, no aingil, no uachdaranachda, no cumhachda, no nithe a ta làth-air, no nithe a ta ri teachd,

39 No àirde, no doimhne, no creutair sam bith eile, comasach air sinne a sgaradh o ghràdh Dhé a ta ann an Iosa Crìosd ar Tighearn.

CAIB. IX.

A TA mi a' labhairt na fìrinn ann an Crìosd, cha dèan mi breug, (air bhì do m' choguis a' dèanamh fianuis domh san Spiorad naomh:)

2 Gu bheil doilgheas mòr orm, agus cràdh air mo chridhe an comhnuidh.

3 Oir ghuidhinn mi féin a bhì dealaichte o Chrìosd, air son mo bhràithre, mo luchd-dàimh a thaobh na feòla:

4 A ta 'nan Israelich; d'am buin an uchd-mhacachd, agus a' ghlòir, agus na coimheangail, agus tabhairt an lagha, agus seirbhis *Dé*, agus na geallanna;

5 D'am buin na h-aithriche, agus o'm bheil Crìosd a thaobh na feòla, neach is e Dia os ceann

nan uile, beannaichte gu sìor-
ruidh. Amen.

6 Cha'n e gu bheil focal Dé
gun éifeachd. Oir cha'n Israel-
ich iadsan uile a ta o Israel:

7 Agus nì mò do bhrìgh gur
sliochd do Abraham iad, a ta iad
uile 'nan cloinn: ach, Ann an
Isaac ainmichear do shìol.

8 Is e sin ri ràdh, Cha'n iad
clann na feòla clann Dhé: ach is
iad clann a' gheallaidh a mheas-
ar mar shìol.

9 Oir is e so focal a' gheall-
aidh, A réir an àm so thig mi,
agus bithidh mac aig Sara.

10 Agus cha'n e mhàin so, ach
Rebeca mar an ceudna 'nuair a
thoirrcheadh i o aon, eadhon
Isaac ar n-athair-ne;

11 (Oir mun do rugadh na
naoidheana, agus mun d'rinn iad
maith no olc, chum gu'm biodh
rùn Dé a réir an taghaidh
seasmhach, cha'n ann o oibribh,
ach o'n Tì a ghairmeas;)

12 A dubhradh rithe, Nì an
neach a's seine seirbhis do'n
neach a's òige.

13 A réir mar a ta e sgrìobh-
ta, Ghràdhaich mi Iacob, ach
dh'fhuathaich mi Esau.

14 Ciod a their sinne ma ta?
am bheil eucoir maille ri Dia?
Nar leigeadh Dia.

15 Oir a ta e ag ràdh ri
Maois, Nì mi tròcair air an neach
air an dèan mi tròcair, agus
gabhadh mi truas do'n neach
d'an gabh mi truas.

16 Uime sin cha'n ann o'n tì
leis an àill, no o'n tì a ruitheas,
ach o Dhia a nì tròcair.

17 Oir a ta an sgrìobtuir ag
ràdh ri Pharaoh, Is ann chum na
crìche so féin a thog mi suas thu,
chum gu'm foillsichinn mo
chumhachd annad, agus chum
gu'm biodh m'ainm iomraideach
air feadh na talmhainn uile.

18 Uime sin nì e tròcair air

an tì a's àill leis, agus an tì a's
àill leis cruaidhichidh e.

19 Their thu ma ta rium, C'ar
son a ta e ma seadh a' faghail
croin? oir cò a chuir an aghaidh
a thoile?

20 Nì h-eadh ach, O a
dhuine, cò thusa a ta tagradh an
aghaidh Dhé? An abair an nì
a chumadh ris an tì a chum e,
C'ar son a rinn thu mi mar so?

21 Nach 'eil cumhachd aig a'
chriadhair air a' chriadh,
ionnus gu'n dèanadh e do'n aon
mheall aon soitheach chum urr-
aim, agus soitheach eile chum
eas-urraim.

22 Ciod ma's e, air bhi do Dhia
toileach 'fhearg a nochdadh,
agus a chumhachd a dhèanamh
aithnichte, gu'n d'fhuiling e
le mòr fhad-fhulangas soithiche
na feirge air an ulluchadh chum
sgrios:

23 Agus chum gu'n dèanadh
e aithnichte saoihbreas a ghloire
air soithichibh na tròcair, a
dh'ulluich e roimh-làimh chum
ghloire,

24 Eadhon sinne a ghairm e,
cha'n e mhàin do na h-Iudhaich,
ach mar an ceudna do na Cinn-
ich.

25 Mar a ta e ag ràdh mar an
ceudna ann an Hosea, Goiridh
mi mo phobull diubh-san nach
robh 'nam pobull domh; agus
bean ghràdhach dh'ise nach robh
gràdhach.

26 Agus tàrlaidh, anns an
ionad san dubhradh riu, Cha sibh
mo phobull-sa; an sin gu'n goir-
ear Clann an Dé bheò dhiubh.

27 Tha Esaias mar an ceudna
ag éigheach, mu thimchioll Is-
rael, Ged tha àireamh chloinn
Israel mar ghaineamh na fairge,
is fuigheall a thèarnar.

28 Oir crìochnaichidh e an
obair, agus gearraidh e goirid i
an ceartas: do bhrìgh gu'n dèan

an Tighearn obair ghoirid air an talamh.

29 Agus mar a thubhairt Esaias roimhe, Mur fàgadh Tighearn nan sluagh sìol againne, dhèantadh sinn mar Shodom; agus bhitheamaid cosmhuil ri Gomorrah.

30 Ciod a their sinn ma seadh? Gu'n d'ràinig na Cinnich, nach robh a' leantuinn fireantachd, air fireantachd, eadhon an fhireantachd a ta o chreidimh:

31 Ach cha do ràinig Israel, a bha leantuinn lagha na fireantachd, air lagh na fireantachd.

32 C' ar son? A chionn nach ann o chreidimh, ach mar gu'm b'ann o oibribh an lagha a dh'iarr iad i: oir thuislich iad air a' chloich-thuislidh sin;

33 Mar a ta e sgrìobhta, Feuch, cuiream ann an Sion clach-thuislidh, agus carraig oilbheim: agus gach neach a chreideas ann-san, cha chuirear gu nàire e.

CAIB. X.

A BHRAITHRE, is e dùrachd mo chridhe, agus m'ùrnuigh ri Dia air son Israeil, gu'm biodh iad air an tèarnadh.

2 Oir a ta mi dèanamh fianuis doibh, gu bheil eud aca thaobh Dhé, ach cha'n ann a réir eòlais.

3 Oir air dhoibh bhi aineolach air fireantachd Dhé, agus ag iarraidh am fireantachd féin a chur air chois, cha do strìochd iad do fhireantachd Dhé.

4 Oir is e Crìosd crìoch an lagha, chum fireantachd do gach neach a chreideas.

5 Oir a ta Maois a' cur an céill na fireantachd a ta o'n lagh, eadhon, An duine a nì na nithe sin, gu'm bì e beò leo.

6 Ach mar so a ta an fhìreantachd a ta o chreidimh ag ràdh,

Na abair ann do chridhe, Cò théid suas air nèamh? (sin r'a ràdh, a thoirt Chrìosd a nuas;)

7 No, Cò a théid sìos do'n doimhne? (sin r'a ràdh, a thoirt Chrìosd a rìs air ais o na marbh-aibh:)

8 Ach ciod a ta i ag ràdh? Tha 'm focal am fagus duit, ann do bheul, agus ann do chridhe: 'se sin focal a' chreidimh a tha sinne a' searmonachadh,

9 Ma dh'aidicheas tu le d' bheul an Tighearn Iosa, agus ma chreideas tu ann do chridhe, gu'n do thog Dia o na marbhaibh e, gu'n saorar thu.

10 Oir is ann leis a' chridhe a chreidear chum fireantachd, agus leis a' bheul a dh'aidichear chum slàinte.

11 Oir a ta an sgrìobtuir ag ràdh, Ge b'e neach a chreideas ann-san, cha nàraichear e.

12 Oir cha'n 'eil eadar-dhealachadh eadar an t-Iudhach agus an Greugach: oir an t-aon Tighearn a ta os ceann nan uile, tha e saoi bhir do na h-uile a ghairmeas air.

13 Oir ge b'e neach a ghairmeas air ainm an Tighearna, tèarnar e.

14 Ach cionnus a ghairmeas iad airsann anns nach do chreid iad? agus cionnus a chreideas iad anns an Tì air nach cual iad *iomradh*? agus cionnus a chluinn-eas iad gun searmonaiche?

15 Agus cionnus a nì iad sear-moin, mur cuirear iad? mar a ta e sgrìobhta, Cia sgiamhach cosa na muinntir sin a ta searmonachadh soisgeil na sìthe, a ta toirt sgéil aoibhneich air nithibh maithe!

16 Ach cha robh iad uile ùmhal do'n t-soisgeul. Oir tha Esaias ag ràdh, A Thighearn, cò a chreid ar n-aithris-ne?

17 Uime sin, is ann o éisd-

eachd a thig creidimh, agus éisd-eachd tre fhocal Dé.

18 Ach a ta mi ag ràdh, Nach cual iad? Chuala gu deimhin, chaidh am fuaim air feadh gach tìre a mach, agus am briathra gu iomallaibh an domhain.

19 Ach a ta mi ag ràdh, Nach robh fios aig Israel? Air tùs, tha Maois ag ràdh, Cuiridh mi eud oirbh le *Cinneach* nach 'eil 'nan Cinneach, agus le Cinneach neo-thuigseach cuiridh mi fearg oirbh.

20 Ach a ta Esaias ro dhàna, agus a ta e ag ràdh, Fhuaradh mi leo-san nach d' iarr mi; dh'fhoillsicheadh mi dhoibh-san nach d' fhiosraich air mo shon.

21 Ach ri Israel a ta e ag ràdh, Shìn mi mach mo làmhnan rè an là gu h-iomlan ri pobull eas-ùmhail agus a labhras a' m' aghaidh.

CAIB. XI.

A TA mi ag ràdh ma seadh, An do thilg Dia a phobull uaith? Nar leigeadh Dia. Oir is Israeleach mise féin mar an ceudna, do shliochd Abrahaim, do thréibh Bheniamin.

2 Cha do thilg Dia uaith a phobull a roimh-aithnich e. Nach 'eil fhios agaibh ciod e a ta an sgriobtuir ag ràdh mu Elias? cionnus a ta e a' dèanamh eadar-ghuidhe ri Dia an aghaidh Israeil, ag ràdh,

3 A Thighearn, mharbh iad t' fhàidhean, agus leag iad sìos t' altairean; agus dh'fhàgadh mise a' m' aonar, agus tha iad ag iarraidh m'anama.

4 Ach ciod a ta freagradh Dhé ag ràdh ris? Dh'fhàg mi dhomh féin seachd mìle fear, nach do lùb an glùn do *dhealbh* Bhaail.

5 Agus mar sin mar an ceudna tha san àm so a làthair fuigh-eall a réir taghaidh a' ghràis.

6 Agus ma's ann tre ghràs, cha'n ann o oibribh ni's mò: no cha ghràs gràs ni's mò. Ach ma's ann o oibribh, cha'n ann o ghràs á sin suas: no cha'n obair á sin suas obair.

7 Ciod ma seadh? An ni sin a ta Israel ag iarraidh, cha do ràinig e air; ach ràinig an taghadh air, agus chaidh a' chuid eile a dhalladh:

8 Mar a ta e sgriobhta, Thug Dia dhoibh spiorad na suaine, sùilean chum nach faiceadh iad, agus cluasan chum nach cluinn-eadh iad, gus an là an diugh.

9 Agus a ta Daibhidh ag ràdh, Biodh am bòrd mar ribe, agus mar inneal-glacaidh, agus mar cheap-tuislidh, agus mar dhiol-thuarasdail dhoibh:

10 Biodh an sùilean air an dorchachadh, chum nach faic iad; agus crom-sa an druim an còmh-nuidh.

11 A ta mi ag ràdh uime sin, An do thuislich iad ionnus gu'n tuiteadh iad? Nar leigeadh Dia: ach tre an tuiteam-san tha slàinte *air teachd* chum nan Cinn-each, chum iadsan a bhrosnuchadh gu h-eud.

12 Ma's e an tuiteam-san saoihbreas an domhain, agus an lughdachadh saoihbreas nan Cinneach; cia's mò na sin a *bhitheas* an lànachd?

13 Oir is ann ribhse a ta mi a' labhairt, a Chinneacha; do bhrìgh gur mi abstol nan Cinn-each, tha mi toirt urraim do m' dhreuchd:

14 Ma dh'fheudas mi air chor sam bith mo choimh-fheòil a bhrosnuchadh gu h-eud, agus gu'n tèaruinn mi dream àraidh dhiubh.

15 Oir ma's e an tilgeadh-san air falbh réiteachadh an domhain; ciod e an ath-ghabhail, ach beatha o na marbhaibh?

16 Oir ma ta an ceud-thoradh naomh, tha am meall *naomh* mar an ceudna : agus ma ta an fhreumh naomh, *tha* na geuga *mar sin* mar an ceudna.

17 Agus ma tha cuid do na geugaibh air am briseadh dheth, agus gu bheil thusa, a bha a' d' chrann-oladh fiadhaich, air do shuidheachadh 'nam measg, agus maille riu a' faotainn comhpàirt do fhréimh agus do reamhrachd a chroinn-oladh ;

18 Na dèan uail an aghaidh nan geug : ach ma nì thu uail 'nan aghaidh, cha tusa a dh'-iomchaires an fhreumh, ach an fhreumh thusa.

19 Their thu uime sin, Bhriseadh dheth na geuga, chum gu suidhichteadh mise 'nan àit.

20 Ro mhaith ; air son am mì-chreidimh bhriseadh iadsan dheth, agus a ta thusa a' seasamh tre chreidimh. Na bì àrd-inntinneach, ach fo eagal.

21 Oir mur do chaomhain Dia na geuga nàdurra, *biodh eagal ort* nach caomhain e thusa mar an ceudna.

22 Feuch uime sin maitheas agus geur-cheartas Dé : geur-cheartas d'an taobh-san a thuit ; ach do d' thaobh-sa, maitheas, ma bhuaanaicheas tu 'na mhaith-eas ; agus mur buanaich, gearrar dheth thusa mar an ceudna.

23 Agus suidhichear iadsan mar an ceudna, mur buanaich iad 'nam mì-chreidimh : oir a ta Dia comasach air an suidheachadh a ris.

24 Oir ma ghearradh thusa as a' chrann-oladh a bha fiadhaich a thaobh nàduir, agus gu'n do shuidhicheadh ann an deadh chrann-oladh thu an aghaidh nàduir ; cia mòr a's mò na sin a shuidhichear na *geuga* nàdurra 'nan crann-oladh féin ?

25 Oir cha b' àill leam, a

bhràithre, sibhse bhi aineolach air an rùn-dìomhair so, (chum nach biodh sibh glic 'nur barail féin,) gu'n do thàrladh doille ann an cuid do Israel, gus an tig iomlaineachd nan Cinneach a steach.

26 Agus mar sin bithidh Israel uile air an tèarnadh : mar a ta e sgrìobhta, 'Thig am Fear-saoraidh o Shion, agus tionndaidhidh e mì-dhiadhachd o Iacòb :

27 Oir is e so mo choimhcheangal riu, 'nuair a bheir mi air falbh am peacanna.

28 Thaobh an t-soisgeil, *is* naimhdean iad air bhur sonsa : ach a thaobh an taghaidh, *tha iad* gràdhaichte air son nan aithriche.

29 Oir a ta tiodhlacan agus gairm Dhé gun aithreachas.

30 Oir mar a bha sibhse roimhe so eas-ùmhail do Dhia, ach a nis a fhuair sibh tròcair tre am mì-chreidimh-san :

31 Amhuil sin a ta iadsan san àm so eas-ùmhail, chum tre bhur tròcair-sa gu'm faigh iad tròcair mar an ceudna.

32 Oir dhruid Dia iad uile an am mì-chreidimh, chum tròcair a dhèanamh air na h-uile.

33 O doimhne saoibhris araon gliocais agus eòlais Dé ! Cia do-rannasachaidh a bhreitheanais, agus do-lorgachaidh a shligh-ean !

34 Oir cò aig an robh fios inntinn an Tighearna, no cò bu chomhairleach dha ?

35 No cò thug dha air tùs, agus a làn-diolar a ris dha e ?

36 Oir is ann uaithe-san, agus trid-san, agus air a shon-san a ta na h-uile nithe : dhasan *gu robh* glòir gu sìorruidh. Amen.

CAIB. XII.

AIR an aobhar sin guidheam oirbh, a bhràithre, tre

thròcairibh Dhé, bhur cuirp a thoirt 'nam beo-ìobairt, naomh, thaitnich do Dhia, *ni a's e* bhur seirbhis reusonta.

2 Agus na bithibh air bhur cumadh ris an t-saoghal so: ach bithibh airbhur cruth-atharrachadh tre ath-nuadhachadh bhur n-inntinn, chum gu'n dearbh sibh ciod i toil mhaith, thaitneach, agus dhiongmhalta sin Dhé.

3 Oir a ta mi ag ràdh, troimh a' ghràs a thugadh dhomh-sa, ris gach neach 'nur measg, gun smuaineachadh *uime féin* ni 's àirde na 's còir dha smuaineachadh; ach smuaineachadh am measarrachd, a réir mar a roinn Dia ris gach neach tomhas a' chreidimh.

4 Oir mar a ta mòran bhall againn ann an aon chorp, agus nach e'n t-aon ghnìomh a' th'aig gach ball;

5 Amhuil sin ged tha sinne 'nar mòran, is aon chorp ann an Crìosd sinn, agus is buill sinn gach aon fa leth d' a chéile.

6 Uime sin air bhi do thiodh-lacaibh againn, eadar-dhealachichte a réir a' ghràis a thugadh dhuinn, ma's fàidheadair-eachd, *dèanamaid fàidheadair-eachd* a réir tomhais a' chreidimh:

7 No ma's frithealadh *thugam-aid aire* d' ar frithealadh; no an tì a theagaisgeas, *thugadh e aire* d' a theagasg;

8 No an tì a bheir earail, *thugadh e aire* d' a earail: an tì a roinneas *an deirc*, *roinneadh e i* an tréibhdhireachd; an tì a riaghlas, *dèanadh se e* le dùrachd; an tì a nì tròcair, *dèanadh se e* gu suilbhir.

9 *Biodh bhur* gràdh gun cheilg. Biodh gràin agaibh do 'n olc, dlùth-leanaibh ris an nì a tha maithe.

10 *Bithibh* teo-chridheach d' a

chéile le gràdh bràthaireil, ann an urram a' toirt toisich gach aon d' a chéile:

11 Gun bhi leasg ann an gnothuichibh: dùrachdach 'nur spiorad; a' dèanamh seirbhis do 'n Tighearn:

12 A' dèanamh gàirdeachais an dòchas: foighidneach an trioblaid; maireannach ann an ùrnuigh:

13 A' comh-roinn ri uireasbhuidh nan naomh; a' gnàthachadh aoidheachd.

14 Beannaichibh an dream a ta dèanamh geur-leanmhuinn oirbh: beannaichibh, agus na mallaichibh.

15 Dèanaibh gàirdeachas maille riusan a ta ri gàirdeachas, agus caoidh maille riusan a ta ri caoidh.

16 Bithibh a dh'aon rùn d' a chéile. Na biodh bhur cion air nithibh àrda, ach cuiribh sibh féin an comh-inbhe riu-san a ta ìosal. Na bithibh glic 'nur barail féin.

17 Na ìocaibh olc air son uile do dhuine sam bith. Ulluichibh nithe ciatach am fianuis nan uile dhaoine.

18 Ma dh'fheudas e bhi, mheud 's a ta e'n comas duibh, bithibh an sith ris na h-uile dhaoineibh.

19 *A chàirde* gràdhach, na dèanaibh dìoghaltas air bhur son féin, ach thugaibh àit do 'n fheirg: oir a ta e sgrìobhta, Is leam-sa dìoghaltas; ìocaidh mi, a ta an Tighearn ag ràdh.

20 Uime sin ma' bhios do nàmhaid ocrach, thoir biadh dha; ma bhios e tartmhor, thoir deoch dha: oir le so a dhèanamh càrnaidh tu eibhle teine air a cheann.

21 Na tugadh buaidh ort leis an olc, ach thoir-sa buaidh air an olc leis a' mhaith.

CAIB. XIII.

BIODH gach anam ùmhal do na h-àrd-chumhachdaibh. Oir cha'n 'eil cumbachd ann ach o Dhia: agus na cumbachdan a ta ann, is ann le Dia a dh'òrd-uicheadh iad.

2 Air an aobhar sin ge b'e air bith a chuireas an aghaidh a' chumhachd, tha e cur an aghaidh òrduigh Dhé: agus iadsan a chuireas 'na aghaidh, gheibh iad breitheanas dhoibh féin.

3 Oir cha'n 'eil uachdarain 'nan aobhar eagail do dheadh oibribh, ach do dhroch oibribh. Uime sin am miann leat bhi gun eagal an uachdarain ort? dèan am maith, agus gheibh thu cliù uaith.

4 Oir is esan seirbhiseach Dhé chum maith dhuit. Ach ma nì thu an t-olc, biodh eagal ort; oir cha'n ann gu dìomhain a tha e giùlan a' chlàidheimh: oir is e seirbhiseach Dhé e, 'na dhioghaltair feirge air an tì a nì olc.

5 Uime sin is éigin bhi ùmhal, cha'n ann a mhàin air son feirge, ach mar an ceudna air son coguis.

6 Oir air an aobhar so tha sibh mar an ceudna a' toirt cìse dhoibh: oir is iad seirbhisich Dhé iad, a' sìor-fheitheamh air an nì so féin.

7 Air an aobhar sin thugaibh do na h-uile an dlighe féin: càin dhasan d' an *dlighear* càin, cìs dhasan d' an *dlighear* cìs, eagal dhasan d' an *dlighear* eagal, agus urram dhasan d' an *dlighear* urram.

8 Na biodh fiacha sam bith aig aon neach oirbh, ach a mhàin a chéile a ghràdhachadh: oir an tì aig am bheil gràdh do neach eile, choimhlon e an lagh.

9 Oir an nì so, Na dèan adhaltrannas, Na dèan mortadh, Na goid, Na dèan fianuis bhréige, Na sanntaich; agus ma tha àithne

sam bith eile ann, tha i air a cur sìos gu h-aithghearr fo 'n fhocal so, Gràdhaich do choimhearsnach mar thu féin.

10 Cha dèan gràdh lochd do choimhearsnach: air an aobhar sin is e an gràdh coimhlonadh an lagha.

11 Agus so, air dhuibh fios na h-aimsir a bhi agaibh, gur mith-ich dhuinn a nis mosgladh o chodal: oir a ta ar slàinte nis nì's faigse na 'nuair a chreid sinn.

12 Tha cuid mhòr do'n oidhche air dol seachad, tha an là am fagus: uime sin cuireamaid dhinn oibre an dorchadais, agus cuireamaid umainn armachd an t-soluis.

13 Gluaiseamaid gu cubhaidh mar anns an là; cha'n ann an ruidhteireachd agus am misg, no an seomradaireachd agus am macnus, no an aisith agus am farmad.

14 Ach cuiribh umaibh an Tighearn Iosa Crìosd, agus na dèanaibh ulluchadh air son na feòla, chum a h-ana-mianna a choimhlonadh.

CAIB. XIV.

GABHAIBH ris an neach a ta anmhunn sa' chreidimh, *ach* cha'n ann chum deasboireachd amharusach.

2 Oir a ta aon a' creidsinn gu'm feud e na h-uile nithe itheadh: ach a ta esan a ta anmhunn ag itheadh luibheanna.

3 Na dèanadh esan a ta 'g itheadh, tàir airsan nach 'eil ag itheadh; agus na tugadh esan nach 'eil ag itheadh, breth air an tì a dh'itheas: oir ghabh Dia ris.

4 Cò thusa a ta toirt breth air seirbhiseach duine eile? d'a mhaighstir féin seasaidh, no tuitidh e: seadh, cumar suas e;

oir is comasach Dia air a chumail 'na sheasamh.

5 Tha meas aig neach air là thar là: agus tha meas aig neach eile air gach là *mar a chéile*. Biodh làn-dearbhadh aig gach duine 'na inntinn féin.

6 An tì aig am bheil suim do'n là, is ann do'n Tighearn a tha suim aige *dha*; agus an tì aig nach 'eil suim do'n là, is ann do'n Tighearn nach 'eil suim aige *dha*. An tì a ta 'g itheadh, is ann do'n Tighearn a tha e 'g itheadh, oir tha e toirt buidheachais do Dhia; agus an tì nach 'eil ag itheadh, is ann do'n Tighearn nach ith e, agus bheir e buidheachas do Dhia.

7 Oir cha'n 'eil a h-aon againn beò dha féin, agus cha'n 'eil a h-aon againn a' bàsachadh dha féin.

8 Oir ma's beò dhuinn, is ann do'n Tighearn a tha sinn beò: agus ma's bàs duinn, is ann do'n Tighearn a tha sinn a' bàsachadh: uime sin ma's beatha no bàs dhuinn, is leis an Tighearn sinn.

9 Oir is ann chum so a fhuair Crìosd bàs, agus a dh'éirich e, agus a tha e beò a rìs, chum gu'm biodh e 'na Thighearn air na beothaibh agus air na marbh-aibh.

10 Ach c'ar son a ta thusa a' toirt breth air do bhràthair? no c'ar son a ta thusa a' dèanamh tarcuais air do bhràthair? oir seasaidh sinn gu léir am fianuis caithir-breitheanais Chrìosd.

11 Oir a ta e sgrìobhta, *Mar* is beò mise, a ta an Tighearn ag ràdh, lùbaidh gach glùn dhomhsa, agus aidichidh gach teangadh do Dhia.

12 Air an aobhar sin bheir gach aon againn cunntas uime féin do Dhia.

13 Uime sin na tugamaid

breth air a chéile ni's mò: ach gu ma feàrr leibh a' bhreth so thoirt, gun aobhar-tuiteam no oilbheim a thoirt do bhràthair.

14 Oir a ta fhios agam, agus is dearbh leam anns an Tighearn Iosa, nach 'eil ni sam bith neòghlan dheth féin: ach do'n tì a mheasas ni sam bith neòghlan, dhasan a ta e neòghlan.

15 Ach ma bhios doilgheas air do bhràthair air son bidh, a nis cha'n 'eil thu a' gluasad a réir a' ghràidh. Na sgrìos le d' bhiadh esan air son an d' fhuiling Crìosd bàs.

16 Air an aobhar sin na labhrar olc mu bhur maith.

17 Oir cha bhiadh agus deoch rìoghachd Dhé, ach fireantachd, agus sìth, agus aoibhneas san Spiorad naomh.

18 Oir ge b'e nì seirbhis do Chrìosd anns na nithibh so, tha e taitneach do Dhia, agus tha e dearbhta do dhaoineibh.

19 Uime sin leanamaid na nithe a bhios chum sìthe, agus na nithe a bhios chum togail suas a chéile.

20 Na sgrìos obair Dhé air son bidh. Gu deimhin tha na h-uile nithe glan; ach is olc do'n duine sin a dh'itheas le h-oilbheum.

21 *Is* maith an ni gun fheòil itheadh, no fion òl, no *ni air bith a dhèanamh* leis am faigh do bhràthair tuisleadh no oilbheum, no leis an dèanar lag e.

22 Am bheil creidimh agad? Biodh e agad dhuit féin am fianuis Dé: Is beannaichte an duine sin nach dìt e féin anns an ni sin a mheasas e ceaduichte.

23 Ach esan a nì eadar-dhealachadh tha e air a dhìteadh ma dh'itheas e, a chionn nach ann o chreidimh a tha e 'g itheadh: oir gach ni nach 'eil o chreidimh, is peacadh e.

CAIB. XV.

UIME sin is còir dhuinne a ta làidir, giùlan le anmhuinn-eachd na muinntir sin a ta lag, agus gun sinn féin a thoileachadh.

2 Toilicheadh gach aon againn a choimhearsnach g'a mhaith, chum a thogail suas.

3 Oir cha do thoilich eadhon Crìosd e féin; ach a réir mar a ta e sgrìobhta, Thuit toibheum na muinntir sin a thug toibheum dhuit ormsa.

4 Oir ge b' iad nithe air bith a sgrìobhadh roimh so, is ann chum ar teagaisg-ne a sgrìobhadh iad; chum tre fhoighidin agus comhfhurtachd nan sgrìobtuir gu'm biodh dòchas againne.

5 A nis gu tugadh Dia na foighidin agus na comhfhurtachd dhuibh-sa bhi dh'aon inntinn a thaobh a chéile, a réir Iosa Crìosd:

6 Chum gu'm feud sibh a dh'aon inntinn, *agus* le aon bheul glòir a thoirt do Dhia, eadhon Athair ar Tighearna Iosa Crìosd.

7 Uime sin gabhaibh-sa r'a chéile, eadhon mar a ghabh Crìosd ruinne, chum glòire Dhé.

8 A nis a ta mi ag ràdh, Gu robh Iosa Crìosd 'na mhinisteir an timchioll-ghearraidh air son fìrinn Dé, chum geallanna nan aithriche a dhaingneachadh:

9 Agus chum gu'n tugadh na Cinnich glòir do Dhia air son a thròcair; a réir mar a ta e sgrìobhta, Air an aobhar so aidichidh mi thu am measg nan Cinneach, agus seinnidh mi *cedèl* do d' ainm.

10 Agus a ris a ta e ag ràdh, Dèanaibh gàirdeachas, a Chinn-eacha, maille r'a phobull-san.

11 Agus a ris, Molaibh an Tighearn, a Chinneacha uile,

agus thugaibh cliù dha, a shlòigh uile.

12 Agus a ris a ta Esaias ag ràdh, Bithidh freumh Iese, *ann* agus an tì a dh' éireas suas chum uachdaranachd bhi aige air na Cinnich, annsan cuiridh na Cinnich an dòchas.

13 A nis gu'n lìonadh Dia an dòchais sibhse do'n uile aoibhneas agus shìth ann an creidsinn; chum gu'm bì sibh pailt ann an dòchas, tre chumhachd an Spioraid naoimh.

14 Agus a ta cinnt agamsa féin do 'ur taobh-sa, mo bhràithre, gu bheil sibhse làn do mhaitheas, air bhur lìonadh leis an uile eòlas, agus comasach mar an ceudna air a chéile a chomhairleachadh.

15 Gidheadh, a bhràithre, sgrìobh mi do 'ur n-ionnsuidh leis an tuilleadh dànadais, an càil-eigin, mar gu cuirinn an cuimhne sibh, air son a ghràis a thugadh dhomh-sa o Dhia,

16 Ionnsu gu'm bithinn a'm' mhinisteir aig Iosa Crìosd do na Cinnich, a' frithealadh soisgeil Dé, chum gu'm biodh tabhartas nan Cinneach taitneach, air a naomhachadh leis an Spiorad naomh.

17 Uime sin tha aobhar uail agam tre Iosa Crìosd, anns na nithibh sin a bhuineas do Dhia.

18 Oir cha bhi dànachd agam labhairt air a' bheag do na nithibh sin, nach d' oibrich Crìosd leam, chum na Cinnich a dhèanamh ùmhal am focal agus an gnìomh.

19 Le cumhachd chomharan agus mhìorbhuilean, le cumhachd Spioraid Dé; ionnsu o Ierusalem agus mu'n cuairt gu Illicum, gu'n do làn-shearmonaich mi soisgeul Chrìosd.

20 Seadh, mar sin bha ro-dhéidh agam air an t-soisgeul a

shearmonachadh, cha 'n ann san ionad san robh Crìosd air ainmeachadh, chum nach togainn air bunait neach eile :

21 Ach a réir mar a ta e sgriobhta, Chì iadsan ris nach do labhradh uime ; agus tuigidh iadsan, nach cuala.

22 Uime sin mar an ceudna chuireadh gu minic bacadh orm o theachd do 'ur n-ionnsuidh-sa.

23 Ach a nis do bhrìgh nach 'eil agam ionad ni's mò anns na crìochaibh so, agus gu bheil mòr-thogradh agam o cheann mòrain bhliadhnacha teachd do 'ur n-ionnsuidh-sa ;

24 Ge b'e uair a thriallas mi do 'n Spàinn, thig mi do 'ur n-ionnsuidh-sa : oir tha dùil agam sibhse fhaicinn san dol seachad, agus bhì air mo thoirt air m' aghaidh leibhse chum an ionaid sin, ma bhios mi air tùs an càil-eigin air mo lìonadh le 'ur *comh-luadar-sa*.

25 Ach a nis tha mi dol gu Ierusalem, a' frithealadh do na naomhaibh.

26 Oir bu toil leo-san ann am Macedonia, agus ann an Achaia, còmh-roinn àraidh a dhèanamh ris na naomhaibh bochda ta ann an Ierusalem.

27 Bu toil leo *gu deimhin*, agus tha iad fo fhiachaibh dhoibh. Oir ma rinneadh na Cinnich 'nan luchd combpàirt d'an nithibh spioradail-san, is còir dhoibh ministreileachd a dhèanamh dhoibh-san sna nithibh a bhuineas do 'n choluinn.

28 Uime sin air dhomh so a chrìochnachadh, agus an uair a sheulaicheas mi an toradh so dhoibh, gabhaidh mi do 'ur taobh-sa do 'n Spàinn.

29 Agus a ta fhios agam, air dhomh teachd do 'ur n-ionnsuidh-sa, gu'n tig mi ann an

lànachd beannachaidh soisgeil Chrìosd.

30 A nis guidheam oirbh, a bhràithre, air sgàth an Tighearna Iosa Crìosd, agus air son gràidh an Spioraid, gu'n dèan sibh gleachda maille rium-sa ann an ùrnuighibh air mo shon ri Dia ;

31 Chum gu saorar mi uathasach nach 'eil a' creidsinn ann an Iudea ; agus chum gu'm bì mo sheirbhis air son Ierusalem, taitneach do na naomhaibh :

32 Chum gu'n tig mi do 'ur n-ionnsuidh-sa le h-aoibhneas tre thoil Dé, agus gu faigh mi suaimhneas maille ribh.

33 A nis *gu robh* Dia na sìthe maille ribh uile. Amen.

CAIB. XVI.

THA mi ag earbadh ribh Phebe ar piuthar, a ta 'na searbh-anta do 'n eaglais a tha ann an Cenchrea :

2 Chum gu'n gabh sibhe rithe anns an Tighearn, mar is cubhaidh do naomhaibh, agus gu'n dèan sibh còmh-nadh rithe anns gach gnothuch anns am bì feum aice oirbh : oir rinn i féin còmh-nadh ri mòran, agus rium-sa mar an ceudna.

3 Cuiribh fàilte air Priscila agus Acuila mo chomh-oibrich-ean ann an Iosa Crìosd :

4 (Muinntir a leag sìos am muineal féin air son m'anama-sa : d'am bheil a' toirt buidheachais cha'n e mhàin mise, ach mar an ceudna eaglaisean nan Cinneach uile.)

5 Mar an ceudna cuiribh fàilte air an eaglais a tha 'nan tigh-san. Cuiribh fàilte air Epenetus a's ionmhuinn leam-sa, neach is e ceud thoradh Achaia do Chrìosd.

6 Cuiribh fàilte air Muire, a rinn saothair mhòr air ar son-ne.

7 Cuiribh fàilte air Androni-

cus agus Iunias mo luchd-dàimh agus mo chomh-phrìosanaich, a tha cliùiteach am measg nan abstol, agus a bha ann an Crìosd romham-sa.

8 Cuiribh fàilte air Amplias a's ionmhuinn leam-sa san Tighearn.

9 Cuiribh fàilte air Urbanus ar comh-oibriche ann an Crìosd, agus air Stachis fear mo ghràidhsa.

10 Cuiribh fàilte air Apelles a tha dearbhta ann an Crìosd. Cuiribh fàilte orra-san a tha do *theaghlach* Aristobulus.

11 Cuiribh fàilte air Herodion mo charaid. Cuiribh fàilte orra-san do *theaghlach* Narcisuis, a tha san Tighearn.

12 Cuiribh fàilte air Triphena agus Triphòsa, *mnai* a tha saoihtreachadh san Tighearn. Cuiribh fàilte air Persis a's ionmhuinn leam, bean a shaothraich gu mòr anns an Tighearn.

13 Cuiribh fàilte air Rufus a tha taghta san Tighearn, agus air a mhàthair agus mo mhàthair-sa.

14 Cuiribh fàilte air Asin-critus, Phlegon, Hermas, Patrobas, Hermes, agus air na bràithribh a tha maille riu.

15 Cuiribh fàilte air Philologus, agus Iulia, air Nereus, agus a phiuthar, agus Olimpas, agus na naoimh uile a tha maille riu.

16 Cuiribh fàilte air a chéile le pòig naoimh. Tha eaglaisean Chrìosd a' cur fàilte oirbh.

17 A nis guidheam oirbh, a bhràithre, comharaichibh iadsan a tha togail roinnean agus a' toirt oilbheim, an aghaidh an teagaisg a dh'fhòghluim sibh; agus seachnaibh iad.

18 Oir cha'n 'eil an leithide so a' dèanamh seirbhis do 'ur

Tighearn Iosa Crìosd, ach d'am broinn féin; agus a ta iad le briathraibh mìlse agus le mìodail a' mealladh cridheacha na muinntir sin a ta neo-lochdach.

19 Oir a ta bhur n-ùmlachd-sa air teachd chum nan uile *dhaoine*. Uime sin a ta mise a' dèanamh gàirdeachais do 'ur taobh-sa: gidheadh b' àill leam sibhse bhi glic chum a' mhaith, ach aon-fhillte thaobh an uilc.

20 Agus bruthaidh Dia na sìthe Satan fo 'ur cosaibh gu h-aithghearr. Gràs ar Tighearna Iosa Crìosd *gu robh* maille ribh. Amen.

21 Tha Timoteus mo chomh-oibriche a' cur fàilte oirbh, agus Lucius agus Iason agus Sosipater, mo luchd-dàimhe.

22 Tha mise Tertius, a sgrìobh an litir so, a' cur fàilte oirbh san Tighearn.

23 Tha Gaius, a tha toirt aoidheachd dhomh-sa agus do'n eaglais uile, a' cur fàilte oirbh. Tha Erastus stiùbhard a' bhaile a' cur fàilte oirbh, agus Cuartus bràthair.

24 Gràs ar Tighearna Iosa Crìosd *gu robh* maille ribh uile. Amen.

25 A nis dhasan a tha comasach air sibhse a dhaingneachadh a réir mo shoisgeil-sa, agus searmonachaidh Iosa Crìosd, (a réir foillseachaidh an rùin-diomhair, a bha am folach o thoiseach an domhain,

26 Ach a dh'fhoillsicheadh a nis, agus tre sgrìobtuiribh nam fàidhean, a réir àithne an Dé bhith-bhuain, a tha air a dhèanamh aithnichte do na h-uile chinnich chum ùmhlachd a' chreidimh.)

27 Do Dhia a tha mhàin glic, *gu robh* glòir tre Iosa Crìosd gu sìorruidh. Amen.

CEUD LITIR AN ABSTOIL PHOIL CHUM NAN CORINTIANACH.

CAIB. I.

P**O**L a ghairmeadh *gu bhi* 'na abstol do Iosa Crìosd, tre thoil Dé, agus Sostenes *ar bràth-air*,

2 Chum eaglais Dé, a ta ann an Corintus, chum na dream a tha air an naomhachadh ann an Iosa Crìosd, air an gairm *gu bhi* 'nan naoimh, maille rìusan uile a tha gairm air ainm ar Tighearna Iosa Crìosd anns gach àit, an *Tighearna-san*, agus ar *Tighearna-ne* :

3 Gràs dhuibh-sa, agus sìth o Dhia ar n-Athair, agus o 'n Tighearn Iosa Crìosd.

4 Tha mi toirt buidheachais do m' Dhia a ghnàth do 'ur taobh-sa, air songràis Dhé a thugadh dhuibhse ann an Iosa Crìosd :

5 Air son gu'n d'rinneadh saoi bhir leis-san sibh anns gach uile ni, anns gach ùr-labhradh, agus anns gach eòlas :

6 A réir mar a dhaingnicheadh fianuis Chrìosd annaibh :

7 Ionnnus nach 'eil sibh an déidh-làimh ann an tiodhlac sam bith ; a' feitheamh ri foillseachadh ar Tighearna Iosa Crìosd,

8 Neach mar an ceudna a dhaingnicheas sibh gus a' chrìch, *chum gu'm bi sibh* neo-lochdach ann an là ar Tighearna Iosa Crìosd.

9 Tha Dia firinneach, leis an do ghairmeadh sibh chum comh-chomuinn a mhic Iosa Crìosd ar Tighearna.

10 A nis guidheam oirbh, a bhràithre, tre ainm ar Tighearna Iosa Crìosd, gu'n labhair sibh uile an t-aon ni, agus nach

bì roinnean'nur measg ; ach gu'm bi sibh ceangailte r' a chéile gu dìongmhalta ann an aon inntinn, agus ann an aon bharail.

11 Oir nochdadh dhomh-sa, a bhràithre, m'ur timchioll-sa, leo-san a tha do theaghlach Chloe, gu bheil comhstri 'nur measg.

12 A nis a ta mi ag ràdh so, gu'n abair gach aon agaibh, Is le Pòl mise ; agus is le Apollos mise ; agus is le Cephas mise ; agus is le Crìosd mise.

13 Am bheil Crìosd air a roinn ? An e Pòl a chéusadh air bhur son ? no an ann an ainm Phòil a bhaisteadh sibh ?

14 Tha mi toirt buidheachais do Dhia, nach do bhaist mi aon agaibh, ach Crispus agus Gaius :

15 Air eagal gu'n abradh neach, gu'n do bhaist mi a'm ainm féin.

16 Agus bhaist mi mar an ceudna teaghlach Stephanais : a thuilleadh air so, cha'n fhios domh an do bhaist mi aon neach eile.

17 Oir cha do chuir Crìosd mi a bhaisteadh, ach a shearmonachadh an t-soi-geil ; cha'n ann an gliocas focail, chum nach cuirteadh cranu-céusaidh Chrìosd an neo-bhrìgh.

18 Oir a ta searmonachadh a' chroinn-chéusaidh 'na amaid-eachd dhoibh-san a chaillear ; ach dhuinne a shaorar, is e cumhachd Dhé e.

19 Oir a ta e sgrìobhta, Sgrìosaidd mi gliocas nan *daoine glìce*, agus cuiridh mi air cùl tuigse nan *daoine* tuigseach.

20 C' àit am bheil an duine glic? c' àit am bheil an sgriobhaiche? c' àit am bheil deasboir an t-saoghail so? Nach do rinn Dia gliocas an t-saoghail so amaideach?

21 Oir an uair, ann an gliocas Dé, nach b' àithne do'n t-saoghal, tre ghliocas, Dia, bu toil le Dia le amaideachd an t-searmonachaidh iadsan a thèarnadh a ta creidsiun.

22 Oir a ta na h-Iudhaich ag iarraidh comhara, agus a ta na Greugaich a' sireadh gliocais:

23 Ach a ta sinne a' searmonachadh Chrìosd air a chéusadh, 'na cheap-tuislidh do na h-Iudhaich, agus do na Greugaich 'na amaideachd;

24 Ach dhoibh-san a ta air an gairm, araon Iudhaich agus Greugaich, Crìosd cumhachd Dhé, agus gliocas Dhé:

25 Do bhrìgh gur glìce amaid-eachd Dhé na daoine, agus gur treise anmhuinneachd Dhé na daoine.

26 Oir chì sibh féin bhur gairm, a bhràithre, nach iomadh iad a ta glic a thaobh na feòla, nach iomadh cumhachdach, nach iomadh uasal a ta air an gairm:

27 Ach ròghnuich Dia nithe amaideach an t-saoghail so, chum gu'n cuireadh e nàire air na daoineibh glìce; agus ròghnuich Dia nithe anmhuinn an t-saoghail, chum gu'n cuireadh e gu nàire na nithe cumhachdach;

28 Agus nithe an-usal an t-saoghail, agus nithe tarcuiseach ròghnuich Dia, agus na nithe nach 'eil ann, chum gu'n cuir-eadh e na nithe a ta ann, an neo-bhrìgh:

29 Ionnnus nach dèanadh feòil sam bith uail 'na fhianuis.

30 Ach uaithe-san a ta sibhse ann an Iosa Crìosd, neach a rinneadh dhuinne le Dia 'na

ghliocas, 'na fhireantachd, 'na naomhachd, agus 'na shaorsa:

31 Ionnnus, a réir mar a ta e sgriobhta, An tì a nì uail, dèanadh e uail anns an Tighearn.

CAIB. II.

A GUS an uair a thàinig mise do 'ur n-ionnsuidh-sa, a bhràithre, cha b' ann le òirdheirceas cainnte, no gliocais a thàinig mi, a' cur an céill duibh teisteis Dhé.

2 Oir chuir mi romham gun eòlas a ghabhail air nì sam bith 'nur measg, ach air Iosa Crìosd, agus esan air a chéusadh.

3 Agus bha mi 'nur measg ann an anmhuinneachd, agus ann an eagal, agus am mòr-chrith.

4 Agus cha robh m' fhocal agus mo shearmonachadh ann am briathraibh mìlse gliocais dhaoine, ach ann an làn-dearbhadh an Spioraid, agus a' chumhachd:

5 Chum gu'm biodh bhur creidimh-sa cha'n ann an gliocas dhaoine, ach an cumhachd Dhé.

6 Ach gidheadh tha sinn a' labhairt gliocais am measg nan daoine iomlan: ach cha'n e gliocas an t-saoghail so, no uachdarana an t-saoghail so, a théid an neo-bhrìgh:

7 Ach tha sinn a' labhairt gliocais Dé ann an rùn-dìomhair, a' ghliocais sin a bha folaichte, a dh'òrduich Dia roimh an t-saoghal chum ar glòir-ne:

8 An gliocas nach b' àithne do aon neach do uachdaranaibh an t-saoghail so: oir nam b' àithne dhoibh e, cha chéusadh iad Tighearn na glòire.

9 Ach a réir mar a ta e sgriobhta, Cha'n fhaca sùil, agus cha chuala cluas, agus cha d' thàinig ann an cridhe duine, na nithe a dh'ulluich Dia dhoibh-san aig am bheil gràdh dha.

10 Ach dh'fhoillsich Dia dhuinne iad le a Spiorad féin: oir tha an Spiorad a' rannsachadh nan uile nithe, eadhon, nithe doimhne Dhé.

11 Oir cò an duine d'an aithne nithe duine, ach do spiorad an duine a ta ann? mar sin cha'n 'eil fios aig neach sam bith air nithibh Dhé, ach aig Spiorad Dhé.

12 A nis fhuair sinne, cha'n e spiorad an t-saoghail, ach an Spiorad a ta o Dhia; chum gu'm biodh aithne againn air na nithibh sin a thugadh dhuinn gu saor o Dhia.

13 Nithe mar an ceudna a ta sinn a' labhairt, cha'n ann am briathraibh a theagaisgeas gliocas dhaoine, ach am *briathraibh* a theagaisgeas an Spiorad naomh; a' coimhneas nithe spioradail ri nithibh spioradail.

14 Ach cha ghabh an duine nàdurra ri nithibh Spioraid Dé: oir is amaideachd leis iad; agus cha'n 'eil e'n comas da eòlas a ghabhail *orra*, do bhrìgh gur ann air mhodh spioradail a thuigear iad.

15 Ach bheir an duine spioradail breth air na h-uile nithibh, gidheadh cha'n 'eil e féin fo bhrèth duine sam bith.

16 Oir cò d'am b' aithne inntinn an Tighearn, agus a theagaisgeas e? ach tha inntinn Chrìosd againne.

CAIB. III.

A GUS, a bhràithre, cha'n fheudainn-sa labhairt ribhse mar ri *daoineibh* spioradail, ach mar ri *daoineibh* feòlmhor, amhuil ri naoidheanaibh ann an Crìosd.

2 Bheathaich mi le bainne sibh, agus cha'n ann le biadh: oir fathast cha b'urrainn sibh a ghabhail, agus a nis féin cha'n urrainn sibh.

3 Oir a ta sibh fathast feòlmhor: oir a thaobh gu bheil farmad 'nur measg, agus strì; agus aimhréite, nach 'eil sibh feòlmhor, agus ag imeachd mar dhaoine?

4 Oir an uair a ta neach ag ràdh, *Is le Pòl mise*; agus neach eile, *Is le Apollos mise*; nach 'eil sibh feòlmhor?

5 Cò e ma seadh Pòl, agus cò e Apollos, ach ministeirean tre'n do chreid sibh, eadhon mar a thug an Tighearn do gach aon?

6 Shuidhich mise, dh' uisgich Apollos: ach 'se Dia a thug am fàs.

7 Uime sin ma seadh, cha'n 'eil anns an tì a shuidhicheas no anns an tì a dh' uisgicheas, brìgh sam bith; ach ann an Dia a ta toirt an fhàis.

8 An tì a shuidhicheas, agus an tì a dh' uisgicheas, is aon iad: agus gheibh gach aon a dhuais féin, a réir a shaothair féin.

9 Oir is comh-luchd-oibre do Dhia sinne: is sibhse treabhachas Dhé, *is sibh* aitreabh Dhé.

10 A réir gràis Dé a thugadh dhomh-sa, mar fhear-togail aitreabh glic leag mi am bunait, agus a ta neach eile a' togail air, ach thugadh gach neach an aire cionnus a thogas e air.

11 Oir bunait eile cha'n urrainn duine sam bith a leagadh, ach *am bunait* a leagadh a cheana, eadhon Iosa Crìosd.

12 A nis ma thogas neach air a' bhunait so, òr, airgiod, clacha luachmhor, fiodh, fear, connlach;

13 Nithear obair gach aoin duine follaiseach: oir nochdaidh an là i, do bhrìgh gu'm foillsichear i le teine; agus dearbhaidh an teine obair gach aoin, ciod is gnè dh'i.

14 Ma dh' fhanas obair neach

sam bith a thog e air, gheibh e duais.

15 Ma loisgear obair neach sam bith, fuilgidh e call: ach saorar e féin; gidheadh mar tre theine.

16 Nach 'eil fhios agaibh gur sibh teampull Dé, agus gu bheil Spiorad Dé, 'na chòmhnuidh annaibh?

17 Ma thruailleas neach air bith teampull Dhé, sgriosaidh Dia an tì sin: oir a ta teampull Dhé naomh, agus is sibhse e.

18 Na mealladh neach air bith e féin: ma shaoileas neach air bith 'nur measg *e féin* bhi glic san t-saoghal so, biodh e 'na amadan, chum gu 'm bì e glic.

19 Oir is amaideachd aig Dia gliocas an t-saoghail so: oir a ta e sgriobhta, Glacaidh e na daoine glice 'nan innleachdaibh féin.

20 Agus a rìs, Is aithne do 'n Tighearn smuainte nan daoine glice, gur diomhain iad.

21 Uime sin na dèanadh neach air bith uail á daoinibh: oir is leibhse na h-uile nithe:

22 Ma 'se Pòl, no Apollos, no Cephas, no an saoghal, no beatha, no bàs, no nithe a ta làthair, no nithe a ta ri teachd; is leibhse iad uile;

23 Agus is le Crìosd sibhse; agus is le Dia Crìosd.

CAIB. IV.

BIODH a shamhuil so do mheas aig duine dhinne, mar mhinisteiribh Chrìosd, agus mar stiùbhardaibh rùna-diomhaire Dhé.

2 Os bàrr iarrar ann an stiùbhardaibh, gu faighear neach dìleas.

3 Ach agam-sa is ro-bheag an ni gu 'n tugtadh breth orm leibhse, no le breitheanas duine: seadh, cha 'n 'eil mi toirt breth orm féin.

4 Oir cha 'n fhios domh ni sam bith do m' thaobh féin; gidheadh cha 'n 'eil mi le so air m'fhìreanachadh: ach is e an Tighearn an Tì a bheir breth orm.

5 Uime sin na tugaibh breth air ni sam bith roimh an àm, agus an tig an Tighearn, neach faraon a bheir gu soilleireachd nithe folaichte an dorchadais, agus a dh' fhoillsicheas comhairlean nan cridheachan: agus an sin gheibh gach neach cliù o Dhia.

6 Agus, a bhràithre, ghabh mi na nithe so a m' ionnsuidh féin, agus a dh' ionnsuidh Apollòis ann an samhladh, air bhur sonsa; chum gu fòghlumadh sibh uainne, gun bharail a bhi agaibh *air daoinibh* os ceann na bheil sgriobhta, chum nach biodh a haon agaibh air a shéideadh suas air son aoin duine an aghaidh duine eile.

7 Oir cò tha dèanamh eadar-dhealachaidh ortsa *o neach eile*? Agus ciod e a ta agad nach d' fhuair thu? a nis ma fhuair thu e, c'ar son a ta thu dèanamh uail mar nach faigheadh tu e?

8 A nis tha sibh sàitheach, a nis rinneadh saoi bhir sibh, riogh-aich sibh as ar n-eugmhais-ne: Agus bu mhiann leam gu 'm bu rìghre sibh, chum gu 'm biodh maid-ne 'nar rìghribh maille ribh.

9 Oir is i mo bharail gu 'n do chuir Dia sinne na h-abstoil a mach mu dheireadh, mar dhream a ta air an òrduchadh chum bàis. Oir rinneadh sinn 'nar ball-amhairc do 'n t-saoghal, agus do ainglibh, agus do dhaoinibh.

10 *Is* amadain sinne air son Chrìosd, ach a ta sibhse glic ann an Crìosd: *tha* sinne lag, ach a ta sibhse làidir: a ta sibhse ann an urram, ach sinne ann an eas-urram.

11 Gus an uair so féin, tha sinn araon ocrach, agus iotmhor, agus lomnochd, agus air ar bualadh le dornaibh, agus gun aon àite-còmhnuidh seasmhach againn ;

12 Agus ri saothair, ag oibreachadh le ar làmhaidh féin : Air fulang anacainnt dhuinn, tha sinn a' beannachadh : 'nuair a gheur-leanar sinn tha sinn 'ga fhulang :

13 Air faghail toibheim dhuinn, tha sinn a' guidhe : rinneadh sinn mar shalachar an t-saoghail, mar anabas nan uile nithe gus an là'n diugh :

14 Cha'n 'eil mi a' sgrìobhadh nan nithe so a chur nàire oirbh, ach mar mo chloinn ghràdhaich a ta mi 'gur comhairleachadh.

15 Oir ged bhi deich mìle luchd-teagaisg agaibh ann an Crìosd, gidheadh *cha'n 'eil agaibh* mòran aithriche : oir ann an Iosa Crìosd, ghin mise sibh troimh an t-soisgeul.

16 Uime sin guidheam oirbh, bithibh 'nur luchd-leanmhuinn ormsa.

17 Chum na crìche so chuir mi Timoteus do 'ur n-ionnsuidh, neach a ta 'na mhac gràdhach dhomh, agus dileas san Tighearna, neach a chuireas an cuimhne dhuibh mo shlighean-sa a ta ann an Crìosd, a réir mar a ta mi teagasg anns gach àit anns gach eaglais.

18 A nis a ta cuid air an séideadh suas, mar nach tiginn do 'ur n-ionnsuidh.

19 Gidheadh thig mi do 'ur n-ionnsuidh gu h-aithghearr, ma's toil leis an Tighearn, agus bithidh fios agam, cha'n ann air cainnt na muinntir a ta air an séideadh suas, ach air an cumhachd.

20 Oir cha'n ann am focal a ta rìoghachd Dhé, ach ann an cumhachd.

21 Ciod is àill leibh ? An tig mi do 'ur n-ionnsuidh le slait, no ann an gràdh, agus *ann* an spiorad na macantachd ?

CAIB. V.

THAE air aithris gu coitchionn *gu bheil* neòghloine 'nur measg, agus a leithid sin do neòghloine, nach 'eil uiread as air ainmeachadh am measg nan Cinneach, gu 'm biodh aig neach bean 'athar.

2 Agus a ta sibh air bhur séideadh suas, agus cha d' rinn sibh bròn mar bu chòir. chum gu tugtadh air falbh uaibh am fear a rinn an gnìomh so.

3 Oir gu deimhin air dhomhsa bhi uaibh an corp, ach a làthair agaibh an spiorad, thug mi breth cheana, mar gu bithinn a làthair, air an neach a rinn so mar so ;

4 An ainm ar Tighearna Iosa Crìosd, air dhuibhse, agus do m' spiorad-sa bhi cruinn an ceann a chéile, maille ri cumhachd ar Tighearna Iosa Crìosd,

5 A shamhuil so do dhuine a thoirt thairis do Shatan chum sgrios na feòla, chum gu 'm bi an spiorad air a shaoradh ann an là an Tighearna Iosa.

6 Cha 'n 'eil bhur n-uaill maith : nach 'eil fhios agaibh gu 'n goirtich beagan do thaois ghoirt am meall uile ?

7 Glanaibh a mach uime sin an t-seann thaois ghoirt, chum gu 'm bi sibh 'nur meall nuadh, mar a ta sibh neo-ghoirtichte. Oir a ta eadhon Crìosd ar n-uan càisge air iobradh air ar son.

8 Uime sin cumamaid an fhéill, na b'ann le seann thaois ghoirt, no le taois ghoirt a' mhi-ruin agus an uile ; ach le *aran* neo-ghoirtichte an tréibhdhireis agus na firinn.

9 Sgrìobh mi do 'ur n-ionn-

suidh ann an litir, gun chomhludadar a bhi agaibh ri luchd-neòghloine.

10 Gidheadh cha'n ann gu h-uile ri luchd-neòghloine an t-saoghail so, no ri luchd-sainnt, no luchd-foireigne, no luchd-ìodhol-aoraidh; oir an sin b'èigin duibh dol a mach as an t-saoghal.

11 Ach a nis sgrìobh mi do'ur n-ionnsuidh, gun chomhludadar a ghléidheadh, ma ta neach air bith ris an abrar bràthair 'na fhear-neòghloine, no sanntach, no 'na fhear-ìodhol-aoraidh, no 'na fhear-anacainnt, no 'na mhisgeir, no 'na fhear-foireigne, maille r'a leithid so do dhuine gun uiread as biadh itheadh.

12 Oir ciod e mo ghnòthuchsa breth a thoirt orra-san a ta am muigh? nach 'eil sibhse a' toirt breth air an dream a ta stigh?

13 Ach a ta Dia a' toirt breth orra-san a ta an leth muigh. Uime sin cuiribh air falbh an droch dhuine *sin* as bhur meadhon féin.

CAIB. VI.

AM bheil a chridhe aig aon neach agaibh, aig am bheil cùis an aghaidh duine eile, dol fo bhreitheanas nan daoine eucorach, agus cha'n ann fo *bhreitheanas* nan naomh?

2 Nach 'eil fhios agaibh gu'n toir na naomh breth air an t-saoghal? agus ma bheirear breth air an t-saoghal leibhse, an e nach fiù sibh bhi 'nur breithibh air na cùisibh a's lugha?

3 Nach 'eil fhios agaibh gu'n toir sinne breth air ainglibh? cia mò na sin air nithibh a bhuineas do'n bheatha so?

4 Uime sin ma tha breitheanas agaibh mu thimchioll nan nithe sin a bhuineas do'n bheatha so, cuiribh 'nan suidhe *chum breith-*

eanais an dream a's lugha meas anns an eaglais.

5 Chum bhur nàire tha mi a' labhairt. An ann mar sin nach 'eil aon duine glic 'nur measg? nach 'eil fiù a h-aon a's urrainn breth a thoirt eadar a bhràithre?

6 Ach a ta bràthair a' dol gu lagh le bràthair, agus so an làthair nan ana-creideach.

7 A nis uime sin a ta gu cinnteach lochd 'nur measg, do bhrìgh gu bheil sibh a' dol gu lagh r'a chéile: c'ar son nach fèarr leibh eucoir fhulang? c'ar son nach fèarr leibh calldach a ghabhail?

8 Gidheadh a ta sibh a' dèanamh eucoir agus dìobhail, agus sin air *bhur* bràithribh?

9 Nach 'eil fhios agaibh nach sealbhaich luchd dèanamh na h-eucorach rioghachd Dhé? Na meallar sibh: cha sealbhaich luchd-strìopachais, no luchd-ìodhol-aoraidh, no luchd-adhaltrannais, no luchd-macnuis, no na daoine a ta ciontach do neòghloine mhi-nàdurra.

10 No gaduichean, no daoine sanntach, no misgeirean, no luchd-anacainnt, no luchd-foir-eigne, rioghachd Dhé.

11 Agus mar so bhacuid dibhse: ach a ta sibh air bhur n-ionnlad, ach a ta sibh air bhur naomhachadh; ach a ta sibh air bhur fìreanachadh ann an ainm an Tigh-earna Iosa, agus tre Spiorad ar Dé-ne.

12 Tha na h-uile nithe ceaduichtedhomh-sa, ach cha'n 'eil na h-uile nithe iomchuidh; tha na h-uile nithe ceaduichte dhomh, ach cha chuirear mi fo chumhachd ni sam bith.

13 Tha am biadh air son na bronn, agus a' bhrù air son a' bhìdh: ach sgrìosaidd Dia faraon so agus sud. A nis cha'n ann do neòghloine a tha an corp, ach

do'n Tighearn : agus an Tighearn do'n chorp.

14 Agus thog Dia faraon an Tighearn suas, agus togaidh e sinne suas tre a chumhachd féin mar an ceudna.

15 Nach 'eil fhios agaibh, gur iad bhur cuirp buill Chrìosd? uime sin an gabh mise buill Chrìosd, agus an dèan mi buill strìopaich dhiubh? Nar leigeadh Dia.

16 An e nach 'eil fios agaibh, an tì sin a tha ceangailte ri strìopaich, gur aon chorp *rithe* e? Oir (a ta e ag ràdh,) bithidh dithis 'nan aon fheòil.

17 Ach an tì a tha ceangailte ris an Tighearn, is aon Spiorad *ris e*.

18 Teichibh o strìopachas. Tha gach aon pheacadh a nì duine an leth muigh do'n chorp: ach an tì a nì strìopachas, tha e peacachadh an aghaidh a chuirp féin.

19 An e nach 'eil fhios agaibh gur e bhur corp teampull an Spioraid naoimh *a ta* annaibh, a ta agaibh o Dhia, agus cha leibh féin sibh?

20 Oir cheannachadh le luach sibh: uime sin thugaibh glòir do Dhia le bhur corp, agus le bhur spiorad, a's le Dia.

CAIB. VII.

A NIS a thaobh nan nithe mu'n do sgrìobh sibh a m' ionnsuidh: *Is* maith do fhear gun bheantuinn ri mnaoi.

2 Gidheadh, chum strìopachas *a sheachnadh*, biodh a bhean féin aig gach fear, agus aig gach mnaoi a fear féin.

3 Thugadh am fear an deadh-ghean dligheach do'n mhnaoi; agus a' bhean mar an ceudna do'n fhear.

4 Cha'n 'eil comas a cuirp féin aig a' mhnaoi, ach aig an

fhear: agus mar an ceudna cha'n 'eil comas a chuirp féin aig an fhear, ach aig a' mhnaoi.

5 Na cumaibh bhur dlighe o chéile, ach le toil a chéile rè tamuill, chum sibh féin a thoirt do thrasgadh agus do ùrnuigh; agus thigibh cuideachd a ris, chum nach buair Satan sibh air son bhur neo-gheamnuidheachd.

6 Ach tha mi a' labhairt so mar ni ceaduichte, *agus* cha'n ann mar àithne.

7 Oir bu mhiann leam gu'm biodh na h-uile dhaoine mar mi féin: gidheadh a ta a thiodhlac féin aig gach duine o Dhia, aig aon neach mar so, agus aig neach eile mar sud.

8 Uime sin a ta mi ag ràdh ris an dream nach 'eil pòsda, agus ris na bantrachaibh, *Is* maith dhoibh ma dh'fhanas iad eadhon mar a ta mise.

9 Gidheadh mur fheudar leo iad féin a ghléidheadh *geamnuidh*, pòsadh iad: oir is feàrr pòsadh na losgadh.

10 Agus dhoibh-san a ta pòsda tha mi ag àithneadh, *gidheadh* cha mhise, ach an Tighearn, gun a' bhean a dhealachadh r' a fear:

11 Ach ma dhealaicheas i, fanadh i gun phòsadh, no biodh i réidh r' a fear: agus na cuir-eadh am fear uaith *a bhean*.

12 Ach ris a' chuid eile a ta mise ag ràdh, cha'n e an Tighearn, Ma bhios aig bràthair sam bith bean ana-creideach, agus gu bheil i toileach còmhnuidh a ghabhail maille ris, na cuireadh e uaith i.

13 Agus a' bhean aig am bheil fear ana-creideach, agus gu bheil esan toileach còmhnuidh a ghabhail maille rithe, na cuir-eadh i uaipe e.

14 Oir a ta am fear ana-creideach air a naomhachadh leis a

mhnai, agus a ta a' bhean ana-creideach air a naomhachadh leis an fhear: no bhiodh bhur clann neòghlan; ach a nis a ta iad naomha.

15 Ach ma dh' fhalbhas am fear ana-creideach, falbhadh e. Cha 'n 'eil bràthair no piuthar fo dhaorsa 'nan leithidibh sin do chàsaibh: ach ghairm Dia sinne chum sìthe.

16 Oir ciod am fios a ta agad-sa, O bhean, nach saor thu t'fhear? no ciod am fios a ta agad-sa, O fhir, nach saor thu do bhean?

17 Ach a réir mar a roinn Dia ris gach duine, mar a ghairm an Tighearn gach aon, mar sin gluaiseadh e: agus mar sin a ta mise 'g òrduchadh anns na heaglaisibh uile.

18 An do ghairmeadh neach sam bith agus e timchioll-ghearrta? na dèanar e neo-thimchioll-ghearrta: an do ghairmeadh neach sam bith gun e bhi timchioll-ghearrta? na timchioll-ghearrar e.

19 Cha 'n 'eil éifeachd san timchioll-ghearradh, agus cha 'n 'eil éifeachd san neo-thimchioll-ghearradh, ach ann an coimhead àitheanta Dhé.

20 Fanadh gach aon anns a' ghairm anns an do ghairmeadh e.

21 An do ghairmeadh thu a'd' sheirbhiseach? na biodh suim agad dheth; ach ma dh'fheudas tu bhi saor, gu ma h-e sin do roghainn.

22 Oir an tì a ghairmeadh san Tighearn 'na sheirbhiseach, is duine saor an Tighearn e: mar an ceudna an tì a ghairmeadh agus e saor, is e seirbhiseach Chrìosd e.

23 Cheannachadh air luach sibh; na bithibh 'nur seirbhisich do dhaoibh.

24 A bhràithre, san staid anns

an do ghairmeadh gach neach, an sin fanadh e maille ri Dia.

25 A nis thaobh òighean, cha 'n 'eil àithne agam o'n Tighearn: gidheadh tha mi toirt breth, mar neach a fhuair tròcair o'n Tighearn gu bhi dìleas.

26 Tha mi a' meas uime sin gu bheil so maith air son na teanntachd a ta làthair, a ta mi ag ràdh, gu bheil e maith do dhuine bhi mar sin.

27 Am bheil thu ceangailte ri mnai? na iarr fuasgladh. Am bheil thu fuasgailte o mhnai? na iarr bean.

28 Ach ma phòsas tu, cha do pheacaich thu; agus ma phòsas òigh, cha do pheacaich i: gidheadh, bithidh aig an leithidibh so trioblaid san fheòil; ach tha mi 'gur caomhnadh.

29 Ach a ta mi ag ràdh so, a bhràithre, gu bheil an aimsir goirid sna bheil ri teachd: ionnus faraon gu'm bì iadsan aig am bheil mnà, mar nach biodh mnà aca;

30 Agus iadsan a ta ri caoidh, mar nach biodh iad ri caoidh; agus iadsan a ta ri gàirdeachas, mar mhuinntir nach 'eil ri gàirdeachas; agus iadsan a ta ri ceannachd, mor dhaoine nach 'eil a' sealbhachadh;

31 Agus iadsan a ta gnàthachadh an t-saoghail so, mar dhream nach 'eil ga mbi-gnàthachadh; oir théid sgiamh an t-saoghail so seachd.

32 Ach b'aill leam sibhse bhi gun ro-chùram. An tì nach 'eil pòsda, bithidh cùram nan nithe sin a bhuineas do'n Tighearn air, cionnus a thoilicheas e an Tighearn:

33 Ach an tì a ta pòsda, bithidh cùram nithe an t-saoghail air, cionnus a dh'fheudas e a bhean a thoileachadh.

34 Tha mar an ceudna eadar-

dhealachadh eadar bean agus òigh : tha cùram oirre-sa nach 'eil pòsda mu nithibh an Tigh-earna, chum gu 'm bì i naomh, faraon 'na corp agus 'na spiorad ; ach bithidh cùram air a' mhnaoi a ta pòsda mu nithibh an t-saoghail, cionnus a dh' fheudas i toil a fir a dhèanamh.

35 Agus so tha mi a' labhairt chum bhur tairbhe féin ; cha 'n ann chum gu 'n cuirinn ribe oirbh, ach a chum an ni sin a ta ciatach, agus gu 'm feitheadh sibh air an Tighearn gun bhuaireadh.

36 Ach ma shaoileas duine sam bith gu bheil e 'ga ghiùlan féin gu mi-chiatach thaobh a mhaighdin, ma chaidh blàth a h-aimsir thairis, agus gur còir a dhèanamh mar sin, dèanadh e na's àill leis, cha 'n 'eil e a' peacachadh : pòsadh iad.

37 Gidheadh, an tì sin a tha suidhichte gu daingean 'na chridhe, agus gun éigin sam bith air, ach aig am bheil cumhachd air a thoil féin, agus a chuir roimhe 'na chridhe a mhaighdean a choimhead, tha e a' dèanamh gu maith.

38 Uime sin ma seadh, a ta an tì a bheir seachad am pòsadh i, a' dèanamh gu maith ; ach a ta an tì nach toir ann am pòsadh i, a' dèanamh ni's feàrr.

39 Tha a' bhean ceangailte leis an lagh rè 'na h-uine a's beò d'a fear : ach ma gheibh a fear bàs, tha i saor gu pòsadh ri aon neach a's toil leatha ; a mhàin anns an Tighearn.

40 Ach tha i ni's sona, ma dh' fhanas i mar sin, a réir mo bhreth-sa : agus is i mo bharailsa gu bheil Spiorad Dhé agam.

CAIB. VIII.

A NIS a thaobh nithe a dh' iobradh do iodholaibh, tha fhios againn gu bheil eòlas againn

uile. Ataidh an t-eòlas suas, ach bheir gràdh fòghlum.

2 Agus ma ta aon duine a' saoil sinn gu bheil eòlas ni sam bith aige, cha 'n aithne dha aon ni fathast mar bu chòir dha aithneachadh.

3 Ach ma tha gràdh aig duine sam bith do Dhia, tha esan air aithneachadh leis.

4 Uime sin, mu thimchioll itheadh nan nithe sin a dh' iobradh do iodholaibh, tha fhios againne nach ni air domhan iodhol, agus nach 'eil Dia sam bith eile ann ach a h-aon.

5 Oir ged tha iad ann ris an abrar Dé, ma 's ann air nèamh no air talamh, (amhuil mar a ta iomadh Dia, agus iomadh Tighearn ann,)

6 Gidheadh dhuinne *cha 'n 'eil ach* aon Dia, an t-Athair, o'm bheil na h-uile nithe, agus sinne air a shon-san ; agus aon Tighearn Iosa Crìosd, *tre am bheil* na h-uile nithe, agus sinne trid-san.

7 Gidheadh cha 'n 'eil an t-eòlas so anns na h-uile dhaoineibh : oir tha cuid le coguis thaobh an iodhoil gus an àm so, ag itheadh a' bhìdh mar ni a dh' iobradh do iodhol ; agus air d' an coguis a bhi annhunn, tha i air a salachadh.

8 Ach cha mhol biadh sinn do Dhia : oir ma dh' itheas sinn, cha 'n fheirrd sinn e ; ni mò mur ith sinn, is misd sinn e.

9 Ach thugaibh an aire nach bì an comas so a ta agaibh air aon dòigh 'na aobhar oilbheim do 'n dream a ta lag.

10 Oir ma chì neach thusa aig am bheil eòlas a' suidhe chum bìdh ann an teampull iodhoil, nach neartaichear coguis an tì sin a ta lag chum na nithe sin a dh' iobradh do iodholaibh itheadh :

11 Agus tre t' eòlas-sa an téid do bhràthair lag am mugha, air son an dh' fhuair Crìosd bàs?

12 Ach le peacachadh dhuibh marsin an aghaidh nam bràithre, agus le an coguis anmhunn a lotadh, tha sibh a' peacachadh an aghaidh Chrìosd.

13 Uime sin ma bheir biadh aobhar oilbheim do m' bhràthair, cha'n ith mi feòil a chaidh, chum nach toir mi aobhar oilbheim do m' bhràthair.

CAIB. IX.

NACH abstol mise? nach 'eil mi saor? Nach fhaca mi Iosa Crìosd ar Tighearn? nach sibhse m' obair san Tighearn?

2 Mur 'eil mi a'm' abstol do dhaoineibh eile, gidheadh gu cinnteach tha mi dhuibhse; oir is sibhse seula m' abstolachd anns an Tighearn.

3 Is e so mo fhreagradh do'n dream a chuireas ceisd orm.

4 Nach 'eil againne comas itheadh agus òl?

5 Nach 'eil againne comas piuthar, bean-phòsda a thoirt leiu mu'n cuairt, amhuil mar na h-abstoil eile, agus bràithrean an Tighearn, agus Cephas?

6 No am bheil mise agus Barnabas a mhàin, gun chomas againn bhi saor o obair?

7 Cò a théid chum cogaidh uair air bith air a chostus féin? cò a shuidhicheas fion-lios, agus nach ith d'a thoradh? no cò a bheathaicheas treud, agus nach blais do bhainne an treud?

8 An ann mar dhuine a ta mi a' labhairt nan nithe so? no nach abair an lagh na nithe so mar an ceudna?

9 Oir a ta e sgrìobhta ann an lagh Mhaois, na cuir ceangal air beul an daimh a tha saltairt an arbhair. Am bheil cùram nan damh air Dia?

10 No nach ann gu h-àraidh air ar son-ne a ta e ag ràdh so? gu deimhin *is ann* air ar son-ne tha e sgrìobhta: chum gur ann an dòchas is còir do'n treabh-aiche treabhadh; agus a chum an neach a bhuaileas ann an dòchas, gu'm bi e 'na fhear còmh-pàirt d'a dhòchas.

11 Ma chuir sinne nithe spioradail dhuibhse, an ni mòr e ma bhuaineas sinne bhur nithe feòlmhor-sa?

12 Ma tha muiuntir eile 'nan luchd-còmh-pàirt do'n chumhachd so thairis oirbh, nach mò is còir dhuinne *bhi*? Gidheadh, cha do chuir sinn an cumhachd so an cleachda; ach a ta sinn a' fulang nan uile nithe, chum nach cuireamaid bacadh air soisgeul Chrìosd.

13 Nach 'eil fhios agaibh gu bheil iadsan a ta saoithreachadh mu thimchioll nithe naomha, air am beathachadh o'n teampull? agus iadsan a ta frithealadh do'n altair, gu bheil comh-roinn aca ris an altair?

14 Agus mar sin dh'òrduich an Tighearn mar an ceudna dhoibh-san a ta searmonachadh an t-soisgeil, an teachd-an-tir fhaotainn o'n t-soisgeul.

15 Ach cha do ghnàthaich mise a h-aon diubh so, agus cha do sgrìobh mi na nithe so, chum gu'n dèantadh mar sin dhomh: oir b'fheàrr dhomh am bàs fhaghail, na gu'n cuireadh neach air bith m'uaill an neo-bhrìgh.

16 Oir ged shearmonaich mi an soisgeul, cha'n 'eil aobhar uail agam: oir a ta éigin air a cur orm; seadh, is an-aoibhinn domh, mur searmonaich mi an soisgeul.

17 Oir ma's ann gu toileach a ta mi dèanamh so, tha duais agam: ach ma's ann an aghaidh

mo-thoile a tha ministreileachd air a h-earbsadh rium,

18 Ciod i mo dhuais ma seadh? *eadhon so*, chum 'nuair a ta mi searmonachadh an t-soisgeil, gu'n suidhichinn soisgeul Chrìosd gun chostus, chum nach mi-ghnàthaichinn mo chumhachd san t-soisgeul.

19 Oir ged tha mi saor o na h-uile dhaoinibh, gidheadh rinn mi mi féin a'm' sheirbhisich do na h-uile, chum gu'n cosnainn an tuilleadh.

20 Agus rinneadh mi do na h-Iudhaich mar Iudhach, chum gu'n cosnainn na h-Iudhaich; dhoibh-san a ta fuidh 'n lagh, mar *dhuine* fuidh 'n lagh, chum gu'n cosnainn iadsan a ta fuidh an lagh;

21 Dhoibh-san a ta gun lagh, mar *dhuine* gun lagh, (ged nach 'eil mi gun lagh do Dhia, ach fo lagh do Chrìosd,) chum gu'n cosnainn iadsan a ta gun lagh.

22 Rinneadh mi dhoibh-san a ta anmhunn mar *dhuine* anmhunn, chum gu'n cosnainn an dream a ta anmhunn: Bha mi san uile chruth do na h-uile, chum air gach uile dhòigh gu'n saorainn cuid éigin.

23 Agus so tha mi a' dèanamh air son an t-soisgeil, chum gu'm bì mi a'm' fhear comh-roinne dheth.

24 Nach 'eil fhios agaibh iadsan a ta ruith anns a' bhlàr-réise, gu'n ruith iad uile, ach is aon duine a gheibh an duais? gu ma h-amhuil a ruitheas sibhse, ionnus gu'n glac sibh *an duais*.

25 Agus a ta gach uile ghleachdair measarra anns na h-uile nithibh: a nis a ta iadsan a' dèanamh sin chum gu'm faigh iad crùn truailidh; ach sinne *air son crùn* neo-thruailidh.

26 Uime sin is amhuil a ta mise a' ruith, cha'n ann mar gu

neo-chinnteach: is amhuil a ta mi a' cur catha, cha'n ann mar neach a bhuaileas an t-athar:

27 Ach tha mi-a' trom-bhualadh mo chuirp, agus 'ga chur fuidh smachd: air eagal air chor sam bith an déigh dhomh searmonachadh do dhream eile, gu'n cuirear mi féin air cùl.

CAIB. X.

OS bàrr, a bhràithre, cha b' àill leam sibhse a bhi aineolach, gu robh ar n-aithriche uile fuidh 'n neul, agus gu'n deachaidh iad uile troimh 'n mhuir;

2 Agus gu'n do bhaisteadh iad uile do Mhaois san neul, agus anns a' mhuir;

3 Agus gu'n d'ith iad uile an t-aon bhiadh spioradail;

4 Agus gu'n d'òl iad uile an t-aon deoch spioradail: (oir dh'òl iad do'n charraig spioradail sin a lean iad: agus b'i a' charraig sin Crìosd:)

5 Ach le mòran diubh cha robh Dia toilichte: oir sgriosadh san fhàsach iad.

6 A nis bha na nithe sin 'nan saimpleiribh dhuinne, chum nach miannaicheamaid droch nithe, eadhon mar a mhiannaich iadsan.

7 Agus na bithibh-sa 'nur luchd-iòdhol-aoraidh, mar a bha cuid diubh-san; a réir mar a ta e sgrìobhta, Shuidh am pobull sìos a dh'itheadh agus a dh'òl, agus dh'éirich iad a chluicheadh.

8 Agus na dèanamaid strìopachas, mar a rinn cuid diubh-san, agus a thuit *diubh* an aon là trì mìle fichead.

9 Agus na dearbhamaid Crìosd, mar a dhearbhadh cuid diubh-san, agus a sgriosadh iad le nathraichibh nimhe.

10 Agus na dèanaibh-sa gearan, mar a rinn cuid diubh-san gearan, agus a sgriosadh iad leis an sgriosadair.

11 A nis thachair na nithe so uile dhoibh-san mar eisempleiribh: agus sgrìobhadh iad chum teagaisg duinne, air am bheil deireadh an domhain air teachd.

12 Uime sin an tì a shaoileas a bhi 'na sheasamh, thugadh e aire nach tuit e.

13 Cha do thachair deuchainn air bith ribh, ach 'ni a ta coitchionn do dhaoineibh: ach tha Dia dileas, nach leig dhuibh bhi air bhur feuchainn thar bhur comas; ach a nì maille ris an deuchainn slighe dol as mar an ceudna, chum gu'm bì sibh comasach air a giùlan.

14 Air an aobhar sin, a mhuinntir mo ghràidh, teichibh o ìodhol-aoradh.

15 Tha mi a' labhairt mar ri daoineibh tuigseach: thugaibh-sa breth air an nì a ta mi ag ràdh.

16 Cupan a' bheannachaidh a ta siune a' beannachadh, nach e comunn fola Chrìosd e? An t-aran a ta sinn a' briseadh, nach e comunn cuirp Chrìosd e?

17 Oir ged tha sinne 'nar mòran, is aon aran, agus aon chorp sinn: oir a ta againn uile comhpàirt do 'n aon aran.

18 Thugaibh fa'near Israel a réir na feòla: nach 'eil aca-san a ta 'g itheadh nan ìobairt comhroinn ris an altair?

19 Ciod a their mi uime sin? gu bheil brìgh air bith anns an ìodhol, no gu bheil brìgh air bith san nì a dh'ìobradh do ìodholaibh?

20 Ach *tha mi ag ràdh*, na nithe a ta na Cinnich ag ìobradh, gur ann do dheamhnaibh a tha iad 'gan ìobradh, agus nach ann do Dhia: agus cha b' àill leam comunn a bhi agaibh-sa ri deamhnaibh.

21 Cha 'n 'eil e an comas duibh cupan an Tighearn òl, ag-

us cupan dheamhnan. Cha 'n 'eil e an comas duibh comhroinn a bhi agaibh do bhòrd an Tighearn, agus do bhòrd deamhan.

22 Am brosnuich sinn an Tighearn gu feirg? an treise sinn na esan?

23 Tha na h-uile nithe cead-uichtedhomh-sa, ach cha'n 'eil na h-uile nithe iomchuidh: tha na h-uile nithe ceaduichte dhomh-sa, ach cha toir na h-uile nithe fòghlum.

24 Na iarradh neach air bith an nì sin a bhuineas dha féin; ach *iarradh* gach aon *an nì* sin a thig ri maith neach eile.

25 Ithibh gach nì a reicear am margadh na feòla, gun cheisd air bith fheòraich air son coguis.

26 Oir is leis an Tighearn an talamh, agus a làn.

27 Ma bheir aon neach dhiubh-san nach 'eil 'nan creidich cuireadh dhuibh, agus gur toil leibh dol maille ris; ithibh gach nì a chuirear roimhibh, gun nì sam bith fheòraich air son coguis.

28 Ach ma their duine sam bith ribh, Dh'ìobradh an nì so do ìodholaibh, na ithibh, air a shon-san a nochd dhuibh e, agus air son coguis. Oir is leis an Tighearn an talamh, agus a làn.

29 *Air son coguis*, a ta mi ag ràdh, cha 'n i do *ehoguis* féin, ach *coguis* an neach ud eile: oir c'ar son a bheirear breth air mo shaorsa-sa le coguis duine eile?

30 Oir, ma tha comhpàirt *bìdh* agam-sa tre ghràs, c'ar son a labhrar olc umam a thaobh an nì sin air son am bheil mi a' toirt buidheachais?

31 Uime sin cò aca dh'itheas no dh'òlas sibh, no ge b'e nì a nì sibh, dèanaibh na h-uile nithe chum glòire Dhé.

32 Na tugaibh aobhar oil-

bheim do na h-Iudhaich, no do na Greugaich, no do eaglais Dé:

33 A réir mar a ta mise a' dèanamh toile nan uile *dhaoine* anns na h-uile *nithibh*, gun bhi 'g iarraidh mo bhuannachd féin, ach *buannachd* mhòran, chum gu tèarnar iad.

CAIB. XI.

BITHIBH-SA 'nur luchd-leannmhuinn orm-sa, amhuil mar a ta mise air Crìosd.

2 A nis a ta mi 'gur moladh, a bhràithre, do bhrìgh gu bheil cuimhne agaibh ormsa anns na h-uile *nithibh*, agus gu bheil sibh a coimhead nan òrduighean, mar a thug mise dhuibh *iad*.

3 Ach bu mhiann leam fios a bhi agaibh, gur e Crìosd ceann gach fir, agus gur e am fear ceann na mnà, agus gur e Dia ceann Chrìosd.

4 Gach fear a ta dèanamh ùrnuigh no fàidheadaireachd, agus folach air *a* cheann, tha e toirt eas-urraim d'a cheann.

5 Ach gach bean a ta dèanamh ùrnuigh no fàidheadaireachd gun fholach air *a* ceann, tha i toirt eas-urraim d'a ceann: oir is ionnan sin agus ged bhiodh i air a bearradh.

6 Oir mur bì folach air ceann na mnà, bearrar i mar an ceudna: ach ma's grannda do mhnaoi i bhi air a bearradh no air a lomadh, cuireadh i folach oirre.

7 Oir gun amharus cha chòir do fhear a cheann a chòmhdachadh, do bhrìgh gur e iomhaigh agus glòir Dhé: ach is i a' bhean glòir an fhir.

8 Oir cha'n 'eil am fear o'n mhnaoi, ach a' bhean o'n fhear.

9 Agus cha do chruthaicheadh, am fear air son na mnà, ach a' bhean air son an fhir.

10 Uime sin is còir do'n

mhnaoi cumhachd a bhi aice air *a* ceann, air son nan aingeal.

11 Gidheadh, cha'n 'eil am fear as eugmhais na mnà, no a' bhean as eugmhais an fhir anns an Tighearn.

12 Oir mar a ta a' bhean o'n fhear, is amhuil sin *a ta* 'm fear tre'n mhnaoi mar an ceudna: ach is ann o Dhia a ta na h-uile nithe.

13 Measaibh annaibh féin: am bheil e ciatach do mhnaoi ùrnuigh a dhèanamh ri Dia gun fholach *air a ceann*.

14 Nach 'eil nàdur féin a' teagasg dhuibh, ma bhios gruag fhada air fear, gur nàr dha e?

15 Ach ma bhios gruag fhada air mnaoi, is glòir dh'i e: oir thugadh a gruag dh'i air son còmhdach.

16 Ach ma bhios neach air bith connspoideach, cha'n 'eil a leithid sin do ghnàthachadh againne, no aig eaglaisibh Dhé.

17 A nis anns an ni so a ta mi cur an céill *duibh*, cha mhol mi sibh, do bhrìgh gu bheil sibh a' teachd an ceann a chéile, cha'n ann chum an ni a's feàrr, ach an ni a's miosa.

18 Oir air tùs, 'nuair tha sibh a' cruinneachadh an ceann a chéile san eaglais, tha mi cluinn-tinn gu bheil roinnean 'nur measg; agus tha mi an cuid 'ga chreidsinn.

19 Oir is éigin saobh-chreidimh a bhi eadaraibh, chum gu'n dèanar follaiseach an dream a ta dearhta 'nur measg.

20 Uime sin an uair a thig sibh an ceann a chéile do aon àit, cha'n e sin suipear an Tighearn itheadh.

21 Oir ithidh gach aon air tùs a shuipear féin, agus a ta neach ocrach, agus neach eile air mhisg.

22 An e nach 'eil tighean

agaibh chum itheadh agus òl annta? no am bheil sibh a' dèanamh tàire air eaglais Dé, agus a' nàrachadh na muinntir aig nach 'eil? Ciod a their mi ribh? Am mol mi sibh anns a' chàis so? cha mhol.

23 Oir fhuair mise o'n Tighearn an ni mar an ceudna a thug mi dhuibh-sa, Gu'n do ghlac an Tighearn Iosa aran, anns an oidhche an do bhràthadh e:

24 Agus air tabhairt buidheachais, bhris se e, agus thubhairt e, Gabhaibh, ithibh; is e so mo chorp-sa, a ta air a bhriseadh air bhur sonsa: dèanaibh so mar chuimhneachan ormsa.

25 Agus air a' mhodh cheudna an cupan, an déigh na suipeir, ag ràdh, Is e an cupan so an coimhcheangal nuadh ann am fhuil-sa: dèanaibh-sa so, cia minic as a dh'òlas sibh e, mar chuimhneachan ormsa.

26 Oir cia minic as a dh'itheas sibh an t-aran so, agus a dh'òlas sibh an cupan so, tha sibh a' foillseachadh bàis an Tighearna gus an tig e.

27 Uime sin, ge b'e neach a dh'itheas an t-aran so, agus a dh'òlas cupan so an Tighearna gu neo-iomchuidh, bithidh e ciontach do chorp agus do fhuil an Tighearna.

28 Ach ceasnuicheadh duine e féin, agus mar sin itheadh e do'n aran so, agus òladh e do'n chupan so:

29 Oir ge b'e dh'itheas agus a dh'òlas gu neo-iomchuidh, tha e 'g itheadh agus ag òl breitheanas dha féin, do bhrìgh nach 'eil e a' dèanamh aithne air corp an Tighearn.

30 Air a shon so tha mòran 'nur measg lag agus tinn, agus tha mòran 'nan codal.

31 Oir nan tugamaid breth oirnn féin, cha tugtadh breth oirnn.

32 Ach an uair a bheirear breth oirnn, tha sinn air ar smachdachadh leis an Tighearn, chum nach bitheamaid air ar dìteadh maille ris an t-saoghal.

33 Uime sin, mo bhràithre, 'nuair a thig sibh an ceann a chéile chum itheadh, fanaibh r'a chéile.

34 Agus ma bhios ocras air aon neach, itheadh e aig an tigh; chum nach tig sibh an ceann a chéile gu breitheanas. Agus cuiridh mise gach ni eile an òrdugh 'nuair a thig mi.

CAIB. XII.

A NIS a thaobh *thiodhlaca* spioradail, a bhràithre, cha 'n àill leam sibh bhi aineolach.

2 Tha fios agaibh gu robh sibh 'nur Cinnich, air bhur tarruing gu ìodholaibh balbha, a réir mar a threòraicheadh sibh.

3 Uime sin tha mi toirt fios duibh, nach abair duine sam bith a tha labhairt o Spiorad Dhé, gu bheil Iosa malluichte; agus nach urrainn duine sam bith a ràdh gur e Iosa an Tighearn, ach tre an Spiorad naomh.

4 A nis tha eadar-dhealachadh thiodhlaca ann, ach *cha'n eil ach* aon Spiorad ann.

5 Agus tha eadar-dhealachadh frithealaidh ann, gidheadh *cha'n eil ach* aon Tighearn ann.

6 Agus tha eadar-dhealachadh oibreachaidh ann, ach is e an t-aon Dia, a tha ag oibreachadh nan uile *nithe* anns na h-uile.

7 Ach a ta foillseachadh an Spioraid air a thoirt do gach neach, chum tairbhe.

8 Oir do aon duine tha focal a' ghliocais air a thoirt leis an Spiorad; agus do dhuine eile focal an eòlais leis an Spiorad cheudna;

9 Do neach eile creidimh leis an Spiorad sin féin; do dhuine

eile tabhartas leighis tre an Spiorad cheudna ;

10 Do neach eile oibreachadh mhìorbhuile ; do neach eile fàidh-eadaireachd ; do neach eile aithneachadh spiorad ; do neach eile iomadh gnè theangadh ; agus do neach eile eadar-mhìneachadh theangadh.

11 Ach na nithe sin uile tha an t-aon Spiorad ceudna ag oibreachadh, a' roinn ris gach aon fa leth a réir mar is àill leis.

12 Oir mar is aon an corp, agus mòran do bhuill aige, agus a ta uile bhuill an aoin chuirp sin, ge h-iomadh iad, 'nan aon chorp ; mar sin a ta Crìosd.

13 Oir tre aon Spiorad bhaisteadh sinn uile do aon chorp, ma's Iudhaich sinn no Greugaich, ma's daor no saor sinn ; agus thugadh deoch r'a h-òl duinn uile chum aoin Spioraid.

14 Oir cha'n aon bhall an corp, ach mòran.

15 Ma their a' chos, Do bhrìgh nach mi an làmh cha'n ann do'n chorp mi ; nach 'eil i do'n chorp air a shon sin ?

16 Agus ma their a' chluas, Do bhrìgh nach mi an t-sùil, cha'n ann do'n chorp mi ; nach ann do'n chorp i air a shon sin ?

17 Nam biodh an corp uile 'na shùil, c'ait am biodh a' chlaisteachd ? Nam biodh e uile 'na chlaisteachd, C'ait am biodh an fhàile ?

18 Ach a nis shuidhich Dia na buill gach aon diubh sa' chorp, mar bu toil leis.

19 Agus nam biodh iad uile 'nan aon bhall, c'ait am biodh an corp ?

20 Ach a nis tha iad 'nam mòran bhall, ged nach 'eil ann ach aon chorp.

21 Agus cha'n urrainn an t-sùil a ràdh ris an làmh, Cha'n 'eil feum agam ort : no a ris,

ann ceann ris na cosaibh, Cha'n 'eil feum agam oirbhse.

22 Ach gu ro mhòr ni's mò tha na buill sin do'n chorp, a's anmhuinne a thaobh coslais, feumail.

23 Agus air na buill sin do'n chorp a's lugha urram 'nar measg-ne, tha sinn a' cur an tuilleadh urraim ; agus na buill sin dhinn a's lugha maise, tha aca sin gu ro mhòr an tuilleadh maise.

24 Oir air na buill mhaiseach againn cha'n 'eil uireasbhuidh : ach rinn Dia an corp a chomhchumadh r'a chéile, air dha an tuilleadh urraim gu mòr a thoirt do'n chuid air an robh uireasbhuidh :

25 Chum nach biodh eas-aonachd air bith sa' chorp ; ach gu'm biodh an t-aon chùram aig na buill d'a chéile.

26 Agus ma dh'fhuilgeas aon bhall, comhfhuilgidh na buill uile : no ma gheibh aon bhall urram, nì na buill uile gàird-eachas maille ris.

27 A nis is sibhse corp Chrìosd, agus is buill sibh fa leth.

28 Agus chuir Dia dream àraidh san eaglais, air tùs abstola, san dara àit fàidhean, san treas àit luchd-teagaisg, a ris mìorbhuilean, 'na dhéigh sin tabhartais leighis, luchd-cuideachaidh, uachdaranachda, iomadh gnè theangadh.

29 Am bheil na h-uile 'nan abstolaibh ? Am bheil na h-uile 'nam fàidhibh ? Am bheil na h-uile 'nan luchd-teagaisg ? Am bheil na h-uile 'nan luchd-dèanamh mhìorbhuile ?

30 Am bheil aig na h-uile tabhartais leighis ? An labhair na h-uile le teangaibh ? An dèan na h-uile eadar-theangachadh ?

31 Ach biodh miann dùrachdach nan tiodhlacan a's feàrr

oirbh: agus gidheadh tha mise a' nochdadh dhuibh slighe a's ro-fheàrr.

CAIB. XIII.

GED labhrainn le teangaibh dhaoine, agus aingeal, agus gun ghràdh agam, tha mi a' m'umha a nì fuaim, no a' m'chiom-bal a nì gleangarsaich.

2 Agus ged robh agam fàidh-eadaireachd, agus ged thuiginn na h-uile rùna-diomhair, agus gach uile eòlas; agus ged bhiodh agam gach uile *ghnè* creidimh, ionnus gu 'n atharraichinn sléibhte, agus mi gun ghràdh agam, cha'n 'eil annam ach neo-ù.

3 Agus ged chaithinn mo mhaoin uile chum na bochdan a bheathachadh, agus ged bheirinn mo chorp chum a losgadh, agus gun ghràdh agam, cha'n 'eil tairbhe sam bith dhomh ann.

4 Tha an gràdh fad-fhulangach, agus caoimhneil; cha ghabh an gràdh farmad; cha dèan an gràdh ràiteachas, cha'n 'eil e air a shéideadh suas,

5 Cha ghiùlain se e féin gu mì-chiatach, cha'n iarr e na nithe sin a bhuineas da féin, cha'n 'eil e so-bhrosnuchaidh *chum feirge*, cha smuainich e olc sam bith,

6 Cha dèan e gàirdeachas san eucoir, ach nì e gàirdeachas san fhìrinn:

7 Fuilgidh e na h-uile nithe, creididh e na h-uile nithe, bithidh sùil aige ris na h-uile nithibh, giùlainidh e na h-uile nithe.

8 Cha téid an gràdh air cùl a chaidh: ach ma's fàidheadaireachda *ta ann*, théid iad air cùl; ma's teangaidh, sguiridh iad; ma's eòlas, cuirear air cùl e.

9 Oir a ta eòlas againn ann an cuid, agus tha sinn ri fàidh-eadaireachd ann an cuid.

10 Ach an uair a thig an nì a ta iomlan, cuirear air cùl an nì sin nach eil ach ann an cuid.

11 'Nuair a bha mi a' m'leanaban, labhair mi mar leanaban, thuig mi mar leanaban, reusonaich mi mar leanaban: ach air fàs domh a' m' dhuine, chuir mi na nithe leanabaidh air cùl.

12 Oir tha sinn a' faicinn san am so gu dorcha tre ghloin; ach an sin *chì sinn* aghaidh ri h-aghaidh: san àm so is aithne dhomh ann an cuid; ach an sin aithnichidh mi eadhon mar a ta aithne orm.

13 Agus a nis fanaidh creidimh, dòchas, gràdh, na trì *nithe* so; ach *is e* 'n gràdh a's mò dhiubh so.

CAIB. XIV.

LEANAIBH gràdh, agus biodh mòr-mhiann *thiodh-laca* spioradail oirbh; ach gu ma mò bhur togradh gu'n dèanadh sibh fàidheadaireachd.

2 Oir an tì a labhras ann an teangaidh *choimhich*, cha'n ann ri daoineibh a labhras e, ach ri Dia: oir cha'n 'eil neach sam bith 'ga thuigsinn; ged tha e anns an Spiorad a' labhairt rùna-diomhair.

3 Ach an tì a tha dèanamh fàidheadaireachd, tha e a' labhairt ri daoineibh chum teagaisg, agus *chum* earail, agus *chum* comhfhurtachd.

4 An tì a ta labhairt an teangaidh *choimhich*, tha e 'ga theagasg féin: ach an tì a nì fàidheadaireachd, tha e teagasg na h-eaglais.

5 Bu mhaith leam gu labhradh sibh uile le teangaibh, ach b'fheàrr leam sibh a dhèanamh fàidheadaireachd, oir *is* mò an tì a nì fàidheadaireachd, no an tì a labhras le teangaibh, mur

eadar-theangaich e, chum gu faigheadh an eaglais fòghlum.

6 A nis, a bhràithre, ma thig mi do 'ur n-ionnsuidh a' labhairt le teangaibh, ciod an tairbhe a nì mi dhuibh, mur labhair mi ribh am foillseachadh, no an eòlas, no am fàidheadaireachd, no an teagasg?

7 Air an dòigh cheudna na nithe gun anam a nì fuaim, ma's pìob no clàrsach, mur dèan iad eadar-dhealachadh 'nam fuaimibh, cionnus a thuigear an nì a sheinnear air a' phìob no air a' chlarsaich?

8 Oir ma bheir a' ghall-tromp fuaim neo-chinnteach uaipe, cò a dh'ulluicheas e féin chum a' chatha?

9 Is amhuil sin sibhse, mur labhair sibh leis an teangaidh briathra so-thuigsinn, cionnus a dh'aithnichear an nì a labhrar? oir is ann ris an athar a labhras sibh.

10 Tha, feudaidd e bi, an uiread do ghuthannaibh san t-saoghal, agus cha'n 'eil a h-aon diubh gun bhlagh.

11 Uime sin, mur tuig mi brìgh a' ghutha, bithidh mi do'n tì a labhras, borb; agus *bithidh* an tì a labhras, borb dhomh-sa.

12 Mar sin mar an ceudna sibhse, do bhrìgh gu bheil déigh agaibh air *tiodhlacaibh* spioradail, iarraibh sibh féin a thoirt barrachd chum fòghluim na h-eaglais.

13 Uime sin, an tì a labhras ann an teangaidh *choimhich*, guidheadh e gu'n dèanadh e eadar-theangachadh.

14 Oir ma nì mise ùrnuigh ann an teangaidh *choimhich*, tha mo spiorad a' dèanamh ùrnuigh, ach tha mo thuigse neo-tharbhach.

15 Ciod ma seadh? nì mi

ùrnuigh leis an spiorad, agus nì mi ùrnuigh leis an thuigse mar an ceudna: seinnidh mi leis an Spiorad, agus seinnidh mi leis an thuigse mar an ceudna.

16 No 'nuair a bheannaicheas tu leis an spiorad, cionnus a their an tì a tha ann an àit an duine gun fhòghlum Amen ri d' bhrèith-buidheachais, o nach aithne dha an nì a ta thu ag ràdh?

17 Oir gu deimhin a ta thusa toirt buidheachais gu maith, gidheadh cha'n 'eil an neach eile air a theagasg.

18 Tha mi toirt buidheachais do m' Dhia, *gu bheil* mi a' labhairt le teangaibh tuilleadh na sibh uile:

19 Ach b' fheàrr leam cùig focail a labhairt san eaglais le m' thuisge, chum gu teagaisginn daoine eile mar an ceudna, na deich mìle focal ann an teangaidh *choimhich*.

20 A bhràithre, na bithibh-sa 'nur leanabaibh an tuigse: gidheadh, ann am mì-run bithibh 'nur leanabaibh, ach ann an tuigse bithibh 'nur daoine foirfe.

21 Tha e sgriobhta san lagh, Labhraidh mi ris a' phobull so ann an teangaibh eile, agus am bilibh eile: gidheadh an déigh sin uile cha'n 'éisd iad rium, tha an Tighearn ag ràdh.

22 Uime sin a ta teanganna *coimheach* 'nan comhara, cha'n ann do'n dream a ta creidsinn, ach dhoibh-san a ta mì-chreideach: ach a ta fàidheadaireachd cha'n ann air an son-san nach 'eil a' creidsinn, ach air an son-san a tha creidsinn.

23 Uime sin ma chruinnicheas an eaglais uile san aon àit, agus ma labhras iad uile le teangaibh *coimheach*, agus gu'n tig dream a ta gun fhòghlum a steach, no daoine mì-chreideach, nach

abair iad gu bheil sibh air a chuthach?

24 Ach ma nì iad uile fàidh-eadaireachd, agus gu'n tig duine gun chreidimh a steach, no *neach* a ta gun fhòghlum, cronuichear e leis na h-uile, agus bheirear breth air leis na h-uile:

25 Agus mar sin a ta *nithe* folaichte a chridhe air am foill-seachadh; agus mar sin, air dha tuiteam air aghaidh, nì e aoradh do Dhia, ag aithris gu bheil Dia gu fìrinneach annaibh-sa.

26 Ciod e sin ma ta, a' bhràithre? nuair tha sibh a' teachd an ceann a chéile, tha salm, tha teagasg, tha teangadh, tha foillseachadh, tha eadar-theangachadh, aig gach aon agaibh. Dèanar na h-uile nithe chum fòghluim.

27 Ma labhras aon neach ann an teangaidh *choimhich*, labhradh dithis, no air a' chuid a's mò triuir, agus sin an déigh a chéile; agus dèanadh a h-aon eadar-theangachadh.

28 Ach mur bì eadar-theangair ann, fanadh e 'na thosd san eaglais; no labhradh e ris féin, agus ri Dia.

29 Labhradh dithis no triuir do na fàidhibh, agus thugadh a' chuid eile breth.

30 Ach ma dh' fhoillsichear *nì* do neach eile a tha 'na shuidhe, biodh an ceud *dhuine* 'na thosd.

31 Oir feudaidh sibh uile fàidheadaireachd a dhèanamh gach aon an déigh a chéile, chum gu faigh na h-uile fòghlum, agus na h-uile comh-fhurtachd.

32 Agus a ta spiorada nam fàidhean ùmhal do na fàidhibh.

33 Oir cha'n e Dia *ùghdair*, na mì-riaghailt, ach na sìthe, mar ann an eaglaisibh nan naomh uile.

34 Biodh bhur mnàì 'nan tosd sna h-eaglaisibh; oir cha'n 'eil e ceaduichte dhoibh labhairt; ach *is coir dhoibh* bhi ùmhal, mar a ta an lagh mar an ceudna ag ràdh.

35 Agus ma's miann leo nì sam bith fhòghlum, feòraicheadh iad d'am fearaibh féin aig an tigh e: oir is mì-chiatach do mhnaibh labhairt san eaglais.

36 An ann uaibhse thàinig focal Dé a mach? no an ann do 'ur n-ionnsuidh-sa a mhàin a thàinig e?

37 Ma shaoileas duine sam bith gur fàidh, no gur duine spioradail e féin, aidicheadh e na nithe a ta mise a' sgrìobhadh do 'ur n-ionnsuidh, gur iad àitheantan an Tighearna.

38 Ach ma tha neach sam bith aineolach, biodh e aineolach.

39 Uime sin, a bhràithre, biodh ro-thogradh agaibh air fàidheadaireachd a dhèanamh, agus na bacadh labhairt le teangaibh.

40 Dèanar na h-uile nithe gu deadh-mhaiseach, agus a réir òrduigh:

CAIB. XV.

OS bàrr, a bhràithre, tha mi cur an céill duibh an soisgeul a shearmonaich mi dhuibh, ris an do ghabh sibhse mar an ceudna, agus anns am bheil sibh 'nur seasamh;

2 Troimh mar an ceudna am bheil sibh air bhur tèarnadh, ma chumas sibh gu daingean an nì a shearmonaich mi dhuibh, mur do chreid sibhse gu diomhain.

3 Oir thug mi dhuibh air tùs an nì a fhuair mi mar an ceudna, Gu'n d'fhuair Crìosd bàs air son ar peacanna a réir nan sgrìobtuir:

4 Agus gu'n d'adhlacaidh e, agus gu'n d'éirich e a ris air an treas là a réir nan sgrìobtuir :

5 Agus gu facas e le Cephas, 'na dhéigh sin leis an dà fhear dheug.

6 'Na dhéigh sin, chunnacas e le tuilleadh as cùig ceud bràthair air aon àm ; d'am bheil a' chuid a's mò beò gus a nis, ach a ta cuid dhiubh 'nan codal.

7 'Na dhéigh sin, chunnacas e le Seumas ; agus a ris leis na h-abstolaibh uile.

8 'Nan déigh uile chunnacas leam-sa e mar an ceudna, mar neach a rugadh ann an an-àm.

9 Oir is mi a's lugha do na h-abstolaibh, neach nach fiù abstol a ghairm dhìom, do bhrìgh gu'n robh mi a' geur-leanmhuinn eaglais Dé.

10 Ach tre ghràs Dé tha mi an ni a ta mi : agus cha robh a ghràs, a *bhuilicheadh* orm, gun bhrìgh ; ach shaothraich mi ni's pailte na iad uile ; gidheadh cha mhise, ach gràs Dé a bha maille rium.

11 Uime sin cò air bith iad dhinn, mise no iadsan, is ann mar so tha sinne a' searmonachadh, agus is ann mar so a chreid sibhse.

12 A nis, ma shearmonaichear Crìosd gu'n d'éirich e o na marbhaibh, cionnus a ta cuid 'nur measg-sa ag ràdh, Nach 'eil aiseirigh nam marbh ann ?

13 Ach mur 'eil aiseirigh nam marbh ann, ni mò a dh'éirich Crìosd.

14 Agus mur d'éirich Crìosd, gu deimhin is dìomhain ar searmoin-ne, agus is dìomhain bhur creidimh-sa mar an ceudna.

15 Seadh fhuaradh sinne 'nar fianuisibh bréige air Dia ; do bhrìgh gu'n d'rinn sinn fianuis a thaobh Dhé, gu'n do thog e suas Crìosd : neach nach do

thog e suas, mur éirich na mairbh.

16 Oir mur éirich na mairbh, ni mò a dh'éirich Crìosd :

17 Agus mur d'éirich Crìosd, tha bhur creidimh-sa dìomhain ; tha sibh fathast an bhur peac-aibh.

18 Mar sin mar an ceudna tha an dream a choidil ann an Crìosd, caillte.

19 Ma's anns a' bheatha so a mhàin a tha dòchas againn ann an Crìosd, is sinn a's truaighe do na h-uile dhaoineibh.

20 Ach a nis tha Crìosd air éirigh o na marbhaibh, agus rinn-eadh an ceud thoradh dhiubhsan a choidil deth.

21 Oir mar is ann tre dhuine *thàinig* am bàs, is ann tre dhuine *thig* aiseirigh nam marbh mar an ceudna.

22 Oir mar ann an Adhamh, a ta na h-uile a' faghail a' bhàis, is amhuil sin mar an ceudna a nithear na h-uile beò ann an Crìosd.

23 Ach gach uile dhuine 'na òrdugh féin : Crìosd an ceud thoradh, 'na dhéigh sin iadsan a's le Crìosd aig a theachd.

24 An sin *bithidh* a' chrìoch dheireannach, 'nuair a bheir e suas an rìoghachd do Dhia, eadhon an t-Athair ; 'nuair a chuireas e as do gach uile uachd-aranachd, agus gach uile ùgh-darras, agus chumhachd.

25 Oir is éigin gu'n rìoghaich e, gus an cuir e a naimhdean uile fo a chosaibh.

26 Sgrìosar an nàmhaid deir-eannach, am bàs.

27 Oir chuir e na h-uile nithe fo a chosaibh. Ach an uair a ta e ag ràdh gu'n do chuir e na h-uile nithe fuidh, is ni foll-aiseach gu bheil esan a chuir na h-uile nithe fuidh, an leth muigh *dheth* so.

28 Agus an uair a chuirear na h-uile nithe fuidh, an sin bithidh am Mac féin fo 'n Tì a chuir na h-uile nithe fuidh-san, chum gu'm bi Dia 'na uile anns na h-uile.

29 No ciod a nì iadsan a bhaistear air son nam marbh, mur éirich na mairbh air aon dòigh? c'ar son ma seadh a bhaistear iad air son nam marbh?

30 Agus c'ar son a ta sinne an gabhadh gach uair?

31 Air bhur gairdeachas-sa a tha agam ann an Iosa Crìosd air Tighearn, tha mi faghail a' bhàis gach là.

32 Ma chòmhraig mi mar dhuine ri fiadh-bheathaichibh ann an Ephesus, ciod i mo thairbhe, mur éirich na mairbh? itheamaid agus òlamaid, oir am maireach gheibh sinn bàs.

33 Na meallar sibh: truaididh droch chomhludadar deadh bheusa.

34 Dùisgibh chum fireantachd, agus na dèanaibh peacadh; oir cha'n 'eil eòlas Dé aig cuid: chum bhur nàire tha mi a' labhairt so.

35 Ach their neach éigin, Cionnus a dh'éireas na mairbh? agus ciod a ghnè cuirp leis an tig iad?

36 Amadain, an ni sin a chuireas tu, cha bheothaichear e, mur bàsaich e *air tùs*:

37 Agus an ni a chuireas tu, cha'n e an corp a bhitheas a ta thu cur, ach gràinne lom, feudaidh e bi do chruithneachd, no do *sheòrsa* éigin eile:

38 Ach a ta Dia a' toirt cuirp dha mar bu toil leis, agus do gach uile shìol a chorp féin.

39 Cha'n aon fheòil gach uile fheòil: ach a ta feòil air leth aig daoinibh, agus feòil eile aig ainmhidhibh, *feòil* eile aig iasgaibh, agus *feòil* eile aig eunlaithibh.

40 Agus a ta cuirp nèamhaidh ann, agus cuirp thalmhaidh: gidheadh a ta glòir air leth aig na *corpaibh* nèamhaidh, agus glòir eile aig na *corpaibh* talmhaidh.

41 Tha aon ghloir aig a' ghréin, agus glòir eile aig a' ghealaich, agus glòir eile aig na reultaibh; oir a ta eadar-dhealachadh eadar reult agus reult thaobh glòire.

42 Agus is ann mar sin a *bhios* aiseirigh nam marbh. Cuirear ann an truailidheachd e; togar ann an neo-thruailidheachd e.

43 Cuirear e ann an eas-urram, togar ann an glòire e: cuirear ann an anmhuinneachd e, éiridh e ann an cumhachd:

44 Cuirear e 'na chorp nàdurra, éiridh e 'na chorp spioradail. Tha corp nàdurra ann, agus corp spioradail.

45 Agus mar so tha e sgriobhta, Rinneadh an ceud dhuine Adhamh 'na anam beò, an t-Adhamh deireannach 'na Spiorad a bheothaicheas.

46 Gidheadh cha'n e an ni spioradail a *bha* ann air tùs, ach an ni nadurra; agus 'na dhéigh sin an ni spioradail.

47 An ceud duine o'n talamh, talmhaidh: an dara duine, an Tighearn o nèamh.

48 Mar an *duine* talmhaidh, is amhuil sin iadsan a *tha* talmhaidh: agus mar a ta an *duine* nèamhaidh, is ann mar sin iadsan a ta nèamhaidh.

49 Agus mar a ghiùlain sinn ìomhaigh an *duine* thalmhaidh, ghiùlainidh sinn mar an ceudna ìomhaigh an *duine* nèamhaidh.

50 A nis so a ta mi ag ràdh, a bhràithre, nach feudar le feòil agus fuil rìoghachd Dhé a shealbhachadh; ni mò a shealbhacheas truailidheachd neo-thruailidheachd.

51 Feuch, tha mi a labhairt ni dìomhair ribh; Cha choidil

sinn uile, ach caochlaidhear sinn uile,

52 Ann an tiota, am priobadh na sùl, ri *guth na* trompaid deireannaich, (oir séididh an trompaid,) agus éiridh na mairbh neo-thruaillidh, agus caochlaidhear sinne.

53 Oir is éigin do'n *chorp* thruaillidh so neo-thruaillidheachd a chur uime, agus do'n *chorp* bhàsmhor so neo-bhàsmhorachd a chur uime.

54 Agus an uair a chuireas an *corp* truailidh so neo-thruaillidheachd uime, agus a chuireas an *corp* bàsmhor so neo-bhàsmhorachd uime, an sin coimhlionar am focal a ta sgrìobhta, Shluigeadh suas am bàs le buaidh.

55 O bhàis, c'àit am bheil do ghath? O uaigh, c'àit *am bheil* do bhuaidh?

56 *Is* e am peacadh gath a' bhàis; agus *is* e neart a' pheacaidh an lagh:

57 Ach buidheachas do Dhia, a tha toirt dhuinne na buadha, tre ar Tighearna Iosa Crìosd.

58 Uime sin, mo bhràithre gràdhach, bithibh-sa daingean, neo-ghluasadach, a' sìor-mheudachadh ann an obair an Tighearn, air dhuibh fios a bhi agaibh nach 'eil bhur saothair dìomhain anns an Tighearn.

CAIB. XVI.

A NIS a thaobh an tionail air son nan naomh, mar a dh'òrduich mi do eaglaisibh Ghالاتيا, mar sin dèanaibh-sa mar an ceudna.

2 Air ceud là gach seachduin, cuireadh gach aon agaibh ni leis féin anns an ionmhas, a réir mar a shoirbhich leis, chum nach bi tionail r'an dèanamh 'nuair a thig mise.

3 Agus an uair a thig mi, cò air bith iad a mholas sibh le 'ur

litrichibh, cuiridh mi iadsan a ghiùlan bhur tabhartais gu Ierusalem.

4 Agus ma's iomchuidh mise a dhol mar an ceudna, théid iadsan a' m' chuideachd.

5 Agus thig mi do'ur n-ionnsuidh-sa, 'nuair a théid mi troimh Mhacedonia: (oir tha mi dol troimh Mhacedonia:)

6 Agus feudaidh e bi gu'm fan mi, no eadhon gu'n caith mi an geamhradh maille ribh, chum gu'n toir sibh air m' aghaidh mi, ge b' e àit d'an téid mi.

7 Oir cha'n àill leam bhur faicinn a nis san dol seachad; ach tha dùil agam fantuinn rè tumuill maille ribh, ma leigeas an Tighearn dhomh.

8 Ach fanaidh mi ann an Ephesus gu Cuingeis.

9 Oir dh'fhosgladh dorus mòr agus éifeachdach dhomh-sa, agus tha mòran eascairdean ann.

10 A nis ma thig Timoteus, feuchaibh gu'm bi e gun eagal maille ribh: oir tha e a' saoithreachadh ann an obair an Tighearn, mar a ta mise.

11 Uime sin na dèanadh neach sam bith tàir air: ach thugaibh air aghaidh e an sìth, chum gu'n tig e a m'ionnsuidh-sa: oir tha sùil agam ris maille ris na bràithribh.

12 Mu thimchioll ar bràthar Apollois, ghuidh mi gu dùrachdach air teachd do 'ur n-ionnsuidh-sa maille ris na bràithribh: ach cha b' i a thoil air chor sam bith teachd san àm so; ach thig e 'nuair a gheibh e àm iomchuidh.

13 Dèanaibh faire, seasaibh gu daingean sa' chreidimh, bithibh fearail, bithibh làidir.

14 Biodh bhur n-uile nithe air an dèanamh le gràdh.

15 Agus guidheam oirbh, a bhràithre, (o's aithne dhuibh

teaghlach Stephanais, gur iad ceud thoradh Achaia, agus gu'n d'thug'siad iad féin chum frith-ealaidh do na naomhaibh ;)

16 Gu'm bì sibh ùmhal d'an leithidibh sin, agus do gach aon a nì obair agus saothair maille ruinne.

17 Tha mi subhach ri teachd Stephanais, agus Fhortunatus, agus Achaicuis: oir rinn iad suas an nì sin a bha dh'uireasbhuidh do 'ur taobh-sa.

18 Oir thug iad suaimhneas do m' spiorad-sa, agus do 'ur spiorad-sa: uime sin biodh meas agaibh air an leithidibh sin.

19 Tha eaglaisean na h-Asia

a' cur fàilte oirbh. Tha Acuila agus Priscila, maille ris an eaglais a tha 'nan tigh, a' cur mòr-fhàilte oirbh anns an Tighearn.

20 Tha na bràithrean uile a' cur fàilte oirbh. Cuiribh-sa fàilte air a chéile le pòig naomh.

21 Fàilte uamsa Pòl le m' làimh féin.

22 Ma tha neach sam bith nach gràdhaich an Tighearn Iosa Crìosd, biodh e 'na Anatema Maranata.

23 *Gu robh* gràs an Tighearna Iosa Crìosd maille ribh.

24 Mo ghràdh-sa maille ribh uile ann an Crìosd. Amen.

DARA LITIR AN ABSTOIL PHOIL CHUM NAN CORINTIANACH.

CAIB. I.

POL, abstol Iosa Crìosd tre thoil Dé, agus Timoteus ar bràthair, chum eaglais Dé a ta ann an Corintus, maille ris na h-uile naomh a ta ann an Achaia uile:

2 Gràs dhuibhse, agus sìth o Dhia ar n-Athair, agus o'n Tighearn Iosa Crìosd.

3 Beannaichte *gu robh* Dia, eadhon Athair ar Tighearna Iosa Crìosd, Athair nan tròcair, agus Dia na h-uile chomhfhurtachd ;

4 A tha toirt comhfhurtachd dhuinne 'nar n-uile àmhghar, chum sinne bhi comasach air comhfhurtachd a thoirt dhoibhsan a ta ann an àmhghar sam bith, tre a' chomhfhurtachd leis am bheil sinn féin a' faotainn comhfhurtachd o Dhia.

5 Oir mar a ta fulangais Chriosd pailt annainne, is amhuil sin a ta ar comhfhurtachd-

ne mar an ceudna pailte tre Chrìosd.

6 Agus ma tha sinn fuaidh àmhghar, *is ann* air son bhur comhfhurtachd agus bhur slàinte-sa, a tha air a h-oibreachadh le sibh a dh'fhulang nam fulangas ceudna, a tha sinne a' fulang: no ma's comhfhurtachd dhuinn, *is ann* chum bhur comhfhurtachd agus bhur slàinte-sa.

7 Agus a ta ar dòchas daingean do 'ur taobh-sa, do bhrìgh gu bheil fios againn, mar a ta sibh 'nur luchd-comhpàirt do na fulangasaibh, gu'm bì sibh mar an ceudna do'n chomhfhurtachd.

8 Oir cha b'àill leinn, a bhràithre, sibhse bhi ain-fhiosrach mu thimchioll ar n-àmghair a thachair dhuinne san Asia, gu'n do bhrùthadh sinn gu ro mhòr thar ar neart, ionn-

us gu robh sinn fuidh amharus eadhon mu'r beatha:

9 Ach bha againn binn ar bàis annainn féin, chum nach biodh againn dòigh annainn féin, ach ann an Dia a dhùisgeas na mairbh:

10 Neach a shaor sinne o bhàs co mòr, agus a ta'gar saoradh; anns am bheil ar dòchas gu'n saor e *sinn* fathast:

11 Air dhuibhse bhi a' co-obreachadh le chéile ann an ùrnuigh air ar son-ne, chum gu tugar buidheachas le mòran air ar son-ne, á leth an tiodhlaic a thugadh dhuinne, tre mhòran.

12 Oir is e so ar gàirdeachas-ne, fianuis ar coguis, gur ann an aon-fhillteachd agus an tréibhdhireas diadhaidh, agus cha'n ann an gliocas feòlmhor, ach ann an gràs Dé, a chaith sinn ar beatha san t-saoghal, agus gu h-àraidh do 'ur taobh-sa.

13 Oir cha'n 'eil sinn a' sgrìobhadh nithe sam bith eile do 'ur n-ionnsuidh-sa, ach nan nithe a ta sibh a' leughadh, no a ta sibh ag aideachadh, agus a ta dùil agam a dh'aidicheas sibh gu a' chrìoch;

14 Amhuil mar a dh'aidich sibh an càil, gur sinne bhur gàirdeachas, mar *is* sibhse mar an ceudna ar *gàirdeachas-ne* ann an là an Tighearn Iosa.

15 Agus anns a' mhuighin so b'àill leam-sa teachd do 'ur n-ionnsuidh air tùs, ionnus gu faigheadh sibhse ath-ghràs.

16 Agus gabhail uaibhse gu Macedonia, agus teachd o Mhacedonia a rìs do 'ur n-ionnsuidh-sa, agus a bhi air mo thoirt air m'aghaidh leibhse san t-slighe gu Iudea.

17 Uime sin an uair a chuir mi so romham, an do ghnàthaich mi eutruimeachd? no an ann a

rèir na feòla a ta mi cur romham, na nithe a ta mi a' cur romham, ionnus gu biodh agam seadh, seadh, agus cha'n eadh, cha'n eadh.

18 Ach *mar a ta* Dia firinn-each, cha b'e ar còmhradh ribhse seadh, agus cha'n eadh.

19 Oir Mac Dhé, Iosa Crìosd, a shearmonaicheadh 'nur measg-sa leinne, *eadhon* leam-sa, agus *le* Siluanus, agus *le* Timoteüs, cha robh e 'na sheadh agus 'na cha'n eadh, ach ann-san bha seadh.

20 Oir geallanna Dhé uile ann-san *is* seadh iad, agus ann-san *is* Amen iad, chum glòire Dhé do ar taobh-ne.

21 A nis an Tì a dhaingnich-eas sinne maille ribhse ann an Crìosd, agus a dh'ùng sinn, *is e* Dia:

22 Neach mar an ceudna a chuir seula oirne, agus a thug dhuinn geall-daingnich an Spioraid ann ar cridheachaibh.

23 Ach a ta mi a' gairm Dhé mar fhianuis air m'anam, gur an chum sibhse a chaomhnadh nach d'thàinig mi fathast gu Corintus.

24 Cha'n e gu bheil againne tighearnas air bhur creidimhsa, ach *is* luchd-cuideachaidh sinn do 'ur n-aoibhneas: oir *is* ann tre chreidimh a sheasas sibh.

CAIB. II.

ACH chuir mi so romham annam féin, gun teachd a rìs fo dhoilgheas do 'ur n-ionnsuidh.

2 Oir ma nì mise doilich sibhse, cò e ma ta nì subhach mise, ach an tì air an do chuir-eadh doilgheas leam?

3 Agus sgrìobh mi an nì so féin do 'ur n-ionnsuidh, chum air dhomh teachd, nach cuirteadh doilgheas orm leis a' mhuinntir

sin o'm bu chòir dhomh aoibhneas fhaotainn, air dhomh bhi muinghinneach asaibh uile, gur e m'aoibhneas bhur *n-aoibhneas* uile.

4 Oir á trioblaid mhòir agus cràdh cridhe, sgriobh mi do 'ur n-ionnsuidh le iomadh deur; cha'n ann chum gu'm biodh doilgheas oirbh, ach chum gu'm biodh fios agaibh air a' ghràdh a ta agam gu ro-phailte dhuibh.

5 Ach ma thug neach sam bith aobhar doilgheis, cha do chuir e doilgheas ormsa, ach an càil: chum nach cuirinn ro-uallach oirbh uile.

6 *Is* leoir d'a leithid sin do dhuine am peanas so, a *leagadh* air le mòran.

7 Ionns air an làimh eile, gur mò *is* còir dhuibh maitheanas agus comhfhurtachd a thoirt *da*, air eagal gu'm biodh a leithid so do dhuine air a shlugadh suas le anabarra doilgheis.

8 Uime sin guidheam oirbh, gu'n daingnicheadh sibh *bhur* gràdh dha.

9 Oir is ann chum na crìche so a sgriobh mi do 'ur *n-ionnsuidh*, chum gu'm biodh fios bhur dearbhaidh agam, am bheil sibh ùmhal anns na h-uile nithibh.

10 Ge b'e neach d'an toir sibh maitheanas ann an ni sam bith, bheir mise mar an ceudna: oir ma thug mise maitheanas ann an ni sam bith, ge b'e d'an d' thug mi am maitheanas, is ann air bhur sonsa *a thug mi e*, am fianuis Chrìosd;

11 Air eagal gu faigheadh Satan an cothrom oirnn le 'chuilbheartachd: oir cha'n 'eil sinn aineolach air 'innleachdaibh.

12 Os bàrr, 'nuair a thàinig mi gu Troas chum soisgeul Chrìosd a *shearmonachadh*, agus a dh'fhosglaidh dorus dhomh leis an Tighearn,

13 Cha robh fois agam ann mo spiorad, do bhrìgh nach d'fhuair mi Titus mo bhràthair: ach air gabhail mo chead diubh, dh'imich mi o sin do Mhacedonia.

14 A nis buidheachas do Dhia, a ta ghnàth a' toirt oirne buadhachadh ann an Crìosd, agus a ta foillseachadh *deadh* fbaile 'eòlais féin leinne anns gach àit.

15 Oir tha sinne do Dhia 'nar fàille cùbhraidh Chrìosd, anns an dream a thèarnar, agus anns an dream a sgriosar:

16 Do'n aon dream *tha sinn* 'nar boltrach bàis chum bàis; agus do'n dream eile, 'nar bolt-rach beatha chum beatha: agus cò a ta foghainteach chum nan nithe so?

17 Oir cha'n 'eil sinne mar mhòran, a thruailleas focal Dé: ach mar o thréibhdhireas, ach mar o Dbia, tha sinn a' labhairt am fianuis Dé ann an Crìosd.

CAIB. III.

AN tòisich sinn a rìs air sinn féin a mholadh? no am bheil feum againn, mar aig dream àraidh, air litrichibh molaidd do 'ur n-ionnsuidh-sa, no air *litrichibh* molaidd uaibh?

2 Is sibhse ar litir-ne a ta sgriobhta 'nar cridheachaibh, air a h-aithneachadh agus air a leughadh leis na h-uile dhaoinibh:

3 *Air dha bhi* follaiseach gur sibh litir Chrìosd, a fhrithealadh leinne, a tha air a sgriobhadh cha'n ann le dubb, ach le Spiorad an Dé bheò; cha'n ann air clàraibh cloiche, ach air clàraibh feòlmhor a' chridhe.

4 Agus tha a leithid so do dhòchas againne tre Chrìosd a thaobh Dhé:

5 Cha'n e gu bheil sinn foghainteach uainn féin chum ni sam

bith a smuaineachadh mar uainn féin : ach is ann o Dhia *a ta* ar foghainteachd ;

6 A rinn sinne mar an ceudna 'nar ministreibh foghainteach an tiomnaidh nuaidh ; cha'n ann do'n litir, ach do'n Spiorad : oir marbhaidh an litir, ach bheir an Spiorad beatha.

7 Ach ma bha ministreileachd a' bhàis, ann an sgrìobhadh air a ghearradh air clachaibh, glòrmhor, ionnus nach b'urrainn clann Israeil amharc gu geur air gnùis Mhaois, air son glòire a ghnùise, a chuireadh air cùl ;

8 Cionnus nach mò na sin a bhios ministreileachd an Spioraid glòrmhor ?

9 Oir ma bha ministreileachd an ditidh glòrmhor, is ro mhò na sin a bheir ministreileachd na fireantachd barrachd ann an glòir.

10 Oir eadhon an ni a rinn-eadh glòrmhor, cha robh glòir sam bith aige sa' chàs so, thaobh na glòire a tha tòirt barrachd.

11 Oir ma bha an ni a chuir-eadh air cùl glòrmhor, is ro mhò na sin *a ta* an ni a bhunaicheas glòrmhor.

12 Uime sin do bhrìgh gu bheil againn a shamhuil so do dhòchas, tha sinn a' cleachdadh mòr-dhànachd cainnte.

13 Agus cha'n 'eil sinn mar Mhaois, *a* chuir folach air 'aghaidh, chum nach amhairceadh clann Israeil gu geur gu crìch an ni a chuireadh air cùl.

14 Ach dhalladh an inntinn : oir gus an là'n diugh ann an leughadh an t-seann-tiomnaidh, tha'm folach ceudna a' fantuinn gun atharrachadh, ni a chuireadh air cùl ann an Crìosd.

15 Ach eadhon gus an là'n diugh 'nuair a leughar Maois, tha am folach air an cridhe.

16 Gidheadh 'nuair a philleas

e chum an Tighearna, togar am folach dheth.

17 A nis is e an Tighearn an Spiorad sin : agus far am bheil Spiorad an Tighearna, tha saorsa an sin.

18 Ach air bhi dhuinne uile le aghaidh gun fholach, ag amharc mar ann an sgàthan air glòir an Tighearna, tha sinn air ar n-atharrachadh chum na h-ìomhaigh ceudna, o ghlòir gu glòir, mar le Spiorad an Tighearna.

CAIB. IV.

UIME sin, air do'n mhinist-reileachd so bhi againn, a réir mar a fhuair sinn tròcair, cha'n 'eil sinn a' fannachadh :

2 Ach chuir sinn cùl ri nithibh folaichte na nàire, gun sinn bhi a' siubhal ann an ceilg, no a' truailleadh focail Dé, ach le foillseachadh na firinn, 'gar moladh féin do choguis nan uile dhaoine ann an sealladh Dhé.

3 Ach ma tha ar soisgeul-ne folaichte, is ann dhoibh-san a ta cailte tha e folaichte :

4 Anns an do dhall dia an t-saoghail so inntinn na dream nach 'eil 'nan creidich, air eagal gu'n dealraicheadh orra solus soisgeil ghlòrmhoir Chrìosd, neach a's e ìomhaigh Dhé.

5 Oir cha'n 'eil sinne 'gar searmonachadh féin, ach Iosa Crìosd an Tighearn ; agus sinn féin 'nar seirbhisich dhuibhsé air son Iosa.

6 Oir is e Dia a thubhairt ris an t-solus soillseachadh á dorchadas, a dhealraich ann ar cridheachaibh-ne, a thoirt soluis eòlais glòire Dhé, ann an gnùis Iosa Crìosd.

7 Ach a ta an t-ionmhas so againn ann an soithichibh creadha, chum gu'm bì òir-dheirceas a' chumhachd o Dhia, agus cha'n ann uainne.

8 *Tha sinn* fo thrioblaid air gach taobh, gidheadh cha 'n 'eil sinn ann an teanntachd; *tha sinn* ann an ioma-chomhairle, gidheadh gun sinu ann an eu-dòchas;

9 Air ar geur-leanmhuinn, gidheadh gun *sinn* air ar tréig-sinn; air ar tilgeadh sìos, gidheadh gun *sinn* air ar sgrios;

10 A' giùlan a ghnàth bàsachaidh an Tighearna Iosa mu 'n cuairt, anns a' chorp, chum gu biodh beatha Iosa mar an ceudna air a dèanamh follaiseach ann ar corp-ne.

11 Oir tha sinne a ta beò, a ghnàth air ar toirt chum bàis air son Iosa, chum gu biodh mar an ceudna beatha Iosa air a dèanamh follaiseach 'nar feòil bhàsmhoir-ne.

12 Uime sin tha bàs ag oibreachadh annainne, ach beatha annaibh-sa.

13 Air dhuinn an spiorad creidimh sin féin a bhi againn, a réir mar a ta e sgrìobhta, Chreid mi, agus uime sin labhair mi; tha sinne a' creidsinn mar an ceudna, agus uime sin tha sinn a' labhairt;

14 Air dhuinn fios a bhi againn, an Tì a thog suas an Tighearn Iosa, gu'n tog e sinne suas mar an ceudna tre Iosa, agus gu'n cuir e 'na làthair *sinn* maille ribhse.

15 Oir tha na h-uile *nithe* air bhur sòrsa, chum gu biodh an gràs a tha saobhir, tre bhuidheachas mhòran, ro phailte chum glòire Dhé.

16 Uime sin cha'n 'eil sinn a' fannachadh, ach ged thruaillear ar duine o'n leth muigh, gidheadh tha an duine o'n leth stigh air ath-nuadhachadh o là gu là.

17 Oir a ta ar n-àmhghar eutrom, nach 'eil ach rè sealain, ag oibreachadh dhuinne tromchudthrom glòire a ta ni's ro

anabharraich agus sìor-mhair-eannach;

18 Air dhuinn bhi ag amharc cha'n ann air na nithibh a tha r'am faicinn, ach air na nithibh nach 'eil r'am faicinn: oir tha na nithe a chithear, aimsireil; ach tha na nithe nach faicear, sìor-ruidh.

CAIB. V.

OIR a ta fios againn, nan sgaoilteadh o chéile ar tigh talmhaidh a phàilliun *so*, gu bheil againn aitreabh o Dhia, tigh nach do thogadh le làmhaibh, sìorruidh anns na nèamhaibh.

2 Oir a ta sinn ri osnaich an *so*, a' miannachadh bhi air ar n-eudachadh le ar tigh o nèamh:

3 O air dhuinn bhi air ar n-eudachadh, nach faighear lomnochd sinn.

4 Oir tha sinne a tha anns a' phàilliun *so* ri osnaich, air dhuinn bhi fuaidh uallaich: cha'n e air son gu'm bu mhiann leinn bhi air ar rùsgadh, ach air ar n-eudachadh, chum gu bi bàsmhorachd air a slugadh suas le beatha.

5 Anis an tì a dh' oibrich sinne chum so féin, *is* e Dia e, a thug dhuinne mar an ceudna geall-daingnich an Spioraid.

6 Uime sin *tha sinn* a ghnàth deadh-mhisneachail, air dhuinn fios a bhi againn am feadh a ta sinn aig an tigh sa' choluinn, gu bheil sinn air choigrich o'n Tighearn:

7 (Oir a ta sinn a' gluasad a réir creidimh, agus cha'n ann a réir seallaidh.)

8 Tha deadh mhisneach againn, agus bu ròghnuiche leinn gu mòr bhi air choigrich as a' choluinn, agus a bhi làthair maille ris an Tighearn.

9 Uime sin a ta sinn a' dèanamh ar dìchill, chum cò aca

bhios sinn a làthair no air choig-rich, gu'm bì sinn taitneach dhasan.

10 Oir is éigin duinn uile bhi air ar nochdadh an làthair caithir-breitheanais Chrìosd; chum gu faigh gach neach na nithe *a rinn e sa'* choluinn, a réir an ni a rinn e, ma's maith no olc e.

11 Uime sin air dhuinn fios a bhi againn air uamhas an Tigh-earna, tha sinn a' cur impidh air daoineibh; ach a ta sinn follaiseach do Dhia, agus tha dòchas agam mar an ceudna gu bheil sinn air ar dèanamh follaiseach ann bhur coguisibh-sa.

12 Oir cha 'n 'eil sinn 'gar moladh féin a ris dhuibhse, ach a ta sinn a' toirt fàth uail dhuibh do ar taobh, chum gu bi *freagradh* agaibh dhoibh-san a tha dèanamh uail ann an gnùis, agus cha'n ann an cridhe.

13 Oir ma tha sinn a dh'easbhuidh céille, *is ann* do Dhia: agus ma tha ar ciall againn *is ann* duibh-sa.

14 Oir a ta gràdh Chrìosd 'gar co-éigneachadh, air dhuinn breithneachadh mar so, ma fhuaire a h-aon bas air son nan uile, gu'n robh na h-uile marbh:

15 Agus gu'n d'fhuaire e bàs air son nan uile, chum iadsan a ta beò, nach biodh iad á so suas beò dhoibh féin, ach dhasan a dh'fhuiling am bàs air an son, agus a dh'éirich a ris.

16 Uime sin, cha'n aithne dhuinne á so suas aon duine a réir na feòla: seadh, ged b' aithne dhuinn Chrìosd a réir na feòla, gidheadh a nis cha'n aithne dhuinn *e ni's mò*.

17 Uime sin ma *tha* neach sam bith ann an Chrìosd, *is* creutair nuadh *e*: chaidh na seann nithe seach, feuch, rinneadh na h-uile nithe nuadh.

18 Agus is ann o Dhia *a ta* na

h-uile nithe, neach a rinn sinne réidh ris féin tre Iosa Crìosd, agus a thug dhuinn mi-mistireil-eachd na réite;

19 Eadhon, gu robh Dia ann an Chrìosd, a' dèanamh an t-saoghail réidh ris féin, gun bhi a' meas an cionta dhoibh; agus dh'earb e ruinne focal na réite.

20 Uime sin is teachdairean sinn air son Chrìosd, mar gu cuireadh Dia impidh leinne: tha sinne a' guidhe *oirbh* as uchd Chrìosd, bithibh réidh ri Dia.

21 Oir rinn e esan do nach b'aithne peacadh, 'na iobairt-pheacaidh air ar son-ne; chum gu bitheamaid air ar dèanamh 'nar fireantachd Dhé annsan.

CAIB. VI.

UIME sin tha sinn mar chomh-oibrichean *leis-san*, a' guidhe *oirbh*, gun sibh a ghabhail gràis Dé an diomhanas:

2 (Oir a ta e ag ràdh, Ann an àm taitneach dh'éisd mi riut, agus ann an là slàinte rinn mi comhnadh leat: feuch, a nis an t-àm taitneach; feuch, a nis là na slàinte.)

3 Gun bhi toirt aobhair oilbheim air bith ann an aon ni, chum nach faigheadh a' mhinistireil-eachd mi-chliu:

4 Ach anns gach ni 'gar dearbhadh féin mar mhinistireibh Dhé, ann am mòr-fhoighidin, ann an àmhgharaibh, ann an uireasbhuidh, ann an teanntachdaibh,

5 Ann am buillibh, ann am prìosanaibh, ann an luasgadh o àit gu h-àit, ann an saothair, ann am faire, ann an trasgaibh,

6 Ann am fìor-ghloine, ann an eòlas, ann am fad-fhulangas, ann an caoimhneas, anns an spiorad naomh, ann an gràdh gun cheilg,

7 Ann am focal na fìrinn, ann

an cumhachd Dhé, le airm na fireantachd air an làimh dheis agus chli,

8 Tre urram agus eas-urram, tre mhì-chliu agus dheadh-chliu: mar mhealltairibh, gidheadh fìr-inneach;

9 Mar dhream nach aithnìchear, gidheadh air am bheil deadh aithne; mar dhream a ta faghail a' bhàis, gidheadh feuch, tha sinn beò; mar dhream a smachdaichear, agus gun am marbhadh;

10 Mar dhream a ta brònach, gidheadh a ghnàth a' dèanamh gàirdeachais; mar *dhaoine* bochda, gidheadh *a ta* dèanamh mòrain saobhir; mar *dhaoine* aig nach 'eil ni sam bith, gidheadh a' sealbhachadh nan uile nithe.

11 Tha ar beul-ne fosgailte dhuibhse, O a Chorintianacha, tha ar cridhe air a dhèanamh farsuinn.

12 Cha'n 'eil sibh ann an cumhannachd annainne, ach tha sibh ann an cumhannachd ann bhur n-innibh féin.

13 A nis mar ath-dhioladh san ni sin féin, (tha mi a' labhairt mar ri *m'* chloinn,) bithibh-sa farsuinn mar an ceudna.

14 Na cuing-cheanglar gu neo-chothromach sibh maille ri mì-chreidich: oir ciod e caidreabh na fireantachd ri neo-fhìreantachd? agus ciod e commonn an t-soluis ris an dorchadas?

15 Agus ciod an réite a ta aig Crìosd ri Belial? no ciod i cuid a chreidich, maille ri ana-creideach?

16 Agus ciod a' cho-réite a ta aig teampull Dé ri h-ìodholaibh? oir is sibhse teampull an Dé bheò; a réir mar a thubhairt Dia, Gabhaidh mise còmhnuidh annta, agus gluaisidh mi 'nam measg; agus bithidh mise a'm' Dhia aca-san, agus bithidh iad-san 'nan sluagh agam-sa.

17 Uime sin thigibh a mach as am meadhon, agus dealaichibh *riu*, tha an Tighearn ag ràdh, agus na beanaibh ris an ni neòghlan; agus gabhaidh mise a m' ionnsuidh sibh,

18 Agus bithidh mi a'm' Ath-air dhuibh, agus bithidh sibhse 'nur mic agus 'nur nigheanaibh dhomh-sa, tha an Tighearn uile-chumhachdach ag ràdh.

CAIB. VII.

UIME sin, a mhuinntir mo ghràidh, air dhuinn na geallanna so bhi againn, glanamaid sinn féin o gach uile shalachar feòla agus spioraid, a' coimhlionadh naomhachd ann an eagal Dé.

2 Gabhaibh ruinne: cha d'rinn sinn eucoir air aon duine, cha do thruaill sinn aon duine, cha do mheall sinn aon duine.

3 Cha'n ann chum bhur ditidh a ta mi a' labhairt so: oir thubhairt mi roimh, gu bheil sibh ann ar cridheachaibh-ne chum bàsachadh maille *ribh*, agus a bhi beò maille *ribh*.

4 *Is* mòr mo dhànachd cainnte do 'ur taobh-sa, *is* mòr m' uail as bhur leth: lìonadh le comhfhurtachd mi, tha mi thar tomhas aoibhneach ann ar n-uile àmhghar-ne.

5 Oir an uair a thàinig sinn gu Macedonia, cha d'fhuir ar feòil fois sam bith, ach bha sinn fuaidh àmhghar air gach taobh; an leth am muigh *bha* còmhraig, an leth a stigh *bha* eagal:

6 Ach Dia a bheir comhfhurtachd dhoibh-san a tha airan leagadh sìos, thug e comhfhurtachd dhuinne le teachd Thituis:

7 Agus cha'n e le a theachd-san a mhàin, ach mar an ceudna leis a' chomhfhurtachd a fhuair esan uaibhse, 'nuair a chuir e an céill duinn bhur dian-

thogradh, bhur caoidh, bhur teas-ghràdh dhomh-sa; air chor as gur mòid a rinn mi gàirdeachas.

8 Oir ge do chuir mi doilgheas oirbh leis an litir, cha'n 'eil aithreachas orm, ged bha aithreachas orm: oir tha mi faicinn gu'n do chuir an litir sin doilgheas oirbh, ged nach *d'rinn i so* ach rè tamuill.

9 A nis tha gàirdeachas orm, cha'n ann air son sibh a bhi doilich, ach gu robh sibh doilich chum aithreachais: oir bha doilgheas oirbh air mhodh diadhaidh, chum, nach tigeadh call oirbh ann an aon ni do ar taobh-ne.

10 Oir oibrichidh am bròn diadhaidh aithreachas chum slàinte do nach gabhar aithreachas: ach oibrichidh doilgheas an t-saoghail bàs.

11 Oir feuch, an ni so féin doilgheas diadhaidh bhi oirbh, ciod e meud an dùrachd a dh'oibrich e annaibh, seadh, *ciod* an glanadh oirbh féin, seadh, *eiod* an ro dhiom, seadh, *ciod* an t-eagal, seadh, *ciod* an dian-thogradh, seadh, *ciod* an t-eud, seadh, *ciod* an togradh dioghaltais? anns gach ni dhearbh sibh sibh féin bhi glan sa' chùis so.

12 Uime sin ge do sgrìobh mi do 'ur n-ionnsuidh, cha b'ann air a shon-san a rinn an eucoir, no air a shon-san air an d'rinneadh an eucoir, ach a chum gu foillsichteadh dhuibh ar curam-ne mu'r timchioll-sa am fianuis Dé.

13 Uime sin fhuair sinn comhfhurtachd air son bhur comhfhurtachd-sa: seadh, bu ro mhò a rinn sinn gàirdeachas, air son gàirdeachais Thituis, do bhrìgh gu'n d' fhuair a spiorad suaimhneas uaibhse uile.

14 Oir ma rinn mi bòsd sam bith ris-san asaibhse, cha'n 'eil nàire orm; ach mar a labhair

sinn na h-uile nithe am firinn ribhse, is amhuil sin a fhuaradh firinneach ar bòsd asaibhse ri Titus.

15 Agus a ta dùrachd a chridhe-san ni's pailte do 'ur taobh-sa, air dha bhi a' cuimhneachadh bhur n-ùmhlaichd uile, mar a ghabh sibh ris le h-eagal agus ball-chrith.

16 Uime sin tha gàirdeachas orm gu bheil dànachd agam asaibh anns gach ni.

CAIB. VIII.

ANIS, a bhràithre, tha sinn a' toirt fios duibh air gràs Dé, a thugadh do eaglaisibh Mhacedonia:

2 Eadhon gu'n robh, ann am mòr-dhearbhadh àmhghair, pailteas an aoibhneis, agus doimhne am bochdainn, ro phailte chum saoibhreis am fialuidheachd.

3 Oir (tha mi toirt fianuis,) *gu robh* iad uatha féin toileach a réir an comais, seadh, thar an comas:

4 A' guidhe oirne gu dùrachdach, gu'n gabhamaid an tiodh-lac, agus comh-roinn an fhrith-ealaidh do na naomhaibh.

5 Agus cha'n ann mar a shaoil sinne, ach thug siad iad féin air tùs do'n Tighearn, agus *'na dhéigh sin* dhuinne a réir toil Dé:

6 Air chor as gu'n do chuir sinn impidh air Titus, a réir mar a thòisich e roimh, mar sin gu'n crìochnaicheadh e annaibh-sa an gràs sin féin mar an ceudna.

7 Uime sin mar a ta sibh pailte anns gach uile ni, ann an creidimh, ann an ùr-labhradh, agus ann an eòlas, agus ann an uile dhìchioll, agus ann bhur gràdh dhuinne, bithibh pailte anns a' ghràs so mar an ceudna.

8 Cha'n 'eil mi a' labhairt so mar àithne, ach a thaobh dùrachd dhæine eile, agus a dhear-

bhadh tréibhdhireas bhur gràidh-sa.

9 Oir is aithne dhuibh gràs ar Tighearna Iosa Crìosd, ged bha e saoi bhir, gidheadh gu'n d'rinneadh bochd e air bhur sonsa, chum gu biodh sibhse saoi bhir tre a bhochdainn-san.

10 Agus anns ann *ni* so tha mi toirt *mo* chomhairle: oir a ta so tarbhach dhuibhse, a thòisich roimh, cha'n e mhàin air dèanamh, ach air a bhi togarrach o cheann bliadhna.

11 A nis air an aobhar sin coimhlionaibh an gnìomh; ionnus mar a bha sibh ullamh chum na toile, mar sin gu'm bì sibh ullamh chum coimhlionaidh as na bheil agaibh.

12 Oir ma bhios air tùs inntinn thoileach ann, gabhar ris a réir mar a ta aig neach, agus cha'n ann a réir nan nithe nach 'eil aige.

13 Cha'n ann chum gu'm biodh socair aig daoine eile, agus àmhghar agaibh-sa.

14 Ach a thaobh co-cheartais, chum san àm so nis gu'm bì bhur pailteas-sa 'na choimhleasachadh air an uireasbhuidh-san, agus mar an ceudna chum gu'm bì am pailteas-san 'na choimhleasachadh air bhur n-uireasbhuidh-sa, air chor as gu'm bì co-cheartas eadaraibh;

15 A réir mar a ta e sgrìobhta, An tì a thionail mòran, cha robh anabarr aige; agus an tì a thionail beagan, cha robh easbhuidh air.

16 Ach buidheachas do Dhia, a chuir an cùram dùrachdach sin féin do 'ur taobh-sa ann an cridhe Thituis.

17 Oir gu deimhin ghabh e ris an impidh; ach air dha bhi ni bu togarraiche, chaidh e d'a thoil féin do 'ur n-ionnsuidh.

18 Agus chuir sinne maille

ris am bràthair, aig am bheil a chliù san t-soisgeul, feadh nan eaglaisean uile:

19 (Agus cha'n e so a mhàin, ach thaghadh e leis na h-eaglaisibh mar an ceudna mar chompanach turuis dhuinne, leis an tiodhlac so a fhrithealadh leinne chum glòire an Tighearna sin féin, agus chum foillseachaidh bhur n-inntinn ullamh-sa.)

20 A' seachnadh so, nach tugadh neach air bith mì-chliu dhuinne thaobh a' phailteis so a fhrithealadh leinne:

21 Air dhuinn bhi solarachadh nithe ciatach, cha'n e mhàin am fianuis an Tighearn, ach mar an ceudna am fianuis dhaoine.

22 Agus chuir sinn maille riu ar bràthair, a dhearbhadh sinn gu minic dùrachdach am mòran do nithibh, ach a nis ni's ro dhùrachdaiche, a thaobh an ro-earbsa ta aige asaibh-sa.

23 Ma dh'fhiosraichear ni sam bith mu Thitus, is e mo chompanach-sa e, agus mo chomh-oibriche do 'ur taobh-sa: no mu thimchioll nam bràithre, is iad teachdairean nan eaglaisean, agus glòir Chrìosd.

24 Uimesin nochdaibh dhoibh-san, agus am fianuis nan eaglaisean, dearbhadh bhur gràidh-sa, agus ar n-uail-ne do 'ur taobh.

CAIB. IX.

OIR a thaobh frithealaidh do na naomhaibh, is neo-fheumail dhomh-sa sgrìobhadh do 'ur n-ionnsuidh.

2 Oir is aithne dhomh togarrachd bhur n-inntinn, as leth am bheil mi dèanamh uail asaibh-sa ris na Macedonaich, ag ràdh, Gu robh Achaia ullamh o cheann bliadhna; agus bhrosnuich bhur n-eud-sa ro-mhòran.

3 Gidheadh chuir mi na bràithre do 'ur n-ionnsuidh, air

eagal gu'm biodh ar n-uaille-ne
asaibh dìomhain sa' chùis so ;
chum, mar a thubhairt mi, gu'm
biodh sibh ullamh :

4 Air eagal ma thig na Ma-
cedonaich maille rium, agus
gu'm faigh iad sibhse neo-ullamh,
gu'm bì nàire oirne, (gun a
ràdh oirbhse,) á dànadas na h-
uail so.

5 Uime sin bhreithnich mi
gu'm b'fheumail impidh chur
air na bràithribh, iad a dhol air
tùs do 'ur n-ionnsuidh-sa, agus
hhur tabhartas, air an do labh-
radh ribh roimh, a dhèanamh
deas, chum gu'm biodh sin ull-
amh, mar thiodhlac, agus cha'n
ann mar ni a dh'aindeoin.

6 Ach so a ta mi ag ràdh, An
tì a chuireas gu gann, buainidh
e gu gann mar an ceudna ; agus
an tì a chuireas gu pailte, buain-
idh e gu pailte mar an ceudna.

7 Thugadh gach duine seachad
a réir rùin a chridhe ; na b'ann
an doilgheas, no le h-éigin : oir
is toigh le Dia an neach a bheir
seachad gu suilbhir.

8 Agus is comasach Dia air
gach gràs a dheanamh ro phailte
dhuibhse, chum air dhuibh anns
gach uile ni làn leoir a bhi ag-
aibh a ghnàth, gu'm biodh sibh
pailte chum gach deadh oibre.

9 (A réir mar a ta e sgriobhta,
Sgaoil e a chuid ; thug e do na
bochdaibh : mairidh 'fhìrean-
tachd a chaoidh.

10 A nis an tì a bheir sìol
do'n fhear-cuir, agus aran chum
bìdh, gu tugadh e agus gu meud-
aicheadh e bhur curachd-sa, ag-
us gu tugadh e do thoradh bhur
fìreantachd fàs.)

11 Air dhuibh bhi air bhur
dèanamh saoibhir anns gach uile
ni chum gach uile thabhartaish,
ni a dh' oibrichas leinne breith-
buidheachais do Dhia.

12 Oir a ta frithealadh na

seirbhis so, cha'n e mhàin a'
leasachadh uireasbhuidh nan
naomh, ach a ta e mar an ceudna
pailte tre mhòran breth-buidh-
eachais do Dhia ;

13 (Air dhoibh bhi tre
dhearbhadh an fhrithealaidh so
a' toirt glòire do Dhia air son
bhur n-ùmhachd do shoisgeul
Chrìosd a réir bhur n-aidmheil,
agus air son bhur tabhartais
fhialuidh dhoibh-san, agus do na
h-uile dhaoinibh :)

14 Agus tre an ùrnuigh air
bhur son-sa, aig am bheil mòr-
dhéidh oirbh air son gràis Dé a
ta ro phailte annaibh.

15 Buidheachas do Dhia air
son a thiodhlaic do-labhairt.

CAIB. X.

ANIS tha mise féin Pòl a'
guidhe oirbh, tre mhacan-
tas agus shèimheachd Chrìosd,
neach air dhomh a bhi làthair a
ta ìosal 'nur measg, ach air
dhomh a bhi uaibh a ta dàna
oirbh :

2 Ach tha mi ag iarraidh oirbh
a dh' athchuinge, gun sibh a thoirt
orm, an uair a bhios mi làthair,
bhi dàna, leis a' mhuighin leis
an saoillear mi bhi dàna an agh-
aidh dream àraidh a tha toirt
meas oirne, mar gu bitheamaid
ag imeachd a réir na feòla.

3 Oir ged tha sinn ag imeachd
anns an fheòil, cha'n ann a réir
na feòla ta sinn a' cogadh :

4 (Oir ar n-airm chogaidh
cha'n fheòlmhor iad, ach cumh-
achdach o Dhia chum daing-
nichean a leagadh :)

5 A' tilgeadh sìos reusonach-
aidh, agus gach ni àrd a dh' àrd-
aicheas e féin an aghaidh eòlais
Dé, agus a' toirt am braigh-
deanas gach smuain chum ùmh-
lachd Chrìosd :

6 Agus dìoghaltas ullamh
againn r'a dhèanamh air gach

uile eas-ùmhlaichd, 'nuair a choimhlionar bhur n-ùmhlaichd-sa.

7 An amhairc sibh air nithibh a réir an coslais? ma tha dòchas aig aon neach as féin, gur le Crìosd e, smuainicheadh e so a ris uaith féin, mar is le Crìosd esan, gur le Crìosd sinne mar an ceudna.

8 Oir ged dhèanainn càileigin nì's mò dh'uaill as ar cumhachd-ne, (a thug an Tighearna dhuinn chum fòghluim, agus cha'n ann chumbhur sgrios-sa,) chabhiodh nàire orm:

9 Chum nach measar mi mar gu'm bithinn a' cur eagail oirbh le litrichibh.

10 Oir a ta a litrichean, (tha iadsan ag ràdh,) cudthromach agus làidir, ach a tu a làthaireachd chorporra anmhunn, agus a chainnt tàireil.

11 Smuainicheadh a leithid sin do dhuine so, mar a ta sinne ann am focal tre litrichibh, agus sinn as làthair, mar sin gu'm b'è sinn ann an gnìomh air dhuinn a bhi làthair.

12 Oir cha'n 'eil a dhànadas againne sinn féin a chur an àir-eamh, no a choimeas ri dream àraidh a mholas iad féin: ach air dhoibh-san bhi 'gan tomhas féin eatorra féin, agus 'gan coimeas féin riu féin, cha'n 'eil iad glic.

13 Ach cha dèan sinne uaill á nithibh a tha thar ar tomhas, ach a réir tombais na riaghailt a roinn Dia dhuinne, eadhon tomhas a ruigeas oirbhse.

14 Oir cha'n 'eil sinne 'gar sìneadh féin thar ar tomhas, mar nach ruigeamaid sibhse; oir thàinig sinn eadhon do 'ur n-ionnsuidh-sa, le soisgeul Chrìosd:

15 Gun sinn a bhi dèanamh uaill á nithibh a ta thar ar

tomhas, eadhon á saothairibh dhaoine eile; ach a ta dòchas againn, 'nuair a mheudaichear bhur creidimh-sa, gu'm faigh sinn farsuinneachd gu pailte annaibh a réir ar riaghailt-ne,

16 Chum an soisgeul a shearmonachadh anns na h-ionadaibh an taobh thall duibhse, agus cha'n ann chum uaill a dhèanamh ann an riaghailt duine eile, á nithibh a ta ullamh a cheana.

17 Ach an tì a nì uaill, dèanadh e uaill anns an 'Tighearn.

18 Oir cha'n e an tì a mholas e féin á tha ionmholta, ach an tì a mholas an 'Tighearn.

CAIB. XI.

B'FHEARR leam gu'n giùl-aineadh sibh beagan le m'amaideachd; agus da rìreadh giùlainibh leam.

2 Oir a ta mi eudmhor umaibh le h-eud diadhaidh; oir rinu mi ceangal-pòsaidh eadar sibh agus aon fhear, chum bhur cur mar òigh fhìor-ghloin an làthair Chrìosd.

3 Ach a ta eagal orm, air dòigh sam bith, mar a mheall an nathair Eubha le a cuilbheartachd, mar sin gu'n truaillear bhur n-inntinn-sa o'n aon-fhillteachd a ta ann an Crìosd.

4 Oir nan dèanadh an neach a thig, Iosa eile a shearmonachadh nach do shearmonaich sinne, no nam faigheadh sibhse spiorad eile, nach d'fhuair sibh, no soisgeul eile ris nach do ghabh sibh, dh'fheudadh sibh gu maith giùlan leis.

5 Oir is i mo bharail-sa nach robh mi a bheag goirid air na h-abstolaibh a b'airde.

6 Ach ged tha mi neo-fhòghluimte ann an cainnt, gidheadh cha'n 'eil mi marsin ann an eòlas; ach rinneadh sinn làn-fhollais-

each anns na h-uile nithibh 'nur measg-sa.

7 An d'rinn mi cionta le mi féin isleachadh chum gu'm biodh sibhse air bhur n-àrdachadh, *no* a chionn gu'n do shearmonaich mi soisgeul Dé a nasgaidh dhuibh?

8 Chreach mi eaglaisean eile, a' gabhail tuarasdail *uatha*, chum seirbhìs a dhèanamh dhuibhse.

9 Agus an uair a bha mi làth-air maille ribhse agus uireasbhuidh orm, cha do leig mi mothrom air duine sam bith: oir leasaich na bràithrean, a thàinig o Mhacedonia m' uireasbhuidh: Agus anns na h-uile nithibh choimbid mi mi féin o m' throm a leigeadh oirbhse, agus coimhididh.

10 Mar a ta fìrinn Chrìosd annam, cha chumar an uail so uam ann an crìochaibh na h-Achaia.

11 C'ar son? An ann a chionn nach 'eil gràdh agam dhuibh? Tha fios aig Dia.

12 Ach an ni a ta mi dèanamh, ni mi fathast e, chum gu toir mi air falbh cion-fàth uathas-san le'm bu mhiann cion-fàth fhaotainn, chum anns an ni as am bheil iad a' dèanamh uail, gu faighear iad eadhon mar sinne.

13 Oir is ann d'an leithidibh sin *a ta* abstola bréige, luchd-oibre cealgach, 'gan cur féin ann an cosamhlachd abstola Chrìosd.

14 Agus cha'n iongantach *sin*: oir cuirear Satan féin an cruth aingil soillse.

15 Uime sin cha ni mòr e ged chuirear a mhinistirean mar an ceudna ann an cruth mhinistirean na fireantachd; aig am b' ann an crìoch dheireannach a réir an oibre.

16 A ta mi ag ràdh a rìs, Na measadh aon neach gur amadan

mi; no fòs, gabhaibh rium mar amadan féin, chum gu'n dèan mi beagan uaill asam féin.

17 An ni a ta mi a' labhairt, cha'n ann a réir an Tighearna a ta mi 'ga labhairt, ach mar gu b'ann gu h-amaideach anns an dànadas uaille so.

18 Do bhrìgh gu bheil mòran a' dèanamh uail a réir na feòla, ni mise uail mar an ceudna.

19 Oir giùlainidh sibh gu toileach le amadanaibh, do bhrìgh gu bheil sibh *féin* glic.

20 Oir fuilgidh sibh ma bheir neach an daorsa sibh, ma dh'ith-eas neach *sibh*, ma bheir neach bhur cuid *dhibh*, ma dh'àrdaicheas neach e féin, ma bhuaileas neach air an aghaidh sibh.

21 Tha mi a' labhairt a thaobh eas-urraim, mar gu'm bitheamaid anmhunn: ach, ge b'e ni anns am bheil neach air bith dàna, (tha mi a' labhairt gu h-amaideach,) a ta mise dàna *ann* mar an ceudna.

22 An Eabhruidhich iad? *mar sin tha* mise mar an ceudna: An Israelich iad? *mar sin tha* mise mar an ceudna: An sliochd do Abraham iad? *mar sin tha* mise mar an ceudna:

23 Am ministirean do Chrìosd iad? (tha mi a' labhairt mar dhuine mi-chéillidh,) a ta mise os an ceann *san ni so*: ann an saothairibh ni's pailte, ann am buillibh ni's ro mhò, am prìosan-aibh ni's trice, am bàsaibh gu minic.

24 Fhuair mi o na h-Iudhaich cùig uairean dà fhichead *buille* ach a h-aon.

25 Ghabhadh le slataibh orm trì uairean, chlachadh mi aon uair, dh'fhuiling mi long-bhriseadh trì uairean; là agus oidhche bha mi san doimhne:

26 Ann an turusaibh gu minic, ann an gàbhadh aimhnichean,

ann an cunnartaibh fhear-reubainn, ann an cunnartaibh o m' chinneach *féin*, ann an cunnartaibh o na Cinnich, ann an cunnartaibh sa' bhaile, ann an cunnartaibh san fhàsach, ann an cunnartaibh san fhairge, ann an cunnartaibh am measg bhràithre breugach;

27 Ann an saothair agus sgìos, am fairibh gu minic, ann an ocras agus tart, an trasgaibh gu minic, am fuachd agus an lom-nochduidh.

28 A bhàrr air na nithibh a ta an leth muigh, an nì a ta teachd orm gu lathail, ro-chùram nan eaglaisean uile.

29 Cò a ta lag, agus nach 'eil mise lag? cò a ta faotainn oilbheim, agus nach 'eil mise a' losgadh?

30 Ma's éigin domh uail a dhèanamh, is ann as na nithibh a bhuineas do m'anmhuinneachd a nì mi uail.

31 Tha fios aig Dia, eadhon Athair ar Tighearna Iosa Crìosd, a tha beannaichte gu sìorruidh, nach 'eil mi dèanamh bréige.

32 Ann an Damascus chuir uachdaran a' *phobuill*, fuidh Ar-etas an rìgh, freiceadan air baile nan Damasceneach, an rùn mise a ghlacadh:

33 Ach tre uinneig leigeadh sìos ris a' bhalla mi ann an cliabh, agus chaidh mi as a làmh-aibh.

CAIB. XII.

GU deimhin cha'n 'eil e iom-chuidh dhomhsa uail a dhèanamh: ach thig mi chum seallanna agus taisbeana an Tighearna.

2 B'aithne dhomh duine ann an Crìosd ceithir bliadhna deug roimh so, (ma's annsa a' choluinn, cha'n fhios domh; no as a' choluinn, cha'n fhios domh; aig

Dia a ta fios;) a leithid sin do dhuine thogadh chum an treas nèamh.

3 Agus b'aithne dhomh a leithid sin do dhuine, (ma's annsa a' choluinn, no as a' choluinn, cha'n fhios domh: aig Dia a ta fios;)

4 Gu'n do thogadh suas e gu pàrras, agus gu'n cual e briathra do-labhairt, nach feud duine a labhairt.

5 M'a leithid sin *do dhuine* nì mi uail: ach asam féin cha dèan mi uail, mur *dèan mi á m'anmhuinneachdaibh*.

6 Oir ged b'àill leam uail a dhèanamh, cha bhi mi a' m'amadan; oir labhraidh mi an fhèirinn: gidheadh a ta mi a' cumail orm féin, air eagal gu'm bì meas aig duine dhiom thar mar a ta e 'gam fhaicinn, no a' cluinntinn umam.

7 Agus air eagal gu'm bithinn air m'àrdachadh thar tomhas, tre ro-mheud nan taisbean, thugadh dhomh sgolb san fheoil, teachdair Shatain chum gu'm buaileadh e mi, air eagal gu'm bithinn air m'àrdachadh thar tomhas.

8 Air a shon so ghuidh mi an Tighearn trì uairean, gu'n imicheadh so uam.

9 Agus thubhairt e rium, Is leoir mo ghràs-sa dhuit: oir a ta mo chumhachd air a dhèanamh foirfe ann an anmhuinneachd. Uime sin is ro thoiliche a nì mi uail á m'anmhuinneachdaibh, chum gu'n gabh cumhachd Chrìosd còmhnuidh orm.

10 Uime sin tha mi gabhail tlachd ann an anmhuinneachdaibh, am maslaibh, ann an uir-easbhuidhibh, ann an geur-leanmhuinnibh, ann an teanntachdaibh air son Chrìosd: oir an uair a ta mi lag, an sin a ta mi làidir.

11 Rinneadh a' m'amadan mi

le uailh a dhèanamh; dh'éignich sibhse mi: oir bu chòir dhomh bhi air mo mholadh leibhse: oir cha robh mi bheag sam bith fo na h-abstolaibh a's àirde, ged nach 'eil annam ach neo-ni.

12 Gu deimhin dh'oibricheadh comharan abstoil ann bhur measg-sa anns gach uile fhoighidin, ann an comharaibh agus an iongantasaibh, agus an cumhachdaibh.

13 Oir ciod an ni anns an robh sibh ni bu lugha na eaglais-ean eile, mur e nach do leig mi féin mo throm oirbh? thugaibh maitheanas dhomh san eucoir so.

14 Feuch, a ta mi ullamh a nis an treas uair gu teachd do 'ur n-ionnsuidh; agus cha chuir mi mo throm oirbh; oir cha'n e bhur cuid a tha mi 'g iarraidh, ach sibh féin: oir cha'n 'eil e mar fhiachaibh air a' chloinn ionmhas a chruinneachadh fa chomhair nam pàrantan, ach air na pàrantaibh fa chomhair na cloinne.

15 Agus is ro thogarrach a nì mise caitheadh agus a chaithear mi air son bhur n-anama-sa, ged mar is ro phailte a ta gràdh agam dhuibh, gur lugha bhur gràdh-sa dhomh.

16 Ach biodh e mar sin, nach do chuir mi trom oirbh: gidheadh air dhomh bhi innleachdach, ghlac mi le seòltachd sibh.

17 An d'rinn mise tre aon neach dhiubh-san a chuir mi do 'ur n-ionnsuidh buannachd dhibh?

18 Ghuidh mi air Titus *dol do 'ur n-ionnsuidh*, agus chuir mi bràthair maille ris: an d'rinn Titus buannachd dhibh? nach do ghluais sinn san aon spiorad? agus anns na h-aon cheumaibh?

19 A ris, am bheil sibh a' saoil sinn gu bheil sinne gabhail ar leithsgeil ribh? tha sinn a'

labhairt am fianuis Dé ann an Crìosd: ach *a ta* an t-iomlan, a chàirde, chum bhur fòghluim-sa.

20 Oir is eagal leam, air dhomh teachd, nach faigh mi sibh mar is miann leam, agus gu faighear mise dhuibhse mar nach bu mhiann leibh: air eagal gu'm bi connasachadh, farmad, fearg, comhstri, cùl-chàineadh, cogarsaich, àrdain, ceannairce 'nur measg:

21 Air eagal an uair a thig mi a ris, gu'n islich mo Dhia mi 'nur measg, agus gu dèan mi caoidh air son mòrain do'n dream a pheacaich a cheana, agus nach do ghabh aithreachas do'n neòghloine, agus striopachas, agus mhacnus a riun iad.

CAIB. XIII.

Is i so an treas uair a ta mi a' teachd do 'ur n-ionnsuidh: am beul dithis no triuir do fhianuisibh bithidh gach focal seasmhach.

2 Dh'innis mi cheana, agus tha mi roimh-làimh ag innseadh dhuibh, mar gu'm bithinn a làthair an dara uair; agus a nis air dhomh bhi as bhur làthair, tha mi a' sgriobhadh chum na dream a pheacaich roimh so, agus chum chàich uile, ma thig mi a ris, nach caomhain mi:

3 O tha sibh ag iarraidh dearbhaidh air Crìosd a' labhairt annam-sa, neach do 'ur taobh-sa nach 'eil amhuinn, ach a ta cumhachdach annaibh.

4 Oir ge do chéusadh e tre anmbuinneachd, gidheadh a ta e beò tre chumhachd Dhé: oir a ta sinne mar an ceudna amhuinn ann-san, gidheadh bithidh sinn beò maille ris tre chumhachd Dhé do 'ur taobh-sa.

5 Ceasnaichibh sibh féin, am bheil sibh sa'chreidimh; dearbh-aibh sibh féin: nach aithne

dhuibh sibh féin, gu bheil Iosa Crìosd annaibh, mur daoine a chuireadh air cul sibh?

6 Ach tha dòchas agam gu 'm bì fhios agaibh nach daoine a chuireadh air cùl sinne.

7 A nis tha mi guidhe air Dia gun sibhse a dhèanamh uile air bith; cha 'n ann chum gu 'm faicear sinne bhi dearbhta, ach chum gu 'n dèanadh sibhse an ni sin a ta maith, ged robh sinne mar dhaoine a chuireadh air cùl.

8 Oir cha 'n urrainn sinn ni air bith a dhèanamh an aghaidh na fìrinn, ach air son na fìrinn.

9 Oir tha sinn subhach an uair a tha sinn *féin* anmhunn, agus sibhse làidir: agus tha sinn a' guidhe so mar an ceudna, sibhse bhi dìongmhalta.

10 Is ann uime so a sgrìobh mi na nithe so *do 'ur n-ionnsuidh* air dhomh bhi as bhur làthair, chum air dhomh bhi làthair nach bithinn garg, a réir a' chumhachd a thug an Tighearna dhomh chum fòghluim, agus cha 'n ann chum sgrios.

11 Fa dheòidh, a bhràithre, slàn leibh: bithibh dìongmhalta, bithibh subhach, bithibh a dh'aon inntinn, bithibh sìochail; agus bithidh Dia a' ghràidh agus na sìthe maille ribh.

12 Cuiribh fàilte air a chéile le pòig naoimh.

13 Tha na naoimh uile a' cur beannachd do 'ur n-ionnsuidh.

14 Gràs an Tighearna Iosa Crìosd, agus gràdh Dhé, agus comh-chomunn an Spioraid naoimh, *gu robh* maille ribh uile. Amen.

LITIR AN ABTSOIL PHOIL CHUM NAN GALATIANACH.

CAIB. I.

POL abstol, (cha 'n ann o dhaoineibh, no tre dhuine, ach tre Iosa Crìosd, agus tre Dhia an t-Athair, a thog suas e o na marbhaibh,)

2 Agus na bràithrean uile a tha maille rium, chum eaglaisean Ghalatia:

3 Gràs duibh, agus sìth o Dhia an t-Athair, agus o ar Tighearn Iosa Crìosd,

4 A thug e féin air son ar peacanna, chum gu 'n saoradh e sinn o'n droch shaoghal a ta làthair, a réir toile Dé agus ar n-Athar-ne:

5 Dhasan *gu robh* glòir gu saoghal nan saoghal. Amen.

6 Is iongnadh leam gu 'n d'atharraicheadh sibh co luath uaith-san a ghairm sibh tre ghràs Chrìosd, gu soisgeul eile:

7 Ni nach *soisgeul* eile; ach a ta dream àraidh 'gur buaireadh, le'n àill soisgeul Chrìosd a thilgeadh bun os ceann.

8 Ach nan dèanamaid-ne, no aingeal o nèamh, soisgeul eile a shearmonachadh dhuibh, ach *an soisgeul a* shearmonaich sinne dhuibh, biodh e malluichte.

9 Amhuil mar a thubhairt sinn roimh, a ta mise ag ràdh a nis a rìs mar an ceudna, Ma shearmonaicheas neach sam bith soisgeul eile dhuibh, ach *an*

soisgeul a ghabh sibh, biodh e malluichte.

10 Oir am bheil mi nis a' cur impidh air daoineibh, no air Dia? no am bheil mi 'g iarraidh daoine a thoileachadh? oir nam bithinn fathast a' toileachadh dhaoine, cha bhithinn a'm' sheirbhiseach aig Crìosd.

11 Ach a ta mi toirt fios duibh, a bhràithre, an *soisgeul* a shearmonaicheadh leam-sa, nach ann a réir duine a ta e.

12 Oir cha b'ann o dhuine a fhuair mi e, ni mò a theagaisgeadh dhomh e, ach tre fhoillseachadh Iosa Crìosd.

13 Oir chuala sibh mo chaithe-beatha-sa san aimsir a chaidh seachad, ann an creidimh nan Iudhach, gu'n d'rinn mi thar tomhas geur-leanmhuinn air eaglais Dé, agus gu'n d'fhàsaich mi i:

14 Agus gu'n d' thàinig mi air m' aghaidh ann an creidimh nan Iudhach thar mòran do m' chomh-aoisibh am measg mo chinnich féin, air dhomh bhi ni bu ro eudmhoire mu ghnàthanaibh mo shinnsireachd.

15 Ach an uair a b'i deadh thoil Dé, a sgar o bhroinn mo mhàthar mi, agus a ghairm mi tre a ghràs,

16 A Mhac féin fhoillseachadh annam, chum gu searmonaichinn e am measg nan Cinneach; air ball cha do chuir mi comhairle ri feòil agus fuil:

17 Ni mò chaidh mi suas gu Ierusalem, chum na muinntir sin a bha 'nan abstolaibh romham; ach chaidh mi gu Arabia, agus a rìs thàinig mi air m' ais gu Damascus.

18 An déigh sin an ceann thri bliadhna, chaidh mi suas gu Ierusalem, a dh'fhaicinn Pheadair, agus dh'fhan mi maille ris cùig làithean deug.

19 Ach neach air bith eile do na h-abstolaibh cha'n fhaca mi, ach Seumas bràthair an Tigh-earna.

20 A nis *anns* na nithibh a ta mi a' sgriobhadh dhuibh, feuch, an làthair Dhé, cha'n 'eil mi dèanamh bréige.

21 'Na dhéigh sin thàinig mi gu crìochaibh Shiria agus Chilia;

22 Agus cha robh eòlas orm a thaobh m' fhaicinn aig eaglaisibh Iudea, a bha ann an Crìosd.

23 Ach a mhàin chual iad, An tì anns an àm a chaidh seachad a bha 'gar geur-leanmhuinn, gu bheil e nis a' searmonachadh a' chreidimh a bha e a' sgrios roimh so:

24 Agus thug iad glòir do Dhia air mo shon-sa.

CAIB. II.

AN sin an ceann cheithir bliadhna deug chaidh mi a rìs suas gu Ierusalem, maille ri Barnabas, a' toirt Thituis leam mar an ceudna.

2 Agus chaidh mi suas a réir foillseachaidh, agus chuir mi an céill dhoibh an *soisgeul* a ta mi a' searmonachadh am measg nan Cinneach, ach ann an uaignidheas dhoibh-san d'an robh meas, air eagal air chor sam bith gu'n ruithinn, no gu'n do ruith mi an diomhanas.

3 Ach cha b'éigin do Thitus féin a bha a'm' chuideachd, bhi air a thimchioll-ghearradh, ged bu Ghreugach e:

4 Agus sin air son bhràithre bréige, a ghoid a steach 'nar measg, a thàinig a steach an uaignidheas a dh'fhaicinn ar saorsa, a ta againn ann an Iosa Crìosd, chum ar toirt fo dhaor-sa.

5 Do nach do ghéill sinn eadh-

on rè uaire ; chum gu 'm buan-
aicheadh firinn an t-soisgeil
maille ribhse.

6 Ach o'n dream sin, a mheas-
adh gu 'm bu ni éigin iad, (ciod
air bith a bha iad roimh, cha
'n 'eil suim ann domh-sa : cha 'n
'eil meas aig Dia do phearsa
duine,) oir iadsan a mheasadh
gu 'm bu ni éigin iad, cha do
phàirtich : iad le 'n còmhradh
bheag sam bith rium-sa.

7 Ach air an làimh eile,
'nuair a chunnaic iad gu 'n d'-
earbadh soisgeul an neo-thim-
chioll-ghearraidh rium-sa, mar
a dh'earbadh soisgeul an timchioll-
ghearraidh ri Peadar ;

8 (Oir an Tì a dh' oibrich gu
h-éifeachdach ann am Peadar
chum abstolachd an timchioll-
ghearraidh, dh' oibrich e gu
cumhachdach annam-sa mar an
ceudna chum nan Cinneach :)

9 Agus an uair a thuig Seum-
as, agus Cephas, agus Eoin, a
tha air am meas 'nam puist,
an gràs a thugadh dhomh, thug
iad dhomh-sa agus do Bharnabas
deas làmh a' chomuinn ; ionnus
gu rachamaid chum nan Cinn-
each, agus iad féin chum an
timchioll-ghearraidh.

10 A mhàin *b' àill leo* gu 'm
bitheamaid cuimhneachail air na
bochdaibh ; ni mar an ceudna a
bha ro-thoil agam féin a dhèan-
amh.

11 Ach an uair a thàinig
Peadar gu Antioch, sheas mi 'na
aghaidh as an eudann, a chionn
gu 'n robh e r' a choireachadh.

12 Oir roimh do dhream
àraidh teachd o Sheumas, dh' ith
e biadh maille ris na Cinnich :
ach an uair a thàinig iadsan,
chaidh e a thaobh agus thearb-
aidh se e féin, air eagal na
muinntir a bha do 'n timchioll-
ghearradh.

13 Agus rinn na h-Iudhaich

eile gnus-mhealladh maille ris
mar an ceudna ; ionnus gu 'n
d' thugadh Barnabas mar an
ceudna a thaobh le 'n cluain.

14 Ach an uair a chunnaic
mise nach do ghluais iad gu
tréibhdhireach, a réir firinn an
t-soisgeil, thubhairt mi ri Pead-
ar 'nam fianuis uile, Ma tha thu-
sa, a tha a' d' Iudhach, a' caith-
eadh do bheatha a réir nan
Cinneach, agus cha 'n ann a réir
nan Iudhach, c' ar son a ta thu
'g éigneachadh uan Cinneach
am beatha chaitheadh mar na
h-Iudhaich ?

15 Air dhuinne a tha 'nar
n-Iudhaich a thaobh nàduir, ag-
us cha 'n ann 'nar peacaich do na
Cinnich,

16 Fios a bhi againn nach
'eil duine air fhìreanachadh o
oibrìbh an lagha, ach tre chreid-
imh Iosa Crìosd, chreid sinne
féin ann an Iosa Crìosd ; chum
gu 'm bitheamaid air ar firean-
achadh o chreidimh Chrìosd,
agus cha 'n ann o 'oibrìbh an
lagha : oir o oibrìbh an lagha cha
bhi feoil sam bith air a firean-
achadh.

17 Ach air dhuinn bhi 'g iarr-
aidh bhi air ar fireanachadh tre
Chrìosd, ma gheibhear 'nar
peacaich sinn féin, *am bheil*,
uime sin, Crìosd 'na mhinis-
teir peacaidh ? Nar leigeadh
Dia.

18 Oir ma thogas mi a rìs
suas na nithe a leag mi, tha mi
dèanamh ciontach dhìom féin.

19 Oir a ta mise tre 'n lagh
marbh do 'n lagh, chum gu 'm
bithinn beò do Dhia.

20 Tha mi air mo chéusadh
maille ri Crìosd : gidheadh a ta
mi beò ; ach cha mhise, ach
Crìosd a ta beò annam : agus a'
bheatha a ta mi nis a' caitheadh
san fheoil, tha mi 'ga caitheadh
tre chreidimh Mhic Dhé, a

ghràdhaich mi, agus a thug e féin air mo shon.

21 Cha'n 'eil mi a' cur gràis Dé an neo-bhrìgh: oir ma tha fireantachd tre'n lagh, is ann gun aobhar a fhuair Crìosd bàs.

CAIB. III.

O A Ghalatianacha amaideach, cò a chuir druidheachd oirbh, ionnus nach biodh sibh ùmhal do'n fhirinn, d'an robh Crìosd air a nochdadh gu soilleir fa chomhair bhur sùl, air a chéusadh 'nur measg?

2 So a mhàin b' àill leam fhòghlum uaibh, An ann o oibribh an lagha a fhuair sibh an Spiorad, no o éisdeachd a' chreidimh?

3 Am bheil sibh co amaideach *as sin*? air dhuibh tòiseachadh san Spiorad, am bheil sibh a nis air bhur dèanamh foirfe leis an fheoil?

4 An d'fhuiling sibh na h-uiread sin do nithibh gu dìomhain? ma's ann da rìreadh gu dìomhain.

5 An Tì uime sin a tha frith-ealadh dhuibh an Spioraid, agus ag oibreachadh mhiorbhuile 'nur measg, an ann tre oibribh an lagha, no tre éisdeachd a' chreidimh *a nì e so*?

6 Amhuil mar a chreid Abraham Dia, agus a mheasadh sin dha mar fhìreantachd.

7 Uime sin biodh fhios agaibh, an dream a *tha* do'n chreidimh, gur iad sin clann Abraham.

8 Oir air fhaicinn roimh do'n sgriobtuir gu'm fireanaicheadh Dia na Cinnich tre chreidimh, shearmonaich e an soisgeul roimh-làimh do Abraham, *ag ràdh*, Beannaichear na h-uile Chinnich annad-sa.

9 Uime sin tha an dream a *tha* do'n chreidimh, air am

beannachadh maille ri Abraham, fìor-chreideach.

10 Oir a mheud 's a'ta do oibribh an lagha, tha iad fo 'n mhallachadh: oir a ta e sgriobhta, *Is* malluichte gach neach nach buanaich anns na h-uile nithibh a ta sgriobhta ann an leabhar an lagha chum an dèanamh.

11 Ach *is* ni follaiseach, nach fireanaichear neach sam bith tre'n lagh am fianuis Dé: oir, Bithidh am firean beò tre chreidimh.

12 Agus cha'n 'eil an lagh o chreidimh: ach, An duine a nì iad gbeibh e beatha anna.

13 Shaor Crìosd sinne o mhallachadh an lagha, air dha bhi air a dhèanamh 'na mhallachadh air ar son: oir a ta e sgriobhta, *Is* malluichte gach aon a chrochar air crann:

14 Chum gu'n tigeadh beannachadh Abraham air na Cinnich tre Iosa Crìosd; ionnus gu faigheamaid gealladh an Spioraid tre chreidimh.

15 A bhràithre, tha mi a' labhairt mar dhuine; ged nach bi ann ach coimhcheangal duine, ma tha e air a dhaingneachadh, cha chuir neach air bith air cùl e, agus cha chuirear ni sam bith ris.

16 A nis is ann do Abraham a thugadh na geallanna agus d'a shìol. Cha'n abair e, Agus do shìolaibh, mar gu'm biodh e *labhairt* mu mhòran; ach mar mu aon, Agus do d' shìol-sa, neach a's e Crìosd.

17 Agus a ta mi ag ràdh so, nach fheudar gu'n cuir an lagh, a thugadh an ceann cheithir cheud agus dheich bliadhna fich-ead 'na dhéigh, an coimhcheangal an neo-bhrìgh, a dhaingnich-eadh roimh le Dia ann an Crìosd, ionnus gu'n cuireadh e an gealladh air cùl.

18 Oir ma's ann o'n lagh a tu an oighreachd, cha 'n 'eil i ni's mò o'n ghealladh: ach thug Dia gu saor i do Abraham tre ghealladh.

19 C'ar son uime sin a thugadh an lagh? thugadh e air son eusaontais, gus an tigeadh an sìol d'an d'rinneadh an gealladh; air òrduchadh le ainglibh an làimh eadar-mheadhonair.

20 A nis an t-eadar-mheadhonair, cha'n ann air son aoine a ta e 'na eadar-mheadhonair; ach is aon Dia.

21 Uime sin am bheil an lagh an aghaidh gheallanna Dhé? Nar leigeadh Dia: oir nam biodh lagh air a thabhairt a bhiodh comasach air beatha thoirt uaith, gu deimhin is ann o'n lagh a bhiodh fireantachd.

22 Ach dh'fhàg an sgrìobtuir na h-uile dhaoine dùinte sa' pheacadh, chum gu'm biodh an gealladh tre chreidimh Iosa Crìosd air a thoirt dhoibh-san a ta creidsinn.

23 Ach mu'n d'thàinig an creidimh, choimhleadh sinn fo 'n lagh, air ar druidealh a steach chum a' chreidimh, a bha gu bhi air fhoillseachadh.

24 Uime sin b'e an lagh, ar n-oid-fhòghluim g'ar treòrachadh gu Crìosd, chum gu bitheamaid air ar fireanachadh tre chreidimh.

25 Ach air teachd do'n chreidimh, cha'n 'eil sinn ni's mò fuidh oid-fhòghluim.

26 Oir is sibhse uile mic Dhé tre chreidimh ann an Iosa Crìosd.

27 Oir a mheud agaibh sa' bhaisteadh do Chrìosd, chuir sibh umaibh Crìosd.

28 Cha'n 'eil Iudhach no Greugach, cha'n 'eil saor no daor, cha'n 'eil firionn no boirionn ann: oir is aon sibh uile ann an Iosa Crìosd.

29 Agus ma's le Crìosd sibh, is sibh sìol Abraham gun amharus, agus is oighreachan sibh a réir a' gheallaidh.

CAIB. IV.

A NIS a ta mi ag ràdh, am feadh a bhios an t-oighre 'na leanabh, nach 'eil eadar-dhealachadh sam bith eadar e agus seirbhiseach, ged is e Tighearn nan uile;

2 Ach a ta e fo luchd-coimhid, agus fo luchd-riaghlaidh gu teachd na h-aimsir a dh'òrduich an t-athair.

3 Agus mar an ceudna sinne, 'nuair a bha sinn 'nar leanabaibh, bha sinn an daorsa fo cheud fhòghlum an t-saoghail:

4 Ach an uair a thàinig coimhlionadh na h-aimsir, chuir Dia a Mhac féin uaith a ghineadh o mhnai, a rinneadh fuidh 'n lagh,

5 Chum gu'n saoradh e iadsan a bha fuidh 'n lagh, ionnus gu faigheamaid-ne uchd-mhacachd na cloinne.

6 Agus do bhrìgh gur mic sibh, chuir Dia Spiorad a Mhic féin ann bhur cridheachaibh, ag éigheach, Abba, Athair.

7 Uime sin cha seirbhiseach thu ni's mò, ach mac; agus ma's mac, is oighre mar an ceudna air Dia tre Chrìosd.

8 Gidheadh, an uair nach b'àithne dhuibh Dia, rinn sibh seirbhis dhoibh-san nach 'eil 'nan dée thaobh nàduir.

9 Ach a nis air dhuibh Dia, àithneachadh, no mar is fèarr a dh'fheudar a ràdh, bhi air bhur n-àithneachadh le Dia, cionnus a ta sibh ag ath-philleadh chum nan ceud-thoiseach anmhuinn agus bochd, d'am miann leibh bhi a rìs fo dhaorsa?

10 Tha sibh a' coimhead

làithean, agus mhìosan, agus aimsirean, agus bhliadhnan.

11 Tha eagal orm do 'ur taobh gu'n do chaith mi gu dìomhain mo shaothair oirbh.

12 Guidheam oirbh, a bhràithre, bithibh mar a ta mise; oir a ta mise mar sibhse: cha d' rinn sibh eucoir sam bith orm.

13 Tha fhios agaibh gu'm *b'ann* tre anmhuinneachd na feòla, a shearmonaich mi dhuibh an soisgeul air tùs.

14 Agus air mo bhuaireadh a bha ann am fheoil, cha d' rinn sibh tarcuais, agus cha do ghabh sibh gràin dìom; ach ghabh sibh rium mar aingeal Dé, mar Iosa Crìosd.

15 Ciod e ma seadh an sonas sin a bha agaibh? oir a ta mi dèanamh fianuis duibh, nam bu chomasach e, gu'n spìonadh sibh a mach bhur sùilean féin, agus gu'n tugadh sibh dhomh-sa iad.

16 Uime sin an d' rinneadh nàmhaid duibh dhiom, air son mi dh'innseadh na fìrinn duibh?

17 Tha iadsan eudmhor umaibh, *ach* cha'n ann gu maith; ach b'àill leo sinne dhruideadh a mach, chum gu'm biodh sibhse eudmhor umpa féin.

18 Ach *is* maith a bhi eudmhor ann an *ni* maith a ghnàth, agus cha'n e mhàin an uair a ta mise a làthair maille ribh.

19 Mo chlann bheag, air am bheil mi a rìs ri saothair, gus an dealbhar Crìosd annaibh,

20 B'àill leam bhi nis a làthair maille ribh, agus mo ghuth a chaochladh, oir a ta mi fuidh amharus umaibh.

21 Innsibh dhomh, sibhse, le'm miann bhi fo'n lagh, nach cluinn sibh an lagh?

22 Oir a ta e sgrìobhta, gu robh aig Abraham dithis mhac;

aon ri banoglaich, agus am *mac* eile ri mnaoi shaoir.

23 Agus e-san a *bh' aige* ris a' bhanoglaich, ghineadh a réir na feòla e; ach e-san a *bh' aige* ris a' mhnai shaoir, tre ghealladh.

24 Na nithe so is samhladh iad; oir is iad so an dà choimh-cheangal; aon diubh o bheinn Shinai, a ta a' breith chum daorsa, a's i Agar.

25 Oir is i Agar beinn Shinai ann an Arabia, agus tha i a' comh-fhreagradh do Ierusalem a tha nis ann, agus tha i fo dhaorsa maille r'a cloinn.

26 Ach a ta an Ierusalem a ta shuas saor, agus is màthair dhuinn uile i.

27 Oir a ta e sgrìobhta, Dèan gàirdeachas, a bhean neo-thorrach nach 'eil a' breith *cloinne*; bris a mach agus glaoth, thusa nach 'eil ri saothair: oir is lìonmhoire clann na mnà aonar-anaich, na na mnà aig am bheil fear.

28 A nis, a bhràithre, is sinne, mar a bha Isaac, clann a' gheallaidh.

29 Ach mar a rinn e-san a rugadh a réir na feòla, san àm sin geur-leanmhuinn air-san a *rugadh* a réir an Spioraid, is amhuil sin a ta nis mar an ceudna.

30 Ach ciod a ta an sgrìobtuir ag ràdh? Tilg a mach a' bhanoglach agus a mac: oir cha bhi mac na banoglaich 'na oighre maille ri mac na mnà saoire.

31 Uime sin, a bhràithre, cha sinne clann na banoglaich, ach na mnà saoire.

CAIB. V.

UIME sin seasaibh gu daingean anns an t-saorsa leis an d' rinn Crìosd saor sinn, agus na bithibh a rìs air bhur cuibhreachadh le cuing na daorsa.

2 Feuch, a ta mise Pòl ag ràdh ribh, ma thimchioll-ghearrar sibh, nach bì tairbhe air bith dhuibh ann an Crìosd.

3 Oir a ta mi ris a' dèanamh fianuis do gach uile dhuine a thimchioll-ghearrar, gu bheil e mar fhiachaibh air an lagh gu h-ìomlan a choimhlionadh.

4 Cha'n 'eil tairbhe sam bith ann an Crìosd dhuibhse a ta air bhur fireanachadh tre'n lagh; thuit sibh o ghràs.

5 Oir a ta sinne tre'n Spiorad a' feitheamh ri dòchas fireantachd o chreidimh.

6 Oir ann an Iosa Crìosd, cha'n 'eil éifeachd sam bith ann an timchioll-ghearradh, no ann an neò-thimchioll-ghearradh, ach ann an creidimh a dh'oibricheas tre ghràdh.

7 Is maith a ruith sibh; cò a bhac sibh o bhi ùmhal do'n fhìrinn?

8 Cha d' *thàinig* an impidh so o'n tì a ghairm sibh.

9 Goirtichidh beagan do thaois ghoirt am meall uile.

10 Tha muinghin agam asaibh san Tighearn, nach bì sibh dh'aon dòigh air atharrachadh inntinn: ach an tì a ta cur dragha oirbh, giùlainidh e a bhreitheanas, cò air bith e.

11 Agus mise, a bhràithre, ma shearmonaicheas mi fathast an timchioll-ghearradh, c'ar son a nithear fathast geur-leanmhuinn orm? an sin bhiodh oibheum a' chroinn-chéusaidh air a chur air cùl.

12 B'fheàrr leam gu'm biodh iadsan a ta cur mì-shuaimhneis oirbh eadhon air an gearradh uaibh.

13 Oir, a bhràithre, ghairmeadh chum saorsa sibh; a mhàin na *dèanaibh* an t-saorsa 'na cion-fàth do'n fheoil, ach le gràdh *dèanaibh* seirbhis d'a chéile.

14 Oir tha an lagh uile air a choimhlionadh ann an aon fhocal, *eadhon* an so, Gràdhaichidh tu do choimhearsnach mar thu féin.

15 Ach ma bhios sibh a' teumadh agus ag itheadh a chéile, thugaibh aire nach claidhear le a chéile sibh.

16 A ta mi ag ràdh ma seadh, Gluaisibh san spiorad, agus cha choimhlion sibh anamian na feòla.

17 Oir a ta an fheoil a' miannachadh an aghaidh an Spioraid, agus an Spiorad an aghaidh na feòla: agus a ta iad sin an aghaidh a chéile; ionnus nach faigh sibh na nithe bu mhiann leibh a dhèanamh.

18 Ach ma threòraichear leis an Spiorad sibh, cha'n 'eil sibh fuidh 'n lagh.

19 A nis tha oibre na feòla follaiseach, a's iad *so*, Adhaltrannas, strìopachas, neòghloine, macnus,

20 Iodhol-aoradh, druidh-eachd, naimhdeas, connsachadh, co-fharpuis, fearg, comhstri, aimhreite, saobh-chreidimh,

21 Farmad, mortadh, misg, ruidhteireachd, agus an leithide sin: mu bheil mi ag innseadh dhuibh roimh-laimh, mar a dh'innis mi dhuibh a cheana mar an ceudna, nach sealbhaich iadsan a nì an leithide sin rìoghachd Dhé.

22 Ach is e toradh an Spioraid gràdh, aoibhneas, sìth, fad-fhulangas, caomhalachd, maitheas, creidimh,

23 Macantas, stuaim: an aghaidh an samhail sin cha'n 'eil lagh.

24 Agus iadsan a's le Crìosd, chéus iad an fheoil, maille r'a h-an-tograibh agus a h-ana-miannaibh.

25 Ma's beò dhuinn san Spiorad, gluaiseamaid san Spiorad mar an ceudna.

26 Na bitheamaid déidheil air glòir dhìomhain, a' brosnachadh a chéile, a' gabhail farmaid r'a chéile.

CAIB. VI.

A BHRAITHRE, ma ghlacair neach ann an coire air bith gu h-obann, sibhse a ta spioradail, togaibh suas a shamhuil sin do dhuine ann an spiorad na macantachd; a' toirt aire dhuith féin, nach buairear thu mar an ceudna.

2 Giùlainibh uallacha a chéile, agus mar sin coimhlionaibh lagh Chrìosd.

3 Oir ma shaoileas duine gur ni éigin e féin, gun bhi ann ach neò-ni, tha e 'ga mhealladh féin.

4 Ach dearbhadh gach neach 'obair féin, agus an sin bithidh aobhar gàirdeachais aige d'a thaobh féin a mhain, agus cha'n ann a thaobh neach eile.

5 Oir giùlainidh gach neach 'uallach féin.

6 Comh-roinneadh an neach a ta air a theagasg san fhocal, ris an neach a ta 'ga theagasg, anns na h-uile nithibh maithe.

7 Na meallar sibh; cha dèanar fanoid air Dia: oir ge b'e ni a shìol-chuireas duine, an ni ceudna buainidh e.

8 Oir an tì a chuireas d'a fheoil féin, buainidh e o'n fheoil truaidheachd; ach an tì a chuireas do'n Spiorad, buainidh e o'n Spiorad a' bheatha shuthainn.

9 Agus na sgèitheamaid do mhaith a dhèanamh: oir ann an àm iomchuidh buainidh sinn, mur fannaich sinn.

10 Uime sin, a réir mar a ta cothrom againn, dèanamaid maith do na h-uile dhaoinibh, ach gu h-àraidh dhoibh-san a ta do theaghlaich a' chreidimb.

11 Tha sibh a' faicinn meud na litreach a sgrìobh mi dhuibh le mo làimh féin.

12 A mheud le'm miann iad féin a thaisbeanadh gu sgiamhach san fheoil, tha iad 'gur n-éig-neachadh chum bhi air bhur timchioll-ghearradh; a mhàin chum nach dèantadh geur-lean-mhuinn orra air son crann-céusaidh Chrìosd.

13 Oir cha'n 'eil iadsan féin a tha air an timchioll-ghearradh a' coimhead an lagh: ach is àill leo sibhse bhi air bhur timchioll-ghearradh, chum as gu dèan iad uail ann bhur feoil.

14 Ach nar leigeadh Dia gu dèanainn-sa uail ach ann an crann-céusaidh ar Tighearna Iosa Crìosd, tre'm bheil an saoghal air a chéusadh dhomhsa, agus mise do'n t-saoghal.

15 Oir ann an Iosa Crìosd cha'n 'eil éifeachd air bith ann an timchioll-ghearradh, no ann an neò-thimchioll-ghearradh, ach ann an cruthachadh nuadh.

16 Agus a mheud 's a shiubhlas a réir na riaghailt so, sìth orra, agus tròcair, agus air Israel Dé.

17 O so a mach na cuireadh neach sam bith dragh orm; oir a ta mi giùlan chomharan an Tighearna Iosa ann mo chorp.

18 A bhràithre, *gu robh gràs* ar Tighearna Iosa Crìosd maille ri bhur spiorad. Amen.

• LITIR AN ABSTOIL PHOIL CHUM NAN EPHESIANACH.

CAIB. I.

P**O**L, abstol Iosa Crìosd tre thoil Dé, chum nan naomh a ta ann an Ephesus, agus nan creideach ann an Iosa Crìosd :

2 Gràs dhuibh, agus sìth o Dhia ar n-Athair, agus o'n Tigh-earn Iosa Crìosd.

3 Beannaichte *gu robh* Dia, eadhon Athair ar Tighearna Iosa Crìosd, a bheannaich sinne leis gach uile bheannachadh spioradail ann an *ionadaibh* nèamhaidh ann an Crìosd :

4 A réir mar a thagh e sinne ann-san, mun do leagadh bunait an domhain, chum gu'm bitheamaid naomha, agus neo-choireach 'na làthair-san ann an gràdh :

5 A roimh-òrduich sinne chum uchd-mhacachd na cloinne tre Iosa Crìosd dha féin, a réir deadh-ghean a thoile.

6 Chum cliù glòire a ghràis, tre an d'rinn e sinne taitneach ann a *Mhac* gràdhach :

7 Anns am bheil againne saorsa tre 'fhuil-san, maitheanas nam peacadh, a réir saoihbheis a ghràis ;

8 Anns an robh e ro phailte dhuinne san uile ghliocas, agus thuigse :

9 A dh'fhoillsich dhuinn rùndiomhair a thoile, a réir adheadh-ghean féin, a rùnaich e ann féin :

10 Chum ann am frithealadh coimhlionaidh nan aimsir, gu'n cruinnicheadh e ann an aon na h-uile nithe ann an Crìosd, araon *na nithe* a ta air nèamh, agus *na nithe* a ta air talamh, *eadhon* ann-san :

11 Anns an d'fhuair sinne mar an ceudna oighreachd, air dhuinn

bhi air ar roimh-òrduchadh a réir rùn an Tì a ta 'g oibreachadh nan uile nithe a réir comhairle a thoile féin ;

12 Ionnus gu'm bitheamaid-ne, a chuir air tùs dòchas ann an Crìosd, chum cliù a ghlòire-san.

13 Anns an do chuir sibhse mar an ceudna *dòchas*, air dhuibh focal na fìrinn a chluinntinn, *eadhon* soisgeul bhur slàinte : neach an déigh dhuibh creidsinn ann, chuireadh seula oirbh le Spiorad naomh sin a' gheallaidh,

14 Neach is e geall-daingnich ar n-oighreachd-ne, *gu teachd* saorsa na seilbhe a cheannachadh, chum cliù a ghlòire.

15 Uime sin air cluinntinn domh-sa mar an ceudna bhur creidimh-sa anns an Tighearn Iosa, agus bhur gràidh do na naoimh uile,

16 Cha'n 'eil mi a' sgur do bhi toirt buidheachais air bhur son, a' luadh oirbh ann am ùrnuighibh ;

17 Gu'n tugadh Dia ar Tighearna Iosa Crìosd, Athair na glòire, spiorad gliocais agus foillseachaidh dhuibh, ann an eòlas air-san ;

18 Sùilean 'ur n-inntinn bhi air an soillseachadh, chum fios a bhi agaibh ciod e dòchas a ghairme-san, agus ciod e saoihbheas glòire 'oighreachd-san anns na naomhaibh,

19 Agus ciod e ro-mheud a chumhachd do ar taobh-ne a ta creidsinn, a réir oibreachaidh a threun neirt ;

20 A dh'oibrich e ann an

Crìosd, 'nuair a thog e o na marbhaibh e, agus a chuir e 'na shuidhe air a dheas-làimh féin e anns na *h-ionadaibh* nèamh-aidh,

21 Gu ro àrd os ceann gach uile uachdarachd, agus cumhachd, agus neirt, agus tigh-earnais, agus gach ainme a dh'ainmichear, cha'n e mhàin san t-saoghal so, ach san *t-saoghal* ri teachd mar 'an ceudna:

22 Agus chuir e na h-uile nithe fuidh a chosaibh, agus thug se e gu *bhi* 'na cheann os ceann nan uile nithe do'n eaglais,

23 A ta 'na corp aige, lànachd an Tì a ta lìonadh nan uile *nithe* anns na h-uile.

CAIB. II.

A GUS sibhse *bheothaich* e, a bha marbh ann an eu-ceartaibh agus ann am peacaibh;

2 Anns an do ghluais sibh sna h-amanaibh a chaidh seachad, a réir gnàtha an t-saoghail so, a réir uachdarain cumhachd an athair, an spioraid a tha nis ag oibreachadh ann an cloinn na h-eas-umhlachd:

3 Am measg an robh againn uile mar an ceudna ar caithe-beatha roimh so, ann an anamianaibh ar feòla, a' dèanamh toil na feòla, agus nan smuainte; agus bha sinn a thaobh nàduir 'nar cloinn na feirge, eadhon mar chàch.

4 Ach Dia a ta saoi-bhir, ann an tròcair, air son a mhòr-ghràidh leis an do ghràdhaich e sinn,

5 Eadhon air dhuinn a bhi marbh ann am peacaibh, chomh-bheothaich e sinn maille ri Crìosd; (le gràs tha sibh air bhur tèarnadh;)

6 Agus chomh-thog, agus

chomh-shuidhich e sinn ann an *ionadaibh* nèamhaidh ann an Iosa Crìosd:

7 Chum gu'm foillsicheadh e anns na linnibh ri teachd saoi-bheas ro phailt a ghràis, ann an caoimhneas d'ar taobh-ne tre Iosa Crìosd.

8 Oir is ann le gràs a ta sibh air bhur tèarnadh, tre chreidimh; agus *sin* cha'n ann uaibh féin: *is e* tiodhlac Dhé e:

9 Cha'n ann o oibribh, chum nach dèanadh neach air bith uaill:

10 Oir is sinne 'obair-san, air ar cruthachadh ann an Iosa Crìosd chum dheadh oibre, air son an d'ulluich Dia roimh-làimh *sinn*, chum gu'n gluaiseamaid annta.

11 Uime sin cuimhnichibh, air dhuibh a bhi san aimsir a chaidh thairis 'nur Cinnich san fheoil, ris an abrar an neo-thimchioll-ghearradh leo-san d'an goirear an timchioll-ghearradh làmh-dhèanta san fheoil;

12 Gu robh sibh san àm sin as eugmhais Chrìosd, 'nur coimhich do chomh-fhlaitheachd Is-raeil, agus 'nur coigrich do choimhcheanglaibh a' gheallaidh, as eugmhais dòchais, agus gun Dia anns an t-saoghal:

13 Ach a nis ann an Iosa Crìosd, tha sibhse a bha roimh so fad o làimh, air bhur toirt am fagus tre fhuil Chrìosd.

14 Oir is e-san ar sìth-ne, a rinn aon *dhinn* araon, agus a bhris sìos balla meadhonach an eadar-dhealachaidh;

15 Air dha an naimhdeas a chur air cùl tre 'fheoil féin, *eadhon* lagh nan àitheanta, a *chuireadh* sìos ann an òrduighibh, chum gu'n dèanadh e ann féin do dhithis aon duine nuadh, *mar-sin* a' dèanamh sìthe:

16 Agus gu'n dèanadh e réidh

faraon iad ri Dia ann an aon chorp tre a chrann-chéusaigh, air dha an naimhdeas a mharbhadh le sin :

17 Agus thàinig e agus shearmonaich e sìth dhuibhse a bha am fad, agus dhoibh-san a bha am fagus.

18 Oir trid-san tha araon slighe againn gu dol a steach tre aon Spiorad chum an Athar.

19 A nis uime sin cha 'n 'eil sibh ni's mò 'nur coigrich agus 'nur coimhich, ach 'nur luchd aoin bhaile ris na naomhaibh, agus 'nur muinntir-teaghlaich Dhé ;

20 Agus tha sibh air bhur togail suas air bunait nan abstol agus nam fàidhean, air bhi do Iosa Crìosd féin 'na chloich-chinn na h-oisinn ;

21 Anns am bheil an aitreabh uile, ceangailte gu ceart r'a chéile, a' fàs suas chum bhi 'na teampull naomh san Tighearn :

22 Anns am bheil sibhse mar an ceudna air bhur comh-thogail suas chum bhi 'nur tigh-còmh-nuidh do Dhia tre an Spiorad.

CAIB. III.

AIR an aobhar so, tha mise Pòl a'm' phrìosanach Iosa Crìosd, air bhur sonsa, a Chinn-eacha ;

2 O chuala sibh mu fhrith-ealadh gràis Dé, a thugadh dhomh-sa air bhur sonsa :

3 Gu'n d'rinn e aithnichte dhomh tre fhoillseachadh an rùn-diomhair, (mar a sgrìobh mi roimh gu h-aithghearr,

4 Leis am feud sibh, air dhuibh a leughadh, m'eòlas ann an rùn-diomhair Chrìosd a thuig-sinn ;)

5 Ni, ann an linnibh eile, air nach d'thugadh fios do chloinn nan daoine mar a ta e nis air fhoillseachadh d'a abstolaibh

naomha agus d'a fhàidhibh tre an Spiorad ;

6 Gu'm biodh na Cinnich 'nan comh-oighreachaibh, agus 'nan comh-chorp, agus 'nan luchd-comhpàirt d'a ghealladh-san ann an Crìosd, tre an t-soisgeul :

7 Air an d'rinneadh mise a'm' mhinisteir, a réir tiodhlaic gràis Dé a thugadh dhomh, a réir oibreachaidh éifeachdaich a chumhachd-san.

8 Dhomh-sa, a's lugha na'n tì a's lugha do na naomhaibh uile, thugadh an gràs so, saoibhreas Chrìosd, nach feudar a rann-sachadh, a shearmonachadh am measg nan Cinneach ;

9 Agus gu'n dèanainn soilleir do na h-uile *dhaoibh*, ciod e comunn an rùn-diomhair sin, a bha folaichte ann an Dia o thoiseach an t-saoghail, a chruthaich na h-uile nithe tre Iosa Crìosd ;

10 Chum gu'n dèantadh aithnichte nis do na h-uachdaranachdaibh, agus do na cumhachdaibh ann an *ionadaibh* nèamhaidh, leis an eaglais, gliocas eagsamhuil Dhé,

11 A réir an rùn shìorruidh a rùnaich e ann an Iosa Crìosd ar Tighearn :

12 Anns am bheil againn dànachd agus slighe gu dol a steach ann am muinghin tre a chreidimh-san.

13 Uime sin tha mi ag iarraidh nach lagaich sibh á leth mo thrioblaidean-sa air bhur son, ni a's e bhur glòir-sa.

14 Air an aobhar so tha mi a' lùbadh mo ghlùine do Athair ar Tighearna Iosa Crìosd,

15 Air an ainmichear an teaghlach uile air nèamh agus air talamh,

16 Gu'n deònaicheadh e dhuibh a réir saoibhreis a ghlòire, bhi air bhur neartachadh gu treun,

tre a Spiorad-san anns an duine an leth stigh ;

17 Ionnnus gu'n gabh Crìosd còmhnuidh ann bhur cridhe tre chreidimh ; chum air dhuibh bhi air bhur freumhachadh, agus air bhur stéidheachadh ann an gràdh,

18 Gu'm bì sibh comasach maille ris na naomhaibh uile, air a thuigsinn ciod e leud, agus fad, agus doimhne, agus àirde ;

19 Agus air gràdh Chrìosd aithneachadh, a chaidh thar gach uile eòlas, chum gu'm bì sibh air bhur lìonadh le uile lànachd Dhé.

20 A nis dhasan d'an comas na h-uile nithe a dhèanamh gu h-anabarrach ro phailt, thar gach ni a's urrainn siune iarraidh no smuaineachadh, a réir a' chumhachd a ta 'g oibreachadh gu h-éifeachdach annainn,

21 Dhasan *gu robh* glòir anns an eaglais tre Iosa Crìosd, air feadh gach uile linn, gu saoghal nan saoghal. Amen.

CAIB. IV.

UIME sin, tha mise prìosanach an Tighearn, a' guidhe oirbh gu'n gluais sibh gu cubhaidh do'n ghairm leis an do ghairmeadh sibh ;

2 Leis gach uile irioslachd inntinn agus mhacantas, le fad-fhulangas, a' giùlan le chèile ann an gràdh ;

3 A' dèanamh dìchill air aonachd an Spioraid a choimhead ann an ceangal na sìthe.

4 *Is* aon chorp agus aon Spiorad a ta ann, amhuil mar an ceudna a ghairmeadh sibh ann an aon mhuinghin bhur gairme ;

5 Aon Tighearn, aon chreidimh, aon bhaisteadh,

6 Aon Dia agus Athair nan uile, a tha os ceann nan uile,

agus tre na h-uile, agus annaibh-sa uile.

7 Ach thugadh gràs do gach aon againn, a réir tomhais tiodhlaic Chrìosd.

8 Uime sin a ta e ag ràdh, Air dol suas da an àird, thug e bruid am braighdeanas, agus thug e tiodhlacan do dhaoineibh.

9 (A nis gu'n deachaidh e suas, ciod e ach gu'n deachaidh e air tùs sìos gu ionadaibh ìochdarach na talmhainn ?

10 An Ti a chaidh sìos, is e sin féin e chaidh suas mar an ceudna gu ro àrd os ceann nan uile nèamh, chum gu'n lìonadh e na h-uile nithe.)

11 Agus thug e dream àraidh gu bhi 'nan abstolaibh ; dream eile, gu bhi 'nam fàidhibh ; agus dream eile, gu bhi 'nan soisgeul-richibh ; agus dream eile, gu bhi 'nan aodhairibh, agus 'nan luchd-teagaisg ;

12 Chum na naoimh a dheasachadh chum oibre na minis- treileachd, chum togail suas cuirp Chrìosd :

13 Gus an tig sinn uile ann an aonachd a' chreidimh, agus eòlais Mhic Dhé, chum duine iomlain, chum tomhais àirde lànachd Chrìosd :

14 Chum as nach bì sinn á so suas 'nar leanabaibh, air ar tonn-luasgadh, agus air ar giùlan mu'n cuairt leis gach uile ghaoith teagaisg, le cleasachd dhaoine, agus seòltachd cealgach, leis am bheil iad gu h-innleachdach ri feall-fhòlach chum meallaidh :

15 Ach a' labhairt na firinn ann an gràdh, gu'm fàs sinn suas anns na h-uile nithibh chuige-san, a's e an ceann, *eadhon* Crìosd :

16 O'm bheil an corp uile, air a cheangal gu ceart, agus air a dhlùthachadh tre an nì sin a tha gach alt a' toirt uaith, a

réir oibreachaidh éifeachdaich ann an tomhas gach buill, a' faghail fàs cuirp, chum a thogail féin suas ann an gràdh.

17 So uime sin a ta mi ag ràdh, agus ag guidhe am fianuis an Tighearna, gun sibh a dh'im-eachd á so suas mar a ta na Cinnich eile ag imeachd, ann an dìomhanas an inntinn féin;

18 Aig am bheil an tuigse air a dorchachadh, air dhoibh bhi 'nan coimhich do bheatha Dhé, thaobh an aineolais a ta annta, tre chruas an cridhe:

19 Muinntir, air dhoibh am mothachadh a chall, a thug iad féin thairis do mhi-nàire, chum gach uile neòghloine chur an gnìomh le ciocras.

20 Ach cha d'fhòghluim sibhse Crìosd mar so;

21 O chuala sibh e, agus o theagaisgeadh leis sibh, mar a ta an fhìrinn ann an Iosa:

22 Gu'n cuir sibh dhìbh, thaobh a' cheud chaithe-beatha, an seann duine, a ta truailidh a réir nan ana-miann cealgach;

23 Agus gu'm bì sibh air bhur n-ath-nuadhachadh ann an spiorad bhur n-inntinn;

24 Agus gu'n cuir sibh um-aibh an nuadh-dhuine, a tha air a chruthachadh a réir Dhé am fìreantachd agus am fìor-naomhachd.

25 Uime sin air dhuibh a' bhreug a chur uaibh, labhraibh an fhìrinn gach neach r'a choimhearsnach: oir is buill sinn d'a chéile.

26 Biodh fearg oirbh, agus na peacaichibh: na luidheadh a' ghrian air bhur corruich:

27 Agus na tugaibh àit do'n diabhul.

28 An tì a ghoid, na goideadh e ni's mò: ach gu ma feàrr leis saothair a dhèanamh, ag oibreachadh an ni a ta maith le a

làmhaidh, chum gu'm bì aige ni r'a phàirteachadh ris an neach air am bheil uireasbhuidh.

29 Na tigeadh cainnt thruailidh air bith a mach as bhur beul, ach an ni sin a ta maith chum deadh-fhòghluim, ionnus gu'n toir e gràs do'n luchd-éisd-eachd.

30 Agus na cuiribh doilgh-eas air Spiorad naomh Dhé, leis an do chuireadh seula oirbh gu là na saorsa.

31 Biodh gach uile sheirbhe, agus corruich, agus fearg, agus gàrrthaich, agus toibheum air an togail uaibh, maille ris gach uile mhi-run.

32 Agus bithibh caoimhneil teo-chridheach d'a chéile; a' toirt maitheanas d'a chéile, eadhon mar a thug Dia maitheanas dhuibhse ann an Crìosd.

CAIB. V.

UIME sin bithibh-sa 'nur luchd-leanmhuinn air Dia, mar chloinn ghràdhaich;

2 Agus gluaisibh ann an gràdh, eadhon mar a ghràdhaich Crìosd sinne, agus a thug se e féin air ar son, 'na thabhartas agus 'na iobairt deadh-fhàile do Dhia.

3 Ach na biodh strìopachas, agus gach uile neòghloine, no sannt, uiread as air an ainmeachadh 'nur measg, mar is cubhaidh do naomhaibh:

4 No draosdachd, no còmh-radh amaideach, no bao-shùg-radh, nithe nach 'eil iomchuidh: ach gu mar feàrr *leibh* breith-buidheachais.

5 Oir a ta fios agaibh air so, nach 'eil aig fear-strìopachais air bith, no aig neach neò-ghlan, no aig duine sanntach, (a tha 'na fhear iodhol-aoraidh,) oighreachd ann an rìoghachd Chrìosd agus Dhé.

6 Na mealladh neach air bith

sibh le briathraibh dìomhain: oir air son nan nithe sin tha fearg Dhé a' teachd air cloinn na h-eas-ùmhachd.

7 Na bithibh-sa uime sin 'nur luchd-comhpàirt riu.

8 Oir bha sibh uair-éigin 'nur dorchadas, ach a nis tha sibh 'nur solus san Tighearn: gluaisibh mar chloinn an t-soluis;

9 (Oir a ta toradh an Spioraid anns an uile mhaitheas, agus ionracas, agus fhìrinn;)

10 A' dearbhadh ciod an ni a tha taitneach do'n Tighearn.

11 Agus na biodh comh-chomunn agaibh ri oibribh neo-tharbhach an dorchadais, ach gu ma feàrr leibh an cronachadh.

12 Oir is gràineil eadhon r' an inuseadh na nithe a ta air an dèanamh leo an uaignidheas.

13 Ach a ta na h-uile nithe a tha air an cronachadh, air an dèanamh follaiseach leis an t-solus: oir gach uile ni a nì soilleir, is solus e.

14 Uime sin a ta e ag ràdh, Mosgail, thusa a tha a'd' chodal, agus éirich o na marbhaibh, agus bheir Crìosd solus duit.

15 Feuchaibh uime sin gu'n gluais sibh gu faicilleach, cha'n ann mar amadain, ach mar dhaoine glìce,

16 Ag ath-cheannach na h-aimsir, do bhrìgh gu bheil na làithean olc.

17 Air an aobhar sin na bithibh-sa neo-ghlic, ach a' tuigsinn ciod i toil an Tighearn.

18 Agus na bithibh air mhisg le fìon, anns am bheil anabarr; ach bithibh air bhur lìonadh do'n Spiorad:

19 A' labhairt ribh féin ann an salmaibh, ann an laoidhibh, agus ann an dànaibh spioradail, a' seinn agus a' dèanamh ciuil 'nur cridhe do'n Tighearn:

20 A' toirt buidheachais a

ghnàth air son nan uile nithe do Dhia, eadhon an t-Athair, ann an ainm ar Tighearna Iosa Crìosd;

21 Air dhuibh bhì ùmhal d'a chéile ann an eagail Dé.

22 A mhnàì, bithibh ùmhal do 'ur fearaibh féin, mar do'n Tigh-earn.

23 Oir is e am fear ceann na mnà, eadhon mar is e Crìosd ceann na h-eaglais: agus is e-san Slànuighear a chuirp.

24 Uime sin mar a ta'n eaglais ùmhal do Chrìosd, mar sin biodh na mnàì d'am fearaibh féin mar an ceudna anns gach nì:

25 Fheara, gràdhaichibh bhur mnàì féin, eadhon mar a ghràdhaich Crìosd an eaglais, agus a thug se e féin air a son;

26 Chum gu naomhaicheadh, agus gu'n glanadh e i le ionnlad an uisge tre an fhocal.

27 Chum gu'n cuireadh e 'na làthair féin i na h-eaglais ghlòrmhoir, gun smal, gun phreasadh, no ni air bith d'an leithidibh sin; ach chum gu'm biodh i naomh, agus neo-lochdach.

28 Is amhluidh sin is còir do na fearaibh am mnàì féin a ghràdhachadh, mar an cuirp féin: an tì a ghràdhaicheas a bhean, tha e 'ga ghràdhachadh féin.

29 Oir cha d'thug duine air bith riamh fuath d'a fheoil féin; ach altrumaidh agus eiridnidh e i, eadhon mar a ta an Tigh-earn a' dèanamh do'n eaglais:

30 Oir is buill sinn d'a chorp, d'a fheoil, agus d'a chnàmhaibh-san.

31 Air an aobhar so fàgaidh duine 'athair agus a mhàthair, agus dlùth-leanaidh e r'a mhnaoi, agus bithidh an dithis 'nan aon fheoil.

32 Is dìomhaireachd mhòr so:

ach tha mi a' labhairt mu Chrìosd agus an eaglais.

33 Gidheadh, thugadh gach aon agaibh-sa fa leth gràdh d'a mhnai amhuil mar dha féin; agus feuchadh a' bhean gu'n toir i urram d'a fear.

CAIB. VI.

A CHLANN, bithibh ùmhal do 'ur pàrantaibh féin san Tighearn: oir a ta so ceart.

2 Thoir urram do t' athair agus do d' mhàthair, (is i so a' cheud àithne le gealladh,)

3 Chum gu'n éirich gu maith dhuit, agus gu'm bì thu fad-shaoghalach air an talamh.

4 Agus aithriche, na brosnuichibh bhur clann chum feirge: ach togaibh iad ann an oilean agus ann an teagasg an Tighearna.

5 A sheirbhiseacha, bithibh ùmhal do 'ur maighstiribh a réir na feòla, le h-eagal agus crith, ann an tréibhdbireas bhur cridhe, mar do Chrìosd:

6 Cha'n ann le sùil sheirbhis, mar dhream a ni toil dhaoine, ach mar sheirbhisich Chrìosd, a' dèanamh toil Dé o'n chridhe;

7 Le deadh thoil a' dèanamh seirbhis, mar do'n Tighearn, agus cha'n ann do dhaoineibh:

8 Air dhuibh fios a bhi agaibh, ge b'e maith air bith a ni aon neach, gu'm faigh e an ni so féin o'n Tighearn, ma's saor no daor e.

9 Agus a mhaighstirean, dèanaibh-sa na nithe ceudna dhoibh-san, a' leigeadh dhibh bagraidh: air dhuibh fios a bhi agaibh gu bheil bhur maighstir féin air nèamh mar an ceudna, agus nach 'eil gnùis-bhreth maille ris.

10 Fa dheoidh, mo bhràithre, bithibh làidir san Tighearn, agus ann an neart a chumhachd-san.

11 Cuiribh umaibh uile armachd Dhé, chum gu'm bì sibh comasach air seasamh an aghaidh cuilbheirtean an diabhuil.

12 Oir cha'n 'eil sinn a' gleachdadh a mhàin ri fuil agus feoil, ach ri uachdaranachdaibh, ri cumhachdaibh, ri riaghlairibh dorchadais an t-saoghail so, ri aingidheachd spioradail ann an ionadaibh àrda.

13 Uime sin glacaibh do 'ur n-ionnsuidh uile armachd Dhé, chum gu'm bì sibh comasach air seasamh an aghaidh a' bhuairidh san droch là, agus air dhuibh na h-uile nithe a dhèanamh, chum seasamh.

14 Seasaidh uime sin, air bhi do 'ur leasraidh air an crioslachadh le firinn, agus uchd-éididh na fireantachd umaibh;

15 Agus ulluchadh soisgeil na sìthe mar bhrògan agaibh air bhur cosaibh;

16 Thar gach uile ni, a' glacadh do 'ur n-ionnsuidh sgéithe a' chreidimh, leis am bì sibh comasach air uile shaighde teinnteach an droch Spioraid a mhùchadh.

17 Agus glacaibh clogaid na slàinte, agus claidheamh an Spioraid, ni a's e focal Dhé:

18 A' dèanamh ùrnuigh a ghnàth leis gach uile ghnè ùrnuigh agus asluchaidh san Spiorad, agus a' dèanamh faire chum an ni so féin maille ris gach uile bhuanachadh, agus ghuidheadh air son nan naomh uile;

19 Agus air mo shonsa, chum gu toirear dhomh comas labhairt, le fosgladh mo bheoil ann an dànachd, chum gu foillsich mi rùn-dìomhair an t-soisgeil;

20 Air son am bheil mi a'm' theachdair ann an geimhlibh: chum gu labhair mi gu dàna uime, mar is còir dhomh labhairt.

21 Ach a chum gu'm bì fhios agaibh-sa mar an ceudna air na nithibh a bhuineas dhomh-sa, agus ciod a tha mi a' dèanamh, foillsichidh Tichieus, bràthair gràdhach agus ministear firinneach san Tighearn, na h-uile nithe dhuibh:

22 Neach a chuir mi do'ur n-ionnsuidh air son an aobhair so féin, chum gu'm biodh fios nan

nithe a bhuineas duinne agaibh, agus gu'n tugadh e còmh-fhurtachd do 'ur cridhe.

23 Sìth *gu robh* do na bràithribh, agus gràdh maille ri creidimh, o Dhia an t-Athair, agus an Tighearn Iosa Crìosd.

24 *Gu robh* gràs maille ri-usan uile a ta gràdhachadh ar Tighearna Iosa Crìosd ann an tréibhdhireas. Amen.

LITIR AN ABSTOIL PHOIL CHUM NAM PHILIPIANACH.

CAIB. I.

P**O**L agus Timoteus, seirbhisich Iosa Crìosd, chum nan naomh uile ann an Iosa Crìosd, a tha ann am Philipi, maille ris na h-easbuigibh agus ris na deaconaibh:

2 Gràs duibh agus sìth o Dhia ar n-Athair, agus o'n Tighearn Iosa Crìosd.

3 Tha mi toirt buidheachais do m' Dhia gach uair a chuimhnicheas mi oirbh,

4 A ghnàth ann am uile ùrn-ighibh air bhur sonsa uile, le gairdeachas a' dèanamh guidhe,

5 Air son bhur còmh-roinn do'n t-soisgeul, o'n cheud là gus a nis;

6 Air dhomh bhi dearbhta as an ni so féin, eadhon an Tì a thòisich deadh obair annaibh, gu'n coimhlion e i gu là Iosa Crìosd:

7 Eadhon mar is còir dhomh so a smuaineachadh umaibh uile, do bhrìgh gu bheil sibh agam ann mo chridhe, agus gu bheil sibh uile 'nur luchd còmh-roinn do m' ghràs-sa, araon ann mo

gheimhlibh, agus ann an seasamh air son, agus ann an daingneachadh an t-soisgeil.

8 Oir is e Dia m' fhianuis, cia mòr mo dhéidh oirbh uile, ann an innibh Iosa Crìosd.

9 Agus a ta mi a' guidhe so, gu'm biodh bhur gràdh-sa air a mheudachadh ni's mò agus ni's mò ann an eòlas, agus ann an uile thuigse:

10 Chum gu'n dearbh sibh na nithe a's feàrr; chum gu'm bì sibh tréibhdhireach, agus gun tuisleadh gu là Chrìosd;

11 Air bhur lìonadh le toraibh na fireantachd, a tha tre Iosa Crìosd chum glòire agus cliù Dhé.

12 Ach is àill leam, a bhràithre, fios a bhi agaibh, na nithe a thàrladh dhomh-sa, gur mò a dh' éirich leo an soisgeul a chur air aghaidh:

13 Ionnus gu bheil mo gheimhlean-sa ann an Crìosd iomraid-each anns an lùchairt uile, agus anns gach àit eile;

14 Agus gu bheil mòran do na bràithribh san Tighearn a' gabhail misnich o m' gheimhlibh, leis

an tuilleadh mòr-dhànachd a' labhairt an fhocail gun eagal.

15 Tha cuid gu dearbh a' searmonachadh Chrìosd tre fharmaid agus strì, agus cuid eile tre dheadh thoil.

16 Tha aon dream a' searmonachadh Chrìosd tre chonnspoid, cha'n ann gu tréibhdhreach, a' saòilsinn àmhghar a chur ri m' gheimhlibh-sa:

17 Ach an dream eile o ghràdh, air dhoibh fios, a bhi aca gu'n do chuireadh mise gu seasamh air son an t-soisgeil.

18 Ciod ma ta? gidheadh air gach aon chor, co aca is ann an cosas a mhàin, no da rìreadh, tha Crìosd air a shearmonachadh; agus air a shon so tha mise a' dèanamh gàirdeachais, seadh, agus nì mi gàirdeachas.

19 Oir a ta fhìs agam gu'n tig so chum slàinte dhomh-sa tre bhur n-ùrnuigh-sa, agus tre fhrithealadh Spioraid Iosa Crìosd,

20 A réir mo ro-dhùil, agus mo dhòchais, nach cuirear nàire orm ann an ni air bith, ach leis an uile dhànachd labhairt, mar a ghnàth, gu'm bì Crìosd a nis mar an ceudna air àrdachadh a'm' chorp-sa, ma's ann tre bheatha no tre bhàs.

21 Oir dhomh-sa bhi beò is e sin Crìosd, agus bàs fhaotainn is buannachd dhomh so.

22 Ach ma's beò dhomh san fheoil, 's e so toradh m'òibre: ach ciod d'an dèanainn roghainn, cha'n fhios domh.

23 Oir tha mi air mo theannachadh eadar dhà ni, air dhomh bhi togarrach air siubhal, agus bhi maille ri Crìosd; oir is e so a's ro fheàrr:

24 Gidheadh, 's e mi dh'fhantuinn san fheoil a's feumail dhuibhse.

25 Agus air domh bhi cinnt-

each dheth so, tha fhios agam gu'm fuirich mi agus gu'n còmhnuich mi maille ribh uile, chum bhur cur-sa air bhur n-aghaidh, agus chum gàirdeachais a' chreidimh:

26 Chum gu'm bì bhur gàirdeachas ni's pailte ann an Iosa Crìosd do m' thaobh-sa, air son mi bhi a rìs a làthair maille ribh.

27 A mhàin caithibh bhur beatha gu cubhaidh do shoisgeul Chrìosd: chum co aca a thig mi agus a chì mi sibh, no a bhios mi as làthair, gu'n cluinn mi mu 'ur timchioll, gu bheil sibh a' seasamh gu daingean ann an aon spiorad, le aon inntinn, a' gleacadh le chéile air son creidimh an t-soisgeil;

28 Gun gheilt ann an ni sam bith oirbh o bhur naimhdeibh: ni a ta dhoibh-san 'na chomhara cinnteach air sgrios, ach dhuibhse air slàinte, agus sin o Dhia.

29 Oir thiodlaicheadh dhuibhse air son Chrìosd, cha'n e mhàin creidsinn ann, ach mar an ceudna fulang air a shon;

30 Air dhuibh an còmhrag ceudna bhi agaibh a chunnaic sibh annam-sa, agus a tha sibh a nis a' cluinntinn a bhi annam.

CAIB. II.

UIME sin ma tha còmh-fhurtachd air bith ann an Crìosd, ma tha sòlas air bith gràidh, ma tha còmh-chomunn air bith an Spioraid, ma tha truas air bith agus tròcaire;

2 Coimhlionaibh mo ghàirdeachas, gu'm bì sibh a dh'aon inntinn, a dh'aon ghràdh, a dh'aon toil, a dh'aon bhreithneachadh.

3 Na dèanar aon ni tre chonnspoid, no tre ghlòir dhìomhain, ach ann an irioslachd inntinn measadh gach aon gur feàrr neach eile na e féin.

4 Na seallaibh gach aon air na nithibh sin a bhuineas da féin, ach gach aon air na nithibh a bhuineas do dhaoineibh eile mar an ceudna.

5 Uime sin biodh an inntinn cheudna annaibh-sa, a bha ann an Iosa Crìosd :

6 Neach air bhi dha ann an cruth Dhé, nach do mheas e 'na reubainn e féin bhi comh-ionann ri Dia :

7 Ach chuir se e féin ann an dimeas, a' gabhail air féin cruth seirbhisich, air a dhèanamh ann an coslas dhaoine :

8 Agus air dha bhi air fhagail ann an cruth mar dhuine, dh'irioslaich se e féin, agus bha e ùmhal gu bàs, eadhon bàs a' chroinn-chéusaidh.

9 Air an aobhar sin dh'ardaich Dia e gu ro àrd mar an ceudna, agus thug e dha ainm os ceann gach uile ainme :

10 Chum do ainm Iosa gu'n lùbadh gach glùn, do *nithibh a ta* air nèamh, agus do *nithibh a ta* air thalamh, agus do *nithibh a ta* fo 'n talamh ;

11 Agus gu'n aidicheadh gach teagadh gur e Iosa Crìosd an Tighearn, chum glòire Dhé an Athar.

12 Uime sin, a mhuinntir mo ghràidh, mar a bha sibh ùmhal a ghnàth, cha'n e a mhàin a'm làthair-sa, ach ni's ro mhò as mo làthair, làn-oibrichibh bhur slàinte féin le h-eagal agus ballchrith.

13 Oir is e Dia a dh'oibrich-eas annaibh, araon an toil agus an gnìomh a réir a dheadh-ghean féin.

14 Dèanaibh na h-uile nithe gun ghearan, agus gun deasboir-eachd :

15 Chum gu'm bì sibh neo-choireach, agus neo-chronail, 'nur cloinn do Dhia, neo-lochd-

ach, am meadhon ginealaich fhiair agus chrosda, measg am bheil sibhse a' dealrachadh mar lòchrain sholuis san t-saoghal ;

16 A' cumail a mach focail na beatha ; chum gu'n dèan mise uail ann an là Chrìosd, do bhrìgh nach do ruith mi gu dìomhain, agus nach do shaothraich mi gu dìomhain.

17 Seadh agus ma dh'ìobrar mi air ìobairt agus seirbhis fhollaiseach bhur creidimh-sa, tha aoibhneas orm, agus tha mi a' dèanamh gàirdeachais maille ribhse uile.

18 Air an dòigh cheudna biodh aoibhneas oirbhse, agus dèanaibh gàirdeachas maille rium-sa.

19 Ach a ta dòchas agam anns an Tighearn Iosa, Timoteus a chur gu goirid do 'ur n-ionnsuidh, chum 'gu'm bì mise mar an ceudna ann an deadh mhisnich, air dhomh fios fhaotainn ciod is cor dhuibhse.

20 Oir cha'n 'eil duine air bith agam comh-ionann inntinn *ris-san*, air am bì cùram nan nithe a bhuineas dhuibhse gu dùrachdach.

21 Oir tha na h-uile ag iarraidh nam nithe a bhuineas doibh féin, cha'n iad na nithe a bhuineas do Iosa Crìosd.

22 Ach is aithne dhuibh a dhearbhadh-san, mar mhac d'a athair, gu'n d'rinn e seirbhis maille riumsa anns an t-soisgeul.

23 Uime sin tha dùil agam e-san a chur do 'ur n-ionnsuidh air ball, co luath as a chì mi ciod is cor dhomh féin.

24 Ach tha earbsa agam anns an Tighearn, gu'n tig mi féin do 'ur n-ionnsuidh gu h-àithghearr mar an ceudna.

25 Gidheadh mheas mi gu'm b'fheumail Epaphroditus mo bhràthair, agus mo chomh-oibriche, agus mo chomh-shaigh-

dear, ach bhur teachdair-sa, agus an tì a fhritheil do m' uireasbhuidh, a chur do 'ur n-ionnsuidh.

26 Oir bha déidh mhòr aige oirbh uile, agus bha e làn tuirse, do bhrìgh gu'n cuala sibhse gu'n robh e tinn.

27 Agus gu deimhin bha e tinn fagus do'n bhàs: gidheadh rinn Dia tròcair air; agus cha b'ann air-san a mhàin ach ormsa mar an ceudna, chum nach biodh doilgheas air muin doilgheis orm.

28 Uime sin bu togarraiche a chuir mi do 'ur n-ionnsuidh e, chum air dhuibh fhaicinn a rìs, gu'm biodh aoibhneas oirbh, agus gu'm bu lughaid mo dhoilgheas-sa.

29 Air an aobhar sin gabhaibh ris san Tighearn leis an uile aoibhneas, agus biodh meas mòr agaibh air an leithidibh sin:

30 Do bhrìgh air son oibre Chrìosd gu robh e dlùth do'n bhàs, agus nach robh suim aige d'a bheatha féin, chum gu'n dèanadh e suas uireasbhuidh bhur seirbhis-sa do m' thaobh-sa.

CAIB. III.

OS bàrr, mo bhràithre, dèanaibh gairdeachas san Tighearn. Gu deimhin cha leasg leam-sa na nithe ceudna a sgrìobhadh do bhur n-ionnsuidh, ach dhuibhse tha so tèaruinnute.

2 Bithibh air bhur faicill o mhadraibh, bithibh air bhur faicill o dhroch luchd-oibre, coimhidibh sibh féin o'n chomhghèarradh.

3 Oir is sinne an timchioll-ghèarradh, a ta dèanamh aoraidh do Dhia san Spiorad, agus a' dèanamh gairdeachais ann an Iosa Crìosd, agus nach 'eil a' cur muinghin san fheoil:

4 Ged dh'fheudainn-sa mar an

ceudna muinghin bhi agam san fheoil. Ma shaoileas aon neach eile gu'm feud e muinghin a chur san fheoil, is mò *na sin a dh'fheudas* mise:

5 Air mo thimchioll-ghèarradh air an ochdamh là, do chinn-each Israeil, do thréibh Bheniamin, a'm' Eabhruidheach do na h-Eabhruidhich; a réir an lagha, a'm' Phairiseach;

6 A thaobh eud, a' dèanamh geur-leanmhuinn air an eaglais; a réir na fìreantachd a ta san lagh, nèò-choireach;

7 Ach na nithe a bha 'nam buannachd dhomh, mheas mi iad sin 'nan call air son Chrìosd.

8 Seadh gun amharus, agus tha mi a' meas nan uile nithe 'nan call, air son ro-òirdheirceis eòlais Iosa Crìosd mo Thigh-earna: air son an d'fhuing mi call nan uile nithe, agus tha mi a' meas gur aolach iad chum gu cosnainn Crìosd,

9 Agus gu faighear ann-san mi, gun m'fhìreantachd féin agam, a ta o'n lagh, ach *an fhìreantachd* sin a ta tre chreidimh Chrìosd, an fhìreantachd a ta o Dhia tre chreidimh:

10 Chum eòlas a bhi agam air-san, agus air cumhachd 'aiseirigh-san, agus air còmh-chomunn 'fhulangais, air bhi dhomh air mo chur ann an coslas crutha r'a bhàs;

11 Dh'fheuchainn am feudainn air aon chor teachd chum aiseirigh nam marbh.

12 Cha'n e gu'n d'ràinig mi cheana, no gu bheil mi cheana foirfe: ach tha mi a leantuinn, dh'fheuchainn am faigh mi greim do'n nì sin féin air son an do ghabhadh greim dhìom le Iosa Crìosd.

13 A bhràithre, cha'n 'eil mi a' meas gu'n do ghlac mi greim: ach aon nì *a ta mi a' dèanamh*,

air dhomh na nithe a ta air mo chùl a dhì-chuimhneachadh, agus bhi 'g am shineadh féin chum nan nithe a ta romham,

14 Tha mi a' dian-ruith dh'ionnsuidh a' chomhara, chum duaise àrd-ghairme Dhé ann an Iosa Crìosd.

15 Uime sin mheud dhinne 's a ta dìongmhalta, biodh an inntinn so againn : agus ma tha sibh ann an nì sam bith air atharrachadh inntinn, foillsichidh Dia an nì so féin duibh.

16 Gidheadh, an nì air an d'ràinig sinn a cheana, gluais-eamaid a réir aoin riaghailt, bith-eamaid a dh'aon inntinn.

17 A bhràithre, bithibh-sa le chéile 'nur luchd-leanmhuinn ormsa, agus thugaibh an aire dhoibh-san a tha gluasad air an dòigh sin, mar a ta sinne 'nar n-eisempleir agaibh.

18 (Oir a ta mòran a' gluasad, mu'n dubhairt mi gu minic ribh, agus mu'm bheil mi nis, eadhon a' gul, ag ràdh ribh, *gur* naimhdean *iad* do chrann-céusaidh Chrìosd :

19 D'an deireadh bhi air an sgrios, d'an dia am brù ; agus aig am bheil an glòir nan nàire, aig am bheil an aire air nithibh talmhaidh.)

20 Oir a ta ar caithe-beathane air nèamh, an t-ionad as an bheil dùil againn fòs ris an t-Slànuighear, an Tighearn Iosa Crìosd ;

21 A chruth-atharraicheas ar corp diblidh, chum gu'n dèanar e comh-chosmhuil r'a chorp glòrmhor féin, a réir an oibreachaidh leis am bheil e comasach air na h-uile nithe a chur fo cheannsal féin.

CAIB. IV.

UIME sin, mo bhràithre gràdhach agus air am

bheil mo dhéidh, m' aoibhneas agus mo chrùn, seasaihb mar so gu daingean san Tighearn, a mhuinntir *mo* ghràidh.

2 Tha mi a' guidhe air Eudias, agus tha mi a' guidhe air Sintiche, iad a bhi dh'aon inntinn san Tighearn.

3 Agus tha mi ag iarraidh ortsa mar an ceudna, a chompanaich dhileis, dèan còmh-nadhris na mnaibh sin a rinn saothair maille rium-sa san t-soisgeul, maille ri Clemens, agus a' chuid eile do m' chomh-oibrichibh, aig am bheil an ainmean ann an leabhar na beatha.

4 Dèanaibh gairdeachas san Tighearn a ghnàth : a ris a ta mi ag ràdh, Dèanaibh gairdeachas,

5 Biodh bhur measarrachd follaiseach do na h-uile dhaoineibh. *Tha* 'n Tighearn am fagus.

6 Na biodh ro-chùram nì sam bith oirbh : ach anns gach uile nì le h-ùrnuigh agus asluchadh maille ri breith-buidheachais, biodh bhur n-iarrtuis air an dèanamh aithnichte do Dhia.

7 Agus coimhididh sìth Dhé, a ta thar gach uile thuigse, bhur cridhe agus bhur n-inntinn ann an Iosa Crìosd.

8 Fa dheoidh, a bhràithre, ge b'e nithe ta fìor, ge b'e nithe *ta* urramach, ge b'e nithe *ta* ceart, ge b'e nithe *ta* fìor-ghlan, ge b'e nithe *ta* ion-ghràidh, ge b'e nithe *ta* ionmholtà ; ma *tha* deadh-bheus air bith *ann*, ma *tha* moladh air bith *ann*, smuainichibh air na nithibh sin.

9 Na nithe sin araon a dh'fhòghluim, agus a ghabh sibh, agus a chual agus a chunnaic sibh annam-sa, dèanaibh : agus bithidh Dia na sìthe maille ribh.

10 Ach rinn mi gairdeachas gu mòr san Tighearn do bhrìgh gu'n d'ath-ùraicheadh nis fa

dheireadh bhur cùram umam-sa ;
ni mar an ceudna anns an robh
sibh cùramach, ach cha robh
cothrom agaibh.

11 Cha'n e gu bheil mi a'
labhairt a thaobh uireasbhuidh :
oir dh'fhòghluim mi, ge b'e staid
am bheil mi, bhi toilichte.

12 Is aithne dhomh bhi ìosal,
agus is aithne dhomh mar an
ceudna pailteas a mhealtuinn :
anns gach àit, agus anns na
h-uile nithibh theagaisgeadh mi,
araon a bhi sàthach agus ocrach,
araon pailteas a shealbhachadh
agus uireasbhuidh fhulang.

13 Is urrainn mi na h-uile
nithe a dhèanamh tre Chrìosd,
a neartaicheas mi.

14 Gidheadh, is maith a rinn
sibh gu'n do chomh-phàirtich
sibh ri m' thrioblaid.

15 Agus a nis biodh fhios
agaibh-sa, a Philipianacha, ann
an toiseach an t-soisgeil, 'nuair
a dh'fhàg mi Macedonia, nach
do roinn eaglais air bith rium-sa,
thaobh tabhairt agus gabhail,
ach sibhse a mhàin.

16 Oir eadhon ann an Tesa-
lonica chuir sibh aon uair agus

a ris a m' ionnsuidh leasachadh
do m' uireasbhuidh.

17 Cha'n e gu bheil mi ag
iarraidh tabhartais : ach a ta mi
ag iarraidh toraidh a bhios pailte
chum bhur cunntais-sa.

18 Ach a ta mi sealbhachadh
nan uile nithe, agus tha pailteas
agam : lìonadh mi, air dhomh na
nithe fhaotainn o Epaphroditus
a chuireadh uaibh-sa, fàile deadh-
chùbhraidh, ìobairt thaitneach,
anns am bheil tlachd aig Dia.

19 Ach leasaichidh mo Dhia-
sa bhur n-uireasbhuidh uile, a
réir a shaoibhreis ann an glòir,
tre Iosa Crìosd.

20 A nis do Dhia agus ar n-
Athair-ne *gu robh* glòir gu saogh-
al nan saoghal. Amen.

21 Cuiribh fàilte air gach uile
naomh ann an Iosa Crìosd.
Tha na bràithrean a tha maille
rium, a' cur fàilte oirbh.

22 Tha na naoimh uile a'
cur fàilte oirbh, gu h-àraidh
iadsan a tha do theaghlach
Cheasair.

23 Gràs ar Tighearna Iosa
Crìosd *gu robh* maille ribh uile.
Amen.

LITIR AN ABTSOIL PHOIL CHUM NAN COLOSIANACH.

CAIB. I.

POL abstol Iosa Crìosd tre
thoil Dé, agus Timoteus
ar bràthair,

2 Chum nan naomh agus nam
bràthar dileas ann an Crìosd, a
tha ann an Colose : Gràs *gu robh*
dhuibh, agus sìth o Dhia ar n-
Athair, agus o'n Tighearna Iosa
Crìosd.

3 Tha sinn a' toirt buidheach-

ais do Dhia, agus Athair ar
Tighearna Iosa Crìosd, a' sìor-
dhèanamh ùrnuigh air bhur son-
sa ;

4 O chuala sinn iomradh bhur
creidimh ann an Iosa Crìosd,
agus *bhur* gràidh do na naomh-
aibh uile ;

5 Air son an dòchais a ta air
a thasgaidh fa 'ur comhair air
nèamh, air an euala sibh iomradh

roimh ann am focal fìrinn an t-soisgeil:

6 A thàinig do 'ur n-ionn-suidh-sa, mar anns an t-saoghal uile; agus a tha toirt toraidh uaith, mar a ta e dèanamh mar an ceudna 'nur measg-sa, o'n là anns an cuala sibh e, agus san d'fhuair sibh eòlas air gràs Dhé ann am fìrinn.

7 A réir fòs mar a dh'fhògh-luim sibh o Epaphras ar comh-sheirbhiseach gràdhach-ne, a tha air bhur son-sa 'na mhinisteir dileas do Chrìosd;

8 A chuir an céill dhuinne mar an ceudna bhur gràdh-sa anns an Spiorad.

9 Air an aobhar so, cha'n 'eil sinne mar an ceudna a' sgur, o'n là a chuala sinn e, do dhèanamh ùrnuigh air bhur son-sa, agus a ghuidheadh gu'm biodh sibh air bhur lìonadh le eòlas a thoile, san uile ghliocas agus thuigse spioradail;

10 Chum gu'n gluaiseadh sibh gu cubhaidh do'n Tighearn chum gach uile thoileachaidh, a' toirt toraidh uaibh san uile dheadh obair, agus a' fàs ann an eòlas Dé;

11 Air bhur neartachadh leis an uile neart a réir a chumhachd ghlòrmhoir-san, chum an uile fhoighidin agus fhad-fhulangais maille ri gàirdeachas;

12 A' tabhairt buidheachais do'n Athair, a riunn sinne iom-chuidh chum bhi 'nar luchd-comh-pàirt do oighreachd nan naomh san t-solus:

13 A shaor sinn o chumhachd an dorchadais, agus a dh'atharraich sinn chum rioghachd Mic a ghràidh-san:

14 Anns am bheil againn saor-sa tre 'fhuil-san, eadhon maith-eanas nam peacadh:

15 Neach a's e iomhaigh an Dé neo-fhaicsinnich, ceud-ghin a' chruthachaidh uile:

16 Oir is ann leis-san a chruthaicheadh na h-uile nithe a ta air nèamh, agus a ta air talamh, faicsinneach agus neo-fhaicsinneach, ma's àrd-chaithrichean iad, no tighearnais, no uachdaranachda, no cumhachda; is ann leis-san agus air a shon-san a chruthaicheadh na h-uile nithe:

17 Agus tha e-san roimh na h-uile nithibh, agus trid-san tha na h-uile nithe a' comh-sheasamh.

18 Agus is e ceann a' chuirp, eadhon na h-eaglais: neach a's e an toiseach, an ceud-ghin o na marbhaibh; chum gu'm biodh aige àrd-cheannas anns na h-uile.

19 Oir b'e deadh thoil an Athar, gu'n còmhnuicheadh gach uile iomlanachd annsan;

20 Agus gu'm biodh na h-uile air an dèanamh réidh ris féin trid-san, air dha sìth a dhèanamh tre fhuil a chroinn-chéusaidh-san; trid-san, a ta mi ag ràdh, ma's nithe iad a ta air talamh, no nithe a ta air nèamh.

21 Agus sibhse a bha uair-éigin 'nur coimhiche, agus 'nur naimhdebh ann bhur n-inntinn thaobh dhroch oibre, nis rinn e réidh ris féin.

22 Ann an corp 'fheòla féin tre'n bhàs, chum sibhse a chur naomha, agus neo-lochdach, agus neo-choireach, 'na làthair-san:

23 Ma dh'fhanas sibh anns a' chreidimh bunaiteach agus daingean, gun bhi air bhur n-atharrachadh o dhòchas an t-soisgeil, a chuala sibh, agus a shearmonaicheadh do gach uile chreutair a ta fuaidh nèamh; air an d'rinn-eadh mise Pòl a'm' mhinisteir.

24 Tha mi nis a' dèanamh gàirdeachais ann am fhulangas-aibh air bhur son-sa, agus a'

coimhlionadh mheud 's a ta dhéidh-làimh do àmhgharaibh Chrìosd ann am fheoil, air son a chuirp-san, eadhon na h-eaglais :

25 D'an d'rinneadh mise a'm' mhinisteir, a réir stiùbhardachd Dhé a thugadh dhomh air bhur son-sa, a choimhlionadh focail Dé;

26 Eadhon an rùn-diomhair a bha folaichte o na linnibh, agus o na ginealachaidh a chaidh seachad, ach a nis a tha air fhoillseachadh d'a naomhaibh-san :

27 D'am bu toil le Dia fhoillseachadh ciod e saobhreas glòire an rùn-diomhair so am measg nan Cinneach; neach a's e Crìosd annaibh-sa, dòchas na glòire;

28 Neach a ta sinne a' searmonachadh, a' toirt rabhaidh do gach duine, agus a' teagasg gach uile dhuine anns an uile ghliocas; chum gu nochd sinn gach uile dhuine 'na làthair-san iomlan ann an Iosa Crìosd :

29 An ni chum am bheil mise mar an ceudna a' saothreachadh, a' dèanamh spairn a réir 'oibreachaidh-san, a tha 'g oibreachadh annam gu cumhachdach.

CAIB. II.

OIR b'àill leam fios a bhi agaibh ciod e meud mo chòmhraig air bhur son-sa, agus air son na dream a ta ann an Laodicea, agus air son a mheud nach fhaca m'aghaidh anns an fheoil :

2 Ionnis gu'm faigheadh an cridhe sòlas, air dhoibh bhi air an dlùth-cheangal r'a chéile ann an gràdh, agus chum uile shaoibhreis an làn dearbh-bheachd tuigse, chum eòlais rùn-diomhair Dhé, eadhon an Athar, agus Chrìosd ;

3 Anns am bheil uile ionmhais

a' ghliocais agus an eòlais folaichte.

4 Agus so a ta mi ag ràdh, air eagal gu mealladh neach air bith sibh le briathraibh tairng-each.

5 Oir ged tha mi uaibh san fheoil, gidheadh a ta mi maille ribh san Spiorad, a' dèanamh gairdeachais agus a' faicinn bhur n-òrduigh, agus seasmhachd bhur creidimh ann an Crìosd.

6 Uime sin mar a ghabh sibh do 'ur n-ionnsuidh an Tighearn Iosa Crìosd, gluaisibh ann :

7 Air dhuibh bhi air bhur freumhachadh agus air bhur togail suas annsan, agus air bhur daingneachadh sa' chreidimh, a réir mar a theagaisgeadh sibh, a' meudachadh ann le breith-buidheachais.

8 Thugaibh an aire nach dèan neach air bith foirneart oirbh tre fheallsanachd agus mealltair-eachd dhìomhain, a réir beul-aithris dhaoine, a réir ceud-thois-eacha an t-saoghail, agus cha'n ann a réir Chrìosd :

9 Oir annsan tha uile iomlanachd na diadhachd a' gabhail còmhnuidh gu corporra.

10 Agus tha sibhse coimhlionta annsan, neach a's e ceann gach uile uachdaranachd agus chumhachd ;

11 Anns am bheil sibh mar an ceudna air bhur timchioll-ghearradh leis an timchioll-ghearradh nach d'rinneadh le làmhaidh, ann an cur dhibh cuirp pheacanna na feòla, le timchioll-ghearradh Chrìosd :

12 Air dhuibh bhi adhlaidte maille ris ann am baisteadh, anns am bheil sibh mar an ceudna air bhur togail suas maille ris tre chreidimh oibreachaidh Dhé, a thog suas e-san o na marbhaibh.

13 Agus sibhse a bha marbh

'nur n-eu-ceartaibh agus ann an neo-thimchioll-ghearradh bhur feòla, bheothaich e maille ris, a' maitheadh dhuibh nan uile eu-ceart;

14 A' dubhadh a mach làmh-sgrìobhaidh nan òrduighean do ar taobh-ne, a bha 'nar n-aghaidh, agus thug e as an t-slighe i, air dha a sparradh ri a chrann-céusaidh-san:

15 Air dha uachdaranachdan agus cumhachdan a chreachadh, rinn e ball-sampuill diubh gu follaiseach, a' dèanamh buaidh-chaitheirm os an ceann tre'n chrann ud féin.

16 Uime sin na tugadh aon neach breth oirbh air son bidh, no dibhe, no thaobh là féille, no gealaich nuaidhe, no shàbaide:

17 A ta 'nan sgàile air na nithibh a ta ri teachd; ach is le Crìosd an corp.

18 Na mealladh aon neach bhur duais uaibh le irioslachd thoileil, agus aoradh do ainglibh, a' fòirneadh a steach gu dàna chum nan nithe nach fac e, gu dìomhain air a shéideadh suas le 'inntinn fheòlmhoir féin;

19 Agus gun an ceann a chumail, o'm bheil an corp uile, air dha bhi air a bheathachadh tre altaibh agus bhannaibh, agus air a dhlùth-cheangal r'a chéile, a' fàs le fàs Dé.

20 Uime sin ma fhuair sibh bàs maille ri Crìosd o cheud thoiseachaibh an t-saoghail, c'ar son, mar dhaoine a ta beò san t-saoghal, a tha sibh fuaidh òrdughibh,

21 (Na bean ri, na blais, na làimhsich;

22 Nithe a théid uile a neo-ni le'n gnàthachadh,) a réir àith-eantan agus teagasga dhaoine?

23 Nithe gun amharus aig am bheil samhladh gliocais ann an aoradh féin-thoile agus irios-

lachd, agus mi-chaomhnadh a' chuirp, cha'n ann an urram sam bith chum sàsachaidh na' feòla.

CAIB. III.

UIME sin ma dh'éirich sibh maille ri Crìosd, iarraibh na nithe a ta shuas, far am bheil Crìosd 'na shuidhe aig deas làimh Dhé.

2 Suidhichibh bhur n-aighe air na nithibh a ta shuas, agus cha'n ann air na nithibh a ta air an talamh.

3 Oir a ta sibh marbh, agus tha bhur beatha folaichte maille ri Crìosd ann an Dia.

4 'Nuair a dh'fhoillsichear Crìosd, neach a's e ar beatha-ne, an sin bithidh sibhse mar an ceudna air bhur foillseachadh maille ris ann an glòir.

5 Uime sin claidhibh bhur buill a ta air an talamh, strìopachas, neòghloine, fonn-collaidh, ana-mianna, agus sannt, ni a's iodhol-aoradh:

6 Nithe air son am bheil fearg Dhé a' teachd air cloinn na h-eas-ùmhlachd.

7 Anns an robh sibhse mar an ceudna a' gluasad uair-éigin, 'nuair a bha sibh a' caitheadh bhur beatha 'nam measg.

8 Ach a nis cuiribh-sa uaibh na nithe so uile; fearg, corruich, mì-run, toibheum, cainnt shalach as bhur beul.

9 Na dèanaibh breug d'a chéile, do bhrìgh gu'n do chuir sibh dhibh an seann duine maille r'a ghnìomharaibh,

10 Agus gu'n do chuir sibh umaibh an duine nuadh, a tha air ath-nuadhachadh ann an eòlas, a réir ìomhaigh an Tì a chruthaich e.

11 Far nach 'eil Greugach no Iudhach, timchioll-ghearradh, no neo-thimchioll-ghearradh, duine borb, Sitianach, daor no saor:

ach *is* e Crìosd na h-uile, agus anns na h-uile.

12 Uime sin cuiribh-sa um-aibh, (mar dhaoine taghta Dhé, naomha agus ionmhuinn.) inn-igh thròcaire, caomhalachd, ir-ìoslachd inntinn, macantas, fad-fhulangas;

13 A' giùlan le chéile, agus a' maitheadh d'a chéile, ma tha cùis ghearrain aig neach an aghaidh neach; mar a thug Crìosd maitheanas dhuibhse, mar sin dèanaibh-sa mar an ceudna.

14 Agus thar na nithibh so uile, *cuiribh umaibh* gràdh, ni a's e coimhcheangal na foirfeachd.

15 Agus biodh sìth Dhé a' riaghladh ann bhur cridhe, chum am bheil sibh mar an ceudna air bhur gairm ann an aon chorp; agus bithibh taingeil.

16 Gabhadh focal Chrìosd còmhnuidh annaibh gu saoi-bhir san uile ghliocas, a' teagasg agus a' comhairleachadh a chéile le salmaibh, agus laoidhibh, agus dànaibh spioradail, a' dèanamh ciuil, do'n Tighearn le gràs ann bhur cridhe.

17 Agus gach ni air bith a ni sibh ann am focal no ann an gnìomh, dèanaibh *iad* uile ann an ainm an Tighearna Iosa, a' toirt buidheachais do Dhia, eadhon an t-Athair trìd-san.

18 A mhnàì, bithibh ùmhal do 'ur fearaibh féin, mar is cubhaidh, anns an Tighearn.

19 Fheara-pòsda, gràdhaichibh *bhur* mnàì, agus na bithibh searbh 'nan aghaidh.

20 A chlann, bithibh ùmhal do 'ur pàrantaibh anns na h-uile nithibh; oir a ta so taitneach do'n Tighearn.

21 Aithriche, na brosnuichibh bhur clann *chum feirge*, air eagal gu'n caill iad am misneach,

22 A sheirbhiseacha, bithibh

ùmhal do 'ur maighstiribh a réir na feòla, anns na h-uile nithibh; cha'n ann le seirbhis-sùl, mar dhream a ta toileachadh dhaoine, ach ann an tréibhdhireas cridhe, ann an eagal Dé:

23 Agus ge b'e air bith ni a ni sibh, dèanaibh o bhur cridhe e, mar do'n Tighearn, agus cha'n ann do dhaoinibh;

24 Air dhuibh fios a bhi agaibh, gu'm faigh sibh o'n Tighearn duais na h-oighreachd: oir is ann do'n Tighearn Crìosd a tha sibh a' dèanamh seirbhis.

25 Ach an tì a ni eucoir, gheibh e toillteanas na h-eucorach a rinn e: agus cha'n 'eil leth-bhreth ann.

CAIB. IV.

A MHAIGHSTIREAN,
thugaibh do 'ur seirbhisich an ni sin a tha ceart agus cothromach, air dhuibh fios a bhi agaibh gu bheil agaibh féin maighstir mar an ceudna air nèamh.

2 Buanaichibh ann an ùrn-ùigh, a' dèanamh faire innte le breith-buidheachais;

3 Ag ùrn-ùigh mar an ceudna air ar son-ne, chum gu fosgladh Dia dhuinn dorus na h-ur-labhaird, a chur an céill rùin-diòmh-air Chrìosd, air son am bheil mise ann an cuibhreachaibh:

4 Chum gu foillsich mi e, mar is còir dhomh labhairt.

5 Gluaisibh ann an gliocas thaobh na dream sin a ta an leth muigh, ag ath-cheannach na h-aimsir.

6 Biodh bhur còmhradh a ghnàth ann an gràs, air a dhèanamh blasda le salann, chum gu'm bì fhios agaibh cionnus is còir dhuibh gach neach a fhreagairt.

7 Foillsichidh Tichicus, bràth-air gràdhach, agus ministear dileas, agus comh-sheirbhiseach

san Tighearn gach ni dhuibh mu m' thimchioll-sa :

8 A chuir mi do 'ur n-ionnsuidh chum na crìche so féin, gu'm biodh fios bhur staide-sa aige, agus gu'n tugadh e comh-fhurtachd do 'ur cridheachaibh.

9 Maille ri Onesimus, bràth-air dìleas agus gràdhach, a tha dhibh féin. Nì iad aithnichte dhuibh na h-uile nithe *a tha* an so.

10 Tha Aristarchus mo chomh-phriosanach a' cur fàilte oirbh, agus Marcus, mac peathar do Bharnabas, (mu'n d'fhuair sibh àitheanta; ma thig e do 'ur n-ionnsuidh, gabhaibh ris;)

11 Agus Iosa, ris an abrar Iustus, muinntir a tha do'n timchioll-ghearradh. 'S iad sin a mhàin *mo* chomh-oibrichean chum rìoghachd Dhé, a bha 'nan comh-fhurtachd dhomh.

12 Tha Epaphras, a tha dhibh féin, seirbhiseach Chrìosd, a' cur fàilte oirbh, a ghnàth a' dèanamh spairn dhùrachdaich air bhur son ann an ùrnuighibh, chum gu seas sibh foirfe, agus

coimhlionta ann an uile thoil Dhé.

13 Oir tha mi dèanamh fianuis dha, gu bheil aige mòr theas-ghràdh dhuibhse, agus dhoibhsan a tha ann an Laodicea, agus do'n mhuinntir a tha ann an Hierapolis.

14 Tha Lucas an léigh gràdhach, agus Demas a' cur fàilte oirbh.

15 Cuiribh fàilte air na bràithribh a tha ann an Laodicea, agus air Nimphas, agus air an eaglais *a tha* 'na thigh.

16 Agus an uair a leughar an litir so 'nur measg-sa, thugaibh fa'near gu'n leughar i ann an eaglais nan Laodiceanach mar an ceudna; agus gu'n leugh sibhse cuideachd *an litir* o Laodicea.

17 Agus abraibh ri Archipus, Thoir an aire do'n mhinistireil-eachd a fhuair thu san Tighearn, gu'n coimhlion thu i.

18 Fàilte uam-sa Pòl le m' làimh féin. Cuimhnichibh mo chuibhreacha. Gràs *gu robh* maille ribh. Amen.

CEUD LITIR AN ABSTOIL PHOIL CHUM NAN TESALONIANACH.

CAIB. I.

P**O**L, agus Siluanus, agus Timoteus chum eaglais nan Tesalonianach, *a tha* ann an Dia an t-Athair, agus *anns* an Tighearn Iosa Crìosd: gràs duibh, agus sìth o Dhia ar n-Athair, agus o'n Tighearn Iosa Crìosd.

2 Tha sinn a' toirt buidheachais do Dhia a ghnàth air bhur son-sa uile, a' toirt iomraidh oirbh ann ar n-ùrnuighibh-ne;

3 A' cuimhneachadh gun sgur obair bhur creidimh, agus saoth-air *bhur* gràidh, agus foighidin bhur dòchais 'nàr Tighearn Iosa Crìosd, am fianuis Dé, agus ar n-Athar-ne:

4 Air dhuinn fios a bhi againn, a bhràithre gràdhaichte le Dia, air bhur taghadh-sa.

5 Oir cha d'thàinig ar soisgeul-ne do 'ur n-ionnsuidh-sa ann am focal a mhàin, ach mar

an ceudna ann an cumhachd, agus anns an Spiorad naomh, agus ann am mòr làn-dearbhadh; mar is aithne dhuibh ciod a' ghnè dhaoine bha annainn 'nur measg air bhur sonsa.

6 Agus rinneadh sibh 'nur luchd-leanmhuinn oirne, agus air an Tighearn, 'nuair a ghabh sibh ris an fhocal ann am mòr-àmhghar, le h-aoibhneas an Spioraid naoimh:

7 Ionnnus gu robh sibh 'nur n-eisempleiribh dhoibh-san uile a tha creidsinn ann am Macedonia, agus ann an Achaia.

8 Oir uaibhse chaidh fuaim focail an Tighearna mach, cha'n ann a mhàin ann am Macedonia agus ann an Achaia. ach mar an ceudna anns gach àit, tha bhur creidimh ann an Dia air a sgaoileadh a mach, ionnnus nach 'eil feum air sinne a labhairt ni air bith.

9 Oir a ta iad féin a' foill-seachadh mu ar timchioll-ne, ciod a' ghnè dol a steach a bha againn do 'ur n-ionnsuidh-sa, agus cionnus a phill sibh chum Dhé o iòdholuibh, a dhèanamh seirbhis do'n Dia bheò agus fhior.

10 Agus gu feitheamh r'a Mhac o nèamh, a thog e suas o na marbhaibh, *eadhon* Iosa a shaor sinne o'n fheirg a ta ri teachd.

CAIB. II.

OIR is aithne dhuibh féin, a bhràithre, ar dol-ne a steach do 'ur n-ionnsuidh, nach robh e ann an dìomhanas:

2 Ach fòs air dhuinn fulang roimh, agus an déigh ar maslachaidh ann am Philipi, mar is aithne dhuibh, bha dànachd againn ann ar Dia-ne soisgeul Dé a labhairt ribhse ann am mòr-ghleachd.

3 Oir cha robh ar n-earail-ne

o mhealltaireachd, no o neò-ghloine, no ann an ceilg:

4 Ach mar a mheasadh sinne le Dia iomchuidh gu'm biodh an soisgeul air earbsadh ruinn, is amhuil sin a labhramaid, cha'n ann mar dhream a tha toileachadh dhaoine, ach Dhé, a tha dearbhadh ar cridheacha.

5 Oir cha do ghnàthaich sinn uair air bith briathra mìodalach, mar is aithne dhuibh, no leithsgeul sainnt; 's e Dia ar fianuis:

6 Ni mò dh'iarr sinn urram o dhaoineibh, no uaibhse, no o dhaoineibh eile, ged fheudamaid ar trom a leagadh oirbhse, mar abstola Chrìosd.

7 Ach bha sinn caomh 'nur measg-sa, amhuil a dh'altrum as banaltrum a clann féin:

8 Mar sin, air bhi dhuinne ro-dhèidheil oirbhse, bu toileach leinn cha'n e mhàin soisgeul Dhé a phàirteachadh ribh, ach mar an ceudna ar n-anama féin, do bhrìgh gu robh sibh ro ionmhuinn leinn.

9 Oir is cuimhne leibh, a bhràithre, ar saothair, agus ar sgrìos-ne: oir air dhuinn bhi ri h-obair a dh'oidhche agus a là, chum nach cuireamaid trom air neach sam bith agaibh, shearmonaich sinn duibh soisgeul Dé.

10 Is fianuisean sibhse, agus Dia, cia naomba, agus cia cothromach, agus neo-lochdach a ghiùlain sinne sinn féin 'nur measg-sa a ta creidsinn:

11 Mar is aithne dhuibh, cionnus a dh'earailich sinn, agus a thug sinn comh-fhurtachd, agus a chuir sinn impidh air gach aon agaibh fa leth, (mar a nì Athair d'a chloinn,)

12 Gu'n gluaiseadh sibh gu cubhaidh do Dhia, a ghairm sibh chum a rioghachd agus a ghloire féin.

13 Uime sin a ta sinne mar an ceudna a' toirt buidheachais do Dhia gun sgar, do bhrìgh 'nuair a ghabh sibh ri focal Dé a chuala sibh uainne, gu'n do ghabh sibh ris cha'n ann mar fhocal dhaoine, ach, (mar is e gu firinneach,) focal Dé, a tha 'g oibreachadh gu h-éifeachdach annaibh-sa a ta creidsinn.

14 Oir rinneadh sibhse, a bhràithre, 'nur luchd-leanmhuinn air eaglaisibh Dhé, ann an Iudea, a tha ann an Iosa Crìosd: oir dh'fhuiling sibhse na nithe ceudna o bhur luchd-dùthcha féin, mar a dh'fhuiling iadsan o na h-Iudhaich:

15 A chuir araon an Tighearn Iosa, agus am fàidhean féin gu bàs, agus a rinn geur-leanmhuinn oirne; agus nach 'eil a' toileachadh Dhé, agus a tha'n aghaidh nan uile dhaoine:

16 A tha bacadh dhinne labhairt ris na Cinnich, chum gu'm biodh iad air an tèarnadh, chum sìr-lionaidh suas am peacanna: oir thàinig an fhearg orra mu dheireadh.

17 Ach air dhuinne, a bhràithre, bhi air ar dealachadh uaibhse rè tamuil bhig am pearsa, ach cha'n ann an cridhe, is ro mhòid a rinn sinn dìchioll air bhur n-aghaidh fhaicinn le mòr-thogradh.

18 Uime sin bu mhiann leinn teachd do'ur n-ionnsuidh, (eadhon leam-sa Pòl,) uair no dhà: ach bhac Satan sinn.

19 Oir ciod e ar dòchas-ne, no ar n-aoibhneas, no ar crùn-uaille? nach sibhse féin e am fianuis ar Tighearna Iosa Crìosd aig a theachd?

20 Oir is sibhse ar glòir-ne agus ar n-aoibhneas.

CAIB. III.

AIR an aobhar sin, an uair nach b'urrainn sinn cumail

oirnn féin ni b'fhaide, bu taitneach leinn bhi air ar fàgail 'nar n-aonar am baile na h-Aithne:

2 Agus chuir sinn Timoteus ar bràthair agus ministear Dhé, agus ar comh-oibriche ann an soisgeul Chrìosd, chum sibhse a dhaingneachadh, agus comh-fhurtachd a thoirt duibh mu thimchioll bhur creidimh;

3 Chum nach gluaisteadh neach air bith agaibh leis na trioblaidibh so; oir a ta fhios agaibh féin gu'n d'òrduicheadh sinn a dh'ionnsuidh so.

4 Oir gu deimhin, an uair a bha sinn maille ribh, dh'innis sinn duibh roimh-làimh, gu robh sinn gu àmhghar fhulang; eadhon mar a thachair, agus is aithne dhuibh.

5 Air an aobhar so, 'nuair nach robh mise comasach air cumail orm féin ni b'fhaide, chuir mi a dh'fhaghail fios mu 'ur creidimh, air eagal air chor sam bith gu'n do bhuair am buaireadair sibh, agus gu'm biodh ar saothair-ne dìomhain.

6 Ach a nis an uair a thàinig Timoteus uaibhse do ar n-ionnsuidh-ne, agus a thug e deadh sgeul duinn mu 'ur creidimh agus bhur gràdh, agus gu bheil cuimhne mhaith agaibh oirne a ghnàth, a' miannachadh gu mòr sinne fhaicinn, amhuil a ta sinne mar an ceudna sibhse fhaicinn.

7 Uime so, a bhràithre, fhuaire sinne comh-fhurtachd do 'ur taobh ann ar n-uile àmhghar agus theinn trebhur creidimh-sa:

8 Oir a ta sinne beò a nis, ma sheasas sibhse gu bunaiteach san Tighearn.

9 Oir ciod am buidheachas a dh'fheudas sinn iocadh do Dhia as bhur leth-sa, air son an aoibhneis sin uile leis am bheil sinn ri gairdeachas do 'ur taobh am fianuis ar Dé-ne,

10 A dh'oidhche agus a là a' guidhe gu ro dhùrachdach gu faiceamaid bhur n-aghaidh-sa, agus gu leasaicheamaid uireasbhuidh bhur creidimh?

11 A nis gu dèanadh Dia féin, eadhon ar n-Athair, agus ar Tighearna Iosa Crìosd ar slighe-ne a threòrachadh do 'ur n-ionnsuidh-sa.

12 Agus gu tugadh an Tigh-earn oirbh fàs agus bhi ro phailt ann an gràdh d'a chèile, agus do na h-uile dhaoineibh, mar a ta sinne dhuibhse;

13 Chum gu daingnich e bhur cridheacha neo-choireach ann an naomhachd am fianuis Dé, eadhon ar n-Athar-ne, aig teachd ar Tighearna Iosa Crìosd maille r' a naomhaibh uile.

CAIB. IV.

OS bàrr ma ta, a bhràithre, cuireamaid a dh'impidh agus a dh'athcheuinge oirbh tre'n Tighearn Iosa, mar a fhuair sibh uainne cionnus is còir dhuibh imeachd, agus Dia a thoileachadh, gu meudaicheadh sibh mar sin ni's mò agus ni's mò.

2 Oir a ta fhios agaibh ciod iad na h-àitheantan a thug sinne dhuibh tre'n Tighearn Iosa.

3 Oir is i so toil Dhé, eadhon bhur naomhachadh-sa, sibh a sheachnadh strìopachais:

4 Gu'm b'aithne do gach aon agaibh a shoitheach féin a shealbhachadh ann an naomhachd, agus ann an urram;

5 Cha'n ann an am fonn anamianach, mar a nì na Cinnich aig nach 'eil eòlas air Dia:

6 Gun neach air bith a dhèanamh eucoir no mealltaireachd sa' chuis air a bhràthair; do bhrìgh gur e'n Tighearn a nì dioghaltas air an uile leithidibh sin, a réir mar a dh'innis sinne

mar an ceudna duibh roimh, agus a rinn sinn fianuis.

7 Oir cha do ghairm Dia sinne gu neò-ghloine, ach gu naomhachd.

8 Uime sin an neach a nì tàir, cha'n ann air duine tha e dèanamh tàir, ach air Dia, a thug dhuinne a Spiorad naomh féin.

9 Ach a thaobh gràidh bhràthaireil, cha'n 'eil feum agaibh mise a sgrìobhadh do 'ur n-ionnsuidh: oir a ta sibh féin air bhur teagasg o Dhia gràdh a thoirt d'a chèile.

10 Agus gu deimhin tha sibh a' dèanamh so thaobh nam bràthar uile, a tha ann am Macedonia gu h-iomlan: ach guidheamaid oirbh, a bhràithre, sibh a mheudachadh ni's mò agus ni's mò;

11 Agus gu'n dèan sibh bhur dìchioll a bhi ciuin, agus bhur gnothuiche féin a dhèanamh, agus saothreachadh le 'ur làmh-aibh féin, (amhuil a dh'àithn sinne dhuibh;)

12 Chum gu'n gluais sibh gu cubhaidh thaobh na muinntir sin a ta'n leth muigh, agus nach bì uireasbhuidh ni sam bith oirbh.

13 Ach cha b' àill leam, a bhràithre, sibh a bhi aineolach thaobh na muinntir sin a tha 'nan codal, chum nach dèan sibh bròn, eadhon mar dhaoine eile aig nach 'eil dòchas.

14 Oir ma chreideas sinn gu'n d'fhuair Iosa bàs, agus gu'n d'éirich e ris, amhuil sin mar an ceudna an dream a choidil ann an Iosa, bheir Dia maille ris.

15 Oir so a ta sinn ag ràdh ribh ann am focal an Tighearna, nach bì againne a tha beò agus a dh'fhàgar gu teachd an Tighearna, toiseach orra-san a tha 'nan codal.

16 Oir thig an Tighearn féin

a nuas o nèamh le àrd-iolaich, le guth an àrd-aingil, agus le trompaid Dhé: agus éiridh na mairbh ann an Crìosd air tùs:

17 An déigh sin sinne a bhios beò agus a dh'fhàgar, togar suas sinn maille riu-san anns na neul-aibh, an còdhail an Tighearna san athar: agus mar sin bithidh sinn gu sìorruidh maille ris an Tighearn.

18 Uime sin thugaibh comh-fhurtachd d'a chéile leis na briathraibh so.

CAIB. V.

ACH mu thimchioll nan aimsirean agus nan àm cha'n 'eil feum agaibh-sa, a bhràithre, mise a sgrìobhadh do 'ur n-ionnsuidh.

2 Oir a ta sàr fhios agaibh féin gu'n tig là an Tighearna mar ghaduiche san oidhche.

3 Oir an uair a their iad, Sìth agus tèaruinteachd, an sin thig sgrios obann orra, mar shaothair air mnaoi thorraich; agus cha téid iad as.

4 Ach cha'n 'eil sibhse, a bhràithre, san dorchadas, ionnus gu'm beireadh an là sin oirbh mar ghaduiche.

5 Is sibhse uile clann an t-soluis, agus clann an là: cha'n ann do'n oidhche, no do'n dorchadas sinn.

6 Uime sin na coidleamaid mar dhaoine eile; ach dèanamaid faire agus bitheamaid stuama.

7 Oir an dream a choidleas, is anns an oidhche a choidleas iad: agus an dream a tha air mhisg, is anns an oidhche tha iad air mhisg.

8 Ach bitheamaid-ne a tha do'n là stuama, a' cur oirnn uchd-éididh a' chreidimh agus a' ghràidh, agus mar chlogaid, dòchas na slàinte.

9 Oir cha d'òrduich Dia sinn

chum feirge; ach chum slàinte fhaotainn tre ar Tighearna Iosa Crìosd,

10 A fhuair bàs air ar son, chum co aca is faireach no codal dhuinn, gu'm bitheamaid beò maille ris.

11 Uime sin thugaibh comh-fhurtachd d'a chéile, agus togaibh suas gach aon a chéile, eadhon mar a ta sibh a' dèanamh.

12 Agus guidheamaid oirbh, a bhràithre, aithne bhi agaibh air an dream a tha saothreachadh 'nur measg, agus a tha os bhur ceann san Tighearn, agus a tha 'gur comhairleachadh;

13 Agus meas mòr a bhi agaibh dhiubh ann an gràdh air son an oibre. Bithibh sìochail 'nur measg féin.

14 A nis guidheamaid oirbh, a bhràithre, thugaibh rabhadh dhoibh-san a tha mì-riaghailteach, thugaibh comh-fhurtachd dhoibh-san a tha lag-chridheach, cumaibh suas iadsan a ta an-mhunn, bithibh foighidneach a thaobh nan uile dhaoine.

15 Feuchaibh nach ioc neach ole air son uile do dhuine sam bith; ach leanaibh-sa a ghnàth an ni a ta maith, araon do 'ur taobh féin, agus a thaobh nan uile dhaoine.

16 Dèanaibh gairdeachas a ghnàth.

17 Dèanaibh ùrnuigh gun sgrur.

18 Anns gach uile ni thugaibh buidheachas; oir is i so toil Dé ann an Iosa Crìosd do 'ur taobh.

19 Na mùchaibh an Spiorad.

20 Na dèanaibh tàir air fàidheadaireachd.

21 Dearbhaibh na h-uile nithe: cumaibh gu daingean an ni sin a ta maith.

22 Seachnaibh gach uile choslas uile.

23 Agus gu dèanadh Dia na sìthe féin naomha sibh gu h-ìomlan; agus gu deònaicheadh Dia gu'm bi bhur n-uile spiorad, agus anam, agus chorp air an gleidheadh gu neo-choireach, gu teachd ar Tighearna Iosa Crìosd.

24 Is firinneach an Tì a ta 'gur gairm, neach mar an ceudna a nì e.

25 A bhràithre, dèanaibh ùrnuigh air ar son-ne.

26 Cuiribh fàilte air na bràithribh uile le pòig naoimh.

27 Tha mi a' sparradh oirbh á h-uchd an Tighearna, gu'n leughar an litir so do na bràithribh naomha uile.

28 Gu robh gràs ar Tigh-earna Iosa Crìosd maille ribh. Amen.

DARA LITIR AN ABSTOIL PHOIL CHUM NAN TESALONIANACH.

CAIB.

POL, agus Siluanas, agus Timoteus, chum eaglais nan Tesalonianach, ann an Dia ar n-Athair, agus anns an Tigh-earn Iosa Crìosd:

2 Gràs gu robh dhuibh, agus sìth o Dhia ar n-Athair, agus o'n Tighearn Iosa Crìosd.

3 Tha e mar fhiachaibh oirnne buidheachas a thoirt do Dhia a ghnàth air bhur son-sa, a bhràithre, mar is cubhaidh, do bhrìgh gu bheil bhur creidimh a' fàs gu ro mhòr, agus gu bheil gràdh gach aoin agaibh uile a' meudachadh d'a chéile:

4 Ionnnus gu bheil sinne féin a' dèanamh uaille asaibh-sa ann an eaglaisibh Dhé, air son bhur foighidin agus bhur creidimh ann bhur n-uile gheur-lean-mhuinnibh agus àmhgharaibh a tha sibh a' fulang:

5 Nì a ta 'na chomhara foll-aiseach air ceart-bhreitheanas Dé, chum gu measar gur airidh sibhse air rioghachd Dhé, air son am bheil sibh a' fulang:

6 Do bhrìgh gur ceart an nì do Dhia, àmhghar iocadh dhoibh-san a ta cur àmhghair oirbh;

7 Agus dhuibhse a ta fo àmhghar, fois maille ruinne, 'nuair a dh'fhoillsichear an Tighearn Iosa o nèamh, maille r'a ainglibh cumhachdach,

8 Ann an teine lasarach, a' dèanamh dìoghaltais air an dream aig nach 'eil eòlas air Dia, agus nach 'eil ùmhal do shoisgeul ar Tighearna Iosa Crìosd.

9 Muinntir air an dèanar peanas le sgrios sìorruidh o làthair an Tighearn, agus o ghlòir a chumbachd;

10 'Nuair a thig e gu bhi air a ghlòrachadh 'na naomhaibh, agus chum gu'n dèanar iongantach e annta-san uile a ta creid-sinn san là sin, (do bhrìgh gu'n do chreideadh ar fianuis-ne 'nur measg-sa.)

11 Air an aobhar so tha sinne mar an ceudna a' dèanamh sìr-ùrnuigh air bhur son-sa, chum gu meas ar Dia-ne gur air-

idh sibhse air a' ghairm so, agus gu'n coimhlion e uile dheadh-ghèan a mhaithéis, agus obair a' chreidimh le cumhachd :

12 Chum gu'm bì ainm ar Tighearna Iosa Crìosd air a ghlòrachadh annaibh-sa, agus sibhse ann-san, a réir gràis ar Dé-ne, agus an Tighearna Iosa Crìosd.

CAIB. II.

A NIS guidheamaid oirbh, a bhràithre, thaobh teachd ar Tighearna Iosa Crìosd, agus ar comh-chruinneachaidh-ne d' a ionnsuidh,

2 Gun sibh bhi gu h-ealamh air bhur crathadh 'nur n-inntinn, no fo bhuaireas, le spiorad, no le focal, no le litir, mar uainne, mar gu'm biodh la Chrìosd am fagas.

3 Na mealladh neach sam bith sibh air aon chor : oir cha *tig an là sin* mur tig air tùs treigeadh-creidimh, agus *mur* foillsichear duine sin a' pheacaidh, mac an sgrios ;

4 A tha cur an aghaidh agus 'ga àrdachadh féin os ceann gach ni ris an abrar Dia, no d'an dèanar aoradh ; ionnus mar Dhia gu bheil e 'na shuidhe ann an teampull Dhé, 'ga nochdadh féin gur Dia e.

5 Nach cuimhne leibh, air dhomh bhi fathast maille ribh, gu'n d'innis mi na nithe so dhuibh ?

6 Agus is aithne dhuibh ciod a tha bacadh nis e bhi air fhoill-seachadh 'na àm féin.

7 Oir a ta rùn-diomhair na h-ain-diadhachd ag oibreachadh cheana. a m-hàin gus an toirear air falbh an tì a ta nis a' bacadh.

8 Agus an sin foillsichear an t-aingidh sin, a chlaoidheas an Tighearn le h-anail a bheoil féin,

agus d'an cur e as le dealradh a theachd :

9 *Eadhon e-san*, aig am bheil a theachd a réir oibreachaidh Shat-ain, maille ris an uile chumhachd, agus chomharaibh, agus iongant-asaibh breugach,

10 Agus maille ri uile mhealltaireachd na h-eucorach anntasan a chaillear ; a chionn nach do ghabh iad gràdh na fìrinn, chum gu tèaruinteadh iad.

11 Agus air a shon so cuiridh Dia treun-oibreachadh meallaidh d'an ionnsuidh, ionnus gu 'n creid iad a' bhreug :

12 Chum gu'm bì iad uile air an diteadh, nach do chreid an fhìrinn, ach aig an robh tlachd anns an eucoir.

13 Ach a ta e mar fhiachaibh oirne buidheachas a thoirt do Dhia a ghnàth air bhur son-sa, a bhràithre, ionmhuinn do 'n Tigh-earn, do bhrìgh gu'n do thagh Dia sibh o thùs chum slàinte, tre naomhachadh an Spioraid, agus creidsinn na fìrinn :

14 Chum an do ghairm e sibh tre ar soisgeul-ne, chum sibh a dh'fhaotainn glòire ar Tighearna Iosa Crìosd.

15 Uime sin, a bhràithre, seasaibh gu daingean, agus cumaidh na teagasgan a thugadh dhuibh, co dhiubh is ann le focal, no le ar litir-ne.

16 A nis gu'n tugadh ar Tighearn Iosa Crìosd e féin, agus Dia, eadhon ar n-Athair-ne, a ghràdhaich sinn, agus a thug *dhuinn* sòlas sìorruidh, agus dòchas maith tre ghràs,

17 Comh-fhurtachd do 'ur cridhe-sa, agus gu daingnicheadh e sibh anns gach uile dheadh fhocal agus ghnìomh.

CAIB. III.

FA dheoidh, a bhràithre, dèanaibh ùrnuigh air ar

son-ne, chum gu'n ruith focal an Tighearn, agus gu'm bì e air a ghlòrachadh mar ann bhur measg-sa;

2 Agus chum gu saorar sinne o dhaoineibh mì-reusonta agus olca: oir cha'n ann aig na h-uile a ta creidimh.

3 Ach a ta an Tighearn dileas, a dhaingnicheas agus a choimhideas o'n olc sibh.

4 Agus a ta earbsa againn san Tighearn do 'ur taobh-sa, gu bheil sibh araon a' dèanamh, agus gu'n dèan sibh na nithe, a tha sinn ag àithneadh dhuibh.

5 Agus gu seòladh an Tighearn bhur cridheacha chum gràidh Dhé, agus chum foighidin Chrìosd.

6 A nis àithneamaid dhuibh, a bhràithre, ann an ainm ar Tighearna Iosa Crìosd, sibh féin a dhealachadh ris gach uile bhràthair a tha 'g imeachd gu mì-riaghailteach, agus cha'n ann a réir an teagaisg a fhuair e uainne.

7 Oir a ta fhios agaibh féin cionnus is còir dhuibh ar lorg-ne leantuinn: oir cha do ghiùlain sinne sinn féin gu mì-riaghailteach 'nur measg;

8 Ni mò a dh'ith sinn aran duine sam bith a nasgaidh; ach le saothair agus an-shocair, a dh'oidheche agus a là ri h-obair, chum nach cuireamaid ar trom air aon agaibh:

9 Cha'n e nach 'eil comas againn, ach a chum gu'n dèanamaid sinn féin 'nar n-eisempleir dhuibhse, gu ar leantuinn.

10 Oir an uair a bha sinn maille ribh, thug sinn an àithne so dhuibh, mur àill le neach obair a dhèanamh, gun e dh'ith-eadh *bìdh*.

11 Oir tha sinn a' cluinn-tinn gu bheil daoine àraidh ag imeachd gu mì-riaghailteach 'nur measg, nach 'eil a' dèanamh oibre sam bith, ach a' gabhail gnothuich ri nithibh nach buin doibh.

12 A nis tha sinn a' toirt àithne d'an leithidibh sin, agus ag earail orra tre ar Tighearna Iosa Crìosd, le saothreachadh gu ciuin, gu'n ith iad an aran féin.

13 Agus sibhse, a bhràithre, na sgithichibh do dhèanamh maith.

14 Agus ma ta neach sam bith nach toir ùmhlachd do ar focal-ne tre an litir so, comharaichibh e-san, agus na biodh comhladar agaibh ris, chum gu'm bì nàire air

15 Gidheadh na measaibh e mar nàmhaid, ach thugaibh comhairle air mar bhràthair.

16 A nis gu'n tugadh Tighearna na sìthe e féin sìth dhuibhse a ghnàth, air gach aon chor. *Gu robh* an Tighearn maille ribh uile.

17 Fàilte uamsa Pòl le m' làimh féin, ni a's e an comhara anns gach uile litir: mar so tha mi a' sgrìobhadh.

18 Gràs ar Tighearna Iosa Crìosd *gu robh* maille ribh uile. Amen.

CEUD LITIR AN ABSTOIL PHOIL CHUM THIMOTEUIS.

CAIB. I.

POL abstol Iosa Crìosd, a réir àithne Dhé, ar Slànuighir, agus an Tighearna Iosa Crìosd, *neach a's e ar dòchas* ;

2 Chum Thimoteuis m'fhior mhic anns a' chreidimh : Gràs, tròcair, agus sìth o Dhia ar n-Athair, agus o Iosa Crìosd ar Tighearn.

3 Mar a dh'iarr mi ort fan-tuinn ann an Ephesus, 'nuair a chaidh mi do Mhacedonia, chum gu'n tugadh tu òrdugh do dhream àraidh gun atharrachadh teagaisg a thoirt uatha ;

4 Agus gun aire a thoirt do sgeulachdaibh, agus do shloinnt-eireachd neo-chrìochnaich, a bheir aobhar do cheisdibh, ni's mò na do fhòghlum diadhaidh, a tha tre chreidimh : *dèan mar sin.*

5 A nis is e a's crìoch do'n àithne gràdh á cridhe glan, agus á coguis mhaith, agus á creidimh neo-chealgach :

6 Nithe air do dhream àraidh clàonadh uatha, chaidh iad a thaobh chum dìomhanais cainnte ;

7 A' miannachadh bhi 'nan luchd-teagaisg an lagha, agus gun iad a' tuigsinn cìod a ta iad ag ràdh, no cìod iad mu'm bheil iad a' toirt cinnte.

8 Ach tha fhios againn gu bheil an lagh maith, ma ghnàthaicheas neach gu dlìgheach e :

9 Air do fhios so a bhi aige, nach ann do dhuine fireanach a dh'òrduicheadh an lagh, ach do dhaoineibh neo-dhligheach agus eas-ùmhail, dhoibh-san a ta mì-dhiadhaidh agus do pheacaich,

do dhaoineibh mì-naomha agus neo-chrabhach, do luchd-marbhaidh aithriche agus do luchd-marbhaidh mhàithriche, do luchd-mortaigh,

10 Do luchd-striopachais, do luchd-ana-mianna mi-nàdurra, do luchd-goid dhaoine, do bhreug-airibh, do luchd-eithich, agus ma tha ni sam bith eile a tha'n aghaidh teagaisg fhallain,

11 A réir soisgeil ghlòrmhoir an Dé bheannaichte, a dh'earb-adh rium-sa.

12 Agus a ta mi a' toirt buidheachais do Iosa Crìosd ar Tighearn, a neartaich mi, do bhrìgh gu'n do mheas e mi dileas, 'gam chur sa' mhinistirealachd ;

13 A bha roimh a'm' fhear-labhairt toibheim, agus a'm' fhear geur-leanmhuinn, agus a'm' dhuine eucorach. Ach fhuair mi tròcair, do bhrìgh gu'n d'rinn mi so tre aineolas, ann am mì-chreidimh :

14 Agus bha gràs ar Tighearna thar tomhas ro phailte dhomh, maille ri creidimh, agus ri gràdh a ta ann an Iosa Crìosd.

15 Is fìor an ràdh so, agus is airidh e air gach aon chor air gabhail ris, gu'n d'thàinig Iosa Crìosd do'n t-saoghal a thèar-nadh pheacach ; d'am mise an ceud-fhear.

16 Gidheadh, air a shon so fhuair mi tròcair, chum gu'm foillsicheadh Crìosd annam-sa air tùs an uile fhad-fhulangas, mar shaimpleir dhoibh-san a chreideadh ann, an déigh so, chum na beatha maireannaich.

17 A nis do'n Rìgh shìorruidh, neo-thruaillidh, neo-fhaicsinn-

each, *do* Dhia a ta mhàin glic, *gu robh* urram agus glòir, *gu saoghal* nan saoghal. Amen.

18 An àithne so tha mi ag earbsadh riut; Thimoteuis a mhic, a réir nam fàidheadair-eachd a rinneadh umad roimh so, chum trid-san gu'n cogadh tu deadh chogadh;

19 A' coimhead creidimh agus deadh choguis; ni air do chuid *do dhaoineibh* a chur uatha, rinn iad long-bhriseadh thaobh a' chreidimh.

20 D'am bheil Himeneus agus Alecsander; muinntir a thug mise thairis do Shatan, chum le'n smachdachadh gu'm fòghlumadh iad gun toibheum a labhairt.

CAIB. II.

THA mi ag iarraidh uime sin, roimh na h-uile nithibh, gu'n dèanar athchuinge, ùrnuighean, eadar-ghuidhe, agus breith-buidheachais air son nan uile dhaoine:

2 Air son rìghrean, agus air son nan uile a tha ann an ùghdarras: chum gu'n caith sinn ar beatha gu foisneach agus gu sìochail, anns an uile dhiadhachd agus chiatachd.

3 Oir *tha* so maith agus taitneach am fianuis Dé ar Slàn-ighir:

4 Neach leis an àill na h-uile dhaoine bhi air an tèarnadh, agus iad a theachd chum eòlas na fìrinn.

5 Oir *is* aon Dia *a ta* ann, agus aon eadar-mheadhonair eadar Dia agus daoine, an duine Iosa Crìosd;

6 A thug e féin 'na éiric air son nan uile, mar fhianuis ann an àm iomchuidh;

7 Chum an d'òrduicheadh mise a'm' shearmonaiche, agus a'm' abstol, (tha mi a' labhairt

na fìrinn ann an Crìosd, cha'n 'eil mi a' dèanamh bréige,) a'm' fhear-teagaisg nan Cinneach ann an creidimh agus ann am fìrinn.

8 Uime sin is àill leam na fir a dhèanamh ùrnuigh sgach àit, a' togail suas làmh naomha gun fheirg, gun amharus:

9 Air an dòigh cheudna, na mnà a chur eudaich iomchuidh umpa, 'gan sgeadachadh féin le nàisneachd agus stuaim: cha'n ann le casadh an gruaige, no le h-òr, no le neamhnuidibh, no le culaidhibh luachmhor;

10 Ach, (mar is cubhaidh do mhnàibh a tha 'g aideachadh diadhachd,) le deadh oibribh.

11 Fòghlumadh a' bhean ann an ciuineas leis an uile ùmhlachd.

12 Ach cha'n 'eil mi a' ceadachadh do mhnaoi teagasg a thoirt uaipe, no ceannas a ghlacadh air an fhear, ach i bhi 'na tosd.

13 Oir is e Adhamh a chruthaicheadh air tùs, agus 'na dhéigh sin Eubha.

14 Agus cha b'e Adhamh a mhealladh, ach air do'n mhnaoi bhi air a mealladh, bha i sa' chionta.

15 Gidheadh tèarnar i tre bhreith cloinne, ma bhunaicheas iad ann an creidimh, agus ann an gràdh, agus ann an naomhachd, maille ri stuaim.

CAIB. III.

IS ràdh fìor so, Ma tha tog-radh aig aon duine chum dreuchd easbuig, tha e miannachadh deadh oibrè.

2 Uime sin is còir do easbuig bhi neo-lochdach, 'na fhear aoin mhnà, faireil, ciallach, deadhbheusach, fialuidh, ealamh gu teagasg;

3 Gun bhi 'na phòitear, gun bhi buailteach, gun bhi déidheil air buannachd shalaich; ach

macanta, neo-thuasaideach, neo-shanntach ;

4 'Na dhuine a riaghlas a thigh féin gu maith, aig am bheil a chlann fo smachd maille ris an uile shuidheachadh-inntinn ;

5 (Oir mur aithne do dhuine a thigh féin a riaghladh, cionnus a ghabhas e cùram do eaglais Dhé?)

6 Gun bhi 'na nuadh-chreideach, air eagal, air dha bhi air atadh le h-uabhar, gu'n tuit e ann an dìteadh an diabhuil.

7 Is còir dha mar an ceudna deadh theisteachas bhi aige uathas an ta'n leth muigh ; air eagal gu'n tuit e ann an scainnil, agus ann an ribe an diabhuil.

8 Mar an ceudna is còir do na deaconaibh *bhi* suidhichte, gun an teagadh bhi leam leat, gun bhi cionail air mòran fìona, gun bhi déidheil air buannachd shal-aich ;

9 A' cumail rùn-diomhair a' chreidimh ann an coguis ghloin.

10 Agus biodh iadsan mar an ceudna air an dearbhadh an toiseach ; agus an sin gnàthaicheadh iad dreuchd deacoin, air dhoibh bhi *air am faghail* neo-choireach.

11 Is amhuil sin *is còir* do na mnàibh bhi suidhichte, gun bhi 'nan luchd-tuaileis ; *ach bhi* measarra, ionraic sna h-uile nithibh.

12 Biodh na deacoin 'nam fir aoin mhnà, a' riaghladh an cloinne, agus an tighe féin gu maith.

13 Oir an dream a ghnàthaich dreuchd deacoin gu maith, tha iad a' cosnadh deadh cheum dhoibh féin, agus dànachd mhòr sa' chreidimh, a tha ann an Iosa Crìosd.

14 Tha mi a' sgrìobhadh nan nithe so a d'ionnsuidh, an dòchas teachd gu grad a d'ionnsuidh :

15 Ach ma nì mi moille, chum gu'm bi fhios agad cionnus is còir dhuìt thu féin a ghiùlan ann an tigh Dhé, nì a's e eaglais an Dé bheò, post agus stéidh-dhaingnich na firinn.

16 Agus gun amharus is mòr rùn-diomhair na diadhachd : dh'fhoillsicheadh Dia san fheoil, dh'fhìreanaicheadh e san spiorad, chunnacas le ainglibh e, shearmonaicheadh e do na Cinnich, chreideadh ann air an t-saoghal, ghabhadh suas e chum gloire.

CAIB. IV.

A NIS a ta an Spiorad ag ràdh gu soilleir, anns na h-aimsiribh deireannach gu'n tréig dream àraidh an creidimh, a' toirt aire do spioradaibh mealltach, agus do theagasgaibh dheamhan ;

2 Tre cheilg bhreugairean, air bhi d'an coguisibh air an losgadh le iarunn dearg ;

3 A' toirmeasg pòsaidh, *agus ag iarraidh* bidheanna a sheachnadh, a chruthaich Dia chum an gabhail maille ri breith-buidheachais leosan a ta creidsinn, agus aig am bheil eòlas na firinn.

4 Oir *is* maith gach nì a chruthaich Dia, agus cha'n ion nì sam bith a dhiùltadh, a ghabhar le breith-buidheachais :

5 Oir a ta e air a naomhachadh le focal Dé agus le h-ùrn-uigh.

6 Ma chuireas tu na nithe so an cuimhne do na bràithribh, bithidh tu a' d' dheadh mhinisteir do Iosa Crìosd, air t'altrum suas ann am briathraibh a' chreidimh, agus an deadh theagaisg, air an do ghabh thu eòlas :

7 Ach diùlt sgeulachda mì-dhiadhaidh shean bhan, agus cleachd thu féin chum diadhachd.

8 Oir a ta an cleachda corp-orra tarbhach chum beag nithe; ach a ta'n diadhachd tarbhach chum nan uile nithe, aig am bheil gealladh na beatha a ta làthair, agus a chum teachd.

9 Is ràdh fìrinneach so, agus is airidh e air gach aon chor air gabhail ris.

10 Oir is ann uime so a ta sinn an dà chuid ri saothair, agus a' fulang maslaidh, do bhrìgh gu bheil dòchas againn san Dia bheò, neach a's e Slànuighear nan uile dhaoine, gu h-àraidh nan creideach.

11 Aithn agus teagaisg na nithe so.

12 Na dèanadh duine sam bith tarcuis air t'òige; ach bì thusa a'd' eisempleir do na creidich, ann am focal, ann an caithe-beatha, ann an gràdh, ann an spiorad, ann an creidimh, ann am fìor-ghloine.

13 Gus an tig mi, thoir an aire do leughaireachd, do earail, do theagasg.

14 Na dearmad an tiodhlac a ta annad, a thugadh dhuit tre fhàidheadaireachd, maille ri leagadh làmh na seanaireachd ort.

15 Smuainich air na nithibh sin; thoir thu féin gu tur dhoibh, chum gu'm bì do theachd air d'aghaidh follaiseach do na huile.

16 Thoir aire dhuit féin, agus do d' theagasg; buanaich anna: oir le so a dhèanamh, saoraidh tu araon thu féin, agus iadsan a tha 'g éisdeachd riut.

CAIB. V.

NA garg-chronaich seanair, ach cuir impidh air mar athair, agus air na h-òig-fhir mar bhràithribh;

2 Na mnàì aosda mar mhàithrichibh, na mnàì òga mar

pheathraichibh, maille ris an uile fhìor-ghloine.

3 Thoir urram do bhantrachaibh a tha 'nam bantrachaibh da rìreadh.

4 Ach ma tha bantrach air bith aig am bheil clann no ogh-achan, fòghlumadh iad air tùs bhì dleasdhanach 'nan tighibh féin, agus ath-dhiol a thoirt d'am pàrantaibh: oir a ta so maith agus taitneach am fianuis Dé.

5 A nis cuiridh ise a ta 'na bantraich da rìreadh, agus air a fàgail 'na h-aonar, a dòchas ann an Dia, agus buanaichidh i a là agus a dh'oidhche ann an ath-chuingibh, agus ann an ùr-nuighibh.

6 Ach ise a tha caitheadh a beatha am macnus, air dh'i bhì beò, tha i marbh.

7 Uime sin aithn na nithe so dhoibh, chum gu'm bì iad neo-lochdach.

8 Ach mur dèan duine solar air son a chuideachd féin, agus gu h-àraidh air son muinntir a theaghlaich, dh'àicheadh e'n creidimh, agus is mìosa e na ana-creideach.

9 Na gabhar bantrach san àireamh a bhios fuidh thrì fich-ead bliadhna dh'aois, a bha 'na mnaoi aoin duine,

10 Air am bheil teistear a thaobh dheadh oibre; ma dh'oil i clann, ma thug i aoidheachd uaipe, ma dh'ionnlaid i cosa nan naomh, ma dh'fhòir i air luchd-àmhghair, ma lean i gu dìchiollach gach deadh obair.

11 Ach diùlt na bantrachan òga: oir an uair a dh'fhàsas iad mear an aghaidh Chrìosd, is miann leo pòsadh;

12 Muinntir a ta fuidh dhìteachd, a chionn gu'n do thréig iad an ceud chreidimh.

13 Agus os bàrr, fòghlumaidh iad bhì diomhanach, a' dol mu'n

cuairt o thigh gu tigh; agus cha'n e mhàin dìomhanach, ach mar an ceudna gabhannach, agus a' gabhail gnothuich ris na nithibh nach buin doibh, a labhairt nithe nach bu chòir dhoibh.

14 Is àill leam uime sin na *mnà* òga a phòsadh, iad a bhreith cloinne, a stiùradh an tighe, agus gun chion-fàth air bith a thoirt do'n eas-caraid labhairt gu toibheumach.

15 Oir a ta cuid a cheana air dol a thaobh an déigh Shatain.

16 Ma tha aig creideach no aig ban-chreideach bantrachan, fòireadh iad orra, agus na biodh an trom air an eaglais; chum gu'n dèan i cabhair orra-san a tha 'nam bantrachaibh da rir-eadh.

17 Measar gur airidh na sean-airean a riaghlas gu maith air urram dùbailte, gu h-àraidh iadsan a tha saothreachadh san fhocal agus ann an teagasg.

18 Oir a ta an sgrìobtuir ag ràdh, Na ceangail beul an daimh a tha saltairt an arbhair: agus, Is airidh an t-oibriche air a thuar-asdal.

19 Na gabh casaid an aghaidh seanair, ach le dithis no triuir do fhianuisibh.

20 Iadsan a tha peacachadh cronaich an làthair nan uile, chum gu'n gabh càch eagal mar an ceudna.

21 Tha mi a' sparradh ort am fianuis Dé, agus an Tighearna Iosa Crìosd, agus nan aingeal taghta, gu'n coimhid thu na nithe so, gun aon a chur roimh neach eile, gun ni air bith a dhèanamh le claon-bhreth.

22 Na leag do làmh a gu h-obann air duine sam bith, agus na biodh comhpàirt agad do pheacaibh dhaoine eile: coimhid thu féin glan.

23 Na h-òl uisge ni's mò, ach

cleachd beagan fìona air son do ghoile, agus t'anmhuinneachd mhinic.

24 Tha peacanna cuid do dhaoineibh follaiseach roimh-làimh, a' dol rompa chum breitheanais; agus tha *peacannadhream* àraidh 'gan leantuinn.

25 Mar an ceudna tha deadh oibre *cuid* follaiseach roimh-làimh; agus na *h-oibre* a ta air ghleus eile, cha'n fheudar am folach.

CAIB. VI.

M EASADH a' mheud 's a ta fuidh 'n chuing 'nan seirbhisich, gur airidh am maighstirean féin air an uile urram; chum nach faigh ainm Dhé, agus a theagasg toibheum.

2 Agus iadsan aig am bheil maighstirean creideach, na dèanadh iad tarcuis orra, air son gur bràithrean iad: ach gu ma feàrr-leo seirbhis a dhèanamh *dhoibh*, do bhrìgh gu bheil iad creideach agus ionmhuinn, 'nan luchd-comhpàirt do thiodhlac a' ghràis. Na nithe so teagaisg agus earailich.

3 Ma bheir aon neach atharrachadh teagaisg uaith, agus nach aontaich e do bhriathraibh fallain, eadhon do bhriathraibh ar Tighearna Iosa Crìosd, agus do'n teagasg, a ta réir na diadhachd:

4 Tha e uaibhreach, gun eòlas aige air ni sam bith, ach e as a chéill mu thimchioll cheisdean, agus bhriathar-chonnsachadh, o'n tig farmad, comhstri, anacainnt, droch amharusan,

5 Fiar-dheas-boireachd dhaoine aig am bheil inntinn thruaillidh, agus as eugmhais na firinn, a' meas gur buannachd an diadhachd: dealaich ri an leithidibh sin.

6 Ach is buannachd mhòr an

diadhachd maille ri toileachas-inntinn.

7 Oir cha d' thug sinn ni air bith *leinn* do'n t-saoghal *so*, agus *is* soilleir nach urrainn sinn ni sam bith thoirt as.

8 Uime sin air dhuinn biadh agus eudach a bhi againn, bith-eamaid toilichte leo sin.

9 Ach an dream le'n àill bhi beartach, tuitidh iad ann am buaireadh, agus ann an ribe, agus *ann* an iomadh ana-miann am-aideach agus ciurrail, a bhàthas daoine ann am milleadh agus ann an sgrios.

10 Oir is e gaol an airgid freumh gach uile: ni am feadh a mbiannaich dream àraidh, chaidh iad air seacharan o'n chreidimh, agus throimh-lot siad iad féin le iomadh cràdh.

11 Ach thusa, O òglaich Dhé, teich o na nithibh sin: agus lean fireantachd, diadhachd, creidimh, gràdh, foighidin, ceann-sachd.

12 Còmhraig deadh chòmhrag a' chreidimh, gabh greim do'n bheatha mhaireannaich, chum mar an ceudna an do ghairmeadh thu, agus dh'aidich thu deadh aidmheil an làthair mhòran fhianuisean.

13 Tha mi a' sparradh ort ann am fianuis Dé, a bheothaicheas na h-uile nithe, agus *am fianuis* Iosa Crìosd, a rinn fianuis air deadh aidmheil an làthair Phontiuais Philait;

14 Thu choimhead na h-àithne *so* gun smal, gun lochd, gu teachd ar Tighearna Iosa Crìosd:

15 Ni, 'na àmaibh féin, a dh'fhoillsicheas an tì a ta beannaichte, agus a mhàin cumhachdach, Rìgh nan rìgh agus Tighearna nan tighearna;

16 Neach 'na aonar aig am bheil neo-bhàsmhorachd, a ta 'na chòmhnuidh san t-solus dh'ionnsuidh nach feudar teachd; neach nach faca duine sam bith, agus nach mò dh'fheudas e fhaicinn: dhasan *gu robh* uram agus cumhachd sìorruidh. Amen.

17 'Thoir àithne do na daoineibh a ta saoibhir san t-saoghal *so*, gun iad a bhi àrd-inntinneach, agus gun dòchas a chur ann an saoibhreas neo-chinnteach, ach anns an Dia bheò, a tha toirt duinn nan uile nithe gu saoibhir r'am mealtuinn:

18 Iad a dhèanamh maith, iad a bhi saoibhir ann an deadh oibribh, ealamh gu roinn, comhpàirteach;

19 A' tasgaidh suas doibh féin deadh bhunait fa chomhair an àm ri teachd, chum gu'n dèan iad greim air a' bheatha mhaireannaich.

20 O Thimoteuis, coimhid an ni sin a dh'earbhadh riut, a' seachnadh faoin-chòmhraidh mhi-naomha, agus comh-chogadh eòlais d'an toirear gu breugach an t-ainm sin.

21 Ni air bhi do dhream àraidh ag aidmheil, chaidh iad air seacharan thaobh a' chreidimh. Gràs *gu robh* maille riut. Amen.

DARA LITIR AN ABSTOIL PHOIL CHUM THIMOTEUIS.

CAIB. I.

POL abstol Iosa Crìosd tre thoil Dé, a réir geallaidh na beatha, a tha ann an Iosa Crìosd.

2 Gu Timoteus *mo* mhac gràdhach: Gràs, tròcair, agus sìth o Dhia an t-Athair, agus o Iosa Crìosd ar Tighearn.

3 Tha mi toirt buidheachais do Dhia, do'm bheil mi a' dèanamh seirbhis o *m'* shinnsiribh le coguis ghloin, gu bheil agam cuimhne ortsa a ghnàth a là agus a dh'oidhche ann am ùrnuighibh;

4 Air dhomh bhi ro-thogarrach air thusa fhaicinn, a' cuimhneachadh do dheur, chum gu'm bì mi air mo lìonadh le gairdeachas;

5 'Nuair a chuimhnichas mi an creidimh neo-chealgach a tha annad-sa, a chòmhnuich air tùs a' d' shean-mhàthair Lois, agus a' d' mhàthair Eunice: agus is deimhin leam a tha annad-sa mar an ceudna.

6 Air an aobhar so tha mi cur an cuimhne dhuit, thu dh'ath-bheothachadh tiodhlaic Dhé, a tha annad tre chur mo làmh-sa ort.

7 Oir cha d'thug Dia dhuinne spiorad na geilt; ach *spiorad* a' chumhachd, agus a' ghràidh, agus na h-inntinn fhallain.

8 Uime sin na gabh-sa nàire do fhianuis ar Tighearna, no dhiom-sa a phrìosanach: ach biodh do chuid agad do àmhghar an t-soisgeil, a réir cumhachd Dhé;

9 A shaor sinne agus a ghairm *sinn* le gairm naomh, cha'n ann a réir ar n-oibre, ach a réir a

rùin féin, agus a ghràis a thugadh dhuinne ann an Iosa Crìosd, roimh thoiseach an t-saoghail;

10 Ach a dh'fhoillsicheadh a nis troimh theachd ar Slànuighir Iosa Crìosd, a chuir as do'n bhàs, agus a thug beatha agus neo bhàsmhorachd chum soluis, tre an t-soisgeul;

11 Chum an d'òrduicheadh mise a'm' shearmonaiche, agus a'm' abstol, agus a'm' fhear-teagaisg nan Cinneach:

12 An t-aobhar air son am bheil mi mar an ceudna a' fulang nan nithe so: gidheadh cha'n 'eil nàire orm: oir a ta fhios agam co ann a chreid mi, agus is dearbh leam gu bheil e-san comasach air an ni sin a dh'earb mi ris a choimhead fa chomhair an là sin.

13 Cum gu daingean samh-ladh fìrinneach nam briathar fallain, a chuala tu uam-sa, ann an creidimh agus ann an gràdh a ta ann an Iosa Crìosd.

14 Coimhid an taisgeach maith sin a dh'earbadh riut, tre an Spiorad naomh, a tha chòmh-nuidh annainn.

15 Tha fhios so agad, gu'n do phill iadsan uile a tha san Asia uam-sa; d'am bheil Phigellus agus Hermogenes.

16 Gu'n tugadh an Tighearn tròcair do theaghlach Onesiph-oruis; oir is minic a thug e sòlas dhomh-sa, agus cha do ghabh e nàire do m' shlabhraidh.

17 Ach an uair a bha e san Ròimh dh'iarr e mach mi gu dìchiollach, agus fhuair e *mi*.

18 Gu deònaicheadh an Tighearn dhasan gu'm faigh e tróc-

air o'n Tighearn san là sin: agus a ta sàr-fhios agad, cia lìon nithe anns an d'rinn e frithealadh dhomh-sa ann an Ephesus.

CAIB. II.

UIME sin bi-sa, a mhic, làidir anns a' ghràs a ta ann an Iosa Crìosd.

2 Agus na nithe a chuala tu uam-sa am measg mhòran fhianuisean, earb thusa na nithe sin féin ri daoineibh fìrinneach, a bhios iomchuidh gu daoine eile a theagasg mar an ceudna.

3 Fuiling thusa uime sin cruaidh-chas, mar dheadh shaighdear Iosa Crìosd.

4 Cha dèan neach sam bith a leanas an cogadh e féin a ribeadh ann an gnothuichibh na beatha so: chum gu'n toilich e an tì a thagh e gu bhi 'na shaighdear.

5 Agus mar an ceudna ged nì fear air bith spairn, cha chrùnar e mur dèan e spairn gu dlìgheach.

6 Is còir do'n treabhaiche a shaoithricheas air tùs, comhroinn fhaotainn do'n toradh.

7 Smuainich air na nithibh a ta mi ag ràdh; agus gu tugadh an Tighearna dhuit tuigse anns na h-uile nithibh.

8 Cuimhnich gu'n do thogadh o na marbhaibh Iosa Crìosd, do shìol Dhaibhidh, a réir mo shoisgeil-sa;

9 Air son am bheil mise a' fulang mar fhear droch-bheirt, *eadhon* gu geimhlibh; ach cha'n 'eil focal Dé ceangailte.

10 Uime sin tha mi ag iomchar nan uile nithe air son nan daoine taghta, chum gu'm faigh iadsan mar an ceudna an t-slàinte a tha ann an Iosa Crìosd, maille ri glòir shìorruidh.

11 Is ràdh fìor so, Ma bhàs-aicheas sinn maille ris, gu'm bi

sinn beò mar an ceudna maille ris:

12 Ma dh'fhuilgeas sinn, rìghichidh sinn mar an ceudna maille ris: ma dh'àicheadhas sinn e, àicheadhaidh e-san sinne mar an ceudna.

13 Mur creid sinne, gidheadh tha e-san a' fantuinn fìrinneach; cha'n 'eil e'n comas da e féin àicheadh.

14 Cuir na nithe sin an cuimhne dhoibh, a' cursparraidh orra am fianuis an Tighearna, gun iad a bhi connachadh mu fhoclaibh anns nach 'eil tairbhe sam bith, *ach* a thilgeas bun os ceann an luchd-éisdeachd.

15 Dèan dìchioll air thu féin a nochdadh dearbhta do Dhia, a'd' shaothraiche, nach ruig a leas nàire a ghabhail, a' roinn focail na fìrinn gu ceart.

16 Ach seachainn faoinchainnt mhì-naomha; oir théid iad air aghaidh chum an tuilleadh mì-dhiadhachd.

17 Agus ithidh am focal mar chnàmhuinn; d'am bheil Himeneus agus Philetus;

18 Muinntir thaobh na fìrinn a chaidh air seacharan, ag ràdh gu'n deachaidh an aiseirigh cheana seach; agus a ta tilgeadh creidimh dream àraidh bun os ceann.

19 Gidheadh, a ta bunait Dhé a' seasamh daingean, aig am bheil an seula so, Is aithne do'n Tighearn an dream sin a's leis. Agus, Gach neach a tha 'g ainmeachadh ainm Chrìosd, tréigeadh e eucoir.

20 Ach ann an tigh mòr cha'n e mhàin gu bheil soithichean òir, agus airgid, ach mar an ceudna *soithiche* fiodha, agus creadha; agus cuid diubh chum urraim, agus cuid eile chum eas-urraim.

21 Uime sin ma ghlanas neach

e féin uatha so, bithidh e 'na shoitheach chum urraim, air a naomhachadh, agus iomchuidh chum feim a' mhaighstir, deas chum gach uile dheadh oibre.

22 Teich uime sin o ana-miannaibh na h-òige: ach lean fireantachd, creidimh, gràdh, sìth, maille riu-san a ta gairm air an Tighearn o chridhe glan.

23 Ach seachainn ceisdean amaideach agus neo-fhòghluimte, air dhuit fios a bhi agad gu'n tog iad connsaichean.

24 Agus cha'n fheadh òglach an Tighearn bhi conspoideach; ach ciuin ris na h-uile dhaoineibh, ealamh chum teagaisg, foighidneach,

25 Ann an ceannsachd a' teagasg na dream a sheasas 'na aghaidh; dh'fheuchainn an toir Dia uair air bith aithreachas dhoibh, chum aidmheil na firinn.

26 Agus air mosgladh dhoibh gu'n téid iad as o ribe an diabhuil, aig am bheil iad air am beòghlacadh chum a thoile.

CAIB. III.

ACH biodh fhios so agad, gu'n tig anns na làithibh deireannach aimsire cunnartach.

2 Oir bithidh daoine féinspeiseil, sanntach, ràiteachail, uaibhreach, toibheumach, eas-ùmhail do phàrantaibh, mì-thaingeil, mì-naomba,

3 Gun ghràdh nàdurra, 'nan luchd brisidh coimhcheangail, tuaileasach, neo-gheamnuidh, borb, gun ghaol do'n mhaith,

4 Fealltach, ceann-laidir, àrdanach, aig am bheil bàrr gràidh do shàimh na ta aca do Dhia;

5 Aig am bheil coslas diadhachd, ach a ta 'g àicheadh a cumhachd: o'n leithidibh sin tionndadh-sa air falbh.

6 Oir is ann diubh so a ta 'n dream sin a dh'éalaidheas a stigh

do thighibh, agus a bheir leo am braighdeanas mnàì shuarach air an uallachadh le peacaibh, air an iomain le iomadh gnè ana-mianna,

7 A' sìr-fhòghlum, agus gun chomas doibh gu bràth teachd chum eòlais na firinn.

8 Agus mar a chuir Iannes agus Iambres an aghaidh Mhaois, mar sin tha iadsan a' cur an aghaidh na firinn: daoine aig am bheil iontinn thruaillidh, gun tuigse thaobh a' chreidimh.

9 Ach cha téid iad ni's faide air an aghaidh: oir bithidh am mì-chiall follaiseach do na h-uile *dhaoineibh*, mar a bha am *mì-chiall-san* mar an ceudna.

10 Ach a ta làn-fhios agad air mo theagasg-sa, *mo* gbnè beatha, *mo* rùn, *mo* chreidimh, *m'* fhad-fhulangas, *mo* sheirc, *m'* fhoighidin,

11 *Mo* gheur-leanmhuinnibh, *m'*fhulangais a thàinig orm ann an Antioch, ann an Iconium, ann an Listra; ciod e meud nan geur-leanmhuinn a ghiùlain mi: ach asda uile shaor an Tighearn mi.

12 Seadh, fuilgidh iadsan uile leis an àill am beatha a chaith-eadh gu diadhaidh ann an Iosa Crìosd, geur-leanmhuinn.

13 Ach fàsaidh droch dhaoine agus mealltairean ni's miosa agus ni's miosa, a' mealladh, agus air am mealladh.

14 Ach buanach thusa anns na nithibh a dh'fhòghluim thu, agus air an d'rinneadh thu dearbh-fhiosrach, air dhuit fios a bhi agad cia uaith a dh'fhòghluim thu *iad*;

15 Agus o bha thu a'd' leanabh gu'm b' aithnè dhuit na sgriobtuire naomba, a tha comasach air do dhèanamh glie chum slàinte, tre'n chreidimh a ta ann an Iosa Crìosd.

16 *Tha* an sgrìobtuir uile air a dheachdadh le Spiorad Dé, agus *tha* e tarbhach chum teagaisg, chum spreige, chum leasachaidh, chum oilein ann am fireantachd :

17 Chum gu'm bì òglach Dhé coimhlionta, làn deas chum gach uile dheadh oibre.

CAIB. IV.

THA mi a' sparradh ort uime sin am fianuis Dé, agus an Tighearna Iosa Crìosd, a bheir breth air na beothaibh agus air na marbhaibh, aig a theachd dealrach, agus *ann* a rìoghachd :

2 Searmonaich am focal, bì dùrachdach ann an àm agus ann an an-àm ; spreig, cronaich, earailich leis an uile fhad-fhulangas agus theagasg.

3 Oir thig an t-àm anns nach bì fulang aca air teagasg fallain : ach air do chluasaibh tachasach bhi aca, carnaidh iad suas dhoibh féin luchd-teagaisg a réir an anamiana ;

4 Agus tionndaidh iad an cluasan o'n fhirinn, agus iompachear iad chum sgeulachda faoine.

5 Ach dèan thusa faire anns na h-uile nithibh, fuiling cruaidh-chas, dèan obair soisgeulaiche, coimhlion do mhinistireileachd.

6 Oir tha mise nis gu bhi air m'lobradh, agus tha àm mo shiubhail am fagus.

7 Chòmhraig mi an deadh chòmhrag, chriochnaich mi *mo* thurus, ghléidh mi an creidimh.

8 O so mach taisgear fa m' chomhair crùn fireantachd, a bheir an Tighearn, am breith-eamh cothromach, dhomh san là ud : agus cha'n ann dhomh-sa a mhàin, ach dhoibh-san uile mar an ceudna, leis an ionmhuinn a theachd-san.

9 Dèan do dhìchioll air teachd a m' ionnsuidh gu luath :

10 Oir thréig Demas mi, air dha an saoghal so a ta làthair a ghràdhachadh, agus chaidh e do Thesalonica ; Crescens do Ghalatia, Titus do Dhalmatia.

11 Tha Lucas 'na aonar maille rium. Gabh Marcus agus thoir leat e : oir tha e feumail dhomh-sa chum na ministreileachd.

12 Ach chuir mi Tichicus gu h-Ephesus.

13 An fhalluing a dh'fhàg mi ann an Troas aig Carpus, 'nuair a thig thu, thoir *leat*, agus na leabhraichean, ach gu h-àraidh na meambrana.

14 Rinn Alecsander an ceard-umha iomadh olc orm : gu tugadh an Tighearn dha a réir a ghnìomhara :

15 Bì thusa mar an ceudna air t'fhaicill uaith, oir chuir e gu mòr an aghaidh ar briathar-ne.

16 Aig mo cheud fhreagradh cha robh aon neach leam, ach thréig na h-uile mi : nar agrar orra e.

17 Gidheadh, sheas an Tighearn làimh rium, agus neartaich e mi ; chum triom-sa gu'm biodh an searmonachadh air a làn-fhoillseachadh, agus gu'n cluinn-eadh na Cinnich uile e : agus shaoradh mi á beul an leòmhain.

18 Agus saoraidh an Tighearn mi o gach uile dhroch obair, agus gleidhidh e mi chum a rìoghachd nèamhaidh féin : dha-san *gu robh* glòir gu saoghal nan saoghal. Amen.

19 Cuir fàilte air Prisca, agus air Acuila, agus air teaghlach Onesiphorus.

20 Dh'fhan Erastus ann an Corintus : ach dh'fhàg mi Trophimus gu tinn ann am Miletum.

21 Dèan dìchioll air teachd

roimh 'n gheamhradh. Tha Eubulus, agus Pudens, agus Linus, agus Claudia, agus na bràithrean uile a' cur fàilte ort.

22 *Gu robh an Tighearn Iosa Crìosd maille ri d' spiorad. Gràs maille ribh. Amen.*

LITIR AN ABTSOIL PHOIL CHUM THITUIS.

CAIB. I.

POL seirbhiseach Dhé, agus abstol Iosa Crìosd, a réir creidimh *dhaoine* taghta Dhé, agus aidmheil na firinn a ta réir diadhachd :

2 Ann an dòchas na beatha maireannaich, a gheall Dia, do nach comasach breug a dhèanamh, roimh chruthachadh an t-saoghail ;

3 Ach dh'fhoillsich e 'fhocal féin, ann an àm iomchuidh tre shearmonachadh, a dh'earbadh rium-sa, a réir àithne Dhé ar Slànuighir :

4 Chum Thituis *mo* dhearbhmhic féin a réir a' chreidimh choitchionn : Gràs, tròcair, agus sìth o Dhia an t-Athair, agus o'n Tighearn Iosa Crìosd ar Slànuighear.

5 Air a shon so dh'fhàg mi thu ann an Crete, chum gu'n cuireadh tu 'n òrdugh na nithe a dh'fhàgadh gun dèanamh, agus gu'n suidhicheadh tu seanairean anns gach baile, a réir mar a dh'àithn mise dhuit.

6 Ma tha neach sam bith neo-lochdach, 'na dhuine aoin mhnà, aig am bheil a chlann creideach, nach 'eil fuidh mhì-chliu thaobh ana-caitheimh, no eas-ùmhail :

7 Oir is còir do easbuig a bhi neo-choireach, mar stiùbhard Dhé ; gun bhi féin-thoileil, no feargach, no òlmhar, no buailt-

each, no cionail air buannachd neòghloin ;

8 Ach aoidheil, déidheil air daoineibh maithe, ciallach, cothromach, naomh, measarra ;

9 A' cumail an fhocail fhìor gu daingean a réir teagaisg, chum gu'm bi e comasach le teagasg fallain, araon earail a thabhairt, agus an dream a sheasas 'na aghaidh a chur as am barail.

10 Oir a ta mòran ann a tha mì-riaghailteach, a labhras gu diomhain, agus a tha 'nam mealltairibh, gu h-àraidh iadsan a tha do'n timchioll-ghearradh :

11 Muinntir a's còir am beul a dhruideadh, dream a tha tionndadh thighean iomlan bun os ceann, a' teagasg nan nithe nach còir, air ghaol buannachd shal-aich.

12 Thubhairt neach àraidh dhiubh féin, eadhon fàidh dhiubh féin, *Is* breugairean a ghnàth na Cretich, droch fhiadh-bheathaichean, builg mhall.

13 Tha an fhianuis so fìor : air an aobhar sin cronaidh gu geur iad, chum gu'm bi iad fallain sa' chreidimh ;

14 Gun bhi toirtaire do fhaoinsgeulachdaibh Iudhach, agus do àitheantaibh dhaoine, a thionndaidheas o'n fhìrinn.

15 Oir gu deimhin tha na h-uile nithe glan do'n dream a ta glan : ach dhoibh-san a ta salach,

agus mì-chreideach, *cha'n'eilaon* ni glan; ach tha an inntinn agus an coguis féin air an salachadh.

16 Tha iad a' gabhail orra eòlas a bhi aca air Dia; ach ann an oibribh tha iad 'ga àicheadh, air dhoibh bhi gràineil, agus eas-ùmhail, agus a thaobh gach deadh oibre as eugmhais tuigse.

CAIB. II.

ACH labhair thusa na nithe a thig ri teagasg fallain:

2 *Eadhon* na daoine aosda bhi aireach, suidhichte, measarra, fallain sa' chreidimh, ann an gràdh, ann am foighidin:

3 Mar an ceudna na mnàì aosda *bhi* 'nan giùlan mar is cubhaidh do naomhachd, gun bhi 'nan luchd-tuaileis, gun bhi trom air fìon, bhi 'nan luchd-teagaisg air nithibh maithe;

4 Chum gu'n teagaisg iad na mnàì òga bhi ciallach, gràdhach air am fearaibh, gràdhach air an cloinn,

5 *Bhi* eagnuidh, geamnuidh, fantuinn aig an tigh, *bhi* maith, ùmhail d'am fearaibh chum nach faigh focal Dé mì-chliu.

6 Cuir impidh air na daoineibh òga mar an ceudna, iad bhi ciallach.

7 Anns na h-uile nithibh 'gad nochdadh féin ann ad eisempleir dheadh oibre: ann an teagasg a' nochdadh neo-thruaillidheachd, suidheachadh inntinn, tréibh-dhireis,

8 Càinnt fhallain nach fheudar a dhìtheadh; chum gu'm bì nàire air an neach a ta 'nur n-aghaidh, a chionn nach 'eil droch ni sam bith aige r'a labhairt umaibh.

9 *Earailich* seirbhisich bhi ùmhail d'am maighstiribh féin, agus an deadh-thoileachadh anns na h-uile nithibh: gun bhi a' labhairt 'nan aghaidh;

10 Gun bhi a' cèileachadh aon ni d'an cuid; ach a' nochdadh gach uile dheadh thairisneachd; chum gu'n dèan iad teagasg Dhé ar Slànuighir mais-each anns na h-uile nithibh.

11 Oir dh'fhoillsicheadh gràs slàinteil Dhé do nah-uile dhaoineibh,

12 A' teagasg dhuinn gach mì-dhiadhachd agus ana-mianna saoghalta àicheadh, agus ar beatha a chaitheadh gu stuama, gu cothromach, agus gu diadhaidh anns an t-saoghal so làth-air;

13 Air dhuinn sùil a bhi ag-ainn ris an dòchas bheannaichte sin, eadhon foillseachadh glòire an Dé mhòir, agus ar Slànuighir Iosa Crìosd:

14 A thug e féin air ar son, chum gu'n saoradh e sinn o gach aingidheachd, agus gu'n glanadh e dha féin sluagh sònruichte, eudmhor mu dheadh oibribh.

15 Na nithe so labhair, agus earailich, agus cronaich leis an uile ùghdarras. Na dèanadh duine sam bith tàir ort.

CAIB. III.

CUIR an cuimhne dhoibh bhi ùmhail do uachdaranachdaibh agus do chumhachdaibh, freagarrach do luchd-riaghlaidh, ullamh chum gach uile dheadh oibre.

2 Gun olc a labhairt mu neach air bith, bhi neo-thuasaideach, mìn, a' taisbeanadh an uile cheannsachd do na h-uile dhaoineibh.

3 Oir bha sinne féin uair-éigin eu-céillidh, eas-ùmhail, air seacharan, a' dèanamh seirbhis do iomadh gnè do ana-miannaibh agus do an-toilibh, a' caitheadh ar beatha ann am mì-run agus am farmad, fuath-thoillteannach, agus a' toirt fuath d'a chéile.

4 Ach an uair a dh'fhoillsicheadh caoimhneas agus gràdh Dhé ar Slànuighir do dhaoibh,

5 Cha'n ann o oibribh fìrean-tachd a rinn sinne, ach a réir a thròcair féin shaor e sinn, tre ionnlad na h-ath-ghineamhuinn, agus ath-nuadhachadh an Spioraid naoimh :

6 A dhòirt e oirnne gu saobhair, tre Iosa Crìosd ar Slànuigh-eir;

7 Chum air dhuinn bhi air ar fireannachadh tre a ghràs-san, gu'm bitheamaid air ar dèanamh 'nar n-oighreachaibh a réir dòchais na beatha maireannaich.

8 Is fìor an ràdh so, agus is àill leam thu thoirt dearbh-chinntte air na nithibh sin, chum gu'm biodh iadsan a chreid ann an Dia, cùramach air toiseach a bhi aca ann an deadh oibribh: oir tha na nithe so maith agus tarbhach do dhaoibh.

9 Ach seachainn ceisdean amaideach, agus sloinntaireachd, agus connspoidean, agus conn-sachadh mu'n lagh; oir tha iad gun tairbhe agus diomhain.

10 Duine a ta 'na shaobh-chreideach, an déigh na ceud agus an dara comhairle ciùlt:

11 Air do fhios bhi agad gu bheil a leithid sin do dhuine air a chur bun os ceann, agus gu bheil e a' peacachadh, air dha bhi air fhéin-dhiteadh.

12 'Nuair a chuireas mi Artemas a d'ionnsuidh, no Tichicus, dèan dìchioll air teachd a m'ionnsuidh gu Nicopolis: oir is ann an sin a chuir mi romham an geamhradh a chaitheadh.

13 Thoir Senas am fear-lagha agus Apollos air an aghaidh san t-slighe gu dùrachdach, chum nach bì ni air bith dh'uireas-bhuidh orra.

14 Agus fòghlumadh armuinn-tir-ne mar an ceudna deadh oibre a dhèanamh gu dùrachdach fa chomhair ghnàthachadh feumail, chum nach bì iad neotharbhach.

15 Tha'n dream a ta maille rium uile a' cur fàilte ort. Cuir fàilte orra-san, le'n ionmhuinn sinne sa' chreidimh. Gràs maille ribh uile. Amen.

LITIR AN ABSTOIL PHOIL CHUM PHILEMOIN.

CAIB. I.

P**O****L**, prìosanach Iosa Crìosd, agus Timoteus ar bràthair, chum Philemoin a's ionmhuinn leinn, agus ar comh-shaothraiche,

2 Agus chum Aphia ionmhuinn, agus Archipuis ar comh-shaighdear, agus chum na h-eaglais a ta ann do thigh:

3 Gràs gu robh dhuibh, agus sìth o Dhia ar n-Athair, agus o'n Tighearn Iosa Crìosd.

4 Tha mi a' toirt buidheachais do m' Dhia, a' sìr-thoirt luaidh ort-sa ann am ùrnuighibh,

5 Air dhomh bhi cluinntinn mu d' ghràdh, agus chreidimh, a tha agad a thaobh an Tigh-earna Iosa, agus a thaobh nan uile naomh;

6 Chum gu'm bì comh-cho-munn do chreidimh éifeachdach ann an aidmheil an uile mhaith a tha annaibh ann an Iosa Crìosd.

7 Oir tha subhachas ro mhòr agus comh-fhurtachd againne ann do ghràdh-sa, do bhrìgh gu bheil innigh nan naomh air faotainn suaimhneis tromhad-sa, a bhràthair.

8 Uime sin ged fheudainn bhì ro dhàna ann an Crìosd, chum an nì a ta iomchuidh àithneadh dhuitse,

9 Gidheadh is feàrr leam air son gràidh impidh chur ort, air bhì dhomh mar Phòl aosda, agus a nis mar an ceudna a'm phrìosanach air son Iosa Crìosd.

10 Guidheam ort air son mo mhic Onesimuis, a ghin mi ann am gheimhlibh:

11 Neach a bha uair-éigin neo-tharbhach dhuitse, ach a nis a tha tarbhach dhuitse agus dhomh-sa:

12 Neach a chuir mi air ais: uime sin gabh-sa ris mar ri m'innigh féin.

13 Neach bu mhiann leam a chumail maille rium féin, chum gu'n dèanadh e frithealadh dhomh ann ad àite-sa, ann an geimhlibh an t-soisgeil:

14 Ach as eugmhais t' inntinn-sa cha bu toil leam nì sam bith a dhèanamh; chum nach biodh do mhaith-sa mar gu b'ann a dh'aindeoin, ach o d' thoil féin.

15 Oir theagamh gur ann air a shon so a dh'fhàg e thu rè tamuill, chum gu'm faigheadh tu e gu sìorruidh;

16 Cha'n ann á so suas mar

sheirbhiseach, ach os ceann seirbhisich, 'na bhràthair gràdhach, gu h-àraidh dhomh-sa, agus nach mò na sin dhuitse, araon anns an fheoil, agus anns an Tighearn?

17 Uime sin ma mheasas tu mise mar fhear comh-roinne, gabh ris-san mar rium féin.

18 Agus ma rinn e eucoir ort, no ma dhligheas e nì sam bith dhuit, cuir sin as mo leth-sa.

19 Sgrìobh mise. Pòl le m' làimh féin e, agus dìolaidh mi e: ged nach 'eil mi ag ràdh riut, gu'n dlighear leat thu féin os bàrr dhomh.

20 Seadh, a bhràthair, faigheam gairdeachais do d' thaobh san Tighearn: dèan suaimhneach mo chridhe san Tighearn.

21 Air dhomh bhì earbsach á d' ùmhlachd sgrìobh mi a d' ionnsuidh, oir tha fhios agam gu'n dèan thusa mar an ceudna nì's mò na a ta mi ag ràdh.

22 Ach maille ri so ulluich mar an ceudna fardoch air mo shon: oir tha dòchas agam, tre bhuir n-ùrnuighibh-sa, gu'n toir-ear mi dhuibh.

23 Tha Epaphras mo chomh-phrìosanach ann an Iosa Crìosd,

24 Marcus, Aristarchus, Demas, Lucas, mo chomh-luchd-oibre, a' cur fàilte ort.

25 Gràs ar Tighearna Iosa Crìosd gu robh maille ri 'ur spiorad-sa. Amen.

LITIR AN ABSTOIL PHOIL CHUM NAN EABHRUIDHEACH.

CAIB. I.

DIA, a labhair o shean gu minic, agus air iomadh

dòigh ris na h-aithrichibh leis na fàidhibh,

2 Labhair e anns na làithibh

deireannach so ruinne tre *a* Mhac, a dh'òrduich e 'na oighre air na h-uile nithibh, tre'n do chruthaich e fòs na saoghail.

3 Neach air bhi dha 'na dhealradh *a* ghloire-san, agus 'na fhìor ìomhaigh a phearsa, agus a' cumail suas nan uile nithe le focal a chumhachd, 'nuair a ghlan e ar peacanna troimh féin, shuidh e air deas làimh na mòrachd anns na h-àrdaibh :

4 Air dha bhi air a dhèanamh ni's ro òirdheirce na na h-aingil, mheud 's gu'n d' fhuair e mar oighreachd ainm bu ro fheàrr na iadsan.

5 Oir cò do na h-aingil ris an dubhairt e uair air bith, ls tu mo Mhac-sa, an diugh ghin mi thu? agus a rìs, Bithidh mise a'm' Athair dha-san, agus bithidh e-san 'na Mhac dhomh-sa.

6 Agus a rìs, 'nuair a tha e a' tabhairt a' cheud-ghin a steach do'n t-saoghal, a ta e ag ràdh, Agus dèanadh uile aingil Dé aoradh dha.

7 Agus a thaobh nan aingeal a ta e ag ràdh, Neach a ta dèanamh 'aingle 'nan spioradaibh, agus a mhinisteirean 'nan lasair theine.

8 Ach ris a' Mhac *a ta e ag ràdh*, *Tha* do rìgh-chaithir, a Dhé, gu saoghal nan saoghal; is slat-rioghail ro chothromach slat do rioghachd-sa :

9 Ghràdhaich thu fìreantachd, agus thug thu fuath do aingidheachd; uime sin dh'ùng Dia, do Dhia-sa, thu le oladh aoibhneis os ceann do chompanacha.

10 Agus, Leag thusa, a Thighearn, bunaite na talmh-ainn air tùs; agus is iad na nèamba oibre do làmh :

11 Teirgidh iadsan, ach mairidh tusa: agus fàsaidh iad uile sean mar eudach ;

12 Agus fillidh tu iad mar bhrat, agus caochlaidhear iad: ach is tusa an Tì ceudna, agus cha'n fhàilnich do bhliadhnachan.

13 Ach cò do na h-ainglibh ris an dubhairt e uair air bith, Suidh air mo dheas-làimh, gus an cuir mi do naimhde 'nan stòl-chos fo d'chosaibh?

14 Nach spiorada frithealaidh iad uile, air an cur a mach chum frithealaidh dhoibh-san a bhios 'nan oighreachaibh air slàinte?

CAIB. II.

UIME sin is còir dhuinn an ro thuilleadh aire a thoirt do na nithibh a chuala sinn, air eagal uair sam bith gu'n leig-eamaid ruith leo.

2 Oir ma bha am focal a labhradh le h-ainglibh seasmhach, agus gu'n d'fhuair gach uile bhriseadh agus eas-ùmhachd diolthuarasdal dligeach ;

3 Cionnus a théid sinne as, ma nì sinn dìmeas air slàinte co mòr, a thòisich air tùs air bhi air a labhairt leis an Tighearn, agus a rinneadh dearbhta dhuinne leo-san a chual e ;

4 Air bhi do Dhia a' dèanamh comh-fhianuis leo, araon le comharaibh agus le h-iongantasaibh, agus le feartaibh eugsamhla, agus le tiodhlacaibh an Spioraid naoimh, a réir a thoile féin?

5 Oir cha do chuir e fo cheannsal nan aingeal an saoghal ri teachd, mu'm bheil sinn a' labhairt.

6 Ach rinn neach fianuis ann an ionad àraidh, ag ràdh, Ciod e an duine gu'n cuimhnicheadh tu air? no mac an duine gu'm fiosraicheadh tu e?

7 Rinn thu e rè tamuill bhig ni's isle na na h-aingil; chrùn thu e le glòir agus le h-urram,

agus chuir thu e os ceann oibre do làmh :

8 Chuir thu na h-uile nithe sìos fuidh a chosaibh. Oir ann an cur nan uile nithe fuidh dha, cha d'fhàg e ni air bith gun chuir fuidhe. Ach a nis cha'n 'eil sinn a' faicinn nan uile nithe fathast air an cur f'a cheannsal.

9 Ach chì sinn Iosa, a rinn-eadh rè ùine bhig ni b'isle na na h-aingil, chum tre ghràs Dé gu'm blaiseadh e bàs air son gach uile dhuine, tre fhulang a' bhàis air a chrùnadh le glòir agus le h-urram.

10 Oir b'iomchuidh dhasan, air son *am bheil* na h-uile nithe, agus tre'm *bheil* na h-uile nithe, ann an tabhairt mhòran mhac chum glòire, ceannard an slàinte a dhèanamh foirfe tre fhulangsaibh.

11 Oir *a ta* araon an Tì a naomhaicheas, agus iadsan a naomhaichear, uile o aon: air an aobhar sin cha nàr leis bràithrean a ghairm diubh,

12 Ag ràdh, Cuiridh mi t'ainm an céill do m' bhràithribh, ann am meadhon na h-eaglais seinnidh mi cliù dhuith.

13 Agus a rìs, Cuiridh mi mo dhòchas ann. Agus a rìs, Feuch mise, agus a' chlann a thug Dia dhomh.

14 Uime sin, mheud gu bheil aig a' chloinn comh-roinn do fheoil agus do fhuil, ghabh e-san mar an ceudna roinn diubh sin; chum tre'n bhàs gu'n claoidheadh e e-san, aig am bheil cumhachd a' bhàis, 'se sin, an diabhl;

15 Agus gu'n saoradh e iadsan a bha tre eagal a' bhàis rè an beatha uile fo dhaorsa.

16 Oir gu deimhin cha do ghabh e *nàdur* nan aingeal air; ach ghabh e sìol Abrahaim air.

17 Uime sin b'fheumail da

anns na h-uile nithibh bhi air a dhèanamh cosmhuil r'a bhràithribh; chum gu'm biodh e 'na àrd-shagart tròcaireach agus dìleas ann an nithibh a thaobh Dhé, chum réite a dhèanamh air son pheacanna an t-sluaigh:

18 Oir a mheud gu'n d'fhuiling e féin, air dha bhi air a bhuaireadh, is comasach e air cabhair a dhèanamh orra-san a ta air am buaireadh.

CAIB. III.

UIME sin, a bhràithre naomha, *a ta* 'nur luchd-comhpàirt do n ghairm nèamhaidh, thugaibh fa' near Iosa Crìosd, abstol agus àrd-shagart ar n-aidmheil;

2 A bha dìleas dhasan a dh'òrduich e, amhuil a bha Maois mar an ceudna 'na thigh-san uile.

3 Oir mheasadh gu'm b'airidh an Tì so air glòir bu mhò na Maois, mheud gu bheil tuilleadh urraim aig an neach a thog an tigh, na aig an tigh féin.

4 Oir tha gach uile thigh air a thogail le aon éigin; ach an Tì a thog na h-uile nithe, *is e* Dia.

5 Agus gu deimhin *bha* Maois dìleas 'na thigh-san uile mar sheirbhiseach, chum fianuis air na nithibh sin a bha gu bhi air an labhairt an déigh sin;

6 Ach Crìosd mar Mhac os ceann a thighe féin: agus is sinne a thigh-san, ma chumas sinn dànachd, agus gairdeachas an dòchais, gu daingean gus a chrìoch.

7 Uime sin, mar a ta an Spiorad naomh ag ràdh, An diugh, ma chluinneas sibh a ghuth,

8 Na cruaidhichibh bhur cridhe, mar anns a' bhrosnachadh, ann an là a' bhuairidh san fhàsach:

9 Far an do bhuair bhur naithriche mi, agus a dhearbhadh iad

mi, agus a chunnaic iad m'-oibre rè dhà fhichead bliadhna.

10 Uime sin bha diom orm ris a' ghinealach sin, agus thubhairt mi, Tha iad a ghnàth air seacharan 'nan cridhe; agus cha do ghabh iad eòlas air mo shligheibh-sa.

11 Ionnsu gu'n d'thug mi mo mhionnan a'm' fheirg, Nach téid iad a steach do m' shuaimhneas.

12 Thugaibh an aire, a bhràithre, air eagal gu'm bì ann an aon neach agaibh droch cridhe mì-chreidimh, ann an tréigsinn an Dé bheò.

13 Ach earailichibh a chéile gach aon là, am feadh a ghoir-ear An là 'n diugh dheth; air eagal gu'n cruaidhichear neach air bith agaibh tre mhealltair-eachd a' pheacaidh.

14 Oir rinneadh sinne 'nar luchd-comhpàirt do Chrìosd, ma chumas sinn toiseach ar muin-ghin gu daingean gus a' chrìoch;

15 Am feadh a theirear, An diugh, ma chluinneas sibh a ghuth, na cruaidhichibh bhur cridhe, mar anns a' bhrosnuch-adh.

16 Oir air do dhream àraidh cluinntinn, bhrosnuich iad: ach cha b' iadsan uile a thàinig a mach as an Eiphit le Maois.

17 Ach cò ris a bha diom air rè dhà fhichead bliadhna? *nach ann* rìusan a pheacaich, muinntir d'an do thuit an coluinnean anns an fhàsach?

18 Agus cò iad d'an d'thug e a mhionnan nach rachadh iad a steach d'a shuaimhneas, ach dhoibhsan nach do chreid?

19 Mar so chì sinn nach b' urrainn iad dol a steach air son mì-chreidimh.

CAIB. IV.

UIME sin biodh faitheas oirn, air eagal air bhi do

ghealladh dol a steach d'a shuaimhneas air fhàgail *againn*, gu'n tigeadh aon neach agaibh a dhéidh-làimh air.

2 Oir shearmonaichheadh an soisgeul duinne, amhuil a *rinn-eadh* dhoibh-san: ach cha robh tairbhe dhoibh anns an fhocal a chaidh shearmonachadh, do bhrìgh nach robh e air a mheasgadh le creidimh anns an dream a chual e.

3 Oir tha sinne a chreid a' dol a steach do shuaimhneas, amhuil a thubhairt e, Mar a thug mi mo mhionnan a'm' fheirg, Nach téid iad a steach do m' shuaimhneas: ged bha na h-oibre crìochnaichte o thoiseach an t-saoghail.

4 Oir labhair e ann an ionad àraidh mu'n t-seachdamh là air an dòigh so, Agus ghabh Dia fois air an t-seachdamh là o' oibribh uile.

5 Agus anns an *ionad* so a ris, Cha téid iad a steach do m' shuaimhneas.

6 Do bhrìgh uime sin gu'n tuigear uaith so gu'n téid dream àraidh a steach ann, agus nach deachaidh an dream, d'an do shearmonaichheadh e air tùs, a steach air son am mì-chreidimh;

7 A ris, tha e suidheachadh là àraidh, ag ràdh ann an Daibhidh, An diugh, an déigh aimsir co fhada; mar a theirear, An diugh, ma chluinneas sibh a ghuth, na cruaidhichibh bhur cridhe.

8 Oir nam biodh Iosua air toirt suaimhneis dhoibh, cha labhradh e an déigh sin mu là eile.

9 Uime sin dh'fhàgadh fois *fa chomhair* sluaigh Dhé.

10 Oir an Tì a chaidh steach d'ashuaimhneas-san, ghabhe-san tàmh o' oibribh-san, amhuil a *ghabh* Dia o' oibribh féin.

11 Dèanamaid dìchioll uime sin air dol a steach do 'n t-suaimbheas sin, air eagal gu 'n tuit aon neach a réir eisempleir cheudna a' mhì-chreidimh.

12 Oir *tha* focal Dé beò agus cumhachdach, agus ni's géire na claidheamh dà fhaobhair air bith, a' ruigheachd eadhon chum eadar-sgaraidh an anama agus an spioraid, agus nan alt agus nan smear, agus a' toirt breth air smuaintibh agus rùnaibh a' chridhe.

13 Agus cha 'n 'eil creutair sam bith nach 'eil follaiseach 'na làthair-san: ach *a ta* na h-uile nithe lomnochd, agus fosgailte do shùilibh an Tì d'am feum sinn cunntas a thabhairt.

14 Do bhrìgh uime sin gu bheil againn àrd-shagart mòr, a chaidh a steach do na nèamhaibh, Iosa Mac Dhé, cumamaid gu daingean *ar* n-aidmheil.

15 Oir cha 'n 'eil àrd-shagart againn nach 'eil comasach air comh-fhulangas a bhi aige r'ar n-anmhuinneachdaibh; ach a bhuaireadh sna h-uile nithibh air an dòigh cheudna ruinne, *ach* as eugmhais peacaidh.

16 Thigearmaid uime sin le dànachd gu rìgh-chaithir nan gràs, chum gu faigh sinn trècair, agus gu 'n amais sinn air gràs chum cobhair ann an àm feuma.

CAIB. V.

OIR *tha* gach uile àrd-shagart, air a thoirt o mheasg dhaoine, air òrduchadh air son dhaoine ann an nithibh a thaobh Dhé, chum gu 'n toir e suas araon tiodhlacan agus iobairtean air son pheacanna:

2 Neach a ta comasach air truas a ghabhail ris an dream a ta aineolach, agus air seacharan; do bhrìgh gu bheil e féin

mar an ceudna air a chuairteachadh le h-anmhuinneachd:

3 Agus air a shon so, is còir dha iobradh air son pheacanna, mar as leth an t-sluaigh, is amhuil sin as a leth féin mar an ceudna.

4 Agus cha ghabh aon duine an t-urram so dha féin, ach an tì a ta air a ghairm o Dhia, mar *bha* Aaron:

5 Is amhuil sin, cha do ghlòraich Crìosd e féin, gu bhi air a dhèanamh 'na àrd-shagart; ach an Tì a thubhairt ris, Is tu mo Mhac, an diugh ghin mi thu.

6 A réir mar a ta e ag ràdh mar an ceudna ann an *ionad* eile, *Is* sagart *thu* gu sìorruidh a réir òrduigh Mhelchisedeic.

7 Neach ann an làithibh 'fheòla, an déigh dha ùrnuighean agus athchuingean, maille ri h-àrd-éighich agus deuraibh, iobradh suas do 'n Tì a bha comasach air a shaoradh o 'n bhàs, agus dh'éisdeadh ris thaobh an ni roimh an robh eagal air.

8 Ged bu Mhac e, dh'fhòghluim e ùmhlachd o na nithibh a dh'fhuiling e:

9 Agus air dha bhi air a dhèanamh foirfe, rinneadh e 'na ùghdar slàinte shìorruidh dhoibh-san uile a bhios ùmhal dha;

10 Air a ghairm le Dia 'na àrd-shagart, a réir òrduigh Mhelchisedeic.

11 Mu'm bheil mòran againn r'a labhairt, agus cruaidh r'am mìneachadh; do bhrìgh gu bheil sibh mall 'nur n-éisdeachd.

12 Oir ged bu chòir dhuibh a réir na h-aimsir bhi 'nur luchd-teagaisg, tha feum agaibh gu 'n teagaisgeadh neach dhuibh a ris ciod iad ceud-thoiseacha bhriathar Dhé; agus tha sibh air teachd chum *na h-inbhe* sin, gur mò a ta bainne dh'uir-

easbhuidh oirbh na biadh làidir.

13 Oir gach neach a ta gnàthachadh bainne, tha e neo-theòmadh air focal na fireantachd: oir is naoidhean e.

14 Ach is ann do dhaoineibh foirfe a bhuineas biadh làidir, aig am bheil an ceudfaidh, tre ghnàthachadh fada, air an cleachdadh ri eadar-dhealachadh a chur eadar maith agus olc.

CAIB. VI.

UIME sin air fàgail duinn ceud-thoiseacha teagaisg Chrìosd, rachamaid air ar n-aghaidh chum foirfeachd; gun bhi rìs a' suidheachadh bunaite aithreachais o oibribh marbha, agus creidimh thaobh Dhé,

2 *Bunaite* teagaisg nam baisde, agus leagaidh nan làmh, agus aiseirigh nam marbh, agus breitheanais shìorruidh.

3 Agus nì sinn so, ma cheadaicheas Dia.

4 Oir is eu-comasach an dream sin a chaidh aon uair a shoillseachadh, agus a bhlais an tiodhlac nèamhaidh, agus a rinn-eadh 'nan luchd-comhpàirt do 'n Spiorad naomh,

5 Agus a bhlais deadh fhocal Dé, agus cumhachdan ant-saoghail ri teachd,

6 Agus a thuit air falbh, athnuadhachadh chum aithreachais: do bhrìgh gu bheil iad a' céusadh Mhic Dhé a rìs dhoibh féin, agus 'ga chur gu nàire fhollaisich.

7 Oir an talamh a dh'òlas a steach an t-uisge a tha teachd gu minic air, agus a bheir uaith luibheanna iomchuidh do 'n dream leis an saothraichear e, gheibh e beannachadh o Dhia:

8 Ach an talamh sin a bheir uaith droighionn agus drisean, *tha* e air a chur air cùl, agus

fagus do mhallachadh; d'an deireadh bhi air a losgadh.

9 Ach is dearbh leinn nithe a's feàrr mu'r timchioll-sa, a mhuinntir ionmhuinn, agus nithe a tha dlùth do shlàinte, ged tha sinn a' labhairt mar so.

10 Oir cha'n 'eil Dia mì-chothromach, gu'n dì-chuimhnicheadh e obair agus saothair bhur gràidh, a nochd sibh a thaobh 'ainme-san, am feadh gu'n d'rinn sibh frithealadh do na naomhaibh, agus gu bheil sibh a' frithealadh.

11 Agus is miann leinne gu'n dèan gach aon agaibh an dùrachd ceudna a nochdadh, chum làn-dearbhaidh an dòchais gus a' chrìoch:

12 Chum nach bì sibh leasg, ach 'nur luchd-leanmhuinn orrasan, a tha tre chreidimh agus fhoighidin a' sealbhachadh nan geallanna.

13 Oir an uair a thug Dia gealladh do Abraham, do bhrìgh nach feudadh e mionnan a thoirt air neach bu mhò, thug e mionnan air féin.

14 Ag ràdh, Gu fìrinneach, beannaichidh mi gu mòr thu, agus nì mi ro lìonmhor thu.

15 Agus mar sin an déigh dhasan feitheamh gu foighidneach, fhuair e sealbh air a' ghealladh.

16 Oir gu deimhin bheir daoine mionnan air an neach a's mò: agus dhoibh-san is crìoch air gach uile chonnsachadh mionnan chum daingneachaidh.

17 Uime sin air bhi do Dhia toileach air neo-chaochluidheachd a chomhairle fheuchainn ni's pailte do oighreachaibh a' gheallaidh, dhaingnich e le mionnaibh e:

18 Chum tre dhà nì neo-chaochluidheach, anns an *robh* e eu-comasach gu'n dèanadh Dia

breug, gu'm biodh againne comh-fhurtachd làidir, a theich chum didein gu greim a dhèanamh air an dòchas a chuireadh romhainn:

19 Ni a tha againn mar acair an anama, araon cinnteach agus daingean, agus a théid a steach do'n ionad sin a ta'n taobh stigh do'n bhrat-roinn,

20 Far an deachaidh an roimh-ruth-fhear a steach air ar sonne, *eadhon* Iosa, a rinneadh 'na àrd shagart gu sìorruidh a réir òrduigh Mhelchisedec.

CAIB. VII.

OIR b'e am Melchisedec so rìgh Shaleim, sagart an Dé a's ro àirde, neach a choinnich Abraham a' pilltinn o àr nan rìghrean, agus a bheannaich e;

2 D'an d'thug Abraham eadhon deachamh do'n uile: neach a's e air tùs, air a eadar-theangachadh, rìgh na fireantachd, agus 'na dhéigh sin mar an ceudna, rìgh Shaleim, 'se sin, rìgh na sìthe;

3 Gun athair, gun mhàthair, gun sinnsireachd, gun toiseach làithean, gun deireadh beatha aige; ach air a dhèanamh cosmhuil ri Mac Dhé, tha e fantuinn 'na shagart gu sìorruidh.

4 A nis thugaibh an aire cia mòr an duine so, d'an d'thug eadhon am prìomh-athair Abraham an deachamh do'n chreich.

5 Agus gu deimhin iadsan do chloinn Lebhi, a tha faotainn na sagartachd, tha àithne aca deachamh a thogail o'n t-sluagh a réir an lagha, sin r'a ràdh, o'm bràithribh féin, ged thàinig iad a mach á leasraidh Abraham:

6 Ach an tì nach 'eil air a shloinneadh uatha-san, fhuaire deachamh o Abraham, agus bheannaich e e-san aig an robh na geallanna.

7 Agus gun agadh sam bith, beannaichear an tì a's lugha leis an tì a's feàrr.

8 Agus an so tha daoine a gheibh bàs a' faotainn deachaimh: ach an sin an Tì aig am bheil fianuis gu bheil e beò.

9 Agus mar a dh'fheudas mi ràdh, fhuaradh ann an Abraham deachamh o Lebhi féin, a thogas an deachamh:

10 Oir bha e fathast ann an leasraidh 'athar, an uair a choinnich Melchisedec e.

11 A nis nan tigeadh foirfeachd tre shagartachd nan Lebhithreach, (oir is ann r'a linn a thugadh an lagh do'n t-sluagh,) ciod am feum a bha air sagart eile éirigh a réir òrduigh Mhelchisedec, agus nach biodh e air a ghairm a réir òrduigh Aaroin?

12 Oir air do'n t-sagartachd bhi air a h-atharrachadh, is éigin an lagh bhi air atharrachadh mar an ceudna.

13 Oir an tì air an labhrar na nithe sin, buinidh e do thréibh eile, do nach d'rinn aon neach frithealadh aig an altair.

14 Oir is soilleir gur ann o Iudah dh'èirich ar Tighearn, treubh air nach do labhair Maois ni air bith thaobh sagartachd.

15 Agus tha e fathast ni's roshoilleire, am feadh gu'n d'èirich sagart eile a réir coslais Mhelchisedec,

16 A rinneadh 'na shagart, cha'n ann a réir lagha àithne fheòlmhoir, ach a réir cumhachd beatha gun chrìoch.

17 Oir tha e dèanamh fianuis, Gur sagart thu gach linn a réir òrduigh Mhelchisedec.

18 Oir gu deimhin tha an àithne roimhe air a cur air cùl, air son i bhi anmhunn agus neo-tharbhach.

19 Oir cha d'rinn an lagh ni

sam bith foirfe, ach *rinn* toirt a steach dòchais a's feàrr e; tre'm bheil sinn a' teachd am fagus do Dhia.

20 Agus a mheud nach d'*rinn*-eadh sagart deth gun mhionnaibh;

21 (Oir rinneadh sagarta dhiubh-san as eugmhais mhionnan: ach dheth-san le mionnaibh, tre'n tì a thubhairt ris, Mhionnaich an Tighearn, agus cha ghabh e aithreachas, *Is* sagart thu gu sìorruidh, a réir òrduigh Mhelchisedeic;)

22 Is co mòr as sin a rinneadh Iosa 'na urras air coimhcheangal a's feàrr.

23 Agus bha gu deimhin mòran diubh-san 'nan sagartaibh, do bhrìgh gu'n do bhacadh dhoibh leis a' bhàs bhì mair-eann:

24 Ach an *duine* so, do bhrìgh gu mair e gu sìorruidh, tha sagartachd neo-chaohluidheach aige.

25 Air an aobhar sin tha e mar an ceudna comasach air an dream a thig a dh'ionnsuidh Dhé trid-san a thèarnadh gu h-iomlan, do bhrìgh gu bheil e beò gu sìorruidh gu eadar-ghuidhe a dhèanamh air an son.

26 Oir bha shamhuil sin do àrd-shagart iomchuidh dhuinne, a bha naomh, neo-lochdach, neo-thruaillidh, air a dhealachadh o pheacachaibh, agus a rinneadh ni's àirde na na nèamha;

27 Nach feum gach là mar na h-àrd-shagairt ud iobairtean thoirt suas, air tùs air son a pheacanna féin, agus an déigh sin air son *pheacanna* an t-sluaigh: oir rinn e so aon uair, san àm a thug se e féin mar iobairt.

28 Oir tha an lagh a' dèanamh àrd-shagarta do dhaoibh aig am bheil anmhuinneachd; ach

focal nam mionnan a bha an déigh an lagha, a' dèanamh àrd-shagairt do'n Mhac, a tha air a dhèanamh iomlan gu sìorruidh.

CAIB. VIII.

A NIS is e so suim nan nithe a labhair sinn: Tha shamhuil sin do àrd-shagart againn, a tha air suidhe air deis rìgh-chaithreach na mòrachd anns na nèamhaibh;

2 Ministear nan ionad naomha, agus an fhìor phàilliuin, a shuidhich an Tighearn, agus cha bu duine.

3 Oir tha gach uile àrd-shagart air òrduchadh chum tiodhlacan agus iobairtean a thoirt suas: uime sin b'èigin gu'm biodh aig an duine so mar an ceudna ni èigin r'a thabhairt suas.

4 Oir nam biodh e air thalamh, cha bhiodh e 'na shagart, do bhrìgh gu bheil sagairt ann a tha tabhairt suas thiodhlac a réir an lagha:

5 Muinntir a tha dèanamh seirbhis le samhladh agus sgàile nan nithe nèamhaidh, a réir mar a dh'òrduicheadh do Mhaois le Dia 'nuair a bha e air tì am pàilliuin a chur suas. Oir feuch, (a ta e ag ràdh,) gu'n dèan thu na h-uile nithe réir an t-saimpleir a nochdadh dhuit san t-sliabh.

6 Ach a nis fhuair e minis-treileachd a's ro-fheàrr, a mheud gu bheil e mar an ceudna 'na eadar-mheadhonair air coimhcheangal a's feàrr, a chaidh dhaingneachadh air geallaibh a's feàrr.

7 Oir nam biodh an ceud choimhcheangal sin gun uireasbhuidh; cha'n iarrtadh àit do'n dara coimhcheangal.

8 Oir, a' faotainn croin doibh, a ta e ag ràdh, Feuch thig na

làithean, (tha an Tighearn ag ràdh,) anns an dèan mi coimhcheangal nuadh ri tigh Israeil, agus ri tigh Iudah :

9 Cha'n ann a réir a' choimhcheangail a rinn mi r'an aithrichibh, anns an là a rug mi air làimh orra chum an treòrachadh a mach á talamh na h-Eiphit ; do bhrìgh nach d'fhan iad ann am choimhcheangal, agus chuir mise suarach iadsan, tha an Tighearn ag ràdh.

10 Oir is e so an coimhcheangal a nì mi ri tigh Israeil an déigh nan làithean ud, tha an Tighearn ag ràdh ; Cuiridh mi mo reachdan 'nan inntinn, agus sgriobhaidh mi iad air an cridheachaibh : agus bithidh mi a'm' Dhia dhoibh, agus bithidh iadsan 'nan sluagh dhomh-sa.

11 Agus cha teagaisg iad gach aon a choimhearsnach, agus gach aon a bhràthair, ag ràdh, Gabh eòlas air an Tighearn : oir bithidh eòlas aca uile orm, o'n neach a's lugha gus an neach a's mò dhiubh.

12 Oir bithidh mise tròcaireach d'an eu-ceartaibh, agus am peacanna agus an aingidheachd cha chuimhnich mi ni's mò.

13 Am feadh a ta e ag ràdh, *Coimhcheangal* nuadh, rinn e'n ceud *choimhcheangal* sean. A nis an ni a ta aosda agus air fàs sean, tha e fagus do dhol as an t-sealladh.

CAIB. IX.

BHA ma seadh gu dearbh aig a' cheud *phàillion* òrduigh-ean a thaobh seirbhis Dé, agus naomh-ionad saoghalta.

2 Oir dheasaicheadh an ceud phàillion, anns an robh an coinneir, agus am bòrd, agus aran na fianuis, ris an abrar *an t-ionad* naomh.

3 Agus an taobh a stigh do'n

dara roinn-bhrat, am pàillion ris an abrar an t-ionad a's ro naomha ;

4 Anns an robh an tùiseir òir, agus àir a' choimhcheangail air a còmhachadh mu'n cuairt le h-òr, anns an robh a' phoit òir anns an robh am mana, agus slat Aaroin a bha fo bhlàth, agus clàir a' choimhcheangail ;

5 Agus os a ceann, cheruban na glòire, a' cur sgàile air caithir na tròcair ; mu nach urrainn sinn a nis labhairt fa leth.

6 A nis an uair a bha na nithe so air an cur an òrdugh mar so, chaidh na sagairt a ghnàth a steach do'n cheud phàillion, a' coimhlionadh seirbhis *Dé* :

7 Ach do'n dara pàillion chaidh an t-àrd-shagart 'na aonar a steach aon uair sa' bhliadhna, cha b'ann as eugmhais fola, a thug e suas air a shon féin, agus *air son* seacharain an t-sluaigh :

8 Air bhi do'n Spiorad naomh a' nochdadh so, nach robh fathast an t-slighe chum an ionaid bu ro-naomha air a foillseachadh, am feadh a bha an ceud phàillion fathast 'na sheasamh :

9 Ni a bha 'na shamhladh do'n aimsir a ta làthair, anns an robh araon tiodhlacan agus iobairtean air an toirt suas, nach robh comasach air an tì a bha dèanamh na seirbhis sin a dhèanamh coimhlionta, thaobh a choguis,

10 An t-seirbhis a bha mhàin ann am biadhaibh agus ann an deochaibh, agus ann an iomadh gnè ionnlaid, agus deas-ghnàthaibh a thaobh na feòla, a chuireadh mar uallaich orra gu àm an leasachaidh.

11 Ach air teachd do Chrìosd 'na àrd-shagart nan nithe maithe a bha ri teachd, tre phàillion bu

mhò agus bu dìongmhalta, nach d'rinneadh le làmh-aibh, sin r'a ràdh, nach robh do'n togail so ;

12 Agus cha b'ann tre fhuil ghabhar agus laogh, ach tre 'fhuil féin a chaidh e steach aon uair do'n ionad naomh, air dha saorsa shìorruidh fhaotainn dhuinne.

13 Oir ma nì fuil tharbh, agus ghabhar, agus luaithre aighe air a crathadh air an dream a bha neòghlan, an naomhachadh chum glanaidh na feòla ;

14 Cia mòr a's mò nì fuil Chrìosd, a thug e féin suas tre'n Spiorad shìorruidh gun lochd do Dhia, bhur coguis-sa ghlanadh o oibribh marbha chum seirbhis a dhèanamh do'n Dia bheò ?

15 Agus air a shon so is e-san eadar-mheadhonair an tiomnaidh-nuaidh, ionnus tre fhulangas a' bhàis, chum saorsa nan eu-ceart a bha fuidh 'n cheud thiomnadh a' chosnadh, gu'm faigheadh iadsan a ta air an gairm gealladh na h-oighreachd shìorruidh.

16 Oir far am bheil tiomnadh, is éigin bàs an tiomnaidh-fhir a bhi ann mar an ceudna.

17 Oir a ta tiomnadh daingean an déigh bàis dhaoine: ach cha'n 'eil brìgh sam bith ann am feadh a ta'n tiomnaidh-fhear beò.

18 A réir sin, nì mò bha'n ceud *thiomnadh* air a choisreagadh as eugmhais fola.

19 Oir an uair a labhradh gach uile àithne réir an lagha ris an t-sluagh uile le Maois, air dha fuil laogh agus ghabhar a ghabhail, maille ri h-uisge, agus oluinn scarlaid, agus hisop, chrath e iad araon air an leabhar agus air an t-sluagh uile,

20 Ag ràdh, 'Si so fuil an tiomnaidh a dh'àithn Dia dhuibh.

21 Os bàrr, chrath e mar an ceudna an fhuil air a' phàill-iun, agus air soithichibh na naomh-sheirbhis uile.

22 Agus is beag nach 'eil na h-uile nithe air an glanadh le fuil a' réir an lagha; agus as eugmhais dòrtaidh fola cha'n 'eil maitheanas r'a fhaotainn.

23 B' fheumail uime sin gu'm biodh samhlaidh nan nithe a ta sna nèamhaibh air an glanadh leo so; ach na nithe nèamhaidh féin le iobairtibh a b' fheàrr na iad so:

24 Oir cha deachaidh Crìosd a steach do na h-ionadaibh naomha làmh-dhèanta, nithe a ta 'nan samhlachas air an fhìor ionad; ach do nèamh féin, chum a nis e féin a nochdadh ann am fianuis Dé air ar son-ne:

25 No fòs chum e féin iobradh gu minic, mar a théid an t-àrd-shagart gach bliadhna steach do'n ionad naomh, le fuil nach leis féin.

26 (Oir mar sin b' éigin gu'm fulaingeadh e gu minic o thoiseach an t-saoghail;) ach a nis dh'fhoillsicheadh e aon uair ann an deireadh an t-saoghail, chum peacadh a chur air cùl tre e féin iobradh.

27 Agus amhuil a ta e air òrdughadh do dhaoineibh bàs fhaotainn aon uair, ach 'na dhéigh so breitheanas:

28 Mar sin thugadh Crìosd suas aon uair a thoirt air falbh peacanna mhòran, ach an dara uair as eugmhais peacaidh foillsichear e dhoibh-san aig am bheil sùil ris, chum slàinte.

CAIB. X.

UIME sin air bhi aig an lagh sgàile nithe maithe ri teachd, agus cha'n e fìor-choslas nan nithe féin, cha'n 'eil e comasach dha an dream a thig d'a.

ionnsuidh a chaidh a dhèanamh coimhionta leis na h-ìobairtibh sin, a bha iad a' toirt suas o bhliadhna gu bliadhna a ghnàth.

2 Oir an sin nach sguireadh iad do bhi 'gan toirt suas? do bhrìgh nach biodh aig luchd dèanamh na naomh-sheirbhis tuilleadh coguis air bith peacaidh, air dhoibh bhi aon uair air an glanadh.

3 Ach anns na h-ìobairtibh sin *nithear* ath-chuimhneachadh air na peacaibh gach bliadhna.

4 Oir cha 'n 'eil e'n comas gu tugadh fuil tharbh agus ghabhar peacanna air falbh.

5 Uime sin ag teachd dha do'n t-saoghal, a ta e ag ràdh, ìobairt agus tabhartas cha b' àill leat, ach dh'ulluich thu corp dhomh-sa :

6 Ann an ìobairtibh-loisgte, agus ann an ìobairtibh air son peacaidh cha robh tlachd agad :

7 Ansin thubhairt mise, Feuch, tha mi a' teachd, (ann an rola an leabhair tha sud sgrìobhta orm,) chum do thoil-sa a dhèanamh, o Dhé.

8 Air dha a ràdh roimh sin, Ìobairt, agus tabhartas, agus ìobairte-loisgte, agus ìobairt air son peacaidh cha b' àill leat, agus cha robh do thlachd annta, (a tha air an toirt suas a réir an lagha ;)

9 An sin thubhairt e, Feuch, a ta mi a' teachd a dhèanamh do thoil-sa, O Dhé. Tha e cur air cùl a' cheud ni, chum gu'n daingnich e an dara ni.

10 Leis an toil so tha sinne air ar naomhachadh, tre toirt suas cuirp Iosa Crìosd aon uair.

11 Agus tha gach uile shagart a' seasamh gach là, a' frithealadh agus a' toirt suas nan ìobairt cheudna gu minic, nithe do nach 'eil e'n comas a chaidh peacanna thoirt air falbh :

12 Ach an duine so, an déigh dha aon ìobairt a thoirt suas air son peacaidh, shuidh e a chaidh tuilleadh air deas làimh Dhé ;

13 A' feitheamh o sin suas gus an cuirear a naimhde 'nan stòl-chos fo 'chosaidh.

14 Oir le aon ìobairt rinn e chaidh foirfe iadsan a ta air an naomhachadh.

15 Agus tha an Spiorad naomh mar an ceudna a' dèanamh fianuis duinne air na *nithibh so* : oir an déigh dha ràdh roimh,

16 Is e so an coimhcheangal a nì mi riu an déigh nan làithean ud, tha an Tighearn ag ràdh, Cuiridh mi mo reachdan 'nan cridhe, agus sgrìobhaidh mi iad air an inntinn :

17 Agus am peacanna agus an eu-cearta cha chuimhnich mi ni's mò.

18 A nis, far am bheil maith-eanas nan nithe so, cha 'n 'eil tabhartas air son peacaidh ann ni's mò.

19 Uime sin, a bhràithre, do bhrìgh gu bheil dànachd againn chum dol a steach do'n ionad a's naomha tre fhuil Iosa,

20 Air slighe nuaidh agus bheò a choisrig e dhuinne, tre'n roinn-bhrat, sin r'a ràdh, tre 'fheòil féin :

21 Agus do bhrìgh gu bheil againn àrd-shagart os ceann tighe Dhé,

22 Thigeamaid am fagus le cridhe fìor, ann an làn dearbh-bheachd a' chreidimh, le ar cridheachaibh air an crath-ghlanadh o dhroch coguis, agus le ar cuirp air an nigheadh le h-uisge glan.

23 Cumamaid gu daingean aidmheil ar dòchais gun chlaonadh, (oir is fìrinneach an Tì a gheall :)

24 Agus thugamaid an aire d'a.

chéile chum ar brosnachadh gu gràdh, agus gu deadh oibribh :

25 Gun bhi leigeadh dhinn sinn féin a chruinneachadh an ceann a chéile, mar is gnàth le dream àraidh ; ach a' comhairleachadh a chéile : agus gu ma mòid a nì sinn so, gu bheil sibh a' faicinn an là a' tarruing am fagus.

26 Oir ma pheacaicheas sinn do ar toil féin an déigh dhuinn eòlas na firinn fhaotainn, cha'n fhàgar tuilleadh dhuinn iobairt air son peacaidh,

27 Ach dùil eagalach ri breitheanas, agus fearg theinnteach, a sgriosas na h-eascairdean.

28 An neach a rinn tàir air lagh Mhaois, bhàsaich e gun tròcair, fo dhithis no thriuir do fhianuisibh :

29 Cia mòr is mò na sin am peanas a shaoileas sibh air am measar e-san toillteanach, a shaltair fo 'chosaibh Mac Dhé, agus a mheas mar ni mì-naomha fuil a' choimhcheangail, leis an do naomhaicheadh e, agus a rinn tarhuis air Spiorad nan gràs ?

30 Oir is aithne dhuinn an Tì a thubhairt, *Is* leam-sa an dioghaltas, agus bheir mi dìoladh uam, tha an Tighearn ag ràdh : agus a ris, Bheir an Tighearn breth air a shluagh.

31 *Is* ni eagalach tuiteam ann an làmbaibh an Dé bheò.

32 Ach biodh ath-chuimhne agaibh air na làithibh a chaidh seachad, anns an d' fhuiling sibh, an déigh dhuibh bhi air bhur soillseachadh, gleachda mòr fulangais ;

33 Ann an cuid am feadh a rinneadh sibh 'nur ball-amhaire, araon tre mhaslaibh agus thrioblaidibh ; agus ann an cuid, am feadh a rinneadh sibh 'nur compaanaich dhoibh-san ris an do bhuineadh mar sin.

34 Oir bha comh-fhulangas agaibh rium-sa ann am gheimhlibh, agus ghabh sibh le 'luathghair ri creachadh bhur maoin, air dhuibh fios a bhi agaibh annaibh féin gu bheil agaibh air nèamh maoin a's feàrr, agus a ta maireannach.

35 Uime sin na tilgibh uaibh bhur muinghin, aig am bheil mòr dhìol-thuarasdal.

36 Oir a ta feum agaibh air foighidin ; chum an déigh dhuibh toil Dé a dhèanamh, gu'm faigh sibh an gealladh.

37 Oir fathast seallan beag, agus an Tì a ta ri teachd thig e, agus cha dèan e moille.

38 A nis bithidh am firean beò tre chreidimh : ach ma philleas neach sam bith air ais, cha bhi aig m'anam-satlachd ann.

39 Ach cha'n 'eil sinne do'n dream sin a philleas air an ais chum sgrios ; ach do'n dream a chreideas, chum tèarnaidh an anama.

CAIB. XI.

A NIS is e creidimh brìgh nan nithe ri'm bheil dòchas, dearbh-chinntè nan nithe nach faicear.

2 Oir is ann tre so a fhuair na sinnsirean deadh theisteachas.

3 Tre chreidimh tha sinn a' tuigsinn gu'n do chruthaich-eadh na saoghail tre fhocal Dé, air chor as nach d'rinneadh na nithe a chithear do nithibh a bha r'am faicinn.

4 Tre chreidimh thug Abel suas do Dhia iobairt ni b' fheàrr na Cain, tre an d' thugadh teisteachas dha gu'n robh e 'na fhìrean, air bhi do Dhia a' dèanamh fianuis d'a thiodhlacaibh : agus tre sin, air dha bhi marbh, tha e fathast a' labhairt.

5 Tre chreidimh dh'atharraicheadh Enoch chum nach faiceadh e bàs ; agus cha d'

'fhuaradh e, do bhrìgh gu'n d'atharraich Dia e: oir roimh 'atharrachadh thugadh fianuis da, Gu'n do thaitinn e ri Dia.

6 Ach as eugmhais creidimh cha'n 'eil e'n comas a thoileachadh: oir is éigin do'n tì a thig a dh'ionnsuidh Dhé a chreidsinn gu bheil e ann, agus gur e an Tì e a bheir duais do'n dream a dh'iarras e gu dìchiollach.

7 Tre chreidimh air do Noah rabhadh fhaotainn o Dhia mu thimchioll nithe nach robh idir r'am faicinn, agus eagal a ghabhail, dh'ulluich e àirc chum tèarnaidh a theaghlaich; tre'n do dhìt e an saoghal, agus rinn-eadh e 'na oighre air an fhìr-eantachd a ta thaobh creidimh.

8 Tre chreidimh, 'nuair a ghairmeadh Abraham gu dol a mach do ionad a bha e gu fhaotainn an déigh sin mar oighreachd, fhreagair e; agus dh'imich e mach gun fhios a bhi aige c'ait an robh e dol.

9 Tre chreidimh bha e air chuairt ann an tìr a gheallaidh, mar ann an tìr choimhich, a' gabhail comhnuidh ann am pàilliunaibh maille ri h-Isaac agus Iacob, comh-oighreachan a' gheallaidh cheudna.

10 Oir bha sùil aige ri baile aig am bheil bunaitean, air am bheil Dia 'na fhear-dealbhaidh agus 'na fhear-togail.

11 Tre chreidimh mar an ceudna fhuair Sarah féin neart gu sliochd a ghabhail 'na broinn, agus rug i leanabh an déigh dh'i dol thar aois *cloinne*, do bhrìgh gu'n do mheas i gu'n robh e-san fìrinneach a thug an gealladh.

12 Uime sin ghineadh o aon a mhàin, agus e-san ionnan agus marbh, sliochd mar reulta nèimh thaobh lìonmhoireachd, agus mar a' ghaineamh air tràigh na fairge do-àireamh.

13 Fhuair iad so uile bàs ann an creidimh, gun na geallanna fhaotainn, ach air dhoibh am faicinn fad o làimh, (agus an làn-chreidsinn,) ghabh iad riu, agus dh'aidich iad gu'm bu choigrich agus luchd-cuairt air an talamh iad féin.

14 Oir an dream a ta ag ràdh nan nithe sin, tha iad a' nochdadh gu soilleir gu bheil iad ag iarraidh dùthcha.

15 Agus gu fìrinneach nam biodh iad cuimhneachail air an dùthaich sin, as an d'thàinig iad a mach, dh'fheudadh iad àm iomchuidh fhaghail air pilleadh:

16 Ach a nis tha déidh aca air dùthaich a's feàrr, eadhon dùthaich nèamhaidh: uime sin cha nàr le Dia, gu'n goirear an Diasan dheth: oir dh'ulluich e dhoibh baile.

17 Tre chreidimh dh'ìobair Abraham, air dha bhi air a dhearbhadh, a mhac Isaac; agus thug an tì a fhuair na geallanna suas 'aon-ghin mhic;

18 Ris an dubhradh, Ann an Isaac goirear do shliochd:

19 A' meas gu'm bu chomasach Dia air a thogail eadhon o na marbhaibh; o'n d'fhuair se e eadhon ann an cosamhlachd.

20 Tre chreidimh bheannaich Isaac Iacob agus Esau mu thimchioll nithe a bha ri teachd.

21 Tre chreidimh bheannaich Iacob, ag faghail bàis da, dithis mhac Ioseph; agus rinn e aoradh a' leigeadh a chudthrom air bàrr a bhata.

22 Tre chreidimh rinn Ioseph, ri àm faghail a' bhàis da, iomradh air dol a mach chloinn Israeil; agus thug e àithne mu thimchioll a chnàmh.

23 Tre chreidimh an uair a rugadh Maois, dh'fholaicheadh e trì mìosan le phàrantaibh, do bhrìgh gu'm fac iad gu'm bu

leanabh tlachdmhor e ; agus cha robh eagal orra roimh àithne an rìgh.

24 Tre chreidimh air teachd gu h-aois do Mhaois, dhiùlt e bhi air a ghairm 'na mhac do nighinn Pharaoh ;

25 A' ròghnachadh àmhghar fhulang maille ri sluagh Dhé, roimh shòlas a' pheacaidh a mhealtuinn rè seal ;

26 A' meas gu'm bu mhò an saoihbreas masladh Chrìosd na ionmhaisnah-Eiphit: oir bhasuìl aige ris an luach-saoithreach.

27 Tre chreidimh thréig e'n Eiphit, gun eagal a bhi air roimh chorruich an rìgh: oir bha e làidir 'na inntinn, mar neach a bha faicinn an 'Tì a ta neo-fhaicsinneach.

28 Tre chreidimh ghléidh e a' chàisg, agus an dòrtadh fola, chum nach beanadh an tì a sgrios na ceud-ghin riusan.

29 Tre chreidimh chaidh iad tre a' mhuir ruaidh, mar tre thalamh tioram: ni 'nuair a thug na h-Eiphitich ionnsuidh air a dhèanamh, bhàthadh iad.

30 Tre chreidimh thuit ball-acha Iericho, an déigh bhi air an cuairteachadh rè sheachd làithean.

31 Is ann tre chreidimh nach do sgriosadh Rahab an strìopach maille riusan nach do chreid, 'nuair a ghabh i ris an luchd-brathaidh an sìth.

32 Agus ciod tuilleadh a their mi? oir theirgeadh an ùine dhomh ann an labhairt mu Ghideon, Bharac, agus Shampson, agus Iephthah, Dhaibhidh mar an ceudna, agus Shamuel, agus na fàidhibh :

33 Muinntir, tre chreidimh, a cheannsaich rìoghachdan, a dh'oirich fireantachd, a fhuair geallanna, a dhruid beoil leòmh-an,

34 A mhùch neart teine, a chaidh as o fhaobhar a' chlaidheimh, o anmhuinneachd a rinn-eadh neartmhor, a dh'fhàs treun ann an cath, a chuir air theicheadh armailte nan coimheach.

35 Fhuair mnàì am mairbh air an togail a ris gu beatha: agus chràidh-phianadh dream eile, gun iad a ghabhail ri saorsa; chum gu faigheadh iad aiseirigh a b'fhearr.

36 Fhuair dream eile deuchainn do fhanoidibh, agus do sgiùrsaibh, seadh fòs, do gheimhlibh agus do phrìosan.

37 Chlachadh iad, shabhadh as a chéile iad, bhuaireadh iad, chuireadh gu bàs leis a' chlaidheamh iad: chaidh iad mu'n cuairt 'nam fògaraich ann an croicnibh chaorach agus ghabhar, ann an uireasbhuidh, ann an trioblaidibh, ann an cràdh ;

38 (Dream air nach b'airidh an saoghal;) a' dol air seacharan ann am fàsaichibh, agus air sléibhtibh, agus ann an uamhaibh agus ann an slochdaibh na talmhainn.

39 Agus air dhoibh so uile deadh theisteachas fhaotainn tre chreidimh, cha d'fhuair iad an gealladh :

40 Air do Dhia ni éigin a's feàrr a sholar dhuinne, ionnus nach biodh iadsan air an dèanamh foirfe as ar n-eugmhais-ne.

CAIB. XII.

UIME sin, air dhuinne bhi air ar cuairteachadh le neul co mòr do fhianuisibh, cuireamaid dhinn gach lethtrom, agus am peacadh a ta gu furas ag iadhadh umainn, agus ruitheamaid le foighidin an réis a chuireadh romhainn,

2 Ag amharc air Iosa, ceannard agus fear-crìochnaich ar creidimh, neach air son an

aoibhneis a chuireadh roimhe, a dh'fhuiling an crann-céusaidh, a' cur ha nàire an neo-shuim, agus a shuidh air deis rìgh-chaitheach Dé.

3 Uime sin thugaibh fa'near e-san a dh'fhuiling a shamhuil sin do ana-cainnt o pheacaich 'na aghaidh féin, air eagal gu'm bì sibh sgìth agus lag ann bhur n-inntinnibh.

4 Cha do sheas sibh fathast gu fuil, a' cathachadh an aghaidh peacaidh.

5 Agus dhì-chuimhnich sibh an earail a ta labhairt ribh mar ri cloinn, A mhic, na cuir suarach smachdachadh an Tighearn, agus na fannaich 'nuair a chronaichear leis thu :

6 Oir an tì a's ionmhuinn leis an Tighearn, smachdaichidh se e, agus sgiùrsaidh e gach mac ris an gabh e.

7 Ma ghiùlaineas sibh smachdachadh, tha Dia a' buntuinn ribh mar ri cloinn : oir cò am mac nach smachdaich an t-Ath-air?

8 Ach ma tha sibh as eugmhais smachdachaidh, d'am bheil na h-uile 'nan luchd-comhpàirt, an sin is clann diolain sibh, agus cha chlann *dligheach*.

9 Os bàrr, bha againn aithriche thaobh na feòla, a smachdaich sinn, agus thug sinn urram dhoibh : nach mò gu mòr *is còir dhuinn* bhi ùmhal do Athair nan spiorad, agus a bhi beò?

10 Oir gu deimhin smachdaich iadsan sinn rè beagain do làithibh a réir an toile féin ; ach e-san chum ar leas, ionnus gu'm bitheamaid 'nar luchd-comhpàirt d'a naomhachd.

11 Ach cha mheasar smachdachadh air bith am feadh a ta e làthair sòlasach, ach doilgheasach : gidheadh, 'na dhéigh sin bheir e uaith toradh sìochail na

fireantachd, do'n dream a ta *gu dligheach* air an cleachdadh ris.

12 Uime sin, togaibh suas na làmhan a ta air tuiteam sìos, agus *neartaichibh* na glùine laga ;

13 Agus dèanaibh cos-cheuma dìreach do 'ur cosaibh, air eagal gu'm bì an ni sin a ta bacach air a thionndadh as an t-slighe ; ach gu ma mò bhiodh e air a shlànuchadh.

14 Leanaibh sìth maille ris na h-uile dhaoineibh, agus naomhachd, ni as eugmhais nach faic neach air bith an Tighearn :

15 A' toirt an ro-aire, air eagal gu'n tig neach sam bith a dhéidh-làimh air gràs Dé ; air eagal air fàs suas do fhreimh seirbhe sam bith, gu'n cuir e dragh oirbh, agus le so gu'm bì mòran air an salachadh :

16 Air eagal gu'm bì fear strìopachais ann, no neach mì-naomha sam bith, mar Esau, a reic air son aoin ghreim bìdh còir a cheud-bhreithe.

17 Oir a ta fhios agaibh 'nuair a b' àill leis an déigh sin am beannachadh a shealbhachadh, gu'n do dhiùltadh e : oir cha d'fhuair e àit aithreachais, ged dh'iarr se e gu dùrachdach le deuraibh.

18 Oir cha d'thàinig sibh chum an t-sleibh ris am feudtadh beantuinn, agus a bha losgadh le teine, no chum duibhre, agus dorchadais, agus doinninn,

19 Agus fuaime na trompaid, agus guth nam briathar, ionnus gu'n do ghuidh an dream a chual e nach labhairteadh am focal riu tuilleadh :

20 (Oir cha b'urrainn iad an ni sin a chaidh àithneadh dhoibh iomchar, Agus ma bheanas fiu ainmhidh ris an t-sliabh, clachar e, no cuirear sleagh a mach troimhe.

21 Agus bu co uamhasach an

sealladh, as gu'n dubhairt Maois, Tha eagal ro mhòr agus crith orm :)

22 Ach tha sibh air teachd gu sliabh Shioin, agus gu caithir an Dé bheò, an Ierusalem nèamhaidh, agus cuideachd do-àir-eamh do ainglibh,

23 Gu làn-choimhthional agus eaglais nan ceud-ghin, a tha sgrìobhta sna nèamhaibh, agus gu Dia breitheamh nan uile, agus gu spioradaibh nam firean air an dèanamh foirfe,

24 Agus gu Iosa eadar-mheadhonair a' choimhcheangail nuaidh, agus chum fola a' chrathaidh, a tha labhairt nithe a's feàrr na *fuil* Abeil.

25 Thugaibh an aire nach diùlt sibh e-san a ta labhairt : oir mur deachaidh iadsan as a dhiùlt an tì a labhair o *Dhia riu* air talamh, is lugha gu mòr na sin a *théid* sinne as, ma thionndaidheas sinn air falbh uaithe-san a ta *labhairt* o nèamh :

26 Neach aig an do chrath a ghuth an talamh an sin : ach a nis gheall e, ag ràdh, Aon uair eile fathast crathaidh mi cha'n e an talamh a mhàin, ach nèamh mar an ceudna.

27 Agus a ta *am focal* so, Aon uair eile, a' ciallachadh atharrachaidh nan nithe sin a ghabhas crathadh, mar nithe a rinneadh, chum gu fanadh na nithe nach gabh crathadh.

28 Uime sin air dhuinne rìoghachd fhaotainn nach feudar a ghluasad, biodh againn gràs, leis an dèan sinn seirbhis gu taitneach do *Dhia*, le h-urram agus eagal diadhaidh :

29 Oir a ta ar *Dia-ne* 'na theine dian-loisgeach.

2 Na dearmadaibh aoidheachd a thoirt do choigrich ; oir le so thug dream àraidh aoidheachd do ainglibh gun fhios doibh.

3 Bithibh cuimhneachail orrasan a tha ceangailte, mar gu'm biodh sibh ceangailte maille riu ; agus air an dream a tha fulang an-shocair, mar mhuinntir a tha sibh féin mar an ceudna anns a' choluinn.

4 *Tha'm* pòsadh urramach anns na h-uile, agus an leabadh neo-shalach : ach air luchd-striopachais agus adhaltrannais bheir Dia breth.

5 *Biodh bhur* caithe-beatha gun sannt ; agus bithibh toilichte leis na nithibh a tha làth-air agaibh : oir thubhairt e, Cha'n fhàg, agus cha tréig mi am feasd thu.

6 Ionnnus gu'm feud sinn a ràdh gu dàna, Is e'n Tighearn m' fhear-cuideachaidh, agus cha'n eagal leam aon ni a dh'fheudas duine dhèanamh orm.

7 Bithibh cuimhneachail air bhur cinn-juil, a labhair ribh focal Dé : leanaibh an creidimhsan, a' beachdachadh air crìch an caithe-beatha :

8 Iosa Crìosd an dé, agus an diugh, agus gu sìorruidh an Tì ceudna.

9 Na bithibh air bhur giùlan mu'n cuairt le teagasgaibh eagsamhla coimheach : oir is maith an ni an cridhe bhi air a dhaingneachadh le gràs, cha'n ann le biadhaibh, nithe nach d'thug tairbhe do'n dream a ghnàth-aich iad.

10 Tha altair againne, dheth nach 'eil còir aca-san a bheag itheadh, a tha dèanamh seirbhis do'n phàillion.

11 Oir a ta cuirp nan ainmhidhean sin, aig am bheil am fuil air a toirt a steach air son peacaidh do'n ionad naomh leis

CAIB. XIII.

FANADH gràdh bràthaireil aguibh.

an àrd-shagart, air an losgadh an leth muigh do'n champ.

12 Uime sin chum gu'n dèanadh Iosa an sluagh a naomhachadh le 'fhuil féin, dh'fhuiling e mar an ceudna an taobh a muigh do'n gheata.

13 Air an aobhar sin rachamaid a mach d'a ionnsuidh-san an taobh a muigh do'n champ a' giùlan a mhaslaidh-san.

14 Oir an so cha'n 'eil againn baile a mhaireas, ach a ta sinn ag iarraidh aoin a ta ri teachd.

15 Uime sin trid-san thugamaid suas ìobairt buidheachais do Dhia a ghnàth, 's e sin, toradh ar bilean, a' toirt molaidh d'a ainm.

16 Ach na dì-chuimhnichibh maith a dhèanamh, agus comh-roinn a thoirt uaibh : oir a ta an leithide sin do ìobairtibh taitneach do Dhia.

17 Bithibh ùmhal do 'ur cinn-iuil, agus thugaibh géill doibh : oir tha iad ri faire air bhur n-anamaibh, mar mhuinntir d'an éigincunntas thoirt uatha: chum gu'n dèan iad e le gàirdeachas, agus cha'n e le doilgheas : oir tha so neo-tharbhach dhuibhse.

18 Dèanaibh ùrnuigh air ar son-ne : oir is dòigh leinn gu bheil deadh choguis againn, air dhuinn bhi toileach ar beatha

a chaitheadh gu cubhaidh anns na h-uile nithibh.

19 Ach is mòid a ghuidheam oirbh so a dhèanamh, chum gur luathaid a dh'aisigear mise dhuibh.

20 A nis gu dèanadh Dia na sìthe, a thug air ais o na marbh-aibh ar Tighearn Iosa, àrd-bhuachaill nan caorach, tre fhuil a 'choimhcheangail shìor-ruidh,

21 Sibhse coimhlionta anns gach uile dheadh obair, chum sibh a dhèanamh a thoile-san, ag oibreachadh annaibh an ni a ta taitneach 'na làthair-san, tre Iosa Crìosd ; dhasan *gu robh* glòir gu saoghal nan saoghal. Amen.

22 Agus guidheam oirbh, a bhràithre, sibh a ghiùlan focal na h-earalach ; oir sgrìobh mi gu h-àithghearr do 'ur n-ionnsuidh.

23 Biodh fhios agaibh gu'n do chuireadh ar bràthair Timoteus air a chomas ; maille ris-san, ma thig e gu goirid, chì mi sibh.

24 Cuiribh fàilte orra-san uile a tha 'nan cinn-iuil duibh, agus airna naoimhuile. Tha muinntir na h-Eadailt a' cur fàilte oirbh.

25 Gràs *gu robh* maille ribh uile. Amen.

LITIR CHOITCHIONN AN ABSTOIL SHEUMAIS.

CAIB. I.

THA Seumas seirbhiseach Dhé, agus an Tighearn Iosa Crìosd, a' cur beannachd chum an dà thréibh dheug a tha air an sgapadh o chéile.

2 Mo bhràithre, measaibh

mar an uile ghàirdeachas 'nuair a thuiteas sibh ann an iomadh gnè dheuchainnean ;

3 Air dhuibh fios so bhi agaibh, gu'n oibrich dearbhadh bhur creidimh foighidin.

4 Ach biodh aig an fhoighidin

in a h-obair dhiongmhalta féin, chum gu'm bì sibh dìongmhalla agus iomlan, gun uireasbhuidh ni sam bith.

5 Ma tha aon neach agaibh a dh'uireasbhuidh gliocais, iarradh e o Dhia, a bheir do gach neach gu pailt, agus nach dèan maoidheamh; agus bheirear dha e.

6 Ach iarradh e le creidimh, gun bhi fuidh amharus sam bith: oir an tì a tha fuidh amharus, is cosmhuil e ri tonn na fairge, a shéidear le gaoith, agus a tha air a luasgadh a null agus a nall.

7 Oir na saoiladh an duine sin gu'm faigh e ni air bith o'n Tighearn.

8 Tha fear na h-inntinn dùbailte neo-sheasmhach 'na uile shlighibh.

9 Dèanadh am bràthair a tha ìosal gàirdeachas 'na àrdachadh:

10 Ach an duine saoibhir, 'na ìsleachadh: do bhrìgh mar bhlàth an fheoir gu'n téid e seachad:

11 Oir air éirigh do'n ghréin le dian theas, crìonaidh i am feur, agus tuitidh a bhlàth, agus théid maise a dhreach am mugha: is amhuil sin mar an ceudna a sheargas an duine saoibhir 'na shlighibh.

12 Is beannaichte an duine a ghiùlaineas buaireadh: oir 'nuair a dhearbhar e, gheibh e crùn na beatha, a gheall an Tighearn do'n dream a ghràdhachas e.

13 Na abradh neach sam bith 'nuair a bhuairear e. Tha mi air mo bhuaireadh le Dia: oir cha chomasach Dia a bhuaireadh le h-olc, ni mò a bhuaireas e neach sam bith.

14 Ach tha gach duine air a bhuaireadh, 'nuair a thairngear, agus a thàlaidhear e le 'ana-miann féin.

15 An sin air bhi do'n ana-miann torrach, beiridh e peac-

adh: agus air do'n pheacadh bhi air a chrìochnachadh, beiridh e bàs.

16 Na bithibh air bhuir mealladh, mo bhràithre gràdhach.

17 Tha gach uile dheadh thabhartas, agus gach uile thiodhlac iomlan o'n àirde, a' teachd a nuas o Athair na soillse, maille ris nach 'eil atharrachadh, no sgàile tionndaidh.

18 O 'thoil féin ghin e sinn le focal na fìrinn, chum gu'm bith-eamaid 'nar gnè cheud-toraidh d'a chreutairibh.

19 Uime sin, mo bhràithre gràdhach, biodh gach duine ealamh chum éisdeachd, mall chum labhairt, mall chum feirge:

20 Oir cha'n oibrich fearg duine fireantachd Dhé.

21 Uime sin cuiribh uaibh gach uile shalachar, agus an-abharr mì-ruin, agus gabhaibh do bhuir n-ionnsuidh le macantas am focal a tha air a shuidheachadh annaibh, a tha comasach air bhuir n-anaman a thèarnadh.

22 Ach bithibh-sa 'nur luchd chur an gnìomh an fhocail, agus na b'ann 'nur luchd-éisdeachd a mhàin, 'gur mealladh féin.

23 Oir ma tha neach air bith na fhear-éisdeachd an fhocail, agus cha'n ann 'na fhear-dèanamh d'a réir is cosmhuil e ri duine a tha 'g amharc air 'aghaidh nàdurra féin ann an sgàthan:

24 Oir bheachdaich e air féin, agus dh'imich e roimhe, agus dhì-chuimhnich e air ball cìod an coslas duine a bh'ann féin.

25 Ach ge b'e bheachdaicheas gu dùrachdach air lagh dìongmhalla 'na saorsa, agus a bhuan-aicheas ann, gun e bhi 'na fhear-éisdeachd dearmadach, ach 'na fhear-dèanamh na h-oibre, bithidh an duine so beannaichte 'na dhèanadas.

26 Ma shaoileas neach air bith 'nur measg gu bheil e diadhaidh, 'gun bhi cur sréin r' a theangaidh, ach a' mealladh a chridhe féin, is dìomhain diadhachd an duine so.

27 'S i so an diadhachd fhiorghlan agus neo-shalach am fianuis Dé agus an Athar, dilleachdain agus bantracha fhiosrachadh 'nan trioblaid, agus neach 'ga choimhead féin gun smal o'n t-saoghal.

CAIB. II.

MO bhràithre, na biodh agaibh creidimh ar Tighearna Iosa Crìosd, *Tighearna* na glòire, maille ri gnùis-bhreth.

2 Oir ma thig a steach do 'ur coimhthional duine air am bheil fàinne òir, ann an eudach dealrach, agus gu'n tig a steach mar an ceudna duine bochd ann an eudach suarach;

3 Agus gu'n amhaire sibh le meas air an duine sin air am bheil an deadh thrusgan, agus gu'n abair sibh ris, Suidh thusa an so ann an àit inbheach; agus gu'n abair sibh ris an *duine* bhochd, Seas thusa an sin, no suidh an so fo stòl mo chos:

4 Nach 'eil sibh mar sin leth-bhretheach annaibh féin, agus nach d'rinneadh sibh 'nur breith-eamhnaibh dhroch smuainte?

5 Eisdibh, mo bhràithre gràdhach, nach do thagh Dia bochdan an t-saoghail so, saoibhir ann an creidimh, agus 'nan oighreachaibh air an rioghachd, a gheall e dhoibh-san a ghràdh-aiheas e?

6 Ach thug sibhse masladh do'n bhochd. Nach 'eil na daoine saoibhir ri an-tighearnas oirbh, agus 'gur tarruing gu caithrichibh-breitheanais?

7 Nach 'eil iad a' toirt toibh-

eim do'n ainm òirdheirc, a dh'-ainmichear oirbh?

8 Ma choimhlionas sibh an lagh rioghail a réir an sgriob-tuir, Gràdhaich do choimhearsnach mar thu féin, is maith a nì sibh:

9 Ach ma nì sibh leth-bhreth air daoineibh, tha sibh a' dèanamh peacaidh, agus tha sibh air bhur fàgail shìos leis an lagh mar a luchd-brisidh.

10 Oir ge b'e neach a choimhideas an lagh uile, agus a thuislicheas ann an aon *àithne*, tha e ciontach do'n iomlan.

11 Oir an tì a thubhairt, Na dèan adhaltrannas, thubhairt e mar an ceudna, Na dèan mortadh. A nis ged nach dèan thu adhaltrannas, gidheadh ma nì thu mortadh, rinneadh fear-brisidh an lagha dhìot.

12 Gu ma h-amhluidh sin a labhras sibhse, agus gu ma h-amhluidh a nì sibh, mar iadsan air an téid breth a thoirt le lagh na saorsa.

13 Oir gheibh e-san breitheanas gun tròcair, nach d'rinn tròcair; agus nì tròcair gàirdeachas an aghaidh breitheanais.

14 Ciod an tairbhe, mo bhràithre, ged their aon neach gu bheil creidimh aige, agus gun oibre bhi aige? an urrainn creidimh a thèarnadh?

15 Ma bhios bràthair no piuthar lomnochd, agus a dh'uir-easbhuidh teachd-an-tìr lathail;

16 Agus gu'n abair neach agaibh-sa riu, Imichibh an sìth, bithibh air bhur garadh, agus bithibh air bhur sàsachadh: gidheadh nach toir sibh dhoibh na nithe sin a tha feumail do'n chorp; ciod an tairbhe *ta ann*?

17 Is amhuil sin creidimh mar an ceudna, mur bì oibre aige, tha e marbh, air dha bhi leis féin.

18 Ach a ta neach àraidh ag ràdh, Tha creidimh agad-sa, agus tha oibre agam-sa: nochd dhomh-sa do chreidimh as eugmhais t'oibre, agus nochdaidh mise dhuitse mo chreidimh le m' oibribh.

19 Tha thu creidsinn gu bheil aon Dia ann; is maith a nì thu: tha na deamhain a' creidsinn mar an ceudna, agus tha iad a' criothnachadh.

20 Ach, O dhuine dhiomhain, an àill leat fios fhaotainn, gu bheil creidimh as eugmhais oibre marbh?

21 Nach deachaidh ar n-ath-air Abraham fhìreanachadh le oibribh, 'nuair a thug e suas a mhac Isaac air an altair?

22 Nach léir dhuit gu'n do chomh-oibrich creidimh le 'ghnìomharaibh, agus gu'n d-rinneadh creidimh iomlan le oibribh?

23 Agus choimhlionadh an sgriobtuir a ta ag ràdh, Chreid Abraham Dia, agus mheasadh sin da mar fhìreantachd: agus ghoireadh caraid Dé dheth.

24 Chì sibh uime sin gu'm fireanaichear duine le oibribh, agus cha'n ann le creidimh a mhàin.

25 Amhuil sin mar an ceudna, nach robh Rahab an strìopach air a fireanachadh le oibribh, 'nuair a ghabh i ris na teachdairibh, agus a chuir i mach air slighe eile iad?

26 Oir mer a ta an corp marbh as eugmhais an spioraid, mar sin mar an ceudna tha creidimh marbh as eugmhais oibre.

CAIB. III.

MO bhràithre, na bithibh 'nur mòran mhaighstirean, air dhuibh fios a bhi agaibh gu'm faigh sinn an tuilleadh breith-eanais.

2 Oir ann am mòran nithe tha sinn uile ciontach. Mur 'eil duine ciontach ann am focal, is duine iomlan an tì sin, comasach mar an ceudna air srian a chur ris a' chorp uile.

3 Feuch, tha sinn a' cur shrian am beul nan each, chum gu'm bì iad ùmhal dhuinn; agus tionndaidh sinn an corp uile mu'n cuairt.

4 Feuch mar an ceudna na longa, ged tha iad co mòr, agus ged shéidear iad le garbhghaothaibh, gidheadh tionndaidhear mu'n cuairt iad le stiuir ro bhig, ge b'e taobh gus am miann leis an stiùradair.

5 Is amhuil sin is ball beag an teangadh, agus nì i mòr-uail. Feuch, cia meud an connadh a lasas teine beag!

6 Agus is teine an teangadh, saoghal do aingidheachd: mar sin tha an teangadh air a suidheachadh am measg ar ball, ionnus gu'n salaich i an corp gu h-iomlan, agus gu'n las i cùrsa an nàduir; agus i féin air a lasadh o ifrinn.

7 Oir a ta gach uile ghnè fhiadh-bheathaiche, agus eunlaith, agus nithe snàigeach, agus nithe san fhairge, air an ceannsachadh; agus cheannsaicheadh iad leis a' chinne-daoine:

8 Ach cha chomasach do dhuine air bith an teangadh cheannsachadh; is olc do-chasgaidh i, làn do nimh marbhtach.

9 Leatha-sa tha sinn a' beannachadh Dhé, eadhon an Athar; agus leatha-sa tha sinn a' mallachadh dhaoine, a rinneadh a réir cosamhlachd Dhé.

10 As an aon bheul tha beannachadh agus mallachadh a' teachd a mach. Mo bhràithre, cha chòir do na nithibh so bhi mar so.

11 An cuir tobar a mach as an aon sùil *uisge* milis agus searbh?

12 'Am feud craobh-fhìge, mo bhràithre, dearcan oladh a thoirt uaipe? no a' chraobh-fhìona, fìgean? mar sin cha'n fheud tobar sam bith sàile agus *uisge* milis a thoirt uaith araon.

13 Cò a ta 'na dhuine glic agus aig am bheil eòlas 'nur measg? nochdadh e á deadh chaithe-beatha 'oibre féin le ceannsachd gliocais.

14 Ach ma tha eud searbh agus comhstri agaibh 'nur cridhe, na dèanaibh uail, agus na dèanaibh breug an aghaidh na firinn.

15 Cha'n ann o'n àirde tha'n gliocas so a' teachd a nuas, ach *tha* e talmhaidh, collaidh, diabhluidh.

16 Oir far am *bheil* farmad agus comhstri, an sin *tha* buair-eas, agus gach uile dhroch ghnìomh.

17 Ach a ta an gliocas a tha o'n àirde air tùs glan, an déigh sin sìochail, ciuin, agus so-chomhairlich, làn do thròcair agus do dheadh thoraibh, gun leth-bhreth agus gun cheilg.

18 Agus tha toradh na fir-eantachd air a chur ann an sìth do luchd-dèanamh na sìthe.

CAIB. IV.

CIA as a ta coganna agus còmhraga a' teachd 'nur measg? nach ann as a so, *eadhon* o bhur n-ana-miannaibh, a tha cogadh ann bhur ballaibh?

2 Tha sibh a' miannachadh, agus cha'n 'eil agaibh: tha sibh a' marbhadh, agus a' dian-shanntachadh, agus cha'n 'eil e'n comas duibh ni fhaotainn: tha sibh a' cathachadh agus a' cogadh, gidheadh cha'n 'eil agaibh, do bhrìgh nach 'eil sibh ag iarraidh.

3 Tha sibh ag iarraidh, agus cha'n 'eil sibh a' faotainn, do bhrìgh gu bheil sibh ag iarraidh gu h-olc, chum gu'n caith sibh e air bhur n-ana-miannaibh.

4 Adhaltrannacha, agus a bhan-adhaltrannacha, nach 'eil fhios agaibh gur naimhdeas an aghaidh Dhé càirdeas an t-saoghail? ge b'e air bith neach uime sin leis an àill bhi 'na charaid do'n t-saoghal, tha e 'na nàmhaid do Dhia.

5 Am bheil sibh a' smuain-eachadh gu bheil an sgriobtuir gu diomhanach a' labhairt? Tha an spiorad a tha chòmh-nuidh annainn a' togairt gu farmad.

6 Ach bheir e gràs a's mò uaith: uime sin a ta e ag ràdh, Tha Dia a' cur an aghaidh nan uaibhreach, ach a' toirt gràis dhoibh-san a ta iriosal.

7 Uime sin ùmhlaichibh sibh féin do Dhia; cuiribh an aghaidh an diabhuil, agus teichidh e uaibh:

8 Dlùthaichibh ri Dia, agus dlùthaichidh e ribh: glanaibh *bhur* làmhan, a pheacacha, agus glanaibh *bhur* cridhe, sibhse aig am bheil an inntinn dhùbailte.

9 Bithibh ann an àmhghar, agus dèanaibh caoidh, agus gul: biodh bhur gàire air a thionndadh gu bròn, agus *bhur* n-aoibh-neas gu tuirse.

10 Irioslaichibh sibh féin am fianuis an Tighearn, agus àrdaichidh e sibh.

11 Na labhraibh olc mu chéile, a bhràithre. An tì a tha labhairt uile m'a bhràthair, agus a' toirt breth air a bhràthair, tha e labhairt uile mu'n lagh, agus a' toirt breth air an lagh: ach ma tha thu toirt breth air an lagh, cha'n fhear-coimhleanaidh an lagha thu, ach breitheamh.

12 Tha aon fhear-tabhairt lagha ann, a's urrainn saoradh agus sgrios: cò thusa a tha toirt breth air neach eile?

13 Imichibh a nis, sibhse a ta ag ràdh, Théid sinn an diugh no maireach gus a' leithid so do bhaile, agus fanaidh sinn an sin rè bliadhna; agus nì sinn ceannachd, agus gheibh sinn buannachd:

14 'Nuair nach 'eil fhios agaibh ciod a thàrlas air a' mhair-each: oir ciod i bhur beatha? is deatach i a chithear rè ùine bhig, agus an déigh sin a théid as an t-sealladh.

15 An àit *gu'm bu chòir* dhuibh a ràdh, Ma's toil leis an Tighearn, bithidh sinn beò, agus nì sinn so, no sud.

16 Ach a nis tha sibh a' dèanamh uaille as bhur ràiteachas féin: is olc gach uile shamhuil sin do uail.

17 Uime sin dhasan d'an aithne maith a dhèanamh, agus nach dèan e, is peacadh e dha.

CAIB. V.

IMICHIBH a nis, a dhaoine saoi bhir, dèanaibh gul agus caoidh air son bhur n-àmghar a tha teachd oirbh.

2 Tha bhur saoi bheas air truailleadh, agus bhur n-eudach air itheadh leis an leomann.

3 Tha bhur n-òr agus bhur n-airgiod air meirgeadh; agus bithidh am meirg-san 'na fhianuis 'nur n-aghaidh, agus ithidh i bhur feoil mar theine: thaisg sibh ionmhas fa chomhair nan làithean deireannach.

4 Feuch, tha tuarasdail an luchd-oibre, a bhuain sìos bhur n-achaidh, nì a chumadh uatha leibhse le féill, ag éigheach: agus tha glaothaich na muinntir a bhuain, air dol a stigh chum cluasa Tighearna nan sluagh.

5 Chaith sibh bhur beatha ann an sògh air thalamh, agus bha sibh mear; dh'altrum sibh bhur cridheacha, mar ann an là a' mharbhadh.

6 Dhìt agus mharbh sibh am firean, agus cha'n 'eil e cur 'nur n-aghaidh.

7 Uime sin, a bhràithre, bithibh foighidneach gu teachd an Tighearna. Feuch, feithidh an treabhaiche ri toradh luachmhor an talmhainn, agus fanaidh e gu foighidneach ris, gus am faigh e an ceud uisge agus an t-uisge deireannach.

8 Bithibh-sa foighidneach mar an ceudna; socraichibh bhur cridheacha: oir tha teachd an Tighearn am fasus.

9 Na dèanaibh gearan an aghaidh a chéile, a bhràithre, chum nach dìtear sibh: feuch, tha am Breitheamh 'na sheasamh aig an dorus.

10 Gabhaibh, mo bhràithre, na fàidhean, a labhair ann an ainm an Tighearna, 'nan eis-empleir air an-shocair fhulang, agus air foighidin.

11 Feuch, measar sona leinn iadsan a dh'fhuilingeas. Chuala sibh iomradh air foighidin Iob, agus chunnaic sibh crìoch an Tighearna; gu bheil an Tighearna ro thiom-chridheach agus tròcaireach.

12 Ach roimh na h-uile nithe, mo bhràithre, na tugaibh mionn-an, aon chuid air nèamh, no air an talamh, no air aon mhiannan eile: ach gu'm b'e bhur còmh-radh Seadh, seadh, agus Cha'n eadh, cha'n eadh; air eagal gu'n tuit sibh ann an dìteadh.

13 Am bheil neach sam bith fo thrioblaid 'nur measg? dèanadh e ùrnuigh. Am bheil neach sam bith subhach? seinneadh e sailm.

14 Am bheil neach sam bith

tinn 'nur measg? cuireadh e fios air seanairibh na h-eaglais; agus dèanadh iad ùrnuigh os a cheann, 'ga ùngadh le h-oladh ann an ainm an Tighearna:

15 Agus slànuichidh ùrnuigh a' chreidimh an t-euslan, agus togaidh an Tighearn suas e; agus ma rinn e peacanna, maith-ea dha iad.

16 Aidichibh *bhur* lochdan d'a chéile, agus dèanaibh ùrnuigh air son a chéile, chum gu'n tèarnar sibh: tha mòr-éifeachd ann an ùrnuigh dhùrachdaich an fhìrein.

17 Bu duine Elias aig an

robh comh-aighe ruinne, agus ghuidh e gu dùrachdach gun uisge bhi ann: agus cha d'-thàinig uisge air an talamh rè thrì bliadhna agus shè mìosan.

18 Agus rinn e ùrnuigh a rìs, agus thug nèamh uisge uaith, agus thug an talamh a mach a thoradh.

19 A bhràithre, ma théid aon neach agaibh-sa air seacharan o'n fhìrinn, agus gu'n iompaich neach e;

20 Biodh fhios aige, an duine a dh'iompaicheas peacach o sheacharan a shlighe, gu'n saor e anam o bhàs, agus gu'm fol-aich e mòran pheacanna.

CEUD LITIR CHOITCHIONN AN ABSTOIL PHEADAIR.

CAIB. I.

PEADAR abstol Iosa Crìosd, chum nan coigreach a tha air an sgapadh tre Phontus, Ghalatia, Chapadocia, Asia, agus Bhitinia,

2 A thaghadh a réir roimh-eòlas Dhé an Athar, tre naomhachadh an Spioraid, chum ùmh-lachd, agus crathadh fola Iosa Crìosd: Gràs agus sìth gu robh air am meudachadh dhuibhse.

3 Gu ma beannaichte gu *robh* Dia agus Athair ar Tighearna Iosa Crìosd, neach a réir a mhòr-thròcair, a dh'ath-ghin sinne gu beò-dhòchas, tre aiseirigh Iosa Crìosd o na marbhaibh,

4 Chum oighreachd neò-thruaillidh, agus neò-shalaich, agus nach searg as, a tha air a coimhead sna nèamhaibh dhuibhse,

5 A tha air *bhur* coimhead le cumhachd Dhé tre chreidimh

chum slàinte, a tha ullamh r'a foillseachadh san aimsir dheireannaich:

6 Ni anns am bheil sibh a' dèanamh mòr-ghàirdeachais, ged tha sibh a nis rè ùine bhig, (ma's feumail e,) fo thuirse tre iomadh buaireadh.

7 Chum gu faighear dearbhadh *bhur* creidimh, ni 's luach-mhoire gu mòr na òr a théid am mugha, ged dhearbhar le teine e, chum cliù, agus urraim, agus glòir aig foillseachadh Iosa Crìosd;

8 D'am bheil sibh a' toirt gràidh, ged nach faca sibh e; agus ged nach 'eil sibh a nis 'ga fhaicinn, air dhuibh bhi creidsinn ann, tha sibh a' dèanamh mòr-ghàirdeachais le h-aoibhneas air dol thar labhairt, agus làn do ghlòir:

9 A' faotainn crìche *bhur* creidimh, *eadhon* slàinte *bhur* n-anama:

10 Slàinte mu'n d'fhiosraich na fàidhean, agus mu'n d'rinn iad geur-rannsachadh, muinntir a rinn fàidheadaireachd mu'n ghràs a bha gu teachd do 'ur n-ionnsuidh-sa ;

11 A' rannsachadh ciod i, no ciod a' ghnè aimsir a bha Spiorad Chrìosd annta-san a' foillseachadh, 'nuair a rinn e fianuis roimh-làimh air fulangasaibh Chrìosd, agus a' ghlòir a bha gu'n leantuinn.

12 Muinntir d'an d'fhoillsich-eadh, nach b'ann doibh féin, ach dhuinne a fhrithheil iad na nithe a tha nis air an cur an céill duibh leo-san a shearmonaich an soisgeul duibh, leis an Spiorad naomh a chuireadh a nuas o nèamh ; nithe air am miann leis na h-ainglibh beachdachadh.

13 Uime sin crioslaichibh leasraidh bhur n-inntinn, bithibh measarra, agus biodh dòchas dìongmhailta agaibh as a' ghràs a bheirear dhuibh aig foillseachadh losa Crìosd ;

14 Mar chloinn ùmhal, gun bhi 'gur còmh-chumadh féin ris na h-ana-miannaibh, a bha agaibh roimh ann an àm bhur n-aineolais :

15 Ach a réir mar a ta e-san a ghairm sibh naomh, bithibh-sa naomha mar an ceudna 'nur n-uile chaithe-beatha :

16 Do bhrìgh gu bheil e sgriobhta, Bithibh-sa naomha, oir a ta mise naomh.

17 Agus ma ghoireas sibh air an Athair, a bheir breth a réir oibre gach neach, gun chlaon-bhàigh ri neach seach a chéile, caithibh aimsir bhur cuairt an so le h-eagal :

18 Air dhuibh fios a bhi agaibh nach do shaoradh sibh le nithibh truailidh, mar a ta airgiod agus òr, o bhur caithe-

beatha dìomhain, a thugadh dhuibh o bhur sinnsireachd ;

19 Ach le fuil luachmhoir Chrìosd, mar fhuil Uain gun chron, gun smal :

20 Neach gu deimhin a roimh-òrduicheadh roimh chruthachadh an t-saoghail, ach a dh'fhoillsicheadh anns na h-aimsiribh deireannach air bhur sonsa ;

21 Muinntir trìd-san a ta creidsinn ann an Dia a thog e-san o na marbhaibh, agus a thug glòir dha, chum gu'm biodh bhur creidimh agus bhur muinghin ann an Dia.

22 Do bhrìgh gu'n do ghlan sibh bhur n-anama le ùmhlachd a thoirt do'n fhirinn tre 'n Spiorad, chum gràidh neò-chealg-aich do na bràithribh ; feuchaibh gu'n toir sibh gràdh d'a chéile á cridhe glan gu dùrachdach :

23 Air dhuibh bhi air bhur n-ath-ghineamhuin, cha'n ann o shìol truailidh, ach neò-thruailidh, le focal an Dé bheò, agus a mhaireas gu sìorruidh.

24 Oir tha gach uile fheoil mar fheur, agus uile ghlòir dhaoine mar bhlàth an fheoir. Seargaidh am feur, agus tuitidh a bhlàth dheth :

25 Ach fanaidh focal an Tigh-earna gu sìorruidh. Agus is e so am focal a shearmonaicheadh dhuibhse anns an t-soisgeul.

CAIB. II.

UIME sin a' cur uaibh gach uile mhi-ruin, agus gach uile mhealltaireachd, agus chealg, agus fharmada, agus gach uile ana-cainnt,

2 Mar naoidheana air an ùr-bhreith, iarraibh bainne fìorghlan an fhocail, chum as gu fàs sibh leis ;

3 Ma's e as gu'n do bhlais sibh gu bheil an Tighearn gràsmhor.

4 A' teachd d'a ionnsuidh-san,

mar gu cloich bheò, a dhiùltadh gu deimhin le daoinibh, ach air a taghadh o Dhia agus luachmhor;

5 Tha sibhse mar an ceudna mar chlochaibh beò, air bhur togail suas 'nur tigh spioradail, 'nur sagartachd naomh, chum iobairte spioradail a thoirt suas, taitneach do Dhia tre Iosa Crìosd.

6 Uime sin a ta so mar an ceudna air a chur sìos anns an sgriobtuir, Feuch, cuiridh mi ann an Sion prìomh chlach-oisne thaghta, luachmhor: agus an tì a chreideas ann, cha chuirear gu nàire e.

7 Dhuibhse uime sin a chreideas, *tha e* luachmhor: ach dhoibh-san a tha eas-ùmhail, a' chlach a dhiùlt na clachairean, rinneadh ceann na h-oisne d' i,

8 Agus clach-thuislidh, agus carraig oilbheim, *dhoibh-san* a thuislicheas air an fhocal, air dhoibh bhi eas-ùmhail, chum mar an ceudna an d'òrduicheadh iad.

9 Ach *is* ginealach taghta sibhse, sagartachd rìoghail, cinn-each naomh, sluagh sònraichte; chum gu'n cuireadh sibh an céill feartan an Tì a ghairm á dorchadas sibh chum a sholuis iongantach féin:

10 Nach *robh* uair-éigin 'nur sluagh, ach a nis *is* sibh sluagh Dhé: dream nach d'fhuair tròc-air, ach a nis a tha air faotainn tròcair.

11 A mhuinntir mo ghràidh, guidheam oirbh, mar choigrich agus luchd-cuairt, sibh a sheachnadh ana-mianna feòlmhor, a tha cogadh an aghaidh an ana-ma;

12 Air dhuibh deadh chaithe-beatha bhi agaibh am measg nan Cinneach; chum an àit olc a labhairt umaibh mar luchd mì-ghnìomh, gu'n dèan iad o bhur

deadh oibribh a chì iad, Dia a ghlòrachadh ann an là an fhiosrachaidh.

13 Uime sin bithibh-sa ùmhail do gach uile riaghailt dhaoine air son an Tighearna: ma's ann do'n rìgh, mar an tì a's àirde inbhe;

14 No do uachdaranaibh, mar do'n mhuinntir a chuireadh uaith chum dìoghaltais air luchd-dèanamh an uile, ach chum cliù dhoibh-san a nì maith.

15 Oir is i toil Dé gun cuir-eadh sibhse le deadh dhèanadas tosd air aineolas dhaoine amaid-each:

16 Mar dhaoine saor, agus gun *bhur* saorsa a ghnàthachadh mar bhrat-folaich do'n olc, ach mar sheirbhisich Dhé.

17 Thugaibh urram do na h-uile dhaoine. Gràdhaichibh na bràithre. Biodh eagal Dé oirbh. Thugaibh urram do'n rìgh.

18 A sheirbhiseacha, *bithibh* ùmhail do'ur maighstiribh maille ris an uile eagal, cha'n e mhàin dhoibh-san a tha maith agus ciuin, ach mar an ceudna dhoibh-san a tha ana-mèineach.

19 Oir *a ta* so cliù-thoillteann-ach, ma dh'iomchaires neach sam bith doilgheas air son coguis a thaobh Dhé, a' fulang gu h-eucorach.

20 Oir ciod an t-aobhar molaidh *a ta ann*, ma's e an uair a ghabhar oirbh air son bhur cionta, gu'n giùlain sibh gu foighidneach e? ach ma's e 'nuair a ta sibh a' dèanamh maith, agus a' fulang *air a shon*, gu'n giùlain sibh e gu foighidneach, *tha* so taitneach do Dhia.

21 Oir is ann a dh'ionnsuidh so a ghairmeadh sibh: do bhrìgh gu'n d'fhuiling Crìosd mar an ceudna air bhur son, a' fàgail eisempleir agaibh, chum gu lean-adh sibh a cheumanna:

22 Neach nach d'rinn peacadh, nì mò a fhuaradh cealg 'na bheul:

23 Neach, 'nuair a chàineadh e, nach do chàin a ris; 'nuair a dh'fhuiling e, nach do bhagair; ach a dh'earb *e féin* ris-san a bheir breth cheart:

24 Neach a ghiùlain ar peacanna e féin 'na chorp féin air a' chrann, chum air dhuinn bhi marbh do'n pheacadh, gu'm bitheamaid beò do fhìreantachd: neach le a bhuillibh-san a tha sibh air bhur tèarnadh.

25 Oir bha sibh mar chaoraich a' dol air seacharan; ach philleadh sibh a nis chum Buachail agus Easbuig bhur n-anama.

CAIB. III.

MAR an ceudna, a mhnà, *bithibh* ùmhal do 'ur fearaibh féin, chum ma tha dream air bith eas-ùmhal do'n fhocal, gu'm bì iadsan mar an ceudna, as eugmhais an fhocail, air an cosnadh le deadh chaithe-beatha nam ban.

2 'Nuair a bheachdaicheas iad air bhur caithe-beatha gheamnuidh maille ri h-eagal.

3 Na b' i bhur breaghachd, figheadh an fhuilt agus a' cur òir oirbh, agus dheadh thrusgan umaibh, *a' bhreaghachd sin* o'n leth muigh:

4 Ach duine folaichte a' chridhe, ann an neo-thruaillidheachd spioraid mhacanta agus chiuin, nì a tha ro luachmhor ann an sealladh Dhé.

5 Oir b'ann mar so a rinn na mnà naomha o shean, aig an robh am muinghin ann an Dia, iad féin breagha, air dhoibh bhi ùmhal d'am fearaibh féin;

6 Amhuil a thug Sarah ùmh-lachd do Abraham, a' gairm tighearna dheth: d'an nigheana sibhse am feadh a nì sibh gu

maith, agus gun gheilt oirbh le h-uamhas sam bith.

7 Mar an ceudna, 'fheara, gabhaibh-sa còmhnuidh maille ri u a réir eòlais, a' tabhairt urraim do'n mhnaoi mar an soith-each a's anmhuinne, agus mar mhuinntir a tha 'nan comh-oighreachaibh air gràs na beatha; chum nach cuirear bacadh air bhur n-ùrnuighibh.

8 Fa dheoidh, *bithibh* uile a dh'aon inntinn, biodh comh-fhulangas agaibh r'a chéile, gràdhaichibh a chéile mar bhràithre, *bithibh* truacanta, càirdeil:

9 Na òcaibh olc air son uile, no càineadh air son càinidh: ach 'na aghaidh sin, beannaichibh; air dhuibh fios bhi agaibh gur ann a dh'ionnsuidh so a ghairmeadh sibh, chum gu'n sealbh-aicheadh sibh beannachadh mar oighreachd:

10 Oir ge b'e le'm b'àill beatha a ghràdhachadh, agus làithean maithe fhaicinn, cumadh e a theangadh o olc, agus a bhilean o labhairt ceilg.

11 Seachnadh e olc, agus dèanadh e maith; iarradh e sìth, agus leanadh e i.

12 Oir *tha* sùilean an Tighearn air na fìreanaibh, agus a chluasa fosgailte r'an ùrnuigh: ach *tha* gnùis an Tighearn an aghaidh na muinntir a nì olc.

13 Agus cò e a nì olc oirbh, ma bhios sibh 'nur luchd-leanmhuinn air an nì sin a ta maith?

14 Ach eadhon ma dh'fhuilingeas sibh air sgàth fireantachd, *is* sona sibh: agus na biodh fiamh an eagail-san oirbh, agus na bithibh mì-shuaimhneach;

15 Ach naomhaichibh an Tighearn Dia ann bhur cridheachaidh: agus *bithibh* ullamh a ghnàth chum freagradh a thoirt, maille ri ceannsachd agus eagal,

do gach uile dhuine a dh'iarraas oirbh reuson an dòchais a tha annaibh:

16 Air dhuibh deadh choguis a bhi agaibh; chum, 'nuair a thaid a' labhairt uile 'nur n-aghaidh mar luchd mì-gnìomh, gu'n gabh iadsan nàire, a tha toirt toibheim do 'ur deadh chaithe-beatha ann an Crìosd.

17 Oir is fearr, ma's e sin toil Dé, sibh a dh'fhulang air son maith a dhèanamh, na air son uile a dhèanamh.

18 Oir dh'fhuiling Crìosd féin aon uair air son pheacanna, am fìrean air son nan neo-fhìrean, (chum gu'n tugadh e sinne gu Dia,) air dha bhi air a chur gu bàs san fheoil, ach air a bheothachadh tre an Spiorad:

19 Leis an deachaidh e mar an ceudna, agus an do shearmonaich e do na spioradaibh ann am prìosan;

20 A bha o shean eas-ùmhal, 'nuair a dh'fheith fad-fhulangas Dé aon uair ann an làithibh Noah, am feadh a bha àirc 'ga h-ulluchadh, anns an robh beagan, sin r'a ràdh, ochd anaman, air an tèarnadh tre uisge.

21 Tha am baisteadh, mar shamhlachas a tha comh-fhreagradh dha so, (cha'n e cur dhinn sal na feòla, ach freagradh deadh choguis thaobh Dhé,) nis 'gar tèarnadh-ne, tre aiseirigh Iosa Crìosd:

22 Neach air dha dol gu nèamh, a tha air deas làimh Dhé, air do ainglibh, agus do uachdranachdaibh, agus do chumhachdaibh bhi air an cur fo 'cheannsal-san.

CAIB. IV.

UIME sin, odh'fhuiling Crìosd air ar son-ne san fheoil, armaichibh-sa mar an ceudna sibh féin leis an inntinn cheud-

na: oir an tì a dh'fhuiling anns an fheoil, sguir e do pheacadh;

2 Chum nach caitheadh e fuigheall 'aimsir anns an fheoil, a réir ana-mianna dhaoine, ach a réir toile Dhé.

3 Oir is leoir dhuinn a' chuid a chaidh seachad do aimsir ar beatha gu toil nan Cinneach a dhèanamh, 'nuair a shiubhail sinn ann am macnus, ann an ana-miannaibh, ann an anabh-arra fiona, ann an geòcaireachd, ann am pòiteireachd, agus ann an iodhol-aoradh an-dligheach:

4 Ni anns am bheil iad a' gabhail iongantais, do bhrìgh nach 'eil sibhse a' ruith maille riu anns an neò-mheasarrachd cheudna gun tomhas, a' labhairt uile *umaibh*:

5 Muinntir a bheir cunntas hasan, a tha ullamh gu breth a thoirt air na beothaibh agus air na marbhaibh.

6 Oir is ann chum na crìche so a shearmonaichheadh an soisgeul dhoibh-san a tha marbh mar an ceudna, chum gu'n tugadh breth orra a réir dhaoine san fheoil, ach gu'm biodh iad beò a réir Dhé san Spiorad.

7 Ach a ta crìoch nan uile nithe am fagus: uime sin bithibh measarra, agus dèanaibh faire chum ùrnuigh.

8 Agus roimh na h-uile nithibh biodh agaibh teas-ghràdh d'a chéile; oir cuiridh gràdh folach air mòran pheacanna.

9 Thugaibh aoidheachd d'a chéile gun ghearan.

10 A réir mar a fhuair gach aon an tiodhlac, *mar sin* dèanaibh frithealadh d'a chéile, mar dheadh stiùbhardaibh air gràs eag-samhuil Dé.

11 Ma labhras neach sam bith, *labhradh e* mar bhriathraibh

Dhé; ma tha neach sam bith ri frithealadh, *dèanadh se e* mar o'n chomas a bheir Dia *dha*; chum gu'm bi Dia air a ghlòrachadh anns na h-uile nithibh tre Iosa Crìosd: dhasan gu robh glòir agus cumhachd gu saoghal nan saoghal. Amen.

12 A mhuinntir mo ghràidh, na biodh iongantais oirbh thaobh na deuchainn theinntich, a thig oirbh chum bhur dearbhadh, mar gu'n tàrladh ni-éigin neo-ghnàthach dhuibh:

13 Ach do bhrìgh gu bheil sibh 'nur luchd-comhpàirt do fhulangasaibh Chrìosd, dèanaibh gairdeachas; chum mar an ceudna, ann an àm foillseachaidh a ghlòire, gu'n dèan sibh gairdeachas le h-aoibhneas ro mbòr.

14 Ma mhaslaichearsibhairson ainme Chrìosd, *is sona sibh*; oir a ta Spiorad na glòire, agus Dbé a' gabhail còmhnuidh oirbh; d'an taobh-san gu deimhin tha e faotainn toibheim, ach do 'ur taobh-sa tha e air a ghlòrachadh.

15 Ach na fuilingeadh aon agaibh mar mhortair, no *mar* ghaduiche, no *mar* fhear droch-bheirt, no mar neach a ghabhas gnothuch ri nithibh nach buin da.

16 Gidheadh ma *dh'fhuilingeas duine* mar Chrìosduidh na biodh nàire air; ach thugadh e glòir do Dhia as a leth so.

17 Oir *thàinig* an t-àm anns an tòisich breitheanas aig tigh Dhé: agus ma thòisicheas e againne, ciod *is* crìoch dhoibh-san a tha eas-ùmhail do shoisgeul Dé?

18 Agus ma's ann air éigin a thèarnar am firean, c'ait an taisbean an duine mì-dhiadhaidh agus am peacach e féin?

19 Uime sin, an dream a dh'fhuilingeas, a réir toile Dhé,

earbadh iad an anama *ris-san* ann an dèanamh maith, mar ri Cruithear dileas.

CAIB. V.

NA seanairean a ta 'nur measg tha mi ag earail, air bhi dhomh féin a'm'sheanair mar an ceudna, agus a'm'fhianuis air fulangasaibh Chrìosd, agus mar an ceudna a'm'fhear-comhpàirt do'n ghlòir sin, a tha gu bhi air a foillseachadh:

2 Beathaichibh treud Dhé a tha 'nur measg, a' gabhail cùraim *dheth*, cha'n ann a dh'aindeoin, ach gu deònach; cha'n ann air son buannachd shalaich, ach le h-inntinn ealamh;

3 Ni mò mar thighearnaibh os ceann oighreachd *Dhé*, ach mar dhream a tha 'nan eisemp-leiribh do'n treud.

4 Agus an uair a dh'fhoillsichear an t-àrd-bhuachaill, gheibh sibh crùn na glòire nach searg as.

5 Mar an ceudna, a dhaoine òga, bithibh ùmhail do na sean-airibh: seadh, bithibh uile ùmhail d'a chéile, agus bithibh air bhur sgeadachadh le h-irioslachd: oir tha Dia a' cur an aghaidh nan uaibhreach, ach a' toirt gràis dhoibh-san a tha iriosal.

6 Uime sin irioslaichibh sibh féin fo làimh chumhachdaich Dhé, chum as gu'n àrdaich e sibh ann an àm iomchuidh:

7 A' tilgeadh bhur n-uile chùraim air-san; oir a ta eùram aige dhibh.

8 Bithibh stuama, dèanaibh faire; do bhrìgh gu bheil bhur nàmhaid an diabhl, mar leò-mhan beuchdach, ag imeachd mu'n cuairt a' sireadh cò a dh'fheudas e shlugadh shas.

9 Cuiribh-sa 'na aghaidh, air dhuibh bhi daingean sa' chreid-

imh, agus fhios a bhi agaibh gu bheil na fulangais cheudna air an coimhlionadh ann bhur bràithribh, a tha san t-saoghal.

10 Ach gu dèanadh Dia féin nan uile ghràs, a ghairm sinne chum a ghlòire shiorruidh tre Iosa Crìosd, an déigh dhuibh fulang rè ùine bhig, iomlan sibh ; gu daingnicheadh, gu neartaicheadh, gu socraicheadh e sibh.

11 Dhasan *gu robh* glòir agus cumhachd, gu saoghal nan saoghal. Amen.

12 Le Siluanus bràthair dè-

eas, (a réir mo bharail-sa,) sgrìobh mi do 'ur n-ionnsuidh gu h-aithghearr, a' teagasg, agus a' dèanamh fianuis, gur e so fìor-ghràs Dé, anns am bheil sibh 'nur seasamh.

13 Tha an *eaglais* ann am Babilon, a thaghadh maille ribhse, a' cur fàilte oirbh, agus Marcus mo mhac.

14 Cuiribh fàilte air a chéile le pòig ghràidh. Sìth *gu robh* maille ribh uile a tha ann an Iosa Crìosd. Amen.

DARA LITIR CHOITCHIONN AN ABSTOIL PHEADAIR.

CAIB. I.

SIMON Peadar, seirbhiseach agus abstol Iosa Crìosd, dhoibh-san a fhuair an creidimh luachmhor ceudna ruinne, tre fhìreantachd ar Dé agus ar Slàn-ùighir Iosa Crìosd :

2 Gu robh gràs agus sìth air am meudachadh dhuibh, tre eòlas Dé, agus Iosa ar Tighearna,

3 A réir mar a dheònuich a chumhachd diadhaidh-san dhuinne na nithe sin uile a *bhuineas* do bheatha agus do dhiadhachd, tre eòlas an Tì sin a ghairm sinn chum glòire, agus deadh-bheus :

4 Tre an d'thugadh dhuinn geallanna ro mhòr agus luachmhor, chum d'an trid-san gu'm biodh sibhse air bhur dèanamh 'nur luchd-comhpàirt do nàdur na diadhachd, air dhuibh dol as o'n truaillidheachd a ta anns an t-saoghal tre ana-miann.

5 Agus a thuilleadh air so, air dèanamh an uile dhìchill duibh-

se, cuiribh ri 'ur creidimh, deadh-bheus ; agus ri deadh-bheus, eòlas ;

6 Agus ri h-eòlas, stuaime ; agus ri stuaime, foighidin ; agus ri foighidin, diadhachd ;

7 Agus ri diadhachd, gràdh bràthaireil ; agus ri gràdh bràthaireil, seirc.

8 Oir ma bhios na nithe so annaibh, agus pailte, bheir iad *oirbh* gun bhi leasg, no mì-thorrach ann an eòlas ar Tighearna Iosa Crìosd.

9 Ach an tì aig nach 'eil na nithe sin, tha e dall, agus gearr-sheallach, a' dì-chuimhneachadh gu'n do ghlanadh e o a sheann pheacaibh.

10 Uime sin. a bhràithre, dèanaibh tuilleadh dìchill chum bhur gairm agus bhur taghadh a dhèanamh cinnteach : oir ma nì sibh na nithe so, cha tuit sibh a chaoidh :

11 Oir mar sin frithealar gu pailt dhuibh slighe a steach do

rioghachd shiorruidh ar Tighearn agus ar Slànuighir Iosa Crìosd.

12 Uime sin cha dearmad mi na nithe so ghnàth-chur an cuimhne dhuibh, ged is aithne dhuibh *iad*, agus ged tha sibh air bhur daingneachadh san fhirinn a làthair.

13 Ach tha mi a' meas gur còir, am feadh a ta mi sa' phàilliuin so, sibhse a bhròsnuchadh le *'ur* cur an cuimhne :

14 Air dhomh fios a bhi agam gur fagus dhomh àm cur dhiom mo phàilliuin so, amhuil a dh'fhoillsich ar Tighearn Iosa Crìosd dhomh.

15 Ach nì mise dìchioll, chum an déigh dhomh siubhal, gu'm bì agaibh-sa gnàth-chuimhne air na nithibh so.

16 Oir cha do lean sinne faoin-sgeulachda a dhealbhadh gu h-innleachdach, 'nuair a chuir sinn an cèill duibh cumhachd agus teachd ar Tighearn Iosa Crìosd, ach rinneadh sinn 'nar sùil-fhianuisibh air a mhòrachd-san.

17 Oir fhuair e o Dhia an t-Athair urram agus glòir, 'nuair a thàinig a' shamhuil so do ghuth d'a ionnsuidh o'n ghlòir òir-dheire, Isesomho Mhacgràdhachsa, anns am bheil mo mhòr-thlachd.

18 Agus chuala sinne an guth so a thàinig o nèamh, 'nuair a bha sinn maille ris air an t-sliabh naomh.

19 Tha againn mar an ceudna focal fàidheadaireachd a's cinn-tiche; d'am maith a nì sibh aire a thoirt, mar do lòchran a tha toirt soluis uaith ann an ionad dorch, agus an soillsich an là, agus an éirich an reult-mhaidne 'nur cridheachaibh :

20 Air dhuibh fhios so a bhi agaibh air tùs, nach 'eil fàidh-

eadaireachd air bith do'n sgrìob-tuir o thogradh *dhaoine* féin.

21 Oir cha d'thàinig an fhàidh-eadaireachd a réir toil duine o shean: ach labhair daoine naomha Dhé, mar a sheòladh iad leis an Spiorad naomh.

CAIB. II.

ACH bha fàidhean bréige mar an ceudna am measg an t-sluaigh, amhuil a bhios luchd-teagaisg bréige 'nur measg-sa, dream a bheir a steach an uaighnidheas saobh-chreidimh millteach, eadhon ag àicheadh an Tighearn a cheannaich iad, agus a bheir sgrios obann orra féin.

2 Agus leanaidh mòran an slighean millteach tre am faigh slighe na firinn mì-chliu.

3 Agus tre shannt nì iad ceannachd oirbh le briathraibh mealltach: dream nach 'eil am breitheanas a nis o chian a' dèanamh moille, agus cha'n 'eil an sgrios a' tur-chodal.

4 Oir mur do chaomhain Dia na h-aingil a pheacaich, ach air dha an tilgeadh sìos do ifrinn, gu'n d'thug e thairis *iad* gu hhi air an coimhead ann an slabhraidhibh dorchadais, fa chomhair breitheanais;

5 Agus nach do chaomhain e an seann saoghal, ach gu'n do shaor e Noah an t-ochdamh *pearsa*, searmonaiche fireantachd, air dha an dìle a thoirt air saoghal nan daoine mì-dhiadhaidh;

6 Agus a' tionndadh caithriche Shodoim agus Ghomorrah gu luaithre, gu'n do dhìt e le léir-sgrios *iad*, 'gan dèanamh 'nam ball-sampuill dhoibh-san, a bhiodh mì-dhiadhaidh an dèigh sin;

7 Agus gu'n do shaor e Lot am firean, a bha fo champar le caithe-beatha neò-ghloin nan aingidh:

8 (Oir chràidh an t-ionracan sin, agus e gabhail còmhnuidh 'nam n'easg, 'anam fireanta o là gu là, le bhi faicinn agus a' cluinntinn an gnìomharan andligheach :)

9 Is aithne do'n Tighearn na daoine diadhaidh a shaoradh o bhuaireadh, agus na daoine eucorach a choimhead gu là a' bhreitheanais chum peanas a' dhèanamh orra :

10 Ach gu h-àraidh iadsan a leanas an fheoil ann an anamian na neò-ghloine, agus a nì tàir air uachdaranachd : Air dhoibh bhi an-dàna, féin-thoileil, cha'n eagal leo ana-cainnt a thoirt dhoibh-san a tha ann an àrd-inbhe :

11 An uair nach toir aingil a's mò ann an neart agus ann an cumhachd, casaid thoibheumach 'nan aghaidh am fianuis an Tighearn.

12 Ach iadsan, mar ainmhidhean nàdurra eu-céillidh, a rinneadh gu bhi air an glacadh agus an sgrios, air dhoibh bhi labhairt gu toibheumach mu na nithibh nach tuig iad, sgriosar iad 'nan truailidheachd féin ;

13 Agus gheibh iad tuarasdal na h-eu-ceirt, *mar* dhream a mheasas cairt shubhachas sògh san là : is smala iad agus aobhar maslaidh, a' gabhail toileachas-inntinn 'nam mealltaireachd féin, am feadh a ta iad air cuirmibh maille ribh ;

14 Aig am bheil an sùilean làn do adhaltrannas, agus do nach 'eil e'n comas sgur do pheacadh ; a' mealladh anama neo-shuidhichte ; aig am bheil an cridhe air a chleachdadh ri gnìomharaibh sauntach ; clann nam mallachd :

15 A thréig an t-slighe dhìreach, agus a chaidh air seacharan, a' leantuinn slighe Bhal-

aaim *mhic* Bhosoir, a ghràdhaich duais na h-eucorach ;

16 Ach a fhuair achmhasan air son 'aingidheachd : oir labhair an asal bhalbh le cainnt duine, agus thoirmisg i mì-chiall an fhàidh.

17 Is tobair gun uisge iad so, neoil air an iomain le iomghaoith ; fa chomhair am bheil duibhrean dorchadais air a thasgaidh gu sìorruidh.

18 Oir an uair a labhras iad *briathran* atmhor dìomhanais, meallaidh iad tre ana-miannaibh na feòla, tre mhacnus, iadsan a chaidh gu glan as uatha-san a tha caitheadh am beatha ann an seacharan :

19 A' gealltuinn saorsa dhoibh, agus gun annta féin ach tràill-ean na truailidheachd : oir ge b'e ni le 'm buadhaichear air duine, do'n ni sin féin tha e air a chur fo dhaorsa.

20 Oir an déigh dhoibh dol as o shalcharaibh an t-saoghail tre eòlas an Tighearn agus an t-Slànuighir Iosa Crìosd, ma bhios iad a ris air an ribeadh annta, agus air an cur fo ghéill, tha an deireadh aca ni's miosa na an toiseach.

21 Oir b'fheàrr dhoibh gun eòlas a bhi aca air slighe na fìreantachd, na, an déigh a h-eòlas fhaotainn, pilleadh o'n àithne naomh a thugadh dhoibh.

22 Ach thachair dhoibh a réir an t-sean-fhocail fhìrinnich, Phill am madadh air ais chum a sgeith féin ; agus, A' mhuc a chaidh nigheadh, chum a h-aoirneagan san làthaich.

CAIB. III.

AN dara litir so, a mhuinntir mo ghràidh, tha mi a' sgrìobhadh do 'ur n-ionnsuidh a nis ; annta *le chéile* tha mi a' brosnachadh bhur n-inntinn

fhìor-ghloin le 'ur cur an cuimhne :

2 Chum gu'm bì sibh cuimhneachail air na briathraibh a labhradh roimh leis na fàidhibh naomha, agus air ar n-àithne, abstola an Tighearn agus an t-Slànuighir :

3 Air dhuibh fhios so bhi agaibh air tùs, gu'n tig anns na làithibh deireannach luchd-fochaid, ag imeachd a réir an anamian féin,

4 Agus ag ràdh, C'ait am bheil gealladh a theachd? oir o choidil na h-àithriche, tha na h-uile nithe a' fantuinn mar a bha iad o thoiseach a' chruthachaidh.

5 Oir tha iad aineolach air so d'an deoin, gu'n robh na nèamha ann o chian, agus an talamh 'na sheasamh as an uisge, agus anns an uisge, tre fhocal Dé :

6 Tre'n deachaidh an saoghal a bha'n sin ann a sgrios, air teachd do'n dilinn air.

7 Ach tha na nèamha agus an talamh a tha nis ann, leis an fhocal sin féin air an tasgaidh suas, agus air an gléidheadh fa chomhair teine air cheann là a' bhreitheanais, agus sgrios dhaoine ain-diadhaidh.

8 Ach, amhuinntir moghràidh, nabithibh-sa aineolach air anaon ni so, Gu bheil aon là aig an Tighearn mar mhìle bliadhna, agus mìle bliadhna mar aon là.

9 Cha'n 'eil an Tighearn mall a thaobh a gheallaidh, (mar a mheasas dream àraidh moille,) ach tha e fad-fhulangach do ar taobh-ne, gun toil aige dream sam bith a bhi caillte, ach na h-uile dhaoine theachd gu h-àithreachas.

10 Ach thig là an Tighearna mar ghaduiche san oidhche; anns an téid na nèamha thairis le toirm mhòir, agus anns an leagh na dùile le dian-theas;

agus bithidh an talamh mar an ceudna, agus na h-oibre a ta air, air an losgadh suas.

11 Uime sin do bhrìgh gu'm bì na nithe so uile air an sgaoileadh as a chéile, ciod a' ghnè dhaoine bu chòir a bhi annaibh, ann an eaithe-beatha naomh, agus diadhachd;

12 Le sùil a bhi agaibh ris, agus luathachadh chum teachd là Dhé, anns am bì na nèamha, air dhoibh bhi ri theine, air an sgaoileadh o chéile, agus anns an leaghar na dùile le dian-theas?

13 Gidheadh tha dùil againne ri nèamhaibh nuadha agus talamh nuadh, a réir a gheallaidh, anns an còmhnuich fireantachd.

14 Uime sin, a mhuinntir ionmhuinn, o tha dùil agaibh ris na nithibh sin, dèanaibh bhur dìchioll chum gu faighear leis-san ann an sìth sibh, gun smàl agus neo-lochdaeh :

15 Agus measaibh gur slàinte fad-fhulangas ar Tighearn; amhuil a sgriobh ar bràthair gràdhach Pòl mar an ceudna do 'ur n-ionnsuidh, a réir a' ghliocais a thugadh dha;

16 Amhuil mar 'na litrichibh uile, a' labhairt annta mu na nithibh so: anns am bheil cuid do nithibh do-thuigsinn, a tha an dream a tha neo-fhòghlumta agus neo-sheasmhach a' fiaradh, amhuil mar na sgriobtuirean eile, chum an sgrios féin.

17 Ach sibhse, a mhuinntir mo ghràidh, o's aithne dhuibh na nithe so roimh-làimh, thugaibh aire air eagal air dhuibhse mar an ceudna bhi air bhur tarruinn air falbh le seacharan nan daoine ain-diadhaidh, gu'n tuit sibh o bhur seasmhachd féin.

18 Ach fàsaibh ann an gràs, agus ann an eòlas ar Tighearn agus ar Slànuighir Iosa Crìosd. Dhasan gu robh glòir a nis agus gu sìorruidh. Amen.

CEUD LITIR CHOITCHIONN AN ABSTOIL EOIN.

CAIB. I.

AN ni a bha ann o thùs, an ni a chuala sinne, a chunnaic sinn le ar sùilibh, air an d'amhairc sinn, agus a làimhsich ar làmhha thaobh focail na beatha ;

2 (Oir dh'fhoillsicheadh a' bheatha, agus chunnaic sinne i, agus tha sinn a' dèanamh fianuis, agus a' cur an céill dhuibhse na beatha maireannaich ud a bha maille ris an Athair, agus a dh'fhoillsicheadh dhuinne ;)

3 An ni a chunnaic agus a chuala sinn, tha sinn a' cur an céill duibhse, chum gu'm bi agaibh-sa mar an ceudna commonn ruinne : agus gu fìrinneach tha ar commonn-ne ris an Athair, agus r'a Mhac Iosa Crìosd.

4 Agus tha sinn a' sgrìobhadh nan nithe so do 'ur n-ionnsuidh, chum gu'm bi bhur gairdeachas coimhlionta.

5 Agus is i so an teachdair-eachd a chuala sinn uaith-san, agus a tha sinn a' cur an céill dhuibhse, Gur solus Dia, agus nach 'eil dorchadas air bith ann-san.

6 Ma their sinn gu bheil commonn againn ris, agus sinn a' gluasad ann an dorchadas, tha sinn a' dèanamh bréige, agus cha'n 'eil sinn a' dèanamh na fìrinn :

7 Ach ma ghluaiseas sinn anns an t-solus, mar a tha e-san san t-solus, tha commonn againn r'a chéile, agus glanaidh fuil Iosa Crìosd a Mhic sinn o gach uile pheacadh.

8 Ma their sinn nach 'eil peacadh againn, tha sinn gar

mealladh féin, agus cha'n 'eil an fhìrinn annainn.

9 Ma dh'aidicheas sinn ar peacanna, tha e-san fìrinneach agus ceart, chum ar peacanna a mhaitheadh dhuinn, agus ar glánadh o gach uile neo-fhìreantachd.

10 Ma their sinn nach do pheacaich sinn, tha sinn a' dèanamh breugaire dheth-san, agus cha'n 'eil fhocal annainn.

CAIB. II.

MO chlann bheag, na nithe so tha mi a' sgrìobhadh do 'ur n-ionnsuidh, chum nach peacaich sibh. Agus ma pheacaicheas neach air bith, tha fear-tagraidh againn maille ris an Athair, Iosa Crìosd am firean :

2 Agus is e-san an lobairt-réitich air son ar peacanna ; agus cha'n e air son ar peacanna a mhàin, ach mar an ceudna air son peacanna an t-saoghail uile.

3 Agus le so tha fhios againn gur aithne dhuinn e, ma choimhideas sinn àitheantan.

4 An tì a their, Is aithne dhomh e, agus nach 'eil a coimhead àitheantan, is breugaire e, agus cha'n 'eil an fhìrinn ann.

5 Ach ge b'e choimhideas fhocal, ann-san gu deimhin tha gràdh Dhé air a choimhlionadh : le so is aithne dhuinn gu bheil sinn ann-san.

6 An tì a their gu bheil e fantuinn ann-san, is còir dhasan mar an ceudna gluasad, eadhon mar a ghluais e-san.

7 A bhràithre, cha'n 'eil mi a sgrìobhadh àithne nuaidh do

'ur n-ionnsuidh, ach seann àithne, a bha agaibh o'n toiseach: is i an t-seann àithne am focal a chuala sibh o thùs.

8 A ris tha mi a' sgrìobhadh àithne nuaidh do 'ur n-ionnsuidh, ni a ta fìor ann-san agus annaibh-sa: do bhrìgh gu'n d'imich an dorchadas thairis, agus gu bheil a nis an solus fìor a' dealrachadh.

9 An ti a their gu bheil e san t-solus, agus a tha fuathachadh a bhràthar, tha e san dorchadas gu a nis.

10 An ti aig am bheil gràdh d'a bhràthair, tha e 'na chòmhnuidh san t-solus, agus cha'n 'eil aobhar oilbheim air bith ann.

11 Ach an ti a ta fuathachadh a bhràthar, tha e anns an dorchadas, agus ag ìmeachd anns an dorchadas, agus cha'n àithne dha c'àit am bheil e dol, do bhrìgh gu'n do dhall an dorchadas a shùilean.

12 Tha mi a' sgrìobhadh do 'ur n-ionnsuidh, a chlann bheag, do bhrìgh gu bheil bhrùpeacanna air am maitheadh dhuibh air sgàth 'ainme-san.

13 Tha mi a' sgrìobhadh do 'ur n-ionnsuidh, aithriche, do bhrìgh gu'm b' aithne dhuibh e-san a ta o thùs. Tha mi a' sgrìobhadh do 'ur n-ionnsuidh, òganacha, do bhrìgh gu'n d' thug sibh buaidh air an droch aon. Tha mi a' sgrìobhadh do 'ur n-ionnsuidh, a chlann bheag, do bhrìgh gu'm b' aithne dhuibh an t-Athair.

14 Sgrìobh mi do 'ur n-ionnsuidh, aithriche, do bhrìgh gu'm b' aithne dhuibh an Tì a ta ann o thùs. Sgrìobh mi do 'ur n-ionnsuidh, òganacha, do bhrìgh gu bheil sibh làidir, agus gu bheil focal Dhé, 'na chòmhnuidh annaibh, agus gu'n d' thug sibh buaidh air an droch aon.

15 Na gràdhaichibh an saoghal, no na nithe a ta ann an t-saoghal. Ma ghràdhaicheas neach air bith an saoghal, cha'n 'eil gràdh an Athar ann.

16 Oir na h-uile a ta anns an t-saoghal, ana-miann na feòla, agus ana-miann nan sùl, agus uabhar na beatha, cha'n ann o'n Athair a tha iad, ach o'n t-saoghal.

17 Agus siubhlaidh an saoghal seachad, agus 'ana-miann: ach an ti a nì toil Dé, mairidh e chaidh.

18 A chlann bheag, is i an aimsir dheireannach a tha ann: agus mar a chuala sibh gu'n tig an t-ana-crìosd, is ann mar sin a ta nis iomadh ana-crìosd ann; o'm bheil sinn a' tuigsinn gur i 'n aimsir dheireannach a ta ann.

19 Chaidh iad a mach uainne, ach cha robh iad dhinn: oir nam biodh iad dhinn, gu deimhin dh' fhanadh iad maille ruinn: ach chaidh iad a mach, chum gu deantadh follaiseach iad, nach robh iad uile dhinn.

20 Ach tha agaibh-sa ùngadh o'n ti naomh, agus is aithne dhuibh na h-uile nithe.

21 Cha do sgrìobh mi do 'ur n-ionnsuidh, do bhrìgh nach aithne dhuibh an fhìrinn; ach do bhrìgh gur aithne dhuibh i, agus nach 'eil breug air bith o'n fhìrinn.

22 Cò a tha 'na bhreugaire, ach e-san a dh' àicheadhas gur e Iosa an Crìosd? Is e so an t-ana-crìosd, a tha 'g àicheadh an Athar agus a' Mhic.

23 Ge b'e neach a dh' àicheadhas am Mac, cha'n 'eil an t-Athair aige: [ach an ti a dh' àicheas am Mac, tha an t-Athair aige mar an ceudna.]

24 Uime sin fanadh an nì sin annaibh-sa a chuala sibh o thùs. Ma dh' fhanas an nì a chuala

sibh o thùs annaibh, fanaidh sibhse mar an ceudna anns a' Mhac, agus anns an Athair.

25 Agus is e so an gealladh a gheall e dhuinn, eadhon a' bheatha mhaireannach.

26 Sgrìobh mi na nithe so do 'ur n-ionnsuidh, mu thimchioll na dream a tha 'gur mealladh.

27 Ach tha an t-ùngadh a fhuair sibh uaith-san, a' fantuinn annaibh: agus cha'n 'eil feum agaibh gu'n teagaisgeadh aon neach sibh: Ach, mar a ta an t-ùngadh so féin 'gur teagasg mu thimchioll nan uile nithe, agus a ta e fìor, agus nach breug e, eadhon mar a theagaisg e sibh, fanaibh ann.

28 Agus a nis, a chlann bheag, fanaibh ann-san; chum 'nuair a dh'fhoillsichear e, gu'm bì dànachd againn, agus nach bì nàire oirnn a' na làthair aig a theachd.

29 Ma tha fhios agaibh gu bheil e-san fireanta, tha fhios agaibh gu bheil gach neach a nì fireantachd, air a bhreith uaith-san.

CAIB. III.

FEUCHAIBH, cìod a' ghnè ghràidh a thug an t-Athair dhuinne, gu'n goirteadh clann Dé dhinn! uime sin cha'n aithne do'n t-saoghal sinn, do bhrìgh nach b'aithne dha e-san.

2 A mhuinntir mo ghràidh, a nis is sinne mic Dhé; agus cha'n 'eil e soilleir fathast cìod a bhitheas sinn: ach a ta fhios againn, 'nuair a dh'fhoillsichear e-san, gu'm bì sinn cosmhuil ris; oir chì sinn e mar a ta e.

3 Agus gach neach aig am bheil an dòchas so ann, glanaidh se e féin, mar a ta e-san glan.

4 Ge b'e neach a nì peacadh,

tha e mar an ceudna a' briseadh an lagha: oir is e am peacadh briseadh an lagha.

5 Agus tha fhios agaibh gu'n d'fhoillsicheadh e-san chum ar peacanna thoirt air falbh; agus cha'n 'eil peacadh sam bith ann-san.

6 Gach neach a dh'fhanas annsan, cha dèan e peacadh: ge b'e air bith a pheacaicheas, cha'n fhac e e-san, agus cha robh eòlas aige air.

7 A chlann bheag, na mealladh neach air bith sibh: an tì a nì fireantachd is firean e, mar is firean e-san:

8 An tì a nì peacadh, is ann o'n diabhul a ta e: oir tha an diabhul a' peacachadh o thùs. Is ann chum na crìche so a dh'fhoillsicheadh Mac Dhé, chum gu'n sgriosadh e oibre an diabhul.

9 Ge b'e neach a ghineadh o Dhia, cha dèan e peacadh: oir a ta a shìol-san a' fantuinn ann: agus cha'n 'eil e'n comas da peacadh a dhèanamh, do bhrìgh gu'n do ghineadh o Dhia e.

10 An so tha clann Dé, agus clann an diabhul follaiseach: Ge b'e neach nach dèan fireantachd, cha'n ann o Dhia a tha e, no an tì nach gràdhaich a bhràthair.

11 Oir is i so an teachdair-eachd a chuala sibh o thùs, sinn a thoirt gràidh d'a chèile:

12 Cha'n ann mar Chain, a bha o'n droch aon, agus a mharbh a bhràthair: Agus c'ar son a mharbh se e? A chionn gu'n robh 'oibre féin olc, agus oibre a bhràthar fireanta.

13 Na biodh ioghnadh oirbh, mo bhràithre, ged dh'fhuathaicheas an saoghal sibh.

14 Tha fhios againn gu'n deachaidh sinn thairis o bhàs gu

beatha, do bhrìgh gu bheil gràdh againn do na bràithribh : an tì nach gràdhaich a bhràthair, fanaidh e ann am bàs.

15 Gach neach a dh'fhuathaicheas a bhràthair, is mortair e ; agus tha fhios agaibh nach 'eil aig mortair sam bith a' bheatha mhaireannach a' fantuinn ann.

16 Le so is aithne dhuinn gràdh *Dhé*, do bhrìgh gu'n do chuir e-san sìos 'anam féin air ar son-ne : agus is còir dhuinne ar n-anama féin a chur sìos air son nam bràithre.

17 Agus ge b'e neach aig am bheil maoin an t-saoghail so, agus a chì a bhràthair ann an uireasbhuidh, agus a dhruideas a chridhe 'na aghaidh, cionnus a tha gràdh *Dhé* a' gabhail còmhuidh ann-san ?

18 Mo chlannbheag, nàgràdh-aicheamaid ann am focal, no ann an teangaidh ; ach ann an gnìomh agus ann am firinn.

19 Agus le so is aithne dhuinn gu bheil sinn do'n fhirinn, agus bheir sinn dearbh-bheachd do 'ur cridheachaibh 'na làthair.

20 Oir ma dhìteas ar cridhe sinn, is mò *Dia* na ar cridhe, agus is aithne dha na h-uile nithe.

21 A mhuinntir mo ghràidh, mur dìt ar cridhe sinn, tha dànachd againn a thaobh *Dhé*.

22 Agus ge b'e ni a dh'iarras sinn, gheibh sinn uaith e, do bhrìgh gu bheil sinn a' coimhead 'aithneantan, agus a' dèanamh nan nithe a tha taitneach 'na fhianuis-san.

23 Agus is i so 'aithne-san, gu'n creideamaid ann an ainm a Mhic *Iosa Crìosd*, agus gu'n gràdhaicheamaid a chèile, mar a thug e-san aithne dhuinn.

24 Agus an ti a choimhideas

'aithneanta-san, tha e gabhail còmhuidh ann, agus e-san ann-san : agus le so is aithne dhuinn gu bheil e-san a' fuireach ann-ainn, o'n Spiorad a thug e dhuinn.

CAIB. IV.

A MHUINNTIR ionmhuinn, na creidibh gach uile spiorad, ach dearbhaibh na spioradan, an ann o *Dhia* a tha iad : do bhrìgh gu bheil mòran do fhàidhibh bréige air dol a mach do'n t-saoghal.

2 Le so aithnichibh Spiorad *Dhé* : gach uile spiorad a dh'aidicheas gu'n d'fhàinig *Iosa Crìosd* san fheoil, is ann o *Dhia* a tha e.

3 Agus gach uile spiorad nach aidich gu bheil *Iosa Crìosd* air teachd san fheoil, cha'n ann o *Dhia* a tha e : agus is e so spiorad sin an ana-crìosd, neach a chuala sibh e bhi teachd, agus a nis tha e cheana anns an t-saoghal.

4 A chlann bheag, tha sibhse o *Dhia*, agus thug sibh buaidh orra-san ; do bhrìgh gur mò e-san a ta annaibh-sa, na e-san a ta anns an t-saoghal.

5 Tha iadsan o'n t-saoghal : uime sin tha iad a' labhairt mu'n t-saoghal, agus tha'n saoghal ag éisdeachd riu.

6 Tha sinne o *Dhia* : an ti aig am bheil eòlas air *Dia*, éisdidh e ruinne ; an ti nach 'eil o *Dhia*, cha'n éisd e ruinn. O so aithnichidh sinn spiorad na firinn, agus spiorad an t-seacharain.

7 A mhuinntir ionmhuinn, gràdhaicheamaid a chèile : oir is ann o *Dhia* tha'n gràdh ; agus gach neach a ghràdhaicheas, ghineadh o *Dhia* e, agus is aithne dha *Dia*.

8 An tì nach gràdhaich cha'n aithne dha Dia; oir is gràdh Dia.

9 An so dh'fhoillsicheadh gràdh Dhé dhuinne, do bhrìgh gu'n do chuir Dia aon-ghin Mhic do'n t-saoghal, chum gu'm bitheamaid beò trìd-san.

10 An so a ta gràdh, cha'n e gu'n do ghràdhaich sinne Dia, ach gu'n do ghràdhaich e-san sinne, agus gu'n do chuir e a Mhac féin *gu bhi* 'na iobairt-réitich air son ar peacanna.

11 A mhuinntir ionmhuinn, ma ghràdhaich Dia sinne mar sin, tha e mar fhiachaibh oirne a chéile a ghràdhachadh mar an ceudna.

12 Cha'n fhaca neach air bith Dia riamh. Ma ghràdhaicheas sinn a chéile, tha Dia 'na chòmhnuidh annainn, agus tha a ghràdh air a choimhlionadh annainn.

13 O so is aithne dhuinn gu bheil sinne 'nar còmhnuidh annsan, agus e-san annainne, do bhrìgh gu'n d'thug e dhuinn d'a Spiorad.

14 Agus chunnaic sinn agus thàsinn a' dèanamh fianuis, gu'n do chuir an t-Athair am Mac uaith mar Shlànuighear an domhain.

15 Ge b'e neach a dh'aidicheas gur e Iosa Mac Dhé, tha Dia 'na chòmhnuidh ann-san, agus e-san ann an Dia.

16 Agus fhuair sinn aithne air agus chreid sinn an gràdh a tha aig Dia dhuinn. Is gràdh Dia; agus an tì a tha fantuinn ann an gràdh, tha e 'na chòmhnuidh ann an Dia, agus Dia ann-san.

17 An so tha ar gràdh-ne air a dhèanamh coimhlionta, chum gu'm bì againn dànachd ann an là a' bhreitheanais: do bhrìgh mar a tha e-san, gur amhuil sin

a tha sinne anns an t-saoghal so.

18 Cha'n 'eil eagal ann an gràdh; ach tilgidh gràdh dìongmhalta an t-eagal a mach; do bhrìgh gu bheil pian san eagal: an tì a tha eagalach, cha d'rinn-eadh coimhlionta ann an gràdh e.

19 Tha gràdh againne dhasan, do bhrìgh gu'n do ghràdhaich e-san sinne an toiseach.

20 Ma their neach, Tha gràdh agam do Dhia, agus fuath aige d'a bhràthair, is breugaire e: oir an tì nach gràdhaich a bhràthair a chunnaic e, cionnus a dh'fheudas e Dia nach fac e a ghràdhachadh?

21 Agus an àithne so tha againn uaith-san, An tì a ghràdhaicheas Dia, gu'n gràdhaich e a bhràthair mar an ceudna.

CAIB. V.

GE b'e neach a chreideas gur e Iosa an Crìosd, ghineadh o Dhia e; agus ge b'e ghràdhaicheas an Tì a ghin, gràdhaichidh e mar an ceudna an Tì a ghineadh leis.

2 O so is aithne dhuinn gu bheil gràdh againn do chloinn Dé, 'nuair a ghràdhaicheas sinn Dia, agus a choimhideas sinn 'àitheantan.

3 Oir is e so gràdh Dhé, sinn a choimhead 'àitheantan: agus cha'n 'eil 'àitheanta-san trom.

4 Oir gach uile ni a ghinear o Dhia, bheir e buaidh air an t-saoghal: agus is i so a' bhuaidh a bhuaidhaicheas air an t-saoghal, *eadhon* ar creidimh-ne.

5 Cò an tì a bhuaidhaicheas air an t-saoghal, ach e-san a tha creidsinn gur e Iosa Mac Dhé.

6 Is e so e-san a thàinig tre uisge agus tre fhuil, Iosa Crìosd; cha'n e tre uisge a

mhàin, ach tre uisge agus fuil : agus is e an Spiorad a nì fianuis, do bhrìgh gur fìrinn an Spiorad.

7 Oir tha triuir a tha dèanamh fianuis air nèamh, an t-Athair, am Focal, agus an Spiorad naomh : agus an triuir sin is aon iad.

8 Agus tha triuir a tha dèanamh fianuis air an talamh, an Spiorad, agus an t-uisge, agus an fhuil : agus thig an triuir sin r'a chèile ann an aon.

9 Ma ghabhas sinn ri fianuis dhaoine, 's i fianuis Dé a's mò : oir is i so fianuis Dé, a thug e mu thimchioll a Mhic.

10 An tì a chreideas ann am Mac Dhé, tha'n fhianuis aige ann féin : an tì nach creid Dia, rinn e breugaire dheth, do bhrìgh nach do chreid e an fhianuis a rinn Dia mu thimchioll a Mhic.

11 Agus is i so an fhianuis, gu'n d'thug Dia dhuinn beatha mhaireannach : agus tha a' bheatha so 'na Mhac.

12 An tì aig am bheil am Mac, tha beatha aige : an tì aig nach 'eil Mac Dhé, cha'n 'eil beatha aige.

13 Na nithe so sgrìobh mi do 'ur n-ionnsuidh, a tha creidsinn ann an ainm Mhic Dhé ; chum gu'm bì fios agaibh gu bheil a' bheatha mhaireannach agaibh, agus chum gu'n creid sibh ann an ainm Mhic Dhé.

14 Agus is e so an dòchas a ta againn ann-san, ma dh'iarraas sinn ni sam bith a réir a' thoile, gu'n éisd e ruinn.

15 Agus ma ta fhios againn gu'n éisd e ruinn, ge b'e ni a dh'iarraas sinn, tha fhios againn gu bheil ar n-iarrtuis a dh'iarr sinn air againn.

16 Ma chì neach sam bith a bhràthair 'a' peacachadh peacaidh nach 'eil a chum bàis, iarraidh e, agus bheir e beatha dha, dhoibh-san nach 'eil a' peacachadh chum bàis. Tha peacadh chum bàis ann : a thaobh sin, cha'n 'eil mi ag ràdh gur còir dha guidheadh.

17 Is peacadh gach uile eucoir : agus tha peacadh ann nach 'eil a chum bàis.

18 Tha fhios againn ge b'e neach a ghineadh le Dia, nach peacaich e ; ach an tì a ghineadh o Dhia, coimhididh se e féin, agus cha bhean an droch aon ris.

19 Tha fhios againn gur ann o Dhia a tha sinne, agus tha'n saoghal uile 'na luidhe san olc.

20 Agus tha fhios againn gu'n d'thàinig Mac Dhé, agus gu'n d'thug e tuisge dhuinn, chum gu'mb'aithne dhuinne-san a ta fìor : agus tha sinne annsan a ta fìor, ann a Mhac Iosa Crìosd. Is e so an Dia fìor, agus a' bheatha mhaireannach.

21 A chlann bheag, coimhidibh sibh féin o ìodholaibh. Amen.

DARA LITIR AN ABSTOIL EOIN.

CAIB. I.

AN seanair chum na ban-tigh-earna taghta, agus chum a cloinne, a's ionmhuinn leam-

sa anns an fhìrinn ; agus cha'n ann leam-sa mhàin, ach leo-san uile mar an ceudna a ghabh eòlas air an fhìrinn ;

2 Air son na fìrinn a tha 'na còmhnuidh annainne, agus a bhios màille ruinn gu bràth :

3 Gràs, tròcair, agus sìth gu robh maille ribh o Dhia an t-Athair, agus o'n Tighearn Iosa Crìosd Mac an Athar, ann am fìrinn agus ann an gràdh.

4 Bha gàirdeachas mòr orm, do bhrìgh gu'n d'fhuair mi do d'chloinn-sa ag imeachd anns an fhìrinn, a réir mar a fhuair sinne àithne o'n Athair.

5 Agus a nis guidheam ort, a bhan-tighearn, cha'n e mar gu'n sgrìobhainn àithne nuadh a d'ionnsuidh, ach *an àithne* a bha againn o thùs, gu'n gràdhaicheamaid a chèile.

6 Agus is e so an gràdh, gu'n imicheamaid a réir 'àitheantasan. 'S i so an àithne, mar a chuala sibh o thùs, gu'n imich-eadh sibh innte.

7 Oir tha mòran mhealltairean air teachd a steach do'n t-saoghal, nach 'eil ag aideachadh gu bheil Crìosd air teachd san fheoil. Is mealltair so agus anacriòsd.

8 Thugaibh aire dhuibh féin, nach caill sinn na nithe sin a shaothraich sinn, ach gu faigh sinn làn-duais.

9 Ge b'e neach a bhriseas *an lagh*, agus nach fan ann an teagasg Chrìosd, cha'n 'eil Dia aige: an tì a dh'fhanas ann an teagasg Chrìosd, tha araon an t-Athair agus am Mac aige.

10 Ma thig neach air bith do 'ur n-ionnsuidh, agus nach toir e an teagasg so leis, na gabhaibh e steach do 'ur tigh, agus na abraibh ris, Gu ma subhach dhuit.

11 Oir ge b'e neach a their ris, Gu ma subhach dhuit, tha comhpàirt aige d' a dhroch oibribh.

12 Air dhòmh mòran a bhi agam r'a sgrìobhadh do 'ur n-ionnsuidh, cha b'àill leam *sgrìobhadh* le paipeir agus dubh; ach tha dòchas agam teachd do 'ur n-ionnsuidh, agus labhairt beul ri beul, chum gu'm bì ar gàirdeachas coimhlionta.

13 Tha clann do pheathar taghta a' cur fàilte ort. Amen.

TREAS LITIR AN ABSTOIL EOIN.

CAIB. I.

AN seanair chum Ghaiuis ghràdhaich, a's ionmhuinn leam san fhìrinn.

2 A *bhrathair* ghràdhaich, 'se mo ghuidheadh thaobh gach uile ni gu'n soirbhicheadh leat agus gu'm biodh tu slàn, mar a ta soirbheachadh le t'anam.

3 Oir rinn mi gàirdeachas gu mòr 'nuair a thàinig na bràithrean, agus a rinn iad fianuis do'n fhìrinn a tha annad-sa, mar a ta thusa ag imeachd san fhìrinn.

4 Cha'n 'eil gàirdeachas agam a's mò na bhi cluinntinn gu bheil mo chlann ag imeachd san fhìrinn.

5 A *bhrathair* ghràdhaich, is dileas a nì thu gach ni a ta thu dèanamh do na bràithribh, agus do choigrich;

6 Muinntir a rinn fianuis air do ghràdh an làthair na h-eaglais: ma bheir thu air an aghaidh iad 'nan slighe mar is cubhaidh do Dhia, is maith a nì thu:

7 Oir chaidh iad a mach air sgàth 'ainme-san, gun ni air bith a ghabhail o na Cinnich.

8 Uime sin tha e mar fhiach-aibh oirne gabhail r'an leithid-ibh sin, chum gu'm bitheam-aid 'nur comh-shaothraichibh do'n fhìrinn.

9 Sgrìobh mi chum na h-eaglais: ach cha ghabh Diotrefhes, leis am miann àrd-cheannas a bhi aige 'nam measg, ruinne.

10 Uime sin ma thig mi, cuiridh mi an cuimhne 'oibre a ta e dèanamh, a' bith-labhairt 'nar n-aghaidh le briathraibh aingidh: agus cha leoir leis sin, ach ni mò a tha e féin a' gabhail ris na bràithribh, agus tha e a' bacadh na dream leis am b' àill, agus 'gan tilgeadh mach as an eaglais.

11 A bhràthair ghràdhaich, na lean an ni a ta olc, ach an ni a ta maith. An tì a ni maith, is ann o Dhia a ta e; ach an tì a ni olc, cha'n fhac e Dia.

12 Tha deadh theisteachas air Demetrius o na h-uile, agus o'n fhìrinn féin: agus tha sinne mar an ceudna a' dèanamh fianuis; agus tha fios agaibh gu bheil ar fianuis-ne fìor.

13 Bha mòran agam r'a sgrìobhadh, ach cha'n àill leam sgrìobhadh le dubh agus peann a d' ionnsuidh:

14 Ach tha dòchas agam t-fhaicinn gun dàil, agus labhairaidh sinn beul ri beul. Sìth maille riut. Tha na càirdean a' cur fàilte ort. Cuir fàilte air na càirdibh air an ainm.

LITIR CHOITCHIONN AN ABSTOIL IUDAIS.

CAIB. I.

IUDAS seirhhiseach Iosa Crìosd, agus bràthair Sheumais, chum na dream a tha air an naomhachadh le Dia an t-Athair, agus air an coimhead le Iosa Crìosd, air an gairm:

2 Gu robh tròcair, agus sìth, agus gràdh air am meudachadh dhuibh-sa.

3 A mhuinntir ionmhuinn, air dhomh an uile dhìchioll a dhèanamh chum sgrìobhadh do 'ur n-ionnsuidh mu thimchioll na slàinte choitchionn, b' fheumail domh sgrìobhadh do bhur n-ionnsuidh. 'Gur n-earalachadh sibh a chathachadh gu dìchiollach air son a' chreidimh a thugadh aon uair do na naoimh.

4 Oir ghoid daoine àraidh a

steach, a dh'òrduicheadh roimh o shean chum an dìteadh so, daoine mì-dhiadhaidh, a' tionn-dadh gràis ar Dé-ne gu macnus, agus ag àicheadh Dhé, a's aon Uachdaran ann, agus ar Tigh-earna Iosa Crìosd.

5 Uime sin is àill leam bhur cur an cuimhne, ged bha fhios agaibh aon uair air so, cionnus an déigh do'n Tighearn am pobull a shaoradh á tìr na h-Eiphit, a sgrìos e an déigh sin an dream nach do chreid.

6 Agus na h-aingil nach do ghléidh an ceud inbhe, ach a dh'fhàg an àite-còmhnuidh féin, choimhid e ann an geimhlibh sìorruidh fo dhorchadas, fa chomhair breitheanais an là mhòir.

7 Amhuil a ta Sodom agus Gomorrah, agus na bailte mu'n cuairt orra, a thug iad féin thairis do striopachas air a' mhodh cheudna, agus a bha leantuinn feòla coimhich, air an cur suas 'nam ball-sampuill, a' fulang dìoghaltais teine shìorruidh.

8 Mar an ceudna fòs tha an luchd-bruadair sin a' salachadh na feòla, a' dèanamh tàir air uachdaranachd, agus a' labhairt gu toibheumach air àrd-inbhibh.

9 Gidheadh cha do ghabh Michael an t-àrd-aingeal, 'nuair a chathaich e an aghaidh an diabhuil, agus a rinn e deasboir-eachd mu chorp Mhaois, dànadas air casaid thoibheumach a thoirt, 'na aghaidh, ach thubhairt e, Gu cronuicheadh an Tighearn thu.

10 Ach tha 'n dream sin a' labhairt gu toibheumach air na nithibh nach aithne dhoibh: ach na nithe sin a's aithne dhoibh air mhodh nàdurra, mar ainmhidhibh gun reuson, tha iad 'gan truailleadh féin annta.

11 Is an-aoibhinn doibh! oir dh'imich iad ann an slighe Chain, agus ruith iad gu togarrach ann an seacharan Bhalaaim air ghaol tuarasdail, agus sgriosadh iad ann an ana-cainnt cheannaircich Chore.

12 Is smala iad sin ann bhur cuirmibh gràidh, 'nuair a tha iad air cuirmibh maille ribh, 'gam beathachadh féin gun eagal: is neòil iad gun uisge, air an giùlan mu'n cuairt le gaothaibh; craobhan searg-mheasach, gun toradh; dà uair marbh, air an spìonadh as am freumhaibh;

13 Garbh thonna na fairge, a sgeitheas an nàire féin mar chobhar; reulta seachranach, d'am bheil duibhre an dorchadais gu sìorruidh air a thasgaidh.

14 Agus rinn Enoch mar an ceudna, an seachdamh *pearsa* o Adhamh, fàidheadaireachd orra sin, ag ràdh, Feuch, tha 'n Tigh-earn a' teachd le deich mìle d'a naomhaibh,

15 A dhèanamh breitheanais air na h-uile, agus chum iadsan uile a tha mì-dhiadhaidh 'nam measg fhàgail ris, a thaobh an uile ghnìomhara mì-dhiadhaidh a rinn iad gu mì-dhiadhaidh, agus a thaobh an uile *bhriathar* cruaidhe, a labhair peacaich mì-dhiadhaidh na aghaidh.

16 Is luchd cànrain agus gearain an dream so, a tha 'g imeachd a réir an ana-miann féin; agus tha 'm beul a' labhairt *bhriathar* atmhor, agus iad a' gabhail iongantais do phearsaibh dhaoine air sgàth buannachd.

17 Ach cuimhnichibh-sa, a mhuinntir mo ghràidh, na focail a labhradh roimh le abstolaibh ar Tighearna Iosa Crìosd;

18 Mar a thubhairt iad ribh, gu'm biodh anns an aimsir dheireannaich luchd-fanoid, a ghluaiseadh a réir an ana-mianna mì-dhiadhaidh féin.

19 'S iad sin an dream a sgaras iad féin o *chàch*, collaidh, gun an Spiorad aca.

20 Ach air bhi dhuibhse, a mhuinntir ionmhuinn, 'gur togail féin suas ann bhur creidimh ro naomha, a' dèanamh ùrnuigh san Spiorad naomh,

21 Coimhidibh sibh féin ann an gràdh Dhé, le sùil ri tròcair ar Tighearna Iosa Crìosd chum na beatha maireannaich.

22 Agus gabhaibh truas do dhream àraidh, a' dèanamh eadar-dhealachaidh:

23 Agus tèarnaibh dream eile le h-eagal, 'gan spìonadh as an teine; a' fuathachadh eadhon an eudaich air am bheil smal na feòla.

24 A nis dhasan a tha comasach air bhur gléidheadh o thuisleadh, agus *bhur* cur gu neòlochdach an làthair a ghlòire le h-aoibhneas ro-mhòr,

25 Do 'n Dia a ta mhàin glic, ar Slànuighear, *gu robh* glòir agus mòralachd, neart agus cumhachd, a nis agus air feadh nan uile linn. Amen.

TAISBEAN EOIN AN DIADHAIR.

CAIB. I.

TAISBEAN Iosa Crìosd, a thug Dia dha, a dh'fhoillseachadh d'a sheirbhisich nithe a's éigin teachd gu crìch ann an ùine gheàrr; agus chuir e teachd-air eachd uaith, agus le 'aingeal féin dh'fhoillsich e *iad* d'a sheirbhiseach Eoin:

2 A rinn fianuis air focal Dé, agus air teistias Iosa Crìosd, agus air gach ni a chunnaic e.

3 *Is* beannaichte an tì a leughas, agus iadsan a dh'éisdeas ri briathraibh na fàidheadair eachd so, agus a choimhideas na nithe a tha sgriobhta innte: oir tha 'n t-àm am fagus.

4 **E**GIN chum nan seachd eaglaisean a ta san Asia: Gràs dhuibh, agus sìth o'n Tì a ta, agus a bha, agus a ta ri teachd; agus o na seachd spioradaibh a tha 'm fianuis a rìgh-chainnreach-san;

5 Agus o Iosa Crìosd, an fhianuis fhior, an ceud-ghin o na marbhaibh, agus uachdaran rìghre na talmhainn: Dhasan a ghràdhaich sinn, agus a dh'ionnlaid sinn o ar peacaibh 'na fhuil féin,

6 Agus a rinn rìghre dhinn agus sagairt do Dhia agus d'a Athair-san; dhasan *gu robh* glòir agus cumhachd gu saoghal nan saoghal. Amen.

7 *Feuch*, tha e teachd le neul-

aibh; agus chì gach sùil e, agus iadsan *mar an ceudna* a lot e: agus nì uile threubha na talmhainn caoidh air a shon-san: gu ma h-amhluidh a bhitheas. Amen.

8 Is mise Alpha agus Omega, an toiseach agus an deireadh, tha an Tighearn ag ràdh, a ta, agus a bha, agus a ta ri teachd, an t-Uile chumhachdach.

9 Bha mise Eoin, bhur dearbh-bhràthair, agus bhur companach ann an àmhghar, agus ann an rìoghachd agus am foighidin Iosa Crìosd, anns an eilean ris anabrar Patmos, air son focail Dé, agus air son fianuis Iosa Crìosd.

10 Bha mi san Spiorad air là an Tighearn, agus chuala mi àir mo chùlaobh guth mòr, *mar ghuth* trompaid,

11 Ag ràdh, Is mise Alpha agus Omega, an ceud neach agus an neach deireannach: agus Sgriobh-sa ann an leabhar an nì a chì thu, agus cuir e chum nan seachd eaglaisean a tha san Asia; chum Ephesus, agus chum Smirna, agus chum Pergamoi, agus chum Thiatira, agus chum Shardis, agus chum Philadelpia, agus chum Laodicea.

12 Agus thionndaidh mi a dh'fhaicinn a ghutha a labhair rium. Agus air tionndadh dhomh, chunnaic mi seachd coinneirean òir;

13 Agus am meadhon nan seachd coinnleirean, *neach* cosmhuil ri Mac an duine, air an robh eudach a ràinig sìos gu 'shàilbh, agus crioslaichte le crios òir mu 'chìochaibh.

14 *Bha* a cheann agus 'fholt geal mar oluinn ghil, mar shneachda; agus a shùilean mar lasair theine;

15 Agus a chosa cosmhuil ri umha fìor-ghlan, mar gu'm bitheadh iad a' dearg-losgadh ann an àmhuinn; agus a ghuth mar thoirm mhoran uisgeachan.

16 Agus bha aige 'na làimh dheis seachd reulta: agus claidheamh geur dà fhaobhair a' teachd a mach as a bheul: agus *bha* a ghnùis mar a' ghrian a' dealrachadh 'na làn neart.

17 Agus an uair a chunnaic mi e, thuit mi sìos aig a chosaibh an riochd mairbh: agus chuir e a làmh dheas orm, ag ràdh rium, Na biodh eagal ort: is mise an ceud neach agus an neach deireannach.

18 *Is mise* an Tì a ta beò, agus a bha marbh; agus, feuch, tha mi beò gu saoghal nan saoghal, Amen; agus tha iuchraiche ifrinn agus a' bhàis agam.

19 Sgrìobh na nithe a chunnaic thu, agus na nithe a ta ann, agus na nithe a bhitheas an déigh so:

20 Rùn-diomhair nan seachd reultan a chunnaic thu ann am làimh dheis, agus nan seachd coinnleirean òir. Is iad na seachd reultan, aingil nan seachd eaglaisean: agus is iad na seachd coinnleirean a chunnaic thu, na seachd eaglaisean.

CAIB. II.

CHUM aingil eaglais Ephe-suis, Sgrìobh; Is iad so na nithe a ta an Tì a tha cumail nan

seachd reultan 'na làimh dheis, a tha 'g imeachd ann am meadhon nan seachd coinnleirean òir, ag ràdh;

2 Is aithne dhomh t' oibre, agus do shaothair, agus t'fhoighidin, agus nach urrainn thu giùlan leo-san a tha olc; agus gu'n do dhearbh thu iadsan a their gur abstoil iad féin, agus nach eadh, agus gu'n d'fhuair thu iad breugach;

3 Agus gu'n do ghiùlain thu, agus gu bheil foighidin agad, agus air sgàth m'ainme-sa gu'n d'rinn thu saothair, agus nach d'thug thu thairis.

4 Gidheadh, tha *ni-éigin* agam a d' aghaidh, do bhrìgh gu'n do thréig thu do cheud ghràdh.

5 Cuimhnich uime sin cia uaith a thuit thu, agus gabh aithreachas, agus dèan na ceud oibre; no thig mi ort gu grad, agus atharraichidh mi do choinnleir as 'àit, mur gabh thu aithreachas.

6 Ach a ta so agad, gur fuathach leat oibre nan Nicolaiteach, nithe mar an ceudna a's fuathach leam-sa.

7 An ti aig am bheil cluas, éisdeadh e ciod a ta an Spiorad ag ràdh ris na h-eaglaisibh; Do'n ti a bhuadhaicheas bheir mise r'a itheadh do chraoibh na beatha, a tha ann am meadhon phàrrais Dé.

8 Agus chum aingil eaglais Smirna, sgrìobh, Na nithe so a ta e-san ag ràdh, an Tì a's e'n ceud neach agus an neach deireannach, a bha marbh, agus a tha beò;

9 Is aithne dhomh t' oibre, agus t-àmhghar, agus do bhochdainn, (gidheadh a ta thu beartach,) agus *is aithne dhomh* toibheum na muinntir a their gur Iudhaich iad féin, agus nach eadh, ach sionagog Shàtain.

10 Na biodh eagal ort roimh aon do na nithibh sin a dh'fhuilingeas tu : feuch, tilgidh an diabhul cuid dhibh ann am prìosan, chum gu'n dearbhar sibh ; agus bithidh àmhghar agaibh rè dheich làithean : bì-sa fìrinneach gu bàs, agus bheir mise dhuit crùn na beatha.

11 An tì aig am bheil cluas, éisdeadh e ciod a ta an Spiorad ag ràdh ris na h-eaglaisibh : An tì a bheir buaidh, cha chiurrar leis an dara bàs e.

12 Agus chum aingil na h-eaglais a ta ann am Pergamos, sgrìobh ; Na nithe so a ta e-san, aig am bheil an claidheamh geur dà fhaobhair, ag ràdh :

13 Is aithne dhomh t'òibre, agus c'ait am bheil thu a' d'chòmhnuidh, *eadhon far am bheil* caithir Shàtain : agus a ta thu a' cumail m' ainme-sa gu daingean, agus cha d' àicheadh thu mo chreidimh, eadhon anns na làithibh sin anns an *robh* Antipas 'na fhianuis fhìrinneach dhomh, a mharbhadh 'nur measg, far am bheil Sàtan 'na chòmhnuidh.

14 Gidheadh, tha beagan agam a' d' aghaidh, do bhrìgh gu bheil agad an sin an dream a tha cumail teagaisg Bhalaaim, a theagaisg do Bhalac ceap-tuislidh a chur roimh chloinn Israeil, chum nithe a dh'ìobradh do ìodholaibh itheadh, agus strìopachas a dhèanamh.

15 Is amhuil sin a ta agad mar an ceudna an dream a tha cumail teagaisg nan Nicolaiteach, ni a's fuathach leam-sa.

16 Dèan aithreachas, no thig mi a d'ionnsuidh gu grad, agus cogaidh mi 'nan aghaidh le claidheamh mo bheoil.

17 An tì aig am bheil cluas, éisdeadh e ciod a ta an Spiorad ag ràdh ris na h-eaglaisibh :

Do'n tì a bhuadhaicheas bheir mi r'a itheadh do'n mhana fholuichte, agus bheir mi dhà clach gheal, agus air a' chloich ainm nuadh sgrìobhta, nach aithne do neach air bith, ach do'n tì a gheibh i.

18 Agus chum aingil na h-eaglais a ta ann an Tiatira, sgrìobh ; Na nithe so tha Mac Dhé, aig am bheil a shùilean mar lasair theine, agus a chosan mar umha fìor-ghlan, ag ràdh ;

19 Is aithne dhomh t'òibre, agus do ghràdh, agus do sheirbhìs, agus do chreidimh, agus t'fhoighidin ; agus t'òibre deireannach ; gu *bheil iad* ni's mò na do cheud oibre.

20 Gidheadh, tha agam beagan do nithibh a' d' aghaidh, gu bheil thu a' fulang do'n mhnaoi sin Isebel, a tha 'g ràdh gur ban-fhàidh i féin, mo sheirbhisich a theagasg agus a mhealladh chum strìopachas a dhèanamh, agus nithe a dh'ìobradh do ìodholaibh itheadh.

21 Agus thug mi dh'i ùine gu aithreachas a ghabhail d'a strìopachas ; agus cha do ghabh i aithreachas.

22 Feuch, tilgidh mi i ann an leabaidh, agus iadsan a tha dèanamh adhaltrannais rithe ann an àmhghar mòr, mur gabh iad aithreachas d'an gnìomhar-aibh.

23 Agus marbhaidh mi a clann leis a' bhàs ; agus bithidh fhios aig na h-eaglaisibh uile gur mise an Tì sin a sgrùdas na h-àirnean agus na cridheachan : agus bheir mi do gach aon agaibh-sa a réir bhur n-oibre.

24 Ach ribhse a ta mi ag ràdh, agus ris a chuid eile ann an Tiatira, Mheud aig nach 'eil an teagasg so, agus do nach b'aithne doimhneachda Shàtain,

mar a their iad, cha chuir mi uallach eile oirbh;

25 Ach cumaibh gu daingean an ni a ta agaibh, gus an tig mi.

26 Agus an tì a bhuadhaicheas, agus a ghléidheas m'oire gus a' chrìoch, dhasan bheir mi cumhachd os ceann nan Cinn-each:

27 (Agus riaghlaidh e iad le slait iarunn: mar shoithichibh creadha brisear 'nam bloighdibh iad:) amhuil a fhuair mise o m' Athair.

28 Agus bheir mi dha reult na maidne.

29 An tì aig am bheil cluas, éisdeadh e cìod a ta an Spiorad ag ràdh ris na h-eaglaisibh.

CAIB. III.

A GUS chum aingil na h-eaglais a tha ann an Sardis, sgriobh; Na nithe so a ta an tì aig am bheil seachd spiorada Dhé, agus na seachd reultan, ag ràdh; Is aithne dhomh t'oire, gu bheil ainm agad, gu bheil thu beò, gidheadh a ta thu marbh.

2 Bì faireil, agus neartaich na nithe a ta làthair, agus a ta ullamh gu bàsachadh: oir cha d'fhuair mi t'oire coimhlionta am fianuis Dé.

3 Cuimhnich uime sin cionnus a fhuair agus a chuala tu, agus gléidh, agus gabh aithreachas. Uime sin mur dèan thu faire, thig mi ort mar ghaduiche, agus cha bhi fios agad cìod i an uair anns an tig mi ort.

4 Tha beagan ainmean agad eadhon ann an Sardis, nach do shalaich an eudach; agus imichidh iad maille rium-sa ann an *eulaidhibh* geala: oir is airidh iad.

5 An tì a bheir buaidh, sgeadaichear e ann an eudach geal; agus cha dubh mi mach 'ainm á

leabhar na beatha, ach aidichidh mi 'ainm-san am fianuis m'-Athar, agus am fianuis 'aingle-san.

6 An tì aig am bheil cluas, éisdeadh e cìod a ta an Spiorad ag ràdh ris na h-eaglaisibh.

7 Agus chum aingil na h-eaglais ann am Philadelphia, sgriobh; Na nithe so a ta an Tì naomh ag ràdh, an Tì fìor, an Tì aig am bheil iuchair Dhaibhidh, an Tì a dh'fhosgla, agus cha dùin neach air bith; agus a dhùineas, agus cha 'n fhosgail neach air bith:

8 Is aithne dhomh t'oire: feuch, chuir mi doras fosgailte romhad, agus cha 'n urrainn neach air bith a dhùnadh: oir a ta neart beag agad, agus ghléidh thu m' fhocal, agus cha d'àich-eadh thu m' ainm.

9 Feuch, bheir mise *orra-san* do shionagog Shàtain, (a tha 'g ràdh gur Iudhaich iad féin, agus nach eadh, ach a ta dèanamh bréige,) feuch, bheir mise orra gu'n tig iad agus gu'n dèan iad aoradh aig do chosaibh, agus gu'm bì fios aca gu'n do ghràdh-aich mise thu.

10 A chionn gu'n do ghléidh thu focal m' fhoighidin-sa, gléidhidh mise thusa mar an ceudna o uair a' bhuairidh, a thig air an t-saoghal uile, a dhearbhadh na muinntir sin a tha 'nan còmhnuidh air an talamh.

11 Feuch, tha mi a' teachd gu grad: dèan greim daingean air na bheil agad, chum nach glac neach air bith do chrùn.

12 An tì a bheir buaidh, nì mi e 'na phost ann an teampull mo Dhé, agus cha téid e ni's mò a mach as: agus sgriobhaidh mi ainm mo Dhé air, agus ainm caithreach mo Dhé, a's i Ierusalem nuadh, a thig a nuas o

nèamh o m' Dhia : agus *sgriobh-aidh* mi m' ainm nuadh féin air.

13 An tì aig am bheil cluas, éisdeadh e ciod a ta an Spiorad ag ràdh ris na h-eaglaisibh.

14 Agus chum aingil na h-eaglais ann an Laodicea, *sgriobh*; Na nithe so a ta an Amen, an fhianuis dhileas agus fhirinneach, toiseach cruthachaidh Dhé, ag ràdh ;

15 Is aithne dhomh t' oibre, nach 'eil thu aon chuid fuar no teth : b' fheàrr leam gu'm bith-eadh tu fuar no teth.

16 Uime sin do bhrìgh gu bheil thu meagh-bhlàth, agus nach 'eil thu aon chuid fuar no teth, sgeithidh mi thu mach as mo bheul.

17 Do bhrìgh gu bheil thu ag ràdh, Tha mi beartach, agus air fàs ann an saoibhreas, agus gun fheum agam air ni sam bith; agus gun fhios agad gu bheil thu dòruinneach, agus truagh, agus bochd, agus dall, agus lomnochd :

18 Comhairlicheam dhuit òr a cheannach uamsa, air a dhearbhadh san teine, chum gu'm bì thu saoibhir; agus eudach geal, chum gu'n còmhdaichear thu, agus nach bì nàire do lònnochduidh follaiseach; agus ùng do shùile le sàbh-shùl, chum gur léir dhuit.

19 Mheud as is ionmhuinn leam, tha mi a' cronachadh agus a' smachdachadh; uime sin biodh agad-sa teas-ghràdh, agus dèan aithreachas.

20 Feuch, tha mi a' m' sheasamh aig an dorus, agus a' bualadh: ma dh' éisdeas neach sam bith ri m' ghuth, agus gu'm fosgail e'n dorus, thig mi a steach d' a ionnsuidh, agus gabhaidh mi mo shuipeir maille ris, agus e-san maille rium-sa.

21 Do'n tì a bhuadhaicheas bheir mi comas suidhe maille

rium-sa air mo rìgh-chaithir, amhuil fòs a bhuadhaich mise, agus a shuidh mi maille ri m' Àthair air a rìgh-chaithir-san.

22 An tì aig am bheil cluas, éisdeadh e ciod a ta an Spiorad ag ràdh ris na h-eaglaisibh.

CAIB. IV.

AN déigh so dh' amhairc mi, agus, feuch, *bha* dorus fosgailte air nèamh; agus *bha* an ceud ghuth a chuala mi, mar *fhuaim* trompaid a' labhairt rium, ag ràdh, Thig a nìos an so, agus nochdaidh mise dhuit nithe a's éigin tachairt an déigh so.

2 Agus air ball *bha* mi san Spiorad: agus, feuch, *bha* rìgh-chaithir air a suidheachadh air nèamh, agus *bha* neach 'na shuidhe air an rìgh-chaithir.

3 Agus *bha* an Tì a shuidh, r'a amharc air, cosmhuil ri cloich lasper, agus Shardis: agus *bha* bogha-frois timchioll na rìgh-chaithreach mu'n cuairt, cosmhuil, r'a fhaicinn, ri Emerald.

4 Agus timchioll na rìgh-chaithreach mu'n cuairt *bha* ceithir chaithriche fichead; agus air na caithrichibh chunnaic mi ceithir seanaire fichead 'nan suidhe, air an sgeadachadh ann an culaidhibh geala; agus *bha* aca air an cinn crùin òir.

5 Agus chaidh a mach as an rìgh-chaithir dealanaich, agus tairneanaich, agus guthanna: agus *bha* seachd lòchrain theine a' dearg-lasadh am fianuis na rìgh-chaithreach, a's iad seachd spiorada Dhé.

6 Agus roimh an rìgh-chaithir *bha* fairge ghloine cosmhuil ri criostal: agus ann am meadhon na rìgh-chaithreach, agus mu'n cuairt do'n rìgh-chaithir, *bha* ceithir bheathaiche làn do shùilibh air am beulaobh agus air an cùlaobh.

7 Agus *bha* an ceud bheathach cosmhuil ri leòmhann, agus an dara beathach cosmhuil ri laogh, agus *bha* aig an treas beathach aghaidh mar dhuine, agus *bha* an ceathramh beathach cosmhuil ri iolair ag itealaich.

8 Agus aig na ceithir bheathaichibh, aig gach aon diubh fa leth, *bha* sè sgiathan mu'n cuairt da, agus *bha* iad làn do shùilibh an taobh a stigh; agus cha do sguir iad a là no dh'oidhche, ag ràdh, Naomh, naomh, naomh, an Tighearn Dia uile-chumhachdach, a *bha*, agus a ta, agus a bhitheas.

9 Agus an uair a thug na beathaiche sin glòir, agus urram, agus buidheachas do'n Tì a *bha* 'na shuidhe air an rìgh-chaithir, a ta beò gu saoghal nan saoghal,

10 Thuit na ceithir seanaire fichead sìos an làthair an Tì a *bha* 'na shuidhe air an rìgh-chaithir, agus rinn iad aoradh dhasan a ta beò gu saoghal nan saoghal, agus thilg iad sìos an crùn an làthair na rìgh-chaithreach, ag ràdh,

11 Is airidh thusa, a Thighearn, air glòir, agus urram, agus cumhachd fhaotainn; or chruthaich thu na h-uile nithe, agus air son do thoile-sa tha iad, agus chruthaich iad.

CAIB. V.

A GUS chunnaic mi ann an làimh dheis an Tì a shuidh air an rìgh-chaithir, leabhar sgrìobhta san taobh a stigh dheth agus air a chùlaobh, air a sheulachadh le seachd seulaibh.

2 Agus chunnaic mi aingeal treun a' gairm le guth àrd, Cò a's airidh air an leabhar fhosgladh, agus air a sheulachan fhuasgladh?

3 Agus cha robh aon neach air nèamh, no air thalamh, no

fuidh 'n talamh comasach air an leabhar fhosgladh, no sealltuinn air.

4 Agus ghuil mi gu mòr, do bhrìgh nach d'fhuaradh aon neach a b'airidh air an leabhar fhosgladh, agus a leughadh, no sealltuinn air.

5 Agus thubhairt aon do na seanairibh rium, Na guil: feuch, bhuadhaich an Leòmhann a tha do thréibh Iudah, Freumh Dhaibhidh, air an leabhar fhosgladh, agus a sheachd seulachan fhuasgladh.

6 Agus dh'amhairc mi, agus, feuch, ann am meadhon na rìgh-chaithreach, agus nan ceithir bheathaichean, agus ann am meadhon nan seanairean, Uan 'na sheasamh mar gu'm biodh e air a mharbhadh, aig an robh seachd adhaircean, agus seachd sùilean, a's iad seachd spiorada Dhé, a chuireadh a mach chum na talmhainn uile.

7 Agus thàinig e, agus ghlac e an leabhar á deas làimhan Tì a *bha* 'na shuidhe air an rìgh-chaithir.

8 Agus an uair a ghlac e 'n leabhar, thuit na ceithir bheathaichean, agus na ceithir seanaire fichead sìos an làthair an Uain, agus aig gach aon diubh clàrsaichean, agus tùis-shoithichean òir làn do nithibh deadh-fhàile, nithe a's iad ùrnuighean nan naomh.

9 Agus sheinn iad òran nuadh, ag ràdh, Is airidh thusa air an leabhar a ghlacadh, agus a sheulachan fhosgladh, do bhrìgh gu'n do mharbhadh thu, agus gu'n do shaor thu sinne do Dhia le t'fhuil féin, as gach uile thréibh, agus theangaidh, agus shluagh, agus chinneach;

10 Agus gu'n d'rinn thu rìghrean dhinn agus sagairt do ar Dia: agus rìghichidh sinn air an talamh.

11 Agus dh'amhaire mi, agus chuala mi guth mhòran aing-eal timchioll na rìgh-chaithreach, agus nam beathaichean, agus nan seanairean; agus b'è an àireamh deich mìle uair deich mìle, agus mìlte do mhiltibh;

12 Ag ràdh le guth àrd, Is airidh an t-Uan a chaidh mharbhadh, air cumhachd, agus saoihbreas, agus gliocas, agus neart, agus urram, agus glòir, agus moladh fhaotainn.

13 Agus chuala mi gach uile chreutair a ta air nèamh, agus air an talamh, agus fuaidh 'n talamh, agus a ta air a' chuan, agus na h-uile nithe a ta anna, ag ràdh, Moladh, agus urram, agus glòir, agus cumhachd, *gu robh* dhasan a ta 'na shuidhe air an rìgh-chaithir, agus do'n Uan gu saoghal nan saoghal.

14 Agus thubhairt na ceithir bheathaiche, Amen. Agus thuit na ceithir seanaire fichead sìos, agus rinn iad aoradh dhasan a ta beò gu saoghal nan saoghal.

CAIB. VI.

AGUS chunnaic mi, 'nuair a dh'fhosgail an t-Uan aon do na seulaibh, agus chuala mi aon do na ceithir bheathaichibh ag ràdh, mar le fuaim tairneanaich, Thig agus faic.

2 Agus chunnaic mi, agus, feuch, each geal; agus bha aig an tì a shuidh air, bogha: agus thugadh dha crùn, agus chaidh e mach a' buadhachadh, agus chum gu buadhaicheadh e.

3 Agus an uair a dh'fhosgail e'n dara seula, chuala mi an dara beathach ag ràdh, Thig, agus faic.

4 Agus chaidh each eile mach, *a bha* dearg; agus thugadh *cumhachd* dhasan a shuidh air, chum

sith a thoirt o'n talamh, ionnus gu marbhadh iad a chéile: agus thugadh claidheamh mòr dha.

5 Agus an uair a dh'fhosgail e an treas seula, chuala mi an treas beathach ag ràdh, Thig, agus faic. Agus dh'amhaire mi, agus, feuch, each dubh, agus bha aig an tì a shuidh air, meidh 'na làimh.

6 Agus chuala mi guth ann am meadhon nan ceithir bheathaichean ag ràdh, Tomhas cruithneachd air son peghinn, agus trì tomhasan eòrna air pheghinn; agus na dèan cron air an oladh, no air an fhìon.

7 Agus an uair a dh'fhosgail e'n ceathramh seula, chuala mi guth a' cheathramh beathaich ag ràdh, Thig, agus faic.

8 Agus dh'amhaire mi, agus feuch each glas; agus b'è ainm an tì a shuidh air, am Bàs, agus lean ifrinn 'na chuideachd: agus thugadh dhoibh-san cumhachd air a' cheathramh cuid do'n talamh, a mharbhadh le claidheamh, agus le gorta, agus le bàs, agus le fiadh-bheathaichibh na talmhainn.

9 Agus an uair a dh'fhosgail e an cùigeadh seula, chunnaic mi fuaidh 'n altair, anama na muinntir sin a mharbhadh air son focail Dé, agus air son na fianuis a chum iad;

10 Agus ghlaodh iad le guth mòr, ag ràdh, Cia fhada bhith-eas, O Thighearna naoimh agus fhirinnich, gus an dèan thu breitheanas, agus an diòl thu ar fuil-ne orra-san a ta 'nan còmhnuidh air an talamh?

11 Agus thugadh do gach aon diubh trusgana fada geala, agus chaidh a ràdh riu, iad a ghabhail fois fathast rè ùine bhig, gus am biodh an còmh-sheirbhisich-mar an ceudna, agus am bràithrean a rachadh a mharbh-

adh mar a chaidh iadsan, air an coimhlionadh.

12 Agus dh'amhairc mi 'nuair a dh'fhosgail e an seathadh seula, agus, feuch, bha crith mhòr thalmhainn ann; agus dh'fhàs a' ghrian dubh mar shaic-eudach ròin, agus dh'fhàs a' ghealach mar fhuil.

13 Agus thuit reulta nèamh air an talamh, mar a thilgeas craobh-fhìge a figean an-abaich, 'nuair a chrathar i le gaoith mhòir.

14 Agus chaidh nèamh thairis mar rola leabhair air fhilleadh air a chèile; agus dh'atharraicheadh gach beinn agus eilean as an ionadaibh féin:

15 Agus dh'fholaich rìghre na talmhainn, agus na daoine mòra, agus na daoine saoi bhir, agus na h-àrd-cheannardan, agus na daoine cumhachdach, agus gach tràill, agus gach duine saor, iad féin ann an uamhaibh agus ann an creagaibh nam beann;

16 Agus thubhairt iad ris na sléibhtibh agus ris na creagaibh, Tuitibh oirne, agus folaichibh sinn o ghnùis an Tì a tha 'na shuidhe air an rìgh-chaithir, agus o fheirg an Uain:

17 Oir thàinig là mòr 'fheirgesan; agus cò a dh'fheudas seasamh?

CAIB. VII.

A GUS an déigh nan nithe sin, chunnaic mi ceithir aingil 'nan seasamh air ceithir oisinnibh na talmhainn, a' cumail ceithir ghaothanna na talmhainn, chum nach séideadh a' ghaoth air an talamh, no air an fhairge, no air aon chraoibh.

2 Agus chunnaic mi aingeal eile ag éirigh o'n àird an ear, aig an robh seula an Dé bheò: agus ghlaodh e le guth mòr ris na ceithir aingil, d'an d'thugadh

cumhachd cron a dhèanamh air an talamh agus air an fhairge,

3 Ag ràdh, na dèanaibh doch-ann do'n talamh, no do'n fhairge, no do na craobhaibh, gus an cuir sinn seula air seirbhisich ar Dé air clàraibh an eudainn.

4 Agus chuala mi àireamh na dream a sheulaicheadh: ceud agus dà fhichead agus ceithir mìle, a sheulaicheadh do uile threubhaibh chloinn Israeil.

5 Do thréibh Iuda sheulaicheadh dà mhìle dheug. Do thréibh Reubain sheulaicheadh dà mhìle dheug. Do thréibh Ghad sheulaicheadh dà mhìle dheug.

6 Do thréibh Aseir sheulaicheadh dà mhìle dheug. Do thréibh Nephtalim sheulaicheadh dà mhìle dheug. Do thréibh Mhanaseis sheulaicheadh dà mhìle dheug.

7 Do thréibh Shimoin sheulaicheadh dà mhìle dheug. Do thréibh Lebhi sheulaicheadh dà mhìle dheug. Do thréibh Isachair sheulaicheadh dà mhìle dheug.

8 Do thréibh Shabuloin sheulaicheadh dà mhìle dheug. Do thréibh Ioseiph sheulaicheadh dà mhìle dheug. Do thréibh Bheniamin sheulaicheadh dà mhìle dheug.

9 An déigh so dh'amhairc mi, agus, feuch, sluagh mòr, nach robh neach sam bith comasach air àireamh, do na h-uile chinnich, agus threubhaibh, agus shluaghaibh, agus theangaidhibh, 'nan seasamh an làthair na rìgh-chaithreach, agus an làthair an Uain, air an sgeadachadh le trusganaibh fada geala, agus pailm aca 'nan làmhaibh;

10 Agus ghlaodh iad le guth àrd, ag ràdh, slàinte do ar Diane a ta 'na shuidhe air an rìgh-chaithir, agus do'n Uan.

11 Agus sheas na h-aingil uile timchioll na rìgh-chaithreach, agus nan seanairean, agus nan ceithir bheathaichean, agus thuit iad air an aghaidh an làthair na rìgh-chaithreach, agus rinn iad aoradh do Dhia,

12 Ag ràdh, Amen: Moladh, agus glòir, agus gliocas, agus buidheachas, agus urram, agus cumhachd, agus neart *gu robh* do ar Dia-ne gu saoghal nan saoghal. Amen.

13 Agus fhreagair aon do na seanairibh, ag ràdh rium, Cò iad sin a ta air an sgeadachadh le trusganaibh fada geala? agus cia as a thàinig iad?

14 Agus thubhairt mi ris, A Thighearn, tha fhios agad-sa, Agus thubhairt e rium, Is iad so iadsan a thàinig á h-àmhghar mòr; agus nìgh iad an trusgain, agus rinn iad geal iad ann am fuil an Uain.

15 Uime sin tha iad an làth-air rìgh-chaithreach Dhé, agus a' dèanamh aoraidh dha a là agus a dh'oidhche 'na theampull: agus gabhaidh an Tì a tha 'na shuidhe air an rìgh-chaithir còmhnuidh 'nam measg.

16 Cha bhi ocras orra tuilleadh, no tart ni's mò; cha mhò a bhuaileas a' ghrian orra, no teas air bith.

17 Oir beathaichidh an t-Uan a tha am meadhon na rìgh-chaithreach iad, agus treòraichidh e iad gu beò-thobraichibh uisge: agus tiormaichidh Dia gach deur o'n sùilibh.

CAIB. VIII.

AGUS an uair a dh'fhosgail e an seachdamh seula, bha tosd air nèamh mu thimchioll leth uaire.

2 Agus chunnaic mi na seachd aingil a sheas am fianuis Dé;

agus thugadh dhoibh-san seachd trompaidean.

3 Agus thàinig aingeal eile, agus sheas e aig an altair, agus tùisear òir aige; agus thugadh dha mòran tùise, chum gu'n tugadh se e maille ri ùrnuighibh nan uile naomh air an altair òir, a bha'n làthair na rìgh-chaithreach.

4 Agus chaidh deatach na tùise suas maille ri ùrnuighibh nan naomh, o làimh an aingil, an làthair Dhé.

5 Agus ghlac an t-aingeal an tùiseir, agus lion se e le teine na h-altarach, agus thilg e air an talamh e: agus bha guthanna, agus tairneanaich, agus dealanaich, agus crith-thalmhainn ann.

6 Agus dh'ulluich na seachd aingil aig an robh na seachd trompaidean iad féin, chum an séideadh.

7 Agus shéid an ceud aingeal, agus bha clocha-meallain ann, agus teine air am measgadh le fuil, agus thilgeadh air an talamh iad; agus loisgeadh an treas cuid do na craobhaibh, agus am feur glas uile.

8 Agus shéid an dara aingeal, agus thilgeadh mar gu'm bu bheinn mhòr a' losgadh le teine anns an fhairge: agus dh'fhàs an treas cuid do'n fhairge 'na fuil:

9 Agus fhuair an treas cuid do na creutairibh a bha anns an fhairge, aig an robh anam, bàs; agus mhilleadh an treas cuid do na longaibh.

10 Agus shéid an treas aingeal, agus thuit reult mhòr o nèamh, a' dearg-lasadh mar lòchran, agus thuit i air an treas cuid do na h-aimhneibh, agus air na tobraichibh uisge;

11 Agus is e an t-ainm a ghoirear do'n reult Burmaid: agus rinneadh an treas cuid do

na h-uisgeachaibh 'nam burmaid; agus fhuair mòran dhaoine bàs leis na h-uisgeachaibh, do bhrìgh gu'n d'rinneadh searbh iad.

12 Agus shéid an ceathramh aingeal, agus bhuaileadh an treas cuid do'n ghréin, agus an treas cuid do'n ghealaich, agus an treas cuid do na reultaibh; ionnus gu'n d'rinneadh an treas cuid diubh dorchà, agus nach do dhealraich an là rè an treas cuid dheth, no an oidhche air a' mhodh cheudna.

13 Agus dh'amhairc mi, agus chuala mi aingeal ag itealaich ann am meadhon nèimh, ag ràdh le guth àrd, Is truagh, truagh, truagh, do luchd-àiteachaidh na talmhainn, air son guthanna eile trompaid nan trì aingeal a tha fathast gu séideadh!

CAIB. IX.

AGUS shéid an cùigeadh aingeal a thrompaid, agus chunnaic mi reult a' tuiteam o nèamh chum na talmhainn: agus thugadh dha iuchair sluichd an dubh-aigein.

2 Agus dh'fhosgail e slochd an dubh-aigein, agus dh'éirich deatach as an t-slochd, mar dheataich àmhuinn mhòr *thein-tich*; agus rinneadh a' ghrian agus an t-athar dorchà le deataich an t-sluichd.

3 Agus thàinig a mach as an deataich air an talamh locuist; agus thugadh cumhachd dhoibh, a réir mar a tha cumhachd aig scorpionnaibh na talmhainn.

4 Agus chaidh a ràdh riu gun iad a dhèanamh dochann air feur na talmhainn, no air ni sam bith glas, no air craoibh sam bith; ach air na daoineibh sin a mhàin aig nach 'eil seula Dhé air clàr an eudainn.

5 Agus thugadh dhoibh, cha'n

e gu marbhadh siad iad, ach gu'm biodh iad air am pianadh rè chùig mìosa: agus *bha* am pian cosmhuil ri péin scorpion, nuair a bhuaileas e duine.

6 Agus anns na làithibh sin iarraidh daoine am bàs, agus cha'n fhaigh iad e; agus bithidh déidh aca air bàsachadh, agus teichidh am bàs uatha.

7 Agus *bha* cruth nan locust cosmhuil ri h-eachaibh air an ulluchadh chum catha; agus *bha* air an cinn mar gu'm biodh crùn cosmhuil ri h-òr, agus *bha* an aghaidhean cosmhuil ri h-aghaidhibh dhaoine.

8 Agus *bha* folt orra cosmhuil ri folt bhan, agus *bha* am fiacra mar *fhiacraibh* leòmhann.

9 Agus *bha* aca uchd-éididhean, mar uchd-éididhean iar-uinn; agus *bha* fuaim an sgiathan mar fhuaim charbada mhòran each a' ruith chum catha.

10 Agus *bha* earbuill aca cosmhuil ri scorpionnaibh; agus *bha* gathanna 'nan earblaibh: agus *b'e* an cumhachd daoine a chiurradh rè chùig mìosa.

11 Agus *bha* rìgh aca os an ceann, *eadhon* aingeal an dubh-aigein, agus *'s e a's* ainm dha san Eabhra, Abaddon, ach anns a' Ghréigis 'se a's ainm dha Apolion.

12 Chaidh aon truaighe thairis; feuch, tha dà thruaighe ri teachd fathast an déigh so.

13 Agus shéid an seathadh aingeal a thrompaid agus chuala mi guth o cheithir adharcaibh na h-altair òir, a tha 'm fianuis Dé,

14 Ag ràdh ris an t-seathadh aingeal aig an robh an trompaid, Fuasgail na ceithir aingil a tha ceangailte aig an amhainn mhòir Euphrates.

15 Agus dh'fhuasgladh na ceithir aingil, a *bha* ulluichte fa chomhair uaire, agus là, agus

miosa, agus bliadhna, chum gu'm marbhadh iad an treas cuid do dhaoineibh.

16 Agus b'e àireamh armait-ean a' mharc-shluaigh fichead mìle do dheich mìlteibh : agus chuala mi an àireamh.

17 Agus mar so chunnaic mi na h-eich anns an taisbean, agus iadsan a shuidh orra, aig an robh uchd-éididhean do theine, agus do hiacint, agus do phronnusc : agus bha cinn nan each mar chinn leòmhann ; agus as am beoil thàinig a mach teine, agus deataich, agus pronnusc.

18 Leis na trì plàighibh so mharbhadh an treas cuid do dhaoineibh, leis an teine, agus leis an deataich, agus leis a' phronnusc, a chaidh a mach as am beoil.

19 Oir tha an cumhachda 'nam beul, agus 'nan earblaibh : oir bha an earbuill cosmhuil ri nathraichibh nimhe, agus bha cinn aca, agus leo sin nì iad dochann.

20 Agus cha do ghabh a' chuid eile do na daoineibh, nach do mharbhadh leis na plàighibh sin, aithreachas do oibribh an làmh, ionnus nach dèanadh iad aoradh do dheamhnaibh, agus do dhealbhaibh òir, agus airgid, agus umha, agus cloiche, agus fiodha ; nach urrainn faicinn, no cluinntinn, no imeachd :

21 Agus cha mhò a ghabh iad aithreachas d'am mortaibh, no d'an druidheachd, no d'an striopachas, no d'an gadachdaibh.

CAIB. X.

A GUS chunnaic mi aingeal cumhachdach eile a' teachd a nuas o nèamh, air a sgeadachadh le neul, agus bogha-frois air a cheann, agus 'aghaidh mar a' ghrian, agus a chosa mar phuist teine.

2 Agus bha aige 'na làimh

leabhran fòsgailte : agus chuir e a chos dheas air an fhairge, agus a chos chli air an talamh,

3 Agus ghlaodh e le guth àrd, mar a bheuchdas leòmhann : agus an uair a ghlaodh e, labhair seachd tairneanaich an guth-anna féin.

4 Agus an uair a labhair na seachd tairneanaich an guthanna féin, bha mi dol a sgriobhadh : agus chuala mi guth o nèamh, ag ràdh rium, Seulaich na nithe a labhair na seachd tairneanaich agus na sgriobh iad.

5 Agus thog an t-aingeal, a chunnaic mi 'na sheasamh air a' mhuir, agus air an talamh, a làmh gu nèamh,

6 Agus mhionnaich e air-san a tha beò gu saoghal nan saoghal, a chruthaich nèamh agus na nithe a ta ann, agus an talamh agus na nithe a ta ann, agus an fhairge agus na nithe a ta innte, Nach bì aimsir ann nì's mò ;

7 Ach ann an làithibh gutha an t-seachdamh aingil, 'nuair a thòisicheas e air séideadh, an sin gu'm biodh rùn-diomhair Dhé air a chrìochnachadh, mar a dh'innis e d'a sheirbhisich na fàidhean.

8 Agus labhair an guth, a chuala mi o nèamh, rium a ris, agus thubhairt e, Imich, glac an leabhran a tha fòsgailte ann an làimh an aingil a tha 'na sheasamh air an fhairge, agus air an talamh.

9 Agus chaidh mi dh'ionnsuidh an aingil, agus thubhairt mi ris, Thoir dhomh-sa an leabhran : agus thubhairt e-san rium, Glac, agus ith suas e ; agus nì e do bhroinn searbh, ach bithidh e ann do bheul milis mar mhill.

10 Agus ghlac mi an leabhran á làimh an aingil, agus dh'ith mi suas e ; agus bha e ann mo

bheul milis mar mhill; agus an uair a dh'ith mi e, rinneadh mo bhrù sèarbh.

11 Agus thubhairt e rium, Is éigin duit a rìs fàidheadaireachd a dhèanamh am fianuis shlògh, agus chinneach, agus theanganna, agus rìghre lionmhor.

CAIB. XI.

AGUS thugadh dhomh cuile cosmhuil ri slait: agus sheas an t-aingeal, ag ràdh, Eirich, agus tomhais teampull Dhé, agus an altair, agus iadsan a tha dèanamh aoraidh ann.

2 Ach fàg a mach a' chùirt a tha'n taobh a muigh do'n teampull, agus na tomhais i; oir thugadh i do na Cinnich: agus saltraidh iad fo'n cosaibh am baile naomh rè dhà mhìos agus dhà fhichead.

3 Agus bheir mise *cumhachd* do m' dhithis fhianuisean, agus nì iad fàidheadaireachd rè mìle agus dà cheud agus trì fichead là, eudaichte ann an saic-eudach.

4 Is iad so an dà chrann oladh, agus an dà choinnleir a tha 'nan seasamh an làthair Dhé na talmhainn.

5 Agus ma chiurras neach air bith iad, théid teine a mach as am beul, agus claidhidh e an naimhdean: agus ma chiurras neach air bith iad, is éigin da bhi air a mharbhadh mar so.

6 Tha cumhachd aca so nèamh a dhùnadh, ionnus nach bi uisge ann, ann an làithibh am fàidheadaireachd-san: agus tha cumhachd aca air uisgeachaibh chum an tionndadh gu fuil, agus an talamh a bhualadh leis an uile phlàigh, co minic's is toil leo.

7 Agus an uair a chrìochnaicheas iad am fianuis, nì am fiadh-bheathach a dh'éireas as an

t-slochd gun iochdar cogadh 'nan aghaidh, agus bheir e buaidh orra, agus marbhaidh e iad.

8 Agus *bithidh* an cuirp mharbha 'nan *luidhe* ann an sràid a bhaile mhòir, ris an abrar gu spioradail Sodom agus an Eiphit, far mar an ceudna an do chéusadh ar Tighearn.

9 Agus chì *cuid* do na sluaghaibh, agus do threubhaibh, agus do theangannaibh, agus do chinnich, an cuirp mharbha rè thrì làithean gu leth, agus cha leig iad an cuirp mharbha a chur ann an uaighibh.

10 Agus nì luchd-àiteachaidh na talmhainn gàirdeachas os an ceann, agus bithidh iad subhach, agus cuiridh iad tiodhlacan dh'ionnsuidh a chéile; do bhrìgh gu'n do phian an dà fhàidh so iadsan a bha chòmbnuidh air an talamh.

11 Agus an déigh thrì làithean gu leth, chaidh Spiorad na beatha o Dhia a steach anna, agus sheas iad air an cosaibh; agus thuit eagal mòr orra-san a chunnaic iad.

12 Agus chual iad guth mòr o nèamh, ag ràdh riu, Thigibh a nìos an so. Agus chaidh iad suas do nèamh air neul; agus chunnaic an naimhdean iad.

13 Agus anns an uair sin féin bha crith mhòr thalmhainn ann, agus thuit an deicheamh cuid do'n bhàile, agus mharbhadh seachd mìle pearsa sa' chrith-thalmhainn: agus ghabh a' chuid eile eagal, agus thug iad glòir do Dhia nèimh.

14 Chaidh an dara truaighe thairis: feuch, thig an treas truaighe gu h-aithghearr.

15 Agus shéid an seachdamh aingeal a thrompaid; agus bha guthanna mòra air nèamh, ag ràdh, Rinneadh rioghachdan an t-saoghail 'nan *rioghachdaibh* do

ar Tighearn, agus d'a Chrìosd-san ; agus bithidh e 'na Rìgh gu saoghal nan saoghal.

16 Agus thuit na ceithir sean-aire fichead, a bha 'nan suidhe air an caithrichibh am fianuis Dé, sìos air an aghaidh, agus rinn iad aoradh do Dhia,

17 Ag ràdh, Bheireamaid buidheachas duitse, O Thigh-earna Dhé uile-chumhachdaich, a ta, agus a bha, agus a bhith-eas ; air son gu'n do ghabh thu do chumhachd mòr a d'ionnsuidh, agus gu'n do rìghich thu.

18 Agus bha fearg air na cinnich, agus thàinig t'fhearg-sa, agus àm nam marbh gu'n tugtadh breth orra, agus gu'n tugadh tusa duais do d'sheirbhisich na fàidhean, agus do na naoimh, agus dhoibh-san air am bheil eagal t'ainme, do na big agus do na mòir, agus gu sgriosadh tu iadsan a sgriosas an talamh.

19 Agus dh'fhosgladh teampull Dé air nèamh, agus chunnacas ann a theampull àire a' choimhcheangail : agus bha dealanaich, agus guthanna, agus tairneanaich, agus crith-thalmhainn, agus clocha-meallain mòra ann.

CAIB. XII.

A GUS chunnacas iongantas mòr air nèamh, bean air a sgeadachadh leis a' ghréin, agus a' ghealach fuidh a cosaibh, agus air a ceann crùn do dhà reult dheug.

2 Agus air dh'i bhi torrach, ghlaodh i, ri saothair-chloinne, agus bha i air a pianadh chum a h-aisead.

3 Agus chunnacas iongantas eile air nèamh, agus, feuch, dragon mòr dearg, aig an robh seachd cinn, agus deich adh-aircean, agus air a chinn seachd crùn.

4 Agus tharruing 'earball an treas cuid do reultaibh nèimh, agus thilg e iad chum 'na talmhainn : agus sheas an dragon fa chomhair na mnà, a bha ullamh gu bhi air a h-aisead, chum a leanabh a shlugadh suas 'nuair a bheireadh i e.

5 Agus rug i leanabh mic, a bha gus na cinnich uile a riaghladh le slait iarunn : agus thogadh a leanabh suas chum Dhé, agus *chum* a rìgh-chaitheach-san.

6 Agus theich a' bhean do'n fhàsach, far am bheil aice ionad air ulluchadh le Dia, chum gu'm biodh i air a beathachadh an sin rè mìle *agus* dà cheud *agus* trì fichead là.

7 Agus bha cogadh air nèamh ; rinn Michael agus 'aingil cogadh an aghaidh an dragoin ; agus chog an dragon agus 'aingil féin ;

8 Agus cha d'thug iad buaidh, cha mhò a fhuaradh an àite ni's mò air nèamh.

9 Agus thilgeadh a mach an dragon mòr, an t-seann nathair sin, ris an abrar an diabhul agus Sàtan, a tha mealladh an t-saoghail uile : thilgeadh a mach e chum na talmhainn, agus thilgeadh a mach 'aingil maille ris.

10 Agus chuala mi guth mòr ag ràdh air nèamh, A nis tha slàinte agus neart, agus rìoghachd ar Dé-ne, agus cumhachd a Chrìosd air teachd ; oir thilgeadh sìos fear-casaid ar bràithrean, a bha 'gan casaid an làthair ar Dé-ne a là agus a dh'oidhche.

11 Agus thug iad buaidh air tre fhuil an Uain, agus tre fhocal am fianuis-san ; agus cha do ghràdhaich iad an anama féin gu bàs.

12 Uime sin biodh gairdeach-

as oirbh, O a nèamha, agus oirbhse a tha 'nur còmhnuidh annta. An-aoibhinn do luchd-àiteachaidh na talmhainn, agus na fairge! oir thàinig an diabhl a nuas do 'ur n-icnnsuidh, agus fearg ro mhòr air, do bhrìgh gur fiosrach e nach 'eil aige ach ùine gheàrr.

13 Agus an uair a chunnaic an dragon gu'n do thilgeadh e chum na talmhainn, rinn e geur-leanmhuinn air a' mhnaoi a rug an *leanabh* mic.

14 Agus do'n mhnaoi thugadh dà sgeith iolaire mòire, chum gu'n rachadh i air itealaich leo do'n fhàsach, chum a h-ionaid féin; far am bheil i air a h-altrum rè aimsir, agus aimsir-ean, agus leth-aimsir, o aghaidh na nathrach.

15 Agus thilg an nathair as a beul uisge mar thuil, an déigh na mnà, chum gu'n tugadh i oirre bhi air a giùlan air falbh leis an t-sruth.

16 Agus rinn an talamh còmh nadh ris a' mhnaoi; agus dh'fhosgail an talamh a bheul, agus shluig e suas an tuil, a thilg an dragon as a bheul.

17 Agus bha fearg air an dragon ris a' mhnaoi, agus chaidh e dhèanamh cogaidh ris a' chuid eile d'a sliochd, a tha coimhead àitheanta Dhé, agus aig am bheil fianuis Iosa Crìosd.

CAIB. XIII.

AGUS sheas mi air gaineimh na fairge, agus chunnaic mi fiadh-bheathach ag éirigh suas as an fhairge, aig an robh seachd cinn, agus deich adhaircean, agus air 'adharcaibh deich crùin, agus air a chinn ainm toibheim.

2 Agus bu chosmhuil am fiadh-bheathach a chunnaic mi ri leopard, agus bha a chosan

mar *chosaibh* math-ghamhna, agus a bheul mar bheul leòmhain: agus thug an dragon a neart, agus a chaithir, agus cumhachd mòr dha.

3 Agus chunnaic mi aon d'a chinn mar gu'm biodh e air a lotadh gu bàs; agus leighiseadh a lot bàsmhor: agus ghabh an talamh uile iongantas an déigh an fhiadh-bheathaich.

4 Agus rinn iad aoradh do'n dragon, a thug a chumbachd do'n fhiadh-bheathach: agus rinn iad aoradh do'n fhiadh-bheathach, ag ràdh, Cò a ta cosmhuil ris an fhiadh-bheathach? Cò a ta comasach air cogadh a dhèanamh 'na aghaidh?

5 Agus thugadh dha beul a' labhairt nithe mòra, agus thoi-bheum; agus thugadh cumhachd dha cogadh a dhèanamh rè dhà mhìos agus dà fhichead.

6 Agus dh'fhosgail e bheulann an toibheum an aghaidh Dhé, chum toibheum a thoirt d'a ainm, agus d'a phàillion, agus do'n dream a ta 'nan còmhnuidh air nèamh.

7 Agus thugadh dha cogadh a dhèanamh an aghaidh nan naomh, agus buaidh a thoirt orra: agus thugadh dha cumhachd os ceann gach uile thréibh, agus theangaidh, agus chinnich.

8 Agus nì iadsan uile, a tha 'nan còmhnuidh air an talamh, aoradh dha, aig nach 'eil an ainmean sgrìobhta ann an leabhar beatha an Uain, a mharbhadh o thoiseach an t-saoghail.

9 Ma tha cluas aig neach air bith, éisdeadh e.

10 Ma bheir neach air bith am braighdeanas, théid e féin am braighdeanas: ma mharbhas neach air bith leis a' chlaidheamh, is éigin e féin bhi air a mharbhadh leis a' chlaidheamh. Is ann

an so a ta foighidin agus creidimh nan naomh.

11 Agus chunnaic mi fiadh-bheathach eile ag éirigh as an talamh; agus bha aige dà adhairc cosmhuil ri uan, agus labhair e mar dhragon.

12 Agus tha e a' cur an gnìomh cumhachd a' cheud fhiadh-bheathaich uile 'na fhianuis, agus tha e toirt air an talamh, agus orra-san, a tha 'nan còmhnuidh ann aoradh a dhèanamh do'n cheud fhiadh-bheathach, aig an robh a lot bàsmhor air a leigheas.

13 Agus tha e a' dèanamh chomhara mòra, ionnus gu bheil e toirt air teine teachd a nuas o nèamh air an talamh, ann am fianuis dhaoine.

14 Agus tha e a' mealladh na dream a tha 'nan còmhnuidh air an talamh, leis na comharaibh sin a thugadh dha a dhèanamh an làthair an fhiadh-bheathaich, ag ràdh ri luchd-àiteachaidh na talmhainn, iomhaigh a dhèanamh do'n bheathach aig an robh an lot claidheimh, agus a bha beò.

15 Agus thugadh cumhachd dha beatha a thoirt do iomhaigh an fhiadh-bheathaich, ionnus gu'n labhradh iomhaigh an fhiadh-bheathaich, agus gu'n tugadh e fa'near gu'm biodh a mheud as nach dèanadh aoradh do iomhaigh an fhiadh-bheathaich, air am marbhadh.

16 Agus tha e toirt air na huile *dhaoine*, araon beag agus mòr, saoibhir agus daoibhir, saor agus daor, comhara a ghabhail air an làimh dheis, no air clàr an eudain;

17 Agus nach feudadh neach sam bith ceannach no reic, ach e-san aig am biodh an comhara, no ainm an fhiadh-bheathaich, no àireamh 'ainme.

18 An so tha gliocas. An ti aig am bheil tuigse, àirmheadh e àireamh an fhiadh-bheathaich; oir is àireamh duine e; agus is e 'àireamh sè ceud agus trì fich-ead agus sè.

CAIB. XIV.

A GUS dh'amhairc mi, agus feuch, Uan 'na sheasamh air sliabh Shioin, agus maille ris ceud agus dà fhichead agus ceithir mìle, aig an robh ainm 'Athar-san sgrìobhta air clàr an eudain.

2 Agus chuala mi guth o fhlaithneas, mar fhuaim mhòran uisgeacha, agus mar fhuaim tàirneanaich mhòir; agus chuala mi fuaim chlàrsairean, a' dèanamh ciùil le'n clàrsaichibh féin:

3 Agus sheinn iad mar gu'm b'òran nuadh e an làthair na rìgh-chaithreach, agus an làthair nan ceithir bheathaichean, agus nan seanairean: agus cha b'urrainn neach sam bith an t-òran sin fhòghlum, ach an ceud agus dà fhichead agus na ceithir mìle, a shaoradh o'n talamh.

4 Is iad so an dream nach do shalaicheadh le mnàibh; oir is òighean iad: is iad so an dream a tha leantuinn an Uain ge b'e àit an téid e: shaoradh iad so o mheasg dhaoine, 'nan ceud thoradh do Dhia, agus do'n Uan.

5 Agus 'nam beul cha d' fhuaradh cealg: oir tha iad gun lochd an làthair rìgh-chaithreach Dhé.

6 Agus chunnaic mi aingeal eile ag itealaich ann am meadhon nèimh, aig an robh an soisgeul sìorruidh r'a shearmonachadh dhoibh-san a tha 'nan còmhnuidh air an talamh, agus do gach uile chinneach, agus thréibh, agus theangaidh, agus shluagh,

7 Ag ràdh le guth àrd, Biodh

eagal Dé oirbh, agus thugaibh glòir dha; oir thàinig uair a bhreitheanais: agus dèanaibh aoradh dhasan a rinn nèamh, agus talamh, agus an fhairge, agus na tobair uisge.

8 Agus lean aingeal eile, ag ràdh, 'Thuit, thuit Babilon, am baile mòr sin, do bhrìgh gu'n d'thug i air gach uile chinneach òl do fhìon feirge a striopachais.

9 Agus lean an treas aingeal iad, ag ràdh le guth àrd, Ma nì neach air bith aoradh do'n fhiadh-bheathach, agus d'a ìomhaigh, agus ma ghabhas e a chomhara air clàr 'eudain, no air a làimh,

10 Olaidh e-san do fhìon feirge Dhé, a tha air a dhòrtadh gun mheasgadh, ann an cupan 'fheirge-san; agus bithidh e air a phianadh le teine agus pronnusc, am fianuis nan aingeal naomha, agus am fianuis an Uain.

11 Agus bithidh deatach am péine-san ag éirigh suas gu saoghal nan saoghal: agus cha'n 'eil fois sam bith a là no dh'oidhche aca-san a nì aoradh do'n fhiadh-bheathach agus d'a ìomhaigh, no aig neach air bith a ghabhas comhara 'ainme-san.

12 An so tha foighidin nan naomh: an so tha'n dream a choimhideas àitheanta Dhé, agus creidimh Iosa.

13 Agus chuala mi guth o nèamh, ag ràdh rium, Sgrìobh, Is beannaichte na mairbh a gheibh bàs san Tighearn, á so a mach: Seadh, a ta an Spiorad ag ràdh, chum gu faigh iad fois o'n saothair; agus leanaidh an oibre iad.

14 Agus dh'amhairc mi, agus, feuch, neul geal, agus air an neul *neach* 'na shuidhe còsmhuil ri Mac an duine, aig an robh crùn òir air a cheann, agus corr-an geur 'na làimh.

15 Agus thàinig aingeal eile mach as an teampull, a' glaoth-aich le guth àrd ris an Tì a bha 'na shuidhe air an neul, Sàth a steach do chorr-an geur, agus buain oir thàinig àm 'dhuith buain; oir tha foghar 'na talmhainn abuich.

16 Agus shàth an Tì a bha 'na shuidhe air an neul, a chorr-an san talamh; agus bhuaineadh an talamh.

17 Agus thàinig aingeal eile mach as an teampull a ta air nèamh, agus corran geur aigesan mar an ceudna.

18 Agus thàinig aingeal eile mach o'n altair, aig an robh cumhachd os ceann teine, agus ghlaodh e le glaoth àrd ris an Tì aig an robh an corran geur, ag ràdh, Sàth a steach do chorr-an geur, agus cnuasaich baguid-eon fionain na talmhainn: oir a ta a fìon-dhearcan làn abuich.

19 Agus shàth an t-aingeal a chorr-an san talamh, agus cnuasaich e fionain na talmhainn, agus thilg e i ann am fìon-amar mòr feirge Dhé.

20 Agus shaltradh am fìon-amar an taobh a muigh do'n bhaile, agus thàinig fuil a mach as an fhìon-amar, gu sréin nan each, feadh mhìle agus shè ceud stàid.

CAIB. XV.

AGUS chunnaic mi comhara eile air nèamh, mòr agus iongantach, seachd aingil aig an robh na seachd plàighean deir-eannach; oir annta so tha fearg Dhé air a coimhlionadh.

2 Agus chunnaic mi mar gu'm b'fhairge ghloine, air a measgadh le teine; agus iadsan a thug buaidh air an fhiadh-bheathach, agus air 'ìomhaigh, agus air a chomhara, agus air àireamh 'ainme, 'nan seasamh air an

fhairge ghloine, agus clàrsaiche Dhé aca.

3 Agus tha iad a' seinn òrain Mhaois òglaich Dhé, agus òrain an Uain, ag ràdh, *Is mòr*, agus *is iongantach t'òibre*, a Thighearna Dhé uile-chumhachdaich : *is ceart* agus *is fìor* do shligh-ean-sa, a Rìgh nan naomh.

4 Cò air nach biodh eagall romhad, O Thighearn, agus nach tugadh glòir do t'ainm? oir *is tusa* a mhàin a ta naomh : oir thig na h-uile chinnich, agus nì iad aoradh ann do làthair ; do bhrìgh gu bheil do bhreitheanais air an dèanamh follais-each.

5 Agus an déigh so dh'amhairc mi, agus, feuch, dh'fhosgladh teampull pàilliuin na fianuis air nèimh.

6 Agus thàinig a mach as an teampull na seachd aingil, aig an robh na seachd plàighean, air an sgeadachadh le lion-eudach glan agus dealrach, agus air an crioslachadh mu'n uchd le criosaibh òir.

7 Agus thug aon do na ceithir bheathaichibh do na seachd aingil seachd soithichean òir, làn do fheirg an Dé a ta beò gu saoghal nan saoghal.

8 Agus lionadh an teampull le deataich o ghlòir Dhé, agus o 'chumhachd-san ; agus cha b'urrainn neach sam bith dol a stigh do'n teampull, gus am biodh seachd plàighean nan seachd aingal air an coimhlionadh.

CAIB. XVI.

AGUS chuala mi guth mòr as an teampull, ag ràdh ris na seachd aingil, Imichibh, agus taomaibh soithiche feirge Dhé air an talamh.

2 Agus dh'imich an ceud aingal, agus thaom e a shoith-

each air an talamh ; agus dh'éirich droch neasgaid nimhneach air na daoineibh sin'aig an robh comhara an fhiadh-bheathaich, agus *orra-san* a rinn aoradh d'a ìomhaigh.

3 Agus thaom an dara aing-eal a shoitheach san fhairge ; agus rinneadh i mar fhuil *duine* mhairbh : agus fhuair gach anam beò bàs anns an fhairge.

4 Agus thaom an treas aing-eal a shoitheach anns na h-aimhnichibh agus anns na tob-raichibh uisge ; agus rinneadh iad 'nam fuil.

5 Agus chuala mi aingal nan uisgeacha ag ràdh, *Is cothromach thusa*, O Thighearn, a ta, agus a bha, agus a bhitheas, do bhrìgh gu'n d'thug thu breth air an dòigh so :

6 Oir dhòirt iadsan fuil naomh agus fhàidhean, agus thug thusa dhoibh fuil r'a h-òl ; oir is toillteanach iad.

7 Agus chuala mi neach eile o'n altair ag ràdh, Seadh, a Thighearna Dhé uile-chumhachdaich, *is fìor* agus cothromach do bhreitheanais.

8 Agus thaom an ceathramh aingal a shoitheach air a' ghréin, agus thugadh *cumhachd* dha daoine a phianadh le h-ain-teas teine.

9 Agus bha daoine air an losgadh le teas mòr, agus thug iad toibheum do ainm Dhé, aig am bheil cumhachd air na plàighibh sin : agus cha d'rinn iad aithreachas, chum gloir a thoirt dhasan.

10 Agus thaom an cùigeadh aingal a shoitheach air righchaithir an fhiadh-bheathaich ; agus rinneadh a rìoghachd dorcha ; agus chagainn *daoine* an teanganna tre phéin,

11 Agus thug iad toibheum do Dhia nèimh air son am

pianta agus an creuchda, agus cha do ghabh iad àithreachas d'an gnìomharaibh.

12 Agus thaom an seathadh aingeal a' shoitheach air an ambhainn mhòir—Euphrates; agus thiormaicheadh a h-uisge, chum gu'n ulluichteadh slighe rìghrean na h-àirde 'n ear.

13 Agus chunnaic mi teachd a mach á beul an dragoin, agus á beul an fhiadh-bheathaich, agus á beul an fhàidh-bhréige, trì spiorada neòghlan, cosmhuil ri losguinn.

14 Oir is iad sin spiorada dhèamhan, a' dèanamh chomhara, a tha dol a mach chum rìghre na talmhainn, agus an domhain uile, gu'n cruinneachadh chum catha là mhòir sin an Dé uile-chumhachdaich.

15 Feuch, a ta mi a' teachd mar ghaduiche. Is beannaichte e-san a nì faire, agus a ghléidheas 'eudach, chum nach imich e lomnochd, agus nach faic daoine a nàire.

16 Agus chruinnich e iad r' a chéile chum ionaid ris an abrar san Eabhra, Armagedon.

17 Agus thaom an seachdamh aingeal a shoitheach san athar; agus thàinig guth mòr a mach á teampull nèimh, o'n rìgh-chaithir, ag ràdh, Tha e dèanta.

18 Agus bha guthanna, agus tairneanaich, agus dealanaich ann; agus bha crith mhòr thalmhainn ann, nach robh a leithid ann o bha daoine air an talamh, a samhail do chrith-thalmhainn co mhòr.

19 Agus bha am baile mòr air a roinn 'na thrì earrannaibh, agus thuit bailtean nan cinneach: agus thàinig Babilon mhòr an cuimhne an làthair Dhé, a thoirt d'i copan fìona fraoich 'fheirge.

20 Agus theich gach uile eil-

ean as, agus cha d'fhuaradh na beannta.

21 Agus thàinig clacha-meallain mòra a nuas o nèamh air daoineibh, *gach clach* co throm ri talann: agus thug daoine toibheum do Dhia, air son plàigh nan clacha-meallain; oir bha am plàigh-san ro-mhòr.

CAIB. XVII.

A GUS thàinig aon do na seachd aingil aig an robh na seachd soithichean, agus labhair e rium, ag ràdh rium, Thig an so; nochdaidh mi dhuit breitheanas na strìopaiche mòire, a tha 'na suidhe air mòran uisgeacha:

2 Ris an d'rinn rìghre na talmhainn strìopachas, agus aig an do chuireadh luchd-àiteachaidh na talmhainn air mhisg le fion a strìopachais.

3 Agus thug e leis mi anns an spiorad do'n fhasach: agus chunnaic mi bean 'na suidhe air fiadh-bheathach air dhath scarlaid, làn do ainmibh toibheim, air an robh seachd cinn agus deich adhaircean.

4 Agus bha a' bhean air a sgeadachadh ann am purpur, agus ann an scarlaid, agus air a dèanamh breagha le h-òr, agus clachaibh luachmhor, agus nèamhnuidibh, agus copan òir aice 'na làimh, làn do ghràineileachd agus do neò-ghloine a strìopachais.

5 Agus air clàr a h-eudain bha ainm sgriobhta, RUNDIOMHAIR, BABILON MHOR, MATHAIR NAN STRIOPACH AGUS GHRÀINEILEACHDA NA TALMHAINN.

6 Agus chunnaic mi a' bhean air mhisg le fuil nan naomb, agus le fuil fhianuisean Iosa: agus an uair a chunnaic mi i,

ghabh mi iongantas le h-iongantas mòr.

7 Agus thubhairt an t-aingeal rium, C'ar son a ghabh thu iongantas? Innsidh mise dhuit rùn-dìomhair na mnà, agus an fhiadh-bheathaich a tha 'ga giùlan, air am bheil na seachd cinn agus na deich adhaircean.

8 Am fiadh-bheathach a chunnaic thu, bha e, agus cha 'n 'eil e ann; agus éiridh e suas á slochd un dubh-aigein, agus théid e am mugha: agus gabhaidh luchd-àiteachaidh na talmhainn, (aig nach 'eil an ainmean sgriobhta ann an leabhar na beatha o thoiseach an t-saoghail,) iongantas, 'nuair a chì iad am fiadh-bheathach a bha, agus nach 'eil, agus a bhith-eas ann.

9 An so a ta an inntinn aig am bheil gliocas. Na seachd cinn is seachd sléibhtean iad, air am bheil a' bhean 'na suidhe.

10 Is seachd rìghrean iad mar an ceudna: tha cùig *dhiubh* air tuiteam, agus a ta h-aon ann: cha d' thàinig am fear eile fathast: agus an uair a thig e, is éigin da fantuinn rè ùine bhig.

11 Agus am fiadh-bheathach a bha, agus nach 'eil ann, is e-san an t-ochdamh, agus tha e o'n t-seachdnar, agus théid e am mugha.

12 Agus na deich adhaircean a chunnaic thu, is deich rìghrean iad, nach d' fhuair rìoghachd fathast, ach a ta faotainn cumhachd mar rìghrean rè aon uaire maille ris an fhiadh-bheathach.

13 Tha aca sin aon inntinn, agus bheir iad an neart agus an cumhachd do'n fhiadh-bheathach.

14 Nì iad sin cogadh an aghaidh an Uain, agus bheir an t-Uan buaidh orra: oir is e-san

Tighearna nan Tighearna, agus Rìgh nan Rìgh; agus *tha* an dream a tha maille ris, air an gairm, agus air an taghadh, agus dìleas.

15 Agus tha e ag ràdh rium, Na h-uisgeachan a chunnaic thu, far am bheil an striopach 'na suidhe, is slòigh, agus coimhthionail, agus cinnich, agus teanganna iad.

16 Agus na deich adhaircean a chunnaic thu air an fhiadh-bheathach, bheir iad sin fuath do'n striopaich, agus nì iad fàs i, agus lomnochd, agus ithidh iad a feoil, agus loisgidh iad i le teine.

17 Oir chuir Dia 'nan cridhe a thoil a choimhlionadh, agus a bhi dh'aon chomhairle, agus an rìoghachd a thoirt do'n fhiadh-bheathach, gus an coimhlionar briathran Dhé.

18 Agus is i a' bhean a chunnaic thusa, am baile mòr sin, a tha rìoghachadh os ceann rìghre na talmhainn.

CAIB. XVIII.

A GUS an déigh nan nithe so chunnaic mi aingeal eile teachd a nuas o nèamh, aig an robh cumhachd mòr: agus dhealraich an talamh le 'ghlòir.

2 Agus ghlaodh e gu làidir le guth mòr, ag ràdh, Thuit, thuit Babilon mhòr, agus rinn-eadh i 'na h-àite-còmhnuidh dhèamhan, 'na prìosan do gach spiorad neòghlan, 'na h-ionad cumail do gach eun neò-ghlan agus fuathmhor.

3 Oir dh'òl na h-uile chinnich do fhion feirge a striopachais, agus rinn rìghre na talmhainn striopachas rithe, agus rinneadh saoibhir ceannaichean na talmhainn le pailteas a sògha.

4 Agus chuala mi guth eile o nèamh, ag ràdh, Thigibh a

nach aisde, mo phobull, chum nach bì sibh comh-pàirteach d'a peacaibh, agus nach faigh sibh cuid d'a plàighibh;

5 Oir tha a peacanna air ruigheachd suas gu nèamh, agus chuimhnich Dia a h-eu-cearta.

6 Thugaibh ath-dhiol d'i mar a dhiol ise ribh, agus thugaibh dh'i a dhà uiread, a réir a h-òibre: anns a' chupan a lìon i, lionaibh a dhà uiread d'i.

7 A mheud as a ghlòraich si i féin, agus a chaith i a beatha gu sòghail, co mòr as sin thugaibh dh'i do pheanas agus do bhròn: oir a ta i ag ràdh 'na cridhe féin, Tha mi a'm' shuidhe a'm' bhan-rìghinn, agus cha bhantrach mi, agus cha'n fhaic mi bròn.

8 Uime sin ann an aon là thig e plàighean, bàs, agus bròn, agus gorta; agus loisgear i gu tur le teine: oir is neart-mhor an Tighearna Dia a bheir breth oirre.

9 Agus nì rìghre na talmhainn, a rinn striopachas agus a chaith am beatha gu sòghail maille rithe, gul agus caoidh air a son, 'nuair a chì iad deatach a losgaidh,

10 A' seasamh fad as, tre eagal a peanais, ag ràdh, Mo thruaighe, mo thruaighe! a' chaithir mhòr sin Babilon, a' chaithir threun sin! oir ann an aon uair thàinig do bhreitheanas.

11 Agus nì ceannaichean na talmhainn gul agus caoidh air a son; oir cha cheannaich neach sam bith am bathar ni's mò.

12 Bathar òir, agus airgid, agus chlach luachmhor, agus nèamhnuidean, agus lìon-eudach grinn, agus phurpuir, agus shìde, agus scarlaid, agus gach uile ghnè fhiodha thine, agus gach uile ghnè shoithiche

do ibhori, agus gach uile ghnè shoithiche do fhiodh ro luachmhor, agus do umha, agus do iarunn, agus do mharmor.

13 Agus canal, agus nithe deadh-fhàile, agus oladh-ùngaidh, agus tùis, agus fìon, agus oladh, agus min mhìn, agus cruithneachd, agus ainmhidhean, agus caoraich, agus eich, agus carbadan, agus tràilleann, agus anama dhaoine.

14 Agus dh'imich na toraidh, air an robh mòr dhéidh t-anama, uait, agus dh'imich na h-uile nithe annasach agus mais-each uait, agus cha'n fhaigh thu iad ni's mò.

15 Seasaidh ceannaichean nan nithe so a rinneadh saoi bhir leatha, am fad, air eagal a peanais, a' gul agus a' caoidh,

16 Agus ag ràdh, Is truagh, am baile mòr sin, a bha air a sgeadachadh le lìon-eudach grinn, agus purpur, agus scarlaid, agus a bha air a dhèanamh breagha le h-òr, agus le clach-aibh luachmhor, agus le neamhnuidibh!

17 Oir ann an aon uair thugadh saoi bheas co mòr gu neòni. Agus sheas gach uile long-mhaighstir, agus gach uile chuideachd a théid air longaibh, agus na seòladairean, agus a' mheud 's a nì gnothuichean air fairge, am fad,

18 Agus ghlaodh iad, an uair a chunnaic iad deatach a losgaidh, ag ràdh, Cò e am baile a's cosmhuil ris a' bhaile mhòr so?

19 Agus thilg iad duslach air an cinn, agus ghlaodh iad, a' gul agus a' caoidh, ag ràdh, Is truagh, is truagh, am baile mòr sin, anns an d'rinneadh saoi bhir iadsan uile aig an robh longa air an fhairge, tre a ghreadhnachas-san! oir ann an aon uair dh'fhàsaicheadh e.

20 Dèan gàirdeachas os a cheann, o a nèamh, agus sibhse abstola naomha agus fhàidhean; oir dhìol Dia sibhse air.

21 Agus thog aingeal treun clach mar chloich-mhuilinn mhòir, agus thilg e san fhairge i, ag ràdh, Is ann mar so le neart a thilgear sìos am baile mòr sin Babilon, agus cha'n fhaidhear e ni's mò.

22 Agus cha chluinnear annad ni's mò fuaim chlarsairean, agus luchd-ciuil, agus phiobairean, agus thompadairean; agus cha'n fhaighear annad ni's mò fear-ceirde, do ghnè ceirde sam bith; agus cha chluinnear fuaim cloiche-muilinn annad ni's mò;

23 Agus cha soillsich solus coinnle annad ni's mò; agus cha chluinnear annad ni's mò guth fear-bainnse no bean-bainnse; oir b'iad do cheannaichean daoine mòra na talmhainn; agus le d' dhruidheachd bha na h-uile chinnich air am mealladh:

24 Agus fhuaradh ann fuil fhàidhean, agus naomh, agus nan uile *dhaoine* a mharbhadh air an talamh.

CAIB. XIX.

A GUS an déigh nan nithe so, chuala mi guth àrd mhòr-shluaigh air nèamh, ag ràdh, Aleluia; Slàinte, agus glòir, agus urram, agus cumhachd do'n Tighearn ar Dia-ne:

2 Oir is fìor agus is cothromach a bhreitheanais; oir thug e breth air an striopaich mhòir, a thruaill an talamh le a striopachas, agus dhìol e fuil a sheirbhiseach féin air a làimh.

3 Agus a rìs thubhairt iad, Aleluia. Agus chaidh a deatach suas gu saoghal nan saoghal.

4 Agus thuit na ceithir sean-aire fichead, agus na ceithir

bheathaiche sìos, agus rinn iad aoradh do Dhia, a bha 'na shuidhe air an rìgh-chaithir, ag ràdh, Amen; Aleluia.

5 Agus thàinig guth a mach o'n rìgh-chaithir, ag ràdh, Mol-aibh ar Dia-ne, sibhse uile a's seirbhisich dha, agus air am bheil 'eagal-san, eadar bheag agus mhòr.

6 Agus chuala mi mar ghuth mòr-shluaigh, agus mar fhuaim mhòran uisgeacha, agus mar thoirm tarneanaich chumhachdaich, ag ràdh, Aleluia: oir a ta an Tighearna Dia uile-chumhachdach a' rìoghachadh.

7 Bitheamaid aoibhinn agus dèanamaid gàirdeachas, agus thugamaid glòir dhasan: oir thàinig pòsadh an Uain, agus dh'ulluich a bhean i féin.

8 Agus thugadh dh'i gu'm biodh i air a sgeadachadh le lìon-eudach grinn, glan agus dealrach: oir is e an lìon-eudach grinn fireantachd nan naomh.

9 Agus thubhairt e rium, Sgrìobh, Is beannaichte iadsan a tha air an cuireadh gu suipeirbhainnse an Uain. Agus thubhairt e rium, Is iad so briathra fìrinneach Dhé.

10 Agus thuit mi sìos aig a chosaibh chum aoradh dhèanamh dha: agus thubhairt e rium, Feuch nach dèan thu e: is còmh-sheirbhiseach dhuit féin mise, agus do d' bhràithribh aig am bheil fianuis Iosa: dèan aoradh do Dhia: oir is i fianuis Iosa spiorad na fàidheadair-eachd.

11 Agus chunnaic mi nèamh air fhosgladh, agus, feuch, each geal; agus ghoireadh do'n tì a shuidh air Dìleas, agus Fìor; agus ann am fireantachd tha e dèanamh breitheanais agus cogaidh.

12 Agus *bha* a shùilean mar lasair theine, agus air a cheann *bha* mòran chrùn; agus *bha* ainm aige sgriobhta, nach b' aithne do neach sam bith ach e féin;

13 Agus *bha* e air a sgeadachadh le trusgan tumta am fuil: agus is e'n t'ainm a ghoir-ear dheth, FOCAL DE.

14 Agus lean na h-armailtean a *bha* air nèamh e air eachaibh geala, air an sgeadachadh le lion-eudach grinn, geal agus glan.

15 Agus as a bheul tha claidheamh geur a' dol a mach, chum gu'm buaileadh e na cinnich leis; agus riaghlaidh e iad le slait iaruin: agus tha e a' saltradh fion-amair fraoich feirge an Dé uile-chumhachdaich.

16 Agus tha aige air a thrusgan agus air a léis ainm sgriobhta, RIGH NAN RIGH, AGUS TIGHEARNA NAN TIGHEARNA.

17 Agus chunnaic mi aingeal àraidh 'na sheasamh sa' ghréin; agus ghlaodh e le guth àrd, ag ràdh ris an eunlaith uile, a *bha* 'g itealaich ann am meadhon nèimh, Thigibh, agus cruinnichibh sibh féin chum suipeir an Dé mhòir;

18 Chum gu'n ith sibh feoil rìghrean, agus feoil àrd-cheannard, agus feoil dhaoine cumhachdach, agus feoil each agus na muinntir a shuidheas orra, agus feoil nan uile *dhaoine*, araon shaor agus dhaor, araon bheag agus mhòr.

19 Agus chunnaic mi am fiadh-bheathach, agus rìghrean na talmhainn, agus an armailtean air an cruinneachadh, a dhèanamh cogaidh an aghaidh an tì a *bha* 'na shuidhe air an each, agus an aghaidh 'armailt-san.

20 Agus ghlacadh am fiadh-bheathach, agus maille ris-san am fàidh-bréige a rinn mìorbhuilean 'na làthair, leis an do mheall e an dream a ghabh orra comhara an fhiadh-bheathaich, agus iadsan a rinn aoradh d'a ìomhaigh. Thilgeadh iad sin 'nan dithis beò ann an loch teine a' dearg lasadh le pronnusc.

21 Agus mharbhadh a' chuid eile le claidheamh an tì a *bha* 'na shuidhe air an each, a thàinig a mach as a bheul: agus *bha* an eunlaith uile air an lionadh le'm feoil.

CAIB. XX.

A GUS chunnaic mi aingeal, a' teachd a nuas o nèamh, agus iuchair sluichd an dubh-aigein aige, agus slabhraidh mhòr 'na làimh.

2 Agus rug e air an dragon, an t-seann nathair nimhe sin, a's e an diabhul agus Sàtan, agus cheangail se e rè mhìle bliadhna;

3 Agus thilg se e do shlochd an dubh-aigein, agus dhùin e stigh e, agus chuir e seula air, chum nach mealladh e na cinnich tuilleadh, agus an crìochnachadh am mìle bliadhna: agus an déigh sin, is éigin gu fuasgailear e rè ùine bhig.

4 Agus chunnaic mi rìghchaithrichean, agus shuidh iad orra, agus thugadh breitheanas doibh: agus *chunnaic mi* anaman na muinntir d'an do chuireadh an cinn air son fianuis Iosa, agus focail Dé, agus nach d' rinn aoradh do'n fhiadh-bheathach, no d'a ìomhaigh, agus nach do ghabh a chomhara air clàr an eudain, no air an làmhaibh; agus *bha* iad beò, agus rìghich iad maille ri Crìosd rè mhìle bliadhna.

5 Ach cha d'ath-bheothaich-

eadh a' chuid eile do na mairbh gus an robh am mìle bliadhna air an crìochnachadh. *Is i so a' cheud aiseirigh.*

6 *Is* beannaichte agus *is* naomha an tì aig am bheil cuid anns a' cheud aiseirigh: orra so cha'n 'eil cumhachd aig an dara bàs; ach bithidh iad 'nan sagartaidh do Dhia, agus do Chrìosd, agus rìghichidh iad maille ris mìle bliadhna.

7 Agus an uair a chrìochnaichear am mìle bliadhna, fuasgailear Sàtan as a phrìosan,

8 Agus thèid e mach a mhealladh nan cinneach, a tha ann an ceithir chearnaibh na talmhainn, Gog agus Magog, chum an cruinneachadh gu cath; muinntir a tha ann an àireamh mar ghaineimh na fairge.

9 Agus chaidh iad suas air leud na talmhainn, agus chuairtich iad camp nan naomh, agus am baile ionmhuinn: agus thàinig teine nuas o Dhia á nèamh, agus chur e as doibh.

10 Agus thilgeadh an diabhul a mheall iad, san loch theine agus phronnuisc, far am bheil am fiadh-bheathach, agus am fàidh-bréige, agus bithidh iad air am pianadh a là agus a dh'oidhche, gu saoghal nan saoghal.

11 Agus chunnaic mi rìghchaithir mhòr gheal, agus an Tì a shuidh oirre, neach d'an do theich nèamh agus talamh o a ghnùis; agus cha d'fhuaradh àite dhoibh.

12 Agus chunnaic mi na mairbh, beag agus mòr, 'nan seasamh am fianuis Dé; agus dh'fhosgladh na leabhraichean; agus dh'fhosgladh leabhar eile, *eadhon leabhar* na beatha: agus thugadh breth air na mairbh as na nithibh sin a bha sgrìobhta sna leabhraichibh, a réir an gnìomhara.

13 Agus thug an fhairge uaipe na mairbh a bha innte; agus thug am bàs agus an uaigh uatha na mairbh a bha annta: agus thugadh breth orra gach aon a réir an gnìomhara.

14 Agus thilgeadh am bàs agus ifrinn do'n loch theine: Is e so an dara bàs.

15 Agus ge b'e air bith nach d'fhuaradh sgrìobhta ann an leabhar na beatha, thilgeadh e san loch theine.

CAIB. XXI.

A GUS chunnaic mi nèamh nuadh, agus talamh nuadh: oir chaidh an ceud nèamh agus an ceud talamh thairis; agus cha robh fairge ann ni's mò.

2 Agus chunnaic mise Eoin am baile naomh, Ierusalem nuadh, a' teachd a nuas o Dhia á nèamh, air ulluchadh mar bhean-bainnse air a sgeadachadh fa chomhair a fir.

3 Agus chuala mi guth mòr á nèamh ag ràdh, Feuch, *tha* pàillion Dhé maille ri daoineibh, agus nì e-san còmhnuidh maille riu, agus bithidh iadsan 'nan sluagh dha, agus bithidh Dia féin maille riu, agus 'na Dhia dhoibh.

4 Agus tiormaichidh Dia gach deur o'n sùilibh; agus cha bhi bàs ann ni's mò, no bròn, no éighich, agus cha bhi pian ann ni's mò; oir chaidh na ceud nithe thairis.

5 Agus thubhairt an Tì a bha 'na shuidhe air an rìghchaithir, Feuch, *tha* mi a' dèanamh nan uile nithe nuadh. Agus thubhairt e rium, Sgrìobh, oir *tha* na briathra so fìrinneach agus dileas.

6 Agus thubhairt e rium, Tha e dèanta. Is mise Alpha agus Omega, an toiseach agus an deireadh: bheir mi dhasan air am

bheil tart, do thobar uisge na beatha, gu saor.

7 Sealbhaichidh an tì a bheir buaidh na h-uile nithe; agus bithidh mise a' m' Dhia dhasan, agus bithidh e-san 'na mhac dhomh-sa.

8 Ach aig an dream sin a ta gealtach, agus mì-chreideach, agus gràineil, agus aig luchd-mortaiddh, agus striopachais, agus druidheachd, agus iòdhol-aoraidh, agus aig na h-uile bhreug-airibh, bithidh an cuibhrionn anns an loch a ta dearg-lasadh le teine agus pronnusc; ni a's e an dara bàs.

9 Agus thàinig a m' ionn-suidh aon do na seachd aingil, aig an robh na seachd soithichean làn do na seachd plàighibh deireannach, agus labhair e rium, ag ràdh, Thig an so, nochdaidh mise dhuit a' bhean nuadh-phòsda, bean an Uain.

10 Agus thug e leis mi anns an spiorad gu beinn mhòir agus àird, agus dh'fheuch e dhomh am baile mòr sin, Ierusalem naomh, a' teachd a nuas á nèamh o Dhia,

11 Aig an robh glòir Dhé: agus bha a shoillse cosmhuil ri cloich ro luachmhoir, mar chloich Iaspis, soilleir mar chriostal;

12 Agus bha balla mòr agus àrd aige, air an robh dà gheata dheug, agus aig na geataibh dà aingeal dheug, agus ainmean sgriobhta orra, eadhon ainmean dà thréibh dheug chloinn Israeil.

13 Air an taobh an ear, trì gheatacha; air an taobh thuath, trì gheatacha; air an taobh deas, trì gheatacha; agus air an taobh an iar, trì gheatacha.

14 Agus bha aig balla a' bhaile dà bhunait dheug, agus annta-san ainmean dà abstol deug an Uain.

15 Agus bha aig an tì a labh-

air rium, cuilc-shlat òir, chum gu'n tomhaiseadh e am baile, agus a gheatacha, agus a bhalla.

16 Agus tha am baile 'na luidhe ceithir-chearnach, agus tha 'fhad co mòr r'a leud: agus thomhais e am baile leis a' chuile-shlait, dà mhìle dheug stàide: is ionnan fad, agus leud, agus àirde dha.

17 Agus thomhais e a bhalla, ceud agus dà fhichead agus ceithir làmhha-coille, a réir tomhais duine, eadhon an aingil.

18 Agus bha a bhalla air a thogail do chloich Iaspis; agus b'òr fìor-ghlan am baile, cosmhuil ri gloine shoilleir.

19 Agus bha bunaitean balla a' bhaile air an dèanamh sgiamhach leis gach uile ghnè chlocha luachmhor. *Bu* iaspis an ceud bunait; *bu* shaphir, an dara; *bu* chalcedon, an treas; *b'* emerald, an ceathramh bunait;

20 *Bu* shardonics, an cùig-eadh; *bu* shardius, an seathadh; *bu* chrisolit, an seachdamh; *bu* bheril, an t-ochdamh; *bu* topas, an naothadh: *bu* chrisoprasus, an deicheamh; *bu* hiacint, an t-aon deug; *b'* ametist, an dara bunait deug.

21 Agus an dà gheata dheug *bu* dà nèamhnuid dheug iad; bha gach aon fa leth do na geataibh air a dhèanamh do aon nèamhnuid: agus b'òr fìorghlan sràid a' bhaile, mar ghloine shoilleir.

22 Agus cha'n fhaca mi teampull ann: oir is e'n Tigh-earna Dia uile-chumhachdach, agus an t-Uan a's teampull da.

23 Agus cha'n 'eil feum aig a' bhaile air a' ghréin, no air a' ghealaich a dhealrachadh ann: oir shoillsich glòir Dhé e, agus is e an t-Uan a's solus da.

24 Agus gluaisidh cinnich na muinntir sin a shaorar 'na shol-

us: agus bheir rìghre na talmhainn an glòir agus an urram d'a ionnsuidh.

25 Agus cha dùinear a gheat-acha san là: oir cha bhi oidhche an sin.

26 Agus bheirear glòir agus urram nan cinneach d'a ionnsuidh.

27 Agus cha téid air chor sam bith a steach ann ni air bith a shalaicheas, no a dh'oihricheas gràineileachd, no a nì breug: ach iadsan a mhàin a tha sgriobhta ann an leabhar beatha an Uain.

CAIB. XXII.

AGUS dh'fheuch e dhomh amhainn fhior-ghlan do uisge na beatha, soilleir mar chrìostal, a' teachd a mach á rìgh-chaithir Dhé, agus an Uain.

2 Ann am meadhon sràide na *caithreach*, agus air gach taobh do'n amhainn, *bha* craobh na beatha, a' giùlan dà *ghnè* dheug thoraidh, agus a' toirt a toraidh uaipe gach uile mhìos; agus *bha* duilleadh na craoibhe chum leighis nan cinneach.

3 Agus cha bhi mallachd air bith ann ni's mò: ach bithidh rìgh-chaithir Dhé agus an Uain innte; agus nì a sheirbhisich seirbhis da.

4 Agus chì iad 'aghaidh; agus *bithidh* 'ainm-san air clàr an eudainn.

5 Agus cha bhi oidhche an sin, agus cha'n 'eil feum aca air coinnil, no air solus na gréine; oir bheir an Tighearna Dia solus doibh: agus rìghichidh iad gu saoghal nan saoghal.

6 Agus thubhairt e rium, *Tha* na briathra so dileas agus firinneach. Agus chuir an Tighearna, Dia nam fàidhean naomha, 'aingeal féin a nochdadh d'a sheirbhisich na nithe

sin a's éigin tachairt gu h-aithghearr.

7 Feuch, tha mi a' teachd gu luath: is beannaichte an tì a choimhideas briathra fàidheadaireachd an leabhair so.

8 Agus chunnaic mise Eoin na nithe so, agus chuala mi iad: agus an uair a chuala agus a chunnaic mi *iad*, thuit mi sìos a' dèanamh aoraidh roimh chos-aibh an aingil, a nochd na nithe so dhomh.

9 An sin thubhairt e rium, Feuch nach *dèan thu e*: oir is comh-sheirbhiseach dhuit mise, agus do d' bhràithribh na fàidhean, agus dhoibh-san a choimhideas briathran an leabhair so: dèan aoradh do Dhia.

10 Agus thubhairt e rium, Na seulaich focail fàidheadaireachd an leabhair so: oir tha an t-àm am fagus.

11 An tì a nì eucoir, dèanadh e eucoir a ghnàth: agus an tì a tha salach, biodh e salach a ghnàth: agus an tì a tha 'na fhìrean, biodh e 'na fhìrean a ghnàth: agus an tì a tha naomh, biodh e naomh a ghnàth.

12 Agus, feuch, tha mi a' teachd gu h-aithghearr; agus a ta mo luach-saoithreach maille rium, a thoirt do gach aon fa leth, a réir mar a bhitheas a ghnìomhara.

13 Is mise Alpha agus Omega, an toiseach agus a' chrìoch, an ceud *neach* agus an *neach* deir-eannach.

14 Is beannaichte iadsan a nì 'aitheanta-san, chum gu'm bì còir aca air craoibh na beatha, agus gu'n téid iad a stigh tre na geataibh do'n bhaile.

15 Oir an taobh a muigh *tha* madraidh, agus luchd-druidheachd, agus luchd-strìopachais, agus luchd-mortaidh, agus luchd-ìodhol-aoraidh, agus gach neach

a ghràdhaicheas agus a nì breug.

16 Chuir mise Iosa m' aingeal a dhèanamh fianuis duibhse air na nithibh so anns na h-eaglaisibh. Is mise freumh agus gin-eal Dhaibhidh, an reult dhealach agus mhaidne.

17 Agus a ta an Spiorad agus a' bhean nuadh-phòsda ag ràdh, Thig. Agus abradh an tì a chluinneas, Thig. Agus an neach air am bheil tart, thig-eadh e. Agus ge b'e neach leis an àill, gabhadh e uisge na beatha gu saor.

18 Oir tha mi dèanamh fianuis do gach uile neach a chluinneas briathra fàidheadaireachd an

leabhair so, Ma chuireas neach air bith ris na nithibh so, cuiridh Dia air-san na plàighean a tha sgrìobhta anns an leabhar so :

19 Agus ma bheir neach air bith o bhriathraibh leabhair na fàidheadaireachd so, bheir Dia a chuibhrionn-san á leabhar na beatha, agus as a' bhaile naomh, agus as na nithibh a tha sgrìobhta anns an leabhar so.

20 A ta an tì a tha toirt fianuis air na nithibh so ag ràdh, Gu deimhin a ta mi a' teachd an aithghearr. Amen. Seadh, thig, a Thighearna Iosa.


21 Gràs ar Tighearna Iosa Crìosd *gu robh* maille ribh uile. Amen.

A' CHRIOCH.

PRINTED BY ANDERSON & BRYCE.

FOR THE





2

S A I L M D H A I B H I D H,

AIR

AN EADAR-THEANGACHADH

O NA

SGRIOPTUIRIBH NAOMHA,

Chum bhi air an seinn ann an aoradh Dhe.

AIR AN LEASACHADH, AGUS AIR AN CUR A MACH
LE H-UGHDARRAS ARD-SHEANAIDH
EAGLAIS NA H-ALBA.

Air iarrtus agus costus na cuideachd urramaich, a ta chum eòlas Criesdaidh a
sgaoileadh air feadh Gaeltachd agus Eileana na h-Alba.

DUNEIDIN:
CLODH-BHUAILTE LE ANDERSON AGUS BRISE.

1838.

1871

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

1871 (1872) 1 1 100

SAILM DHAIBHIDH.

SALM I.

- 'S BEANNAICHT' an duine sin nach gluals
 an comhairle nan daoil,
 An slighe fhiair nam peacach baoth',
 'na sheasamh fòs nach bi;
 An caithir fànoid luchd an spòrs
 nach togair suidh gu bràth;
 2 Ach 'gam bheil toil do naomh-reachd Dhé,
 'ga smuaineach' oidhich' is là.
 3 Mar chraoibh is amhluidh bithidh e
 'n cois airmhe fas a ta,
 A bheir 'na h-aimsir toradh trom,
 gun duilleach chall no blàth.
 4 Soirbhichidh leis gach ni d'an dean:
 ni h-amhluidh sin do bhi
 Na daoine peacach; ach mar mhoill
 air fhuadachadh le gaoith.
 5 Is uime sin cha seas a suas
 na h-aingidh anns a' bhreth,
 No peacaich ann an comunn naomh
 nam fireanach air leth.
 6 Oir 's fiosrach Dia air slighe ghloin
 nam fireanach air fad;
 Ach slighe fhiair nam peacach baoth',
 di-mhilltear i gu grad.

SALM II.

- C' ARSON a ghabh na Cinnich boil',
 's na slòigh le chéile cruinn,
 A' smuaineachadh beairt dhìomhanaich,
 nach feudar chur an suim?
 2 Rìghre na talmhainn dh'èirich suas,
 's na h-uachdaran gu léir;
 'N aghaidh Iehobhah chruinnich iad;
 's 'n aghaidh aoin ungta Dé.
 3 'Nis briseamaid an cuibhreach dhinn,
 (sud thubhairt iad air fad),
 Na boinn a b'ail leo iadhadh oirnn,
 dhinn tilgeamaid gu grad.
 4 An Ti air nàmh 'na shuidhe ta,
 ni esan gàire riu;
 Is mar chùis-mhagaidh bithidh iad
 do Thighearn ard nan dùl.
 5 'N sin labhraidh e am briathraibh borb'
 'na chorroich riu gu garg;
 Is cuiridh e gu cabhaig iad,
 le lasan is le feigr.
 6 Gidheadh do dh'ungadh leam mo Rìgh
 gu fìor air Sion caomh;
 Is chuir mi e 'na uachdaran
 suas air mo thulaich naomh.
 7 Cuiridh mi ni 'n céill an t-ordugh ud;
 thubhairt Iehobhah rium,
 Is tu mo mhac-sa; 's ann an diugh
 a ghineadh thusa leam.
 8 Iarr orm, 's mar oighreachd bheir mi dhuit
 na fineacha gu léir;
 'S mar sheilbh ro-dhìleas bheir mi dhuit,
 fad iomall crìch' gach tìr.
 9 Nìthear le slait do'n iarunn chruaidh,
 gu luath am briseadh leat;
 'Nam bloighdibh beaga pronnar iad,
 mar phota crè le d' neart.
 10 O rìghrean, uime sin, a nis,
 gabhaibh-sa ciall gu léir;
 A bhreitheamhna na talmhainn fòs,
 grad-fhoghlumaibh deadh bbeus.
 11 Do'n Tighearna Iehobhah mòr
 aoraibh-sa slòs gu ceart;
 Le h-eagal deanaibh seirbhis mhaith
 do Thighearna nam feart,

'S le ball-chrith deanaibh gairdeachas
 12 Do'n mhac grad-thugaibh pòg,
 Air eagal gu'n las 'fhearg-san ruibh,
 g'ur nùlleadh anns an ròd.

An uair a bhitheas corruich air
 a' lasadh ach gu beag.
 Is beannaicht' iad, gach uile neach,
 an dòchas air a leag.

SALM III.

- NACH lionmhor iad mo naimhde, Dhra,
 sìor-dhol am meud gach là?
 Is luchd mo thrioblaid iomadh iad,
 ag éirigh rium a ghnàth.
 2 Ri m'anam iomadh their nach 'eil
 aon fhurtachd aig an Dia:
 3 Ach 's tu fear-togalach mo chinn,
 mo ghloir is tu, 's mo sgiath.
 4 Air Dia do ghairm mi féin le m' ghuth,
 dh'èisd as a thulaich naomh:
 5 Luidh, choitid, agus mhosgail mi,
 chum Dia mi suas gu caomh.
 6 Cha'n eagal leam deich mìle sluagh,
 ged chuairticheadh iad mi.
 7 Mo Thighearna éirich suas gu luath,
 is cuidich leam, a Dhé!
 Mo naimhde bhuail thu air an gial;
 bhris fiacra fòs nan daoil.
 8 'S le Dia an fhurtachd: air do shluagh
 do bheannachd tha gun dìth.

SALM IV.

- OTHUSA Dhia ud m'ionracais,
 éisd rium tràth éigheam riut;
 'S tu dh'fhuasgail orm 's mi ann an teinn
 fòir orm, is éisd mo scread.
 2 Mo ghloir cia fhad, a chlann nan daoine,
 gu nàire chaochl'èas sibh?
 A' tabhairt gràdh do dhìonihanas,
 is leanas breugan ruibh?
 3 Biodh agaibh fios gu'n d' ròghnuich Dia
 dha féin an duine naomh;
 'Nuair dh'éigheas mi, bheir e gu beachd
 sàr-éisdeachd do mo ghlaodh.
 4 Biodh eagal oirh 's na deanaibh lochd;
 labhraidh ri 'ur cridh' féin,
 Gu h-uaigneach air 'ur leabaichibh
 bibh tosdach mar an ceudn'.
 5 Deadh iobairt thaitneach thugaibh uaibh,
 do'n ionracas a ghnàth;
 'S 'ur dòchas cuiribh ann an Dia,
 ag earbsadh as gach là.
 6 Nì maith co nochdas duinn a nis?
 tha mòran ac' ag ràdh:
 Ach dealradh glan do ghnùise, Dhé,
 tog cirnne suas a ghnàth.
 7 'S mò chuir thu dh'aoibhneas ann am chridh',
 no'n uair a's lionmhor' coirc,
 No, aca sud, a's saobhre fion
 a' cinneachduinn gu airc.
 8 An sìth-shàimh luidhidh mi fàraon,
 is coidlidh mi le suain:
 Oir 's tusa mhàin bheir dhomh, a Dhé,
 fo dhìdean, còmhnuidh bhuan.

SALM V.

- DO m' bhriathraibh tabhair aire, Dhé
 is beachdaich air mo smuain.
 2 Eisd guth mo ghlaoidh, mo Rìgh 's mo
 oir guidheam ort gu dian.

- 3 Mo ghuth do chluinnear leat, a Dhé,
air m'aduinn gach aois là :
Gu moch do dheanam urnuigh riut,
is dearcam ort a ghnàth.
- 4 Cha tus' an Dia le 'm miann an t-olc ;
Is lochd cha chaidir thu :
- 5 Cha seas an t-amadan a'd làth'r ;
's fuath leat luchd-uile nach fìu.
- 6 Do sgriosar leat luchd-labhairt bhreug :
is gràin le Dia faraoon
An duine fuileachdach, 's an tì
chum cealgairachd a chlaon.
- 7 Ach mise, thig mi chum do theach,
thaobh meud do ghrasa caomh' :
Is ann ad eagal aoraidh mi,
m'aghaidh ri d' theampull naomh.
- 8 Fa chùis mo nàmhde, treòraich mi,
a'd' cheartas naomh, a Dhé,
Is dean-sa romham, air gach ball,
do shlighe dìreach rèidh.
- 9 Oir cha 'n 'eil cinnt no ceart 'nam beul,
fìor-aing'eachd annta ta ;
An sgòrnan fosgail' tha mar uaigh,
le mìodal teagaldh tlàth.
- 10 Le'n comhairlibh leig tuiteam dhoibh ;
sgrios iad, a Dhé, 'nan lochd :
'Nam peacaibh lionmhor fuaidach iad,
oir rinn iad ceannairc ort.
- 11 Ach aobhneas air gach neach gu robh
ni barrant dhìot 'nan airc :
Is deanadh iad buan ghardaebas,
oir ni thu dhoibh cùl-taic' :
- 12 Blodh annad ait, le'n ionnmhuinn t'ainm,
oir beannaichidh tu, Dhé,
Am firean : ni thu le do ghràs
a chuairteach', mar le sgeith.

SALM VI.

- A THIGHEARN, ann ad chorruih mhòir
na cronuich mi gu gurg ;
Na dean mo smachdachadh gu geur,
an uair a lasas t'fhear.
- 2 Dean trocair orm, a Dhia nan gràs,
oir lag tha mi gun cheisd :
Dhia, slànuih mi a nis a'm' fheum,
oir tha mo chnàman brist'.
- 3 Tha m'anam air a chràdh gu geur :
ach thusa, Dhé, cia fhàd ?
- 4 Pìll, fuasgail m'anam ; agus fòir
le trócair orm gu grad.
- 5 Oir ort, a Thighearna, sa' bhàs,
cha chùimhnichear gun cheisd :
Cò bheir dhuit buidheachas san uaigh,
no bheir ort luaidh am feasd ?
- 6 Le m' osnadh tha mi sgèth ; san oidhch'
a' cur mo leab' air snámh :
Le m' dheuraibh m'uirigh uisgicheam
san àm bu chòir dhomh tàmh.
- 7 Mo shùil a ta air fàilneachadh
fa chùis mo bhròin gach tràth ;
Is tha i dol gu h-aois, air son
m' uil' eascairde a ghnàth.
- 8 A luchd na h-aingidheachd gu léir,
imichibh uam am fad :
Chr chuala Dia gu trócaireach
ard-ghuth mo chaoidh mo stad.
- 9 An athchuinge a chuir mi suas,
chuala Iehobhah i ;
Is gabhaidh e gu toileach uam
an urnuigh a ni mi.
- 10 Air m' eascairdibh gu robh air fad
nair' agus cùradh geur :
Is pilleadh iad air ais gu luath
le masladh mòr gu léir.

SALM VII.

- O DHIA, mo Thighearn, earbann riut,
orm furtaich agus fòir,
Is saor mi fòs o shàrachadh
mo nàmh tha orm an tòir.
- 2 Air eagal, mar ni leòmhann treun,
gu'n reubar m'anam leis :
A' deanamh liodairt air gu nùin,
gun neach ga m' fhuasgladh as.

- 3 Iehobhah Dhé, 'ma rinn mi so ;
ma tha lochd air mo làmh :
4 Ma ch'loc mi olc do'n fhear a bha
an sìochaint dhomh, 's an dàimh ;
(Ni h-amhluidh sin, ach rinn mi'n tì
a theasairginn gu blath,
A bha gun aobhar is gun chùis
'na nàmhaid dhomh gach là.)
- 5 Leanadh an nàmhaid m'anam féin,
glacadh se e, 's gu làr
Saltradh mo bheatha, teagadh ròs
m'urram san dus le tair.
- 6 Eirich, a't'fheirg, tog suas thu féin,
fa chorruih m' eascair thréin ;
Is chum nab reth a dh'orduich thu
mosgail fa'm chùis, a Dhé.
- 7 Mar sin ni coimhthional an t-sluaig'
do chuairteachadh gun tàmh ;
Is uime sin fa'n chùis, a Dhé,
pìll féin gu ionad ard.
- 8 Breth air an t-sluaigh gu léir bheir Dia :
réir m'ionracais dean breth,
A réir mo neòchiont féin, a Dhé,
gu teann cuir as mo leth.
- 9 O thigeadh crìoch air olc nan daoibh,
ach daingnich daoine còir :
'S fear-sgrudaidh cridh', is rannsaich airm'
Dia cothromach na glòir'.
- 10 'S e Dia mo sgiath, 's e dh'fhurtaicheas
air luchd a' cluridhe cheirt.
- 11 Breitheamh luchd-còraich Dia, gach là
am feirg ri luchd droch-bheirt.
- 12 Ma 's e 's nach pìll an daoi air ais,
a chlaidheamh lionhaidh Dia :
Air lagh a bhogha chuir gu teann,
gu caitheamh ullamh dian.
- 13 Fìor-actuin agus innil bàis
sin dheasaich e dha féin ;
'S a shàighde guineach leig e mach
an aghaidh luchd dhroch-bheus.
- 14 Mar mhnaoi ri saoth'r is amluidh sin,
an daoi ri olc a ta ;
Fench airmhleas ghabh mar thorachas,
breug rugadh leis gun stà.
- 15 Chladhaich e sìochd, is threachall e,
is thuit sa' chlais a rinn :
- 16 Thig 'airmhleas air a chloiginn féin,
is 'fhoirneart air a cheann.
- 17 A réir a cheartais molaidd mi
an Tighearn, air gach àm :
Do aium Iehobhah seinnidh mi,
oir 's e a' àirde th'ann.

SALM VIII.

- I EHOBBAH DHIA, cia mòr tha t'ainm
air feadh gach uile thir !
Do ghloir do shocrach thu os ceann
nam flaitheas is nan speur.
- 2 A heul nan naoidh 's nan clochran maoth'
bhrigh t'eascair dh'orduich neart,
An nàmhaid chum gu coisgeadh tu,
's an dioghaltach mi-cheart.
- 3 Do speuran tràth thug mi fa'near,
obair do mheura féin ;
A' ghealach is na reulta glan',
a dh'orduich thu le chéir :
- 4 Duine cìod e, gu'n cuimhnichteadh ?
no 'mhac gu'm fiosraicht' leat ?
- 5 An inbhe 's beag nach d' rinn thu e,
mar ainglibh ard ap neart,
Oir chuir thu coron aluinn air,
le maise 's glòir t'nar chàch.
- 6 Air oibrìbh fòs do làmh thug thu
dha uachdaranachd air fad.
Gach dùile chuir fo 'chosaibh dha,
a chruthaich thusa riamh :
- 7 Caorach, is buar, 's gach ainnhidh fòs,
tha 'g imeachd air an t-sliabh.
- 8 An eunlaith tha san athar shuas,
an t-lasg a ta sa' chuan,
'S na shiubhlas fòs air sliغه tuinn,
sin thug thu dha gu buan.
- 9 A Dhia, ar Tighearn is ar Dia,
t'ainm-sa cia h-uasal e !

Air feadh gach talmhainn agus tìr
is nìor e sud, a Dhé.

SALM IX.

- I** E m'uille chridhe bheir mi dhuit,
àrd-nìholadh binn, a Dhé;
Is t'òibre miorbhuileach air fad
sior-chuiridh mi an céill.
- 2 Fòs ni mi annad aoibhneas ait,
is gairdeachas gu mòr:
Do t'ainm-sa seinnidh mise cliu,
O Thi a's àirde glòir.
- 3 A ris tràth phillear air an ais,
mo naimhde, théid gu làr;
Oir tuitidh iad is théid doibh as,
a'd'fhianuis féin gun dàil.
- 4 Mo chòir rinn thusa sheasamh dhomh,
gu daingean is gu treun:
A'd' chaithir chothrom shuidh thu shuas,
mar hhrèitheamh ceart am binn.
- 5 Is thug thu air na cinnich smachd,
sgrios thu na daoine daoi:
An ainm do chuir thu as gu glan,
o linn gu linn a chaoidh.
- 6 (Air sgrios an nàmh chaidh crìoch am fcasd):
leag thu am bailte treun:
An ionradh-san 'n a cuimhne fòs
do theirig sin leo féin.
- Ach mairidh Dia gu bunaiteach:
chuir caithir suas chum breth.
- 8 Bheir air an domhan cothrom ceart,
le còir do'n t-sluaigh fa leth.
- 9 Mar dhaingneach bithidh Dia nam feart
do'n tì a fa fo leòn:
An trioblaid, tearmunn dilcise,
ri faicinn neach fo bhròn.
- 10 Gach neach 'gam bheil air t'ainm-sa fios
nì dòchas dhìot, is bun:
Oir mheud 's a ta ga d'iarraidh, Dhé,
cha tréig thu iad gu tur.
- 11 Do'n Triath d'an comhnuidh Sion naomh,
seinnibh-sa cliu gu binn;
Aithrisibh fòs am measg an t-sluaigh
na gnìomharan a rinn.
- 12 Tràth ni e rannsachadh air fuil,
'n sin cuimhneach orra ta;
Cha leig air dearmad glaoch nam bochd,
a ghairmeas air a ghnàth.
- 13 Fòir orm, a Dhé, is amhaire air
mo thrioblaid o luchd m'fhuath':
A Dhé, a ta ga m' thogail suas
o dhorsaibh bàis gu luath.
- 14 An dorsaibh nìghinn Shìoin chaoimh
gu sgaollion t'uille chliu:
Is nì mi gairdeachas air sgàth
na slàinte dheònaich thu.
- 15 Thuit sìos na cinnich anns an t-slochd
a cbladhaich iad do chàch;
Is anns an lion a dh'fholuich iad,
tha'n cosa féin an sàs.
- 16 Aithnìchear Dia sa' bhreth a nì,
'nuair thuiteas dao san drip;
Is ann an gnìomh a làmhha féin
teann-ghilacar e san rib.
- 17 Pillear luchd-uile is aingidheachd
gu h-frinn sìos gu léir;
's na fineachan nach cuimhnich Dia,
pillear iad sìos le chéill.
- 18 An t-ainnis truagh cha téid am feasd,
air dearmad no air dlùth;
Air dòchas fòs an duine bhoichd
gu bràth cha'n fhaicear claoidh.
- 19 A Thighearn, éirich, 's na leig buaidh,
le neach d'an dual am bàs;
B'èth thugar air na cinneachaibh
a'd'fhianuis anns gach càs.
- 20 Cuir eagal orra-san gu mòr,
Iehobhab Dhia nam feart;
Gu'n aithnìcheadh na slòigh gu léir
iad féin nan daoine meat'.

SALM X.

CIOD uime 'n seas thu fad o làimh,
Iehobhab làidir thréin?

An aimsir teinn is trioblaid mhòr
an dean thu d'fholach fèin?

- 2 An droch dhuin' tha 'na àrdan borb
gu dian air tòir a' bhoichd:
Ach glacar iad sna h-innleachdaihb
a dhealbhadh iad féin chum lochd.
- 3 Oir ni an droch dhuin' ràiteachas
a miann a chridhe féin;
's na daoine sanntach molaidd e,
ge beag air Dia am méin.
- 4 An droch dhuin' a'm' fìor-àrdan gruaidh
cha ghoir e air an Triath;
'Na chridhe cha 'n 'eil uair air bith
gné sinuaineachaidh air Dia.
- 5 Tha 'uille shlighe doilghiosach,
o 'shealladh 's ard do bhreth:
A' séideadh pluic gu fanoidcach,
mu 'cascairidh gach leth.
- 6 'Na chridhe féin do labhair e,
am feasd cha ghluaisear mi:
Oir cha tig àmhlighar orm gu bràth,
no trioblaid fòs g'am chlaoidh.
- 7 Do'n iogan, mhallachadh, 's do ghò,
a bheil-san làn a ta:
Tha ainmheas nìor is diomhanas
fo 'theangaidh-san a ghnàth.
- 8 An diomhaireachd nam bailte beag'
gnàth-suidhidh e gun fhios;
Tha 'shùil air bochd 's air neòchiontach,
g'am ruot an uaignidheas.
- Tha 'shùile nìmhneach mar an ceudn',
ro-ghuineach geur gu lochd,
A' dearcadh ann an diomhaireachd
chum sgrios an fhìreìn bhoichd.
- 9 Mar leòmhann luidh' am foill a ta,
'na thàmh an garaidh dìon,
Ghabhail nam bochd: is ghilac e iad
'gan tarruing ann a lion.
- 10 Crùbaidh is cròuaidh e gu làr,
chum dha nach mothaidh neach:
Le 'laochraibh chum gu'n leagadh e
am bochd a' gabhail seach.
- 11 Is thubhairt e 'na chridhe féin,
dhìchuimhnich Dia gun cheisd:
Seadh dh'fholuich e a ghnùis an céin,
cha léir dha sud am feasd.
- 12 Iehobhab, éirich suas an àird,
a Dhia ta neartnìhor treun,
Tog suas do làmh: 's na dearmaid chaoidh
na dcòraidh bochd 'nam feum.
- 13 Na daoine dona c'uim' an dean
iad tarcuis ort, a Dhé?
An neach uid thu'fhairt 'na chridh' féin,
cha'n fhiosraichear leat e.
- 14 Chunnaic thu sin, oir dhuit is léir
gach dochair is gach spid,
A chum le d'làmh gu tòir thu dhoilbh
comain an uile a nì'd:
'S ann ortsa dh'fhàg an duine bochd
e féin a chur fo dhìon,
O's tu fear-cuidich agus neart
nan dìlleachdan gun mhaoin.
- 15 Gairdean an droch dhuin' is an daoi
leòn thus', is bhris, a Dhé;
Is rannsaich 'uille lochd gu geur,
gu ruig nach faighear e.
- 16 Gu suthain is gu sìorruidh fòs,
Iehobhab ta 'na Rìgh:
Sgriosadh na cinnich as gu tur,
is ghlanadh as a tìr.
- 17 Miann nan daoine 'umhal cbual tu, Dhé,
an cridhe nì thu gleust';
Is bheir thu air do chluais gu beachd
an gearan-san gu'n éisd:
- 18 A chumail ceirt ri dìlleachdain,
's ri daoineibh brùite truagh',
A chum nach tugadh duin' o'n tìr
nì 's mò air fòirneart luaidh.

SALM XI.

MO dhòchas chuir mi ann an Dia;
cìod uime 'n abradh sibh
Ri m'anam, chum mo chur air gheilt,
teich as mar eun gu d' shìabhl?

- 2 Feuch chuir na h-aingidh bogh' air lagh,
air sreing an saighead ghleus,
Thigeadh san dorch' an tì ta ceart
'na cliridhe fòs 'na bleus.
- 3 Ma théid na bunait air dhith,
clod nì a' duine còir?
- 4 Tha Dia 'na theampull naomh, air nèamh,
tha 'chaithir làn do ghloir;
Is léir d'a shùilbh-san gach dùil,
san domhan mhòr a ta:
Le 'rosgaibh clann nan daoin' air fad
rannsaichidh e a ghnàth.
- 5 Rannsaichidh Dia na fireanaich:
ach luchd na h-aingidheachd
Is fuath le 'anam, is gach neach
thug spéis do ragaireachd.
- 6 Air daoineibh droch-mhuinnt' dòirtidh Dia
nuas ribeachan gun dùth;
Is teine, pronnus, 's doininn gharbh,
cuibhrionn an cup' do nì.
- Oir Dia tha cothromach is ceart,
is ionmhunn leis a' chòir:
Ag amharc air na fireanaibh
le deadh ghnùis làn do ghloir.

SALM XII.

- NIS fòir, is cuidich leam, a Dhé,
's gun deadh dhuin' idir ann:
Na treibhdhìrich measg ghloinn nan daoin'
ri m' faghail tha ro-ghann.
- 2 Labhraidh gach neach r'a choimhearsnach
a' bhreug le mìodal béil;
Le cridhe dubailt' làn do cheilg,
sior-labhraidh iad ri chèill'.
- 3 Gach beul tha làn do ghabhan tlàth,
d'an gnàth bhi leam is leat;
An teagadh bhruidhneach àrdanach
sgathar le Dia nam feart.
- 4 A thubhairt, Orra bheir sinn buaidh
le'r teagaidh féin a mach;
'S leinn féin ar beul: cò e an Triath
a chuireas sinn fo smachd?
- 5 Ri sàruchadh nan deòradh truagh',
ri osnaich dhaoine bochd,
Nis éiridh mi, (ars' Dia), g'an dìon,
o'n dream ta bagradh lochd.
- 6 Is fìorghlan focal Dhé gu dearbh;
amhluidh mar airgid e,
A leaghadh is a ghlacadh fòs
seachd cuairt an suacan crè.
- Coimhididh tus' iad uile, Dhé,
dionaidh tu iad a ghnàth,
O'n ghinealach so nis a th'ann,
's o sin a mach gu bràth.
- 8 Gluaisidh gach aon taobh luchd an uilc,
is togaidh iad an ceann;
An t-àn san cuirear suas gu h-àrd
na daoine' a's suaraidh' t'ann.

SALM XIII.

- CIA fhad a dhearmadar mi leat,
a Dhia, an ann gu bràth?
Cia fhad a cheileas tu do ghnùis
o m'anam truagh gach tràth?
- 2 Cia fhad bhios imcheist ann am chom
le cridhe trom gach là?
Cia fhad a chuirear tharum suas
an tì bha dhomh 'na nàmh?
- 3 Tabhair fa'near, is freagair mi,
a Thighearna mo Dhia;
Soillsich mo shùile, codal trom
chum bàis nach coidil mi.
- 4 Eagal gu'n abair rium mo nàmh,
cbaidh agam air a nis;
'S gu'n dean mo naimhde gairdeachas,
an uair a dh' aomar mis'.
- 5 Ach dh'earb mi á do ghràs: is bidh
mo spiorad a' d' shlàint'.
- 6 Is seinnidh mi gu binn do Dhia
air son a phailteis ghnàicht'.

SALM XIV.

- 'NA chridhe deir an t-amadan,
cha'n 'eil ann Dia air bith:

- Taid truaillidh, 's oilleit fòs an gnìomh
cha'n 'eil ann neach nì maith.
- 2 An Tighearna dh'amhairc e o néamh,
air cloinn nan daoine nuas;
A dh'fheuchainn an robh tuigs' aig neach
na dh'iarraidh Dia nan gràs.
- 3 Ach chlaon an t-ìomlan diubh a thaobh,
ro-shalach taid gu léir:
Cha'n'eil aon neach a' deanamh maith,
cha'n 'eil fìu aon fò'n speur.
- 4 Am bheil aig droch dhaoine' tuigs' air bith
tha 'g itheadh suas gu dian
Mo phobhuil-sa, mar aran blast',
's nach 'eil a' gairm air Dia.
- 5 An sin do ghabh iad eagal mòr,
air son gu bheil gu fìor
Dia ann an ginealach is linn,
nam fireanach do shìor.
- 6 Comhairl' an truaghain nàraich sibb,
chionn Dia 'na thearmunn da:
7 A Sion O gu tigeadh mach
slàint' Israeil gach là!
- An nair bheir Dia air ais o bhruid
a phobull féin le chèill',
Air Iacob bithidh aoibhneas mòr,
's aiteas air Israel.

SALM XV.

- C O dh'fhanas ann ad phàillion shuas?
a Thighearna, cò e?
Air do chnoc naomh cò 'n tì sin leat
a chòmhnucneas gach rè?
- 2 An tì a' ghluais gu treibhdhireach,
is ionracas a chleachd,
Labhras an fhìrinn sin a mach
a ta 'na chridhe steach.
- 3 An tì nach dean air neach air bith,
cùl-cùbaineadh 'm feasd le 'bheul,
Nach dean aon lochd d'a choimhearsnach,
's nach tog air fòs droch sgeul.
- 4 A nì trom-thailceas air an daoì:
ach urram dhoibh a bheir
D'an eagal Dia; 's nach caochail mionn
ged thigeadh calltach air.
- 5 Airgid air ocar nach do chuir;
an aghaidh fòs nan saoi
Duais nach do ghabh: cha ghluaisear
gu bràth mar sin a nì.

SALM XVI.

- DHIA, coimhid mi, oir annad féin
a ta mo dhòigh gu fìor;
- 2 O m'anam, thubhairt thu ri Dia,
is tu mo Thriath gu sìor.
- 3 Mo mhaithas ort gu dearbh cha rug
ach air na naomh a ta
Air thalamh, 's air na flathibh fìor,
'g am bheil mo ghean 's mo ghràdh.
- 4 Mòr-mhendaichear an doilghios doibh,
a dheifricheas gu luath
Air lorg dhée eile choimheach bhreig',
a' cur ri cràbhadh truagh:
An lobairt-dhibhe tha do fhuil
cha 'n offail mi gun cheisd,
Is air an ainmibh ann am bheul
cha toir mi fuaidh an feasd.
- 5 Cuibhrionn mo chup' is m' oighreachd Dia
's tu sheasas dhomh mo charrn.
- 6 An àitibh aoibhneas thuit mo lìon:
's leam oighreachd bhreagh nach gann.
- 7 Bheir mise buidheachas do Dhia,
thug comhairl' orm a'm fheum:
Tha m'airne fòs an àm na h-oidhch'
ga m' theagasg mar an ceudn'.
- 8 Do chuir mi romham, anns gach cùis,
an Tighearna mòr a ghnàth;
Chionn air mo dheas làimh gu bheil e,
cha ghluaisear mi gu bràth.
- 9 Mo chridh' nì aoibhneas ùime sin,
nì gairdeachas mo ghloir;
Nì m'fheoil fòs còmhnuidh fhoistineach
le dìon an dòchas mòr.
- 10 Oir anns an uaigh cha'n fhàgar leat
shìos m'anam, air aon achd:

'S cha leig thu fòs do d' sheirceinn naomh
gu'm faic e truaillidheachd.
'1 Dhomh sligh' na beatha nochdaidh tu:
a'd' làth'r làn aoibhneas ta,
Is aig do dheas làimh féin, a Dhé,
mòr shubhacas gu bràth.

SALM XVII.

- E**ISD thus, a Thighearn, ris a' chòir,
mo ghlaodh thoir aire dha;
Is cluinn an urnuigh thig a mach
o m' bheul gun bhreug, gun ghò.
2 Mo bhreth o d' fhianuis thigeadh i:
le d' shùilibh léirsinneach,
Seall air na nithibh sin, a Dhé,
ta ceart is cothromach.
- 3 Dhearhh thn mo chridh', is dh'fhiosraich thu
san oidhche; dh'fhionn gu geur;
Cha d'fhuair thu maoin; oir b'e mo rùn
nach peacaichinn le m' bheul.
- 4 Mu thimchioll oibre dhaoine fòs,
ghléidh mi m' féin gu beachd,
Le guth do bhéil, o cheumannaibh
luchd-braid is ragaireachd.
- 5 Cum m' imeachd suas, a Dhia nam feart,
a'd' shlighibh ceart gu treun;
A' d' ròidibh dìreach cum mi suas,
nach sleamhuich uam mo cheum.
- 6 Oir ghairm mi ort, a Dhé, a chionn
gu'n éisdear leatsa rium;
Do chluas a m' ionnsuidh crom a nuas,
is fòs mo ghearan cluinn.
- 7 Taisbein do chaoimhneas iongantach
tha gràdhach làn do chliu;
O thus' a shaoras le d' dheas-làimh,
an droing d'an dòchas thu,
O'n dream 'nan aghaidh thogas ceann.
- 8 O coimhid mi gu treun,
Mar chloich do shùil: dean folach orm,
fo sgàil' do sgiathan féin.
- 9 O'n droch dhuin' tha ri fòirneart orm,
o naimhaidibh sgrìosach treun,
A ta ga m' chuairteachadh gach taobh,
mo choimhead uatha dean.
- 10 'Nan saill a ta iad druide te suas,
cainnt uaibreach tha 'nam beul.
- 11 Chrom iad gu làr, is dhearc le'n sùil;
is chuairtich iad ar ceum.
- 12 Mar leòmhnan gionach togarach
chum cobhartaich a ghnàth;
Mar leòmhnan òg an diomhaireachd
a' luidh' am foll a ta.
- 13 Eirich, a Dhé, is caisg mo nàmh,
leag sìos gu talamh e:
O'n droch dhuin' ta 'na chlaidheamh dhuit,
saor m'anam uaithe, a Dhé.
- 14 O'n dream tha dhuit-sa, Dhé, mar làimh,
o dhaoineibh saogh'ta d'an',
'G am bheil an cuibhrionn is an cuid
sa' bheatha so a mhàin.
D'am bheil thu tabhairt làn am bronn
á t'ionnhas diomhair fòs:
Tha'n gineal lionmhor, is am maoin
fagaidd d'an leanbaibh òg'.
- 15 Ach air mo shon-sa, dearcam air
do ghnùis am fireantachd:
Air mosgladh dhomh làn-dhiolar mi,
a Dhé, le d'chosamhlachd.

SALM XVIII.

- M**O chion ort féin, a Dhia, mo theirs.
2 Mo charraig Dia gu ceart,
Mo dhainneach, is mo Shlànuighear:
mo Thighearn, is mo neart:
An ti san cuir mi dòchas fòs,
mo thargaid is mo sgiath,
Adharc mo shlàinte e gu beachd,
mo bhaideal àrd 'se Dia.
- 3 Nis gaiream air an Tighearna,
d'an dlighear moladh sìor;
Mar sin o m'eascaidibh gu léir
coimhdear mi gu fìor.
- 4 Chuir tuithe dhroch dhaoine' eagal orm,
chaidh umam guin an éig,

- 5 Pian ifrinn agus liontan bàis,
romham 's gach àite feuch.
- 6 A'm' éigin ghoir mi air mo Thriath,
dh' éigh mi gu h-àrd le m'ghlaodh;
Is as a theampull naomha féin
dh' éisd e mo ghuth gu caomh.
'Na fhianuis is 'na éisdeachd féin,
mo ghlaodh do ràinig suas;
- 7 An talamh air gach ceum an sin
do chriothnuich, chra'nadh, ghluais:
Bunaitean nan cnoc 's nam beann,
do ghluaiseadh sin gu garg,
Do chriothnuicheadh is chrathadh iad,
a chionn gu robh air fearg.
- 8 Chaidh deatach as a shròin a mach,
is teine loisgeach mòr
Chaidh as a bheul, is lasadh leis
do eibhligh ni bu leòr.
- 9 Is lùb e fòs na nèamha fuidh',
's a nuas do thùrling e:
Fìor-dhorchadas is dùbh-àigein
hha sin fo chosaibh Dhé.
- 10 Air cherub mharcaich e gu h-àrd,
air iteig fòs do chaidh;
Is bha e luath ag itealach,
air bharraibh sgiath na gaoith'.
- 11 Dùbh-dhorchadas mar dhìomhaireachd
do chuir e uime féin:
Bu phàillion dà na h-uisgean dorch',
is neulta tugh' nan speur.
- 12 Do chaidh a neulta tugh' le chéil',
is clacha-mealain fòs,
Is eibhlean tein' air thoiseach air,
o'n dealradh bha 'na ghnùis.
- 13 Rinn Dia sna speuraidh tairmeanach,
is leig an Tì a's àird'
A ghuth a mach, le cloich-shneachd chruaidh,
is eibhligh teith 's gach àit.
- 14 A shaighde leig e uaithe' a mach,
is sgaol e iad air fad,
Tein-athair orra thilg gu mòr,
is chlaoidheadh iad gu grad.
- 15 Àigein an uisge chnannas ris,
bha stéidh an domhain nochdt';
Le séideadh anail t'fheirge, Dhé,
le t' achmhasan 's do smachd.
- 16 As 'ionad àrd do chuir e nuas,
is bhuin e mise mach,
Is rinn mo tharruing mar an ceudn'
á h-uisgibh iomarcach.
- 17 O m'èascar thul-chuiseach is theun
thug e dhomh fuasgladh deas,
'S o luchd mo mhi-ruin agus m'fhuath,
bu treis' gu mòr na mis'.
- 18 An là mo thrioblaid is mo theinn,
thug ionnsuidh orm gun fhios:
Ach bha mo Dhia 'na thaice dhomh,
cha sleamhuich uam mo chos.
- 19 Gu ionad farsuinn agus réidh
thug esan mi a mach:
Mo theasairginn do rinneadh leis,
oir ghabh e annam tlachd.
- 20 Réir m'ionracais, is gloine làmh,
do chuirtich Dia maith rium:
- 21 Air seachran uaithe' cha deachaidh mi;
a shlighe choimheadh leam.
- 22 Oir 'uile bhreth a'm' fhianuis tha
a statuin uam nìor chuir.
- 23 Bu treibhdhireach 'na làthair mi
o m' aing'eachd féin do sguir.
- 24 Réir m'ionracais is gloine làmh,
an sealladh beachd a shùil,
Do rinneadh mise chulteachadh
gu caomh le Dia nan dùl.
- 25 Do'n duine ghràsail, gràsmbhor thu,
dìreach do'n treibhdhireach.
- 26 Glan thu do'n duine ghlan, is fiat'
do'n duine fhiaf' fa seach.
- 27 Na daoine tha fo thrioblaid mhòir,
làn-shaoraidh tu 's gach àit;
Ach bheir thu nuas a' mhuinntir sin
'g am bheil an sealladh àrd.
- 28 Oir lasaidh tu mo choinneal domh,
is ni mo Dhia 's mo Rìgh

- Mo dhorchadas a shollseachadh
chum soilleir glan gu 'm bi.
- 29 Mòr bhuidheann sluaigh, le d'fhreis', a Dhé,
do hhriseadh leam air fad;
Le neart mo Dhia thar balla leum,
is chaidh mi féin gun stad.
- 30 Ach Dia, a ta a shlighe ceart:
is dhearbhadh focal Dé;
Do'n uile dhream a dh'earbas as,
g'an dion' is targaid e.
- 31 Oir cò is Dia, ach thusa Dhé ?
cò's carraig ach ar Triath ?
- 32 An neach a ni mo shlighe ceart,
's a bheir dhomh neart, 'se Dia.
- 33 Mar chosaibh féidh ta luath chum ruith,
mo chosa do rinn e,
Air m'aitibh árd ga m' shocrachadh,
a chum nach gluaiastadh mi.
- 34 Gu comhrag theagaisg e mo lámh,
ionnus gu'n d'thug mi buaidh,
A' briseadh le mo ghairdeinibh
bogha do'n stailinn chruaidh.
- 35 Thug thusa sgiath do shláinte dhomh,
do dheas lámh chum mi suas;
Thug orm do chaoimhneas is do ghràdh
gu h-inbhe mhòir gu'n d'fhàs.
- 36 Mo cheuma rinn thu farsuinn fo 'm
sin domh mar fhuaradh thus';
Ionnus gur socrach sheasas mi,
cha sleamhuich uam mo chos.
- 37 Lean mi mo naimhde anns an ruaig,
is erra rug gu cas:
Is gus 'n do chlaoidheadh iad gu léir,
nìor phill mi féin air m'ais.
- 38 Gun chomas éirigh lot mi iad,
is thuit iad síos fo m' chois.
- 39 Le neart chum cath' 's ta chríolaich mi;
na dh'éirich rium leag thus'.
- 40 Air mhuineal thug thu dhomh mo nàmh;
luchd m'fhuath' gu'n claoidh gu léir.
- 41 Ghlaoth iad, 's d'am furtachd cha robh neach:
air Dia, 's cha d'fhreagair e.
- 42 Amhluidh mar dhus a' dol le gaoith,
gu mhn do phronn mi iad;
Is thilg mi iad a mach a ris
mar chlabar air an t-sràid.
- 43 O strí nan daoine shaor thn mi;
rinn ceann nan cinneach dhomh;
Na daoine riamh nach b'aithne dhomm,
ri seirbhís dhomh do chim'.
- 44 Air cluinntinn dhoibh-san iomradh orm,
géillidh iad dhomh gun stad;
Is ní dhomh coigrich mar an ceudn'
an isleachadh air fad.
- 45 Làn-sheargaidh is dubh-chríonaigh as
na coigrich ud gu léir;
A' teachd le h-eagal 's uamhunn mhòr
a mach o'n garaidh féin.
- 46 Dia beò a ta, beannaicht' gu robh
mo charraig féin gu bráth:
Is Dia mo shláinte bitheadh e
air árdachadh a ghnáth.
- 47 Mo dhioghaltas, 's mo leasachadh,
's e Dia a bheir a mach;
's e fòs a chuireas dhomh fo smachd
na slòigh gu h-iomadach.
- 48 'Se dh'fhuasglas ní o m' eascairdibh
's ta thog mi thar gach neach
A dh'éirich rium; is thug mi saor
o fhear na h-eucorach.
- 49 Am measg nan cinneach, uime sin,
bheir mise dhuit, a Dhé,
Mòr bhuidheachas; do t'ainm-sa fòs
árd-mholadh seinnidh mi.
- 50 Bheir esan fuasgladh mòr d'a rìgh:
le pailteas ní e gràs
Air Daibhidh, neach a dh'ungadh leis,
is air a shliochd gu bráth.

SALM XIX.

- GLAIR Dhé làn-fhoillsichidh na néamh,
's na speura gníomh a lámh,
2 Tha là a' deanamh seòil do là,
is oidhche dh'oidhche.

- A' teagasc eòlais, anns gach àit.
3 Oir cha'n 'eil ioud ann,
No caint, no uirgholl fòs air bith,
nach cual an guth gach àm.
- 4 Chaidh'm fuaim air feadh gach tìre mach,
am focal chaidh an céin
Gu crìch na cruinne, chuir e annt'
buan-phàillion árd do'n ghreín:
- 5 Neach tha mar nuadh fhear-pòda teachd
o sheòmar féin a mach,
Ta àit, mar ghaisgeach treun a' ruith
a réis' gu togarach.
- 6 A' dol a mach o chrìch nan speur,
mu'n cuairt g'an crìch a ghnàth:
'S cba'n f'holuichear o theas na gréir',
aon ní sa' chruinne ta.
- 7 Is iomlan lagh Iehobhah mhòir;
an t-ainm iomp'chidh e:
Teistean an Tighearna tha dearbh;
an simplidh glie 'se ní.
- 8 Tha statuin fòs an Tighearna ceart,
'g cur aobhneis anns a' chrìdh':
Glan-àithnté Dé a' soilleseachadh
nan sal nach maith a chi.
- 9 Eagal an Tighearna fìor-ghlan e,
buan-mhaireannach a ghnàth:
Fìor agus cothromach air fad,
a bhreitheanaís a ta.
- 10 Is fearr r'an iarraidh iad na'n t-òr,
an t-òr a's fearr air bith:
Ní 's mìlse na a' mhìl ta iad,
no cìr mheala r'a h-ìth.
- 11 A' faotainn rabhaidh fòs a ta
t'òglach-sa uath' a ghnàth,
'S 'nan coimhead cùramach gu dearbh
mòr-thuarasdál a ta.
- 12 Cò thuigear uile sheachrainn féin ?
glan o lóch d'iomhair mi.
- 13 O pheacaibh dànadais air ais
cum t'òglach féin, a Dhé;
Na bitheadh ac' árd-cheannas orm
an sin biom treibhdhireach,
Is fòs o'n pheacadh mhòr bidh mi,
fìor-ionraic neochiontach.
- 14 O Dhia, mò neart, 's mo shlànighneas,
an deadh thoil gabh uam féin,
Na smuainte ta a'm' chridhe stigh,
is briathra glan mo bheil.

SALM XX.

- GU freagradh Dia thu ann an là
do thrioblaid, is do phéin!
Gu deanadh ann Dhé Iacob fìs
sìor-choimhead ort a'd' f'heum
- 2 Gu'n cuireadh thugad cuideachadh,
tràth, as a theampull naomh
Is deanadh e do neartachadh
á Sion féin gu caomh.
- 3 Cuimhnichheadh e gu gràsmbhor dhuit
't'uil' ofraile gu grad,
Is gabhadh e gu taitneach uait
t'lobairte loisg' air fad.
- 4 A réir deadh ruín do chridhe féin,
tiùbhradh e dhuit gu maith;
Coimhlonadh e gach comhairle
tha ann ad chridhe stigh.
- 5 Ní sinne aobhneas ann ad shláint',
is ann an ainm ar Dia,
Suas togaigh sinn ar brataichean:
Dia dhéanach' t'uile miann!
- 6 Ní 's fìosrach mi gu teasaig e
an tì a dh'ungadh leis:
Is le neart-saoraidh deas láimh' Dhé
o néamh gu'n éisdear ris.
- 7 Tha cuid ag earbs' á carbadaibh,
is cuid á h-eachaidh árd;
Ach ainm an Tighearna ar Dia
cuimhnichidh sinn 's gach àit.
- 8 Dh' isleachadh iadsan, 's thuit iad síos
ach dh'éirich sinn is sheas.
- 9 Dhia, fòir, is éisdeadh ruinn an Rìgh,
tràth ní sinn gearan ris.

SALM XXI.

- A**M meud do neirt-sa, Dhé nan dòl,
bidh aoibhneas air an Rìgh:
Is aon ad shlàinte thròcairich
sòlas cia mòr do ni ?
- 2 Làn mhiann is rùn a chridhe féin
thug thusa dha gu seith:
Aon athchuinge a dh'iarr a bheul
cha d' rinn thu air a cleith.
- 3 Oir heannachadh do mhaithéis mhòir
sin thug thu dha gu moch:
Is chuir thu coron árd m'a cheann,
do'n òr a's deirge deach.
- 4 Do dh'iarr e ortsa beatha bhuan,
sin thug thu dha gu fìor:
Is thug thu sléadh saoghail dha,
a chum bhi beò gu sìor.
- 5 A thaobh na slàinte thug thu dha,
is mòr a ghloir gach àm;
Ard-urram agus moralachd
chuir thusa air a cheann.
- 6 Oir rinneadh leat-ro-bheannaicht' e
air feadh gach rè gu beachd;
Is rinn thu e làn-aoibhneach fòs
le d' ghnùis an tròcaireachd.
- 7 Oir ann an Dia Iehohhah mòr
earbaidh an rìgh a ghnàth:
Tre thròcair fòs an Tì a's áird,
cha ghluaisear e gu bràth.
- 8 Aimsidh do ghlaic air t'nile nàmh;
air t'earc do làmh dheas.
- 9 Mar àmhhuinn theinntich ni thu iad,
an aimsir t'fheirg' g'an sgrios:
'Na chorruidh mhòr ni Dia gu fìor,
an slugadh sìos air fad,
Is nìthear orra milleadh fòs
le teime mòr gu grad.
- 10 An toradh sgriosaidh tu o'n tìr,
's an sìol o dhaoinibh as.
- 11 Oir rinn iad feall a'd' aghaidh: 's dhealbhadh
do-lheart nach d'fheud' cur leis:
- 12 Bheir thusa orra, uime sin,
gu'n tionndaidh iad an cùl,
Oir saighde gear do bbogh' air sreing
ri'n aghaidh gleusaidh tu.
- 13 Ardaich thu féin, a'd' chumhachdaibh,
a Thighearna nam feart:
Mar sin sìor-chanaidh sinn do chliù,
is molaidd sinn do neart.

SALM XXII.

- M**O Dhia, mo Dhia, c'uim' thréig thu mi ?
le d'fhuirtachd uam an céil:
O bhriathraibh goirt mo bhùiridh áird,
gun fhuasgladh orm a'm' fbeum ?
- 2 Mo Dhia, cha d' thug thu freagradh dhomh,
san là 'n do ghairm mi ort;
An uair bu chóir dhomh tàmh san oidhch',
cha'n 'eil mi féin a'm' thosd.
- 3 Gidheadh tha thusa fìor-ghlan naomh,
a Dhé, os ceann gach sgéil,
A'd' chòmhnuidh anns an àros sin,
am bheil cliù Israeil.
- 4 Do rinn ar sinnsir dhìotsa bun;
Is shaor thu iad mar dh'earb.
- 5 Do ghlaodh iad riut, Is shaoradh iad:
dh'earb riut, gun aghaidh dhearg.
- 6 Ach mise fòs cha duin', ach cnuimh:
gràin dhaoin', is tàir nan slògh.
- 7 Cùis crathaidh cinn, is casaidh béil,
spòrs do na chì mo dhòigh.
- 8 Ag ràdh, Do rinn e bun á Dia,
chnm fuasgladh air 'na fheum:
Nis deanadh e a theasairginn,
o thug e dha làn-speis.
- 9 Ach 's tus' an tì a bhàin a mach
á broinn mo mhàthar mi;
Is tu bu bharrant dòchais dhomh,
'nuair bha mi air a' chich.
- 10 O'n bhroinn do thigheadh ortsa mi,
air bhith dhomh òg is maoth;
O thàinig mi o'n bhroinn a mach,
is tu mo Dhia ro-chomh.
- 11 A Dhé na bì-sa fada uam,
oir 's dùth dhomh trioblaid theann;

'S gun agam neach gu'm chuideachadh,
no aon a chuireas leam.

- 12 Do chuairtich umam mòran tharbh,
mu m' thimchioll air gach làimh;
Dh'iadh umam tairbh ro-làidir bhorb'
am Basan bha 'nan tàmh.
- 13 Gu farsulinn dh'fhosgail iad am beul,
mar leòmhnan allta garg;
A' tabhairt sìthidh reubaidh orm,
le bùireadh fìadhaich borb.
- 14 Mar uisge dhòirteadh mise mach,
mo chnàmhan sgàint' o chéil':
Mo chridh' a'm' chom an taobh a stigh,
air leaghadh tu mar chéir.
- 15 Air tiormachadh mar pbota crè
a ta mo neart, a Dhé;
Mo theangadh leantuinn tha ri m' ghial,
gu h-ùir-bhàis thug thu mi.
- 16 Oir dh'iadh mu'n cuairt orm madraidh gharb'
bhuaill umam thall 's a bhos
Mòr-bhuidheann luchd na h-aingidheachd;
lot iad mò làmh 's mo chos.
- 17 Mo chnàmhan uile feudaidd mi
an àireamh fòs gu leir:
Tha iad-san uil' ag amharc orm,
a' dearcadh orm gu gear.
- 18 Mo thrusgan eatorra do roinn,
croinn thilg iad air mo bhrat.
- 19 Ach fad o m' chabhair, Dhia mo neirt,
na fan, ach deifrich ort.
- 20 Do m'anam tabhair fuasgladh deas
o'n chlaidheamh sgaiteach gheur,
Is m'aon-ghràdh caomh gu saorair leat,
o neart nam madradh treun'.
- 21 O bheul nan leòmhnan làidir borb',
Dhé, fuasgail orm gun stad:
O adharcaibh nam buabhull treun';
oir chual thu mi gu grad.
- 22 Do m' bhràithribh cuiream t'ainms' an céil;
san èireachd molam thu.
- 23 Shìl Iacob, 's a luchd eagail t' é,
ghloir thugaibh dha is cliù:
Oirbhs', Iarnad Israeil air fad,
biodh 'eagal-san gu mòr.
- 24 Oir tarcuis riamh cha d'ynn air bochd,
's nìor ghabh e gràin d' a leòn:
Cha d'fholuich, 's cha do cheil a ghnùis,
g'a thréigsinn ann a theinn;
'Nuair rinn e glaoch is gearan ris,
thug éisdeachd dha gu binn.
- 25 'S ann ortsa bhios mo mholaigh árd
san èireachdas, a Dhé:
Mo bhòidean locam fòs an làth'r
na dream d'an eagail e.
- 26 Na daoine sin tha macanta
lthidh, is gheibh an sàth:
Na dh'iarras Dia árd-mholaigh e;
bhur cridh' bidh beò gu bràth.
- 27 Pillidh ri Dia gach iomail tìr,
is cuimhnichidh iad air:
Seadh sluagh nam fineacha gu léir
dhuith géill is urram bheir.
- 28 Air son gur le Iehohhah mòr
an rìoghachd le còir cheart:
'S am measg nam fineachan air fad
's leis uachdranachd is neart.
- 29 Na daoine reanhar anns gach tìr,
ithidh, is géillidh dha:
Dha cromaidh sìos na théid san uaigh,
cha chum neach 'anam beò.
- 30 Thig sìobhd is seirbhìs ni do Dbia,
dha measar iad mar linn.
- 31 Innsidh a' cheart do'n àl ri teachd,
gu 'm b'esan sud a rinn.

SALM XXIII.

- I**s e Dia féin a's buachaill dhomh,
cha bhi mi ann an dith.
- 2 Bheir e'a'near gu'n luidhinn sìos
air cluainibh glas' le sìth:
Is fòs ri taobh nan aithmichean
théid seachad sìos gu mall,
A ta e ga mo theorachadh,
gu min réidh anns gach ball.

- 3 Tha g aiseig m'anam' dhomh air ais;
's a' treorachadh mo cheann
Air sligheibh glan' na fireantachd,
air sgàth 'dheadh ainme féin.
- 4 Seadh fòs ged ghluaisinn eadhon trid
ghlinn dorchas sgàil' a' bhàis,
Aon oile no urchuid a theachd orm
ni h-eagal leam 's ni 'n càs;
- Air son gu bheil thu leam a ghnàth,
do lorg, 's do bhata treun,
Tha iad a' tairgadh comhfhurtachd
is fuasglaidh dhomh a'm fheum.
- 5 Dhomh dheasaich bhor air heul mo nàmh
le h-oladh dh'ung mo cheann;
Cur thairis tha mo chupan fòs,
aig meud an làin a' t'ann.
- 6 Ach leanaidh maith is tròcair rium,
an cian a bhios mi beò;
Is còmhnuicheadh an àros Dé,
ri fad mo rè 's mo là.

SALM XXIV.

- 'S LE Dia an talamh, is a làn;
an domhan, is a bheil ann.
- 2 Oir shocrach e air cuantaibh e,
air sruthaibh leag gu teann.
- 3 Cò e am fear sin a theid suas
gu tulaich naomha Dhé?
Is fòs 'na ionad naomha-san,
cò sheasas ann gu réidh?
- 4 An ti 'g am bheil na làmh an glan'
is cridhe neòchiontach;
'Anam nìor thog ri dìomhanas,
's nìor lùgh mionn ioganach.
- 5 An ti sin beannachadh o Dhia
gheibh e gu saoihir pailt,
Is ionracas faraoen o'n Dia
's bun slàinte dha 'na airc.
- 6 'S i sin a' ghinealach 's an dream
a dh'farras e gu mòr;
Ta 'g iarraidh d'aghaidh is do ghnùis,
o Iacob, mar is còir.
- 7 Togaidh, a gheatacha, bhuir cinn
is éiribh suas gu h-àrd,
o dhorsa sìorruidh; Rìgh na glòir'
gu'n tigeadh e g'a àit.
- 8 Cò e sin féin Ard-Rìgh na glòir' a
an Tighearn làidir treun,
Iehobhah neartmhor, cruaidh an cath,
bheir buaidh a mach dha féin.
- 9 Togaidh, a gheatacha, bhuir cinn,
is éiribh suas gu h-àrd,
o dhorsa sìorruidh; Rìgh na glòir'
gu'n tigeadh e g'a àit.
- 10 Cò e sin féin Ard-Rìgh na glòir' a
Iehobhah mòr nan slògh,
'Se féin a's Rìgh na glòir' a' t'ann,
gun choimeas idir dha.

SALM XXV.

- DHIA, togam m'anam riut a suas.
2 Mo Dhia, mo mhuighin dheas;
A m' ionnsuidh na leig aohhar nàir':
do m'easgar gairdeachas.
- 3 Fo nàir' is mhasladh na leig neach
d'an gnàth bhi feitheamh ort:
Ach nàire gu robh air an dream
a ni gun aohhar lochd.
- 4 Foillsich do shlighe d'bhorm, a Dhé;
a'd' cheumnaibh teagaisg mi;
- 5 Is treoraich mi a' d' fhirinn ghloin,
's mo theagasg dean, a Dhé;
Oir 's tu a's Tighearn ann gu dearbh,
's tu 's slàinte dhomh a ghnàth,
Is ort a ta mi feitheamh fòs
le foighid mhòir gach là.
- 6 Cuimhnich, a Dhé, do thròcair chaomh,
do chaoimhneas làn do ghràdh.
O chian nan cian a ta iad ann,
san amsir fad o'n là.
- 7 Na cuimhnich peacaich m'bighe dhomh:
's na lochdan a rinn mi;
A réir do thròcair cuimhnich orm,
air sgàth do ghràis, a Dhé.

- 8 Is maith 's is dìreach Dia nan dùil:
is air an aohhar ud
Do nithear leis na peacaich thruagh'
a theagasg anns an ròd.
- 9 Treoraichidh e na daoine ciùin'
am breitheanas gu ceart:
'S na daoine míne teagaisgidh
'na shlighe, Dia nam feart.
- 10 An tròcair is an fhirinn réidh
sud sligh' ar Dé 's gach hall;
Do'n dream a chumas gealladh ris,
's nach leig a theist air chail.
- 11 Sgàth t'ainme, lagh mo chionta fòs,
oir tha sud mòr, a Dhé.
- 12 Cò'm fear d'an eagal Dia? San-t-slighe
's ion-roghnuidh seòlaidh e.
- 13 An seasgairleadh ni 'anam tàmh,
's le 'shliochd le ceart an tìr.
- 14 Tha run an Tighearn aig an dres
d'an eagal e gu fìor:
Is nithear leis a chumhnant fòs
fhoillsachadh dhoibh gu ceart.
- 15 A ta mo shùile féin a ghnàth
ri Tighearn nam feart,
Air son gu'n spionar leis mo chos
gu h-aithghearr as an rìh.
- 16 Fill thugam, is dean tròcair orm
a'm' aonar taim, 's fo dhrìp.
- 17 Tha teinn mo chridh' a' dol am meud;
saor mi o m'àmghar geur.
- 18 Seall air mo pheinn, is m'anshocair,
's mo pheacaidh lagh gu léir.
- 19 Mo naimhde guineach thoir fa'near,
oir tha iad lionmhor ann;
Fuath nìmhneach agus mì-runach
tha aca dhomh nach gann.
- 20 Dhia, coimhid m'anam, 's furtaich orm:
na leig fo nàire mi;
Mo dhòchas uile leig mi ort,
air son gur tu mo Rìgh.
- 21 Nis deanadh ionracas is còir
mo dhion; 's mi feitheamh ort.
- 22 Dhia fuasgail air cloinn Israeil,
o'n uile àmhghar goirt.

SALM XXVI.

- THOIR orm-sa breth, a Dhia nan dùil,
a'm' neòchiont ghluais mi féin,
Oir rinn mi dochas maith a Dia,
cha sleamhuich uam mo cheum.
- 2 Dhia, fionn mo chridh' is m'airne fòs,
fidir is ceasnuich mi.
- 3 Oir dhearc mi air do chaoimhneas gràidh:
a'd' fhirinn ghluais mi, Dhé.
- 4 Le cuideachd dhlomhain riamh nìor shuidh
cha siuhlam le luchd-saobh.
- 5 Is beag orm coimhthional an uile;
's cha suidh mi sìos le baobh.
- 6 An neòchiont glanaidh mi mo làmh,
is cuairt'cheam t'altair, Dhé;
- 7 Gu foillsichinn le moladh àrd,
do mhiorbhuile gu léir.
- 8 Còmhnuidh do theach is ionmhuinn leam,
a Tighearn is a Dhé,
Gnàth-àite bunaidh t'onorach,
is leam ro-ionmhuinn e.
- 9 Le peacaichibh, luchd-deanamh nìle,
na cruinnich m'anam bochd,
Na cuir mo bheath' 'nan cuideachd sud,
tha fuileachdach gu lochd.
- 10 'G am bheil an t-aimhleas mòr 'nan glae
duais-bhratha 'nan làimh dheis.
- 11 Ach ghluaisidh mi a'm' neòchiont féin,
a'd' thròcair saor-sa nìs'.
- 12 'Na seasamh ta mo chos gu beachd
air ionad còmhnaidh réidh:
Is ann an coimhthional nan naomh,
beannaicheam thus', a Dhé.

SALM XXVII.

- 'S E Dia mo sholus, is mo shlàin',
cò chuireas eagal orm?
'Se neart mo bheatha Dia nan dùil,
cò chuireas fait'cheas fòr'm?

- 2 Mo naimhde, m'eascairde, luchd-uilc,
tràth thàinig orm gu bras,
Gu gionach dh'itheadh m'fheòla suas,
fhuair tuisleadh, thuit gu cas.
- 3 Ged champaichadh a'm' aghaidh feachd,
cha'n eagal le mo chridh':
Ged éireadh cogadh m' aghaidh fòs,
á so mo bhun do ní.
- 4 Aon ní do mhiannaich mi o Dhia,
gu minic iarram e:
A hhi a'm' chòmhnuidh feadh mo là
an tigh 's an àros Dé;
- A chum gu faicinn féin gu glan
maise le hohhab mhòir,
Gu fiosraichinn 's gu faghainn sgeul,
'na theampull mar is còir.
- 5 Oir ni e m'fholach 'n àm na h-airc'
'na phàilliu: dìon do ní
An dìomhaireachd a phàilliuin dbornh;
air carraig cuiridh mi.
- 6 Os ceann mo naimhde ta mu m' chuairt,
nis togar suas mo cbeann:
Glan lobaírt aoibhneis uime sin
d'a phàilliuin dheirear leam:
Is seinnidh mi gu togarach,
seadh, canaidh mi gu hinn,
Ceòl agus moladh àrd do Dhia
air feadh mo rè 's mo linn.
- 7 Le guth mo bheoil tràth éigheam riut,
thoir éisdeachd dhomh, a Dhé:
Le iochd dean tròcair orm, is fòir,
gu gràsmhor freagar mi.
- 8 Iarr m' aghaidh, 'nuair a thuirt thu rium,
an sin thuirt m'anam leat,
Do ghnùis, is t'aghaidh féin, a Dhé,
sin iarraidh mi gu h-ait.
- 9 Na folaich uam do ghnùis, am feirg
na dihr t'òglach féin:
'S tu chuidich leam: a Dhé mo shlàint'
na fag-sa mi 's na tréig.
- 10 'Nuair thréigas m'athair mi gu tur,
's mo mhàthair fòs faraon,
Do ni an Tighearna an sin
mo thogail suas gu caom.
- 11 Dhia, teagaisg dhomh do shlighe féin,
is treoraich mise, Dhé,
Fa chùis mo naimhde mi-runach,
air ceumaibh dìreach réidh.
- 12 Do mhu-run m'eascairde ro-gheur
na tabhair thairis mi:
Oir dh'éirich rium luchd-fianuis bhreig',
is dreun a bhrùchdas nimh.
- 13 Rachadh mo mhisneach uil' air cùl,
mur creidinn matheas Dé,
Gu faicinn sin an tìr nam heò,
ga m' fhuasgladh ann am fheum.
- 14 Fuirich gu foighidneach ri Dia,
glac thugad misneach mhòr,
Is bheir e spionnadh cridhe dhuit:
fuirich ri Dia na glòir'.

SALM XXVIII.

- A** DHIA, mo charraig, éigheam riut,
a'd' thod na hì-sa uam:
Eagal le d' thod, gur cosmhuilt mi
ri dream theid sìos do'n uaigh.
- 2 Guth m' athchuinge, tràth éigheam riut,
éisd thus' an sin, a Dhé:
'Nuair thogas mi do làmh an lāmhan suas
gu d' theampull naomha féin.
- 3 Le luchd an uile 's na h-eucorach,
na tarruing mi gu bràth:
R'an coimhearsnach a labhras sìth,
ach olc 'nan cridhe ta.
- 4 A réir an oibre, tabhair dhòibh,
a réir an rùn chum lochd:
Is dìol-sa riu droch ghlòmh an lāmhan,
amhluidh mar thoill iad ort.
- 5 Do bhrìgh nach tuig iad oibre Dhé,
no gnìomh a làmbha fòs,
Do ní e milleadh ort' is claoidh,
's cha dean an togail suas.

- 6 Air son guth m'athchuinge gu'n d'éisd,
mòr-bheannaicht' gu robh Dia.
- 7 Do chuir mo chridh' a dhòchas ann;
's e Dia mo neart 's mo sgiath.
- Tha mi a' faghail furtachd uaith',
mar sin le h-aoibhneas ait
Mo cbridh' a ta; 's le mòran binn
sior-mholam e gu pailt.
- 8 'Se Dia a's neart, 's a's treise dhòibh,
oir tha e fàid gu deas
'Na neart, 's 'na spionnadh slàinte dlùth
do'n tì a dh'ungadh leis.
- 9 Dhia, furtaich air do phobull caomh,
is heannaich t'òighreachd féin:
Dhòibh tabhair heath', is teachbd-an-tìr,
tog iad am feasd, a Dhé.

SALM XXIX.

- T**HUGAIBH, a laochraidh làidir theun,
do Thighearna nam feart,
Thugaih dh'onn Tighearna ud faraon
glòir, urram, agus neart.
- 2 A' ghloir a's cuhaidh fòs d'a ainm,
thugaih dh'onn Dia ro-theun:
Sleuchdaibh dh'onn Tighearna faraon
am mais' a naomhachd féin.
- 3 Tha guth Dhé air na h-uisgeachaibh;
is fòs ni Dia na glòir'
Ard-thairmeanach, is suidhidh e
air uisgibh làidir mòr.
- 4 Tha guth an Tighearna gu beachd
mòr-chumhachdach is treun:
Tha guth an Tighearna faraon
làn moralachd ann féin.
- 5 Brisidh an Tighearna le 'ghuth
na seudair a ta fas;
Is brisear seudair Lehanoin
le 'ghuth-san aig a chruas.
- 6 Is hheir e orra leum gu clist',
amhluidh mar ghàmhainn bò:
Sliabh Shirlain is Lehanoin,
mar huabhuill meargant' òg.
- 7 Sgoiltidh guth Dhé an dealanach;
am fàsach crathaidh e;
Seadh fàsach Chadeis mar an ceudn'
'se Dia a chrathas e.
- 9 Bheir guth Dhé fòs air aighnibh àlt'
grad-sgarachdainn r' an laigh;
Is lomaidh sud na coilte diuth',
a' rùsgadh bhàrr nan craoibh:
- Is ann a theampull naomha-san,
cuiridh gach neach an cèill
Glòir agus urram mòr ar Dia;
g' a mholadh-san d'a réir.
- 10 Tha Dia 'na chòmhnuidh air an tuil;
's 'na shuidh' am feasd 'na Rìgh.
- 11 Bheir Dia d'a phobull neart; is bheir
dhòibh beannachadh le sìth.

SALM XXX.

- D**HIA, molam thu, oir thug thu mi,
gair' m'eascair cha d'rinn dhìom.
- 2 A Dhia mo Thighearna, ghlaodh mi riut,
is dh'fhurtaich orm a'm' fheum.
- 3 Do thogadh m' anam leatsa, Dhé,
glan as an uaigh a nìos;
Is ghleidh thu mi gu tearuint' beò,
do'n t-slochd nach rachainn sìos.
- 4 Do'n Tighearna àrd gu ceòlmhor hinn
seinnibh, a naomh-shluagh féin,
Ri cuimhneach' air a naomhachd-san,
sgaoilb a chliu an cèin.
- 5 Oir 'fhearg cha mhair ach mionaid bheag,
'na dheadh ghean heatha ta:
Tràth feasgar fòs ged robh ann bròn,
thig aoibhneas leis an là.
- 6 A'm' shocair thubhairt mi mar so,
cha ghluaisear mis' am feasd:
7 Le d' thròcair thug thu air mo cbnoc
gu daingean suas gu'n sheas:
A Dhé, do cheil thu orm do ghnùis,
chuir sin gu trioblaid mi.
- 8 Dhia, riut do ghlaodh: is rinn ri Dia
mo ghearan is mo chaoidh:

- 9 Ciod i an tairbh' a'm' fhuil-sa ta
an dèigh mo chur san uaigh ?
Am molar thusa leis an ùir ?
au toir air t'fhìrinn luaidh ?
- 10 Eisd rium a nis, a Dhia nan dùl,
dean trócàir orm is gràs;
Is bi-sa, Dhé, d'fhear-cuidich leam,
'nuair tharlas dhomh bhi 'n sàs.
- 11 Mo hhròn gu dannelsadh chaochail thu,
is m'eudach saic faraon
Do sgaoil thu dhòim, is chrìoslaich mi
le h-aoibhneas air gach taobh:
- 12 Mo ghloir gu seinneadh dhuit-sa clin,
gun idir bhi 'na tosd:
A Dhia mo Thighearn, bheir mi dhuit
mòr-bhuidheachas am feasd.

SALM XXXI.

- A SAD-SA, Dhé, nì mise bun;
nàir' orm na leig am feasd:
Dean fuasgladh dhomh a' t' ionracas,
o thrioblaid is o cheist.
- 2 Do chluas a m' ionnsuidh crom a nuas,
is furtaich orm gu dìan:
A'd' charraig dhaingean hì-sa dhomh,
tigh-tearmuinn chum mo dhion.
- 3 Oir's tu a's carraig dhìleas dhomh
's mo dhaingneach làidir treun,
Is uime sin sgàth 'fainne, Dhé,
trebraich, is stiùir mo cheum.
- 4 Saor as an rib a dh'fhòlaich iad
huin mise mach, a Dhé:
Air son gur tus' an tì a m'hàin
a's neart, 's a's treòir dhómh féin.
- 5 A'd' làimh-sa m'hàin, a Dhia nan dùl,
mo spiorad tionnann suas:
A Dhia na fìrinn, is mo Thriath,
's t' dh'fhàsgail air mo chruas.
- 6 Is fuath leam iad a bheil fa'near
na breuga diomhaireach:
Ach dòchas ann an Dia nan gràs
chuir mi gu muinghineach.
- 7 A'd' thròcair hìom gu h-aoibhneach ait:
oir thug thu, Dhé, fa'near
Mo thrioblaid: 's m'anam ann an teinn
bha thusa fìosrach ait.
- 8 Cha d'rinneadh leat mo dhruideadh suas
an làimh mo nàmhaid thréin:
An àite farsuinn shocruch thu
mo chosan is mo cheum.
- 9 O tha mi, Dhé, an trioblaid mhòir,
dean trócàir orm gu cas:
Mo shùile, m'anam, is mo bholg,
le hhròn air seargadh as.
- 10 Oir chlaoidheadh m'anam as le bròn,
's mo hhlaidhna le caoidh:
Do bhrìgh mo leòch chaidh as do m' neart,
mo chnàmhan air an claidh.
- 11 Mar aobhar fanoid tha mi fòs
do m'easeairidh gu léir,
Gu h-àraidh do mo choimhearsuaich,
mar mhasladh tha mi féin:
Is do luchd m'èolais fòs a taim
a'n' aobhar geit is fuath:
Gach neach a bhi mi air an t-sraid,
a' teicheadh uam gu luath.
- 12 Mar dhuine marbh air dol á cuimhn'
mar shoitheach briste mi:
- 13 Oir chualas toilleum mòran dhaoine';
eagal gach taobh do bhi:
A'm' aghaidh 'nuair a chruinnich iad,
dheallh iad mo bheath' a sgrìos:
- 14 Ach dhìotsa, Dhé, rinn mise bun;
is tu mo Dhia, deir mis'.
- 15 Tha m'aimsirean a'd' làimh-sa, Dhé,
orm furtaich agus fòir
O làimh mo naimhdean, is o'n dream
tha leantun orm an tòir.
- 16 Do ghnàis is t'aghaidh dealraicheadh
air t'òglach dìleas féin:
Air sgàth do ghràsa carhannach,
mo shaoradh dean gu treun.
- 17 Na leig fo nàire mhaslaidh mi,
A Dhia, oir ghairm mi ort

- Ach nàire b'iodh air luchd an uile
san uaigh b'iodh iad 'nan toid.
- 18 Cuir béil nam breug, a Dhé, 'nan tàmh,
lahhras gu h-àrdanach,
'N aghaidh nam fìrean spreigeadh croakn,
gu spìdeil tarcuiseach.
- 19 Cia mend do mhaith a thaisg thu dhoibh,
d'an eagal thu faraon;
'S a rinn thu do na dh'earbas rint,
am fianuis chloinn nan daoine'!
- 20 O àilgheas dhaoine nì thu 'n dion,
fo dhìomhaireachd do ghnàis';
'S am pàillion fòs, o strì nan teang',
nì didean dhoibh 'nan chis.
- 21 Dia gu ma beannaichte gu bràth;
oir dh'fhoillsich e dhomh féin
A chaoimhneas càirdeil iongantach,
an caithir làidir thréin.
- 22 Thuirt mi a'm' dheifir, Scaith' tha mi
o bheachd do shùl a mach:
Ach chual thu 'nuair a ghlaodh mi riut,
guth m'asluich ghearanaich.
- 23 Gràdhachibh Dia, O naoimh, air fad:
oir Dia do'n treibhdhireach
Do nì sàr-dhion, is dìol gu pailt
do'n ualbhrach àilgheasach.
- 24 Sibhse a chuir an Dia nan gràs,
bhur dòchas mar is còir,
Bibh misneachail, is cuiridh e
neart ann bhur cridh' is treibir.

SALM XXXII.

- 'S BEANNAICHT' an duine sin a fhuair
'na pheacadh maitheanas;
A fhuair le trócàir folach air
a chiont' is eusantas.
- 2 'S beannaicht' an tì nach agair Dia
'na sheachranaibh nì's mò';
Is ann a spiorad fòs nach 'leil
claoon-chealgair reachd no gò.
- 3 A' fantuinn dhomh gu fad a'm' thàmh,
luidh air mo chnàmhaibh aois,
Is b'amluidh sin gach là mo chor,
le dol do m' bhùireadh suas.
- 4 Oir ormsa bha do làmh gu trom,
air feadh gach oididh' is là:
Mo bhrìgh gu tart an t-samhraidh theith
air a' trachadh a ta.
- 5 Làn-fhoillsich mi mo pheacadh dhuit,
nìor cheil mi m'aingioheachd:
Aidmheil (thuirt mi) do Dhia nì uis',
is mhaith thu cron mo leòch.
- 6 So fath mu'm guidhe riut gach naomh,
san àm am faighear thu:
Gu dearbhan an tui nan uisgean mòr',
cha ruig iad air gu dlùth.
- 7 Tha thu a' t'ionad foluich dhomh,
nì coimhead orm o theinn;
Is nìhear leat mo chuairteachadh
le h-bràn saorsa hinn.
- 8 Dhuit teagaisgidh is nochdaidh mi
am bealach is an t-ùil,
San tìgeadh dhuitse triall gu ceart;
sin seòlam dhuit le m'shùil.
- 9 Na bi mar mhuilleid, no mar each,
na h-ainmhidhean gun chèill;
Ri'n cuirear, chum nach tig iad ort,
teann-sparrag sréin 'nam beul.
- 10 Is lionmhor bròn aig luchd an uile:
ach neach d'am barrant Dia,
Tha 'hròcair dol m'a thimchioll-san
g'a dhionadh mar nì sgiath.
- 11 A dhaoine treibhdhireach, an Dia
b'ibh aoibhneach agus ait:
Is deanaibh gardachas, gach neach
'g am bheil an cridhe ceart.

SALM XXXIII.

- O SIBHSE ta 'nur fìreanaibh,
b'iodh aiteas oirbhan an Dia:
Oir 's cuinheadh do na daoineibh còir,
bhi tabhairt cliu do'n Triath.
- 2 Air clàrsaich thugaibh moladh dha;
is air an t-saltair ghriinn,
Air inneal-cùil nan teuda deich
seinnibh do Dhia gu binn.

- 5 Is cènaibh dha-san òran nuadh :
àrd-sheinnibh fonn gun stad.
- 4 Oir 's ceart a reachd : am fàrrinn fòs
ta 'oibre deant' air fad.
- 5 Is ionmhuinn leis-san còir is ceart :
lion maitheas Dé gach tìr.
- 6 Rinn focal Dé na nèimh', 's an sluagh
rinn guth a bheoll gu léir.
- 7 Mar thòrr a ta e carnadh suas,
uise na fàirge mòir' :
A' còimhead fòs na doimhne suas,
gu dìleas an tigh-stoir.
- 8 Nis roimh an Tighearna gu mòr
biodh eagal air gach tìr ;
Is air na dh'aiticheas an saogh'!
biodh fiamh roimh 'ainm gu léir.
- 9 Oir labhair Dia, is rinneadh e
dh'òrduich, is chuir air chois :
10 Chuir comhairle nan sluagh air cùl
is inneachd dhaoine' air ais.
- 11 Tha comhairle Iehobhah mhòir-
gu seasnach buan an feasd ;
Smuaintean a chridhe mar an ceudn'
o linn gu linn gun cheisd.
- 12 'S beannaicht' an cinneach sin 'g am bheil,
mar Dhia Iehobhah treun :
'S am pobull fòs a règhnach e
mar oighreachd bliuan dha féin.
- 13 Air chloinn nan daoine seallaidh Dia,
o nèamh nan speur a nuas.
- 14 'S léir dha gach neach sa' chruinne-ché
o 'ionad-còmhnuidh shuas.
- 15 An cridh' air aon dòigh chumadh leis ;
thug e fà'near an gluimh.
- 16 Cha tèarunn rìgh le meud a sbluaigh ;
do'n laoch, neart mòr cha dìon.
- 17 An t-each an còmhag 's dìonhain e,
a dheanamh furtachd leis ;
No dheanamh fuasglaidh ri am féim,
ge mòr a lùth 's a theis'.
- 18 Feuch, sùilean Dé gu furachar
air a luchd eagail féin,
Is air an dream sin as a ghràs,
mì muinghinn làidir treun :
- 19 An anam chum a dhìon o'n bhàs,
's o'n ghort an cumail beò.
- 20 Ar n-anam feithidh e air Dia ;
ar neart, 's ar sgiath gach ló.
- 21 Oir ann-san nì ar cridh' a stigh
ùr-ghairdeachas gun dìth :
Is cuiridh sinn 'na ainm ro-naomh
ar muinghinn fòs a chaidh.
- 22 Do thròcair gu robh oirnn gu caomh,
a Tighearna, gach là,
A reir mar chuir sinn annad féin
ar dòchas treun a ghnàth.

SALM XXXIV.

- I EHOBAH beannaicheam gu h-àrd,
gach aimsir is gach tràth :
A chliu 's a mholadh ann am bheil
gu h-ìomraiteach a ghnàth.
- 2 Is anns an Tighearna ro-threun
nì m'anam uail is glòir :
Na daoine sèimh', tràth chluinneas sud,
nì gairdeachas gu mòr.
- 3 Ardaichibh leamsa Dia nam fear,
molamaid 'ainm le chèill' :
- 4 Dh'ìarr mise Dia, chual' e, is hhuin
nì as gach gabhadh geur.
- 5 Dh'amhairc iad air, is dhealraich iad' ;
gun nàire air an gruaidh.
- 6 Do ghlaodh am bochd, is dh'éisd ris Dia,
is dh'fhuasgail as gach truagh.
- 7 Tha aingeal Dé a' campachadh
nu'n dream d'an eagail e,
G'am fuasgladh is g'an teasairginn
o'n trioblaidibh gu léir.
- 8 O blaisibh agus faicibh so,
gur maith, 's gur milis Dia :
Am fear sin 's beannaicht' e gu beachd
a dh' earbas as an Triath.
- 9 Fìor eagail Dé, biodh oirbh, a naoimh ;
oir ureasbhuidh no dìth

- Cha bhi air a luchd eagail-san,
fìor-chràbhadh dha a nì.
- 10 Bìdh easbhuidh air na leòmhnaibh òg,
is ocras orr' air leth ;
Ach air an dream a dh'ìarras Dia
cha cheilear aon nì maith.
- 11 Thigibh a chlànn, is éisdibh rium :
dhuibh nochdam eagail Dé.
- 12 Cò'm fear le'm b'ail bhi fada beò,
chum maith gu faicadh e ?
- 13 Còimhid do theangadh féin o'n oile,
's o labhairt ceilg' do bheul.
- 14 Seachainn an t-oile, is dean am maith ;
iarr slochaint, 's lean gu geur.
- 15 Tha sùile Dhé air fìreanaibh,
's a chluas ri'n glaoch gu fìor,
- 16 Tha gròis Dhé 'n aghaidh daoib', a chum
an cuimhne sgrìos a tìr.
- 17 Do ghlaodh na fìreana ri Dia,
is dh'éisd e ri'u gu grad ;
Thug furtachd agus fuasgladh dhoibh
o'n àmhgharaibh air fad.
- 18 Do'n mhuinntir 'g am bheil cridhe brùit'
is dlùth dhoibh Dia gun cheisd :
Nì esan furtachd fòs do'n dream
'g am bheil an spiorad brist'.
- 19 Is lionmhor trioblaid agus teinn
thig air an fhìrean còir ;
Ach asd' air fad nì Dia nan gràs
a theasairginn fadheòidh.
- 20 A chnàmhan uile còimhidh e :
cha'n 'eil a ha-on duibh brist'.
- 21 Ach marbhaidh oile an duine daoi ;
is claoidhear e gun cheisd :
Is luchd an f'armaid, a bheir fuath
do dhaoineibh còir is ceart,
- Mòr-chiontach fagar iad 'nan lochd,
di-inhilltear iad gu beachd.
- 22 Anam a sheirbhisich gu léir
saor-fhuasglaidh Dia gach am,
Cha mhillleair idir neach dhiubh sud
chuireas an dòchas ann.

SALM XXXV.

- TAGAIR, a Dhia, ri luchd mo strì ;
cuir cath ri luchd mo chat'.
- 2 Glac féin do thargaid, is do sgiath,
éirich, dean còmhadh maith.
- 3 Glac fòs do shìleag, 's air luchd mo thìr
am bealach druid gu teann :
Ri m'anam abair féin mar so,
is mì do chòmhachadh ann.
- 4 Trom-nàir' is masladh gu robh dhoibh
ta 'g iarruidh m'anam' bhoichd :
Is pilleadh iad le h-amhlachd geur,
ta smuaineachadh dhomh lochd.
- 5 Biodh iad mar mhuil'nein dol le guoth :
'nan tòr biodh aingeal Dé :
- 6 Biodh aingeal Dé 'g an ruith gu teann,
dorch s'eamhuinn biodh an ceun.
- 7 Oir lontan leag iad air mo shon,
gun aobhar no cion-fath ;
Is slochd gun aobhar chladhaich iad,
chum m'anam chur an sàs.
- 8 Gun fhios da, thigeadh doruinn air,
is glacar e sun lion
A dh'f'holuich e : san dòruinn cheudn'
tuiteadh e féin gu dian.
- 9 Nì m'anam gairdeachas an Dia ;
's 'na fhurtachd sòlas mòr.
- 10 Is their mo chnàmhan uile, Dhé,
cò choimeas riut' is còir ?
Nì teasairginn do'n duine bhoichd
o'n neach ta air ro-threun,
An t-ainnis is am bochd o'n tì
le'm b'ail a chlaoidh gu léir.
- 11 Luchd fìanuis bhéirge dh'éirich rium,
is chuir iad as mo leth
Na nithe sin gu h-eucorach,
nach b' fhiosrach mì am bith.
- 12 Oile dhiol iad rium an éiric maith,
chum m'anam chur fo leòn.
- 13 Ach mis', air bhi dhoibh sud gu tinn,
ghabh uniam culaidh bhòin :

- M'anam le trasgadh dh'àmhlach mi,
's phill m'urnugh ann am chrìos.
- 14 Mar charaid, bràth'r, no fear-caoidh màth'r
gu brònach crom ghluais mis'.
- 15 Ach chruinnich iad, is bha iad ait,
air bhi dhomh ann an teinn:
Gun fhios domh, chruinnich cuideachd thair,
gun tàmh mo reubadh rinn.
- 16 Le cealgairibh gu fanoideach,
'nam féisd rinn spòrs dhìom,
Do chasadh leo am fiacra rium,
ri magadh orm gu dian.
- 17 Cia fhad is léir dhuit so, a Dhé?
saor m'anam féin gu cas
O'm milleadh-san: mo sheircein fòs,
tèarunn o leòmhnaibh bras.
- 18 Làn-bhuidheachas do bheir mi dhuit
am measg an tionail mhòir;
'S am measg an t-sluaigh tràth 's lìonmhor iad,
àrd-mholam thu le glòir.
- 19 Mo naimhde ta gun aobhar rium,
na hiodh ac' aoibhneas dhìom:
Do'n dream a thug dhomh fuath gun chùis
a'm' chaogadh sùl na biom.
- 20 Oir ann an slth cha'n 'eil an tlachd,
ach ann am beartaibh clao, n,
An aghaidh dhaoine ciùin na tìr',
'g am buaireadh air gach taobh.
- 21 Gu farsuinn dh'fhosgail iad am beul,
is rium, ha, ha, a deir,
Chunnaic a nis ar sùil an ni
bu mhiannach leinn teachd air.
- 22 Ach chunnaic thusa so, a Dhia,
na bi a'd' thosd a'm' f'heum:
A Thighearn is a Dhia nam feart,
na fuirich uam an cèin.
- 23 Tog ort, is mosgail chum mo cheirt,
fa m' chùis, mo Dhia, 's mo Rìgh.
- 24 Dhia, dean a rèir do cheartaibh breth,
is dhoibh na b'aoibhneas mi.
- 25 'Nan crìdh' na h-abradh iad riu féin,
ha, ha, 'se sud ar miann:
Is fòs na h-abradh iad a chaoidh,
do shluig sinn e gu dian.
- 26 Biodh orra nàir, is tairngear iad
gu h-amhluidh mòr le chéil',
A ta gu suilbhir is gu h-aif,
ri faicinn m'àmhbhair gheir:
- Is biodh iad air an sgeudachadh
le masladh is le nàir,
Tha 'g iarraidh urraim mhòir dhoibh féin
a'm' aghaidh-sa gun tàmh.
- 27 Biodh aoibhneas orra, 's gaird e chas,
a sheasas dhomh mo chòir:
Is abradh iad, Mòr-chliu gu robh
do Thighearna na glòir.
- Tha gabhail tlachd do shonas buan
a sheirbhìsich a ghnàth.
- 28 Is air do cheartas thig mo bheul,
is air do chliu gach là.

SALM XXXVI.

- D**EIR eusaontas an droch-dhuin' so,
'na chridhe stigh 'sna chliabh
Fìor-eagal Dé am beachd a shùl
cha 'n 'eil, is cha robh riannh.
- 2 Oir nì e brionnall baoth ris féin
a rèir mar thaitneas ris;
A chionta gus am foillsichear
mar aobhar fuath d'a sgrìos.
- 3 Fìor-chluaintearachd is eucoir mhòr,
sud cainnt a bheoil gu tric:
Is sguir e fòs o dheanamh maith,
is leig e dheth bhì g'ic.
- 4 Airmheas 'na leabaidh tha e dealbh';
san t-slighe nach 'eil ceart
Shuidhich is shocruidh se e féin;
cha'n oillteil leis droch bheart.
- 5 Do thròcair tha sna nàmhaidh shuas,
a Thighearn is a Dhé:
Gu ruig na neoil, is àird nan speur,
làn ruigidh t'fhirinn réidh.
- 6 Do cheartas mar na sléibhtibh àrd,
do bhreth mar dhoimhneachd mhòir.

Air duitne 's ainmhidh nì thu, Dhé,
deadh-choimhead agus fòir.

- 7 O Dhia! is prìseil urramach
do chaoimhneas gràdhach caoin;
Fo sgàil dò sgéith nì uime sin,
làn dòchas clann nan daoin'.
- 8 Le saill do theach is t'aròis phailt
sàsuichear iad gu mòr;
A t'amhainn làn do shòlasaibh
deoch bheir thu dhoibh fà h-òl.
- 9 Tobar na beatha tha gu dearbha
agadsa, Dhia nan dùl;
Is ann ad sholus dealrach glan,
chi sinne solus iùil.
- 10 Mairleadh do chaoimhneas gràidh, a Dhé,
do'n dream c'buir eòlas ort:
Is buanaich t'fhìreantachd faraon
do luchd a chridhe cheirt.
- 11 Na leig do chois an àrdain bhuirb
a'm' aghaidh teachd, a Dhé:
Is làmh an droch dhuin' aingidh fòs
gu bràth na gluaiseadh mi.
- 12 An sin do thuit luchd-deanamh uile
is leagadh iad a sìos,
Ag diobhail luith cha'n fheudar leo,
gu'n éirich iad a nìos.

SALM XXXVII.

- L**ASAN no campar na biodh ort
mu dhaoibh aingidh oic,
Is na gabh farmad ris an dream
a bhios a' deanamh lochd.
- 2 Oir amhluidh mar is dual do'n fheur,
glan-sgathar iad gu grad,
Is amhluidh mar na lusa maoth,
crìon-seargaidh iad air fad.
- 3 Cuir-sa do dhòchas ann an Dia,
is deanar maithreas leat,
Mar sin sìor-mhealaidd tu an tìr,
's beathaichear thu gu beachd.
- 4 Gabh tlachd an Dia, is bheir e dhuit
làn rùn do chridh' a chaoidh.
- 5 Do shlighe tabhair suas do Dhia;
earb ris, is bheir gu crìch.
- 6 Foillsichidh e do chòir 's do cheart,
mar sholus glan nan tràth;
Is amhluidh mar àrd-mheadhon-là
do bhreitheanas a ghnàth.
- 7 Gu sàmhach fan ri Dia nan dùl,
is feith le foighid leis;
An ti 'na shligh' a shoirbhicheas,
na gabh-sa farmad ris:
- Fa chùis an f'hir a bheir gu buil
a dhroch-bheart innleachdach.
- 8 Leig corruich dhìot, trèig fearg: chum uile
na bi-sa frìonasach.
- 9 Oir droch-dhaoin' is luchd-deanamh uile
glan-sgathar as gu léir:
Ach lion 'g am bheil an shùl ri Dia,
buan-mhealaidd iad an tìr.
- 10 Oir feith gu foil rè tamuill bhig,
's an droch dhuin' cha bhi ann:
'S 'na ionad fòs, ma bheir fa'near,
cha bhi e féin no 'chlann.
- 11 Ach mealaidd daoine sèimh am fead
am fearann is an tìr:
Làn-shòlas bheirar dhoibh faraon,
an saobhreachd na sìth'.
- 12 Tha 'n t-aingidh cumadh lochd do'n t-saol,
's a' casadh 'fhiacra ris.
- 13 Nì Dia air fanoid: oir dha 's léir
gur dlùth air là a sgrìos.
- 14 Na h-aingidh tharruing iad an lann
is chuir am bogh' air ghleus,
A leagadh airm-heartach is bhochd,
's a mharbhadh luchd deadh bheus.
- 15 An claidheamh théid 'nan crìdhe féin,
théid air am bogha claoidh.
- 16 'S fearr beagan aig an duine chòir,
na saobhbheas mòr nan daoi.
- 17 Oir gairdeana luchd aingidheachd
mùn-bhrisear air an cruas;
Ach daoine còir is fìrinnach
nì Dia an cumail suas.

- 18 Air aimsiribh nam fireanach
is fiosrach Dia gun cheisd:
An oighreachd is an seilbh faraon,
d'hoibh 's maireannach am feasd.
- 19 Cha chuirear iad gu rudhaidh gruaidh,
's an aimsir ghàbhaidh olc:
Oir gheibh iad uil' an sàth gu leòr
an làithibh gainne 's gort'.
- 20 Ach sgriosar droch dhaoiln, naimhde Dhé,
hidh iad mar shailh nan uan:
Làn-mhilleir iad, is théid dhoibh as,
mar dheataich nach 'eil buan.
- 21 An iasachd gabhaidh daoine daoi,
's cha dìol a ris air ais;
Am firean tha e tròcaireach,
is nithear pailteas leis.
- 22 Oir mheud 's a fhuair a bheannachd-san,
sior-mhealaidd iad an tìr:
'S an dream a gheibh a mhallachd-san,
lom-sgriosar iad gu léir.
- 23 Tha Dia a' stiùireadh cheumanna
an duine naomha chòir:
Is tha e gabhail tlachd is toil'
d'a shlighe-san gu mòr.
- 24 Nan tarladh dha gu'n tuiteadh e,
cha tilgear tur e sìos;
Oir tha an Tighearna le 'làimh
'g a chumail suas a ris.
- 25 Bha mise òg, 's a nis an aois;
is riamh cha'n fhaca mi
'Na dhiobhrachan an duine còir,
no 'shliochd ag iarraidh bìdh.
- 26 Sior-thruacant' e, is coingheallach:
beannaicht' a shliochd a ta.
- 27 Seachainn an t-olc, is dean am maith,
is còmhnuidh gabh gu bràth.
- 28 Is toigh le Dia ceart bhreitheanas,
a naomh cha tréig e chaoidh;
Sior-choimhdear iad: ach sgathar sìos
droch shliochd nan daoine daoi.
- 29 Mealaidh na fireana an tìr;
buan-chòmhnuidh mi iad inn't.
- 30 Thig heul an t-saol air glòcas glan,
a theang' air rogha cainnt.
- 31 Tha lagh a Dhé, 'na chridh' a stigh:
cha sleamhnuidh uatha a cheum.
- 32 Tha'n droch dhuin' feitheamh air an t-saol,
g'a mharbhadh is g'a theum.
- 33 Cha 'n fhàg an Tighearna e 'na làimh,
a dheanamh air droch-bheirt;
Cha'n fhàgar ris e ann am hinn,
tràth chuirear e fo cheirt.
- 34 Feith thus' air Dia, 's na shlighe' gluais
is àrduichear leis thu,
An tìr gu meal thu; is droch dhaoiln'
'g am milleadh chì do shùil.
- 35 An duine malluicht' chunnaic mi
an neart, 's an inbhe mhòir,
'Ga sgaoileadh féin a mach mar chraoibh,
a' fàs gu dosrach ùr;
- 36 Ach chaidh e seach, is feuch cha robh;
dh'farr, is cha d'fhuaras e.
- 37 Amhairc is feuch gur sìth is crìoch
d'òr duine dhìreach réidh.
- 38 Ach sgriosar luchd an eusaontais,
is théid dhoibh as faraon:
Di-mhilltear agus sgathar sìos
crìoch dheireannach droch dhaoiln'.
- 39 Ach furtachd fhior nam firean fòs,
thig sin o Dhia nan dùl:
Is anns an aimsir thrìoblaidich,
's e 's harrant air an cùl.
- 40 Thig treis is furtachd thu' o Dhia,
le fuasgladh an deadh àm;
Saorar iad leis o dhaoilnh olc,
oir chuir iad muinghinn ann.

SALM XXXVIII.

- A THIGHEARN, ann ad chorroich mhòir
na cronuich mi gu garg;
Na dean mo smachdachadh gu geur,
an uair a lasas t'fhearg.
- 2 Oir tha do shaighde guineach geur
sàith' annam féin gu teann.

Is orm a ta do làmh gu trom,
'g am chumail sìos gach àm.

- 3 Cha'n 'eil maoln fhallaineachd a'm' fheòil,
air son do chorroich ghéir;
A'm' chuamhaibh cha'n 'eil tàmh no fois,
air son mo pheacaidh féin.
- 4 Oir chaidh mo pheacaidh os mo cheann;
taid orm 'nan eire thruim.
- 5 Mo chreuchda ta ro-lobhta, 's breun
mo ghòruich 's coireach rium.
- 6 Tha mi gu cràiteach, euslan, crom,
a' triall gach là le bròn.
- 7 Mo leasraidh làn do ghalar hreun':
gun fhallaineachd a'm' fheòil.
- 8 Taim lag is hrùit: a' b'bidheadh fòs
trid an-shocair mo chridh'.
- 9 A'd' làth'r, a Dhé, tha m'uile mhianna
cha'n fholuicht' ort mo chaoidh.
- 10 Mo chridhe ta sìor-phloscartaich,
mo neart chaidh uam gu glan;
An taic ri fradharc geur mo shùil,
sin agam fòs cha d'fhan.
- 11 Tha luchd mo ghaoil 's mo chairde caomh
a' seasamh fad o m' bheum,
Mo choimhearsnaich is luchd mo phàirt,
a' teicheadh uam an céin.
- 12 Sealg orm a ta luchd larraidh m'anm
luchd iarraidh m'uile a ghnàth,
A' lahhairt nithe aimhleasach,
's a' smuaineach' ceilg' gach là.
- 13 Ach mise fòs mar bhodhar mi,
nach cluinneadh guth no sgeul
Is cosmhail mi ri duine balbh,
gun chomas fosglaidh béil.
- 14 Mar sin mar dhuine mi nach cluin,
gun achmhasan 'na bheul.
- 15 Oir dh' earh mi riut, a Dhé, mo Thriath:
Dhia, freagraidh tus' a'm' fheum.
- 16 Thubhairt mi, dhom nach maoidheadh iad,
thoir freagradh dhomh gu cas;
Is chum nach dean iad gairdeachas
'n tràth shleamhnucias mo chas.
- 17 Oir 's dlùth chum claoaidh mi, 's mo hhrò,
a'm' fhianuis tha do ghnàth.
- 18 Mo lochd do innseam, is fo m' chiont',
mòr aimheal orm-sa ta.
- 19 Ach mheud 's a ta 'nan naimhde dhomh,
's ro' hheothail iad 's is treun,
Is luchd mo mhi-rùn eucorach,
taid Ìonmhor mar an ceudn'.
- 20 'S iad sin a's naimhde dhomh gu fìor,
luchd-dìolaidd maith le h-olc;
Air son gu bheil mi leantuinn air
an nì tba maith gun lochd.
- 21 Na tréig mi, Thighearna: mo Dhia,
na bi-sa uam an céin.
- 22 Dhia, greas a chum mo chuideachaidh,
oir 's tu mo shlàinte féin.

SALM XXXIX.

- THUBHAIRT mi, hheir mi féin fa'near
mo shlighe: 's nì mi fòs
Mo theangadh choimhead mar le sréin,
air bith d'òr daoi a'm' chòir.
- 2 Dh'fhan mi gu tosdach halbh a'm' thàmh,
o'n nì sin féin hu mhaith;
Mhosgail mo thrìoblaid is mo hhròn
annam gu mòr a stigh.
- 3 Air bhith dhomh smuaineachadh mar so,
do ghabh mo chridhe teas
Is las an teine: oir mar so
le m' theangaidh lahhair mis'.
- 4 Thoir fios, a Dhé, dhomh air mo chrich,
tomhas mo là ciod e.
Gu faighinn eòlas agus fios
cia h-anmhuinn gearr mo rè.
- 5 Feuch rinn thu mar leud hois' mo làith,
mar neo-ni agad m'aois:
Gach neach d'a fheahhas, e gu fìor,
's nì dìomhanach gun phrìs.
- 6 An samhladh bréig' a' siuhhal fòs
gach duine ta gu dearbh:
Gun suaimhneas fòs 'gam buaireadh féin,
an dìomhanas gun tairbh'.

- A' torradh nìme, 's cur ri cheit
mòr bheartais air gach dòigh,
Gun fhios co'n t-òighre chruinnicheas,
no mhealas iad fadheòidh.
- 7 Cìod nìs ri'm feitheam fèin, a Dhé?
mo dhòchas dhìot do nì'm'.
- 8 Saor mi o m'uile lochd; 's na dean
ball-maslaidh an-daoin' dhìom.
- 9 Dh'fhan mi a'm' thòsd, gun fhosgladh béil,
oir leatsa rinnadh e.
- 10 Tog dhìom do bhuille, Dhé; le beum
do làimhe chlaoidheadh nì.
- 11 Tràth chronuichear leat neach m'a lochd,
mar chnuimh theid as d'a shluadh;
Gu deimhin fèin 's fòr-dhiomhanas
gach duin' air bith do'n t-sluagh.
- 12 Dhia, èisd ri m'urnuigh is ri m' ghlaodh:
ri m' dheòir a'd' thòsd na bi;
Oir 's coigreach agad, is fear-cusairt,
mar m'athrìbh uile mi.
- 13 Dhia, coigil agus caomhain mi,
gu faighio neart ri m' bheò
Mu'o siubhail mi, a' dol do'n eug,
's nach bi mi ann nì's mò.

SALM XL.

DH'FHEITH mi le foighid mhaith ri Dia,
chrom thugam, dh'èisd nìo ghuth:

- 2 Is thug se á slochd uamhuon mi,
á clàbar criadha tiugh:
Air carraig chòmhnaird chuir mo choa
mo cheuman shocrùich e.
- 3 Is òran nuadh chuir e a'm' bheul,
gu b'e sud moladh Dhé:
Chì mòran e, 's fò eagal bi'd
is earbaidh iad á Dia.
- 4 'S beannaicht' an duine sin gu dearbh
nì dòchas as an Triath,
Is nach gabh tlachd no toil air bith
do luchd an àrdain mhòir,
No fòs do'n dream a théid a thaobh
gu ceilg, le saobhadh glèid.
- 5 Is lòn-mhor t'òihre iongantach,
a Thighearn is a Dhé,
'S do smuaintean oirn: cha'n àirmhear iad
an ordugh dhuit gu rèidh:
Na'n cuirinn iad an céill gu mìn,
no fòs na'n innsinn iad,
An àireamh rachadh thar mo neart,
aig lòn-mhoireachd is meud.
- 6 Ofrail no lobairt leat cha mhiann,
dh'fhosgail thu fèin mo chluas:
Lochd-lobairt agus lobairt-loisgt'
cha d'farr thu dhuit chur suas.
- 7 An sin do labhair mise, feuch,
a nis a ta mi teachd:
An ròl' an leabhair ormsa fòs
sud sgriobhta tha gu beachd.
- 8 'Se sud mo thlachd 's mo mhiann, a Dhé,
do thoil gu deantsadh leam:
Do reachd gu dearbh a ta gu buan
a'm' chridhe stigh, 's a'm' chom.
- 9 Air t'fhreantachd sa' choinneimh mhòir,
a Dhé, rinn mise sgeul:
Oir feuch, a Dhé, oir 's aithne dhuit,
nìor chaisg mi fèin mo bheul.
- 10 A'm' chridhe t'fhreantachd nìor cheil;
ach t'fhirino chuir mi'n céill;
Do shlàint, 's do chaoimhneas gràdhach caomh
o'n t-sluagh nìor cheil mi féio.
- 11 Do thròcair chazom na cum-sa uam,
a Thighearna gu bràth;
Do chaoimhneas gràdhach, t'fhirinn fòs
gleidheadh iad mi a ghnàth.
- 12 Oir is do-àireamh iad na h-uile
ta 'g iadhadh orin mu'n cuairt;
Do ghilac mo pheacaidh mi co teann
's nach feud mi sealltainn suas:
O's lòn-mhor' iad na folt mo chinn,
is thréig mo chridhe nà.
- 13 Dhia, gu ma toil leat furtachd orm,
grad-chuidich leam, a Dhé.
- 14 Bìodh nàir' is amhluchd dhoibh faraon,
do m'anam dh'iaras claoibh:

- Ruaig orr' air ais, is rudhadh g'uaidh',
le 'm b'àill mò chur gu dìth.
- 15 Guo àird, gun àiteach' gu robh iad,
mar thuarsad d'an nàir',
A thubhairt rium gu fanoideach,
aha, aha, le gair.
- 16 Aoibhneas is aidhear do gach neach,
ga d'iarraidh fèin a ta:
Is abradh iad le'n toigh do shlàit',
Dia gu ma mòr a ghnàth.
- 17 Ach mis' ged tha mi ainnis hochd,
smuainichidh orm an Triath:
M'fhear cabhair thu 's mo shlànuighear,
moille na dean, a Dhia.

SALM XLI.

- 'S BEANNAICHT' am fear a bheir gu glé
fa'near an duioe lochd:
An uair a thrioblaid is a tbeion,
bheir Dia e saor o'o oic.
- 2 Nì Dia a dhion, 's a chumail beò,
is beannaicht' e saor tìr:
Gu toil a naimhde mì-runach
na tathair e gu slor.
- 3 Air leabhadh 'thinneis iarganaich
bheir Dia dha neart is treòir:
A leabhadh oì thu dha air fad
ri h-àm a thinneis mhòir.
- 4 Thubhairt mi, dean-sa tròcair orm,
a Thighearn is a Dhé;
Is leighis m'anam euslan bochd,
oir t'aghaidh pheacaich mi.
- 5 Tha'n dream sìo a's fìor-oaimhde dhomh
a' labhairt orm le beum:
O c'uin a sgriosar ainm-san as,
's a théid e sìos do'n eng?
- 6 Ma thig e m'amharc, labbraidh e
caioot dhìomhanach le 'bheul:
Ta 'chridh' a' torradh oimh a stigh,
's a moigh a' deanadh sgeùil.
- 7 Slor-chogarsaich ao cluais a' cheùil',
luchd m' fhuath a ta air fad:
A' smuaineachadh 's a' cumadh lochd
a'm' aghaidh fèin guo stad.
- 8 Droch thinneas (deir iad) tha gu dìth
a' leantainn ris r' a bheò;
Air bhith dha nìs 'na luidh' gu tinn,
chan éirich e ois' mò.
- 9 Am fear hu charaid dilleas domh,
ri'o earbainn gach nì b'àill,
'S a dh'ith do m'aran air mo bhòrd,
a'm' aghaidh thog e 'shàil.
- 10 Ach thusa, Dhé, deat tròcair orm,
is tog mi ris an àird,
A chum gu tugainn luigheachd dhoibh,
is comain cheart gun dàil.
- 11 Tre so is fìosrach mi gu beachd
gur iomhuinn leatsa mi:
Air son nach d'thug mo naimhde buaidh,
's oach d'rinneadh leo mo cliaaidh.
- 12 Ach mise, aon am ionracas,
's tu sheasas mi a ghnàth:
Am fianuis fòs do ghòise, Dhé,
ga m' shocruchadh gu bràth.
- 13 Jehobhah Dia chloioo Israeil,
heannaicht' gu robh e féio,
O aois gu h-aois gu suthaio sìor,
Ameo, agus Amen.

SALM XLII.

- MAR thogras gadh na sruthan uisg'
le bùreadh àrd gu geur,
Mar sin tha m'anam pioscartaich,
ag éigheach riutsa, Dhé.
- 2 Tha tart air m'anam 'o geall air Dia,
'n geall air ao Dia ta beò:
O c'uin a thig 's a nochdar mi
am fianuis Dhia o' glòir'?
- 3 Gach là is oidhch is iad mo dheòir
a's cuilhrion dhomh 's a's biadh:
An uair a deir iad rium a ghnàth,
c'ait bheil a nis do Dhia?
- 4 Tha m'anam air a dhòrtadh mach,
' cuimhneachadh gach nì;

Oir chaidh mi leis a' chuideachd mhòir,
dol leo gu teampull Dé;

Seadh chaidh mi leo le gairdeachas,
is moladh fòs le chéir,
Seadh leis a' chuideachd sin a bha
a' coimhead làithe féill'.

O m'anam! c'uim' a leagadh thu
le dìobhail misnich sìos?
Is c'uim' am bheil thu'n taobh stigh dhlom
fo thrioblaid is fo sgios?

Cuir dòchas daingean ann an Dia,
oir fathast molam e,
Air son na furtachd is na slàint'
thig dhomh o 'eudan reidh.

6 Thuit m'anam annam sìos, a Dhé,
ghrad-chuimhnich mi 'n sin ort;
O thalamh Iordain, Hermon àird,
o Mhàtsar fòs nan cnoic.

7 Le fuaim do shruthan uisge fén,
ta doimhn' air dhòimhne gairm;
Do stuaidhean, is do thonnan àrd'
dol tharum tha le toirm.

8 Orduichidh Dia d'a ghràsaibh dhomh,
a chaoimheas anns an lò;
San oidhche ni mi guidhe 's ceòl
ri Dia a chum mi beo.

9 Mo charraig, c'uim' a thréig thu mi?
ri Dia a deir mi féin:
Is c'uim' am bheil mi triall fo bhròn,
bhrìgh fòirneirt m'eascair thréin?

10 Mar lann a'm' chnàmhaibh, m'eascairde
toirt toibheim dhomh a ta:
Tràth their iad rium gu fanoideach,
c'aith bheil do Dhia? gach là.

11 O m'anam, c'uim' a leagadh thu,
le dìobhail misnich sìos?
Is c'uim' am bheil thu'n taobh stigh dhìom
fo aimheal is fo sgios?
Cuir dòchas daingean ann an Dia;
oir molam e a ghnàth,
O 's e a's slàinte do mo ghnùis,
is e mo Dhia gu bràth.

SALM XLIII.

C'UM cothrom rium, is tagair féin
mo chùis, o'n fhuineach olc,
O'n eucorach, 's o fhear na ceilg',
Dhé, saor-sa mi o'n lochd.

2 C'ar son a thilg thu mise uait?
's gur tu mo Dhia 's mo thrèoir;
C'ar son bhrìgh fòirneirt m'eascairde,
an siubhlam féin fo bhròn?

3 Dhia, t'fhrinn is do sholas glan,
leig thugam iad a mach:
Ga m' sheòladh chum do thulaich naoimh
's mo thabhairt chum do theach.

4 'N sin racham dh'ionnsuidh altair Dhé,
an Dé sin m'aoibhneis mhòir;
Air clarsaich bhinn do mhoim thu,
O Dhia, mo Dhia na glòir'.

5 O m'anam, c'uim' a leagadh thu,
le dìobhail misnich sìos?
Is c'uim' am bheil thu'n taobh stigh dhlom
fo aimheal is fo sgios?
Cuir dòchas daingean ann an Dia;
oir molam e a ghnàth,
O 's e a's slàinte do mo ghnùis,
is e mo Dhia gu bràth.

SALM XLIV.

L'E'R cluasaibh chuala sinn, a Dhé,
ar sinnsir chuir an cèill
Na gnìomhara a rinneadh leat,
'nan aimsir, iad o chein.

2 Le d' làimh mar thilg thu mach na slòigh,
is iadsan chuir 'nan àit:
Mar rinn thu air na cinich claidh,
ach dhoibhsan thug au sàth.

3 Oir seallb san tìr cha d' fhuairleadh leo
le'n claidheamh no le'n loinn,
Ni mò a rinn an gairdean féin
an teasairginn 'nan teinn:
Ach do làmh dheas thug dhoibh a' lhuaidh,
do ghairdean neartmhor treun,

Is solus glan do ghnùis, a chionn
gu'n d' thug thu dhoibhsan speis.

4 Oir 's tusa féin, a Dhia nam fear,
mo Thighearna is mo Rìgh:
Furtachd do Iacob orduich uait,
is fuasgail air gun dìth.

5 'S ann tre do neart-sa leagar sìos
na h-uile s naimhde dhuinn:
Tre t'ainn-sa saltraidh sinn gu làr
an dream a dh'èireas ruinn.

6 Oir as mo bhogh' cha dean mi bun,
cha'n fhurtachd dhomh mo lann.

7 Ach 's tusa nàirich luchd ar fuath',
o'r naimhdibh shaor thu sinn.

8 Air feadh an là 's ann ann an Dia,
a ni sinn uail is glòir:
Is t'ainm-sa fòs air feadh gach linn,
àrd-nìolaigh sinn gu mòr.

9 Ach rinn thu nis ar tilgeadh dhìot,
is nàirich thusa sinn:

'S a mach le'r n-arnailtibh 's le'r feachd
cha'n 'ed thu féin dol leion.

10 Gu teicheadh chuir thu sinn air ais,
o'n nàmhaid gheur sa' chath:

Is luchd ar mì-ruin tha dhoibh féin
a' deanamh creich' is sgath'.

11 Mar chaoirich thug thu sinn 'nar bia'bh
measg chinnreach sgaoleadh sinn.

12 Reic thu do phobull féin gun fhiach,
's gun mhead air maoin d'an cinn.

13 Do rinn thu toibheum dhian gu truagh
d'ar coimhearsnaich gu léir;

Ball-fanoid do na bheil nu'n cuairt,
's ball-magaidh mar an ceudn'.

14 Am measg nan Geintileach air fad,
gnàth-fhocal rinn thu dhinn:

'S am measg a' phobull anns gach àit
'nar n-aobhar crathaidh cinn.

15 Tha m' amhladh is mo mhasladh geur
a'm' fhiannais féin a ghnàth,
Rinn nàir' is rudhadh fòs mo ghruidh'
m'fhocal gu truagh gach là.

16 'Se sin mo chor thaobh guth an fhir
a chàincaas mi gu h-olc,

'S a spreigeas mi; 's a thaobh an nàmh,
's an dioghaltaich gu lochd.

17 Sud uile go do thàinig oirnn,
nìor dhearmaid sinne thu;
Cha d'rinn sinn breug no briseadh claoch
'n aghaidh do chùmhaint dhlùth.

18 Cha d' aom ar n-aigne uisithe rianh,
ar cridh' cha deach air cùl:

O d' shlighe cha do chlaon ar cos
's cha deach air seachran iùil.

19 An ionad dhràgon ge do phroun
thu sìne sìos gu làr,

Is ge do dh'fholuich thusa sinn
le sgàid is dubhar bàis.

20 Ma 's e gu'n leig sinn as ar cuimhn'
ainm uasal àrd ar Dia,

No gu dia eile coimheach bréig'
ar làmh ma shin sinn rianh:

21 Nach rannsuich Dia so féin a mach?
oir aige ta làn-fhios

Air dìomhaireachd a' chridhe stigh,
gach car a t'ann is cleas.

22 Oir, air do shonsa mharbhadh sinnu,
air feadh an là gu léir,

'S mar chaoirich tha sinn air ar meas,
a chasgairleadh gu geur.

23 Mosgail; c'ar son a choidleas tu?
Dhia, fàirich as do shuain;

Gu bràth na tilg-sa sinn a mach,
na triall-sa fada uainn.

24 Ciod uim' am foluich thu do ghnùis?
ciod uim' an dearmaid thu

Ar n-amhghar, is ar n-éigin mhòr
tha 'g iadhadh oirnn gu dlùth?

25 Oir chrom ar n-anam sìos do 'n ùir,
ar brù ri talamh theann.

26 A'd' thròcair éirich, cuideich leinn,
is furtaich oirnn san àm.

SALM XLV.

DEADH aobhar d'raib naomh is ciùil
a' deachdadh ta mo chridh':
Is labhran air na nithibh sin
a rian mi féin do'n Rìgh:
Mar pheann an làimh fir-sgrìobhaidh dheis,
a chuireas sìos gu luath,
Is amhluidh sin, mo theangadh ta
air 'urram àrd a' luaidh.

2 Is maisich' thu na clann nan daoine ;
gràs dhòirteadh ann ad bheul:
Is air an aobhar sin rinn Dia
do bheannachadh gach ial.
3 Deasuich do chlàidheamh air do léis,
O thus' a ghaisgich mhòir:
Le d' chumhachd is le d'mhòralachd,
le greadhnachas is glòir.

4 Bhàrrigh fìnnn, suasirceis, agus ceirt,
marcaich gu buadhach àrd,
Is nithe uamhor teagaisgidh
do dheas làmh dhuith 's gach àit.
5 Rachadh do shàighde geur' gu crìdh'
gach eascairid an Rìgh:
Tre sin am pobull tuitidh fo'd,
is nithear leat an claoidh.

6 Gu suthain is gu sìorruidh ta
do chaithir àrd, a Dhé:
Slat-shuaicheantais do rìoghachd-sa
is slat ro chòthrom i.

7 O 's ionnmhuinn leatsa còir is ceart,
is thug thu fuath do'n oic ;
Os ceann do chompanach chuir Dia,
do Dhiar' ol' aoibhneis ort.

8 Do'n alos, mhirr, is chasia,
o 'tèudach fàile théid:
Leo sud do chuir iad aoibhneas ort,
o d' lùchairt geal mar dheud.

9 Am measg do mhnathan urramach,
ta nigheana nan rìgh:
'S an òr na h-Ophir, air do dheis,
do bhan-rìgh seasaidh i.

10 A nighean, élad is amhairc fòs,
is cròm-sa sìos do chluas;
Tigh t'athar, is do mhuinntir féin
na cuinnich f' f' so suas.

11 Gabhaidh mar sin an Rìgh làn-toil
do 'sàille thlachdmhor féin:
Oir 'se do Thighearn is do Thriath,
thoir urram dha is géill.

12 Thig nighean Thlruis thugad fòs,
le tiodhlacaibh gu tric;
'S na daoine saobhair tha 'nam measg
ag asluch' gràis is iochd.

13 Nighean an Rìgh gu dearbh a stigh,
tha uile làn do ghloir:
Tha 'cuilaidh eudaich uimpe fòs,
air oibreachadh le h-òr.

14 Am brat do obair ghréis le snàth'd,
bheirear i gus an rìgh:
'Thig thugad luchd a coimheadachd,
's a maighdeana 'na dèigh.

15 Théid iad gu cùirt an Rìgh a steach,
ait, aoibhneach bheirear iad.

16 Air son do shìnsir bidh do chlànn,
mar phrionnsaibh anns gach àit.

17 T'ainn glòrmhor do gach linn a thig,
air chumhne culridh mi:
'Is bheir mar sin am pobull duit
àrd-mholadh feadh gach rè.

SALM XLVI.

'SE Dia a's tearmunn duinn gu beachd,
ar spionnadh e 's ar treis:
An aimsir carraid agus teinn,
ar cabhair e ro-dheas.

2 Mar sin ged ghluais't an talamh trom,
cha'n aobhar eagail duinn:
Ged thilgeadh fòs na sléibhe mòr'
am builgein fairg' is tuinn.

3 Na h-uisgeacha le beucaich mhuirb,
ged rachadh thar a chéill':
Le'n ataireachd ged bhiodh air chrith
na beanntan àrd' gu léir.

4 Ta amhainn ann, le 'sruthaibh sèimh
ni caithir Dhé ro-ait:
Fìor-bite naomh an ti a's àird',
am bheil sìor-chòmhnuidh aig.

5 Tha Dia 'na meadhon lnnnt stigh;
mar sin cha ghluaisear i;
Oir cuideachadh is còmhnaidh leath'
'se Dia gu moch a ni.

6 Do ghabh na cinnich bol', is ghluais
na rìoghachda gu cas:
Air cur do Dhia a ghuth a mach,
do leagh an talamh as.

7 Tha Dia nan sleagh leinn féin a ghnàth;
Dia Iacob 's tearmunn duinn.

8 Thigibh, is faicibh oibre Dé,
gach sgrìos air talamh rinn.

9 Gu h-ìomall fòs an domhain mhòir
an cogadh ni e chosg:
Am bogha bhris, an t-sleagh do ghearr,
an carbad-cogaidh loisg.

10 Bibh sàmbach, 's tuiigh gur mi Dia:
àrduichear mi gu sìor
Am measg nan sluagh, biodh urram dhomh
air feadh gach uile thir.

11 Tha Dia nan sluagh ri còmhnaidh leinn,
s an còmhnuidh air ar crann:
Is e Dia Iacob 's tearmunn duinn,
d'ar furtachd anns gach àm.

SALM XLVII.

BUAILIBH 'ur basan, uile shòigh,
tu còmhnuidh anns gach àit;
Le guth 's le gairdeachas do Dhiar,
suas togaibh iolach àrd:

2 Oir Dia ro-àrd is uamhunn e;
Rìgh mòr os ceann gach tìr.
3 Am pobull cuiridh e fo'r smachd,
fo'r cois na sìobh gu léir.

4 Mòrachd Iacob d'an d'thug e gràdh,
mar oighreachd dhuinne thag:

5 Chaidh Dia le caithream àrd a suas,
le trompaid 's fuaimneach blad.

6 Seinnibh do Dhiar, seinn moladh: seinn
d'ar Rìgh, seinn moladh hinn:

7 Oir's Rìgh Dia mòr os ceann gach tìr,
seinn da gu h-èblach grinn.

8 Tha Dia 'na shuidh' 'na chaithir naotmh;
'se 's Rìgh air cinnich ann.

9 Prionnsa nan sluagh do chruinnich iad,
pobull Dé Abraham;

Air son gur le Iehobhah mhàin
sgìath dhèidh do gach tìr:

'Se féin a's àird' 's a's urramalach,
's dha dlìghear moladh sìor.

SALM XLVIII.

IS mòr Iehobhah, Dia nam feart,
an caithir àird ar Dia;

Is air slabh àrd a naombachd féin,
ion-mholta chaoidh an Triath.

2 Beinn Shìoin 's breagh' a suidheachadh,
aoibhneas gach fearainn i;

Is diùth dhi air an taobh mu thuath,
tha caithir an Ard-Rìgh.

3 Aithnìchear Dia 'na lùchairtibh,
mar thearmunn anns gach airc.

4 Oir feuch, tràth bha na rìgre cruinn,
le chéile ghabh iad thart.

5 Chunnaic iad sud, is b'iongnadh leo,
le cabhaig dheifrìch as.

6 Ghlac eagail iad an sin, is pian,
mar mhuaoi ri saoth'r gu cas.

7 Cabhlach Tharsuis le gaoith an ear,
mìn-bhrisear leat gu luath.

8 Mar chual, is amhluidh chunnaic sinn,
am baile Rìgh nan sluagh,

Am bail' ar Dé; 's e Dia gu bràth
ni daingean e le neart.

9 A'd' theampull, air do chaoimheas caomh,
Dhiar, smuainich sìan gu ceart.

10 Mar t'ainm, is amhluidh sin do chliu,
gu crìch na talmhainn ta:

Do dheas làmh làn do fhìreantachd,
Dhiar, anns gach beart a ghnàth.

- 11 Beinn Shìoin gu ma h-aoibhinn i,
is Nighean Iudah ait,
Air son do h-breitheanas, a Dhé,
ta cothromach is ceart.
- 12 Siùbhlaibh mu thimcheall Shìoin naoimh,
is cuairt'chibh i maraon:
Airmhìbh a baideala gu dlùth,
's a turaite gach aon.
- 13 Thugaibh fa'near a b'bhain bhreagh',
's a caisteil ard le beachd.
Chum sin gu cuireadh sibh an cèill
do'u àl a ta ri teachd.
- 14 Oir 'se an Dia so féin ar Dia,
gu sìorruidh is gu bràth:
'Se fòs a stiùras sinn gu ceart
gu h-uair is àm ar bàis.

SALM XLIX.

- E**ISDIBHSE so gach uile shluagh,
na bheil sa' chruinne-ché:
- 2 Is cluinnibh eadar mhòr is bheag,
ma's bochd no beartach e.
- 3 Air tuigse smuainichidh mo chridh',
air glocas thig mo bheul.
- 4 Aomaidh mo chluas gu parablaibh:
nochdam cainnt dhorch air teud.
- 5 Droch làithean c'uim' am b'eagal leam
gu'n cuirinn iad an suim,
Mòr aingidheachd is lochd mo shal
tràth dh'iadh iad orm gu cruinn?
- 6 Na daoine sin 'nan saoihbreas mòr
ta deanamh dòigh is treis',
Is ann an Ìomhoireachd an stòir
a ta ro-bhòsdail leis.
- 7 A bhràth'r cha'n fhuasgail neach dhiubh sud
á gabhadh no á péin,
A thabhairt éiric as do Dhia,
ni f'heudar leis 'na f'heum:
- 8 (Oir saors' an anama 's prìseil e,
sguiridh e 'm feasd gu beachd:.)
- 9 Gu maireadh e gu sìorruidh beò,
's nach faiceadh truallidheachd.
- 10 Oir chi e fòs na daoine glie,
's an dream air dhiobhail cèill:
'S ua h-ùmaidh, fàgail toic do cbàch,
is fagbail bàis iad féin.
- 11 'Se 'u smuaineachadh gu mar an tigh,
's an còmhnuidh feadh gach rè,
A' tabhairt air an fearann ainm,
a réir an ainme féin.
- 12 Gidheadh, an duin' an urram mòr
cha mhair e ann gu buan:
Ach amhluidh mar an t-ainmhidh truagh
chum bàis a shiùbhlas uainn.
- 13 An slighe sud ge gòrach i,
taidnidh an cainnt'r'an sliochd.
- 14 Mar chaoraich do san uaigh tha iad,
'nam biadh do'n bhàs gun iochd:
Na fireanaich gheibh os an ceann
làn-uachdranachd gu moch,
'S 'nan ionad còmhnuidh anns an uaigh',
seargaidh an àill' 's an dreach.
- 15 Bheir Dia do m'anam fuasgladh saor
o chumhachd bàis is uaigh',
Oir gabhaidh e mi thuige féin,
ga m' theasairginn le buaidh.
- 16 An uair a nithear saoihbhir neach,
na glacadh fàitcheas thu;
'S an t-àm a chinneas glòir a theach,
na cuireadh sud ort tnu.
- 17 Oir 'nuair a shiùbhlas e do'n eug,
aon ni cha toir e leis:
'S an uair a théid e sìos do'n uaigh,
a ghloir cha lean i ris.
- 18 Seadh 'anam ge do bheannaich e
am feadh a bha e beò;
'S thusa, ma ni thu maith dhuit féin,
o dbaoinibh gheibh thu glòir.
- 19 Gu h-àl a shinnsear siùbhlaidh e,
solus cha'n fhaic gu bràth.
- 20 An duin' an urram, 's e gun chéill,
mar ainmhidh gheibh e bàs.

SALM L.

- L**ABHAIR an Dia Iehobhah treun,
an talamh ghairm gu léir,
O'n àird an ear gu h-àird an iar,
o éirigh gu luidh' gréin'.
- 2 A Sion ard, a's foirfe mais',
do dhealruich Dia nam feart.
- 3 Oir thig ar Dia 's cha bhi 'na thosd,
ach labhraidh e le neart:
Théid teine millteach roimh a ghnúis,
a' lasadh suas gu garg:
'S m'a thimcheall-san gu doininnach
bidh e 'na chaotribh dearg'.
- 4 Air talamh, is air nعام nan neul,
àrd-ghairmidh e gu treun,
Gu'n tugadh e ceart bhreitheanas
air 'uile phobull féin.
- 5 A m'ionnsuidh cruinnichibh mo naoimh,
is tionalaibh an dream
A rinn gu dileas is gu dlùth,
le h-lobairt, cùmhnant leam.
- 6 A cheartas-san ni nعام nan neul
a chur an cèill 'na àm:
Oir 'se Iehobhah féin gu beachd
a's son àrd-bhreitheamh anu.
- 7 Mo phobull Isra'l éisdibh riann,
is labhraidh mi gu ceart:
A't' agbaidh togam fianuis fhior,
's mi Dia, do Dhia gu beachd.
- 8 Mu t'offrailibh cha'n agram thu,
no fòs mu t'lobairt-loisg',
Oir m' fhiannus thug thu iad a ghnàth,
is fhuaras iad gun fhois.
- 9 Oir as do thigh cha ghabhainn uait
mar lobairt biorach bò;
'S cha ghabhainn gabhar fhìrionn fòs
mar offrail as do chrò.
- 10 Gach ainmhidh beò a ta an coill
is leamsa sin gu léir,
'S na h-uile spréid' air mhile cnoc,
ta 'g ionatrath air fear.
- 11 An eunlaith 's aithne dhomh air fad,
ta 'g itealaich feadh bheann:
'S leam gach fiadh-bheathach uile fòs,
feadh gharbhluic agus ghleann.
- 12 Geur-oeras nam biodh orm, no gort,
cha chuirinn duits' an cèill,
Oir 's leam an domhan mu'n iadh grìan,
is na bheil ann gu léir.
- 13 Fuil ghabhar 'n e gu'n òlainn uait?
feòil tharbh an ithinn i?
- 14 Ioc lobairt buidheachais do Dhia,
's do bhòidean do'n Àrd-Rìgh.
- 15 An là do thrioblaid is do theinm,
goir orm an sin gu ceart:
Ort fuasglam, is bheir thusa glòir
do m'ainms' a cuidich leat.
- 16 Ach ris an droch dhuin' labhraidh Dia,
mo statuinn chur an cèill
Am buineadh dhuit, no ghabhail fòs
mo chùmhnaint ann ad bheul.
- 17 Do m' achmhasan o thug thu fuath,
's an spéis riamh e nìor chuir;
Ach thig mo bhràthran air do chùil,
'g an diultadh uait gu tur?
- 18 Tràth chunnaic thu an gaduich' dàn,
dh'aontaich thu leis 'na oic:
'S le luchd an adhaltrais a ris,
b'fhear-comuinn thu 'nan lochd.
- 19 Do theangadh thug thu chumadh bréig',
chum uic thug thu do bheul.
- 20 Do d' bhràthair shuidh thu tabhairt guth
do d' mhac do mhàthar beum'.
- 21 Na nithe-s' uile rinneadh leat,
is dh'fhan mi dhìot a'm' thosd;
Is shaoil thu mar a ta thu féin,
gu b'amhluidh mi gach achd:
Ach cronaicheam do pheacaidh dhuibh,
a'd' amharc cuiream iad;
A chum gu faiceadh do dhà shùil,
nach fol'cheat orm-sa beud.
- 22 O sibhs' a dhream nach cuimhnich Dia,
nis tuigibh so 'na àin

- Mu'n dean mi loidart oirhh gu cas,
gu'n neach d'ur furtachd ann.
23 An ti bheir lobairt molaidd uaith',
'se sin bheir dhomhsa glòir:
Oir nochdam slàinte Dhé do'n fhear
a ghluaiscas mar is còir.

SALM LI.

- D**EAN tràcair orm, a Dhia nan gràs,
gu h-ìochdmhor saor-sa mis',
Rèir lìonmhoireachd do thròcair chaoimh,
glan as m'uill' eusaontas.
2 Gu h-ìomlan ionnail mi o m' lochd,
glan mi o m' chiont' a'd' ghràdh:
3 Oir tha mi 'g aidmheil m'eusaontais,
's léir dhomh mo lochd a ghnàth.
4 A' t'aghaidh, t'aghaidh féin a mhàin;
do pheacaich mi gu trom,
Is ann ad f'hanuis féin, a Dhé,
an t-olc so rinneadh leam:
Do chum air labhairt duit a mach,
gu biodh tu cothromach;
S gu biodh tu glan tràth bheir thu breth,
is ceart neo-eucorach.
5 Am peacadh, feuch, do dhealbhadh mi,
is ann an cionta fòs
Do ghabh mo mhàthair mi 'na broinn,
tràth ghineadh mi o thus.
6 An taobh a stigh do'n chridhe, feuch,
an fhirinn 's ionmhuinn leat:
San ionad f'holuicht' bheir thu orm
gu'n tuig mi gliocas ceart.
7 Le hisop dean-sa mise glan,
is bitheam glan gu beachd;
Dean m'ionnlad fòs, mar sin hidh mi
ni's gile dhuit na sneachd.
8 Guth subhachais thoir orm gu'n cluin
is fonn an aoibhneis ait,
Mar sin ni gairdeasach gu mòr,
na cnàmhan bhriseadh leat.
9 O m' pheacaibh is o m'eusaontais
fòluich do ghnùis, a Dhé;
Mo sheachrain is m'uill' eucòir fòs
glan thusa uam gu réidh.
10 Dhia, cruthaich annam cridhe glau;
ath-nuadhaich spiorad ceart.
11 Na tllg o d' shealladh mi; 's na huin
do spiorad naomha leat.
12 Is aisig dhomh ùr-gairdeachas
do shlàinte chàirdeil féin;
Is dean-sa fòs mo chumail suas,
le d' spiorad saor gu treun.
13 'N sin teagaisream do shlighe, Dhé,
do'n dream a bhris do reachd;
Is pillear riut le h-aithreachas
na peacaich thruagh gu beachd.
14 O chionta fola saor-sa mi,
O Dhia, a Dhé mo shlàint':
Seinnidh gu h-àrd air t'fhreantachd
mo theangadh anns gach àit.
15 Mo bhile, ta air druideadh suas,
fosgail, a Dhé nan gràs;
An sin do mholadh le mo bheul
cuiridh mi'n céill gu h-àrd.
16 Oir lobairtean cha'n iarrar leat,
no bheirinn duit gach ré:
An o'frail-loisgte fòs air bith
cha 'n 'eil do thlachd, a Dhé.
17 An spiorad briste, tuirseach, trom,
sud lobairt Dhé nan dùl:
Ri cridhe briste brùit', a Dhé,
gu bràth cha chuir thu cùl.
18 A'd' dheadh-ghean dean-sa maith, a Dhia,
air Sion do chnoc féin:
Ballan Ierusalem gu luath,
tog suas le d' làimh gu treun.
19 'N sin taitnidh lobairt cheartais riut,
o'frail, 's làn o'frail loisgt'
'N sin bheirear colpaich dhuit-sa suas,
air t'altair naomh gu fhois.

SALM LII.

- C**UOD uime 'n dean thu, ghaigich thréin,
maill as an olc gu mòr?

- Mairidh am feasd gun cheann gun chrìch,
deadh mhaithas Rìgh na glòir'.
2 Do theang' a' dealbh an aumhleis chlaioi
chum ceig' mar caltuinn gheir.
3 Is annsadh leat an t-olc na maith,
is breug na briathra fìor.
4 A theangadh chealgach, 's ionmhuinn leat
gach focal milleach olc.
5 Nì Dia gu sìorruidh mar an ceudn'
làn-sgrìos a tharruing ort:
Glan-sgathar thu, is as do theach
grad splonar thu gu tur,
A talamh is á tir nam beò
buaineas do fhreumh á bun
6 Sud chi am fìrean, gabhaidh fiamh,
is nì e gàire fòs:
7 Feuch, so am fear nach d'earb á Dia,
mar dhaingnach is mar threòir:
Ach ann an lìonmhoireachd a stoir
a dhòchas chuir gu treun,
'Na sbaobhreas is 'na aingidheachd,
do neartaich se e féin.
8 Ach mis' mar ùr-chrann olaidd ta
an àros Dé a ghnàth:
A' cur mo dhòchais ann a ghràs,
ri fad mo rè 's mo là.
9 Gu sìorruidh suthain molam thu,
chionn sud gu'n d' rinneadh leat:
Feitheam air t'ainm, oir tha e maith,
an làth'r do naomh gu beachd.

SALM LIII.

- N**A chridhe deir an t-amadan,
cha'n 'eil ann Dia air bith:
Taid truaillidh, 's gràincil fòs an lochd
cha'n 'eil ann neach nì maith.
2 Dh'amhairc an Tighearna o nèamh
air cloinn nan daoine nuas,
A dh'fheuchainn an rohh tuigs' aig neach
a dh'iarradh Dia nan gràs.
3 An t-ìomlan diubh chaidh air an ais,
ro-shalach iad gu leir:
Cha 'n 'eil aon neach a' deanamh maith,
cha 'n 'eil fiu aon fo speur.
4 Am bheil aig droch dhaoin' tuigs' air bith
ta 'g itheadh suas gu dian,
Mo phòhuill-sa mar aran blasd',
's nach 'eil a' gairm air Dia.
5 An sin do ghabh iad eagal mòr,
gun aobhar eagail ann:
Sgaoil Dia a chnàmha-san o chéill',
chuir séisdeadh ort gu teann;
Is mar an ceudna chuir thu iad
gu rughadh gruaidh' is nàir,
Do bhrìgh gu d' rinneadh ort' le Dia
trom-tharcuis agus tàir.
6 'Se so mo ghuidh' is m' athchuinge,
gu'n tugadh Dia nam feart
Cabhair d'a phobull Israel,
á Sion féin le neart!
An uair bheir Dia air ais o bhruid
a phobull féin le chéill,
Air Iacob bithidh aoibhneas mòr,
's aiteas air Israel.

SALM LIV.

- T**RE t'ainm-sa teasairg mise, Dhé,
cum cothrom rium le d' neart.
2 Eisd m'urnuigh, thoir fa'near, a Dhé,
briathra mo bhéil gu ceart.
3 Oir dh'éirich co'grìch rium-sa suas
luchd-fòirmeart tha gu dian
An tòir air m'anam; 's cha do chuir
iad Dia fa'n comhair riamh.
4 Ach feuch, 'se Dia m' fhear-cuideachaidh,
gu m'sheasamh anns gach cruas:
Bithidh Iehobhah leis an dream
a chumas m'anam suas.
5 Aiumhleas do m' naimhédibh diolaidh Dia:
a'd' fhirinn dean an sgath'.
6 Gu toileach bheir mi lobairt dhuit;
Dhé, molam t'ainm, ta maith.
7 Oir rinn e saors' is fuasgladh dhomh
o m'uile theinn gu treun:

Ionann gu fàca mi mo mhianann
air m'eascairidh gu léir.

SALM LV.

RI m'urnuigh éisd : 's o m' ghuidhe, Dhé,
na foluich thus' thu féin.

2 Thoir aire, 's freagraidh dhomh, ta caoidh
le bròn 's le bùireadh geur :

3 Air son guth m'eascairde gu léir,
is fòirneart fòs nan daoib' :

Oir euceart thilg iad orm, am feirg
dhomh thug iad fùnfh gun àith.

4 Mo chridh' a'm' chom' ta cràitcach goirt ;
thuit orm-sa uamhunn bàis.

5 Crith, oillt, is uamhunn thàinig orm,
ga m' shlugadh is mi 'n sàs.

6 'N sin thubhairt mi, Is truagh nach robh
sgàth colmain agam nis !

'N sin theicinn as ag itealach,
is gheibhinn tàmh is fois.

7 Feuch, shiubhlainn fòs air ànradh fad,
chum tàimh am fàsach chruaidh ;

8 Is dheanainn deifir gu dol as
o dhoininn gharbh na gaoith'.

9 Dhia, roinn is sgrìos an teang' ; sa' bhail'
bha fòirneart agus strì.

10 Taid dol m'a bhallaibh oidhch' is là ;
tha airmheas ann is caoidh.

11 Eucor ro-mhòr is oic a ta
'na mheadhou sud gun cheisd :

Seadh feall r'a shràidibh agus cealg
cha dealaich sud am feasd.

12 Cha b'e mo nàmh thug masladh dhomh,
oir dh' fhuilginn sud gu réidh :

Cha b'e fear m'fhuath' a dh'éirich rium,
oir dhionainn uaith' mi féin.

13 Ach thusa, fear bu choimpir dhomh,
fear m'edlais, is fear m'fùil ;

14 Bu hhlasd' ar combair' dol le càch,
gu h-àros Dhé nan dùl.

15 Sealbh gabhadh orr' am bàs gu grad,
's gu h-ìfrinn théid iad beò :

Oir aingidheachd 'nan còmhnuidh ghnath,
's nam builgean bha gach là.

16 Ach uise, glaotham suas ri Dia,
saoraidh Iehobhah mi.

17 Glaoth àrd, is urnuigh ni mi ris,
nuoch, feasgar, 's meadhon-là ;

Is éisdidh e gu grad ri m' ghlaodh :

18 M'anam 's e shaor an sìth,
O'n chath' 's o'n chòmhair dh'éirich rium,
is mòran rium ri strì.

19 Cluinnidh an Dia ta làidir beò,
's bheir deirtinn orra 's pian :

Seadh fòs an Dia air mairiunn ta,
's a bha o chian nan cian.

Is air an aobhar fòs nach 'eill
caochladh air bith 'nan staid,

Eagal an Tighearn uime sin
do thilg iad dhiubh air fad.

20 A làmh do shìn 'nan aghaidh sud,
a bha an sìochaint ris :

A chumhant is a nasgadh dlùth,
gu fcalltach orra bhris.

21 Bu shleamhna briathra 'bhéil na'n t-im,
ach cogadh cruaidh 'na rùn :

Bu bhuige 'chainnt na oladh thlàth,
's i ghnàth mar chlaideamh rùisgt'.

22 Ach tilg-sa t'eallach throm air Dia,
's e ni do chumail suas :

Cha leig e 'm feasd do'n fhrean choir,
o 'shocair féin gu'n gluais.

23 Ach thus', a Thighearna nam feart,
a'd' chorruih cheirt gu geur,

An slochd d'am milleadh tilgidh tu
an aitim ud gu léir :

Na daoine sliغهach fuileachdach,
cha mhair iad leth an làith' :

Ach annad cuiridh mis', a Dhé,
mo dhòchas is mo dhòigh.

SALM LVI.

ORMSA dean iochd, a Dhé, oir b'ail,
le duin' mo shlugadh suas :

A tha gu dian ga m' shàruchadh
gach là le cogadh cruaidh.

2 Seadh b'ail le m'eascairidh gun iochd
mo shlugadh suas gach là :

Oir 's lìomhor iad tha cogadh rium
gun aobhar no cion-fàth.

3 An làithibh m'eagal earbham riut :
an Dia, a bhriathar féin

4 Àrd mholaidh mi, is ann an Dia,
chuir mi mo dhòigh gu treun.

Cha ghabh mi gealtachd uime sin,
's am feasd cha'n eagal leam,

Na dh'fheudas feoil a dheanadh orm
do lochd, le iomairt theann.

5 Mo bhriathar tha iad fàradh fòs,
gach là mar 's toileach leò :

Chum doltheis agus dochair dhomh
ta 'n smuainte-san gach là.

6 Tha iad le chéil' a' cruinneachadh,
is iad 'gam folach féin,

A' feitheamh m'anam', air bhith dhoibh
ro-fhurachar mu m'cheum.

7 Gu saor an téid iad as mar sin,
le'n eucor mhòir gun tàmh ?

A' d'fheirg-sa leig am pobull sìos,
a Thighearna le d' làimh.

8 Mo sheachrain air an àireamh leat,
a'd' shearraig taig mo dheòir :

Nach 'eill iad ann ad leabhar shìos,
air chuimhne sgrìobht' gach uair ?

9 Mo naimhde pillidh air an ais,
tràth ghaircam ort gu teann :

Is aithne dhomhsa so gu beachd,
oir tha Iehobhah leam.

10 An Dia, a bhriathar molaigh mi :
molam an Dia a reachd ;

11 An Dia do chuireadh leam gu treun
mo dhòchas féin gu beachd.

Is air an aobhar ud, a Dhé,
cha'n eagal idir leam

Na dh'fheudas duin' a dheanamh orm,
nach 'eill deth féin ach faun.

12 Do bhòide ta iad ormsa, Dhé :
is iocam dhuit-sa cliu.

13 Oir m'anam bochd gu saor o'n bhàs,
gu gràsmhor dh'fhuasgail thu :

Nach coimhead thu mo chosa fòs
o shleamhnachadh ni's mò,

A chum gu'n gluais mi 'n fianuis Dhé
an solus dhaoine beò.

SALM LVII.

DEAN trècàir orm, a Dhia nan gràs,
dean trècàir orm gach rè,

Oir annad-sa tha m'anam truagh
a' cur a dhòigh gu léir :

Is gabhaidh mi fo sgàil do sgéith
mo thearmunn is mo neart,

Gu ruig an uair sin anns an téid
na h-uile ud uille thart'.

2 Eigheadh mi ris an Dia a's àird' :
ri Dia ta làidir treun,

A chuireas leam gach cùis gu crìch,
mar chì e ormsa fèum.

3 Cuiridh e neart o nàmh, do m' dhion
o bheum an fhir le'm b'ail

Mo shlugadh ; cuiridh Dia a mach
'fhirinn 's a ghràs gun dàil.

4 Tha m'anam bochd an còmhnuidh fòs
am builgean lèomhan gar'.

Am measg na dream a'm' luidh' a tairn
air lasadh ta le leirg :

Daoine, 'g am bheil am fiacra fòs
mar shleagh 's mar shàighde geur ;

Mar chlaideamh guineach, 's anhluidh sìm
an teagadh-san gu léir.

5 Os ceann nan nàmh, Dhia, tog thu féin :
os ceann gach tìr do ghloir.

6 Air son mo cheuma ghleus iad lion,
chrom m'anam sìos gu làr :

Slochd romham chladhaich iad, is thuit
iad féin san t-slochd a rinn.

7 'S gleusta mo chridhe, 's gleust', a Dhé,
dhuit canam molaigh binn.

- 6 Mosgail mo ghloir, 's a shaltair fòs,
a chlàrsaich dùisg an àird :
Air maduinn mosglam féin gu moch,
is seinnem ceòl gu h-àrd.
- 9 Dhia, measg a' phobull, molam thu ;
dhuit seinneam measg an t-sluaigh :
- 10 Oir t'fhrinn is do thròcair mhòr,
gu nàmh nan neul chaidh suas.
- 11 Arduichear thus, a' Dhia nam feart,
os ceann àrd-nàmh nan speur :
Is togar suns do ghloir gu h-àrd,
os ceann gach tìr gu léir.

SALM LVIII.

- A** N labhair sibhs', a choimhthionail,
an fhrinn cheart neo-chlaon ?
'S an tabhair sibh gu cothromach,
breth cheart, a chlann nan daoine ?
- 2 Is ann bhuir cridh' tha sibh a' dealbh'
mòr aingidheachd gun tàmh :
'S air talamh tha sibh tomhas fòs,
fòreigin chruaidh 'ur làmh.
- 3 Luchd-uile, n thig iad as a' bhroinn,
sùbhlaidh air slighe fhair ;
Tràth bheirear iad, air seachran théid,
a' labhairt bhreug gach ial.
- 4 An nìmh mar nìmh na nathrach ta :
mar nathair dhruid a' cluas ;
- 5 Ri guth nan druith tha eagnaidh seòl',
nach éisd, is fòs nach gluais.
- 6 Am fiacra bris, a Dhé, 'nam beul :
a Thighearn làidir thréin,
Pronn fiacra agus tuisg ro-mhòr
nan leòmhann òg' gu léir.
- 7 Gu'n leaghadh iad, a' sìdeadh slos,
mar uisge ruith le gleann :
'S a shaighde bris, tràth chuireas e
a bhogh' air lagh gu teann.
- 8 Mar sheilchelg bhios a' leaghadh as,
rachadh iad as gu dian ;
Mar thorralcheas an-abuich mnà
na faiceadh iad a' ghrian.
- 9 Mu'm mothaich seadh 'ur coireachan
n choille chrionaich teas,
Ni Dia, 's iad beò, 'na chorruih ghéir
le cuairt-ghaoith dhian an sgrios.
- 10 Bìdh aoibhneas air an fhìrean chòir,
'nuair chì e 'n dioghaltas :
Is ann am fuil luchd-aingidheachd,
nighidh e fòs a chos.
- 11 Thoir duine 'n sin, gu bheil gun cheisd,
deadh dhuals aig daoineibh coir ;
'S gu bheil air talamh fòs, gu beachd,
'na hhrèitheamh Dia na glòir'.

SALM LIX.

- T** EASAIRG, is saor mi, O mo Dhia,
o m' naimhdeibh dh'éireas rium.
- 2 O luchd an uile ta fuileachdach,
dion mis', is cuidlich leam.
- 3 Feuch, 'n aghaidh m'anam' luidh am fàth
is chruinnich daoine treun :
Cha'n ann, a Dhia, air son mo lochd
no cron a rinn mi féin.
- 4 A' ruith tha iad, gun chon a'm' tlaobh,
's gu h-ullamh dol air ghleus :
Chum teachd do m'fhurtachd mosgail tràth,
is thoir fa'near am beus.
- 5 O Dhé nan sluagh, Dhé Israel,
mosgail 's gu fòsraicht' leat
Na cinnich : 's na dean iochd air neach
gu h-aingidh bhris do reachd.
- 6 Air teachd do'n fheasgar pillidh iad :
a' donnalaich gu h-àrd,
Mar choin, mu'n bhall' a' cuairteachadh,
is amhluidh sin a taid.
- 7 Feuch, brùchdaidh iad a mach le'm beul ;
'nam bilibh claidheamh geur ;
Cò chluinneas sin, no bheir fa'near ?
'se sud a's cainnt dholhch féin.
- 8 Ach thusa, Dhia Iehobhah mhòir,
ni gaire fanoid ri ;
Is mar bhall-magaith bithidh fòs
na cianich ann ad shùil.

- 9 Air son gur mòr 's gur maith do neart,
slor-fheithem ort a ghnàth :
Do bhrìgh gu bheil dhomh Dia nan dùl
'na dhìdean dùth gu bràth.
- 10 Bìdh Dia o'n tig mo thròcair chaomh,
dol romham air gach ceum ;
'Se Dia bheir dhomh air m' eascairdibh,
mo rùn gu falc mi féin.
- 11 Mu'm bi mo phobull dìchuimhneach,
na marbh an aitim ud :
O Dhia ar sgìath, le d' chumhachd sgaoil,
's leag iad gu h-ìosal fo'd.
- 12 Fa lochd an teangaidh, 's cainnt am béil,
'nan àrdan glacer iad :
Fa chùis nam mallachd, is nam breug
a labhair iad os aird.
- 13 Sgrios iad a' d' fheirg, sgrios iad gu tur,
is théid iad as gu dian :
Is tuigidh 'n sin gach uile thir,
rìgh Iacob gur e Dia.
- 14 'S air teachd do'n fheasgar pilleadh iad,
n' donnalaich gu h-àrd,
Mar choin, mu'n bhall' a' cuairteachadh,
is amhluidh bitheadh iad.
- 15 Ag iarraidh bìdh gu seachranach,
's gu luaineach ann an teinn ;
A' deanamh gearain anns an oidhch',
mur bi an sath 'nam hroinn.
- 16 Ach mise molar leam do neart ;
gu moch a' seinn do ghràis,
Air son gur tu mo thearmunn treun,
's mo dhaingneach féin 's gach càs.
- 17 'S tu féin mo neart, dhuit canam fonn,
'se Dia mo dhìdean treun :
'Se 'u Dia sin féin rinn thròcair orm,
's a chuidich leam a'm' fheum.

SALM LX.

- A** DHE, do thùg thu sinne uait,
dh' fhuadaich thu sinn air fad,
Oir bha thu ruinn an corruich ghéir ;
pill ruinn thu féin gu grad.
- 2 Chuir thus 'an talamh trom air chrith ;
is fòs do bhris thu e :
Slànuaich a bhriseadh, oir gu heachd
air criothnachadh tha e.
- 3 Do thaishein thusa nithe cruaidh
do'n t-sluagh a's leat le còir :
Fion busireasach chuir uamhunn oirnn,
thug thusa dhuinn r'a òil.
- 4 Is thug thu bratach àrd, a Dhé,
do'n dream d'an eagal thu :
A chum gu sgaoilteadh sud a mach,
bhrìgh fìrinn duit le cliu.
- 5 O dhaorsa chum gu saorar leat
do phobull ionmhuinn féin :
Éisd rium, is slànuaich mi gu grad
le d' dheas làimh làidir thréin.
- 6 'Na naomhachd labhair Dia nam feart,
bìdh aoibhneas orm nach gann :
Air Sechem ni mi roinn gu ceart,
gleann Shucoit toimhsar leam.
- 7 'S leam Gilead le dlìghe cheirt,
Manaseh 's leam gu beachd,
'S i treubh Ephraim neart mo chinn,
bheir Judah mach mo reachd.
- 8 Is soitheach-ionnlaid Moab dhomh ;
tilgearm thar Edom thruagh
Mo bhròg ; is ni mi cathraim binn
thar Palestin le buaidh.
- 9 Cò bheir do'n chaithir dhaingein mi ?
's gu Edom bheir gu ceart ?
- 10 Nach tusa, Dhia, le'n d' thréigeadh sinn ?
's nach deachaidh mach le 'r feachd ?
- 11 O thrioblaid tabhair còmhnaidh dhuinn',
oir 's diomhain furtachd dhaoine'.
- 12 Tre Dhia ni sinne treubhantas,
'se shaltras naimhde fuaidh'n.

SALM LXI.

- R** I glaoth mo ghearain éisd, a Dhé,
is m'urnuigh thoir fa'near.
- 2 O iomall talmhainn éigheam riut,
's mo chridhe trom fo smal :

- Dhia, treoraich chum na carraig mi
a's àirde na mi féin.
- 3 Bu t'earmunn thu, 's bu chaisteal dhomh
o m'eachaidh gu léir.
- 4 A'd' phàillinn naomh nì mise tàmh
gach aimsir is gach tràth:
Mo dhòigh fo dhubhar sgàil' do sgéith,
cuididh mi féiu gu bràth.
- 5 Oir chuala tu mo bhòide naomh',
's an gealladh a thug mi:
Oighreachd na muinntir thug thu dhomh
d'an eagal t'ainm, a Dhé.
- 6 Buan shaoghal agus aimsir clùan
bheir thusa, Dhia, do'n Rìgh:
Mar iomadh ginealach is linn,
a bhliadhna 's tu nì.
- 7 Mairidh e buan am fianuis Dé,
gu bunaiteach 's gu bràth:
Tròcair is fìrinn deasaich dha,
g'a choinhead-san gach tràth.
- 8 Mar sin gu sìorruidh seinneam cliu
do t'ainm ro-usal àrd,
's mo bhòide naomha dìolam dhiut,
o là gu là gu bràth.

SALM LXII.

- L**E foighidinn tha m'anam bochd
feitheamh air Dia gu beachd:
'S ann uait tha furtachd agus fòir
orm air gach taobh a' teachd.
- 2 'Se mhàin a's carraig dhìneid dhomh,
is m'fhurtachd e ro-dheas:
Mo thearmunn dìleas e faraon,
gu mòr cha ghluaisear mis'.
- 3 Cia fhad a dhealbhar aimbleas leibh?
làn-mharbhar sibh gu beachd,
Mar bhall' air chrith, 's mar ghàradh dh'aom,
tha leagadh oirbh a' teachd.
- 4 O urram àrd ga thilgeadh slosh
tha 'n comhairlean a' ruith:
'Si 's miann leo breug: beannachd 'nam beul,
ach mallachd an taobh stigh.
- 5 O m'anam feith gu foighidneach
ri Dia a mhàin mar chleachd:
Oir ann-san tha mo mhuighin threun,
's mo dhòchas féin gu beachd.
- 6 'Se mhàin a's carraig dhìleas dhomh,
'se mhàin mo shlàinte dheas:
Mo thearmunn daingean e faraon,
mar sin cha ghluaisear mis'.
- 7 Mo shlàinte ta 's mo ghloir an Dia,
ris earbam féin a ghnàth:
Carraig mo neirt, 's mo thearmunn treun,
'se Dia, gu buan 's gu bràth.
- 8 O phobull, cuiribh ann an Dia
bhur dòchas anns gach àm;
'Na fhianuis doiribh mach 'ur cridh':
'se Dia ar tearmunn ann.
- 9 'S nì dhomhain daoine beag' gu fìor,
tha daoine mòr 'nam bréig:
Air meidh ri'n tombas, 's eastruim' iad
na diomhanas gu léir.
- 10 Na b-earb á fòirneart, 's na dean uail
á reubainn no droch bheart:
Na socruidh fòs do chridh' air stòr,
'n tràth chinneassaoibhreas leat.
- 11 Do labhair Dia aon uair a mach:
sud chualas uair no dhà,
Gur leis an Dia ta cumhachdach
treis agus neart gach là.
- 12 Tròcair, a Thighearn, buinidh dhiut,
is gràsa mòr faraon:
Oir bheir thu réir a ghlomhara,
a luigheadh do gach aon.

SALM LXIII.

- O** DHIA, is tu mo Dhia, gu moch
iarraidh mi thu gach là:
Ro-thartmhor a ta m'anam bochd,
an geall ort féin a ghnàth;
Tha miann, is ciocras mòr air m'fheoil,
an geall ort féin gach àm,
An tìr ro-thiorain, thartmhoir, theith,
gun uisg' air bith bhi ann.

- 2 Do chumbachd chum gu faicinn féin,
's do ghloir a ta ro-chaomh;
A réir mar chunnacas roimhe thu,
le cliu a' t'aros naomh.
- 3 Air son gur fearr na beatha fòs
do chaolmhneas gràdhach caoin.
Àrd-mholadh dhiut le h-iomadh cliu
mo bhile bheir faraon.
- 4 Mar sin an clan a bhios mi beò,
beannaicheam thu a ghnàth:
Is ann ad naomh-ainm togam suas
mo lamhan riut gach tràth.
- 5 Sàsulchean m'anam mar le smior,
's le saill ro-reambar réidh:
Is bheir mo bheul 's mo bhile dhiut
àrd-mholadh ait, a Dhé:
- 6 'N tràth nì mi air mo leabaidh fòs,
do chuimhneachadh le tlachd,
'S an àm na faire smuaineach' ort,
a' dol do'n oidhche thart.
- 7 Air son gur tu b'fhear cabhair dhomh
a Thighearn is a Dhé;
Bidh aoibhneas agus aiteas orm,
fo dhubhar sgàil do sgéith.
- 8 Tha m'anam leantuinne riut gu dlùth:
do dheas làmh chum m'ì suas.
- 9 Luchd iarraidh m'anam' bhochd g'a sgrìos,
théid iadsan slosh do'n uaigh.
- 10 Le faobhar claidheimh agus arm
slosh tuitidh iad gu làr:
Mar chuibhrionn do na sionnachaidh
do nìthear iad le tàir.
- 11 Ach aoibhneach bidh an rìgh an Dia:
na lùghas e gun bheud
Nì iadsan uail: ach druidear beul
gach ti a labhras breug.

SALM LXIV.

- T**RATH nì mi urnuigh riut, a Dhé,
thoir éisdeachd dhomh gu luath:
O eagall nàmhaid coimhid fòs,
gu téaruint' m'anam truagh.
- 2 O chomhairl' dhìomhair dhaoine daol
o ionnsuidh ghairbh faraon
Luchd deanamh uile is aingidheachd,
cuir folach orm gu caoin.
- 3 An teagadh féin do gheuraich iad,
mar chlaidheamh guineach geur;
Tha'm bogb' air lagh, 's an saighde deas,
's iad briathra searbh am béil;
- 4 Gu'n caitheadh iad an dìomhaireachd
an neach sin fòirfe ta;
Gu h-obann taid 'ga chaitheamh fòs,
gun eagal is gun sgàth.
- 5 A' gabhail misneich taid san oile,
's a labhair tric le chéil:
Mu leagadh lion an uaignidheas,
ag ràdh, Cò 'n ti d'an léir?
- 6 Gach oile do rannsaich iad a mach
seadh rinn iad sgrùdadh geur,
An rùn a stigh 's ro-dhomhain e,
's an cridhe mar an ceudn'.
- 7 Ach saighhead tilgidh orra Dia,
bhlos guineach agus geur;
Grad-bhuailear agus lotar iad,
'g an gortuchadh gu léir.
- 8 Mar sin bheir iad-san orra féin
toradh an teang' gu grad:
Gach uile neach d'an léir an dòigh,
teichidh iad uath' am fad.
- 9 Mòr-eagal bithidh air gach neach,
is nochdaidh obair Dhé:
Oir bheirear leo gu glic fa'near
an gnomh ud a rinn e.
- 10 Nì 'm fìrean aoibhneas mòr an Dia,
a' cur a dhòchais ann:
'S gach neach 'g am bheil an cridhe ceart
nì gairdeachas nach gann.

SALM LXV.

- T**HA ann an Sion feitheamh ort
moladh, a Dhé, gun dìth:
'S ann duit a dhìolar fòs gu pailt
a' bhòid mar gheallar i.

- 2 O thus' a dh'éisdeas urnuigh ghlan,
's ann thugadh thig gach aon.
- 3 Mo sheachrainn tha an uachdar orm:
Glan tbus' ar peacaidh uainn.
- 4 'S beannaicht' an duine sin a chaoidh
a thaghar leatsa, Dhé,
'S a bheir thu fós am fagus duit:
còmhnuidh a'd' chùirt gheibh e.
Sàsuichear sinn le maithneas mòr
do theach, 's do theampuil naoimh.
- 5 Le nithibh uamhasach, bheir dhuinn,
a'd' cheartas, freagradh caomh:
A Dhia ar slainte, 's tu gu dearbh,
làn dòchas crìch gach tìr';
'S na bheil san fhaireg fada uainn,
an dòchas 's tu do shior.
- 6 Le 'heart-san sbocruch sléibhte mòr',
e crioslaicht' fòs le treis.
- 7 'Se chaisgeas fuaim gach mara 's tuinn,
is comh-stri dhaoine leis.
- 8 Na daoine ta an còmhnuidh thall,
sna tìribh fad a mach,
Na uamhunn orra ta gu mòr,
do chomhar miorbhuileach:
Is tusa bheir air dol a mach
na maidne gach aon là,
'S air dol an fheasgair mar an ceudn'
bhi aoibhinn ait a ghnàth.
- 9 An talamh tha thu fiosaichbadh,
's 'ga uisgeachadh gu réidh:
Le amhainn Dé ta làn do'n uisg',
trom beartaich nì thu e.
Dhoihh arbhar tha thu deasachadh,
le d'fhreasdal caomha féin;
- 10 'S ag uisgeachadh le palteas mòr,
nan iomairean gu mín:
A sgrìoban leagaidh tu a sìos,
le frasalbh nì thu tais;
A chinneas agus 'fhochann fòs,
beannaichidh tu le mais'.
- 11 Mu'n bhliadhna coran tha thu cur,
le d' mhaithneas féin, a Dhé;
Tha saill a' sìleadh anns gach àit,
o d' cheumannaibh gu réidh.
- 12 Air cluainibh glas an fhàsaich luim,
nuas sìlidh iad gu mín;
Na tulaich dheag', gach taobh a ta
làn aoibhneis agus gear.
- 13 Na cluaine an air an sgeudachadh
le treudaibh anns gach àit;
Na glinn, le h-arbhar folaichte,
a' seinn le h-iolaich àrd.

SALM LXVI.

T'OGAIBH, gach uile thir gu h-àrd,
iolach do Dhia nan dùl.

- 2 D'a ainm ro-uasal seinnibh glòir,
a' tabbairt dha-san cliù.
- 3 Ahraibh ri Dia, Cia h-uamhasach
gach heart do nìthear leat?
Oir géillidh dhuit do naimhe borb,
air son gur mòr do neart.
- 4 Sleuchdaidh gach uile talamh dhuit,
ag iomradh ort gu binn:
Do t'ainm ro-uasal fongatach
nì'd moladh mòr a sheinn.
- 5 Thigibh an so is ambaicribh
air oibribh Dhé gu gear:
Ta uamhasach 'na ghnìomharaibh
air chloinn nan daoine' gu léir.
- 6 Mar thalamh tioram rinn e 'n enan:
is trid nan sruth bu luath
D'an cois chaidh daoine; 'nuair a bhia
sinn ann-san ait le bnaidh.
- 7 Le 'threun-neart riaghlaidh e a chaoidh;
na slòigh d'a shùilbh 's léir:
'S na h-àrdaicheadh luchd-eusaontais
gu h-amaideach iad féin.
- 8 O dhaoine, beannaichibh ar Dia,
àrd-mholaibh e gun chlos.
- 9 'Se chum ar n-anaid beò, 'se bheir
nach carruichear ar cos.
- 10 Mar airgid leagtha ghlan tha sinn
's tu d'fhidir sinn, a Dhé:

- 11 Chuir umainn fion, ar leasraidh chuir
fo dhòrainn is fo phéin.
- 12 Thug thu air daoineibh marcachd oirnn,
tre theine 's uisge chaidh;
A ris gu h-ionad saoihbh réidh,
's tu féin thug sinn le buaidh.
- 13 Racham do d' thigh le offrail-loisgt'
dhuit coimhlionam mo bhòid,
- 14 A ghealladh leam le fosgladh béil,
tráth bha mi 'n éigin mhòir.
- 15 Do'n fheadail reamhar, lobairt-loisgt'
le tuis is saill nan reith';
Offrail nam bò, 's nan gabhar fòs
sud bheir mi dhuit fa leth.
- 16 Tbigibh, is éisidibh so, gach neach
air am bheil eagal Dé,
Gach maigh do rinn ar m'anam bochd,
sud aithriseam gu réidh.
- 17 Do ghlaodh mi ris gu h-àrd le m'bheul:
le m'itheagaidh dh'ardaich' e.
- 18 A'm' chridh' ma bheir mi spéis do'n olc,
cha 'n éisd an Tighearn mi.
- 19 Gu dearbh dh'éisd Dia rium: thug fa'near
guth m'urnuigh Rìgh nan dùl.
- 20 Moladh do Dhia, nìor cheil a ghras,
's mo ghuidh' nìor chuir air càl.

SALM LXVII.

- G U'N deanadh Dia nùr thròcair oirnn,
's ar beannachadh a ghnàth:
Is togadh e gu grámhor oirnn
dearbhadh a ghnùis' gu bráth.
- 2 Chum fios do shlighe bhi gu fìor
's gach uile thir air bith:
Is iomradh air do shlàinte chaoimh
measg f'heineacha fa leth.
- 3 Moladh am pobull thus', a Dhé:
moladh gach pobull thu.
- 4 Biodh gairdeachas air fheineachaibh,
gu h-ait a' seinn do cliù:
Oir ceart-bhreth bheir thu air an t-slagh,
riaghlaidh air thalamh iad.
- 5 Moladh gach pobull thus', a Dhé:
moladh iad thu 's gach àit.
- 6 'N sin bheir gach talamh is gach fonn
deadh thoradh trom gu pailt;
Is cuiridh Dia ar Tighearn oirnn
a bheannachadh gun airc.
- 7 Nì Dia ar beannachadh gun cheisd,
's bidh 'eagal-san gu fìor
Air gach aon neach a dh'aiticheas
fad iomail crìch gach tìr.

SALM LXVIII.

- F IREADH ar Dia, is sgaoilear leis
an dream a's naimhe dha:
'S an aifinn sin thug dhasan fuath,
teicheadh o 'ghnùis gu bráth.
- 2 Mar sgapar deatach, fadaidh iad:
mar leaghas teine céir,
Mar sin gu sgrìosar droch dhac'n' as
a fianuis Dhé gu léir.
- 3 Ach gairdeachas air daoineibh còir,
is aoibhneas gu'n robh ac'
Am fianuis Dhé, le luathghair mhòir,
's iad suibh' agus ait.
- 4 Seinnibh do Dhia, stor-mholaibh 'ainm
àrdaichibh 'n Tì a ta
Marcachd air nàmh, tre 'ainm-san IAH,
bibh ait 'na làth'r a ghnàth.
- 5 Do dhilleachdain is athair Dia;
do bhantraichibh gun neart,
An tigh a naomhachd tha e ghnàth
'na bhreitheamh dìreach ceart.
- 6 Suidhichidh Dia an teaghlachibh
an dream tha uaigneach truaigh:
Is saoraidh e gu trócaireach
na bheil fo chuibhreigh chruaidh;
- Ach meud 's a bhios gu h-eucorach
tì ceannaire is ri lochd,
Nì iadsan còmhnuidh bhuanaiteach
ann fearann tioram bochd.
- 7 Air ceann do shluaigh tráth dh'imich tìr,
a Dhé, san fhàsach chruaidh;

- Chriothnaich an t-lamh, shìl an speur,
an làthair Dhé nan sluagh:
- Sliabh Shinaí féin tha daingean ard,
chriothuach is luaisg gu mòr
An làthair Dhé, Dé Israeil,
tha urramach an glòir.
- 9 Shìl thusa, Thighearna, gu pailt
frasán a nuas gun dìth;
le shuidhich agus dh'fhurtaich thu
air 'eighreachd, is i' fsgth.
- 10 Bha fòs do choimhthional 's do shluagh
'nan còmhnuidh innt', a Dhé,
Do d' mhaithreas rinn thu deasachadh
do d' dhaoibh nochda féin.
- 11 An Tighearna ta làidir treun,
leig e a ghuth a mach,
'S a' chuideachd sin a dh'fhoillsich e
bu lionnhor ionarach.
- 12 Rìghrean nan armaile 's nam feachd,
an sin le deifir theich:
'S ise a dh'fhuirich aig an tigh,
bha 'n sin a' roinn na creich'.
- 13 Measg phota luidh sibh, ach bidh sibh
mar sgiath nan colman luath,
Foluicht' le h-airgid, is an cleit'
le h-òr a's deirge snuadh.
- 14 Tràth sgaoil Dia uile-chumhachdach
na rìghrean innt' a steach:
'N sin bha i' geal mar Shalmon ard,
'S i uile làn do shneachd.
- 15 An sliabh ud, Dhé, is cosmhuil e,
ri Basan measg nam beann,
Mar Bhasan mòr is amhluidh e,
gu h-àrd a thog a cheann.
- 16 C'ar son a' feum sibh, bheannta àrd?
'S e so àrd-thulaich Dhé,
Ann miann leis tamh, is bìthidh e
'na chòmhnuidh ann gach rè.
- 17 Tha carbad Dhé 'nam ficead mìl';
mìlte do ainglibh treun':
'Na theampull naomh tha Dia 'nam measg,
ionnan 's 'na Shinaí féin.
- 18 Is chaidh thu suas air ionad àrd,
thug hruid am braigheanas,
Do dhaoibh fhuair thu tiodhlaca,
le'n dean thu toirbheartas:
'S ann cbeanafos do'n inhuinntir ud
ro cheannairceach a ta,
A chum gu'm biodh Iehobhah Dia
'na chòmhnuidh ac' a ghnàth.
- 19 Dia gu ma beannaicht' gu robh e,
tha dòrtadh oirn gach ló
A thiodhlaca, 'se Dia ar slàint',
an Dia a chum sinn beò.
- 20 Is leinn an Dia ta làidir treun,
nì cabhair anns gach càs:
Do Dhia Iehobhah buinidh fòs
làn-teasairginn o'n bhàs.
- 21 Ach ceann a naimhde brisidh Dia;
is claignonn greannach cruaidh
An f'hir a dh'imicheas gu dàn
'na chionta féin gach uair.
- 22 Deir Dia, Bheir mise air an ais
mo shluagh o Bhasan àrd;
'S o dhoimhneachd fairge bheir mi ris,
a nìs iad le mòr bhaigh.
- 23 Chum ann am fuil do naimhde dian,
do chos gun deanar dearg,
'S gu'n tumar fòs 'nam fuil-san féin
teangadh do mhadradh garg'.
- 24 Do thriall-sa chunnaic iad, a Dhé,
a Thighearna ro-chaoimh,
'S e triall mo Thighearn is mo Rìgh,
's ann ann an àros naomh.
- 25 Luchd-òrain dh'imich iad air tùs,
luchd-inneil ciùil a ris:
'Nam measg a' bualadh thiompan fòs
na maighdeana gu mìn.
- 26 Deanaibh-sa Dia a bheannachadh,
'nur coimhthional le chéil',
Eadhon Iehobhah Dia nam feart,
e thobar Israeil.

- 27 Beniamin beag le'n triath an sud,
bha prionnsan Iudah ann,
Le'n comhairl', prionnsan Naphtali,
is prionnsan Shebulain.
- 28 Do Dhia 'se dh'àithn is dh'orduich dhuit
do neart is fòs do throbair:
An gnìomh a rinn thu air ar son,
neartaich, a Dhé na glòir'.
- 29 Air son do theampull naoimh, a Dhé,
ta aig Ierusalem,
Do bheir na rìghre ta mu'n cuairt
deadh thiodhlaca dhuit féin.
- 30 Thoir achmhasan do luchd nan sleagh,
's do chuideachd mhòir nan tarbh,
Do laoghaibh fòs a' phobuill ud,
thoir achmhasan gu garbh,
- Le mìribh airgid gus an géill
iad sud gu léir do d' smachd:
Sgaoil thus' am pobull ud, a Dhé,
a ghabh do'n chogadh tiachd.
- 31 Thig prionnsan mòr o'n Eiphit mach,
's nì Etiopia fòs
A làmhan shineadh mach gu luath
ri Tighearna na glòir'.
- 32 O rìoghachdan an domhain mhòir,
seinnibh do Dhia gu grinn;
Do'n Dia a's Rìgh 's a's Tighearn ann,
seinnibh-sa moladh hinn.
- 33 Do'n mharcach àrd air néanib nan nàmh,
ta ann o'n aimsir chéin:
Feuch, tha e cur a mach a ghuth',
a ghuth' ta làidir treun.
- 34 Sior-thugaibh neart do Dhia: oir tha
a ghloir thar Israeil,
'S a threis a ta sna nàmhaidh àrd,
's an neulaibh tiugh' nan speur.
- 35 O d' naoimh-thigh 's uamhasach thu Dhé:
Dia Israeil gu beachd,
D'a phobull bheir sàr-neart is treoir:
's beannaichte Dia nam feart.

SALM LXIX.

- O** TEASAIRG mise, Dhé mo neart,
oir dhòirt na tuille orm,
Is thàinig fòs air m'anam bochd
na h-uisgeacha le toirm.
- 2 An làthair domhain tha mi'n sàs,
gun àit an seasainn ann;
Le h-uisgibh domhain ghilacadh mi,
is sruth dol thar mo cheann.
- 3 Taim sgìth le m' ghlaodhaich; agus tha
mo scornan loisgt' le tart:
Mo shùile ta air failneachadh,
feitheamh air Dia nam feart.
- 4 Is lionnhoire na falt mo chinn
mo naimhde gun chion-fath,
'S an dream ud fòs le'm b'àill mo chlaoidh
ro ghuineach làidir ta.
- An sin an nì nach d'thug mi leam,
dh'aisig mi uam gu beachd.
- 5 Dhia, 's nìsrach thu air m'amaideachd,
cha'n fhòluicht' ort mo lochd.
- 6 Nàir air mo sgàth-sa, Dhé, na leig,
O Thighearna nan sluagh,
Air neach air hith do'n àitim ud
tha feitheamh ort gach uair;
- An dream sin, O Dhia Israeil,
ga d'iarraidh féin a ta,
Na leig gu bràth fo nàire iad,
no masiadh air mo sgàth.
- 7 Oir masladh dh'fhuiling air do sgàth;
lionadh mo ghùis le nàir'.
- 8 Do m' bhràthraibh is fear coigreach mi,
coimheach aig cloinn mo mhàth'r.
- 9 Le eud do theach-sa shluigeadh mi;
meud 's a bheir masladh dhuit,
'S ann orms' an toibheum sud gu léir
gu leth-tromach a thuit.
- 10 M'anam tràth thraig, 's a rinn mi gul,
'n sin mhasluich iad mo ghnìomh.
- 11 'S 'nuair chuir mi umam eudach saic,
ball-magaith rinn iad dhìomh.
- 12 Dhoibhsan a shuidheas anns a' gheat',
's cùis chòmhairidh mi gach là:

- do luchd na misg' ri àm am pòit',
a'm' òran tha mi ghnàth.
- 13 Ach mise, Dhé, nì'm urnuigh riut,
san uair a's taitneach leat:
Eisd rium, a Dhé, réir meud do ghràis,
le d' chabhair fhior thoir neart.
- 14 O'n làthaich saor mi, O mo Dhia!
chum fuidh nach rachainn sìos:
O luchd mo nìh-ruin teasairg mi,
's o dhoimhneachd uisge nìos.
- 15 Na rachadh tharum tuitreach uisg',
na sluigeadh doimhneachd mi,
An slochd na druideadh orm a bheil
gu h-ìomlan chum mo chlaoidh.
- 16 Eisd rium, O Dhia, oir 's maith do ghràs:
pull rium a'd' thròcair phailt.
- 17 Do ghnùis na ceil air t'òglach féin
éisd rium gu luath, 's mi'n airc.
- 18 Ri m'anam druid, is fuasgail e:
o m' nàmhaid dean mo dhìon.
- 19 Mo mhasladh, m'eas-urram, 's mo nàir',
's mo nairmhe, 's léir dhuit féin.
- 20 Le tolbheum tha mo chridhe brist',
is mi gu h-iarganach:
Dnarr m' luchd truais is comhfhartachd,
is dhiubh cha d'fhuaras neach.
- 21 Seadh, thug iad domblas dhomh mar bhìadh,
's am lotadh thug fion geur.
- 22 Mar eangach dhoibh gu robh am bord;
's mar rib an àgh gu léir.
- 23 Gun léirsinn biodh an shùilean dall,
's an lcasraidh ghnàth air chrith.
- 24 Dòirt orra t'fhearg, 's le d'chorruich ghéir
glac iad gach uair sam bith.
- 25 Mar f'basach lom gun àiteachadh
gu robh an tàmh 's an teach,
Is anna na pàillunaibh bu leo
còmhnuidh na gabhadh neach.
- 26 Oir lean iad le dian-fhoireigneadh
an ti a bhuailleadh leat;
Is labhair iad chum dòilgheis mhòir,
do'n dream a rinn thu lot.
- 27 Cuir ciont' ri 'n aingidheachd, 's na leig
a'd' cheartas iad a teach.
- 28 A leabhar fòs nam beò gu tur
dubhar iad sud a mach;
Is maille ris na fireanaibh
a bhuincas duit gun cheisd,
Is ann an àireamh dhaoine còir
na sgrìobhar iad am feasd.
- 29 Ach mise ta gu h-ainnis bochd,
is làn do bhronn faraon:
Togadh do shlàinte mi an àird,
a Dhé, gu gràsmhor caoin.
- 30 Le h-òran binn sior-mholaidh mi
deadh ainm mo Dhé gach là,
'S a chliù-san fòs sior-thogar leam
le buidheachas gu h-àrd.
- 31 'S fearr leis an Tighearn sud gu mòr
na damh ta adharcach,
No lobairt fòs a bheireadh neach
do bhiorach crobhanach.
- 32 Na daoine séimh tràth chì iad so,
bidh aoibhneach aig gu leòr;
Is bidh 'ur cridh'-sa beò gu bràth
ta 'g iarraidh Dhé na glòir'.
- 33 Ri bochdaibh éisdidh Dia, 's cha dean
tàir air a phriosanaich.
- 34 Nèamh, muir, is tir, gu moladh e,
's gach ni ta gluasadach.
- 35 Oir bailte Iudah togaidh Dia,
is saorar Sion leis,
A chum gu meal iad i gu buan,
'ga h-àiteachadh am feasd.
- 36 Do shìochd a sheirbhisach gu fìor,
is sealbh ro-dhilleas i;
'S an dream a bheir d'a ainm-san gràdh,
sior-chòmhnuidh innte ni.

SALM LXX.

IEHOBAH Dhia, gu m' theasairginn,
's gu m' chòmhachd, deifrich ort.
2 Biodh nàir' is amhladh air an dream
sa 'g iarraidh m'anam' bhoichd:

Pillair an dream ud air an ais,
le 'm miann mo lochd a ghnath,
Mòr amhladh gu robh orra sud,
is rughadh gruaidh gach la.

- 3 Gu pillair iad san air an ais,
mar thuarasdal d'an nàir',
An dream a theig gu fanoideach,
Aha, aha, le tair.
- 4 Aoibhneas is aighear, do gach neach
ga d' iarraidh féin a ta:
Is abradh iad le 'n toigh do shlàint',
Dia gu ma mòr, a ghnàth.
- 5 Ach mise ta gu h-einnis bochd,
a m'ionnsuidh greas, a Dhia:
Mo chabhair thu, 's mo shlànuighear
moille na dean, mo Thriath.

SALM LXXI.

- 'SANN riut a ta mi 'g earbsadh, Dhé;
nàir' orm am feasd na biodh.
- 2 A'd' cheartas fòir, thoir orm dol as:
aom rium do chluas, saor mi.
- 3 A'd' charraig còmhinnidh bi-sa dhomh,
d'an tàthuichead mo shìor:
Mo chaisteal, is mo dhaingneach thu,
thug àithne chum mo dhìon.
- 4 A làimh nan aingidh, O mo Dhia,
dean fuasgladh dhomh a'm' chruas,
A làimh na muinntir eucoraibh,
a ta gun iochd, gun truas.
- 5 Oir 's tusa, Thighearna mo Dhia,
mo dhòchas ann am fheum:
O aois is almar m'òige nuas,
mo mhuinghlinn thu ro-threum.
- 6 'S ann leatsa chumadh mise suas,
o thain'geas as a' bhroinn;
A bolg mo mhàthar bhuin thu mi,
sior-mholam thu gu binn.
- 7 Mar aobhar iongantais, a Dhé,
aig mòran a ta mi;
Ach 's tusa 's téarmunn dileas dhomh,
's mo spionnadh mòr gun dìth.
- 8 Lìonar mo bheil le d' mholadh-sa,
's le t'urram féin gach ló.
- 9 Na tilg mi dhìot a'm' aois; 's na tréig
'n tràth dh'fhàillicheas mo threoir.
- 10 Oir m'aghaidh mheud 's is nàimhde dhomh
labhair gu sgaiteach geur:
'S an dream ta brath air m'anam bochd,
ghabh comhairle le chéil'.
- 11 Ag ràdh, Do thréigeadh e le Dia,
leanaibh e nis gu teann,
Is glacaibh, oir g'a theasairginn,
cha'n 'eil neach idir ann.
- 12 A Dhé, na hì-sa fada uam;
fòir orm, mo Dhia, gu luath.
- 13 Biodh nàir' is claoidh air m'eascairidibh,
'g am bheil do m'anam fuath:
Masladh is nàire fol'cheadh iad,
tha 'g iarraidh m'uile gach ló.
- 14 Sior-earbam riut, is seinnidh mi
do chliù ni 's mò, 's ni's mò.
- 15 Labhraidh mo bheil air t'fhireantachd,
's do shlàint' gach là gun sgòs:
An àireamh sud aig lìonmhòireachd
cha'n fheudar leam chur sìos.
- 16 Tre neart an Tighearna mo Dhia,
fòs gluaisidh mi a ghnàth:
Is ni mi sgeul air t'fhireantachd,
t'fhireantachd féin a mhàin.
- 17 O m'òige rinn thu teagag dhomh,
a Thighearna is a Dhé:
Is chuir mi t'òibre iongantach
gu ruige so an céill.
- 18 A nis air bhì dhomh aosmhor liath,
na tréig mi, Dhia nam feart:
Gu taisbeanainn do neart 's do threis,
do'n àl a t'ann, 's ri teachd.
- 19 'S ro-àrd do cheartas féin, a Dhé,
is rinn thu bearta mòr:
O Dhia, cò e a's cosmhail riut,
no choimeas riut is còir?
- 20 Triohlaid ro-mhòr is an-shocair,
's ta thaisbein dhomh, a Dhé;

- Ath-hheothaichidh, is bheir thu ris
o dhoimhneachd talmhainn mi.
21 Mo mhòrachd cuiridh tus' am meud,
's bheir solas air gach taobh.
22 Air saltair molam thu, mo Dhia,
seadh t'fhirinn ta ro-chaomh.
Is selnneam dhuit air clàrsaich bhinn,
O Aoiu naoimh Israeil.
23 Mo bhilean ni mòr-ghairdeachas,
tràth sheinneam dhuit le m' bheul:
Bidh subhachas is aolbheas mòr
air m'anam féin, a Dhé,
A shaoiradh leat gu trècgrèach
o 'thrioblaidibh gu léir.
24 Is bidh mo theang' air t'fhreantachd
ag iomradh feadh an là:
Oir nàir' is amhladh fhuair an dream
'g iarraidh mo lochd a ta.

SALM LXXII.

- DHIA, thoir do bhreitheanas do'n rìgh,
is t'fhreantachd a' mhac.
2 Bheir esan ceart bhreth air do shluagh,
's do d' bhochdaibh coir 'nan airc.
3 Na sleibhtean arda bheir a mach
slochairt do'n t-sluagh gu pailt;
Is bheir na tulaich bheaga sìth
le fireantachd gun airc.
4 Air daoineibh bochd a' phobuill fòs
bheir esan breth gu ceart;
Is clann nan ainnis saoraidh e,
min-bhrisidh luchd ain-neirt.
5 Am feadh bhios gràs is gealach ann,
fresdal do'n là 's do'n oidhch',
Bidh t'eagal orra-san gu mòr,
o linn gu linn a chaoidh.
6 Mar uisge air an fhaiche bhuaint'
is amhluidh thig e suas:
Mar fhrasaibh dh'uisgicheas am fonn,
is ionnan sin a glùras.
7 R'a linn-san bidh na fireanaich
gu h-ùr a' fàs le blàth:
'S am feadh a bhios a' ghealach ann,
bidh sìochaint pailt a ghnàth.
8 Bidh uachdranachd aig mar an ceudn'
o thuinn gu tuinn gu sìor,
Is ruigidh sud o'n amhainn mhòir,
gu iomall crìch gach tìr.
9 Luchd-còmhnuidh fòs an fhàsach chruaidh
sleuchdaidh iad sìos 'na làth'r;
A naimhdean imlichidh an ùir,
a' tabhairt ùmhlachd dha.
10 Rìgh Tharsis, is nan eileanan,
tìodhlacan bheir iad uath',
Bheir rìghrean Sheba, Seba fòs,
tahhartais dha gu luath.
11 Seadh, fòs 'na fhianuis sleuchdaidh sìos
gach rìgh air thalamh ta:
'S gach ginealach air feadh gach tìr,
dha seirinis ni a ghnàth.
12 An t-ainnis bochd gun chuideachadh,
saoraidh tràth dh'èigheas ris.
13 'S ni acarachd ri truaghan bochd,
is dìonar 'anam leis.
14 'Se theasairgeas an anam fòs
o fhoill 's o fhòirneart gheur:
Is fòs 'na shùilbhan gun cheisd,
's priseil am fuil gu léir.
15 Bitnidh e beò gu maireannach,
òr Sheba bheirear dha
Gnàth-urnuigh nìtheair air a shon,
is molar e gach là.
16 San talamh cuirear dorlach sìl,
air bhàrr nan sliabh 's nam beann;
Is bidh a thoradh trom air chrith,
mar Lebanon nan crann.
An dream a ta sa' chaitir mhòir,
bidh toradh orr' is blàth
Gu lionmhor, mar is dual do'n fheur
air thalamh fas a ta.
17 Bidh 'ainm-san buan gu suthain sìor,
eo-mhairreann ris a' ghréin;
Is ann-san beannaichear gach slògh;
is beannaichear leo e féin.

- 18 Beannaicht' gu robh an Tighearn Dia
Dia Israeil a ghnàth,
An ti a mhàin ni miorhhuile
le treis is neart a làimh.
19 Beannaicht' gu robh gu sìorruidh buan
ainm glòrmhor usal féin;
Lionadh a ghòir gach uile thìr,
Amen, agus Amen!

SALM LXXIII.

- GU frinneach tha Dia ro-mhaith
do phòhull Israeil,
Do'n dream 'g am bheil an cridhe glan,
tha Dia dhoibh maith d'a réir.
2 Ach air mo shon-sa, 's beag nach d'aom
mo chosa uam gu grad:
Cha mhòr nach d'rinn mo cheuma fòs
sleamhnachadh uam air fad.
3 Ri amadanaibh ghabh mi tòn,
ri faicinn soirbheis daoi.
4 Oir cuibhrichean cha'n 'eil 'nam bàs
neart làidir 's leo gun dìth.
5 Mar dhaoineibh eile cha'n 'eil iad
fo thrioblaid no fo leòn:
'S cha'n 'eil iad air an sàrachadh
mar chàch le piantaibh mòr'.
6 Ard an mar shlabhraidh, uime sin,
'g an cuairteachadh a ta;
Am fòirneart féin 'g an còmhachadh
mar eudach thart' a ghnàth.
7 An sùile sultmhor tha le saill:
an tòic chaidh thar am miann.
8 Is truaillidh iad, 's air fòirneart geur
labhraidh gu h-aingidh, dian.
9 An aghaidh fòs nan nèamh 's nan speur,
am beul do thog iad suas;
Air feadh na talmhainn is na tìr'
an teagadh-san do ghluais.
10 Fa'n aobhar ud gu ruige so,
a shluagh-san pillidh iad;
Is fàisgear dhoibh do 'n uisge mach,
làn cupain a's leòr meud.
11 Is their iad, Cia mar 's léir do Dhia?
'm bheil tuigs' san Tì a's àird?
12 Feuch, sud na daoi, tha soirbheachadh,
a' fàs 'nan stòr gach là.
13 Mo chridh' gu dearbh ghlan mi gun stà,
's an neo-chiont' nigh mo lamh;
14 Oir buailt is smachduichte ta mi
gach maduinn 's feadh gach là.
15 Nan abrainn, Labhraidh mi mar so,
feuch, pheacaichinn gu beachd,
An aghaidh slòchd is ginealach
na cloinne 's ionmhuinn leat.
16 Tràth smuainich mi gu'n tuiginn so,
bu chruaidh-cheisd orm an gnìomh.
17 Ach chaidh mi steach do naomh-thigh Dhé,
is thuig mi 'n sin an crìoch.
18 Gu deimhin chuir thu iad air fad
an àitibh sleamhuinn lom;
Is thig thu iad a sìos g' an sgrios
le dìoghaltas gu trom.
19 Feuch cionnus thàinig orra clòidh,
am mionaid bhig na h-uair?
Oir tha iad air an sgrios gu tur
le oillt is eagal mòr.
20 Mar aising 'nuair a dhùisgeas neach,
mar sin, a Dhia nan sluagh,
Nì thusa dimeas air an dealbh,
air mosgladh dhuit á suain.
21 Mar so bha air mo chridhe cràdh,
's am airmibh goimh ro-gheur,
22 Oir bha mi haath is ainealach:
mar bhrùid a'd' làth'r, a Dhé.
23 Gidheadh, tha mise maille riut,
O Thighearna, a ghnàth:
Is air mo dheas làimh ghlac thu mi,
ga m' chumail suas gach là.
24 Do nìtheair leat mo sìobradh fòs
le d' chomhairle a'm' fheum,
Is gabhaidh tu mi steach fadheòidh
a'd' àros ghloirmhor féin.
25 Cò th'agam anns na nèamhaibh shuas
ach thusa, Dhia nan dàl?

- Is cha'n 'eal neach air thalamh fòs
ach thus' am bheil mò dhuil.
- 26 Mo chridh' is m' fheòil faraoan a ta
air failleadh gun cheist:
Gidheadh 'se neart mo chridhe Dia,
's mo chuibhrionn bhuan am feasd.
- 27 Oir feuch iad sin tha fada uait,
léir-sgrìosar iad gu luath:
Oir chlaoidheadh leat gach uile neach
air strìopachas chaidh uait.
- 28 Ach dhomhsa 's maith teachd dlùth do Dhia:
dh'earb mi á Dia mo neart,
A chum gu foillsichinn gu slor
gach gnìomh a rinneadh leat.

SALM LXXIV.

- C**'ARSON a thilg thu sinne uait,
an ann gu bràth, a Dhé?
Carson ri caoraich t'ionaidraidh,
a las do chorruich gheur?
- 2 Cuimhnich, a Dhé, do choimhthiona,
a cheannaich thu o chéin;
Slat t'òighreachd fòs a shaoradh leat,
Sion do chòmhnuidh féin.
- 3 A chum nam fàsach slorruidh buan,
do chosa tog gu grad;
Is chum gach oile a rinn do nàmh
a'd' theampull naomh air fad.
- 4 Do naimhde rinn iad heucadh borb
measg coimhthionail do shluaigh:
Is chuir iad suas am brataichean
mar chomhar air am huaidh.
- 5 Bu chliùiteach neach mar dheantadh leis
a thuagh a thogail suas,
Air crannaibh àrda dosrach tiugh,
a chum an leagadh suas.
- 6 Ach nis an obair shnaidhte ghrinn,
le h-ordailbh 's tuagaibh bhriis;
7 Is chuir iad suas 'na lasair dheirg
do theampull naomh 'g a sgrìos:
- Tigh còmhnuidh naomha t'ainme, Dhé,
feuch, thruaill iad e le tair,
'G a mhilleadh is 'g a leagadh slòs
co losal ris an lár.
- 8 'Nan cridhe labhair iad mar so,
sgrìosamaid iad le chéil':
Gach Sinagag th'aig Dia san tìr,
loisgeadh iad leo gu léir.
- 9 Ar comhara cha'n fhaicear leinn;
faidh cha'n 'eal idir ann,
Ni mò tha neach 'nar measg cho geur
d'an léir cia fad an t-am.
- 10 Cia fhad a bheir, O Dhé nan dùl,
na naimhde toibheum uath'?
- An toir an nàmhaid heum am feasd
do t'ainm-sa, Dhia nan sluagh?
- 11 C'arson a phillear leat do làmh,
do dheas làmh air a h-ais?
O buin a mach o d' bhrollach i,
chum fuasgladh oirnn gu cas.
- 12 Oir Dia na gior' tha neartmhor àrd,
o chian is e mo Rìgh,
Am huiltsein talmhainn le mòr-neart,
ag oihreach' slàint' is slth'.
- 13 An fhaighe sgaoidheadh leat le d' neart,
is cinn ro-làidir chruaidh
Nan dràgon bhriseadh leat san uisg',
a' tabhairt orra huaidh.
- 14 Cinn Lebhiatain àghoir mhòir,
's tu féin a bhriis e phronn;
Is thug thu e mar bhaidh do'n t-sluagh,
a hha san fhàsach lom.
- 15 'S tu sgoilt an tobar is an tuil:
's tu thiormaich aimbne mòr'.
- 16 'S tu dheasaich solus agus grìan,
is leat an oidhech', 's an là.
- 17 Criccha na talmhainn shoeruidh thu:
rinn thu an samhradh teth,
'S an geamhradh fòs do rinneadh leat,
'nan aimsiribh fa leth.
- 18 Gu'n d' thug na naimhde toibheum uath'
cnìr sud air chuimhne, Dhé,
'S gu'n d' thug am pòhail amaideach
do t'ainm ro-ussal beum.

- 19 Anam do cholmaìn na toir suas
do chuideachd mhòir nan daoi:
Is coimhthional do dhebraidh bochd
na dearmaid iad a chaidh.
- 20 Do chumhnant thoir fa'near, a Dhé
oir àitean corch' na tìr,
Tha uile air an àiteachadh
le luchd an fhoirneirt ghéir:
- 21 Na piller air an ais le nàir
na dh'fhuiling fòirneart goirt:
An dream ta ainns aim-beartach,
deanadh iad moladh ort.
- 22 Tog ort is éirich suas, a Dhé;
tagair do chùis gu trenn:
Cuimhnich mar tha an t-amadan
gach là toirt dhuitse heum'.
- 23 Na dearmaid guth na muinntir sin
'nan naimhdeibh dhuit a ta:
Tha bruidheann dhaoin' a dh'éirich riut,
slor-dhol am meud a ghnàth.

SALM LXXV.

- D**HUIT bheir sinn buidheachas, a Dhé,
dhuit buidheachas a ghnàth:
Oir foillsichidh do mhòrbhuile
gur fagus t'ainm gach là.
- 2 Trath gheibh mi is a glàcar leam
coimhthional mòr na tìr',
Do ni mi dhoibh deadh bhrèitheanas,
gu cothromach 's gu fìor.
- 3 Sgaoidheadh an dùthaich, is an sluagh
'ga h-àiteachadh a ta:
Ach mise cumaidd suas gu treun
posta na tìr' a ghnàth.
- 4 Thuhhairt mi ris gach amadan,
na gluais gu h-amaideach:
'S ri luchd an uile, Na togaibh suas
bhuir n-adharc àrdanach.
- 5 Bhur n-adharc fòs na togaibh suas
ri cainnt le muineal cruaidh.
- 6 Cha'n ann o'n ear, no 'n iar, no deas,
tìg urram mòr no buaidh.
- 7 Ach 's breitheamh Dia: a leagas aon,
's a thogas aon fa seach.
- 8 Oir cup an làimh an Tighearn ta
do 'n fhion a's deirge dreach:
Làn coimeisg tha e, dòirtidh Dia
cuid as a mach gu grad:
A dheasgann tìsgidh daoine daoi,
is blaith iad air fad.
- 9 Ach cuiridh mise fòs an céill
gu suthain is gu slor,
Do Dhia uil Iacob canar leam
àrd-mholadh binn gu fìor.
- 10 Uil' adharca nan daoine daoi,
sgathaidh mi slòs 's gach àit;
Ach adharca nan saoi air fad
togar gu grad an àird.

SALM LXXVI.

- A**N Iudah aithnichear ar Dia:
's mòr 'ainm an Isra' naomh.
- 2 An Salem tha a phàillion fòs,
a thàmh an Sion coomh.
- 3 Saighdean a' bhogha bhris e 'n sin,
an sgiath 's an claidheamh geur,
An còmhrag is an cath faraoan,
bhriseadh iad leis gu treun.
- 4 Is mò do mhòralachd, a Dhé,
is mò gu mòr do ghloir
Na beannta thog an cinn gu h-àrd,
le cobhartach ro-mhòr.
- 5 Làn-chreachadh luchd a' chridhe chailm,
is choitil iad le suain,
Na fìr a bha 'nan curaidh mhòr',
an làmh fòs cha d'fhuair.
- 6 O thus' a's Dia do Iacob ann,
le d' achmhassn 's le d' neart,
An carhad-cogaidd is an t-each
'nan suain do chuireadh leat.
- 7 'S cùis eagal thu, thu féin, a Dhé:
cia neach a chogas riut?
No ann ad shealladh sheasas snas
an uair bhios corruich ort

- 8 Thug thusa air do bhreithcanas
o nèamh gu'n cualas e :
Bha aig an talamh eagail mòr
's 'na thàmh ghrad dh' fhuirich e.
- 9 Tràth dh'èirich Dia chum bhreithcanais,
a theasairginn san àm,
Gach uile dhuine ciùin is sèimh,
air talamh a bha ann.
- 10 Bheir fearg is corruich dhaoib' an sin
àrd-mholadh dhut gu beachd ;
Is fuigheall fòs na feirge mòir ;
làn choisgidh tu le d' neart.
- 11 Geallaibh 'ur bòid gu togarach
d'ur Dia Jehobhabh àrd ;
Is coimhlionaibh gu firinneach
na gheallair leibhe dha :
- Gach neach a ta m'a thimchioll-san
thugadh iad dha 'na àm,
Deadh-thabhartais is tiòdhilaca,
do'n ti 's cùis eagail ann.
- 12 Is e ni spiorad phrionnsan mòr
a sgathadh sìos le neart ;
Do rìghribh fòs a' chruinne-ché
's cùis eagail e gu beachd.

SALM LXXVII.

- D**H'EIGH mi ri Dia gu h-àrd le m'ghuth,
dh'eigh mi le m' ghuth gu h-àrd ;
Is thug e, 'nuair a ghlaodh mi ris,
sàr-eisdeachd dhomh gun dàil.
- 2 An là mo thrioblaid dh'iarr mi Dia :
is slruth mo leòn gun sear,
Rè fad na h-oidhch' : is m'anam truagh
sòlas do dhiùlt gu tur.
- 3 Air Dia ghrad-chuimhnich mi an sin,
is mi an trioblaid ghéir :
Ris rinn mi gearan trom gun tàmh,
chlaoidheadh mo spiorad féin.
- 4 Chum thu mo shùil 'na làireachadh :
tha mi co iarganach,
Nach feud mi focal cainnt no sgéill
labhairt le m' bheul a mach.
- 5 An sin air làithibh fad o chéin
smuainich mi féin le beachd ;
Air bliadhnaihb fòs na h-ainisir céin
am aire féin bha teachd.
- 6 Seadh chuimhnich mi mo cheòl san oidhch',
's rinn cainnt ri m' chridhe féin,
Is rinn mo spiorad fòs gun tàmh,
le diùltioll, sgrudadh geur.
- 7 An tilg an Tighearna uaith gu bràth ?
nach nochd e 'ghràdh ni 's mò ?
- 8 'N do seir gu tur a ghràs am feasd ?
's a ghealladh fad gach lò ?
- 9 'N do dhearmaid Dia gu firinneach
bhi gràsmhor caoin gu bràth ?
'N do dhruid e suas 'na chorruich mhòir
a thròcair chaomh 's a ghràdh ?
- 10 An sin ghrad thubhairt mi gu dearb
is i so m'anmhuinn mhòir ;
Ach bliadhnaid deas làimh' cuimhnicheam,
an Ti a's àirde glòir.
- 11 Gníomhara Dhé sior-mheòraicheam,
mar rinneadh leis gach beart,
Is t'iongantais o'n aimsir chéin
sior-chuimhnicheam gu beachd.
- 12 Air t'oibribh uile mar an ceudn'
smuainichidh mi gu tric ;
Is air gach gnìomh a rinneadh leat,
sior-labhaird mi gu glie.
- 13 Do shlighe ta san ionad naomh,
a Thighearna is a Dhé :
Cò 's coimeas ann am meud ri Dia
a ta 'na Dhia dhuinn féin ?
- 14 'S tu 'n ti ta deanamh iongantais,
a Thighearna nam fear ;
Is ann am measg a' phobuill fòs
do thaisbein thu do neart.
- 15 Do shaoradh leat d'an teasairginn
do phobull dileas féin,
Clann Iacob agus Ioseph fòs,
le d' ghairdean neartnuh treun.
- 16 Chunnaic na h-uisgeachan thu, Dhé,
chunnaic iad thu gu beachd :

- Is ghabh iad géilt ; 's air doimhneachd fòs
bha mòran oghuidheachd.
- 17 An uisge dhòirt na neoil a nuas,
bu ro-mhòr fuaim nan speur ;
Is chaidh do shaighde corranach
a mach gu sgaiteach geur.
- 18 Àrd-ghuth do thairneanaich san speur,
chualas, a Dhé, gu tric ;
An saoghal las le d' dhealanaich,
an talamh ghluais is chlig.
- 19 Do cheuma tha san doimhneachd mhòir,
do shlighe tha sa' chuan :
Ach luirg do chos cha'n aithnich sinn,
tha sud am folach uainn.
- 20 Is amhluidh mar gu'm biodh ann treud,
do phobull stiùireadh leat ;
Le deadh làimh Mhaois is Aaroin fòs
'g an treòrachadh gu ceart.

SALM LXXVIII.

- M**O phobull éisdibh ri mo reachd ;
is cluinnibh guth mo bheil.
- 2 Am briathraibh fìlidh cuiridh mi
sean-fhocail dhorch' an céill :
- 3 A chuala sinn o'r sinnsearaibh,
is air an b'fhiosrach sinn,
4 Cha'n fhòlaich sinn o'n ginealach,
's cha cheil sinn iad o'n cloinn ;
- A' foillseachadh àrd mholaidh Dhé
do 'n àl a ta ri teachd ;
'S na mìorbhuilean a rinneadh leis,
a chumbhachd is a neart :
- 5 Oir lagh an Iacob dhaingnich e,
is reachd an Israel,
A dh'orduich e d'ar n-aithrichibh,
d'an cloinn an cur an céill.
- 6 Chum fòs bhi aig an àl ri teachd,
a' chlànn a ta gun bhreith :
'S gu'n innseadh iad do'n linn 'nan déigh
na nithe sin fa leth.
- 7 An Dia gu'n cuireadh iad an dòigh,
's nach deantadh d'chuimhn' leo
Air oibribh Dhé, 's gu'n gleidheadh iad
a reachda mar is còir :
- 8 'S nach biodh iad mar an sinnsireachd,
làn ceannairc is droch-bheirt,
Gun spiorad tairis ann' do Dhia,
's an cridhe gun bhi ceart.
- 9 Claun Ephraim le armaibh gleust',
air bogh' bu chuimsseach beachd,
Ach phill iad air an ais le géilt
an làithibh cath' is feachd.
- 10 Coimhcheangal Dhé nìor ghleidheadh leo.
is dhiùlt iad géill d'a reachd ;
- 11 'S na mìorbhuilean a nochd e dhoibh
a' n' cuimhne leig gu beachd.
- 12 An sealladh sùl an aithriche,
seadh fòs an tìr na h-Eiph't,
'S air machair Shoin nochdadh leis
a mhiorthuilean ro threun.
- 13 Sgoilt e an fhaireg', 's thug iadsan trid ;
mar thorrr na h-uisgean sheas.
- 14 San là le neul iad stùir, san oidhch'
le solus tein' gu deas.
- 15 Sgoilt creag san fhàsach, aisde deoch
thug, mar a doimhneachd mhòir ;
- 16 Bhuin sruth a creagaibh, thug air uisg'
ruith sìos mar thuil gu leòr.
- 17 San fhàsach pheacaich iad ni 's mò ;
is bhrosnuich an t-Àrd Rìgh.
- 18 'Nan cridhe chuir iad cathadh air ;
d'am miann ag iarraidh bìdh.
- 19 Labhair iad fòs an aghaidh Dhé ;
is thubhairt iad gu dian,
An urrainn Dia san fhàsach mhòr
bòrd dheasachadh d'ar miann ?
- 20 Feuch, bhuail e chreag, bhrùchd uisge mach,
dh'èirich an tuil gu luath.
Am feud e aran thabhairt fòs ?
an deasaich feibh d'a shluagh ?
- 21 Air cluimntinn so, ghabh corruich Dia ;
ri Iacob teine las,
Is dh'èirich fearg ro-dhoinionnach
ri Israel gu cas :

- 22 Chionn nach do chreid iad ann an Dia,
's nach d'earb iad as a shlàint';
- 23 Ged dh'fhosgail dorsa nèamha fòs,
's na neòil o'n àird ged dh'aithn.
- 24 Ge d' dhòirt e orra Mana nuas,
ge d' fhuair iad coirc nan speur,
- 25 Biadh aingeal dh'ith iad: thug e dhoibh
do lòn an sàth gu léir.
- 26 San speur thug e air gaoith an ear
gu'n d'imich i gu treun:
Is thug e fòs le neart a steach
a' ghaoth dheas mar an ceudn'.
- 27 Fòs dhòirt e orra nuas mar dhus,
do fheòil an uile bhàth;
'S eoin iteagach bu lloinnhoira
na gaineamh air an tràigh.
- 28 Do leig e sùd 'nan camp a nuas
mu'n cuairt 'nan àitean-tàimh.
- 29 Seadh dh'ith iad uile 's shàsaicheadh;
oir thug e dhoibh an sàimh.
- 30 Cha robh iad air an sgarachduinn
o mhiann an cridhe féin;
Ach air bhith aca-san am biadh
'g a chagnadh dian 'nam beul,
- 31 A' chuid bu shultmhòir' diubh 's bu tréin',
ghlac Dia 'na fheirg is mharbh:
'S an oigridh thaght' an Israel,
ghrad-bhuailleadh leis gu garbh.
- 32 Gidheadh an déigh gach gnolmh dhiubh sud,
do pheacaich iad gu mòr;
Is ge do rinn e miorbhuilean,
nior chreid iad mar bu chòir.
- 33 An làithean chaithe e, uime sin,
an diomhanas air fad;
'Sam bliadhnaidh thairis chaidh gu léir
le carroid ghéir gu stad.
- 34 An uair a mharbhadh leis-san iad,
an sin ghrad-iarr iad e,
Seadh phill iad, agus bha iad fòs
gu moch ag iarraidh Dhé.
- 35 Is chuimhnich iadsan gu'm b'e Dia,
an carraig threun a ghnàth:
Is gu'm b'e fòs an Dia a's àird'
b'fhear-saoraidh dhoibh gach là.
- 36 Ach rinn iad mìodal ris le 'm beul,
le 'n teangaigh breug is gò:
Cha robh an cridhe ceart; 's cha robh
'na chùmhnannt dìleas da.
- 38 Ach Dia, gu ìochdmhor mhaith an lochd,
's an sgrìos cha d'rinn gu geur;
Bu tric a phill e 'chorruich uath',
's nior dhùsg e 'fhearg gu léir.
- 39 Oir annta chuimhnich e nach robh
ach feoil thèid as mar bhàith,
Is osag ghaoith' a ghabhas seach,
's nach pill a ris gu bràth.
- 40 Cia tric a bhrosnuicheadh e leo
san fhàsach thartmhor chruaidh;
San dithreach chuireadh corruich air
le eusaontas an t-sluaigh?
- 41 Seadh phill iad uile air an ais,
bhrosnuich iad Dia le chéil':
Is chuir iad tomhas mar an ceudn
air Ti naomh Israel.
- 42 Dhìchuimhnich iad, 's cha d'thug fa'near
a ghairdean treun 's a làmh:
No 'n là san d'thug e furtachd dhoibh,
is fuasgladh deas o 'n nàmh:
- 43 No fòs mar rinneadh anns an Eiph't,
comhara Dhé nam feart;
Air machair Shoam mar an ceudn'
a mhorbhuile le neart.
- 44 An srutha chaochall e gu fuil:
's na h-uillt nach feudtadh 'n òl.
- 45 Chuir losgairn thuc', is cuileagan;
's leo chlaoidheadh iad gu mòr.
- 46 An toradh thug e is am bàrr
do'n bhruras sgrìosach bheag;
Is saothair fòs an làmh air fad,
fo aighios locust leag.
- 47 Am fion-chroinn bhris e mar an ceudn'
le cloich-shneachd chruaidh 's gach àit;
Is amhluidh mhùil le roadhann teann
an cranna-fìgis àrd.
- 48 Am feudail fhug e thairis fòs
do 'n chloich-shneachd sgataich: ghéir;
'S le saighdibh teine-dealanaich,
ghrad-chuir e as d'an treud.
- 49 Teas feirge, trioblaid, 's corruich mhòr,
sud thilg e orr' gu grad;
Le ainglibh olc a chur 'nam measg
gan claidh gu goirt air fad.
- 50 D'a chorruich rinn e bealach réidh:
'n anam nior chum o'n bhàs;
Am beatha thrugh thug thairis fòs
do ghalar-plàigh 's do'n chàs.
- 51 Throm-bhuailleadh leis-san anns an Eiph't,
gach ceud-ghin a bha ann:
Toiseach an neirt sna pàilliuinibh
a bha aig gineil Ham.
- 52 Ach thug e mach a phobull caomh
mar chaoirich as an tìr;
Is rinn mar threud san fhàsach mhòr,
an treòrachadh gu fìor.
- 53 Leis stiùireadh iad gu téaruine
gun eagal is gun sgàth:
Ach air an naimhdeibh dh'iadh an cuan,
's an sluaigh ud uile bhàth.
- 54 Gu crìochaibh ionaig naomha féin
thug e a phobull leis:
Gu ruig an cnoc so choisinn e,
's a bhuaidhaich a làmh dheas.
- 55 Thilg e na cinnich rompa mach,
's an oighreachd roinn le crann:
Do Isra'! thug e'n àite sud
gu còmhnuidh ghabhail ann.
- 56 Ach bhrosnuich agus ghrànaich iad
an Dia a's àirde glòir;
Is idir cha do choinnidh iad
a naomh-reachd mar bu chòir.
- 57 Ach phill iad mar an sinnseara,
's gu fealltach ghluais air fad:
Mar bhogha fiar chaidh iad a thaobh,
is chlaon iad uath gu grad,
- 58 Le 'n dealbhaibh, is le'n àitibh àrd'
chuir iad air fearg is eud:
- 59 Tràth chuala Dia bha corruich air
is gràin ri Israel.
- 60 Ionann a phobull gu'n do thréig,
an Sìlòh chuir a làmh:
'S am pàilliu fòs a shocruich e
measg dhaoine ghabhail tàimh.
- 61 Gu bruid thug suas an neart, 's an glòir
gu làmh nan naimhde garg.
- 62 Do 'n chlaidheamh thug e suas a shluaigh,
ri 'oighreachd gabh e fearg.
- 63 An teine loisg an oigridh ghleust';
pòsadh cha d'fhuair an òigh'n.
- 64 An sagairt thuit le claidheamh geur
's cha d'rinn am bantraich bròn.
- 65 Ghrad-mhosgail Dia an sin, mar neach
ag éirigh as a shuain:
Mar churaidh 'n déigh bhì pòit air fion
tràth ni e iolach chruaidh.
- 66 'Nan deireadh bhuaileadh leis gu geur
a naimhde féin le tair:
Is chuir e iad o sin a mach
gu maslaidh buan is nàir'.
- 67 Is pàilliu Ioseph dhiùltadh leis
nior thagh treubh Ephraim fòs:
- 68 Ach thagh e Iudah, sliaibh Shìoin fèan
d'an d'thug e gràdh gu mòr.
- 69 Thog esan 'fhàrdoch naomh an sud,
mar luchairt àrd ro-dheas:
'S mar ionad àrd air talamh teann
a dhaingnich e am feasd.
- 70 Is 'òglach Daibhidh thagh, is thug
o chrò nan caorach e:
- 71 'S o leantuinn fòs nan caorach trom
le h-àl am measg an spréidh;
Is thug se e a bheathachadh
Iacoib a phobull naomh,
Is gineal Isr'eil mar an ceudn'
a b' oighreachd dha ro-caomh.
- 72 Réir ionracais a chridhe féin,
bheathaich e iad gu beandh:
A réir deadh sheòltachd fòs a làmh,
stiùireadh leis iad gu ceart.

SALM LXXIX.

- T**HAINIG, a Dhé, na fineachan
a steach do d' oighreachd féin,
Thruaill iad do theampull naomh, is dh'fhàg
'na tòrr Ierusalem.
- 2 Is thug iad cuirp do sheirbhseach
mar bhiadh do eoin nan speur:
Is feoil do naomh mar chobhartach,
do bheathaichibh an t-sléibh.
- 3 Mu thimchioll fòs Ierusalem,
dhòirt iad an fuil mar uisg:
Is cha robh neach g'an adhlacadh
's g'an cur san uaigh an taisg.
- 4 Ball fanoid agus maslaidh sinn
d'ar coimhearsnachaibh féin:
Cùis spòrs is mhagaidh do gach neach
a ta m'ar cuairt gu léir.
- 5 Cla fhad a bhltheas corruich ort,
a Dhé, am bi gu bràth?
Is t'eud am bi a' losgadh ruinn
mar lasair theith a ghnàth?
- 6 Do chorruich air na cinnich dòirt
aig nach 'eil eòlas ort;
Is air na rìoghachdaibh nach gairm
air t'ainm, a Dhia nam feart.
- 7 Oir mhill iad Iacob, 'f hàrdoch fòs
'na fàsach chuir iad sìos.
- 8 Na peacaidh fòs a rinneadh leinn
na cuimhnich dhuinn a ris;
Tionndadh gu luath do thruacantas,
ruigeadh e oirnn mu thràth:
Oir 's diblidh bochd a nis ar staid
a' tuiteam sìos gach là.
- 9 Dean còmhnaidh leinn, O Dhé ar slàint',
air sgàth glòir t'ainme féin;
Sgàth t'ainme saor sinn, agus glan
ar peacaidh uainn gu léir.
- 10 Ciod uime 'n abradh fineacha,
c'àit bheil a nis an Dia?
Measg fhuineacha 'nar sealladh féin,
aithnicheadh iad an Triath,
Le dìoghaltas a ghabhail diubh;
oir dhòirteadh leo gun lochd
Fuil neòchiontach do sheirbhseach,
gu saolbhir is gu tric.
- 11 Osnaidh a' phriosanaich a'd làth' r
thigeadh, a Dhé nam feart;
'S an dream a dh'orduicheadh chum bàls
saor-sa, réir meud do neirt.
- 12 Riusan tha dhuinn 'nan coimhearsnaich
'nam brollach, diol am beum:
Gach masladh le'n do spreig iad thu,
seachd uaire pill riu féin.
- 13 Treud t'ionaltraidh, 's do phobull sinn,
molaidd sinn thu a ghnàth;
Is ouiridh sinn an cèill do chliu
o liun gu linn gu bràth.

SALM LXXX.

- E**ISD, aodhair Israeil, a stiùir
Joseph mar theud le d'làimh.
Thusa ta d' thàmh measg cheruban,
dealruich a mach mu thràth.
- 2 An làthair Ephraim 's Bheniamin,
agus Mhanaseh fòs,
Dùisg-sa do chumhachd: agus thig
g'ar saoradh mar is nòs.
- 3 Pill sinn a ris, a Dhé nam feart:
tog oirne suas gu h-àrd
Deadh dhealradh glan do ghnùise nis,
is saorar sinn le d' ghràs.
- 4 Cia fhad, a Thighearna nan sluagh,
a leanas corruich riut,
Bi guidhe ghéir na muinntir sin
a's pobull dileas duit?
- 5 Oir bheathaich thu do shluagh gu léir
le aran deur is bròin:
Is tomhas saoiubhir thug thu dhoibh
do dheuralbh goirt r'an òl.
- 6 Is rinn thu sinn mar aobhar strì
d'ar coimhearsnachaibh féin
'Nar n-aobhar spòrs' is abhacais
d'ar n-eascaidibh gu léir.

- 7 Pill sinn a ris, O Dhé nan slògh;
tog oirne suas gu h-àrd
Deadh dhealradh glan do ghnùise nis,
is saorar sinn le d' ghràs.
- 8 Thug thu fionain as an Eiphit:
na cinnich thig thu mach,
Is shuidhich thus' an fhionain ud
'nan ionad sud fa seach.
- 9 Réidich thu hite dhì: Is ghabh
i freunth gu daingean teann,
Le d' bheannachadh; is lionadh leath'
an tìr o cheann gu ceann.
- 10 Na cnuie ro-àrda dh'f'holuich i
le sgàil 's le dubhar féin:
A geugan bha a cinneachduinn
mar sheudair àluinn réidh.
- 11 An dara taobh gu ruig an cuan
chuir i a mach a meòir;
An taobh ud 'eil a gengan shin
gu ruig an aubhainn mhòir.
- 12 A callaid o'ufm' a bhriseadh leat!
ionnus gu bheil gach neach
Théid seachad air an rathad mhòr,
'ga spionadh leo fa seach.
- 13 Tha'n tore a thig o'n choille mach
'ga fàsachadh gu léir,
Tha beathaich allt' na macharach fòs
'ga slugadh suas le chéil'.
- 14 Pill, guidh'mid ort, a Dhé nan sluagh,
is seall o nàmh a nuas,
Feuch, agus fiosaich féin a nis
an fhionain so le truas.
- 15 Am fion-los sin a shuidhich thu,
le neart do làimhe deis':
'S am meanglan ud a neartaich thu
dhuit féin le lùth is treis.
- 16 Le lasair theine loisgeadh i,
is ghearradh i a nuas:
Làn-mhilleadh agus sgriosadh iad,
le achmhasan do ghrùis.
- 17 Air fear do dheas làimh féin, a Dhé,
gu rohh do làmh gn treun:
Air mac an duin' a rinneadh leat
a neartachadh dhuit féin.
- 18 Mar sin cha phill sinn uait a ris;
ath-bheothaich sinn gach lù,
Is gairmidh sinn air t'ainm an sin,
an cian a bhios sinn beò.
- 19 Pill sinn a ris, a Dhé nam feart,
is foillsich féin gu h-àrd
Deadh dhealradh glan do ghnùise nis,
is saorar sinn le d' ghràs.

SALM LXXXI.

- S**EINNIBH gu h-ait do Dhia ar neart;
Dhia Iacuib fòs gu binn,
- 2 Is glacaibh salm, is tiompan fòs;
saltair is clàrsach ghrinn.
- 3 An trompaid séidibh san ré nuadh:
air làithibh orduicht' féill'.
- 4 Bu lagh sud aig Dia Iacuib fòs;
's bu reachd do Israel.
- 5 Do Joseph dh'orduich sud mar theist,
air dol dha trid na h-Eiph't;
'S an cualas cainnt is uirghloll fòs
nach tuiginn as am beul.
- 6 O'n uallach shaor mi 'ghuala-san:
o obair chrè a làmh.
- 7 Ghair thusa ann ad thrioblaid orm,
is shaor mi thu gun dàil:
Ad ionad dlomhair tairneanaich,
do fhresgar mi do ghlaodh:
Aig uisgibh comhstri Mheribah,
do dhearbh mi thu faraon.
- 8 Eisd, O mo shluagh, is bheir mi dhuit
deadh f'hanuis fòs gu ceart,
Ma dh'éisdeas tu ri guth mo bheill,
O Israeil gu beachd.
- 9 Annad na biodh aon uair air bith
dia eile coigreach bréig,
Is do dhia coimheach fòs air bith
na cron-sa sìos 's na géill.
- 10 'S mise do Dhia Iehobhah treun,
thug thus' o'n Eiph't le neart;

- Gu farsuinn fòsgail rium do bheul,
is lionam e gu pailt.
- 11 Gidheadh cha d' thug mo phobull féin
éisdeachd do ghuth mo bhéil,
'S cha ghabhadh rium an aitim ud
a ghin o Israel.
- 12 Mar sin do nhlann an cridhe féin
thug nise thairis iad:
'S ghluais iad 'nan comhairle neo-ghlic
'a' cur an ciont' am meud.
- 13 O b'fhearr gu'm biodh mo phobull féin
a' tabhairt géill do m' reacbd:
Is fòs gu'n ghluaisheadh Israel
a'm' shlighibh féin gu ceart!
- 14 An naimhde smachdaichinn gu luath,
le buaidh 'g an leagadh sìos;
Is phillinn air an eascairdibh
mo làmh, g'an cur fo chlis.
- 15 Luchd-fuath' an Tighearna mar sin
bheireadh làn-bhlachd dha;
Ach biodh an aimsir-san ro-bhuan
is maireannach gu bráth.
- 16 Is bheireadh e gu'm beathachadh,
snior cruithneachd fòs d'a shluagh:
Do làn-dbiol bheirinn duit faraon
do'n mhil o'n charragh chruaidh.

SALM LXXXII.

- A**N coimhthional nan treun a ta
'na sheasamh Dia nam feart:
Am niasg nan dée bheir esan breth
le cothrom is le ceart.
- 2 Cia fhad a bheir sibh breitheanas
gu le-eucorach 's gach cúis;
Toirt leth-bhreth air na daoineibh daoí,
'gam meas a réir an gnúis?
- 3 Do dhaoineibh bochd 's do dhilleachdain
deanaibh-sa dìon le ceart:
Is cumaibh còir riu sud a ghnáth
ta cráiteach bochd gun neart:
- 4 An t-ainnis lag 's an deoradh truagh,
sior-theasairgibh 'nam feum,
Deanaibh o làmh nan aingidh fòs
deadh-fhuasgladh dhoibh gu treun.
- 5 Eòlas no tuigse cha'n 'eil ac',
a' triall san dorcha taid;
Tha bunaite na talnhaínn fòs
air gluasad as an àit.
- 6 Is dée sibh (thubhairt mi,) 's 's mic
do'n Tì a's airde 'nann:
- 7 Ach tuitidh, 's gheibh sibh bàs mar dhaoín,
's mar aon do phrionaiseibh fann.
- 8 Dhia, éirich, air an talamh dean
deadh bheirtheanas gu grad;
Oir gabhaidh tu nar oighreachd dhuit
na fíneachan air iad.

SALM LXXXIII.

- N**A bi a'd' thosd a nìs, na bi
a'd' thàmh, O Dhia ar neart,
Na bi-sa samhach nìs 'nar feum',
Dhia chumhachdaich nam feart.
- 2 Oir feuch, a ta do naimhde treun
ri strì is bnaireas ard;
'S an dream ud leis am fuathach thu,
an cinnt thog suas an àrd.
- 3 Oir dhealbhadh iad oile gu cuilbheartach
'n aghaidh do phobull féin,
'N aghaidh do naimhdeir dhìomhair fos,
ghabh comhairle le cheil'.
- 4 A deir iad, thigibh leinn g'an sgrios
o bhì nì 's mò 'nan sluagh;
A chum nach biodh air Israel
iomradh gu bráth no luaidh:
- 5 Oir ghabh iad comhairle le cheil':
a' t'aghaidh ceangal rinn.
- 6 Pàilltinn Edoim, 's Ismaelich,
Moab is Hagaren;
- 7 Gebal, Amon, is Amalec,
Palestin, 's nuinntir Thior;
- 8 Dhruid Asur leo: 's bu chòmhnaidh iad
do ghineil Lot gu fìor.
- 9 Mar rinneadh leat air Midian,
s air Sisera le cheil';

- Air Tabin aig sruth Chisoin cas,
dean orra sud d'a réir:
- 10 Aig Endor mar a chaidh an claidh
mar aolach air an làr.
- 11 Air Oreb mar rinn thu, 's air Seeb,
dean air an uaislìbh tair:
- Mar Sheba fòs is Shalmuna,
am prionnsan dean gu léir
- 12 A thubhairt, Glacamaid dhuinn féin
mar oighreachd àros Dé.
- 13 Dean iad mar asbhuan, O mo Dhia;
mar mhill roimh ghaoith nan gleana.
- 14 Mar chlaoidheas teine coilteach chrìon,
's mar loisgeas lasair beann:
- 15 Mar sin le d' dhoineinn orra sud,
dean thusa tòrachd dhian;
Le d'iom-ghaoith, is le d' dhoineinn mhòir,
cuir orra geilt is fiamh.
- 16 An eudan lion le masladh mòr,
's le rughadh-gruaidh' gach ré,
Gu ruig an uair an iarrar leo
t'ainm glòrmhor féin, a Dhé.
- 17 Biodh amhluidh orra mar an ceudn',
is trioblaid mhòr a chaoibh;
Is glacadh nàire mhaslach iad,
g'am milleadh is g'an claoibh.
- 18 Gu'n-aithnich iad gur tusa mhaín
d'an ainm Iehobhah treun,
Tha t'uaichdaran os ceann gach tìr'
san domhan mhòr gu léir.

SALM LXXXIV.

- C**IA mòr an airdh-ghràidh do theach,
Iehobhah mhòr nan sluagh!
Cia taitneach dhomh-sa t'àros naomh,
O Thighearna nam buadh!
- 2 Tha m'anam fann, aig meud a mhiann
air cùirtibh Dhé gach lù;
Mo chridh is m'fheòil ri scairteachd chruaidh
'n geall air an Dia ta beò.
- 3 Feuch fhuair an sud an gealbhonn beag
tigh-còmhnuidh maith 'na fheum,
San gobhlan-gaoithe mar an ceudn'
do sholair nead dhi féin.
Is taisgadh i an sin a h-eoin,
's a h-àlach beag gun chli:
Aig t'altair féin, O Dhia nan sluagh,
mo Thighearna, is mo Rìgh.
- 4 'S beannaicht' an dream an còmhnuidh ta
a'd' àros naomh, a Dhé,
Oir bheir iad, (mar is cublaidh dhoibh),
mòr-mboladh duit gach ré.
- 5 'S beannaicht' an duine sin 'gam bheil
annads' a neart gach là:
An dream 'gam bheil 'nan cridhe stigh
do shlighe féin a ghnáth.
- 6 An dream sin tre ghleann Baca théid,
nì tobair ann, 'nam feum:
Is lìonaidh 'n t-uisge thig a nuas
na sluic gu ruig am béil.
- 7 Sior-ghluaisidh iad mar sin gun sgios,
a' dol o neart gu neart:
An Sion nochdar iad fàdheòidh
an làthair Dhé nam feart.
- 8 O Dhia nan sluagh, cluinn m'urnuigh féin,
Dhé Iacob, éisd gu grad.
- 9 O Dhia ar sgiath, feuch 's amhaire air
gnùis t'ungaidh féin gun stad.
- 10 'S fearr là a'd' chùirt na mìle là:
b'fhearr leam bhì dorsaireachd
An àros Dé, na m' còmhnuidh fòs
am pàilltinn aingidheachd.
- 11 Oir 's grinn, 's is sgiath Iehobhah Dia;
is bheir e gràs is glòir;
'S cha chum e maith air bith o'n dream
ghluaisèis gu dìreach còir.
- 12 O Thighearna is a Dhia nan sluagh,
is beannaicht' e gun cheisd,
An duine sin, gu mninghineach,
d'an dòchas thu am feasd.

SALM LXXXV.

- B**HA thusa gràsmhor fàbharach,
a Dhé, do d' dbùthaich féin;

- Bruid Iacoth thug thu air a b-ais
a ris le d' ghairdean treun.
- 2 Cionta do phobuill mhaith thu féin;
dh'fholuich thu 'n uile lochd.
- 3 Choisg thu do chorruch uile, 's phill
o'n lasan a bha ort.
- 4 Pill sinn a ris, a Dhia ar sláint',
is tog do lasan dhinn.
- 5 Am bí do chorruch ruinn gu bráth?
s an sinear t'fhearg gach linn?
- 6 Nach deanar leatsa, Dhia nan grás,
a ris ar tabhairt beò:
Gu'n deanadh annad gairdeachas
do phobull féin gach ló?
- Taishein do thrócáir dhuinn a nis,
a Thlighearn is a Dhé:
Is deonúich dhuinne t'fhurtachd fós,
's do shláinte féin gach ré.
Nis éisdeam ris an ní thair Dia:
labhraid he sith gu beachd
R'a phobull naomh; 's na pilleadh iad
a ris chum amaideachd.
- 9 Gu dearbh tha 'chabhair dlúth do'n dream
d'an eagal e gu fíor;
Chum glóir a bhí 'na còmhnuigh fós
gu bunaiteach 'nar tír.
- 10 Tha thrócáir agus fírinn ghlan
air còmhlaichadh a cheil':
Tha ceartas agus síochant mhaith
a' pógadh beul ri beul.
- 11 Is fásaidh as an talamh fós
fírinn a níos gu pailt:
Is seallaidh ceart is fireantachd
o réamh a nua gun airc.
- 12 Is ambluigh bheir Iehobhah dhuinn
ní maith gu toirbheartach;
Is bheir ar fearann is ar fonn
deadh thoradh trom a mach.
- 13 Sior-ghluaisidh ceart is fireantachd
'na fhianuis-san gu réidh:
Is sinn air sligh' a cheumanna
gu díreach stiúraidh e.

SALM LXXXVI.

- A**OM rium do chluais is cluinn mí, Dhia,
oir tha mí ainns truaigh:
- 2 Dean thusa, cibionn gu 'm buin mí dhuít,
m'anam a dhion gu luath:
Oir 's tu mo Dhia, saor t'òglach féin
tha 'g earbsadh riut a ghnáth.
- 3 Dean thrócáir orm, a Dhia, le lochd
oir gaiream ort gach lá.
- 4 Dean anam t'òglach dhileis féin
fíor-aoibhinn agus ait:
Air son gu'n togam riut, a Dhé,
m'anam gu léir a'm airc.
- 5 Oir tha thu féin ro-mhaith, a Dhé,
làn lochd is acarachd:
as tha thu do na ghairmeas ort,
pailt ann an thrócaireachd.
- 6 Eisd m'urnuigh, Dhia; is thoir fa'near
guth gearanach mo chaoidh.
- 7 An là mo thrioblaid gaiream ort:
oir freagraidh tusa mí.
- 8 Am measg nan dée cha'n 'eil, a Dhia,
aon neach tha cosmhuil riut:
No gníomh air bith tha cosmhuil ris
gach gníomh a rinneadh leat.
- 9 Thig iad, gach cinneach rinneadh leat,
is sleuchdaidh dhuít, a Dhé,
Is bheir iad glóir is moladh árd
do t'ainm-sa feadh gach ré.
- 10 Air son, a Dhé, gu bheil thu mòr,
's gu'n deanar oibre leat
Tha míorbhuileach; 's tu féin a mhàin
Dia cumbhachdach nam fear.
- 11 Do shlighe teagaisg dhomh, a Dhia,
a'd' fhirinn gluaisidh mí:
Chum eagal t'ainme gu'n bheadh orm
mo chridhe druid riut féin.
- 12 Le m' uile chridh' árd mholam thu,
O Thighearna mo Dhia:
Do t'ainm ro-uasal bheir m'í fós,
árd glóir air feadh gach ial.

- 13 Oir s mòr do thrócáir dhomhsa, Dhé,
is fós o ifrinn shíos
Thug thusa saors' do m'anam bochd,
is thog thu e a níos.
- 14 Luchd-árdain dh'éirich rium, a Dhé,
is cuideachd láidir dhian,
'G iarraidh m'anam', ach thusa', a Dhé,
níor chuir iad rompa riamh.
- 15 Ach tha thu, Dhé, mòr-thrócaireach,
ro-íochdmhor anns gach càs:
Chum feirge mall, ach saobhair pailt
am fírinn is an grás.
- 16 O pill rium, is dean thrócáir orm,
thoir neart do t'òglach féin,
Do mhac do hhanoglaich faraon
dean fuasgladh ann a fheum.
- 17 Comhair air maith nochd dhomhsa, Dhia,
luchd m'fhuath' gu'm fáiceadh e,
'S gu'n gabhadh nàir, a chionn gur tu
mo neart, is m'fhurtachd féin.

SALM LXXXVII.

- T**'HA 'bhunaite sna sléibhtíh naomh';
2 'S ro-ionmhúineach le Dia
Geatacha Shíoin, thar gach áit
a bha aig Iacób riamh.
- 3 Níthe ro-ghlórmmhor innsear ort
a chaithir aluinn Dé.
- 4 Rahab, is Babel cuimhnícheam,
do'n dream d'an aithne mí;
Gabh beachd air Tírus mar an ceudn',
is dùthaich Phalestin,
Maille ri Etiopia;
Am fear so rugadh 'n sin.
- 5 M'u thimchill Shíoin threiar so,
am fear so rugadh fós,
'S am fear ud inné; an Tí a's áird
socrachidh i air chóir.
- 6 Tráth sgríobhas Dia le cuimhne mhaith
na fíneacha fa leth,
'N sin áirmhidh e gu'm h'ann an sud
bha 'm fear so air a bheirthe.
- 7 Luchd-seinn nan óran bíd an sud,
luchd innil-ciuil d'an réir:
'S ann annad féin, a Dhia nan grás,
mo thobair tha gu léir.

SALM LXXXVIII.

- I**EHOBBAH Dhia mo Shlánuighir,
ort ghair m'í dh'oidhch' 's a lá.
- 2 A'd' fhianuis thigeadh m'urnuigh fós;
is éisd mo ghlaodh a ghnáth.
- 3 Oir m'anam lán do thrioblaid ta;
's do'n uaigh mo bheatha dlúth.
- 4 Seadh mheasadh mí mar neach théid síos
do'n t-slochd, is mí gun lúth.
- 5 Saor tha mí measg nam marbh, is fós
mar mharbh san uaigh gun deò,
A sgathadh síos le d'láimh gu beachd,
's nach cuimhnícheam ní 's mó.
- 6 Chuir thu m'ín áite domhain, dorch,
san t-slochd a's isle t'ann.
- 7 Is chlaoidh thu mí le d' shumainneadh
luidh orm-sa t'fhearg gu teann.
- 8 Chuir thu luchd m'eòlais fada uam;
's ro-sgreataidh mise leo;
Mar neach am príosán druid' a taim,
nach faigh a mach ní's mó.
- 9 Do hhrigh mo thrioblaid tha mo shùil
ri caoidh is hròn a ghnáth:
Mo lámhan shin mí riut, a Dhé,
is ghairm mí ort gach lá.
- 10 Do mhórbhuile do'n dream tha marbh,
a Dhé, an taisbein thu?
An éirich iad a níos a ris,
a thabhairt dhuitse cliu?
- 11 Do thrócáir is do chaoimhneas caomh,
am foillsichear san uaigh?
Air t'fhirinn ann an sgríos a' bháis,
le neach an toirear luaidh?
- 12 Am bí maóin eòlais anns an dorch'
air t'fheartaibh míorbhuileach?
No 'm bí an t'hr na d'chiumhn' fíor,
no beachd air t'fhreantachd?
- 13 Ach riutsa ghlaodh mí, O mo Dhia:
gu moch théid m'urnuigh suas.

- 14 Dhia c'uim' an tilg thu m'anam uait?
's an cum thu uam do ghnùis?
- 15 O m' òige tha mi air mo chràdh,
ro-dhlùth do bhàs is uaigh;
Air dhomh bhì fulang t'uamhasan,
tha mi an imcheist chruaidh:
- 16 Oir dh'imich tharum t'fhearg gu trom;
chlaoidh t'uamhais mi a ghnàth:
- 17 Mar uisge chaidh iad timchioll orm,
ga m' chuairteachadh gach là.
- 18 Mo charaid chuir thu uam am fad,
's am fear thug dhomhas gràdh:
Luchd m'èblais mar an ceudna tha
an dorchadas 'nan tàmh.

SALM LXXXIX.

- AIR tròcair Dhé slor-sheinnidh mi
is ni mi oirre sgeul;
O àl gu h-àl gu maireannach
air t'fhrinn thig mo bheul.
- 2 Oir thubhairt mi, gu'n togar suas
do thròcair mhòr do shìor:
Is t'fhrinn cheart sna nèamhaibh àrd'
socruchear leat gu fìor.
- 3 Coimhcheangal rinn mi ris an Tì
a ròghnach mi gu slor;
'S do Dhaibhidh tha 'na òglach dhomh,
mhionnach mi fèin gu fìor.
- 4 Socraichidh mi gu daingean buan
do gheinealach 's do shìol,
Do chaithir rìoghail togam suas
o linn gu linn gu slor.
- 5 Molaidh na nèamhan àrd' gu binn
do mhlorbhuilean, a Dhé;
Is t'fhrinn ann an coimhthional
do chloinne naomha fèin.
- 6 Oir cò sna nèamhaibh choimeasar
ri Dia Iehobhah mòr?
Is cò ta measg nan cumhachdach
cosmhuil ri Dia na glòir'?
- 7 An coimhthional nan naomh gu beachd
's cùis eagail Dia gun cheisd:
Ard-nram o gach neach mu'n cuairt
dha 's dèasdanach am feasd.
- 8 O Thighearna 's a Dhia nan sluagh
cò 'n Triath sin ann an neart
Is cosmhuil riut? a'd' fhrinn fòs
ga d' chuairteachadh gu beachd?
- 9 Ard-onfha cuain is faire mòir,
's tu chuireas iad fo reachd:
A tonnan àrd' tràth dh'éireas suas,
coisgidh tu iad le smachd.
- 10 Mar dhuine buailte dol do'n eug,
mhìn-phronnadh Rahab leat:
Do naimhde sgaol thu as a chéil'
le d' ghairdean treun 's le d' neart.
- 11 Is leatsa, Dhé, na flaitheanaís,
's an talamh ta fo'r bonn:
'S tu dhaingnich fòs an cruinne-cé,
le 'àn do thoradh trom.
- 12 An àirde deas is tuath faraon,
do chruthaicheadh iad leat:
Sìlabh Thaboir agus Hermoil àird
a'd' ainm bidh aoibhneach ait.
- 13 Tha agad gairdean cumhachdach;
a ta do làmh ro-threun,
A Dhé, a ta do dheas làmh fòs
àrdichte mar an ceudn'.
- 14 Mar àite tàmh do d' chaithir rìgh
tha cothrom agus ceart:
Bidh tròcair agus fìrinn fòs
dol roimh do ghnùis gu beachd.
- 15 'S beannaicht' an sluagh a thuigeas fòs
an fhuaim tha aoibhneach ait:
An solus glan do ghnùis, a Dhé,
sior-ghluaisidh iad gu ceart.
- 16 A'd' ainms' air feadh an là bidh iad
gu h-aoibhneach mar bu chòir:
Is ann ad fhrèantachd faraon,
àrdichear iad gu mòr.
- 17 Oir mais' is glòir an spionaidh sud
is tus' a mhàin, a Dhé:
Ar n-adharc ann ad chaoimhneas caomh
àrdichear leat gu treun.

- 18 Oir 'se Iehobhah Dia nam fear,
ar targaid is ar agiath;
'Se 'n tì ro-naomh sin Israeil
ar n-Ard Rìgh is ar Triath.
- 19 An taisbean, anns an àm sin fèin,
labhair thu, Dhé, gu ceart
Ri d' dhuine naomh; is thubhairt thu,
le fìrinn, ris gu beachd;
Leag mise 's chuir mi cuideachadh
air gaisgeach treun nam buadh;
Is dh'arduich mi gu mòr an neach
a thagh mi as an t-sluagh.
- 20 B'e Daibhidh neach a fhuaradh leam,
mo sheirbhiseach ro chaomh;
'Se sin an neach a rinneadh leam
ungadh le m'òladh naomh.
- 21 Is socruchear mo làmh do shìor
gu dìleas daingean leis;
Is ni mo ghairdean cumhachdach
a neartachadh le treis.
- 22 Le mac an uile cha chlaoidhear e
a nàmh cha tog dheth cis.
- 23 Buailidh mi 'eascairde 'na làth'r,
leagaidh mi nàmh a slor.
- 24 Ach bidh mo thròcair maille ris,
is m'fhrinn mar an ceudn':
Is 'adharc-san a'm' ainm-sa fòs
bidh àrdichte gu treun.
- 25 A làmh-san cuiridh mi sa' chuan,
's na sruthaibh a làmh dheas.
- 26 Carraig mo shlainge, their e rium,
m' athair, mo Dhia, 's mo threis.
- 27 Mo cheud-ghin ni mi dheth faraon,
àrdichte thar gach rìgh.
- 28 Mo chùmhant seasaidh daingean leis
mo ghràs dha gleidhidh mi.
- 29 Is bbeir mi air a shliochd gu mair
iad feadh gach linn gu bràth:
'S a chaithir rìoghail uasal àrd
mar làithe nèimh a ghnàth.
- 30 Ma 'se 's gu'n tréig a chlann mo lagh,
's nach gluais iad ann am reachd;
31 Gu'n truail iad m'aitheanta ro-naomh,
m'iarruitis nach cum gu ceart:
- 32 Fiosraichidh mi an sin gu beachd
le slait, an eucor chlaon,
Am peacaidh fiosraicheam 's an lochd,
le sgiùrsadh goirt faraon.
- 33 Gidheadh, gu tur mo chaoimhneas-gràidh
cha bhuin mi uaith gun cheisd:
Cha'n fhuiling mi gu'm breugaichear,
mo ghealladh fìor am feasd.
- 34 Mo choimhcheangal cha bhrisear leam,
no'n cùmhant rinn mi ris;
'S am focal a chaidh as mo bheul,
am feasd cha chaochail mis'.
- 35 Oir aon uair mhionnach mi mar so,
's ann air mo naomhachd fèin,
Do Dhaibhidh tha 'na òglach dhomh,
am feasd nach dean mi breug.
- 36 Bithidh a shliochd 's a gheinealach
sior-mhaireannach gach iad,
'S a chaithir rìoghail bithidh i
a'm' fhianuis mar a' ghrìan.
- 37 Is bithidh mar a' ghealach ghlan
gu daingean buan do shìor:
'S mar fhianuis anna na nèamhaibh àrd'
bhios tairis agus fìor.
- 38 Ach thilg thu uait, is thréig gu tur,
is ghabh thu gràin a nis;
'S an tì dh'ung thu le t'òladh naomh,
tha thu an corruich ris.
- 39 Coimhcheangal t'òglach dhìleis fèin,
sgaol thusa, Dhé, le tair:
'S a choron uasal thruailleadh leat,
'g a thilgeadh air an làr.
- 40 A ghàradh dèidn bhriseadh leat;
's a dhaingneach làidir leag.
- 41 Mar chobhartach e do luchd-ròid:
d'a choimhearsnaich mar sgeig.
- 42 Làmh dheas a nàmhaid thog thu suas
uil' eascaird' rinn thu airm;
- 43 Is phill thu faobhar 'ann; sa' chath
cha d'thug thu dhasan neart.

- 41 Chòisg thu a ghloir, 's a chaitheirigh
leag thrusa slos gu làr.
- 45 Is aimsir 'òige ghearradh leat;
chòmhdaich thu e le nàir.
- 46 Cia fhad a dh'fholuicheas tu, Dhé,
thu féin a chaoidh nan cian?
An loisg do chorruih fòs gu cas,
mar theine lasrach dian?
- 47 Tabhair fa'near is cuimhnich féin
giorrad mo ré 's mo lò:
C'arson a rinn thu clann nan daoine
mar dhìomhanas no cèd?
- 48 Cò e am fear am measg nam beò,
am bàs nach faicear leis?
No 'anam féin o làimh na h-uailgh',
an teasairg e le treis?
- 49 C'ait bheil do chaoimhneas-gràidh, a Dhé,
a thaisbein thu o thùs,
a mhionnaich thu air t'fhlirinn cheirt
do Dhaibhidh chumail suas?
- 50 Cuimhnich, a Thighearn, toibheum trom
do sheirbhiseach gu léir:
Is mar a ghiùlain mis' a'm' uchd
masladh a' phobuill thréin,
- 51 Len d'thug do naimhde masladh uathf
gur aobhar, Dhé nam feart,
Oir mhasluich iadsan ceunna
an ti a dh'ungadh leat.
- 52 Mòr-bheannaicht' agus diùiteach fòs
gu robh Iehobhah treun,
Gu sìorruidh sùbain fad gach rè!
Amen agus Amen.

SALM XC.

- 'S TU b'ionad còmhnuidh dhulinn gach linn,
a Thighearna na glòir;
- 2 Cian mu'n do ghineadh fòs na cnuic,
's na sléibhte beag no mòr.
Cian mu'n do dhealbh thu'n talamh trom, i
no'n cruinne-cè le d' neart;
O bhith-bhuantachd gu hith-bhuantachd,
is tusa Dia gu beachd.
- 3 Gu neo-ni pillear leatsa rìs
an duine truagh g'a sgrìos;
Is their thu fòs, O chlann nan daoine
grad-phillibh air 'ur n-ais.
- 4 Oir mìle bliadhn' a'd' shealladh féin,
mar an là 'n dè a ta,
'N tràth théid e seach: is amhluidh fòs
mar f'horair oidhch' a'd' làth'r.
- 5 Dh'fhuadaich thu sìos iad mar le sruth
mar chodal iad no suain:
Sa' mhaduinn bidh iad mar am fear
gu moch a dh'éireas suas.
- 6 Air maduinn hrìsidh e fò bhlàth,
is fàsaidh e gu h-àrd:
Ri àm an fheasgair gearr e,
is seargaidh air an làr.
- 7 Oir cbaitheadh sinn le d' chorruih ghéir
chlaoidh t'fhearg-sa sinn gu tur.
- 8 Ar peacaidh dhìomhair, is ar lochd,
an sealladh t'eudain chuir.
- 9 Oir ann ad fheirg ar n-uile làith'
tha teireachduinn fa seach:
Is chaithear leinn ar bliadhnaidh fòs,
mar sgeul a dh'inneadh neach.
- 10 'S iad làith' ar bliadhna mar an ceudn'
tri fichead bliadhn' 'sa deich,
No, feudaidh bith, le tuilleadh neart
ceith'r fichead bliadhn' do neach:
Gidheadh cha 'n eil 'nan spionnadh sud
ach cràdh is cùradh geur:
Oir sgathar sìos gu h-ealamh e,
is sìubhlaidh sinn gu léir.
- 11 Cò aig am bheil deadh thuigs' is fòs
air neart do chorruih féin?
Is amhluidh fòs mar t'eagal mòr,
tha lasair t'fheirg' d' a réir.
- 12 O teagaisg dhuin, a Dhé nam feart,
mar àirmhear leinn ar làith';
A chum ar cridh' a shocruchadh
aur gliocas ceart gach tràth.
- 13 O Thighearna Iehobhah mhòir,
pill féin a rìs: cia fhad?

- Mu thimchioll staid do sheirbhiseach
gahh aithreachas gu grad.
- 14 O dean ar sàsachadh gu moch
le d' throcair chaoimh, a Dhé,
A chum gu'm bi sinn aoibhneach ait,
ri fad ar là 's ar ré.
- 15 Dean subhach sinn a réir nan là
a chràidh thu sinn gu goirt:
A réir nam bliadhna ud faraon
am faca sinn an t-olc.
- 16 Taisbean do d' sheirbhìsich do ghlòimh,
faiceadh an clann do ghloir.
- 17 Is bitheadh mais' ar Tighearna Dia
a' dealradh oirn gu mòr.
- Na gnìomhara a rinn ar làmh,
socruich iad dhuinn, a Dhé;
Na gnìomhara a rinneadh leinn,
dean daingean iad gu léir.

SALM XCI.

- A'N neach sin tha 'na thàmh gach uair
an ionad uaigneach Dhé,
Fo sgàl an Uille-chumhachdaich
buan-chòmhnuidh ni gach ré.
- 2 Their mi a nis mu thimchioll Dhé,
mo thearmunn e, 's mo neart;
Mo dhaingneach: cuiream dòchas ann;
mo Dhia; 's e Dia nam feart.
- 3 Gu dearbh o rib an eunadair
ni esan fuasgladh ort,
Is ni do shàoradh mar an ceudn'
o'n phlàigh tha gràineil goirt.
- 4 Le 'iteich ni e d'fholach fòs,
bidh t'earbsa fuidh a sgéith;
Is 'fhirinn bidh 'na targaid dhuit,
mar sgéith do d' dhion gach ré.
- 5 Fa chùis an uamhais anns an oidhch'
cha bhi ort geilt no sgàth;
No fòs fa chùis na saighde bhios
a' ruith air feadh an là:
- 6 Cha bhi maoin eagail ort roimh 'n phlàigh
tha triall an dorchadas:
No fòs fa chùis an uile a bhios
mu mheadhon là ri sgrìos.
- 7 Bidh mìle tuiteam sìos ri d' thaobh,
deich mìle fòs ri d' dheis;
Ach olc dhiubh sud cha tig a'd' chòir
no 'm fagus duit am fead.
- 8 A mhàin le d' shùilbhe seallaidh tu,
is bheir fa'near le beachd:
Droch-dhiol is tuarasdail nan dao, i
gun cheisd do chithear leat.
- 9 A chionn gu'n d'bròghnaich thusa Dia,
mar chòmhnuidh dhuit gach àm,
An Dia ud tha 'na thearmunn domh,
'se 'n Ti a's àirde t'ann:
- 10 Aon olc cha'n éirich dhunt; is plàigh
do d'fhàrdaich cha tig dlùth.
- 11 Oir bheir e àithn' d'a ainghlh, chum
a'd' ròd gu'n dìon iad thu.
- 12 Is togaidh iadsan thusa suas
gu h-àrd air bhàrr am bos;
Eagal gu'm buailteadh leat air cloich,
aon uair air bith do chos.
- 13 Air leòmhnan is air nathair-nimh'
gun dòrainn saltrar leat:
Pronnaidh tu 'n dràgon sìos le d' chois,
's an leòmhnan og le d' neart.
- 14 A chionn gur ionmhuinn leis-san mi,
sàr-fhuasgladh bheir mi dha;
Air m'ainm a chionn gur eòlach e,
àrdaicheam e gach là.
- 15 Gairidh e orm, is freagram e:
'na thriohlaid bitheam leis;
Onoir is urram bheir mi dha,
is fuasglam air gu deas.
- 16 Le saoghal fad is maireannach
sàsuicheam e gu leòr:
Mo shlàinte dha-san mar an ceudn'
fòillsichidh mi gu mòr.

SALM XCII.

- BHI tabhairt buidheachais do Dhia,
's ai sàr-mhaith maiseach e

- Bhi tabhairt cliù, O Thi a's àird,
do t'ainm-sa feadh gach rè :
- 2 Do chaoimhneas-gràidh sa' mhaduinn mhoich,
gach là bhi cur an cèill ;
'S air t'fhirinn ta neo-mhearachdach,
gach oidhch' bhi deanamh sgéil,
- 3 Air innca-ciuil nan teuda deich,
is air an t-saltair ghriinn ;
'S air clàrsaich le guth fonnmhòr àrd,
a sheinneas ceòl gu binn.
- 4 Oir tre do ghnomhara, a Dhé,
rinn thu mi aoibhin ait ;
Is ann an oibrìbh fòs do làmh
nim' gairdeachas gu pailt.
- 5 T'oibre-sa, Dhé, cia iongantach !
do snuainte cò d'an léir ?
- 6 An t-amadan cha tuig e so,
's cha'n eol do'n anhlair e.
- 7 Tràth chinneas luchd na h-aingidheachd
a nìos mar chinneas fear,
Tràth bhitheas fòs luchd-deanamh uile
a' fas fo bhlàth gu léir :
- 'Se sud is deireadh dhoibh fadheòidh
gu'n sgriosar iad am feasd.
- 8 Ach thusa, Dhé, gu sìorruidh ta
àrd-urramach gun cheisd.
- 9 Oir feuch, do naimhde féin, a Dhé,
oir feuch, do naimhde féin,
Làn-sgriosar iad : ionn-sgoilleir fòs
luchd-angidheachd gu léir :
- 10 Ach m'adharc togaidh tusa suas,
mar adharc buabhuill àird' :
Is mar le h-oladh fhior-ghlan ùir,
ungar mi féin le d' ghràs.
- 11 Chi mi mo mhiann air m'èascairidibh ;
is cluinidh fòs mo chluas
A toil air luchd na h-aingidheachd,
a'm' aghaidh dh'éireas suas.
- 12 Bidh piseach air an fhrean choir
mar phailm-chrann ùrar glas :
Mar sheudar àrd air Lebanon,
a' fas gu dìreach bras.
- 13 An dream tha air an sùdheachadh
an tigh 's an àros Dé,
An cùirtibh greadhnach àrd' ar Dia,
sior-fhàsaidh iad gach rè.
- 14 San àm am bi iad aosmhor liath,
bheir iad mòr mheas a mach ;
Is bithidh sultmhor le deadh bhlàth
dhiubh sud gach uile neach.
- 15 A chum gu feuch iad gu bheil Dia
ro-chothromach is ceart ;
Mo charraig e, 's cha 'nèil ann féin
aon eucoir no droch bheart.

SALM XCIII.

- IS Rìgh Dia, air a sgudachadh
le mòralachd gach àm ;
Ta air a sgudachadh le neart,
is criosluichte gu teann.
Shocrucheadh leis an cruinne-cè,
nach gluaisear e a chaidh.
- 2 Do chaithir daingean ta o chian :
's tu féin gun tàs gun chrìoch.
- 3 Do thog na tuitlean suas, a Dhé,
na tuitlean thog an guth ;
Seadh thog na tuitlean suas gu h-àrd
an tonna mòr' gu tiugh.
- 4 Is treise Dia ta chomhnuidh shuas
na fuaim nan uisge garbh ;
Is treise Dia na sumainnean,
is tonna cuam gu dearbh.
- 5 A ta do theisteis is do reachd
re-dhaingean agus fìor :
Tha naomhachd ionchuidh air do thigh,
a Dhé nam fear, gu sìor.

SALM XCIV.

- O DHIA, d'am buin ceart-dhioghaltas,
Iehobhah neartmhoir thréin,
D'am buin a mhàin ceart dhioghaltas,
gu dealrach nochd thu féin.
- 2 O Bhreitheimh cheirt na talmhainn, dean
thu féin a thogail suas ;

Is loc do luchd an uaibhreachais
ceart-luigheachd agus duais.

- 3 Cia fhad a nì luchd aingidheachd,
cia fhad, a Dhia, a nì
Luchd aingidheachd ùr-ghairdeachas,
le aoibheas mòr gun dìth ?
- 4 Cia fhad a bhruichdar briathra leò,
a' teachd air nithibh cruaidh ?
'S a bhitheas luchd na h-aingidheachd,
rì raiteachas is uail ?
- 5 Bhris iad do shluagh gu mìn, a Dhé,
is t'oighreachd chlaoidh gu gort.
- 6 Bantwacha, coigrich, 's dilleadhdan,
'gam marbhadh, is 'gam mort.
- 7 Their iad gidheadh, cha léir do Dhia,
is fòs nì mò a nì
Dia Iacob sud a thoirt fa'near,
s cha chuir am feasd am prìs.
- 8 O dhaoine brùideil measg an t-sluaigh,
nìs tuigibh agaibh féin,
Is amadan, cia fhad a bhios
sibh gabhail thugaibh cèill ?
- 9 An neach a chuir air faillean cluas,
am bi gun chlaisteachd ghéir ?
An Ti a dhealbha an t-sùil faraoon,
nach an da féin is léir ?
- 10 'N ti smachdaicheas na fineachan,
an e nach cronuich e ?
An ti bheir eòlas do gach neach,
an neach gun eòlas e ?
- 11 Air smuaintibh dhaoin' is fìosrach Dia,
gur dìomhain iad gu beachd,
- 12 Dhia, 's beannaicht' iad d'an toir thu sinachd,
is teagasg as do reachd :
- 13 Chum fois gu'n tugadh tusa dhoibh,
o kaitibh amhghair oic,
Gu ruig an uair an cladaichear
do dhaoineibh dao' an sìochd.
- 14 Oir Dia cha tilg e dheth am feasd
an sluagh d'an d'fhug e spéis :
'S nì mò na sin a thréigear leis
an oighreachd a's leis féin.
- 15 Ach pillidh breitheanas a rìs
ri fireantachd air ais :
Is luchd a' chridhe threibhdhriche
leanaidh 'na déigh gu cas.
- 16 An aghaidh fòs luchd-deanamh uile
cò dh'éireas leam an àird ?
An aghaidh luchd na h-aingidheachd,
cò sheasas air mo phàirt ?
- 17 Mur bitheadh Dia Iehobhah leam,
ga m' chuideachadh le buaidh,
'S beag nach robh m'anam bochd an tàmh
gu tosdach anns an uaigh.
- 18 Tràth thubhairt mi, a ta mo chos
air sleamhnachadh uam sìos ;
Do thròcair chaomb-sa 'n sin, a Dhé,
chum suas mi, agus dhìon.
- 19 Air bhith do m' smuainte muldach,
is ìonmhor ann am chom,
Do chomhfhurtachd-sa thug an sin
solas do m'anam trom.
- 20 Aig caithir rioghail luchd an uile
'm bi comunn riut gu beachd,
Tha dealbh gu seòlta airmheas mhòir,
's ga orduchadh le reachd ?
- 21 An aghaidh an'ma 'n fbrein choir
chruinnicheadh leò gu dlùth ;
A dh'fhàgail ris tùl neo-chiontach,
le breitheanas nach fìu.
- 22 Ach Dia mo dhaingneach 'se : mo Dhia,
mo charraig dhìon gach là.
- 23 'Se dhiolas orra sud air ais
gach eucoir rinneadh leo :
An sgathadh sìos do nithair leis
gu ceart 'nan eucoir féin ;
Is nì Iehobhah mòr ar Dia,
an sgathadh sìos gu treun.

SALM XCV.

- O THIGIEH, seinneamaid do Dhia :
thigeadh gach neach 'na làth'r :
Do charraig thréin ar slainte fòs,
tegamaid iolach àrd.

- 2 A steach 'na fhianuis thigeamaid
le buidheachas gach là ;
Togamaid ceol gu suilbhireach '
a' seinn le salmaibh dhia ;
- 3 Is Dia ro-mhòr Iehobhah treun ;
righ mòr os ceann gach dia.
- 4 Doimhneachd na talmhainn tha 'na làimh ;
's leis neart nan cnoc 's nan sliabh.
- 5 'Se rinn an cuan tha farsuin mòr,
tha còir aig air is sealbh ;
'S an talamh tioram le a làimh
'se chruthaich is a dhealbh.
- 6 O thigibh agus sleuchdamaid,
is deanar cromadh leinn ;
Is air ar ghlinibh tuiteamaid
do 'n Dia a chruthaich sinn ;
- 7 Oir 'se ar Dia, is sinn a shluagh,
a bheathaich e mar threud,
Caoraich a làimh' : ma dh'èisdear leibh,
an diugh r' a ghuth gun bhreug.
- 8 Na cruaidhichear 'ur cridhe leibh,
mar anns a' chomh-stri dhian,
K'ur rinneadh leibh san fhàsach chruaidh,
gu m' bhuairleadh le bhar miann ;
- 9 Tràth dh'fhionn 's a dhearbh 'ur sinnsir mi,
's mo ghnìomh tràth chunnaic iad.
- 10 An t-àl ud ré dà fhichead bliadhn'
chuir campar orm is eud :
Thubhairt mi, 's pobull iad 'gann bheil
droch chridhe seachrach ;
Is air mo shligheibh nach do ghabh
riamh eòlas firinneach :
- 11 D'an d'thug mi féin mo mhionnan mòr,
a'm' fheirg 's a'm' chorroich ghéir,
Nach rachadh iad g' chaoiadh a steach
do m'ionad-suaimhneas féin.

SALM XCVI.

- CANAIBH do'n Tighearn òran nuadh,
gach aon tìr, canaibh dhia.
- 2 Seinnibh do Dhia : ainm beannaichibh,
nochdaibh a shlàint' gach là.
- 3 Am measg nam fineachan gu léir
sìor-thaisbeinibh a ghlòir :
Am measg gach pobull aithrisibh
a mhlorbhuile ro-mhòr.
- 4 Oir 's mòr Iehobhah Dia nam feart,
's ion-mholta feadh gach ré ;
Is aobhar eagail e fàraon
os ceann nan uile dhée :
- 5 Oir uile dhée nam fineachan
is lodholl iad gu léir :
Ach 'se Iehobhah Cruithfhear àrd
nam fàitheas is nan speur.
- 6 Àrd-urram agus mòralachd
'na fhianuis-san a ta :
Treun-spionnadh agus maisealachd
'na theampull naomh a ghnàth.
- 7 O fhineacha nan slògh gu léir
thugaibh do Dhia nam feart ;
Thugaibh do'n Tighearna fàraon
glòir, urram, agus neart.
- 8 A' ghlòir a's cubhaidh fòs d'a ainm,
do'n Tighearn thugaibh uaibh :
Thigibh d'a chùirtibh naomha steach,
is thugaibh òfrail leibh.
- 9 Do Dhia Iehobhah sleuchdaibh slos
am mais' a naomhachd féin :
Biodh egal oirbh, gach uile thìr,
'na fhianuis-san gu léir.
- 10 Abraibh measg fhineach, gu bheil Dia
riaghladh mar rìgh gu beachd.
Buan-dhaingnichear an domhan leis ;
air daoineibh bheir breth cheart.
- 11 Biodh aoibhneas air na nàmbaibh àrd
is biodh an talamh ait ;
Beucadh an cuan gu farumach,
's a lànachd-san gu pailt.
- 12 Biodh aoibhneas air a' mhachair fòs,
is air gach nì a t'ann :
An sin biodh aiteas air gach coill',
is air gach craoibh is crann
- 13 An làthair Dhé ; oir tha e teachd,
oir tha e teachd gu breth ;

Air talamh chum gu'n deantadh leis
ceart-bhreitheanas fa leth :

Le ceartas maith bheir e a mach
breth air a' chruinne-ché ;
Bheir air a' phobull breitheanas
le fìrinn fhior-ghloin réidh.

SALM XCVII.

- I EHOBBAH mòr 'se tha 'na Rìgh,
biodh aiteas air gach tìr ;
'S air eileanaibh tha ionnmhor ann,
biodh gairdeachas gu léir.
- 2 Tha neula tiugh' is dorchadas
m'a thimchioll air gach leth :
'Se 's còmhnuidh fòs d'a chaithir-rìgh
deadh chothrom is ceart-bhreth.
- 3 Tha teine milleach roimh a ghnùis
ag imeachd air gach àird,
Le'n loisgear suas gu lasarach
a naimhdean anns gach àit.
- 4 Le solus glan a dhealanaich
dhealruich an cruinne-cé :
Chunnaic an talamh sud gu dearbh,
ghrad-chlisg is chrìochnuich e.
- 5 Na cnuic, an làthair Dhia nan dùl,
leagh as air fad mar chéir ;
Roimh ghnùis Àrd-Rìgh an domhain nàbaidh
leagh iadsan as gu léir.
- 6 Na nàmhha cuiridh 'n céill a cheart
is chì gach sluagh a ghlòir.
- 7 Do dhealbhaibh snaidhte meud 's a chom
gu'n robh dhoibh amhludh mòr,
Tha deanamh uail' is ràiteachais
à lodholaibh nach fù ;
Gach uile dhée a ta sibh ann,
sleuchdaibh do Dhia nan dùl.
- 8 Rinn Sion aoibhneas nach bu ghann,
an uair a chual i'n sgeul,
Rinn nighean Iudah gairdeachas
mu d' bhrèitheanas, a Dhé.
- 9 Oir tha thu, Dhia Iehobhah, àrd
os ceann gach uile thìr :
Tha thu air t'àrdachadh gu mòr,
os ceann gach dia gu léir.
- 10 Sibhs le'n ionmhuinn Dia ro-naomh,
fuathaichibh oile a chaoiadh :
Anam a naomh sìor-ghlèidhidh e ;
saoraidh o làimh nan daoibh.
- 11 Cuirear mar phòr gu frasach pailt,
solus do'n fhìreanach ;
Is aoibhneas dhoibh-san fòs a ta
'nan cridhe treibhidhreach.
- 12 Biodh aiteas oirbh an Dia na glòir,
O fhìreana gu léir :
Is thugaibh buidheachas do Dhia,
ri cuimhn' a naomhachd féin.

SALM XCVIII.

- O SEINNIBH òran nuadh do Dhia,
rinn bearta mhlorbhuileach :
'S i 'dheas làmh féin 's a ghairdean naomh
thug dhasan buaidh a mach.
- 2 Feuch, thaisbein Dia gu follaiseach
'fhurtachd 's a shlàinte mhòr :
Am fianuis chinneach nochdadh leis
'fhìreantachd féin gu leòr.
- 3 Chuimhnich e 'f'brinn is a ghràs
do theaghlach Israeil ;
Is slàint' ar Dia-ne chunnaic fòs
gach iomall tìr gu léir.
- 4 Do Dhia Iehobhah togaibh suas
àrd-iolach ait, gach tìr ;
Togaibh bhar guth : bibh subhach fòs,
is seinnibh moladh fìor.
- 5 Do Dhia Iehobhah mòr nam feart
seinnibh air clàrsaich ghrinn ;
Le clàrsaich (deirim) seinnibh dhia,
le guth na sailm gu binn.
- 6 Le fuaim na b-adhairc seinnibh dhia,
's le guth na trompaid àird' :
Do Dhia an t-Àrd-Rìgh seinnibh fòs,
le iolach ait 's gach àit.
- 7 Beucadh an fhaighe mhòr gu borb,
's an làn tha innt' le chéil' ;

- An domhan, is gach dùil a ta
an còmhnuidh ann gu léir.
8 Buaileadh na tuitte mòr 'am boe';
na sléibhte bitheadh ait,
9 An làthair Dhé; oir tha e teachd
air talamh thabhairt ceirt:
Le ceartas maith bheir e a mach
breth air a' chruinne-ché;
Bheir air a' phobull breitheanas
le cothrom fìor-ghlan réidh.

SALM XCIX.

- T**HA Dia 'na Rìgh is criothnalcheadh
gach uile shluagh air bith:
'Se shuidheas eadar cheruban,
biodh air an talamh crith.
2 An Sion tha Iehobhah mòr,
is àrd os ceann gach sluagh.
3 Tainm mòr ro-uamhor molar leo,
oir tha e naomh r'a luaidh.
4 Is toigh le neart an Rìgh ceart-bhreth;
's tu shocruchas a' cheart:
An Iacob breitheanas is còir
cuididh tu 'n ghlòimh gu beachd.
5 Ar Dia Iehobhah àrdaichibh,
is sleuchdaibh dha gu caomh,
Aig stòl a chos gu h-urramach;
oir tha e fèin ro-naomh.
6 Am meas a shagart Aaron 's Maois
bha Samuel do'n dream
A ghair air 'ainm: dh'iarr iadsan Dia,
fhreagair e iad san àm.
7 Am baideal neoil gu gràs-mhor caoin
labhair an Tighearna riu:
Na h-aitheant an a thug e dhoibh,
's a theistean ghlèidheadh leo.
8 Iehobhah Dia, thug freagradh dhoibh;
's tu 'n Dia a mhaith an lochd,
Ge d'rinn thu orra dioghaltas
air son an innieachd olc.
Ar Dia Iehobhah àrdaichibh,
's 'na thulaich naomh a ghnàth,
Sìos sleuchdaibh dha gu h-riòsal;
oir 's naomh ar Dia bràth.

SALM C.

- T**OGADH gach tìr àrd-folach glaoth,
do Dhia Iehobhah mòr.
2 Thigibh, is deanaibh seirbhis ait,
'na làthair-san le ceòl.
3 Blòdh agaibh sìos gur esan Dia,
'se rinn sinn, 's cha sinn féin;
A phobull sinn, 's a chaoraich fòs
dh' ionaltir leis gu léir.
4 Thigibh a nis le buidheachas
'na gheataibh-san a steach,
Is thigibh fòs le moladh mòr
an cùirtibh naomh a theach:
Is thugaibh dha mòr-bhuidheachas,
'ainm beannaichibh gu binn.
5 Oir Dia ta maith, tha 'thrócair buan,
is 'fhlirinn feadh gach linn.

SALM CI.

- B**RETH cheart is trècair canar leam;
Dhé, seinneam dhuit le ceòl.
2 Is iomchaiream mi féin gu glòir
air slighe fhoirfe choir.
O c'uin do m'ionnsuidh-sa a thig
thu féin, a Dhia nam feart?
A steach a'm fhàrdaich gluaisidh mi
le cridhe fìor-ghlan ceart.
3 Fa chomhair fòs mo shùile féin,
cha chuir mi olc am fead:
Obair luchd-ceannairc 's fuathach leam,
's cha lean i rium gun cheid.
4 An cridhe iargalt ceannaireach
uam triallaidh e an céin:
Eòlas no furan air an daoil
a chaoidh cha chuir mi féin.
5 An ti bheir beum d'a choimhearsnach,
lom-sgrìosaidd mi as 'ait;
An cridhe borb cha'n fhuing mi,
no neach a sheallas àrd.

- 6 Bidh m' air' air fireanaibh na tìr,
gu'n gabh iad còmhnuidh leam:
An ti bhios fòirfe glan 'na bheus,
'se 's òglach dhomh gach àm.
7 Fear deanamh ceilg' is mealltaireachd,
a'm' thigh-sa cha 'n fhaigh tàmh:
A'm' làthair, neach a labhras breug
cha 'n fhuirich e gu bràth:
8 Lom-sgrìosaidd mise fòs gu moch
gach droch dhuin' as an tìr,
Chum luchd an uile a sgathadh as
o chaitheir Dhé gu léir.

SALM CII.

- R**I'm'urnnigh éisd, Iehobhah Rìgh;
is ruigeadh ort mo ghlaodh.
2 Na foluich uam do ghnòis san là
thig trioblaid orm gach taobh:
San là an gairm mi ort gu gear,
crom thugam féin do chluas;
Is freagair mi gu deifreach,
a' furtachd air mo chruas.
3 Do bhrìgh gu bheil mo làith' mar cheò
a' teireachduinn a ghnàth;
Mar lic an teinntein 's amhluidh sin
mo chnàmhan loisgte ta.
4 Trom-bhuailte tha mo chridhe bochd
is shearg e mar am feur;
Ionnnus gu'n d' dhearmad mi gu beachd
greim arain chur am bheul.
5 Le guth mo chaoiidh, mo chnàmhan lean
ri m' charaicinn féin gu teann:
6 Mar phelican an f'hàsaich mi,
's mar chaillich-oidhich' nam beann.
7 Rì faire taim gu furachair,
is cosmhail mi a ghnàth
Rì gealbhuinn beag 'na aonar fòs
air mullach tìghe ta.
8 Rì fad an là mo naimhde garg'
ga m' mbasluchadh gu trom;
A'm' aghaidh m'ionnaich iad gu léir,
air bhoile dh'éirich rium.
9 Le m' dheuraibh choimheas mi mo dheoch
mar aran dh'ith mi luath,
10 Tre lasan t'fheirg'; oir thog thu mi,
is leag thu ris gu truagh.
11 Mar sgàile chlaon mo làithean sìos;
is shearg mi féin mar fheur.
12 Ach mairidh tus', am fead, a Dhé,
's do chuimhne féin gu slor.
13 Nis éiridh tu a dheanamh gràis
air Sion naoimh gu dùth:
Oir àm a cabhair tha air teachd,
seadh, 'n t-àm a dh'orduich thu.
14 Oir t'òglach tha a' gabhail dachd
'na clachaibh breagh' gach uair:
Tha deadh thoil aig do sheirbhisich
d'a luaithe is d'a h-àir.
15 Mar sin bidh air na fineachaibh
eagal roimh ainm an Triath:
Is air gach rìgh air thalamh ta
bidh roimh do ghlòir-sa fiamh.
16 Tràth thogar Sion suas le Dia
taisbeanar e 'na ghlòir.
17 Urnuigh nam bochd bheir e fa'near,
's cha diùlt e iad le tair.
18 Do 'n àl a ta rì teachd 'nar déigh,
sud sgrìobhar dhoibh gu beachd:
'S an dream a ghinear o so suas,
molaidd iad Dia nam feart.
19 Oir dh'amhairc e a nuas gu beachd,
o àird a naomhachd féin;
Is air an talamh dh'amhairc Dia,
a nuas o nàmh nan speur.
20 A chluinntinn osnaich ghearanach
a' phrìosaich ta 'n sàs;
Chum fuasgladh air a' mhuinntir sin
a dh'orduicheadh chum bàis.
21 An Sion chum a chur an céill
ainm uasal àrd ar Dia,
'S a dh'innseadh an Ierusalem
moladh is cliù an Triath.
22 An t-àm a bhios na fineacha
air cruinneachadh le chéil';

- 's gu seirbhis Dé tràth thionaillear
na rioghachda gu léir.
- 23 Air feadh na slighe is an ròid
mo threòir do lagadh leis:
Mo làithe chuir an giorrad fòs,
- 24 'S mar so do labhair mis,
Mo Dhia, na glacar mi le bàs,
nu thimcheall leth mo là:
O aois gu h-aois gu maireannach,
do bhliadhnaidh buan a ta.
- 25 O chian leag thusa bunaite,
na talmhainn so, a Dhé;
Is iad na n-èmhla fìor-ghlan àrd'
oibre do làmh fa féin.
- 26 Teirgidh iadsan 's théid iad as,
ach mairidh tusa, Dhé:
Seadh teirgidh iadsan 's gabhaidh seach
mar eudach sean gu léir:
- Feuch caochlaidh tu mar thrusgan iad,
is caochl'ear iad gun cheisd.
- 27 Tha thus' a mhàin gun caochladh ort,
's do bhliadhnaidh buan am feasd.
- 28 Bidh clann do sheirbhiseach, a Dhé,
maireannach buan a ghnàth:
Is ann ad fhianuis socruichear
an gineal-san gu bràth.
- SALM CHII.
- O M'ANAM, beannaich thusa nis
an Dia Iehobhah mòr:
Moladh gach ni an taobh stigh dhiom
'ainm naomha mar is còir.
- 2 O m'anam, beannaich féin a nis
Iehobhah mòr do Dhia:
Na d'èuchaimhnich na tiòdhlaean
a dheònuich dhuit an Triath.
- 3 'Se mhaitheas duit gu gràsmhor caoin
gach peacadh annad féin:
'Se bheir dhuit slàint', is furtachd fòs,
o t'euslaintibh gu léir.
- 4 Do bheatha fòs o sgrìos a' bhàis,
'se dh'fhuasglas duit gu pailt:
'Se chrùnas thu le coron gràidh,
's le tròcair chaoimh gun airc.
- 5 Le 'mhaitheas is le 'thiodhlacaibh
sàr-lìonaidh e do bheul:
'S tha t'òige air a nuadhachadh
mar iolar luath nan speur.
- 6 Air sgàth na muinntir úd, a ta
le fòirneart air an claoidh,
Ceartas is breitheanas faraoen,
'se Dia nì dhoibh gun dìth.
- 7 Do Mhaois an neach a b' òiglach dha,
a shlighe chuir e 'n cèill:
Is mar an ceudna 'ghniomhara
do'chlannaibh Israeil.
- 8 Tha'n Tighearn iochdmhor tròcaireach
's mall 'fhearg, 's is pailt a ghràs.
- 9 Cha bhi e tagradh ruinn do shìor
's cha ghleidh e 'fhearg gu bràth.
- 10 A réir ar peacaidh iomarcaich,
dioghaltas oirn nan cha d'rinn;
'S a réir ar ciont' is eusaontais
cha d'thug e luigheachd dhuinn.
- 11 Oir mar os ceann na talmhainn ta
na speuran àrd gach ré,
Is amhluidh sin tha 'thròcair mòr
do'n dream d'an eagal e.
- 12 Mar tha an àrd an ear 's an iar
a' gabhail fad o chéill;
'S co fhad a chuireas Dia nan gràs
ar peacaidh uainn gu léir.
- 13 Amhluidh mar ghabhas athair dàimh
is truas d'a leanbaibh maoth,
Mar sin d'a fhlòr luchd-eagail féin
Dia gabhaidh truas gu caomh.
- 14 Oir 's aithne dhasan agus 's léir
ar cruth 's ar dealbh gu ceart;
Gur duslach talmhainn sinn air fad,
is cuimhne leis gu beachd.
- 15 An duine truagh, a ta a làith'
amhluidh mar fheur a ghnàth;
Mar bhàrr na luibh' air machair fòs
a ta e fàs fo bhlàth.

- 16 Oir gabhaidh thairis oasg ghaoith',
's cha bhi e idir ann;
'S cha 'n fhaicear e san ionad nd
an robh e fàs gu teann.
- 17 Ach mairidh tròcair Dhé gu sìor
do'n dream d'an eagal e,
Is fòs do chloinn an cloinne-san
bidh 'threantachd gach ré.
- 18 Do 'n aitim ud a chumas ris
an cùmhant rinn e ri:
'S a chuimhnicheas 'uill' àiteantan,
a chum gu'n deant' iad leo.
- 19 Dia shocruidh anns na n-èmhlaibh àrd
a chathair rioghail féin;
A rioghachd tha an uachdar fòs
os ceann gach ni fo 'n ghréin.
- 20 Sìor-bheannaichibh Iehobhah mòr,
O 'angle treun an neart,
Tha deanamh iartuis mar is còir;
's a' tabhairt géill d'a reachd.
- 21 Gach uile shluagh a bhineas da,
beannaichibh Dia a nis;
A sheirbhisich le 'n coimhlonar
gach ni a's toileach leis.
- 22 'Uill' oibre, feadh a thighearnais,
a rinneadh leis an Triath,
An rìgh Iehobhah beannaichibh:
O m'anam, beannaich Dia.

SALM CIV.

- O M'ANAM, beannaich thusa Dia:
mo Dhia, 's tu 'n Triath ro-mhòr.
Tha thusa air do sgeadachadh
le mòralachd is glòir.
- 2 Seadh chuir thu solus dealrach glae
mar thrusgan umad féin;
Is shìl thu mach, is sgaioleadh leat,
mar chùrtean n-èmh nan speur.
- 3 Sallean a sheòmar leagadh leis
air uisgeachaibh mar stéidh;
Mar charbad rinn na neula tiugh,
'se ruith air sgiathaibh gaoith'.
- 4 'Se féin a rinn na h-aingil fòs
'nan spioraid làidir theun;
'Se rinn nan teime lasarach
a theachdairean gu léir.
- 5 Is bunaite na talmhainn fòs
shocruideadh leis 'nan àit,
A chum nach gluaist' as 'ionad e
a chaoidh nan cian gu bràth.
- 6 Is dh'fholuich thu le doimhneachd e,
ceart mar gu'm b'ann le brat:
Os ceann nam beann 's nan sléibhte àrd
na h-uisgeacha do stad.
- 7 Air cluinntinn doibh guth t'achmhasain,
theich iad air falbh gu cas:
Is fòs ri guth do thairneanaich,
le deifir chaidh iad as.
- 8 Rì taobh nam beann chaidh iad a suas,
's a sìos air feadh nan gleann:
Gu ruig an t-àir a dh'òrduich thu
's a shocruidh thu gu teann.
- 9 Chuir thusa rompa crìocha buan
nach téid iad tharta null;
'S nach pill iad air an ais a ris
dh'fholach na tìr le tuinn.
- 10 Cuiridh e mach na tobraichean
air feadh nan glae 's nan gleann,
A ta gun tàmh le 'n sruthaibh bras,
a' ruith air feadh nam beann.
- 11 Do bheathaichibh na macharach
deoch bheir e dhoibh r'a h-òl:
'S na h-asail fhiahaich coisgidh iad
an tart 's an iota mòr.
- 12 Am fagus doibh nì eoin nan speur,
tigh clùthor tàmh dhoibh féin:
Is eadar gheugan cuirrean leo
an ceileir binn an cèill.
- 13 Uisgichidh e o 'sheòmaribh àrd'
na beannta mòr' gun tàmh:
An talamh tioram gheith a dhìol
le toradh gniomh do làmh,
- 14 Bheir e air feur bhì fas do'n spréidh
's air luibh bhì fas gun sgìos

- Do dhaoibh, chun gu'n tugadh
o'n talamh biadh a uios:
- 15 Is fion a chuireas cridhe dhaoiñ
air shubhachas 's air ghean,
Is oladh fòs a nì an ghnùis
le maise dealrach glan.
'Se bheir dhoibh aran mar an ceudn'
fhreasdal am feum gu leòr,
An cridhe dhaoiñ a chuireas near,
le misneich mhaith is treòir.
- 16 Tha craobhan àrd' an Tighearna
ro làn do bhrìgh gu léir,
Is seudair mhaiseach Lebanoin
a shuldhicheadh leis féin.
- 17 Is bithidh nìd san ionad ud
aig eunlaith luath nan speur:
Na craobhan giùmhais aig an stòr
mar ionad tàimh dhì féin.
- 18 An tearmunn féin, an heanntaibh àrd',
na gabhair fhìadhaich leag;
Na coinean bheagas mar an ceudn'
an còsaibh blàth nan creag.
- 19 A' ghealach dh'orduich esan fòs
a sgarachduinn nan tràth:
Is aig a' ghrèin tha còlas maith
mar luidheas i gach là.
- 20 Do nithear leat-sa dorchadas,
is thig an oidhch' gu grad;
An sin bidh beathaich all' na coill'
a' dol a mach air fad.
- 21 Rì beucadh bidh na leòmhain òg'
ag iarraidh cobhartaich,
Is bithidh iad ag iarraidh bhlh
air Dia ro-chumhachdach.
- 22 An sin 'nuair dh'èreas suas a' ghrian,
cruinnichidh iad le chéil',
Gu h-uaigneach luidhidh iad a stigh
'nan garaidh dèidh féin.
- 23 Is théid an duine mach an sin
gu 'obair mar is còir,
Is leanaidh e gu dìchoillach
a shaothair gu tràth nòin'.
- 24 Cia lìonmhor 'tòibre mòr, a Dhé!
an gliocas rinn thu iad:
An talamh fòs le d' sbaoibhreas mòr,
tha làn air fad 's air leud.
- 25 Mar sin an cuan tha farsuinn mòr,
's gach nì a shnàgas ann,
Na beathaichean tha beag is mòr,
gun orra cunntas cheann.
- 26 Tha longan sìubhal ann gu tiugh;
's tha'n Lebhiatan mòr,
A chumadh is a dhcalbhadh leat,
ri sùgradh ann le treòir.
- 27 Na slòigh ud uile tha, a Dhé,
a' feitheamh ort a ghnàth,
A chum dhoibh biadh gu'n tugadh tu
g'an cumail heò gach tràth.
- 28 Na bheir thu dhoibh a'd' thoirbheartas
'ga thional sud' tha iad:
Tràth dh'fhoglas tu do làmh gu pailt,
le maith sàrlonair iad.
- 29 Air folach dhuit do ghnùis a ris,
thig cabhag orr' air fad;
Eugaidh, tràth bheir thu asd' an deò,
pillidh rì 'n àir gu grad.
- 30 Do spiorad féin g'an cruthachadh,
ris cuirear leat a mach:
Aghaidh na talmhainn mar an ceudn'
nuadhaichidh tu le drach.
- 31 Bidh glòir an Triath ro-mhairiannach,
air feadh gach linn am fèas;
Is nì Iehobhah gairdeachas
'na ghnìomharaibh gun cheisd.
- 32 Air sealltuinn air an talamh dha,
criothnaichidh e gu grad;
Tràth bheanas e ri sléibhtibh àrd
bidh deatach dhiubh air fad.
- 33 Do Dhia Iehobhah seinnidh mìa
an cian a bhios mi beò:
Is bheir mi moladh mòr do m'Dbia
ri fad mo rè 's mo là.

- 54 'S ro-mhills blast' mo smuaintean air
biom ait an Dia a ghnàth.
- 35 Gu'n tigeadh sgrios air peacaichibh,
mach as an tìr gu bràth,
'S na biodh na h-àingidh ann nì 's mò.
O m'anam, moladh seinn
Do Dhia Iehobhah; seinneamaid
le h-Alleluia binn.

SALM CV.

- OTHUGAIBH buidheachas do Dhia;
air 'ainm-san gairibh féin;
Is cuiribh fòs a ghnìomhara
am measg nan sluagh an céill.
- 2 Seinnibh do Dhia Iehobhah mòr,
sailm seinnibh dha gu binn;
Is aithrisibh gu h-ionlan fòs
na mìorbhuilean a rinn.
- 3 As 'ainm ro-naomha-san faraon
deanaibh deadh-uail is glòir;
Biodh gairdeachas air cridh' an dream
dh'iarra Iehobhah mòr.
- 4 Iarraibh Iehobhah mòr nam feart,
iarraibh a neart a ghnàth:
A ghnùis ta gràs-mhor fàbharach,
sior-iarraibh i gu bràth.
- 5 Cuimhnichibh fòs na mìorbhuile
a rinneadh leis gu treun;
A ghnìomhara ro-iongantach,
is breitheanais a bhéil.
- 6 O sibhs' a ghineil Abraham,
deadh òglaich dhìleis Dé:
Sibhs' chlann Iacob mar an ceudn'
a ròghnuich e dha féin.
- 7 'S esan ar Tighearn is ar Dia,
Iehobhah mòr gu sìor:
Tha 'bbreitheanais ro-chothromach
air sgaioleadh feadh gach tìr.
- 8 Oir chuimhnich e gu sìorruidh buan
a choimhcheangal gu beachd;
'S am focal fòs a dh'orduich e
do mhìltibh àl ri teachd;
- 9 An coimhcheangal a rinn e féin
ri Abraham gu caoin,
'S na mionnan a thug e le 'bheul
do Isaac òglach caomh:
- 10 Is amhluidh sin do Iacob fòs
dhaingnich se e mar reachd;
Mar choimhcheangal gu sìorruidh ouan
do Israel gu beachd:
- 11 Ag ràdh, Tìr Chanaain bheir mi dhuibh,
mar chrann bhuir n-òighreachd féin.
- 12 'Nuair bha iad tearc, 's 'naui buidhinn bhig
's 'nan coigrich inn' gu léir.
- 13 Is air bhi dhoibh ag imeachd fòs
o thìr gu tìr gun tamlh;
A' triall feadh sluaigh is rìoghachda,
nach fac' iad riamh roimh làimh:
- 14 Cha d' leig le neach an gortachadh;
ach smachdaich air an sgàth
Mor-rìghre neartmhor cumhachdach:
's a riu mar so ag ràdh;
- 15 'Feuchaidh nach bean sibh ris an dream
a dh' ungadh leam gu caomh:
Is fòs na deanaibh cron air bith
no lochd air m' fhàidhibh naomh.'
- 16 Fòs ghairm e gorta steach do 'n tìr,
is lorg an arain hhris.
- 17 Ach chuir e Ioseph rompa slòs,
reiceadh mar thràill gun fhìos.
- 18 Le geimhlìbh dhochainn iad a chos',
luidh e an iarunn teann;
- 19 Gu 'n uair an d'thàinig focal Dé;
is dhearbhadh sud e san àm.
- 20 An rìgh an sin chuir airsan fios,
is dh'fhuasgail air gu caoin:
Seadh uachdaran nam fìneacha
is leig se e fa sgaoil.
- 21 Is air a theaghlach thug e dha
àrd-thighearnas gu léir:
Ard-uachdranachd a stòrais mhòir,
thug esan dha d'a réir.
- 22 A cheangal mar a chiteadh dha
àrd-cheannardan na tìr:

- S gu'n tugadh e d'a sheanairibh
teagasg air gliocas fìor.
- 23 D'fhoghlaim na h-Eiphit thàinig fòs,
clann Israeil gu léir,
'S bha Iacob is a shliochd air chuairt
an talamh Cham le chéil'
- 24 Thug esan air a phobull féin
an sin ro-lhonnmhor fàs,
Is ní bu treise rinn e iad
na'n naimhdean anns gach càs.
Cridhe an dream ud dh'iompaich e
thoirt fuath d'a phobull naoinh,
'S gu'm buineadh iad gu cealgach olc
r'a sbeirbhisich ro-chaomh.
- 26 An sin chuir e dheadh òglach Maois,
Aaron a thagh e féin.
- 27 Nochd iad a bhearta miorbhuileach,
an talamh Cham gu treun.
- 28 Chuir orra duibhne, 's dh'orchaicheadh:
'n sin thug iad geill d'a ghuth.
- 29 Dh'iompaich gu fuil an uisgeachan,
is mharbh e 'n t-iasg 'nan sruth.
- 30 Is losgainn ann an lhomhoireachd
sin bhrùchd an tìr a mach,
An fardaichibh an rìghre-san,
's 'nan seòmraichibh a steach.
- 31 Air 'iarttus thàinig iomadh gnè
do chuileagaibh gu grad:
Is niala lhomhhor mar an ceudn'
'nan crìochaibh féin air fad.
- 32 Air son an uisge thug e dhoibh
clach-sheachd gu frasach geur,
Is lasair theine-dhealanaich
air feadh na tìr gu léir
- 33 Na craobhan fion, is fige fòs
ghrad-bhuileachd leis gu trom;
Is bhriseadh agus reubadh leis
gach crann a bha 'nam fonn.
- 34 Thug esan ìthne 's thàinig iad,
locuist gu lhomhhor ann,
'S na burruis sgrìosach iomarcach,
gun orra cuantas cheann;
- 35 Gach luibh san fhearann dh'itheadh leo
is dh'itheadh leo gach meas.
- 36 Bhuail e gach ceud-ghin anns an tìr,
toiseach an brìgh 's an treis'.
- 37 Le h-òr 's le h-airgiod thug e mach
a phobull féin gun dìth;
'S cha robh 'nan treubhaibh-san air fad
neach euslaiteach gun chli.
- 38 Bu shubhach leis na h-Eiphitich
'nuair chaidh iad uath' a mach.
Oir thuit an eagal-san gu mòr
le h-uamhunn air gach neach.
- 39 Neul os an ceann sgaol esan mach
mar bhrat no cùrtein mòr;
Le teine mar an ceudn' san oidhch'
thug solus dhoibh gu leòr.
- 40 An pohull dh'iarr, is thug e dhoibh
na gearra-goirt gu pailt;
'S le h-aran nèimh o speurailh àrd
thug dhoibh an sàth gun airc.
- 41 A' charralg sgòilt e, bhrùchd a mach
na h-uisgeacha gu leòr;
Is anns an fhàsach thartmhor theth
ruith iad mar amhainn mhòir.
- 42 Chionn gu'n d' chuimhnich e an sin
'fhocal 's a ghealladh naomh,
Is mar an ceudna Abraham
'òglach ro-dhileas caomh.
- 43 Is uime sin thug e a mach,
a shluagh le h-aobhneas mòr;
'S a dhaoine féin a rònnaich e,
le gairdeachas is còil.
- 44 Is fearann fòs nam fìneacha
thug esan dhoibh air fad;
Is mheal iad mar an oighreachd féin
saothair nan cinneach ud.
- 45 A chum gu'n tugadh iad fa'near
a reachda mar is còir,
'S gu'n gleidheadh iad a lagh faraon.
Molaihb Iehobhah mòr.

SALM CVI.

- OTHUGAIBH moladh mòr do Dhia,
is buidheachas faraon,
Oir tha e maith, mairidh gu bràth
a thròcair ghràmhòr chaoimh.
- 2 Gníomhara treun' Iehobhah mhòir,
co dh'fheudas chur an cèill?
Cò dh'fheudas fòs a chliu ro-inhòr
a thaisbeanadh gu léir?
- 3 'S beannaicht' an aithn ud gu beachd
a ghleidheas breitheanas,
'S an neach ud fòs a nì gach uair
ceartas is ionracas.
- 4 Dhia, cuimhnich ormsa, leis a' ghràdh
thug thu do d' phobull féin;
O thig le d' shlàinte shòlasaich
gu m' fhiosrachadh a'm' fheum.
- 5 Gu faic sinn maith do dhaoine taght',
's gu'n dean sinn aobhneas mòr
'Nan aobhneas sud; 's le t'òighreachd féin
gu'n dean sinn uail is glòir.
- 6 Do pheacaich sinn le'r sinnsearailh;
is fòs do rinneadh leinn
Mòr chiont' a' d' aghaidh féin, a Dhé;
gu h-aingidh pheacaich sinn.
- 7 Ar sinnseara cha d'thug fa'near
do bhearta miorbhuileach,
A rinneadh leat an tìr na h-Eiphit'
gu treunmhor cumhachdach;
Is lhomhoireachd do thròcair chaoimh'
dhichuimhnich iad gu truagh;
'S iad aig a' mhuir ga d' bhròsnachadh,
ri cois na fairge ruaidh'.
- 8 Ach theasairg e gu tèaruint' iad,
air sgàth dheadh ainme féin;
A chum gu'n nochdadh e mar sin
a chumhachda ro-threun.
- 9 Leig e a mach geur achmhasan
is thiormaich a' mhuir ruadh;
Is stiùir e troimh an doimheachd iad,
Mar troimh an fhàsach chruaidh.
- 10 O làimh an tì thug dhoibh-san fuath,
dh'fhuasgail e 'phobull féin,
'S o làimh an naimhde mi-ruach
shaoradh leis iad gu treun.
- 11 Is dh'fholuich uisg' an eascairde:
cha d'fhan fìu aon duibh beò.
- 12 Chreid iad an sin a bhiathra-san,
's a chliu do sheinneadh leo.
- 13 Air dearmad leigeadh leo gu cas
a ghníomhara ro-threun;
Cha d'fhuirich iad gu foighidneach
r'a chomhair' eagnuidh féin.
- 14 San fhàsach ghlac miann ciocrach iad,
'n sin bhuair iad Dia gu luath.
- 15 An iartus thug e dhoibh, ach chuir
caoil' air an anam truagh.
- 16 Sa' champa ghabh iad farmad mòr
ri Maois an duine caomh,
'S ri Aaron neach a rònnaich Dia
dha féin 'na shagart naomh.
- 17 An talamh dh'fhosgail e a bheul,
shluig Danan sìos gu grad;
Buidhinn Abiraim mar an ceudn'
dh'fholuich e iad air fad.
- 18 Is fòs am measg an guideachd-san
ghrad-las an teine teth;
Is loisg an lasair suas gu léir
na h-aingidh ud fa leth.
- 19 Dbealbh iad an sin is rinn iad laogh,
gu truagh aig Horeb àrd,
'S do'n iomhaigh leaght' a rinneadh leo
aoradh thug iad gun dàil.
- 20 Is amhluidh chaochail iad gu bochd,
an Dia 's an glòir gu léir,
Gu cosamhlachd is iomhaigh fhaoin
an daimh a dh'itheas feur.
- 21 An Dia thug tèarnadh dhoibh 'nam feum
dhichuimhnich iad gu grad;
An neach le 'n d' rinneadh bearta mòr'
an tìr na h-Eiphit' air fad:
- 22 Is gníomhara ro-iongantach
au dàthaich Cham le buaidh,

- Mar sin is nithe uamhasach
ri cois na fairge ruaidh':
- 23 Thubhairt e air an aobhar sin
gu'm millt' iad leis gu léir,
Mar seasadh 'oglach taghta, Maols,
fa chomhair, anns a' bheum:
- A chum gu'n deant' a chorruih mhòr
a philleadh air a h-ais,
Eagal 'na fheirg gu'n deanadh e
a phobull féin a sgríos.
- 24 Dhiùlt iad le focal an tìr ro-mhaith;
nìor chreid iad fàid Dé:
- 25 'Nam pàilliuuaidh rinn monmhor mòr,
's d'a ghuth cha d'thug iad géill.
- 26 An sin 'nan aghaidh thog e 'làmh,
g'an sgríos san fhásach lom:
- 27 A sgríos an sliochd measg fhineacha,
's g'an sgaioleadh feadh gach tuinn.
- 28 Rì Baal-peor mar an ceudn',
naig siad iad féin gu dlùth:
Is dh'ith iad cuid do lobairtibh
nan lodhol marbh' nach fù.
- 29 Bhrosnuich iad e mar sin gu feirg,
le'n innleachdaibh gu truagh;
Is bhris a' phlàigh an sin gu mòr
a steach am measg an t-sluaigh.
- 30 Sheas Phinehas, is rinn e 'n ceart:
'n sin sguir a' phlàigh d'an claoidh:
- 31 Sud mheasadh dha mar fhìreantachd
o linn gu linn a chaoidh.
- 32 Aig uisge comh-strì Mheribah
bhrosnuich iad Dia a ris;
Air chor, fa chùis a' phobull ud,
gu'n d' éirich oic do Mhaois.
- 33 Oir rinneadh leo a splorad-san
a bhrosnachadh gu geur:
Ionns gu'n d' labhair e an sin
gu cabhagach le 'bheul.
- 34 Na cinnich cha do sgrìosadh leo
mar dh'aithn Iehobhah dhoibh:
- 35 Ach mheasg iad leis na fineachaibh,
is dh'fhòghluim iad an dòigh.
- 36 Do lodholaibh nam fineacha
iad seirbhis rinn gu truagh:
Bha sud mar lìon 's mar rìbe dhoibh,
le'n ghlaadh iad gu luath.
- 37 Seadh thug iad suas mar lobairtean
do dheamhnaibh 's dhealbhaibh bréig',
Am mic 's an nigheana faraoan,
an aghaidh naomh-reachd Dhé.
- 38 Is fuil nan neòchiontach gu truagh
do dhòirteadh leo gun sgàth;
B'i fuil am mac 's an nighean féin
a dhòirt iad gun chion-fath.
- Do lodholaibh Chanaain fòs
mar lohairt thug an sliochd;
Mar sin do thruaillleadh leaoan tìr,
le fuil gun truas gun iochd.
- 39 Is amhluidh sin le'n gnìomharaibh
do thruaillleadh leo iad féin:
Chaidh iad air strìopachas o Dhia
le 'n innleachdaibh gu léir.
- 40 Fa 'n aobhar ud las corruich Dhé
r'a phobull féin gu teth:
Ionns gu'n ghabh e gràin gu mòr
d'a oighreachd air gach leth.
- 41 Is amhluidh rinn e 'n tabhairt suas
do làimh nam fineach flat;
Is thug thu dhoibh mar uachdarain,
an dream a dh'fhuathaich iad.
- 42 Rinneadh gu mòr an sàruchadh
le 'n naimbdbh laldir treun';
Is leagadh iad gu h-ìosal sìos
fo'n làimh sud mar an ceudn'.
- 43 Gu minic thug e saorsa dhoibh;
ach bhrosnuich iad e ris
le'n comhairlibh, is leagadh iad
air son an ceannairc sìos.
- 44 Ach thug e 'n àmhghar mòr fa'near,
tràth chualadh leis an glaoch;
Is chuir mhaich e dhoibh mar an ceudn'
a chumhnant gràs-mhor caomh;
Is ghabh e aithreachas a réir
mòr-shaobhreachd a ghràis

- 46 'S 'nan sealladh-san rinn braighde dhubh
'fhuair e dhoibh iochd is truas.
- 47 Thusa Iehobhah mhòir ar Dia,
dean saoradh dhuinn 'nan feum,
Is dean, am measg nam fineacha,
ar tional leat gu léir:
Do t'ainm ro-naomh gu'n tugamaid
mòr-bhuidheachas gu pailt':
Do chliu 's do mholadh mòr faraoan
gu seinneamaid gu h-ait.
- 48 'S beannaicht' an Triath, Dia Israell,
o chian nan cian gu bràth:
Abrahd an sluagh gu léir, Amen!
Molaibh-sa Dia a ghnàth.

SALM CVIL

- O THUGAIBH moladh mòr do Dhia,
is buidheachas faraoan;
Oir tha e maith, 's mairidh gu brath
a thròcair ghràs-mhor chaoin.
- 2 Pobull Iehobhah shaoradh leis,
labhradh mar so gun tàmh,
A' mhuinntir ud a bhuin e saor
a mach o làimh an nàmh.
- 3 Is as gach tìr san robh iad sud
do chruinnicheadh iad leis,
O 'n àird an ear, 's o'n àird an iar,
o'n àirde tuath, is deas.
- 4 San fhásach iad air seachran chaidh
an ionad falamh fàs;
Is bail' air bith cha d'fhuaradh leo
gu còmhnuidh ann no tàmh.
- 5 Ocrach is lotmhor bha iad fòs;
chlaoidheadh an anam truagh.
- 6 Ghlaodh iad an sin ri Dia 'nan teinn,
shaor iad o'n àmhghar chruaidh.
- 7 Stiùir esan agus threòruich iad
air bealach ceart fa'n cois,
A chum gu'n rachadh iad fadheoidh
gu baile tàimh is fois'.
- 8 O b'fhearr gu'm moladh daoine Dia
air son a mhaithis chaoin,
'S air son a bhearta iongantach
rinn e do chloinn nan daoin'!
- 9 Oir nì e 'n t-anam miannach trom
a shàsachadh gun airc
'S an t-anam ciocrach lionaidh e
le 'mhaitheas féin gu pailt.
- 10 An dream a shuidh an dorchadas,
is ann an dubhar bàis;
Fo chuibhreach ta an àmhghar truagh,
's an iarunn cruaidh an sàs;
- 11 Air son gu'n robh iad ceannairceach
an aghaidh briathra Dhe,
'S air comhairle an Tì a's àird'
gu'n d'rinn iad tàir gu léir;
- 12 An sin an cridhe leag e sìos
le saothair is le péin;
Thuit iad, is aon neach cha robh ann
g'an cuideachadh 'nam feum:
- 13 Ghlaodh iad an sin ri Dia 'nan airc,
dh'fhuasgail o'n teinn gu grad.
- 14 O'n dorchas bhuin, 's o dhubhar bàis,
's an cuibhreach bhris air fad.
- 15 O b'fhearr gu'm moladh daoine Dia
air son a mhaithis chaoin,
'S air son a bhearta iongantach
rinn e do chloinn nan daoin'!
- 16 Chionn gu'n do bhriseadh leis le 'neart
na geatan prais gu léir;
Na stapull iarunn is na croinn
sgaol esan as a chéill'.
- 17 Bha amadain le 'n cron, 's le 'n lochd,
fo àmhghar goirt an sàs.
- 18 Bha 'n anam gabhail gràin do bhìadh,
's iad dlùth do dhorsaibh bàis.
- 19 Ghlaodh iad an sin ri Dia 'nam feum,
dh'fhuasgail o'n teinn gu grad.
- 20 Le 'fhocal rinn e 'n slànuchadh.
is shaor o'n sgrìos air fad.
- 21 O b'fhearr gu'm moladh daoine Dia
air son a mhaithis chaoin,
'S air son a bhearta iongantach
rinn e do chloinn nan daoin'!

- 22 Thugadh iad lobairt buidheachais
is cliù do Dhia na glòir;
Athriseadh iad a ghlòimhara,
le subhachas is ceòl.
- 23 Luchd-loingeis théid air muir, 's a bhios
ri gnìomh an uisgibh buan;
- 24 Dhoibh sud is léir mòr-oibre Dhé,
's a mhlorbhuilean sa' chuan.
- 25 Air 'iarrtus, dèisgear leis a' ghaoth
gu h-àrd 's gu doiminnach:
Le 'n togar suas gu h-atmhor borb
a thonna garbh' fa seach.
- 26 Tha iad ag éirigh suas gu nèamh:
's a ris dol domhain sìos:
Ionnnus gu'n d' leagh an anam truagh
le trioblaid chruaidh 's le sgios.
- 27 Dol thuig' is uaithe, gu tuisleach fòs,
amhluidh mar dhuin' air mhisg;
Ionnnus gu'n d' thréig gu buileach iad
gach gliocas bha 'nam measg.
- 28 Ghlaodh iad ri Dia 'nam teinn; is shaor
e iad o'n trioblaid ghéir.
- 29 Ghrad-chuireadh leis an stoirm gu fèith,
's na tuinn 'nan tàmh gu léir;
- 30 An sin tha iad ro-ait, air son
gu bheil iad sàmhach beò:
'S gu'n d' thug e iad do'n chalahd sin,
's do'n phort bu mhiannach leo.
- 31 O b'fhearr gu'm moladh daoine Dia
air son a mhaithais chaoimh,
's air son a bhearta iongantach
rinn e do chloinn nan daoin'!
- 32 Is fòs an coimhthional an t-sluaigh
àrd-mholar e gu mòr;
'S an cruinneachadh nan seanair glie'
cliù thugar dha is glòir.
- 33 Almhniche nì 'nam fàsach lom,
tobair 'nan talamh cruaidh:
- 34 Tìr bheartach nì e fàs, air son
mòr aingidheachd an t-sluaigh.
- 35 Am fàsach tioram tionndaidh e
gu uisge tàimh nach gann,
'S gu tobair fìor-uisg' iompaichidh
am fearann tartmhor teann.
- 36 Do dhaoibh ocrach bheir e sud
mar àite fois' is tàimh;
A chum gu'n deasuidht' caithir leo
chum còmhuidh ann a ghnàth.
- 37 Chum craobhan fion' a shuidheachadh
is siol a chur san fhoimh,
A bheir a mach san aimsir cheirt
cinneas is toradh trom.
- 38 Bheannaich e fòs am pobull ud
is dh'fhàs iad lìonnmhor mòr;
'S nìor leig e dhoibh dol air an ais
'nam feudall no 'nan stòr.
- 39 Lughdaichear iad gidheadh a ris,
is leigear iad gu bochd,
Le saruchadh is àmhghar geur,
is doilgeas brònach goirt.
- 40 Air prionnsaibh dòirtear tarcuis leis,
san fhàsach mar an ceudn',
Cuiridh e iad air seachran fiar,
gun bhealach ann d'an ceum.
- 41 'S o trioblaid togaidd e am bochd,
's nì teaghlach dha mar threud.
- 42 Sud chì na fireana, 's b'ìdh ait,
is druidear beul nam beud.
- 43 Cò iad tha glie, 's a bheir fa'near
na nithe sud gu ceart?
'S iad sin a thuigas trócair cbaomh
is maithas Dhé nam feart.

SALM CVIII.

- M**O chrìdh' tha ann am fonn, a Dhé,
gu socair mar is còir;
Is seinnidh mi gu ceòlmhor dhuith,
is molam thu le m' glòir.
- 2 Mosglaidh, is éiribh grad an àird,
'shaltair 's a chlarsach ghriinn:
Mosglaidh mi féin, is éiridh mi
gu moch chum ceòl a sheinn.
- 3 O Thighearna Iehobhah mhòir,
measg chinneach, molam thu,

- 'S am measg an t-sluaigh gu h-urramach
àrd-seinnidh mi do chliù.
- 4 Oir tha do thròcair mòr os ceann
nan nèamha shuas gu léir;
Is ruigidh t'fhìrinn mar an ceudn'
gu neulthaibh àrd' nan speur.
- 5 Bì thusa, Dhé, os ceann nan nèamh
air t'àrdachadh gu mòr;
Is fòs os ceann gach uile thìr
togar gu sìor do ghloir.
- 6 A chum gu deanta fuasgladh leat
do d' phobull ionnmhuinn féin,
O teasaig mi le d' ghairdean deas,
is freagair mi a'm' f'heum.
- 7 'Na naomhachd labhair Dia nam feart;
bidh aoibhneas orm nach gann,
Air Sechem nì mi roinn gu ceart,
gleann Shucoit' toimhear leam.
- 8 'S leam Gilead le dighe cheirt,
Manaseh 's leam gu beachd;
'S i treubh Ephraim nearm mo chinn:
bheir Iudha mach nìo reachd.
- 9 Is soitheach-ionnlaid Moab dhomh,
tìgearm thar Edom thruagh
Mo bhròg: is nì mi caithream binn
thar Palestin le buaidh.
- 10 Cò bheir do 'n chaitir dhaingein mi?
's gu h-Edom bheir gu ceart?
- 11 Nach tusa, Dhé, le'n d' thréigeadh sinn?
's nach téid thu mach le'r feachd?
- 12 O thrioblaid tabhair còmhnaidh dhainn,
oir 's dìomhain furtachd dhaoim'.
- 13 Trid Dhé nì sinne treubhantas:
'se shaltas naimhde fodh'nn.

SALM CIX.

- O** DHIA, ta taobhar molaidd dhomh,
gu balbh a'd' thosd na bèi.
- 2 Oir beul nan daoil, 's nam fealtach tha
gnàth-fhosgall' air mo thì:
Le teangaidh bhreugaich labhair iad
a'm' aghaidh-sa a ghnàth:
- 3 Chuairtich iad mi le briathraibh fuath':
chuir cath orm gun chion-fath.
- 4 Air son mo ghaol taid naimhdeil dhomh,
is mi ri urnuigh ghnàth.
- 5 Ole dhiol iad rium an éric maith,
is fuath air son mo ghràidh.
- 6 Fear droch-bheirt cuir-sa os a cheann;
biodh Satan aig a dheis.
- 7 Urnuigh gu robh 'na peacadh dha,
fàgar am binn e ris.
- 8 Gearr gu robh 'a'ois; is glacadh neach
oilig' 's a dhreuchd gun iechd.
- 9 Gu'n robh a bheann 'na ban-treabhaich,
's 'nan dilleachdain a shliochd.
- 10 Air seachran biodh a shliochd a ghnath,
ag iarraidh déirc' 'nam feum;
Is as an àitibh falamh fàs
ag iarraidh b'ìdh dhoibh féin.
- 11 Gu'n glacar fòs le luchd nam fiach
gach nì a bhuineas da:
'S a shaothair-san mar chobharthaich,
gu'm buineadh coigriche leo.
- 12 Na biodh neach ann nì trócair air;
na bitheadh fòs a haon
A ghabhas truas d'a shliochd, a bhios
'nan dilleachdain gun mhaoin.
- 13 Sgrìos gu robh air a ghineil-san,
g'an sgathadh as gu léir;
Gu'n cuirear as an ainm air fad,
san ài a thig 'nan déigh.
- 14 Aingidheachd 'aithriche gu'n robh
air chuimhn' aig Dia a ghnàth:
Is ciont' a mhàthar mar an ceudn'
na cuirear as gu bràth.
- 15 Gu robh iad air an taisbeanadh
am fianuis Dhé do shìor;
A chum gu'n sgathadh e a mach
an iomradh as an tìr.
- 16 Oir dhearnaid e bhì tròcaireach,
is shàruich e am bochd,
'S an t-ainnis, chum gu marbhadh e
neach'g an robh cridhe goirt.

- 17 Mar thug e toil do mhallachadh,
mallaicht' biodh e gach là ;
Is mar nach b' àill leis beannachadh,
na éireadh beannachd dha.
- 18 Amhluidh mar rinneadh leis e féin
a chuairteachadh gach am,
Le h-euscaint is le mallachadh,
ceart mar le trusan teann,
- *s amhluidh gu tigeadh sud gu beachd
mar uisge steach 'na chom,
*s mar oladh drùidheadh sud gu geur
'na chnámhaibh féin gu trom.
- 19 Biodh sud mar eudach uime-san,
'ga fholach air gach tráth ;
Is amhluidh mar an crios a bhios
'g a chrìoslachadh a ghnáth.
- 20 O'n Tighearna gu'n toirear sud
do m' naimhdbh mar an duais,
*s do'n dream an sghaidh m'anam' ta
gnáth-labhairt uile gun truas.
- 21 Ach air mo chrann bi thusa, Dhé,
air sgáth t'ainm' usail féin ;
Do bhrìgh gu bheil do thròcair maith,
dean saoradh dhomh a'm' fheum.
- 22 Oir tha mi aim-beartach gu beachd,
is tha mi ainnis lom,
A ta mo chridhe air a lot
an taobh a stigh do m' chom.
- 23 Is amhluidh ta mi gabhail seach
mar sgàil a' clonadh sìos ;
Air m'fhuadach' mar an locust truagh
thuig' agus uait a ris.
- 24 Mo ghluine ta air failneachadh,
aig meud mo thraisg a ghnáth ;
Is m'fheòil aig diobhail sàil' is sult'
air seargadh as a ta.
- 25 A'm' aobhar fochaid tha mi fòs
do'n aitim ud gu léir ;
Chrath iad an cinn gu fanoideach,
tràth sheall iad orm gu geur.
- 26 Fòir orm, a Thighearna mo Dhia ;
a'd' thròcair cuidich mi ;
27 Gu'n tuig iad gur i so do làmh,
's gur tu rinn sud, a Dbé.
- 28 'N tràth bhitheas iad ri mallachadh,
beannaich-sa sinn gu pailt ;
Biodh orra nàir', air éirigh dhoibh ;
ach t'òglach-sa biodh ait.
- 29 Gu robh iad air an cuairteachadh
m'uid' eascairde le nàir ;
's mar f'halluinn air an uachdar biodh
an amhluidh féin le tair.
- 30 Ach mise, ghnáth, ard-mholaidh mi
Iehobhah Dia le m' bheul ;
Is fòs, an measg a' choimhthionail,
cuidich mi 'chian an céill.
- 31 Oir tha e leis an duine bhochd
'na sheasamh air a dheis,
G'a theasairginn o'n dream le 'm b'àill
'anam-san fhàgail ris.

SALM CX.

THUBHAIRT Iehobhah ri mo Thriath,
Bi d' shuidhe air mo dheis,
T'uill' eascairde gu'n cuir mi dhuit
'nan stòl fo bhonn do chois'.

- 2 A Sion cuiridh Dia a mach
slat-shuaicheantais do neirt ;
's an builsgan t'eascairde gu léir
bi féin a'd' uachdran ceart.
- 3 Bithidh do phobull taghta féin
ro-thoilach mar is còir,
San là sin anns am foillsich thu
do chumbachda gu mòr ;
Am mais 's an sgéimh 'na namhachd ghriinn,
o bholg na maidne moich,
Mar dhealt a thig a nuas o nēamh,
tha t'òigridh iomarcach.
- 4 Do mhionnach Dia Iehobhah mòr,
's cha'n aithreach leis gu'n d' rinn,
Réir orduigh mhaith Mhelchisedeic,
gur sgart thu gach linn.
- 5 An 'Tighearna ta air do dheis,
trom-bhuaillear leis gu garg

Mor rìghrean làidir cumhachdach,
san là a lasas 'fhearg.

- 6 Bheir esan breth measg fhineachan,
lìonaidh gach àit gu fìor
Le corpaibh marbh' : is lotar leis
na h-uachdrain thar gach tìr.
- 7 Is anns an t-slighe òlaidh e
deoch as na sruthaibh luath' ;
Is air an aobhar ud fa-dheòidh
togaidh e 'cheann le buaidh.

SALM CXI.

- M**OLAIBHSE Dia, sìor-mholams' e
le n'uile cluridh' gu h-àrd ;
An coimhthional nam fìrean còir',
sa' chuideachd mhòir 's gach àit.
- 2 Tha gnìomharan an 'Tighearna
iomaroch mòr gu léir ;
Is leis an dream le'n 'tìochdmhor iad,
rannsaichear iad gu geur.
- 3 Tha 'obair-san ro-urramach,
ro-ghlòrmhor i gun cheisd ;
Tha fìreantachd Iehobhah fòs
buan mhaireannach am feasd.
- 4 A ghnìomhara ro-iongantach,
air chuimhne chuir gu beachd :
A ta Iehobhah grasmhor cuoin,
is làn do thrucantachd.
- 5 Thug esan biadh is lòn do'n dream
d' an eagal e a ghnàth,
's a choimhcheangul a rinn e leo
cuimhnichidh e gu bràth.
- 6 Neart 'oibre iongantach chuir Dia
an céill d'a phobull féin ;
A thabhairt doibh mar sheilbh gu buan
oighreachd nan sluagh gu léir.
- 7 Fìrinn is ceartas gnòmh a làmh ;
'uill' àitheantan tha fìor.
- 8 Deanta le ceartas fìrinnreach :
taid seasmhach buan do shòr.
- 9 Shaochadh le Dia a phobull féin ;
is dh'orduich e am feasd
A choimhcheangul : tha 'ainm-san naomh
is urramach gun cheisd.
- 10 'Se tús a' ghliocais eagal Dé,
tha deadh thuigs' aig an dream
Le'n coimhthionar a roachda-san :
mairidh a chùiu gach am.

SALM CXII.

- O** THUGAIBH moladh mòr do Dhia :
's beannaicht' an ti gu beachd
D' an eagal Dia, 's a ghabhas toil
gu mòr d'a lagh 's d'a reachd.
- 2 Bidh 'shliochd-san làidir anns an tìr,
's ro-bheannaicht' sìol nan soi.
- 3 Bidh maoin is saobhreas mòr 'na thigh ;
bidh 'cheartas buan a chaoidh ;
- 4 Tràth bhitheas saoi an dorchadas,
'n sin éiridh solus da ;
Tha e fìor-gbràsmhor tròcaireach
is cothromach a ghnáth.
- 5 Is truacant' fòs, deadh-choingheallach,
an duine maith a chaoidh ;
Is bheirair leis gu seòlta glie
a ghnòthuiche gu crìch :
- 6 Gu dearbh cha tig aon ni am feasd
le'n gluaisear e gu mòr ;
Ach cuimhn' is iomradh maith a chaoidh
bidh air an fhìrean chòir.
- 7 Is air-san cha bhì faiteachas,
air cluinntinn dha droch-sgèil ;
Tha 'chridhe socrach muinghinneach
an Dia Iehobhah treun.
- 8 Tha 'chridhe air a shocrachadh,
cha bhì air geilt no fiamh,
Gu ruig an uair am faicear leis
air eascairdibh a mhiann.
- 9 Sgoil e a chuid, is thug do'n bhochd,
's buan 'fìreantachd am feasd ;
Bidh 'adharc air a h-àrdachadh
le urram mòr gun cheisd.
- 10 Cràdhar an daoi, tràth chi e so ;
casaidh e 'fhuicla geur' ;

Seargaidh e as: is sgrìosar miann
nan aingidh ud gu léir.

SALM CXIII.

- M**OLAIBHSE Dia, O molaibh e,
òglacha dileas Dé;
Ard-mholaibh fos gu h-urramach
deadh ainm Iehobhah thèin.
2 Ainm Dhé biodh beannaichte gu mòr,
o'n àm so is gu brath.
3 O éirigh gu ruig luidhe gréin',
ainm Dhé ion-mholta ta.
4 'S àrd thar gach tìr Iehobhah mòr,
's a ghloir thar nàmhha fos.
5 Cò 's coimeas ris an Tighearna
ar Dia, ta chòmhnuidh shuas?
6 'S ean an neach a chromas sìos,
's a dh'ìsicheas e féin,
Dh'amharc gach nì san talamh ta,
's an nàmhaidh àrd' nan speur.
7 Togaidh e 'n deòradh truagh o'n dus;
's am bochd o'n òrach bhreun;
8 G'an cur 'nan suidh' le prionnsaibh àrd',
le prionnsaibh 'phobuill féin.
9 Bheir e do'n mhnai a ta gun sliochd
tigh còmhnuidh teaghlach mhòir';
Gu bhì 'na màthair aobhneach mhac.
Molaibhse Dia ha glòir'.

SALM CXIV.

- A**IR teachd do Isra'ì as an Eiph't,
's do Jacob mach o'n dream
'G an robh an cainnt ro-chruaidh is dorcha
aig còmhlicheas an teang'.
2 Bha Iudah dha mar chòmhnuidh naomh,
bu riochachd Isra'ì leis.
3 Air faicinn sud, ghrad-theich an cuan
sruth fòrdain phill air ais.
4 Mar reithe bras leum beannta suas;
leum cnocan beag' mar uais;
5 Iordan, c' arson a phill air 'tais?
c' arson a theich thu, chuain?
6 C'arson a leum sibh, shléibhte àrd',
mar reithe meargant bras?
C'arson, mar uain nan caorach fòs,
a leum sibh, chnoca glas?
7 O thalaimh, crìothnaich fòs le geilt,
roimh ghnùis Iehobhah mhòir;
O crìothnaich fòs le geilt roimh ghnùis
Dhé Jacob mar is coir!
8 Oir thionndaidh e an aillbhin theann
gu loch do uisge talamh,
'S a' charraig chruaidh gu tobair uisg',
le cumhachdaibh a làimh'.

SALM CXV.

- D**HUINNE cha'n ann, a Thriath, cha'n ann,
ach do 'tainm uasal féin
Tabhair an cliù 's a' ghloir, air sgàth
do ghràis is t'fhìrinn réidh.
2 C' arson a theireadb fìneacha,
c'aist bheil an Dia a nis?
3 Ar Dia a ta air nàmh, is rinn
gach gnìomh bu toileach leis.
4 An iodhoil 's aigiod iad is òr,
gnìomh làmhha dhaoine féin.
5 Tha beoil ac', leis nach labhair iad;
's sùilean, leis nach léir.
6 Tha cluasan ac', 's cha chluinn iad leo;
is sròin', gun fhàile annt'.
7 An làmh gun chhl, an cos gun cheann
an scornan gun smid chainnt'.
8 Iadsan a dhealbh 's a ghéilleas doibh,
's ro-chosmhuidh iad riu féin.
9 O Isra'ì, dean-sa bun á Dia;
'se 'n sgiath, 's an còmhnaidh treun.
10 Thigh Ároin, O dean bun á Dia;
'se 'n còmhnaidh, is an sgiath.
11 Luchd eagail Dé, làn-earbaibh as:
an sgiath 's an neart 'se Dia.
12 Iehobhah Dia bha cuimhneach oirn;
beannaichidh e sinn féin;
Beannaichear leis tigh Israeil,
's tigh Ároin mar an ceudn'.

- 13 Na big 's na mòir d'an eagail Dia,
beannaichidh e gu caoin.
14 Cuiridh e sibh an lionmhoireachd,
sibh féin 's 'ur sliochd fàraon.
15 Is beannaicht' sibh o'n Tighearna,
rinn nàmh is làr gu léir.
16 An talamh thug do chloinn nan daoine';
's leis féin àrd nàmh nan speur.
17 Na mairbh, no'n dream théid tosdach sìos
do'n uaigh, cha mhol iad Dia.
18 Ach molar leinn e nis, 's gu bràth.
Molaibh gu h-àrd an Triath.

SALM CXVI.

- I**S toigh leam Dia, air son gu'n d'fìsd
ri m' ghuth, 's ri m' urnuigh fos.
2 A chionn gu'n d'aom e rium a chluais,
sior-éigheam ris ri m' bheò.
3 Chaidh unam dòruinn gear a' bhàis,
ghlac piantan ifrinn mi:
Theann-ghlacadh mi le trioblaid thruagh,
is àmhghar cruaidh do m' chlaoidh.
4 Air ainm Iehobhah ghair mi 'n sin;
(mar so a' labhairt ris).
O Dhia mo Thighearna, guidheam ort,
saor m' anam bochd a nis.
5 A ta Iehobhah gràsmhor, ceart;
's is tròcaireach ar Dia.
6 'Se ghleidheas daoine sìmplidh ciùin'
lag bha mi, 's dh'fhoir an Triath.
7 O m'anam, feuch gu'm pill thu nis,
gu d' shuaimhneas is gu d' thàmh;
Oir dheònuich Dia gu saibhir dhuit
mòr thoibrheartas a làimh'.
8 O ghàbhadh is o chunnart bàis
shaor thusa m'anam bochd;
Mo chosan shaor o shleamhnachadh,
's mo shùil o dheuraibh goirt'.
9 An sealladh Dhé, an tìr nam beò,
gu dìreach gluaisear leam.
10 Do bhrìgh gu 'n chreid mi, labhair mi
's mi air mo chlaoidh gu trom.
11 A'm' dheifir thubhairt mi mar so
's breugach gach duin' air bith.
12 Ciod dh'ìocas mi do Dhia, air son
na rinn e dhomh do mhaith?
13 Cupan na slàinte glacar leam,
air ainm Dhé gaiream féin.
14 Iocam mo bhòid do Dhia, a nis
an làth'r a shluagh gu léir.
15 Aig Dia 's ro-phrìseil bàs a naomh.
16 Dhé, t'òglach 's mi gu beachd;
'S mi t'òglach, mac do bhanoglaich;
mo chuibhreach sgaolachd leat.
17 Bheir mise lobairt-molaidh dhuit
air ainm Dhé gaiream féin.
18 Iocam mo bhòid do Dhia, a nis
an làth'r a shluagh gu léir.
19 An cùirtibh àluinn àois Dé,
a'd' bhuilsgan féin gu sìor
O chaithir àrd Ierusalem.
Molaibh an Triath gu sìor.

SALM CXVII.

- O** THUGAIBH moladh mòr do Dhia,
gach fìne t'ann fa leth;
Seadh molaibh Dia gu fonnmhor àrd,
gach uile shluagh air bith.
2 Oir 's mòr a chaoimhneas tròcaireach,
a dheònuich e dhùinn féin;
Tha fìrinn Dé sìor-mhaireannach.
Molabh Iehobhah treun.

SALM CXVIII.

- O** MOLAIBH Dia, oir tha e maith,
sior-mhairidh tròcair Dhé:
2 Abradh clann Israeil a nis,
gur buan a ghràs gach ré.
3 Tigh Ároin abradh iad a nis,
sior-mhairidh tròcair Dhé.
4 Abradh an dream d'an eagail Dia,
gur buan a ghràs gach ré.
5 A'm' éigin ghair mi air an Triath:
fhreagair e mi gu deas,

- An ionad farsuinn agus réidh
shocrúich e mi le treis.
- 6 Tha Dia Iehobhah air mo chrann,
cha'n eagail leam a chaoiadh,
Aon ni a dh'fheadas clann nan daoine
a dheanamh orm ga m' chlaoidb.
- 7 Measg luchd mo chnideachaidh tha Dia
a' seasamh leam gu beachd:
Air luchd mo mhi-ruin, uime sin,
chi mi mo mhian a' teachd.
- 8 'S fearr na bhí 'g earbs' a' duine beò,
ar dòchas chur an Dia.
- 9 'S fearr na bhí 'g earbs' a' prionnsaibh mòr,
ar dòchas chur san Triath.
- 10 Do chuairtich umam air gach làimh
na dùthchanna gu léir:
Ach sgatham agus sgríosam iad,
an ainm Iehobhah tbréin.
- 11 Do chuairtich iad mi air gach taobh,
chualtich iad mise fós;
Ach sgatham agus sgríosam iad
an ainm Iehobhah mhoir.
- 12 Mar bheachd chualtich iad, ach chaidh
iad as mar theine dris;
Oir ann an ainm Iehobhah thréin,
ní mi gu léir an sgríos.
- 13 Ga m' leagadh, theann thu orm gu dlúth;
ach chuidich leam-sa Dia.
- 14 'Se Dia mo cheòl, 's mo shláinte fós,
is e mo thréir an Triath.
- 15 Guth gairdeachais is sláinte ta
am páillunaibh nan saoi:
Deas lámh Iehobhah ulle tbréin
fhuaradh gu treubhach i.
- 16 Ta gairdean deas an Tighearna
air 'ardachadh gu mòr;
Is rinneadh bearta treubhantais
le deas lámh Dhé na glóir'.
- 17 Cha'n fhaigh mi bàs, ach maiream beò,
is innseam oibre Dhé.
- 18 Throm-smachdaich Dia mi, ach gu bàs
cha d'thug e thairis m'.
- 19 O fosglaidh dhomh gu farsuinn réidh
geatan an ionracais:
Is racham orra-san a steach;
Iehobhah molaich m'.
- 20 So dorus Dé, air 'n téid a steach
na daoine coire naomh'.
- 21 Sior-mholam thu, oir chual' thu mi;
is tu mo shláinte chaoimh.
- 22 A' chlach a dhíhlit na clachairean,
clach-chinn na h-oisinn i.
- 23 'Se Dia rinn sud, 's ro-longantach
'nar shúilbhe an gníomh.
- 24 So féin an là a dh'orduich Dia,
sam bi sinn suilbhir ait.
- 25 Fóir, guidbeam, guidheam ort, a Dhé;
nis solrbhich leinn gu pailt.
- 26 Beannaicht' gu robh an neach a thig
an ainm Iehobhah thréin:
Thug sinne beannachd oirbhse mach,
a' tigh Iehobhah féin.
- 27 'Se Dia Iehobhah dhealraich oirnn:
ceanglaibh le cordaibh cruaidh,
Ri adharcaibh na h-altair' naoimh',
an lobairt bheir sibh uaibh.
- 28 'S tusa mo Dhia, is molam thu;
ardaicheam thu, mo Dhia.
- 29 O molaibh Dia, oir tha e maith:
sior-mbairidh gràs an Triath.

SALM CXIX.

ALEPH.

- 'S BEANNAICHT' an dream tha foirfe glan
san t-slighe dh'irich cheirt;
An dream a ghluaiseas ann an lagh
ard-Thighearna nam feart.
- 2 'S beannaicht' an altim ud faraon
le 'n coimhdear teistias Dé,
's a dh'iarras e gu dìchiollach,
le 'n ulle chridhe féin.
- 3 'Na shligheibh-san sior-ghluaisear leo,
's cha dean iad aingidheachd.

- 4 Dh'àithn thn dhuinn gu coimheadamaid
gu dìchiollach do reachd.
- 5 O stiùir mo cheum, 's gu coimhdear leam
do reachda dìreach féin!
- 6 Cha ghahh mi nàir', tràth bheir mi spéis
do t'àitheantaibh gu léir.
- 7 Le cridhe treibhdhreach gun ghò
mòr-mholam thu gu binn,
Tràth dh'fhoghlumas mi breitheanaidh
do cheartais naomha ghrrinn.
- 8 'Se so mo rùn gu coimhdear leam
do reachda naomha a ghnath:
O Thighearna, na trèig-sa mi
gu buileach no gu bràth.

BETH.

- 9 Ciod leis an glan an t-òganach
a shlighe féin gu ceart?
Trid faicill mhaith is furachrais,
réir t'fhoicail is do reachd.
- 10 Le m'ulle chridhe féin, a Dhé,
dh' iarradh leam thu gu caomh;
Na leig dhomh dol air seacharan
o t'àitheantaibh ro-naomh.
- 11 Air eagail peacaich, dh'fholuich mi
a'm' chridhe t'fhocal ceart.
- 12 O teagaisg dhomh do reachda naomh'
's beannaicht' thu, Dhia nam feart.
- 13 Le m' b'bhilbh, breitheanaidh do bhéil
nocbd mi air fad 's air leud.
- 14 Slighe do theisteis h'aoibhnic' leam,
na saoihbheas mòr d'a mheud.
- 15 Socraichidh mi mo smuaineachadh
air àitheantaibh do reachd;
Air cennannaibh do shlighe féin
sior-dbearcaidh mi le beachd.
- 16 Gabhaidh mi tlabhd is ciata mhaith
do d' statuibh gu léir:
Air dearmad fós cha leig mi chaoidh
deadh fhocal glan do bhéil.

GIMEL.

- 17 Riumsa ta m'òglach dhuit, a Dhé,
dean toirbheartas gach àm;
A cbum gu bithinn beò, is fós
gu'n coimhdear t'fhocal leam.
- 18 Fosgail mo shùl-eàn, 's chi mi 'n sin
mòr-longantais do reachd.
- 19 'S coigreach air thalamh mi; na ceit
orm t'àitheanta ro-cheart.
- 20 Tha m'anam briste stigh,
is muldach a ghnath;
Aig meud mo thograidh is mo mhian
do d' bhreitheanaidh gach tràth.
- 21 Luchd-uabhair mhallaicht' smachdaich thu,
a chlaon o t'arrtus ceart.
- 22 Cuir spid is masladh fada uam,
oir choimhdeach leam do reachd.
- 23 A'm' aghaidh lahbair prionnsan mòr,
air suidhe dhoibh le chéil';
Ach air do statuibh ro-naomh
do smuainich t'òglach féin.
- 24 A ta mi gabhail tiachd gu mòr
do d'theisteis naomha féin;
Is mar an eudna tha iad dhomh
'nan comhairlich a'm' fheum.

DALETH.

- 25 Tha m'anam leantuinn ris an ùir:
réir t'fhocail beothaich mi.
- 26 Nochd mi mo shligh', is dh'éid thu rium
seòl dhomh do lagh, a Dhé.
- 27 Air slighe fhior-ghloin t'àitheanta
thoir dhomhsa tuigse gheur;
Mar sin air t'oirbribh iongantach
labhram, 'g an cur an céill.
- 28 Tha m'anam leaghadh as le hròn:
réir t'fhocail deonach neart.
- 29 Cuir slighe bbreugach fada uam:
a'd' ghràs thoir dhomh do reachd.
- 30 Slighe na firinn foirfe gloin,
is i bu roghainn leam:
Is chuir mi do cheart bhreitheanaidh
fa m' chomhair féin gach àm.

- 51 Lean mi gu dlùth 's gu faicilleach
ri d' theisteis naomha féin;
Na cuir gu h-amhladh náire mí,
O Thighearna ro-thréin.
52 An slighe fhior-ghloin t'aitheanta
sior-rùithidh mí le tiachd;
Trath m'ithear leat mo chridhe teann
a chur am farsuinneachd.

HE.

- 33 Slighe do statuin teagaisg dhomh,
O Dhia Iehobhah thréin:
Is coimhdeam i gu dìchiollach,
gu crìch mo shaothail féin.
34 Tuigs' agus eòlas tabhair dhomh,
is coimhèidh mí do reachd;
Is fòs le m'ùile chridhe féin
coimhdear leam e gu beachd.
35 An ceum do lagh' thoir orm bhì triall,
oir leam 's ro-thlachdmhor e.
36 Gu d' theisteas naomh', 's cha'n ann gu sannt,
mo chridhe lùb, a Dhé.
37 Mo shùile pill mu'n ambaire mí
air dlombanas gun stà:
Ach ann do shligheibh naomha féin
ath-bheothaich mí a ghnàth.
38 O dàingnich t'fhocal firinneach
do t'òglach féin gu mòr;
Do'n neach thug suas e féin air fad
do t'eagal mar is còir.
39 Pill uam an nàir a's eagal leam;
oir 's maith do bhreth, a Dhé.
40 Feuch, 's miannach leamsa t'aitheanta:
a'd' cheartas beothaich mí.

VAU.

- 41 Thigeadh do thròcair mar an ceudn'
a m'ionnsuidh féin, a Dhé;
Do chomhfhurtachd, 's do shlàinte chaomh,
a réir do gheallaidh féin.
42 Mar sin do'n neach bheir masladh dhomh,
hidh agam freagrach deas:
Oir ann ad fhocal firinneach
mo dhòchas cuiridh mis'.
43 Focal na firinn na buin leat
gu h-ionnlan as mo bheul;
Oir ann ad bhreitheanais ro-cheart
a ta mo dhòchas féin.
44 Mar sin gu suthain is gu sior,
gnath-choimhèidh mí do reachd:
45 Air son gu'n larram t'aitheanta,
gluaiseam am farsuinneachd.
46 Ri righrìbh labhran air do theist,
gun amhladh orm no sgàth.
47 Is gabham tiachd do t'aitheantaibh,
's ann doibh a thug mi gràdh.
48 Ri t'aitheantaibh d'an d' thug mi toil,
togam mo làmh féin:
Is ann ad statuisibh ro-naomh
bithream ri cuasachd ghéir.

ZAIN.

- 49 Cuimhnich am focal ud, a Dhé,
do t'òglach féin a nis,
Thug thu mar bharran dòchais dhomh,
's thug orm gu'n d'earb mí ris.
50 'Se so mo chomhfhurtachd ro-mhòr
a'm' theinn 's a'm' àmhghar geur:
Oir rinn do bhriathar firinneach
m'ath-hheothachadh gu treun.
51 Bha mi mar aobhar fanoid mhòir
aig daoineibh àrdanach;
Gidheadh cha d' aom mi o do lagh,
le claonadh seachranach.
52 Do bhreitheanais a ta o chian,
cuimhnich mí, Dhia, gu léir
Is ghilac mí thugam féin an sin
deadh chomhfhurtachd a'm' fheum.
53 Air son gu'n d' thréig an daoi do lagh,
ghlac uamhunn mí gu mòr.
54 An tigh mo chuairt is m'oil-thire,
do statuin b'iad mo cheòl.
55 Cuimhnich mí t'ainm san oidhech', a Dhé,
is choimhèidh leam do reachd.

- 56 B'e so mo chuid, oir choimhid mi
t'iarrtuais, a Dhé, gu heachd.

CHETH.

- 57 Mo chuibhrionn is mo chrannchur thu,
O Thighearna is a Dhé;
Le gealladh cinnteach thubhairt mí,
gu coimhdinn t'fhocal féin.
58 Le m'ùile chridhe dh'iarr mí ort
do ghnais 's do ghràsa saor:
A réir do bhriathair f'hirinnich,
dean tròcair orm gu caoin.
59 Do chnuasaich mí mo shlighe féin,
's ri d' theisteas phill mo chos.
60 Rinn deifir choimhead t'aitheanta,
's nìor ghabh mí tamh no fois.
61 Chreach buidhinn aingidh mí; gidheadh
nìor dhearmaid mí do reachd.
62 Eiream mu mheadhon oidhche, chum
gu molam do bhreth cheart.
63 'S fear-comuinn mí is companach
do'n dream d'an eagal thu;
'S do'n aitim ud a coimhdeas fòs
t'fhlor-àiteant an gu dlùth.
64 A Thighearna, tha'n talamh làn
do d' ghràs 's do d' thròcair chaomh:
Tuigs' agus eòlas tabhair dhomh
a'd' statuisibh ro-naomh.

TETH.

- 65 Do t'òglach rinn thu maith, a Dhé,
a réir do bhriathair cheirt.
66 Deadh thuigs' is eòlas teagaisg dhomh,
oir chreid mi féin do reachd.
67 Mun robh mi 'n teinn, air seachran chaidh
ach t'fhocal ghleidh mí nis.
68 'S maith thus', is nìthear maithes leat:
a'd' statuin teagaisg mis'.
69 A'm' aghaidh luchd an ardain bhuirb
dhealbh breuga baoth le cheif:
Ach gleidhidh mise t'aitheanta
le m' chridhe féin gu léir.
70 Tha 'n chridhe-san co reamhar fòs,
ri saill aig meud an sògh:
Ach gabhaidh mise tiachd dhomh féin
a'd' lagh-sa, Dhé, gach lù.
71 'S maith dhomhs' a nis gu robh mí féin
an teinn 's an àmhghar geur,
A chum gu foghlumainn le beachd
do statuin cheart gu léir.
72 'S fear dhomh gu mòr an lagh a ta
a' teachd o d' bheul a mach,
Na mìlte mòr do'n airgid ghlán,
's do'n òr a's deirge dreach.

IOD.

- 73 Do rinn, 's do dhealbhadh do làmhann mí;
dean tuigseach mí d'a réir,
A chum gu faighinn eòlas maith
Air t'aitheantaih gu léir.
74 Tràth chì luchd t'eagail mí, b'ìd ait:
oir dh' earb mí as do theist.
75 Dhia, 's ceart do bhreitheanais, 's le còir,
leòn thusa mí gun cheisd.
76 Dhé, guidheam ort, do thròcair chaoin
bhì dhomh mar chomhfhurtachd:
A réir an fhocail labhair thu
ri t'òglach féin gu beachd.
77 O thigeadh thugam féin a nis
do thròcair chaomh, a Dhé,
Ga m' chumail beò: oir 'se do lagh
mo thlachd 's mo mhiann gach ré.
78 Bìodh nàir' air luchd an ardain mhòir,
bhuin riumsa, gun chion-fàth,
Gu fealltach fiar; ach smuainicheam
air t'aitheantaibh a ghnàth.
79 Pilleadh luchd t'eagail rium, 's an dream
ta eòlach air do theist.
80 Gu robh mo chridhe ceart a'd' reachd,
nach nàraichear mí 'm feasd.

CAPH.

- 81 Tha m'anam air a chlaoidh gu mòr,
fèitheamh do shlàinte, Dhé:

- Ach tha mo dhòchas bunaiteach
a' d' fhocal tairis féin.
52 A' feitheamh t' fhocail chaithe mo shùil :
furtachd, O 'cuin a ni ?
53 Oir taim mar shearraig anns an toit ;
's do reachd nior dhearmaid mi.
54 Cia lìon iad làithean t'òglach féin ?
is fòs, a Dhé, cia uair
Chuireas tu breitheanas an gnìomh
orra ta orms' an tòir ?
55 An dream ta làn do 'n àrdan bhorb,
chladhaich iad dhomh gu beachd
sluicidh dhomhain, chum mo ghilacadh leo,
nach robh a réir do reachd.
56 An tòir gu fealltach tha iad orm ;
Dhé, cuidich leam gu grad :
Oir tairis agus firinneach
tha t'aitheantan air fad.
57 Air talamh chaidh ach beag mo chlaoidh ;
nìor thréig mi t'iarrrus naomh.
58 'S gun coimhdinn teistean fìor do bhéil,
atù-bheothaich mi gu caomh.

LAMED.

- 89 Tha t'fhocal bunaiteach gu bràth,
sna nàmhaidh àrd', a Dhé :
90 Tha t'fhìrinn is do thairisneachd
- buan-mhaireannach gach ré ;
Do dhaingicheadh an talamh leat,
's 'na sheasamh tha d'a réir.
91 Taid buan an diugh réir t'òrduigh féin ;
do mhuinntir iad gu léir.
92 Mur bhith gu 'n ghabh mi ciata mhòr
do t'fhocal firinneach,
Ghrad-fhàilnichinn is gheibbinn bàs
a'm' àmhghar iomarcach.
93 T'iarrruis cha d'chuirimhich mi chaidh ;
oir bheothaich thu mi leo.
94 'S leat mi, fìor orm ; oir dh'iarr mi féin
t'aitheanta-san gach lù.
95 Bha luchd an uile gu furaehar
ga m' fheitheamh chum mo sgrìos ;
Ach air do theistean firinneach
le m' smuaintibh dearcadh nìs'.
96 Chunnac mi crìoch gach nì a ta
sa' bheatha so d' a mheud :
Ach t'aithe tha gun tomas fòs
aig farsuinneachd is leud.

MEM.

- 97 Cia ionmhufn leam do lagh-sa, Dhé !
mo smuaineach' e gach là.
98 Thar m'earcar thug thu gliocas dhomh
le d' reachd, ta leam a ghnàth.
99 Is tuigsich' mi na'n aitim ud
thug teagasg dhomh gu léir ;
Bhrìgh gur ann air do theistean naomh
taim smuaineachadh gu geur.
100 Taim tuigseach eagnuidh fòs os ceann
gach seanair anns an tìr ;
Air son gun choimheadh leam gu beachd
iarrruis do reachd gu fìor.
101 Phill mi mo chos o ròd gach uile,
gu'n coimhdinn t'fhocal ceart.
102 Nìor chlaon mi fòs o d' bhreitheanas ;
oir theagaisgeadh mi leat.
103 Ie m' bhlas cia milis, O mo Dhia,
do bhrìathra ceart gu léir !
Do m' chàirean 's mìse iad gu mòr
na mìl air feadh mo bhéil.
104 Tre t'aitheanta taim faghail fòs
tuigs' agus eòlas mhaith ;
Is uime sin 's ro-fhuathach leam
gach slighe cham air bith.

NUN.

- 105 Is làcheran t'fhocal féin do m' chois,
solus do m' cheum gu beachd.
106 Do mhìonnaibh mi, 's nì mi d'a réir :
gu'n coimhdinn féin do reachd.
107 Tha nìs' an trioblaid iomarcaich,
O Thighearna nam fear :
A réir an fhocail labhair thu,
atù-bheothaich mi le d' neart.

- 108 Gahl uam gu taitneach, guidheam ort,
ofrail mo bhéil a nìs,
A bheir mi dhuit gu toileach saor ;
stiùir mi a'd' bhreitheanas.
109 Tha m'anam bochd a'm' làimh a ghnàth :
ach chuimhnich mi do reachd.
110 Leag droch dhaoir' romham lìon ; gidheadh
nìor chlaon o t'iarrrus ceart.
111 Do theisteis f'hiar ghabh mise féin
mar m' oighreachd bhuan an feas ;
Oir 's iad a bheir do m'chridhe leoint'
mòr-shubhachas gun cheisd.
112 Dh'aom mi mo chridhe fòs a chum
gu deantar leam a ghnàth,
Do statuin cheart a chur an gnìomh,
o so a mach gu bràth.

SAMECH.

- 113 Is fuath leam smuainte dìomhanach ;
do d' reachd ach thug mi gràdh.
114 'S tu m' ionad-fòluch, 's tu mo sguath
a t'fhocal m' earbsa ta.
115 O sibhs' a chleachd bhì deanamh uile,
imichibh uam a nìs ;
Oir àitheanta mo Thighearna
le cùram coimhdidh m'is'.
116 Réir t'fhocail dean mo chumail suas,
a chum gu marinn beò ;
'S na leig tu nàire mi fa chùis
mo dhòchais féin gach lù.
117 Neartaich mi, 's teardnaidh mise slàn ;
sior-dhearcan air do reachd.
118 Shaltair thu air chlaon o d' lagh ;
oir 's breug am feall gu beachd.
119 Mar shal droch-mhiotail tilgear unit
gach dao air talamh ta :
Is uime sin 's ro-chaoimh leam féin
teistean do bhéil a ghnàth.
120 Do chrìochnaich m'fheòil fa'n eagal ud
a ghabh mi romhad féin ;
Is lìonadh mi le uamhunn fòs,
fa d' bhreitheanas gu léir.

AIN.

- 121 Rinn mi breth chothromaon ; na fàg
fo lechd luchd m' fhoirneir m'.
122 Air t'òglach 'n urras bì chum maith ;
na leig luchd-buirb do m' chlaoidh.
123 Mo shùilean tha air fàilneachadh
feitheamh do shlàinte, Dhé ;
'S a' feitheamh gus an coimhlionar
deadh bhriathra ceart do bhéil.
124 Bì t'òglach buin a réir do ghràis,
seòl dhomh do lagh gu beachd.
125 'S mi t'òglach, tabhair eòlas domh,
gu'n tuigann féin do reachd.
126 'S m'ithich dhuit gnìomh a thaisbeanadh
a Dhé le hobhach thréin :
Oir sgaoileadh agus bhriseadh leo
t'aitheanta naomh gu léir.
127 Fa'n aobhar ud, O Thighearna,
gu dearbh is ionmhuinn leam
T'aitheanta féin os ceann an òir,
an òir a's fearr a t'ann.
128 Measam t'ui'f-iarruis, uime sin,
bhì anns gach aon nì ceart ;
Is fuathach fòs le m' chridhe féin
gach slighe bhréig' gu beachd.

PE.

- 129 Tha t'fhocal is do theisteis féin,
a Dhé, ro-longantach ;
Is uime sin nì m'anam bochd
'n coimhead gu cùramach.
130 Bheir tìonnsgnadh t'fhocail solus maith
ri dol a stigh 'na phàirt ;
Do dhaoineibh simplidh aineolach,
do bheir e eòlas àrd.
131 Gu farsuinn dh'fhosgail mi mo bheul,
a' ploscartach gu mòr ;
Fa mheud mo thoil' do t'aitheantaibh
bhìom muladach gu leòr.
132 Seall agus amhaire orm, a Dhia,
dean trocàir orm gu caomh ;

Mar rinnadh leat a ghnàth do'n dream
le'm b'ionmhuinn t'ainm ro-naomh.

- 133 Peacadh na biodh an uachdar orm,
a'd' fhocal stùir mo cheum.
134 O f'hoirneart dhaoine teasairg mi;
Is coimhdeam t'iarrais féin.
135 Dealradh do ghnáth air t'òglach tog,
seòl dhomh do staitin cheart.
136 Ruith srutha dheur o m' shùilibh fòs,
air briseadh leo do reachd.

TSADDI.

- 137 'S ro-chothromach thu féin, a Dhé,
's is díreach réidh do bhreth.
138 Do theisteis dh'aithn thu dhuinn, a ta
ro-thairis ceart gach leth.
139 Do rinn mo ghrádh is m'eud ro-mhòr
mo chaitheadh as gu léir;
Do bhrìgh gu 'n dhearmaid m'eascairde
deadh bhriathra ceart do dhéil.
140 'S ro-fhiorghlan t'fhocal; uime sin
's ionmhuinn le t'òglach e.
141 Taim suarach beng, gídheadh do reachd
air d'chumhlan' nior leig mi.
142 Do cheartas féin is ceartas e
ta siorruidh buan gu bráth;
Is amhlaidh sin do lagh ro-cheart
'na f'hirinn ghloin a ta.
143 Ghlac trioblaid mi, is ghabh orm greim
teinn agus àmhghar geur;
Gídheadh a ta mo thlachd gu mòr
a'd' àitheantaibh gu léir.
144 Ceartas do theisteis féin, a Dhé,
tha siorruidh buan gun cheisd;
Deadh thuigse tabhair thusa dhomh,
is bitheam beò an feasd.

KOPH.

- 145 Ghlaodh mi le m' uile chrìdh'; a Dhé,
éisd, 's coimhèididh mi do reachd.
146 Ghlaodh mise riut, fòir orm; 's an sin
coimhdeam do theist gu beachd.
147 Do thionngain mi roimh 'n chamhanaich,
is ghlaodh mi riutsa, Dhé;
Oir tha mo dhòchas bunaitheach
a'd' fhocal daingean féin.
148 Mo shùilean tha nì's furachair'
na forair' theann na h-oidhch';
A chum gu bithinn smuaineachadh
air t'fhocal féin a chaoidh.
149 A réir do chaoimhneis thròcairich
éisd féin ri m' ghuth a nìs;
A réir do bhreitheanas ro-mhòir,
Iehobhah, beothaich mis'.
150 Luchd leamhuinn uile tha teannadh orm;
a ta iad fad o d' reachd.
151 Dhé, tha thu 'm fagus; agus tha
t'uil' iarrtus fìor is ceart.
152 Fa thimchioll fòs do theisteas naomh',
o thoiseach b'fhiosrach mi,
Gu'n d'rinnadh leat an socrachadh
a chum bhì buan gach ré.

RESH.

- 153 Amhairc, a Dhé, air m' àmhghar goirt,
is fuasgail orm a'm' fheum;
Fa'n aobhar nach do dhearmaid mi
an reachd a dh'aithn thu féin.
154 Tagair mo chùis; is fuasgail orm;
réir t'fhocail cum mi beò.
155 'S fad slaint' o luchd an uile: air son
do reachd nach iarrar leo.
156 'S ro-lionmhor mòr do thròcair chaomh,
a Thighearn is a Dhé;
A réir do bhreitheanas ro-cheirt
dean beothail ealamh mi.
157 'S lionmhor luchd leamhuinn orm an tòir,
is m'eascairde faraou;
Ach mis' o d' theisteas fìrinneach,
cha deach' air seachran clao.
158 Chunnaic mi peacach, chràidh sud mi,
do reachd oir bhriseadh leo.
159 Feuch mar is ionmhuinn leam do lagh;
a'd' chaoimhneas cum mi beò.

- 160 A Thighearna tha t'fhocal féin
o thoiseach daingean fìor;
Is tha do bhreitheanas air fad
ceart agus buan gu sìor.

SCHIN.

- 161 Bha prionnsan làidir orm an tòir
gun aobhar na cion-fàth;
Ach air mo chrìdh' tha eagal mòr
roimh t'fhocal féin a ghnàth.
162 Tha aiteas orm ri t'fhocal maith,
mar nench fhuair creach gun tòir.
163 'S oilleit 's is fuath leam breug; ach theg
mi gràdh do d' lagh gu mòr.
164 Tha mi a' tabhairt molaigh dhuit
seachd uairean gach sòn là,
Air son do bhreitheanas gu léir
ta ceart, a Dhé, gu bráth.
165 'S mòr sìth na muinntir ud a fa
a' tabhairt gràidh do d' reachd;
Cha'n éirich tuisleadh idir dhoibh,
no oibheum fòs gu beachd.
166 Rì d'shlàinte dh'Fheith mi féin, a Dhé;
coimhdeam do reachd air chòir.
167 Do theisteis choimhid m'anam féin;
's ionmhuinn leam iad gu mòr.
168 Do theisteis agus t'aitheanta,
do choimheadh leam a ghnàth;
Oir tha mo shligheanna gu léir
fa d' chomhair féin gach là.

TAU.

- 169 Thigeadh mo ghlaodh am fagus duit
a'd' f'hanuis féin, a Dhé;
Is fòs réir t'fhocail f'hirinnich
dean tuigsach eòlach mi.
170 A'd' lathair thigeadh m' athchuinge;
réir t'fhocail ormsa fòir.
171 Air teagasg dhuit do staitin dhomh,
mo bheul bheir dhuitse glòir.
172 Labhaird mo theang' air t'fhocal fìor;
oir tha t'uil' iarrtus ceart.
173 Deanaidh do làmh-sa coimhnadh leam;
oir ròghnaich mi do reachd.
174 A' feitheamh air do shlàinte, Dhé,
bhìom féin gu tuisreach trom;
Is mar an ceudna tha do reachd
ro-thlachdmhor ciatach leam.
175 Deònuich do m'anam bochd bhì beò,
is dhuitse bheir e glòir;
Is deanaidh do cheart-bhreitheanas
deadh chòimhnadh dhomh le fòir.
176 Do chaidh mi féin air seacharan
mar choraich chaillte thruaigh;
Iarr t'òglach, oir cha d' leig do d' reachd
dol as mo chumhne uanì.

SALM CXX.

- A 'M' éigin ghlaodh mi suas ri Dia,
is dh' éisd e rium gach ré.
2 O'n teangaidh cheilgach, m'anam saor;
's o bbeul nam breug, a Dhé.
3 Cìod bheirtear dhuit, no nìthear ort,
a theangadh làn do ghò?
4 Mar shaighdibh laoiach, 's iad geurmehte,
mar eilulibh aiteil beò.
5 Mo thruaigh mi, gu bheil mo chuaiet
am Mesech; is mo thàmh
Am bùthaibh Chedair choigrieh bhuirb,
gu m'ladach gun dàimh!
6 Rinn m'anam coimhnuidh fhada bhuan
le neach thug fuath do shìth.
7 Gu cogadh tha iad togarach;
air sìth 'n tràth labhras mi.

SALM CXXI.

- M O shùile togam suas a chum
nam beann, o'n tig mo neart.
2 O'n Dia rinn talamh agus nèamh
tha m'f'hurtachd uile teachd.
3 Cha leig do d' chois air chòir air bith
gu'n sleamnuich i gu bráth;
Tàmh-neul cha tig sin air an neach
's fear-coimhid ort a ghnàth.

- 4 Feuch, air fear-còmhaid Israeil,
còlad cha'n aom no suain;
5 'Se Dia t'fhear-còmhaid; se do sgàil
air do làimh dheis gu buan.
6 A' ghrain cha bhuail i thu san là,
na ghealach fòs san oidhch'.
7 Nì Dia do choimhead o gach olc;
nì t'anam dhìon a chaidh.
8 Do dhol a mach, 's do theachd a steach,
còmhaidh Dia a ghnàth;
O'n aimsir so a nìs a t'ann,
's o sin a mach gu bràth.

SALM CXXII.

- B**HA aoibhneas orm tràth thubhairt iad,
Gu tigh Dhé thèid sinn suas.
2 A'd' dhorsaibh, O Ierusalem,
ar cosa seasaidh fòs.
Ierusalem mar cbaithir i,
thogadh gu dìleas dlùth;
D'an téid na treubhan suas gu léir,
's iad treubhan Dhé nan dùl:
Gu teistean Israeil, a chum
ainm Dhé gu moladh iad.
Oir caithrichean chum breth tha'n sin;
's le teaghlach Dhaibhidh iad.
3 Sior-ghuidhibh do Ierusalem
sith-shàimh is sonas mor:
A' mhuinntir-sin le'n ionmhuinn thu
soirbhichidh iad gu leòr.
4 An taobh a stigh do d' bhallachaibh,
biodh sith is sonas maith;
Deadh shoirbheas fòs gu robh gu bràth
a'd' luchairt àrd a stigh.
5 Air sgàth mo bhràithrean 's luchd mo ghaoll,
dhuil guidheam sith a ghnàth.
6 Air sgàth tigh naomb ar Tighearn Dia,
iarram do leas gu bràth.

SALM CXXIII.

- M**O shùile togam riutsa ta
'n còmhnuigh air nàmh nan speur.
2 Feuch, mar tha sùil nan seirbhiseach
air làimh am maighstir féin,
'S mar shùile banoglaich air làimh
a ban-tighearn farao,an,
Feithidh ar sùil air Dia, gu's 'n dean
e tròcair oirnn gu caoin.
3 Dean tròcair oirnn, Iehobhah Dhia,
dean tròcair oirnn gu luath;
Oir tha sinn air ar lìonadh làn
do tharcuis is do fhuath.
4 Le fanoid luchd na seasgairachd,
lìonadh ar n-anam bochd;
'S le spid na muinntir ud a ta
làn ardain is an-ìochd.

SALM CXXIV.

- N**IS abradh Israel gu sìor,
mur biodh Iehobhah leinn:
2 Mur biodh Iehobhah as ar leth,
tràth dh'éirich daoine ruinn;
3 'N sin dheantadh leo ar slugadh beò,
'n tràth las an corruich ruinn.
4 Is ruithheadh tharunn tuilte bras,
gruth làidir thar ar ceann.
5 'N sin rachadh thar ar n-anam bochd,
na tuitlean àrd' gu léir.
6 Moladh do Dhia, nach d' thug e sinn
mar chreich d'am fìaclaibh geur'.
7 Mar eun a lìon an eunadair,
ar n-anam truaigh chaidh as:
Bhriseadh an lìon is sgaolleadh e,
is shaoradh sinn gu cas.
8 Ar còmhnaidh ta 's ar cuideachadh
an ainm Iehobhah thrèin:
An neach a rinn an talamh fòs,
's a chruthaich nàmh nan speur.

SALM CXXV.

- T**HA'N dream nì dòchas ann an Dia
mar shliabh Shìon a ghnàth,
Nach feudar fòs a charuchadh,
ach mhaireas ann gu bràth.

- 2 Ceart mar a ta na beannta tric
timchioll Ierusalem,
Tha Dia mar sin, a nìs gu sìor,
timchioll a phobuill féin.
3 Oir slat luchd-uile cha ghabh i tàmh
air chrann nan daoine còir;
Eagal gu'n sin na fireanaich
an lamh gu peacadh mor.
4 An aitim ud tha maith, a Dbé,
do mhaithreas pàirtich leò;
Is leis an dream tha tréibhdhireach
's 'nan cridhe ta gun ghò.
5 Ach iadsan uile thèid a thaobh
d'an slighibh clann le chéil',
Iomainidh Dia le luchd an uile.
'S bidh sìth air Israel.

SALM CXXVI.

- N** TRATH thug Iehobhah air a h-aie
bruid Shìon, b' ionnan sinn
Is daoine chunnaic ailing mhòr,
's a mhosgail as an suain.
2 Lionadh ar beul le gairn an sin,
's ar teagadh fòs le ceòl;
Am measg nan cinneach thubhairt iad,
Rinn Dia dhoibh bearta mòr'.
3 Rinn Dia mòr-bhearta air ar son
chuir oirne gairdeachas.
4 Iehobhah, pill ar bruid a ris,
mar shruth san àirde deas.
5 Iadsan a chuir gu deurach siol,
gu subhach nì iad buain.
6 An neach gu cur a thèid a mach
le siol ro-phriseil caoin,
Air bhith dha gu gu muladach,
'g a iomchar sud gu fonn,
Le h-aites pillidh e gu dearbb,
a' giùlan sguaba trom'.

SALM CXXVII.

- M**UR tog Iehobhah féin an tigh,
luchd-togail tha iad faoin;
Mur gléidh Iehobhah 'm baile fòs,
luchd-faire chaill an saoth'r'.
2 Dhuibh 's dìomhan bhi ri moch-eirigh,
san oidhch' ri caithris bhuaian,
Bhi 'g itheadh arain bròn; mar sin
d'a sbeircin bheir e suain.
3 'Se Dia bheir toradh bronn mar dhuais;
mar oighreachd bheir e clann.
4 Bidh mic na h-òig' mar shaighdibh geur',
'n làimh ghaisgich thrèin gach àm.
5 Is sona 'm fear' gam bi dhuibh sud
a ghlaic 's a dhòrlach làn;
Gun rughadh labhradh iad sa' gheat'
r' an naimhidh olc gu dān.

SALM CXXVIII.

- S** BEANNAICHT' gach aon neach aig an bheà
eagal Iehobhah mhoir;
Is ann an slighibh fìorghlan Dé
stiuireas a cheum air chòir.
2 Oir toradh gnìomh do lamha féin,
itheidh tu e gu h-ait:
Beannaichear thu gu mòr mar sin,
's bidh sonas ort gu pailt.
3 Mar fhìonain tharbhaich bidh do bhean
'n taobh stigh do t'fàrdaich féin;
Do chlànn mar òg chroinn-olaidh nìr
timchioll do bhùird gu léir.
4 Feuch, 's amhluidh sin a bheannaichear
an neach d'an eagal Dia.
5 A Sion gheibh thu beannachadh,
is sonas pailt o'n Triath;
Is chi thu maith Ierusalem
ri fad do làith' gu léir.
6 Seadh, clann do chloinne chi thu fòs,
is sìth air Israel.

SALM CXXIX.

- B**U tric a chrìdh iad mi o m' òig',
deir Israel gu truaigh;
2 O m' òige chraidh iad mi gu tric,
èidheadh cha d' thug iad buaidh.

- 3 'N luchd-treabhaidh treabh lad air modhruim ;
tharruing lad claisean fad.
4 Ach 's ceart Iehobhah, 's bhriseadh leis
còrdan nan daoibh gu grad.
5 Air naimhdebh Shìoin gu robh nàir',
's rachadh air cùl gu luath :
6 Mar fheur air mullach tighe ta,
a shearg mu'n d'hàs e suas :
7 Ni leis nach lìonar glac an fhir
a bhios gu tric a' buain ;
Is leis nach lìonar sgiath an tì,
a bhios ri ceangal sguah.
8 Ni mò their luchd an rathaid riu,
Gu robh oirbh beannachd Dhé ;
Tha sinne fòs 'gar faire beannachadh,
an ainm Iehobhah thrèin.

SALM CXXX.

- 1 O' doimhne, O Iehobhah Dhé,
do ghlaodh mi riutsa suas.
2 Dhia, eisid ri m' ghuth gu furachar ;
's ri m' urmuigh crom do chluas.
3 Ma chombraichear leat aingidheachd,
a Dhé, cò sheasas riut ?
4 Ach agad-sa ta iochd : a chum
gu'n strìochd t' ad' eagal dhuibh.
5 Ri Dia tha mise feitheamh, fòs
tha m' auam feitheamh ris ;
Is ann a bhriathar fìrinneach
mo dhòchas cuiridh mis'.
6 Tha m' anam hochd ni 's furachair'
a' feitheamh Dhé a ghnàth,
Na bhios luchd faire maidne fòs
ri sgarachdainn nan tràth :
Ni 's furachair', a delream fòs,
'g a fheitheamh-san gu ghò,
Na bhios luchd-faire anns an oidhch'
ri teachd a steach do'n lòn.
7 Biodh dòchas Israeil an Dia ;
our tha a thròcair mòr ;
'S ann alg an Tighearna gu beachd,
tha fuasgladh pailt gu leòr.
8 Le bheir e fèin gu cheisd air bith
d'a phobull Israel,
Làn-shaorsadh agus fuasgladh glan
o'n aingidheachd gu léir.

SALM CXXXI.

- 1 M' o chridhe cha 'nheil àrdanach,
no fòs mo shùil, a Dhé ;
Nìor ghluais mi ann an cùisibh mòr',
a's àirde na mi fèin.
2 Gu dearbh, mar naoidhean chaidh o'n chich,
chum mi mi fèin a'm' thosd.
Mar naoidhean chaidh o chich a mhàth'r,
is amhluidh m' anam bochd.
3 Biodh dòchas maith alg Israel
an Dia Iehobhah treun,
O'n aimsir so a nis a t'ann,
's air feadh gach linn an cèin.

SALM CXXXII.

- 1 A IR Daibhidh dean-sa cuimhne, Dhé,
's air uile àmhglar geur :
2 Mar thug e mionn' do Dhia, is bòid
do Dhia ud Iacob treun.
Do m' thigh cha téid mi fèin a steach,
no air mo leabaidh suas :
4 Do m' shùilibh còdal fòs cha leig,
no do mo rosgaibh suain ;
5 Gu ruig an uair am faigh mi àit
do Dhia Iehobhah treun,
Is ionad-còmhnuidh bannaiteach
do Dhia ud Iacob fèin.
6 Feuch, ann an crìochaibh Ephrata,
do chuala sinn an sgeul ;
Air maohairibh nan coilleatan dlùth,
fhuair sinn e mar an ceudn'.
7 Aig stol a choisleuchdaidh sinn,
an àros Dhé nam feart.
8 Fìrich, a Dhé, gu t'ionad tàimh :
thu fèin is àirc do neirt.
9 Sgeudaicht' gu robh do shagairt-sa
a ghnàth le b-ionracas ;

- Is deanadh do luchd-muinntir naomh,
gun tàmh ùr-ghairdeachas.
10 Air sgàth do sheirbhiseach ro-chaoimh,
Daibhidh do'n d'thug thu buaidh,
Aghaidh an tì a dh' ungadh leat,
na cuir air ais gu truagh.
11 Do Dhaibhidh mhiannaich Dia gu fìor,
's cha phill e uaith' am feasd,
A'd' chaithir-rioghail cuiridh mi
t' iarmad 's do shìochd gu cheisd.
12 Ma nì do chlann mo choimhcheangal
a choimhead, is mo reachd,
An teist a nì mi theagasg dhoibh,
ma chumar leo gu ceart :
An sìochd-san suidhidh mar an ceudn'
a'd' chaithir rìgh, gu bràth.
13 Oir mhiannaich agus ròghnaich Dia
Sion mar ionad tàimh ;
14 'S i so mo thàmh 's mo shuaimhneas fòs,
gu suthain is gu slor :
An so nì mise fàrdach dhomh,
oir 's i mo mhiann gu fìor.
15 Mòr-bheannaicheam a stòr gu pailt ;
diolam a bochd le lòn.
16 Le slàint' a sagairt eudaicheam ;
's a naoimh nì iolach mhòr.
17 Bheir mi an sin gu h-ùrar glas
air adhair Dhaibhidh fàs ;
Is lòchran dh' orduich mi do 'n tì
a dh' ungadh leam tre ghràs.
18 Cuairtichidh mi a naimhde-san
le nàir' is rughadh gruaidh :
Ach air-san bidd a choron fèin
a' fàs le h-ionadh buaidh.

SALM CXXXIII.

- 1 O FEUCH, cia meud am maith a nis,
cia meud an tlachd faraon,
Bràithrean a bh' nan còmhnuidh ghnàth
an sìth 's an ceangal caoin.
2 Mar oladh pbriseil air a' cheann,
ruith air an fheusaig slos,
Air feusaig Aaroin, agus shruith
gu ionall 'eudaich ris.
3 Mar dhealt air Hermon, 's mar an drùcl-d
air sléibhtibh Shìoin suas :
'N sin dh'orduich Dia am beannaichadh
a' bheatha shìorruidh bhuan.

SALM CXXXIV.

- 1 O GLACHA Iehobhah mhòir,
beannaichibh Dia a chaoidh ;
Sibhse le'n gnàth bhì 'n àros Dé
'nur seasamh feadh na b-oidhch'.
2 'Na theampull togaibh suas 'ur làmh,
beannaichibh Dia nam feart.
3 Beannaicheadh Dia á Sion thu,
rinn nàmh is làr le neart.

SALM CXXXV.

- 1 MOLAIBHSE Dia, àrd-nholaibh fòs
deadh ainm Iehobhah thrèin,
Is thugaibh cliu is moladh dha,
òglacha Dhé gu léir.
2 O sibhse ta 'nur seasamh fòs
an tigh Iehobhah mhòir,
An cùirtibh àluinn tigh ar Dia,
molaibh e mar is còir.
3 Molaihb an Tighearna, do bhrìgh
gu bheil e maith gach ré :
D'a ainm-san seinnibh moladh ait,
oir 's nì ro-thlachdamhor e.
4 Oir Iacob fòs do ròghnaich Dia
'na thròcair mhòir dha fèin :
Dha fèin mar ionmhas is mar sheilbh,
do thagh e Israel.
5 Oir 's fìosrach mi 's is deimhin leam
gu bheil Iehobhah mòr,
Gu bheil ar Tighearna faràon
os ceann gach dia an glòir.
6 Gach nì air bith bu mhiannach leis,
rinn Dia an nàmh nan speur,
's air talamh, 's anns na cuantaibh mòr',
's na doimhneachdaibh gu léir.

- 7 Bheir esan air a' cheò dol suas
o chrich a' chruinne-ché;
Is uisge nì le dealanach;
gaoth as a stòr bheir e.
- 8 Gach ceud-ghin anns an Eiphit bha,
do bhuailleadh leis gu trom;
Do dhuine 's ainmhidh anns gach àit,
ag imeachd bha air fonn.
- 9 O Eiphit! chuir e comlata,
is mhorbhuile le chéil;
A'd' bhuilsgan-sa; 's air Pharaoh fòs
's air òglachaibh gu léir.
- 10 'Na cinnich lìomhhor chlaoidheadh leis,
mharbh rìghrean cumbachdach.
- 11 Do mharbhadh Og rìgh Bhàsan leis,
Sihon nan Amorach:
Gach uile rìghbhadh mar an ceudn',
cia h-ìomadh bha iad ann,
Lom-sgrìosadh agus mhilleadh leis,
d'an rohh an tìr Chanaain:
- 12 Am fonn 's am fearann sud air fad,
mar oighreachd thiodhlaic e;
Mar oighreachd do chloinn Israeil,
a phobull dileas féin.
- 13 Tha t'ainn, a Thighearna nam fear, buan-mhaircanach a ghnàth,
Tha t'iomradh buan air chuimhne, Dhé,
o linn gu linn gu bràth.
- 14 Oir air a phobull féin nì Dia
ceart bhreithcanas gu beachd;
Is gabhaidh esu aithreachas
m'a òglachaibh le fochd.
- 15 Iodhoil nan cìneach tha do'n òr,
's do'n airgid ghlas faraon;
Is cha 'n'eil ann' ach dìomhanas
rinnadh le làmhaidh dhaoin'.
- 16 Tha beul ac', is gun chòmhradh ann;
is sùilean, leis nach léir.
- 17 Tha cluasan ac', 's cha chluinn iad leo;
gun anail fòs 'nam beul.
- 18 A' mhuinntir tha 'gan deanamh sud,
ro-chosmhuil iad ri uile;
'S amhluidh gach neach ta annta fòs
ag earbsa mar an ceud '.
- 19 O beannaichibh Iehobhah mòr,
a theaghlach Israeil;
'S a theaghlach Aaron, beannaichibh
an Tighearna le chéil'.
- 20 O theaghlach Lebhi, beannaichibh,
is thugaibh cliù do Dhia:
Sibhsé d'an eagal Dia faraon,
mòr-bheannaichibh an Triath.
- 21 A Sion beannaicht' gu robh Dia,
'g am bheil a chòmhnuidh bhuan
An caithir naoimh Ierusalem.
Molabhsé Dia gach uair.

SALM CXXXVI.

- O** THUGAIBH buidheachas do Dhia,
do bhrìgh gur àr-mhaith e;
Air son gu mair a thròcair chaomh,
gu sìorruidh feadh gach ré.
- 2 Thugaibh do Dhia nan uile dhia
mòr buidheachas le chéil';
Air son gu mair a thròcair chaomh
gu sìorruidh feadh gach ré.
- 3 Thugaibh do Thriath nan uile thriath
mòr buidheachas gu léir;
Air son gu mair a thròcair chaomh
gu sìorruidh feadh gach ré.
- 4 Do'n Tì 'na aonar fòs a rinn
mòr mhorbhuile gu treun;
Air son gu mair a thròcair chaomh
gu sìorruidh feadh gach ré.
- 5 Do'n Tì le gliocas iongantach
a chruthaich nàmh nan speur;
Air son gu mair a thròcair chaomh
gu sìorruidh feadh gach ré.
- 6 Do'n tì a shìn air nachdair tuinn
an talawh trom gu léir;
Air son gu mair a thròcair chaomh
gu sìorruidh feadh gach ré.
- 7 Do'n tì a rinn na soluis mhòr,
ta soilleachadh nan speur

- Air son gu mair a thròcair chaomh
gu sìorruidh feadh gach ré.
- 8 A' ghrian gu h-uachdranachd san là,
chum dhuinne gu m'hu léir;
Air son gu mair a thròcair chaomh
gu sìorruidh feadh gach ré.
- 9 A' ghealach is na reulta glan'
a' riaghladh oidhch' le chéil';
Air son gu mair a thròcair chaomh
gu sìorruidh feadh gach ré.
- 10 Do'n Tì rinn buaidh trom san Eipht'
air ceud-ghin dhaoin' is spréidh;
Air son gu mair a thròcair chaomh
gu sìorruidh feadh gach ré.
- 11 Thug as am builsgan-san a mach
a phobull Israel;
Air son gu mair a thròcair chaomh
gu sìorruidh feadh gach ré.
- 12 Le neart a ghairdein sìnte mach,
's le làimh a ta ro-threun;
Air son gu mair a thròcair chaomh
gu sìorruidh feadh gach ré.
- 13 Do'n Tì a sgoit an fhairge ruadh,
'na roinnibh as a chéil';
Air son gu mair a thròcair chaomh
gu sìorruidh feadh gach ré.
- 14 Is troimh a meadhan stiùradh leis
gu tèaruint' Israel;
Air son gu mair a thròcair chaomh
gu sìorruidh feadh gach ré.
- 15 San fhairge ruaidh ghlan sgrìosadh leis
Pharaoh 's a shluagh gu léir;
Air son gu mair a thròcair chaomh
gu sìorruidh feadh gach ré.
- 16 Do'n Tì sin tre an fhasach mhòr
a stiùir a mhuinntir féin;
Air son gu mair a thròcair chaomh
gu sìorruidh feadh gach ré.
- 17 Dhasan a bhuail 's a lot gu trom
na rìghrean làidir treun';
Air son gu mair a thròcair chaomh
gu sìorruidh feadh gach ré.
- 18 Is rìghrean mòr is iomraiteach,
mharbh e le 'ghairdean féin;
Air son gu mair a thròcair chaomh
gu sìorruidh feadh gach ré.
- 19 Seadh Sihon rìgh nan Amorach,
bha naimhdeil guineach geur;
Air son gu mair a thròcair chaomh
gu sìorruidh feadh gach ré.
- 20 Is Og air Basan bha 'na rìgh,
do mharbh is chasgair e;
Air son gu mair a thròcair chaomh
gu sìorruidh feadh gach ré.
- 21 Is thug e fòs mar oighreachd bhuan
am fearann-san gu léir;
Air son gu mair a thròcair chaomh
gu sìorruidh feadh gach ré.
- 22 An oighreachd thug do Israel,
'òglach ro dhileas féin;
Air son gu mair a thròcair chaomh
gu sìorruidh feadh gach ré.
- 23 Neach, air bhi dhuinn ro-ìosal truagh,
a chuimhnich oirn 'nar fenn;
Air son gu mair a thròcair chaomh
gu sìorruidh feadh gach ré.
- 24 Gu tèaruint' bhui e sinn a mach
o neart ar naimhde treun';
Air son gu mair a thròcair chaomh
gu sìorruidh feadh gach ré.
- 25 Tha tabhairt beatha do gach feòil
is lòin do'n uile chéir;
Air son gu mair a thròcair chaomh
gu sìorruidh feadh gach ré.
- 26 O thugaibh moladh agus cliù
do Dhia nan nàmh 's nan speur;
Air son gu mair a thròcair chaomh
gu sìorruidh feadh gach ré.

SALM CXXXVII.

A IG sruthaibh coimheach Bhabiloin,
shuidh sinn gu brònach hochd;
An sin air Sion chuimhnich sinn,
is ghuileadh leinn gu goirt.

- 2 Air gheugaibh seilich chrochadh leinn
ar clàrsaichean an sin.
3 Oir iadsan a riun braighde dhinn
d'fharr òran oirnn is gean:
Seadh iadsan le'n do chreachadh sinn
dh'iarr luathghair oirnn is ceòl;
Seinnibh do laoidhinn Shìoin duinn,
(ars' iadsan) mar bu nòs.
4 'N tìr choigrich cia mar dh'fheadar leinn
òran Iehobhah sheinn?
5 Mur cuimhn'cheam thu Ierusalem,
ri m' dheis nìor lean a seirm.
6 Mo theangadh leanadh teann ri m' ghial,
mur cuimhnichear thu leam;
Mur fearr leam na m'uil' aoibhneas àrd
caithir Ierusalem.
7 Clann Edoim cuimhnich thusa, Dhé,
oir thubhairt iad le tair,
An làithibh truagh' Ierusalem,
leag, leag l, sìos gu làr.
8 O nighean uaibhreach Bhabìloin,
a dh'fhàsaichear gu léir:
Is sona dha, mar rinn thu oirnn,
a dhòlas dhuit d'a réir.
9 Is sona dha-san ghilacas fòs
do mhaoth-chlann bheag is thruagh,
'S a phronnas iad gun acarachd,
ri clachaibh daingean cruaidh'.

SALM CXXXVIII.

- I E m'uile chridh' àrd-mholam thu, gu caomh
àrd-mholam thu gu caomh
2 N làthair nan dia. Is sleuchdam dhuit;
m'aghaidh ri d'theampull naomh,
Is molam t'ainm, bhrìgh t'fhirinn cheirt,
's do chaoimhneis ghràdaich féin:
Oir t'fhocal fìorghlan dh'ardaich thu,
os ceann t'uil' ainm' gu léir.
3 San là a ghlaodh mi riut, a Dhé,
fhreagair thu mi gu laath;
Is thug thu spionnadh dhomh gu leòr,
le treòir, a'm' anam truagh.
4 Bheir rìghre mòr' na cruinne dhuit,
àrd-mholadh hinn gu léir,
San uair an cluinnear leo, a Dhia,
deadh bhriathra glan do bheil.
5 An slighibh fòs Iehobhah mhòir,
seinnidh iad ceòl gu h-ait;
Air son gur urramach, 's gur àrd
glòir àluinn Dhé nam feart.
6 Ge h-àrd Iehobhah, seallaidh e
air daoibh umhal coir;
Ach 's léir dha'n dream ud, fad o làimh,
tha làn do'n àrdan mhòr.
7 Ged ghluaisinn ann am buillsgean fòs
na triohaid mòir do m' chlaoidh,
A ta mi fiosrach dòchasach
gu beothaich thusa mi:
An aghaidh corruich mòir' mo nàmh,
do làmh-sa sìnear leat;
Is nì do dheas làmh ann am fheum
mo thea-airginn le neart.
8 Gach nì air bith a bhuineas domh,
coimhlionaidd Dia gu trenn;
Is buan do ghràs, a Dhia, gu bràth;
òbre do làmh na tréig.

SALM CXXXIX.

- D O rannsuich thu 's is aithne dhuit
mise, Iehobhah thréin:
2 Mo shuidh', is m' éirigh 's aithne dhuit;
's léir dhuit mo smuain an céin.
3 Mo cheuma is mo luidhe sìos,
do chuairtich thu gu diùth;
Is air mo shligheibh féin gu léir,
's geur fhiosrach eòlach thu.
4 Feuch cha 'n 'eil focal mòr no beag
no cainnt air bith a'm' bheul,
Mu'n labhras sud, a Dhia nam feart,
nach aithne dhuit gu léir.
5 Do chuairtich thu mi air gach taobh,
romham faraon 's am dhéigh;
Do làmh ta neartmhor cumhachdach
leag thusa orm, a Dhé.

- 6 Tha 'n t-eòlas so ro iongantach,
is ormsa tha e cruaidh;
Cha ruig mi air, or tha e àrd
r' a thuigsinn is r'a luaidh.
7 Cia 'n t-àit air bith am feud mi do
o d' spiorad glie, a Dhé?
O d' ghnùis ta uille-léirinneach
cia 'n taobh a theicheas mi?
8 Nan rachainn suas air nèamh nan speur,
a ta thu féin an sud;
Nan luidhinn ann an ifrinn shìos,
tha thu san ionad ud.
9 Air bharrtaibh sglath na maidne fòs
nan sìubhlainn fad o làimh,
Gu h-iomallaibh na fairge mòir'
chum còmhnuidh agus tàimh;
10 Stiùraidh tu mi an slig, a Dhé,
le d' làimh ta treun an neart;
Is nìthean leat mo chumail fòs
le d' dheas làimh mhòir gu heachd.
11 Nan abrainn, gu dean dorchadas
gu deimhin m'fhòlach nait;
Bidh 'n oidheche féin mar sholas glan
ag iadhadh orm mu'n cuairt.
12 Cha'n fhòluich uaitse dorchadas,
's co-shoilleir oidhch' is là;
'S ceart-ionnan duit's an diùbhe dorch,
is solus glan nan tràth.
13 Oir feuch ghabh thusa sealbh gu moch
air m'airnibh is mi maoth;
'S ann leat a rinneadh m'fhòlach fòs
am broinn mo mhàthar chaoimh.
14 Àrd-mholam thu, oir 's uamhasach,
's is miorbhuileach mo dhealb;
Tha t'òibre iongantach; 's is léir
do m'anan sin gu dearbh.
15 Tràth rinneadh mi an diomhaireachd,
's a dhealbhadh mi gu ceart,
An àitibh iochdrach talmhainn shìos;
bu léir dhuit brìgh mo neirt.
16 Mo cheud-fhàs an-àhuich gun dreach,
do d' shùilbh-sa bu léir;
Mo bhuill gu h-iomlan chuireadh sìos
sgriobht' ann ad leahar féin;
Gidheadh ri aimsir is ri bìn,
do dhealbhadh iad 'nan àm;
Air bhì dhoibh roimhe sin gun dreach
's nach robh a h-aon diùbh ann.
17 'S ro-phrìseil uime sin, a Dhé,
do smuaintean uile leam:
'S ro-lionmhor mòr 'an àireamh iad,
's 'an cur air cunnatas cheann.
18 Rì 'n àireamh 's mòr gur lionmhor' iad
na gàiueamh mhìn na traigh':
Air mosgladh as mo chodal domh,
tair maille riut a ghnàth.
19 Marbhar an t-aingidh leat gu beachd,
O Thighearna ro-thréin:
A nis, O dhaoine fuileachdach,
imichibh uam an céin.
20 Oir labhair iad a'd' aghaidh, Dhé,
le aing'eachd eusaontais;
Is thug do naimhde mi-runach
t'ainm naomh an diomhanas.
21 Nach 'eil mi tabhairt fuath, a Dhia,
do'n dream thug dhuit-sa fuath?
Nach 'eil mi gabhail gràin do'n dream
a'd' aghaidh dh'éirich suas?
22 Fuath iomlan thug mi dhoibh gu beachd;
mar naimhdeibh nim' am meas.
23 Rannsaich mi, Dhé, mo chridhe faic;
mo smuainteach, dearbh mis'.
24 Feuch agus amhaire féin am bheil
sligh' aingidh oic a'm' chlé;
Is anns an t-slighe-shiorruidh chòir
gu dìreach treòraich mi.

SALM CXL.

- O 'N droch-dhuin' saor is teasairg mi,
O Dhia Iehobhah naomh;
O'n fhear a ta ri fòireigneachd
dean didean dhomh gu caomh.
2 'Nan cridh' tha iad a' smuaincachadh
air airmheas mòr gach la;

Chum cath' is comraig chruaidh tha iad
air crinneachadh a ghnàth.

- 3 Mar theangaidh nathrach, rinneadh leo
an teagadh sgatfeach geur:
A ta nimh mhilleach nathrach fòs
am folach ann am beul.
- 4 O làmh nan daoil, gléidh mise, Dhé;
's o luchd an fhòirneirt, dìon;
Mo cheuman thilgeadh bun os ceann,
'se sud an rùn 's am miann.
- 5 Dh'fholuich na h-uibhrich rìbe dhomh,
is corda fòs gu m' sgrios;
Ei taobh a' bhealach sgaoil iad lion,
is leag iad ceap gun fhios.
- 6 Rì Dia fèhobhah thubhairt mi,
'S tu fèin gu beachd mo Dhia;
Eisd ri guth m' atcheuinge a nis,
O Thighearn is a Thriath.
- 7 Is tu a's spionnadh slàinte dhomh,
fèhobhah Dhia nam fath;
Cuir dìon is folach air mo cheann
an aimsir teinn is cath'.
- 8 Na deinnidh miann an aingidh uile,
O Thighearn nam feart;
'Ais-innleachd fòs na soirbhich leis,
nu'u dean iad uail 'nan neart.
- 9 Ach cinn an dream a chuairtich mi
gach taobh le tuailas bhreug,
Gu robh iad air am folach fòs
le ainhleas mòr am béil.
- 10 Orra gu'n tuiteadh eibhle loisgt';
tilg iad san teine beò;
An sìochdaibh domhain sloas, a chum
nach éirich iad ni 's mò.
- 11 Na daingnichear air talamh fòs
fear-labhairt uile a chaoidh;
Biodh oile a' sealg fìr-fòreignidh,
g'a leagadh is g'a chloaidh.
- 12 Is aithne dhomh-sa gu dean Dia
do'n dream ta 'n àmhghar goirt,
An eùis a sheasamh dhòibh gu treun,
is coir nan daoine bochd.
- 13 Do bheir na fireana gu dearbh
do t'ainn-sa moladh mòr;
Bithidh còmhnuidh bhuan a' d'fhanuis féin,
a Dhé, aig daoine coir.

SALM CXLI.

- O** DHIA, a ta mi 'g éigheach riut,
dean deifir thugam féin;
Is tabhair éisdeachd fòs do m' ghuth,
tráth ghlaodham riut a'm' fheum.
- 2 Mar bholtrach tuis a'd' lathair suas,
mar sin biodh m'urnuigh riut;
Is togail suas mo làmh, gu robh
mar 'n lobairt 'theagair dhuit.
 - 3 Cuir faire air mo bheul, a Dhia;
dorus mo bhéil-sa gléidh.
 - 4 Gu droch-bheirt, no gu oile air bith
na aom mo chridh', a Dhé:
Eagal le luchd na h-aingidheachd,
gu'n cuirinn oile an gnìomh,
Ge m'is blasd' an sògh 's an gleus,
cha'n ith mi féin maoin diubh.
 - 5 Buailleadh am firean mi le smachd,
gabhadh mi sin gu caomh;
Gabhadh mi naith an t-achumhasan,
mar oladh-phrìseil mhaoth;
Cha bhris am buailadh ud mo cheann:
oir fòs theid m'urnuigh suas,
Tráth bhios an altim ud gu truagh
'nan àmhghar cruaidh an sàs.
 - 6 Tráth thilgear sloas air clachaibh cruaidh,
am breitheamhna gu léir;
'N sin cluinnidh iad, oir 's millis binn,
deadh bhriathra grunn mo bhéil.
 - 7 Ar cnàmhán fòs m'g beul na h-uigh'
do sgaoileadh leo le tair;
Mar ghearrar is mar sgoltear fiodh
'na spealtaibh air an làr.
 - 8 Ach tha mo shùilean riutsa suas,
fèhobhah Dhia nam feart:
Na fag-sa m'anam bochd gun treidir,
's tu fèin mo dhòigh 's mo neart.

- 9 O teasairg mi o'n rìb', a Dhé,
a leag iad chum mo sgrios;
'S o hiontaibh luchd na h-aingidheachd
a dh'fholuich iad gun fhios.
- 10 Ach tuiteadh luchd na h-aingidheachd
'nan hiontaibh rinneadh leò,
Am feadh bhios nise gabhail thart',
's a' tèarnadh asta beò.

SALM CXLII.

- G**HLAODH mi ri Dia le m' ghuth; is fòs
le m' ghuth rinn m'urnuigh ris.
2 Mo chaoidh 'na fhianuis dhòirt mi mach,
's mo thrioblaid dh'fhoillsich mis'.
- 3 Tràth bha mo spiorad bàite stigh,
'n sin b'aithne dhuit mo cheum;
Sa' bhealach san do shuabail mi,
gun fhios do leag iad lion.
 - 4 Dh'amhairc mi air mo dheis, is dh'fheuch,
's cha robh fear m'èòlais ann;
No neich do m'anam bheireadh spéis;
thréig cabhair mi san àm.
 - 5 O Thighearna, do ghlaodh mi riut,
is thubhairt mi gun ghò,
Gur tu a's tèarmann dileas domh,
's mo chuid an tìr nam beò.
 - 6 Chionn gu 'n do chlaoidheadh mi gu truagh,
éisd ri mo ghlaodh san àm;
Is saor mi o luchd n'fhoirneirt mhòir,
oir 's treise leo na leam.
 - 7 A prìosan m'anam buin a mach,
t'ainm-sa gu molar leam:
Is iadhaidh umam fireana,
oir ni thu pailteas rium.

SALM CXLIH.

- R**I m'urnuigh éisd, is aom do chluas
ri m'atcheuinge, a Dhé;
A' d'fhirinn, is a'd' cheartas àrd,
gu gràmhòr freagar mi,
- 2 Na tionnsain ann am breitheanas
le tòglach dileas féin:
Oir 's dearbh nach saorar dìne beò
a' d'fhanuis ann am binn.
 - 3 Oir lean an nàmhaid eucorach
le tòir gheir m'anam bochd,
Mo bheatha thilg e sìos le tair,
leag ris an làr gun iochd:
Is chuir e mi an dorchadas
chum còmhnuidh ann gu truagh;
Is ionnan mi 's an dream gu dearbh
bhiodh fada marbh san uigh.
 - 4 Is uime sin tha m'anam bàit'
gu cràiteach ann am chom;
Mo chridh' a'm' chliabh gu muldach
air fàs gu tuisreach trom.
 - 5 Na làith' o chian do cluimhnich mi,
tair cnuasachadh gun tàmh
T' oibre gu léir; 's a smuaineachadh
air gnìomharaibh do làmh.
 - 6 Mo làmhhan shìn mi riutsa suas;
an geall tha m'anam ort,
Amhluidh mar bhitheas fearann cruaidh
air tìormachadh le tart.
 - 7 Eisd rium, a Thighearna, gu grad;
chaidh as do m'anam bochd:
Do ghnòis na ceil, chum nach bi mi
mar dhream theid sìos do'n t-slochd.
 - 8 Thoir orm gu'n cluinnear leam, gu moch,
guth binn do chaoimhnis-ghràidh;
Oir annad chuir mi féin gu mòr
mo dhòchas is mo dhòigh:
Am bealach fòs an gluaisear leam,
thoir orm gu'n aithnich mi:
Oir riutsa tha mi togail suas
mo spioraid thruagh, a Dhé.
 - 9 O m' naimhaidh guineach teasairg mi,
O Thighearn is a Rìgh:
A d'ionnsuidh theich mi fòs, a chum
gu foluich' leatsa mi.
 - 10 Do thoil a dheanamh teagnis dhomh,
oir 's tu mo Dhia gu beachd:
O's innidh do spiorad; treudruich ni
gu tìr na fireantachd.

- 11 Sgàth 'n'ainme beothaich mi gu treun,
a Dhé Iehobhah mhòir:
Sgàth t'fhreantachd, saor m'anam bochd
o thrioblaid ghoirt 's o leòn.
- 12 Cuir as do m' naimhdebh tre do ghràs,
is sgrios iad sin gu léir
A ta cur m'anam 'thruaigh fa leòn;
oir 's mise t'òglach féin.

SALM CXLIV.

- B**EANNAICHT' gu robh Iehobhah treun,
mo charraig e's mo threidh;
Mo làmh a theagaisgeas gu cath,
s gu comhrag mhaith mo mheibh:
- 2 Mo mhaith, mo dhion, 's mo bhaideal àrd,
mo shlànuighear, 's mo sgiath;
'Se cheannsaicheas mo dhaoine fo'm
mo mhuighinn is e Dia.
- 3 Dhia, ciod e'n duine, gu bheil thu
a' gabhail eòlais air?
No ciod e mac an duine fòs
gu'n d'thug thu e fa'near?
- 4 An duine, 's cosmhail e gu fìor
ri diomhanas gu stà;
'S a làith' mar sgàil, 's mar f'haileas fòs
a' gabhail seach a ta.
- 5 O' lùth, a Dhia, do fhlaitheis àrd,
thig fèin gu dàil a nuas:
Bean ris na sléibhtibh mòr' le d' neart,
is uath' théid deatach suas.
- 6 Cuir uait a mach do dhealanach,
is sgaoil iad sud air fad:
Is tlig a mach do shaigneigh geur',
is claidhear iad gu grad.
- 7 Sin uait do làmh á t'ionad àrd,
saor mi, is fuasgail orm,
O uisgilh làidir iomarcach,
's o làimh nan coigreach borb'.
- 8 Iadsan 'g am bheil an béil a' teachd
air diomhanas gach ló:
An deas làmh sud, is deas làmh i
làn iogain agus gò.
- 9 Dhuit seinneam dran nuadh, a Dhé,
's ann air an t-saltair ghriinn;
Air inneal-tiul nan teuda deich,
dhuit seinneam moladh binn.
- 10 'Se Dia a bheir do righribh mòr'
slàin' agus buaidh gu treun,
'Se shaoras Daibhidh 'òglach caomh
o'n chlaideamh mhillteach gheur.
- 11 Saor mi, is fuasgail orm o làimh
nan còinheach, 'g am bheil beul
làn diomhanais: 's an deas làmh fòs
'na deas làimh foill' is bréig'.
- 12 A chum gu'm biodh ar mic a' fàs
mar àr-chrann suas 'nan òig':
'S ar nigheana mar chlaibaibh snaidht'
an oisinn lùchairt mhòir.
- 13 Ar saibhlean làn do'n uile stòr;
ar treudan fòs a' breith
Nam miltean, seadh deich miltean fòs
'nar machairibh gach leth.
- 14 Ar daumh gu h-obair làidir calm,
gun bhriseadh mach no steach;
A chum 'nar sràidibh fòs nach biodh
guth caoidh' gu gearanach.
- 15 'S beannaicht' am pobull sin a ta
san inbhe so gu beachd;
'S beannaicht' am pobull fòs, d'an Dia,
Iehobhah Triath nam feart.

SALM CXLV.

- A**RDUICHEAM thu, mo Dhia, 's mo Rìgh;
t'ainn beannaicheam gu bràth,
Do t'ainn a' fèas bheir mise cliu;
àrdluicam thu gach là.
- 3 Tha Dia Iehobhah mòr gu dearbh;
ion-mhòla Dia gu mòr:
Cha'n f'heudar meud a mhòrachd-san
a rannsaichadh gu leòr.
- 4 Molaidh gach àl do ghlomhara
do'n àl a thig 'nan deigh;
Is t'òibre cumhachdach ro-mhòr
sior-chuir ear leò an cèill.

- 5 Urram do mhòrachd ghlòrmhoir fèin
cuiridh m'in cèill gu beachd;
Air t'òibreibh iongantach gu léir
labhran, a Dhé nam feart.
- 6 Labhraidh daoine' eile fòs air neart
do bhearta uamhasach:
Is mise foillsicheam gu mòr
do mhòrachd iongantach.
- 7 Is cuir ear leò an cèill gu pailt
ionradh do mhaithis mhòir;
Do cheartas glan, is t'ionracas
molaigh gu binn le ceòl.
- 8 Tha'n Tighearna ro-ghràsmhor caoin,
is làn do thruacantachd;
A ta e mall chum fèirg', is fòs
pailt ann an trócaireachd.
- 9 Is maith Iehobhah do gach dùll;
tha 'thrócair chaoimh gu beachd
Os ceann gach obair agus gnòimh
a rinneadh leis le neart.
- 10 Dhia, molaigh t'òibre thu air fad;
le d' naomhaibh molar thu:
11 Air glòir do rìoghachd labhraidh iad;
innsidh do neart le cliu.
- 12 A chum a bhearta cumhachdach
gu'n tuingadh clann nan daoine';
Gu bheil a rìoghachd làn do ghloir,
is mòralachd faraoine.
- 13 Do rìoghachd féin, is rìoghachd i
ta siorruidh buan gu beachd;
Is mairidh t'uachdranachd gu bràth
air teadh gach àil ri teachd.
- 14 Cumaidh Iehobhah suas le neart
an dream tha tuitcam sìos;
'S an dream tha claoanadh chum an làir,
togaidd e 'n àird a ris.
- 15 Tha dùile fòs gach dùll' air bith
a' feitheamh ort, a Rìgh;
Is tha thu anns na tràthaibh ceart
a' tabhairt dhoibh am bidh.
- 16 A ta thu ann ad thoirbheartas
fosgladh do làimh' gu mòr,
Is miann gach nìthe beò air bith
sasùichear leat gu leòr.
- 17 Tha Dia 'na uile shligheibh ceart,
is naomh 'na uile ghnìomh.
- 18 'S dlùth Dia do mheud 's a ghairmeas air;
seadh ghairmeas air gu fìor.
- 19 Deadh mhiann gach neach d'an eagal e,
còimhlionaidd e gu pailt;
Is éisdidh ean fòs r'an glaoth,
saoraidh e iad 'nan airc.
- 20 An dream tha tabhairt gràidh do Dhia,
dhoibh nì e tèarmunn deas;
Ach fòs na h-aingidh olc gu léir
do nì e féin an sgrios.
- 21 A' luaidh air cliu Iehobhah thréin,
bithidh mo bheul gu cheisd:
Ainn naomha beannaicheadh gach fòill,
gu siorruidh buan am feasd.

SALM CXLVI.

- D**IA molaibh; mol, O m'anam, Dia.
2 Molaidh mi Dia ri m'bheò;
Ard-seinnidh mise cliu do m' Dhia,
ri fad mo rè 's mo ló.
- 3 Na earbaibh is na deanaibh bun
á prionnsaibh làidir treun';
No fòs á mac aoin dùn' a t'ann,
's gun fhurtachd ann ri feunn.
- 4 Tha 'anail-san dol as a mach,
théid e g'a àir air ais,
Théid as d'a smuaintibh-san gu léir,
san là sin féin gu cas.
- 5 'S beannaicht' an duine sin 'gam bhòid
Dia Iacob mar a neart;
'G am bheil a dhòchas ann a Dhia,
Iehobhah Triath nam feart.
- 6 'Se chruthaich nìeamh, is muir, is tìr,
's gach aon nì ann ta;
'S e choimhdeas fìrin mar an ceudn
gu siorruidh is gu bràth.
- 7 Rì daoinibh ta fò t'òirneart mòr,
cumaidh e còir gu caoin,

Eheir bladh do'n oerach : cnlridh Dia
na prìosanach fo sgaol.

- 8 'Se Dia ta fosgladh sùil nan dall;
togaidh Iehobhah mòr
An dream a ta air cromadh sìos:
is caomh leis daoine còir.
- 9 Dia seasaidh bantrach 's dìlleachdan,
'se 's dìon do 'n choigreach ann:
Ach slighe fhlar nan daoine daoi
tilgidh e bun os ceann.
- 10 Bidh Dia 'na Ard-Rìgh mòr gu bràth,
do Dhia-sa, Shìon naomh;
O linn gu linn gu maireannach.
Molaidhse Dia gu caomh.

SALM CXLVII.

MOLAIBHSE Dia; oir 's maith bhi seinn
àrd-mholadh hinn d'ar Dia,

- Oir 's tlachdmhor e 's is maiseil sud,
bhi tabhairt cliù do'n Triath.
- 2 Suas togaidh Dia Ierusalem;
crùinnichidh e ri chèil,
An dream d'an d' rinneadh dìobarach,
do ghineal Israell.
- 3 Do'n aitim 'g am bheil crìdhe bràir',
bheir esan slàinte mhòr:
Is ceanglaidh suas gu faicilleach
gach cneadh ta orra 's leòn.
- 4 Na reulta lìomhbor àirmhear leis;
g' an ainmeachadh gu léir.
- 5 Is mòr ar Dia, 's is mòr a neart;
gun tomhas air a chèil.
- 6 Togaidh Iehobhah suas gu dearbh
na daoine clùn a ris,
Is leagar leis na daoib' le tair,
gu làr, 'g an tìgeadh sìos.
- 7 Seinnibh do Dhia Iehobhah mòr,
le buidheachas gu binn:
Seinnibh d'ar Dia-ne moladh àrd
air teud na clàrsaich grinn.
- 8 'Se dh'fhol'cheas nàmh le neulaibh thugh'
dh'ulluicheas uisge fòs
Do'n talamh; 'se bheir air an fheur
bhi fàs air sléibhtih mòr';
- 9 Do'n ainmhidh 's do gach beathach beò,
bheir esan lòn gun dìth;
Is do na sìthich òg' faran
a ghlaodhas 'g iarraidh bìdh.
- 10 An neart an eich cha hhi a dhùil,
ge mòr a lùth 's a theiris:
Cha ghabh e tachd an cosaibh fir
sheasas gu dìreach deas.
- 11 Tha Dia a' gabhail tachd gu mòr
do'n dream d'an eagal e,
Chuireas an dochas is an dòigh
'na thròcair-san gach rè.
- 12 Thoir moladh, O Ierusalem,
do Dhia Iehobhah mòr,
Do d' Dhia-sa tabhair moladh fìor,
O Shìon, mar is còir.
- 13 Cròlan-dhruididh fòs do dhòrsa mòr'
do neartaich e gu maith;
Is bheanaich e do shìochd gu léir
a'd' mheadhon féin a stigh.
- 14 'S e chuireas ann ad chriocheibh fòs
sìth agus sonas mòr:
'Se nì le smior a' chruthneachd ghloin
do shàsachadh gu leòr.
- 15 'Se chuireas 'aithne mach air tìr,
a' f'focal ruith gu luath.
- 16 Eheir sneachd mar olainn; sgaolaidh e
an liath-reodh mar an luath.
- 17 Leac-eighe tilgidh e a mach,
mar ghreamanna nach gann;
Is anns an fhuachd a rinneadh leis,
cò dh'fheudas seasamh ann?
- 18 Cuiridh e 'f'focal mòr a mach,
is leagar iad a ris:
Air seideadh dha le gaolh an sin,
sruthaidh na tuille sìos.
- 19 Do Iacob tha e fòillseachadh
a bhriathar fìorghlan naomh,
A statuin is a bhreithanas
do Israel gu caomh.

- 20 So maithas nach do dheònaich e
dh'aon chinneach ta fo'n ghreim:
A bhreithanas cha 'b'aithe dhoibh.
Molaidh Iehobhah treun.

SALM CXLVIII.

MOLAIBHSE Dia. Àrd-mholaidh fòs
Iehobhah mòr gu bràth,

- O nàmh nan speur; molaidhse Dia,
sna h-ionadaibh a's àird'.
- 2 Uil' ainge Dhé, mòr-mholaidh e:
molaidh e, shluagh gu léir.
- 3 O ghrian 's a ghealach, molaidh e
's a reulta glan nan speur.
- 4 O nàmh àrd' nan uile nàmh,
is uisgeachan a ta
An còmhnuidh shuas os ceann nan speur,
molaidhse Dia a ghnàth.
- 5 Thugadh iad cliù is moladh binn
do airm Iehobhah thréin;
Oir chuir e 'aithne mach le neart,
is rinneadh iad d'a réir.
- 6 Do rinn e fòs an daingneachadh
a chum bhi buan a ghnàth:
Is chuire statuin orra sud
nach téid air chùl gu bràth.
- 7 O'n talamh fòs a ta fo nàmh,
molaidh Iehobhah treun;
Uil' dhràgona ro-namhasach,
's a dhoimhneachda gu léir.
- 8 Tein'-athair agus clach-sheachd chruaidh,
an ceò théid suas, 's an sneachd;
Gaoth dhoimhonnach a' còmhlonadh
a bhriathar-san gu beachd.
- 9 Na sléibhte farsuinn atmhòr mòr',
's na tulaich fòs le chèil:
Gach craobh bheir toradh agus blàth,
's na seudair àrd' gu léir.
- 10 Gach beathach, ainmhidh, is gach dùil
a sùnaigeas air an làr,
's gach eunlaith sgiathach iteagach,
ta 'g itealaich gu h-àrd.
- 11 Gach rìgh air thalamh, làidir mòr,
's gach pobull fòs air bìth;
Na prionnsan is luchd breitheanas
tha thar gach tìr fa leth.
- 12 Na h-òig-fheara ta calma deas,
's na mairgheana le chèil;
Na seanaire ta eòlach glie,
's gach leanabh òg' gu léir.
- 13 Ainm Dhé àrd-mholadh iad, oir tha
'ainm-san a mhaìn ro-mhòr:
Os ceann na talamhainn is nan nàmh
air àrdachadh tha 'ghloir.
- 14 Adharc a shluaigh leis àrdachear,
seadh cliù a naomh gu léir,
Sluaigh Israell, tha dhasan dlùth.
Molaidh Iehobhah treun.

SALM CXLIX.

MOLAIBHSE Dia: is òran nuadh
seinnibh do Dhia gu caomh;

- Seinnibh a mholadh-san gu binn,
an còmhthional nan naomh.
- 9 Biodh Isra' a' aobhneach ann an Dia;
an Tì a chruthaich e;
Deanadh clann Shìoin gairdeachas
'nan Rìgh air feadh gach rè.
- 3 Is anns an dannsadh thugadh iad
d'a ainm-san moladh binn:
A chliù le tiompan seinneadh iad,
is leis a' chlàrsaich ghrinn.
- 4 Oir tha Iehobhah gabhail tachd
'na phobull dìleas féin:
Ro-sgiamhach fòs le 'shlainte nì
na daoine seimh gu léir.
- 5 Biodh air na daoineibh naomh' an ainm
ùr-ghairdeachas an glòir:
Is air an leabaidh seinneadh iad
do Dhia le h-iolaich mhòir.
- 6 Gu'n robh àrd-clìu an Tighearna
gu dìgheach ann am beul:
Is ann an àmhaich fòs gu roth
claidheamh dà-fhaobhair gear

- 7 A chum gu deant' air fìneacbaibh
làn-dìoghaltas gu léir:
's mar an ceudna air na slòigh
an-sinachdachadh gu geur.
- 8 A chum gu'n deant' an rìghrean-san
a chur fo chuibbreich ghéir;
Fuidh gheibhthibh teann do'n iarunn chruaidh
an uaisle mòr' gu léir.
- 9 Chun dìoghaltas a chur an gnìomh,
ta sgrìobht' 'na fhocal ceart:
So clia nam fìreanach gu léir.
Molaibhse Dia nam feart.

SALM CL.

- M**OLAIBHSE Dia. 'Na theampull naomh
molaibhse Dia gu mòr:
An speuraibh àrd' a chumachd fòs
molaibh e mar is còir.
- 2 Air son a ghnìomhara ro-threun,
molaibhse Dia 's gach àit;

- A rèir a mhòrachd molaibh e,
's a ghlòir a ta ro-àrd.
- 3 Le guth na trompaid mar an ceudna'
molaibhse Dia gu binn:
Air clàrsaich seinnibh moladh dha,
is air an t-saltair ghrinn.
- 4 Le tiompan thugaibh moladh dha,
san dannsadh mar an ceudn';
Le organ togaibh suas a cblu,
's le inneal-ciùil nan teud.
- 5 Air ciombalaibh ta làbhar linn
molaibhse Dia gun tàmh:
Molaibhse Dia air ciombalaibh,
ni toirm is fuain ro-àrd.
- Gach uile dhùil sam bith ta beò,
6 'g am bheil an deò 'nan crè,
Àrd-mholadh iadsan Dia gu mòr,
Molaibh Iehobhab treun.







